

New Testament

Nocte, Naga Language

Nocte, Naga - Bible - New Testament

Mathiu	3	
Mak	107	
Luk	174	
Jon	287	
Moatlem	369	
Rom	472	
1 Korint	519	
2 Korint	566	
Galatien	596	
Ifisien	612	
Filipien	628	
Kolosien	639	
1 Thisalonika	650	
2 Thisalonika	660	
1 Timothi	665	
2 Timothi	678	
Titas	687	
Filimon	693	
Hibru	696	
Jems	730	
1 Piter	742	
2 Piter	754	
1 Jon	762	
2 Jon	774	
3 Jon	776	
Jud	778	
Loatkhesok	782	



Nocte, Naga - Bible - New Testament

Mathiu

Mathiu 1

Jisu Krista Te Awa heh

(Luk 3.23-38)

1Arepa Abraham Chha, ngale Devit Chha, Jisu Krista te awa heh nginkong.

2-6aAbraham tōpumma Devit Lowang tōko, te awa heh areheh dāngwah: Abraham, Isak, Jakob, Juda ngale ate pho anaa heh; erediko paraz ngale Zera (thin nyongpa Tama dāngwah), Haran, Ram, Aminadab, Nason, Salmon, Boz (ate nyong pa Rahab dāngwah), Obad (ate nyong pa Rut dāngwah), Jisi, ngale Devit Lowang.

6b-11Devit Lowang tōpumma chenthu Isrial mihnyan heh Babilon nāng chēmsiet rāng sietkattah tōko te awa heh areheh dāngwah: Devit, Solomon (ate nyong pa Uria tangnyu dangtah dihiaknyu pa dāngwah), Rihobom, Abija, Asa, Jihosapat, Jihoram, Uzia, Jotham, Ahas, Hizikia, Manisa, Amon, Josia ngale Jihochin ngale ate pho anaa heh.

12-16Babilon nāng chēmsiet rāng sietkattah tōpumma Jisu Chhat sanpoat tōko te awa heh areheh dangwah: Jihochin, Saltial, Zirubabal, Abuid, Iliakim, Ajor, Jadok, Achim, Iluid, Iliajar, Mathan, Jakob, ngale Josep, Josep pa Misaia ngama roeoka Jisu nyong Mariam keptepa.

17Abraham tōpumma Devit tōko echhi roanbelii, Devit tōpumma Babilon nāng chēmsiet rāng sietkattah tōko echhi roanbelii, Babilon nāng chēmsiet rāng sietkattah tōpumma Krista tōko echhi roanbelii dāngwah.

Jisu Krista Chhat

(Luk 2.1-7)



¹⁸Jisu Krista chhat pa aroh dângwah. Ate nyong Mariam pa Josep demnâng kepâmînrâng ngama kahkhetmîn wah, rohkomin ateni roamsông mako Mariam ma Asâthôanju wah naawun lahma dângwah.

¹⁹Mariam tangwa Josep pa toangtang mihnyan dâng phumma, Mariam nok atang mako rêse chothuk lehunma; atema ahuh chhama chiakpherâng themawa wah.

²⁰Josep ma aroh themawa poatko, Teso ngintatte kalahma Josep nâng metmãngnâng ngatkatwah, “Josep Devit chha, Mariam pa nang tangnyurâng keprâng nekchei. Chenrângma ngako atema wun eka naapa Asâthôanju chaanma wun eka.

²¹Atema delachha echha a, ngale nangma ate mînpa Jisu ngama mînmin - Chenrângma ngako atema ate mihnyan heh papwah pepângmin.”

²²Joban ma Mông hehnâng jabthuktah nginpa toangtang dângkatrâng arepa dangeka,

²³“Janchhôsâ ma naawun lahma delachha ehongchha a, ate mînpa Imanuel ngama mînmin” (Are ngaeka pa, “Joban pa nângdemnâng ngaeka”).

²⁴Josep jupwah satlahma, Teso ngintatte ma chenroh chientah a ererângrâng, atema Mariam ate tangnyu râng kepwah.

²⁵Rohkomin Mariam ma atechaa delachha pa chhatmako Josep ma Mariam nâng ate tangnyu rângrâng keplahma roamjup ho. Ngale Josep ma Jisu ngama mînwah.

Mathiu 2

Sankat ngewah Naachha Sokhokte

¹Hirod pa Lowang danglahma pên sanpoatko, Judia diakwah Bethlehem hahnâng Jisu chhatwah. Erediko lemlienma, sankat ngewah mihnyan khuthe meritnâng sùlahma jienjette heh Jeroselem nâng hokwah



²Thinma thôngphâ wah, “Jews heh Lowang rãng chhaeka naapa chenkoa? nima ate merit pa sankatnâng hong lahma khetih, erohwah nima Atenâng soamtô rãng kaerii.”

³Chenthu Hirot lowang ma aroh chohtat diko, ate nyahrãng hungkê wah, ngale Jeroselem wah mihnyan hehmin anga nga ate demnâng hungjohkê wakwah.

⁴Atema chentô soam aroakte adong ngale Niemarang hethôte heh aroamma khôanroo lahma thôngphâ wah, “Misaia pa chenngê nâng chhatmin a?”

⁵“Judia diakwah Bathlehem hahnâng chhatmin,” ngama dânthâng wah. “Chenrãngma ngako Mõng heh ma aroh raangwah:

⁶“Judia diakwah Bathlehem, Nanga Judia diak kowah arinchha thôn dangmoh; Chenrãngma ngako lemsênte pa nangwah hôngmin, atema nga mihnyan Isrial heh epên a.’ ”

⁷Ephumma Hirot ma sankatwah jet ajien mihnyan hutah heh ahuh chhama khôanroo lahma, merit hongtah sanpoat pa jetloatwah.

⁸Erediko atema aroh thôko lahma Bathlehem nâng chienkatwah: “kaletma naachha pa lemsûka en, mechoh khetetko, ngamemin Atenâng rangsoam katrãng, ngakthô wãngkohha.”

⁹⁻¹⁰Thin erethe kowah loatchhoan ko, thinma sankat ngenâng khetah merit pejô thinma lemko khewah. Chenthu thinma ere merit pa khe phumma nyahrãng khuhah nâhah, rinroan bahsa dângwakwah! Ngale ere merit pa naachha punko matang tangjek thin mamako wãngwah.

¹¹Humkhenko nyupwãng waklahma, naachha pa ate nyong Mariam demko chohkhe wah, phumma dakuhto waklahma Atenâng soamwakwah. Erediko mâmâ tống dok lahma Atenâng hínhô chohkoh wah, Kem, Frankinsen (Arepa bãngkhoan, wennâng tûmthhekli) Myrh (Arepa seknâng tûmhutli tien, nyahrãng thâchaanjat).



¹²Metmãngnâng Hirot tânâng nekngak wãngen ngama Joban ma ngatjunko, thin diaknâng lemhanma ngakwâng wakwah.

Igip nâng Huhtôngkat

¹³Thin chhoan diko, Teso ngintatte ma metmãngnâng Josep nâng ngatwah, “Hirot ma naachha pa ritphe rãng ephoang lemsûa. Erohwah sat o, naachha ngale ate nyong sietlohma Igip nâng huhtongka en, ngama enângwah chhoan en ngama mathô thôkohko enâng tongen.”

¹⁴Ephumma Josep toansat lahma, naachha le ate nyongnii sietlahma, rangpen penko Igip nâng katwah,

¹⁵Hirot mariirii thin enâng sôngwah. Arepa Teso ma Mông hehnâng jabthuktah nginpa toangtang dângrãng moatwah, “Ngama ngachha pa Igip wah eloatroo ang.”

Naachha heh Ritphe

¹⁶Sankat wah hokkte hehma nganâng lâdiapchhah thang ngama Hirot ma thonghun lahma, ate nyahrãng rinkhah wah. Phumma atema Bathlehem ngale kêanâ hah hehwah pânii pumma leta chentô delachha heh ritphe rãng chienwah - Arepa atema merit hông nginpa sankatwah hûtah mihnyan hehwah chohtattah sanpoatma weih lahma ritphewah.

¹⁷Ephumma Mông Jirimia ma jabtah nginpa toangtang dângwah:

¹⁸“Rama hahnâng tin alîn tat ekang, nyahrãng chhihsep lahma tat ekang. Rachel ate chha hehrãngma sep eka; atea mihma jekdiap komin jekmah, chenrãngma ngako ate chha heh riiwak eka.”

Igip wah Ngakwâng

¹⁹Hirot ritdiko Teso ngintatte ma Josep nâng Igip diaknâng sôngthuko metmãngnâng ngatwah

²⁰“Sat o, naa le ate nyongnii sietlohma, Isrial diaknâng ngakwãngen, chenrãngma ngako naachha ritphe rãng phungtepa riitah.”

²¹Ephumma Josep toansat lahma naa le ate nyongnii sietlahma Isrial diaknâng ngakwâng wah.



²²Chenthu Josep ma Achitas pa atewa litko Lowang danglahma Judia diak pa pên eka, ngama tatphumma Josep enâng wângrăng chei rewah. Rohkomin ate metmãngnâng thôkoh phumma, Galilijaa nâng wângwah.

²³Ngale ate Nazarat hahko sôngwângwah. Ngale mông heh ma jabtah pa toangtang dângwah: “Atenâng Nazaren ngama roomin.”

Mathiu 3

Jon Baptisma Joban Ngin Phoangthô

(Mak 1.1-8; Luk 3.1-18; Jon 1.19-28)

¹Ere sanpoatko Jon Baptisma Judia wah sehah nâng hûlahma Joban ngin bengphoangthô wah.

²Atema ngatwah, “Nepap hehwah hungngaklit en,” “chenrăngma ngako, rangkethung Hahsông pa lânam hûtha!”

³Jon pa Isaia Mông ma thôtah mihnyan pa dângwah “Sehahkho nâng wathe mihnyan rakeka, “Teso răngma lem hôankoh en; Ate khôm răng lemtin hôankoh en!” ”

⁴Jon khetpa Ut banwah hôanwah; ate roam tumlitko ngemkhoan roamdit pa dit rewah, ngale ate phhekchhah pa kupchhang ngale wunnyahti heh dângwah.

⁵Jeroselem wah, Judia diak chentôwah, ngale Jordan jokêm nâng sôngte chentô mihnyan heh Jon tânâng hokwah.

⁶Mihnyan heh ma thinma chentô pap motah heh loatthô rewah, ngale Jon ma thinnâng Jodan joko baptijem kohwah.

⁷Jon baptisma ate tânâng Farasi le Saduki heh jahmông baptijem keprăng hok khelahma, thinnâng ngatwah, “Pû heh - Joban ma chêmchei hokthukrăng ngaeka kowah etape en ngama henma thôkoh ehèn a?”

⁸Nea papwah hung lâlittet ngama khesokli moatlem mo en.



⁹Abraham pa nite niwa dângwah ngama ngatko Joban rinkhah thunwah tape e ngama nekthonghun en. Ngama nenâng thôkoh eka, Joban ma are long hehwahmin Abraham chhuchha rãng tahôan a!

¹⁰Wâka pa bângrin khohko thien lahma tonga, penri leribãng chentôpa bângrin thongma runjoat lahma wennâng thhekmin.

¹¹Ngama joma hunglit rãng baptijem koheka, rohkomin ngadiko nganoma bâmbâm adong wathe ekara; nga a ate dapheng sêmkoh rãngjô punmek. Atema Asâthôanju ngale Wenma baptijem ekohhèn.

¹²Ate chhah chaaprãng ate dekko wenkhoang sem eka, chhahsek sekpa pumko ekhânthien a, ngale chhahphathoak heh chenthujô lemut wenko erokthhek a.”

Jisu Baptijem kep Ngin

(Mak 1.9-11; Luk 3.21, 22)

¹³Ere sanpoatko Jisu Jordan joko Jon wah baptijem keprãng hokwah.

¹⁴Rohkomin Jon ma aroh ngalahma lenyok dângwah, “Nganângjô nangma baptijem kohmin dângwah,” “phumma nanga ngawah baptijem keprãng kaeroa!”

¹⁵Phumma Jisu ma Atenâng dânthâng wah, “Athângheh rãngma arohjô chendanga, Joban ma huneka moatlem pa nãngma arohjôba moatmin.” Erediko Jon ma Jisu nâng baptijem kohwah.

¹⁶Jisu baptijem kepdiko jokowah loatkhôam wângwah. Erediko rangkhethung pa Atenâng laangkohwah, ngale atema Joban Jupa wochha rãngrãng kalahma ate khoko tôngkat khewah.

¹⁷Ngale rangkhethung wah jabkhab hongjab katwah, “Arepa ngachha, ngama Atenâng nyahrãng hun ekang, Ate demnâng nga nyahrãng rinme ekang.”

Mathiu 4

Jisu Hungtôan

(Mak 1.12, 13; Luk 4.1-13)



¹Erediko Juma Jisu lindong lakdong nâng juchhih ma hungtôanrăng sietchhoan wah.

²Ngih roakbelii pen roakbelii lephhek lechhah thangma tôngdiko Jisu rêmritwah.

³Ephumma Jisu tânâng juchhih pa hûlahma ngatwah, “Nanga Joban Chha medang oko, are longheh nâng phhekchhah rãng litjârăng chien o.”

⁴Phumma Jisu ma dânthâng wah, “Joban nyapraangma aroh ngaeka, ‘Mihnyan pa phhekchhah junma lolo hîn dangmah, Joban thunwah chentô loatjab eka jabkhab heh junmaba hineki.’ ”

⁵Erediko juchhih ma Jisu Asâthôn Hahdaang, Jeroselem hahko sietkat lahma, Rangsoamhum khokowah achoang thônko sietwênwah,

⁶ngale Atenâng ngatwah, “Nanga Joban Chha medang oko, nangdede arekowah jârii katan, chenrăngma ngako Joban nyapraangma ngaeka, ‘Joban ma ate ngintatte hehnâng nangrăngma echien a; thindekma nang etânglo wak ho, Ephumma nangda min longko lebhurii thangma edango.’ ”

⁷Jisu ma dânthâng wah, “Rohkomin Joban nyapraangma arohmin ngaeka, ‘Teso nang Joban nâng hung nektoan.’ ”

⁸Erediko juchhih ma Jisu nyahrăng hahkongchoang khonâng sietwên lahma hahtokkhoh wah hahsông hahdaang asen chentôpa Atenâng khesokwah.

⁹Juchhih ma ngatwah, “Nangma nganâng dakuhto lohma rangmesoam hangko,” “are chentôpa ngama nangnâng koh e.”

¹⁰Eko Jisu ma dânthâng wah, “joak, chhoan o!, Joban nyapraangma ngaeka, ‘Nang Joban Teso nâng soam o, ngale atelolo soangraango!’ ”

¹¹Ephumma juchhih ma Jisu thînphêwah; ngale Joban ngintatte kalahma Jisu nâng chohsok katwah.

Jisu ma Ate Moatlem Galili nâng Bengmoat

(Mak 1.14, 15; Luk 4.14, 15)



¹²Chenthu Jisu ma Jon phâtek nâng loatsekpa tatphumma, ate Galili nâng katwah.

¹³Ate Nazarat nâng letong thangma, Jubulon ngale Napthali jaawah Galili josi kahwah Kaparnam hahnâng sôngkatwah.

¹⁴Arepa Mông Isaia ma jabtah nginpa toangtang dângkat rãngma hânwah:

¹⁵“Jubulon ngale Napthali jaa, josi nâng katlem kêmko, jordanjo ranka nâng, Galili, Jews ledangte heh hah!

¹⁶Rangnyek khennâng sôngte mihnyan heh ma nyahrãng wenphiak dong echokke wak a. Arit amahthin rangnyek hahnâng sôngte mihnyan heh khohnâng wenma ephiakkat a.”

¹⁷Ere sanpoat pumma Jisu ma Joban nginkong bengphoang thôwah: “Ne papwah hunglit en, chenrãngma ngako rangkethung Hahsông pa lânam hûtha!”

Jisu ma Ngahloatte Wabelii Roo

(Mak 1.16-20; Luk 5.1-11)

¹⁸Jisu Galili josikem jêngjêngma khoampoatko, Atema ngahloatte pho anaa wanii khewah, Simon piter ngale ate naa Andru, josiko chaakma ngahhat dângwah.

¹⁹Jisu ma thinnâng ngatwah, “Ngadijun ha, ngama mihnyan loatrãng hethôa.”

²⁰Lemlienma thinchak pa thinphe lahma Jisu dijun wakwah.

²¹Noangthe wângko pho anaa wanii, Jems ngale Jon, Jibidi chha wênkhe wah. Thin a khôankhoko thinwa demko chaak senphin lahma dângwah. Eko Jisu ma thinnâng roowah,

²²Lemlienma khôankho ngale thinwa phethien lahma Jisu dijun wakwah.

Jisu ma Hethô, Phoangthô, ngale Khoanchet Mesiet

(Luk 6.17-19)



²³Jisu ma Galili jaatang nâng phoangkhoam lahma Sanagog hehnâng hethô, Joban Hahsông Nginkongsen pa phoangthôkoh, ngale jatrup khoanchet, khun atamte heh mesiet rewah.

²⁴Ate nginpa Siria diak phangtangma chohtat wah, ephumma mihnyan hehma jatrup khoanchette, khunte: juchhih lupte mihnyan heh, wobuh, kôasôte heh - ate tânâng siethû kolahma atema mesietwah.

²⁵Jahmõang mihnyan heh atediko Galili ngale Dekapoli, Jeroselem, Judia, ngale jordanjo rankawah jahmõang mihnyan hehma ate dijun wah.

Mathiu 5

Hahhokho nâng Joban Nginthô

(5.1-7.29)

¹Jisu ma mihnyan heh jahmõang khelahma atea hahhokho nâng wângwah, ngale ereko tângwângwah. Eko ate dijunte heh ate tumlit khôanhok wah,

²Ngale atema thinnâng hethô wah:

Alinlin Khuhah

(Luk 6.20-23)

³“Ju rãngma numrii lahma sekma patritte mihnyan heh rangkepte dângmin; Rangkhethung Hahsông pa thinthiak!

⁴Athângheh seblahma tângte mihnyan heh rangkepte dângmin; Joban ma thinhung esenthuk a!

⁵Numnene dângte mihnyan heh rangkepte dângmin; Joban ma toamsem tahpa thinma echoh a!

⁶Joban ma chenni huneka ere moatlem pa henma ajahthôn moatrãng huneka ere mihnyan pa rangkepte dângmin; Joban ma thinhung nyahrãng esenthuk a!

⁷Mihnâng mînchente heh rangkepte dângmin; Joban ma thinnâng emînchen a!

⁸Hungsâ rinsâte mihnyan heh rangkepte dângmin; Thinma Joban echohkhea!



⁹Mêmo dângrãngma moatlem moatte heh rangkepte dângmin; Thinnâng Joban Chha ngatmin!

¹⁰Joban ma chenni huneka ere moatlem moatjunko mihnyan hehma chêmthuk eka heh rangkepte dângmin; Rangkhethung Hahsông pa thinrãng!

¹¹“Chenthu mihnyan ma jôjêm, chêmthuk, ngale ne khohnâng khoanglep methôako, nea rangkepte dângmin, chenrãngma ngako nea ngadijunte.

¹²Khuhah nâhah dangen, chenrãngma ngako rangkhethung nâng nerãngma nyahrãng hinhô dong thienko lahma tonga. Erohjôba nemawah Mông dangtah hehmin chêmthuk wah.

Sum ngale Wenphiak

(Mak 9.50; Luk 14.34, 35)

¹³“Nea mihnyan nyuchha rãngma sum rãngrãng. Phumma sumko wah sumtupa mesejâ tahko, erepa ngaktû sietrãng lihân lemkhô ahotu. Erepa mahto lâdangtah, petphe lahma mihnyan dakhen nângba ewoatnek tûa.

¹⁴“Nea hahtokkhoh rãngma wenphiak rãngrãng. Hahho kowah hahsôngpa chenthumin leta bintângmin.

¹⁵Henmejô wentitpa toaklahma khokkhenko sekma; humkhen kowah sângte chentô nâng khêmphiakrãng, wentit toakthinko etoak a.

¹⁶Ererãngrãng newen pumma mihnyan heh mathahko phiak en, erohkoba nema moatlemsen moeken pa khelahma rangkhethung wah newa Joban nâng erôwak a.

Niemarang junma Hethô

¹⁷“Ngama Mosa Niemarang ngale Mông hehma hethôthen heh chhihsiet rãng kaera ngama nekthonghun en. Ngama ereheh chhihsiet rãng kat dangmek, thinma hethôthen heh toangtang dânghukrãng kaerâng.

¹⁸Thonghun en rangle hah chentô lektong eka, eretôko Niemarang nyapraang kowah phathemin ngale phatû chhamin lemahmin - chentôpa toangtang madang dangkako lemahmin.



¹⁹Erohwah, henhenma Niemarang kowah moatrãng chieneka arinthôan moatlem pa lemo thangma mihnângmin eroh lemorãng hethôeka, erepa rangkethung nângmin arinthôanrãng hôanmin. Ngale henhenma Niemarang kowah chieneka moatlem pa phangtang molahma mihnângmin eroh moatrãng hethôeka, erepa rangkethung nângmin adong thôanrãng hôanmin.

²⁰Erohwah, ngama thôkoh eka, Niemarang hethôte le Farasi heh noma toangtang dangletma Joban ma huneka moatlem pa memo enkoba nemin rangkethung nâng tâwâng min.

Rinkhah junma Hethô

²¹“Khemako mihnyan hehnâng aroh thôkohpa nema tattet, ‘mih leritphe min; henhenma mihritphe eka erepa metloat thinnâng athe ngama loatmin.’

²²Phumma athângheh ngama nenâng thôkoh eka: Henma komin ate pho anaa demnâng rin mekhah ako ate nângmin athe loatmin, ngale henhenma ate pho anaa nâng, ‘nanga chenrãngjô senmoh!’ ngaeka atemin ngoang awang heh tânâng metloatrãng siethokmin, ngale henhenma ate pho anaa nâng nanga aba mahto ngaeka, atemin papwen nâng khâmrit katmin.

²³Erohwah nang hínhô pa rangsoamhum wah joapsoaphthin chaamko thienko lohma Joban nâng rangsoam rãng ngatko nangpho anaa demwah nang kietnoat pa mechhem hun oko,

²⁴Nang hínhô pa joapsoaphthin chaamko phethien o, ngale lemlienma ngakka lohma nangpho anaa demnâng ngaksen mînka mêngo, erediko ngakwãng lohma nang ngewah hínhô pa Joban nâng kohwãngo.

²⁵“Henma komin nangnâng athe lolahma metloat thinnâng mesiethû hoko, metloat thithe hokmako lemko nginpa phenthômîn o. Metloatthin theko mehûsiet thoko, metloatte heh deknâng ekohho, ngale atema sipâhi deknâng kohlahma phâtek nâng esekho.

²⁶Ngama thôkoh eka, nema chêngpa phangtang mata tathum eretheko etongen.

Mihdihiak Dela Kaamchhih Moat junma Thôkoh



²⁷“Nema aroh ngatah pa chohtattet, ‘Mihdihiak dela kaamchhih nekmo en.’

²⁸Rohkomin athângheh ngama thôkoh eka: Henma komin dihiaknyu nâng phetwan jebjeb sũeka, ate hungnâng ere dihiaknyu demko kaamchhih lâmotah.

²⁹Erohwhah ne dekchahnge mitma pap medangthuk hênko, ne mitpa loatletma petphe en! chenrângma ngako nephoang phangtang pap wendônâng khâmritkat noma, nephoang wah chupthe chhihjâ peba ajahthem asen edanga.

³⁰Nedek dekchah pumma pap medangthuk hênko, thahdoak letma petphe en! chenrângma ngako, nephoang phangtang papwendô nâng khâmritkat noma, dekka aho peba ajahthem asen edanga.

Dihiak Chiakphe junma Thôkoh

(Mathiu 19.9; Mak 10.11, 12; Luk 16.18)

³¹“Khema nâng arohmin ngatwah, ‘henhenma ate tangnyu chiakphe eka, atema chiakphe nyapraang pa chenraangkoh a’.

³²Rohkomin athângheh ngama thôkoh eka: Delama ate tangnyu pa mihdela demnâng kaamchhih moatjun wah ledang chiakphe lahma dihiak pa dela hânânâng mengakwâng ako, atema dihiakpa mihdemnâng kaamchhih lâmo thuktah, ngale ere dihiak kepte pummemin kaamchhih lâmotah.

Toamsem junko Hethô

³³“Khema nâng mihnyan hehma aroh thôkoh pa nememin chohtattet, ‘Nema toamsem eken pa nekse en, Teso demnâng chenni moatrâng toamhoantet a erepa mo en.’

³⁴Rohkomin athângheh ngama thôkoh eka: chenthumin toamsem letma kah nekkhetmîn en. Rangkhethung mîn chhehlet memin neksem en, chenrângma ngako erepa Joban tângthin;

³⁵Hahtokkhoh mîn chhehlet memin neksem en; chenrângma ngako erepa Joban danekthin; Jeroelem mîn chhehlet memin neksem en, chenrângma nga erepemin Lowangdong heh sângthin hah.



³⁶Nedede khophang mîn chhehlet memin neksem en, chenrãngma ngako, nema nedede khochoo lathemin taposietmet ngale tanyeksietmet.

³⁷Erohwah, ‘danga’ ba ‘dangmah’ ngama lolo nga en, nema erenoma jabkhab bâm mejab enko erepa juchhih ngewah jabeken.

Phuhlit junko Hethô

(Luk 6.29, 30)

³⁸“Nema aroh ngat pemin chohtattet, ‘Mit phuhpa mitma litmin, ngale pâ phuhpa pâma litmin.’

³⁹Rohkomin athângheh ngama thôkoh eka: henma komin nerãngma kaamchhih memokoh hênko, thinrãng nekngak chhihmokoh en. Henma komin ne thhenchah ko mewat hênko, thhenhit komin watthuk en.

⁴⁰Ngale henma komin ne chhemchong nyenkep hunma metloat thinnâng mesietchhoan hênko, ne kut pemin koh en.

⁴¹Erediko henma komin nenâng meethe laang hênhên choanrãng mekhetlo hênko, meenii laang hênchhoankoh en.

⁴²Henma komin newah sêmmak metha hênko, ate nãngkoh en; ngale henma komin newah sêmmak menêm hênko nênthuk en.

Neran hehnâng Hun en

(Luk 6.27, 28, 32-36)

⁴³“Nema aroh ngat pemin chohtattet, ‘Ne lemruçha ko hun en, ngale neranko mitchek en.’

⁴⁴Rohkomin athângheh ngama thôkoh eka; neranko hun en, ngale nechêmsiette rãngma rangsoam koh en,

⁴⁵Eroh koba rangkethung wah tângte ne Wa Joban Chharãng eta dangen. Chenrãngma ngako, Atema sanpa mihnyan chhih mihnyansen chentô nãng khoakthe sahthukrãng hânêka, ngale rangpat pa kaamchhih moatte le kaamsen moatte waniinii rãng hânêka.

⁴⁶Joban ma chenni rãngma rang ekohhên a, nenâng hunte mihnyan kololo nema mengak hun enko? eroh Pete thãkho thâte mihnyan hehmemin moeka!



⁴⁷Ngale ne lemruçha nânglolo merânjab enko, mihhan noma çenpa bâmsen moeken a? Ererângrâng pete Joban lejette mihnyan hehmemin moeka.

⁴⁸Rangkhethung wah ne Wa Joban pa asen dangeka rângrâng nemin asen dangen!

Mathiu 6

Mihnâng Chohsok Moatlem Moat Junko Hethô

¹“Nema mihnâng chohsok moatlem memo enko mihhehma çenkhehi ngama thonghun letma nok atang çhangko nekmo en. Nema ere moatlempa mihmathah ko memo enko, nema rangkhethung wah newa Joban wah çenjô leçohmin.

²“Eroh wah çenthuh nema tangçhih hehnâng çenni komin meçohsû enko, ahuhkhoanglep hehma rangsoamhum ngale noknyu lemdong hehnâng phoang khesok lahma moat rângrâng rânghôrii letma nekmo en. Thinma arepa mihhehma rânghô çenrehi ngama moeka. Ngama linlin thôkoh eka, thinma çohthinpa phangtang râçhohtah.

³Rohkomin nema tangçhih hehnâng meçohsû enko, ne lemruçha asenthôan pummemin lejetli mo en.

⁴Nema çohsû eken pa henmejô lejetli mo en. Eroh koba nema ahuh çhama, moeken pa ne Wama, khelahma erethã nenâng rang ekohhên.

Rangsoam junko Hethô

(Luk 11.2-4)

⁵“Çenthuh ne rangsoamko, ahuhkhoanglep heh rângrâng neksoam en! thinma anga ngama çenkhem khehi ngama, rangsoamhum nâng toançep lahma soamhun eka, ngale noknyu lemdong hehnâng soamhun eka. Ngama linlin thôkoh eka thinma çohthinpa phangtang râçhohtah.

⁶Çenthuh nema rangsoamko, humkhen nâng wângletma kêsek sekletma mitma lekhe ne Wa Joban nâng soam en, ngale ne Wa Joban ma ahuh çhama moatpa khelahma nenâng rang ekohhên.



⁷“Chenthu nema rangsoamko, Joban lejette heh rãngrãng, sekhota jabkhab heh nekmenjab en, thinma ranglo soamdi Joban ma echohtat hi ngama thonghun eka.

⁸Thin rãngrãng nekdangen. Ne Wa Joban wah nema thâmama nema chennilem eken a ereheh atema râjettah.

⁹Nema, rangsoampa, aroh soamen: ‘Rangkhethung wah nikhu Wa: Nangmîn pa Asâthôan;

¹⁰Nang Hahsông karo; Rangkhethung wah rãngrãng hahkho komin Nanghung junko chendanga.

¹¹Thejâ nima lem eki phhekchhah pa chohkohhi.

¹²Nirãngma kaamchhih moatte hehnâng nima mapkoh eki rãngrãng, Nipap heh map kohhi.

¹³Achhih nâng hung nektoanthuk hi, Juchhih wah pânghi.’

¹⁴“Nerãngma kaamchhih moatte hehnâng, nema map mekoh enko, rangkhethung wah ne Wa Joban memin nenâng map ekohhèn.

¹⁵Nema mihnâng map lekoh kenko, rangkhethung wah ne Wa Joban memin nepap heh map lekohmin.

Lejok lechhah thangma Rangsoam junko Hethô

¹⁶“Chenthu nema lejok lechhah thangma rangsoamko, ahuhkhoanglep heh rãngrãng then khukhu nekdangen. Mihnyan hehma lejok lechhah thangma rangsoam pa chenkhehi ngama thinma thenphâng litsiet wakeka. Ngama nginlinlin thôkoh eka, thinma chohtin pa phangtang râchohtah.

¹⁷Chenthu ne lejok lechhah thangma rangsoamko, thenmut ngale khopa khit re en,

¹⁸Eroh koba nema lejok lechhah thangma rangsoam pa mihma lejetmin - mitma lekhe, ne Wa Joban, meloloba ejet a. Ngale nema ahuh chhama moeken pa ne Wa Joban ma khelahma, nenâng rang ekohhèn.

Rangkhethung nâng Techhu thôn

(Luk 12.33-34)



¹⁹“Hahtokkhoh ko techhu dângrăng nekkhônjôan en, dōng ngale chhinma ethôn chhihphhek a, ngale ahuhte ma chhihsiet lahma ehuh a.

²⁰Ere noma rangkethung nâng techhu dângrăng khônjôan en, enâng dōng ngale chhin memin tachhihsiet mah, ngale ahuhte memin chhihsiet lahma tahumah.

²¹Erohwha chenko ne ngun akem heh thien eken a, ereko nehung nerin min edanga.

Phoang wah Wenphiak

(Luk 11.34-36)

²²“Mitpa phoang rãngma wentit rãngrãng. Ne mitpa asen medang ako, ne phoang phangtang aphiak dânmin;

²³Rohkomin nemit pa achhih medang ako, ne phoangmin rangnyek dânmin. Phumma newah phiak pa aho medang ako, arepa chentô cheili nyek dânmin a!

Joban ngale Chhahkhem

(Luk 16.13; 12.22-31)

²⁴“Henjô tângte wanii haa tadang mah; atema watheko chhihchoh erea, ngale watheko sênchoh erea; wathe nginpa senthemthem ekep a, ngale wathe nginpa lekep edanga. Nema Joban ngale ngun akem wannini taroam khoakhem met.

²⁵“Erohwha ngama thôkoh eka, chenni jokphhek chhah lihma hîn ajômin a ngama neksekmah en, erediko ne phoangko poh athok khet akhurãng memin neksekmah en. Jokphhek chhah noma phoangpa adong ledangne? ngale khet akhu noma phoangpa adong ledangne?

²⁶Wo hehnâng sûtan en: Thinma chenmin khiet alimah, ngale pum nângmin khônkhên thienmah; rohkomin rangkethung wah ne Wa Joban ma sũare wakeka! Nea wo heh noma ajahthem thãchaan ledangne?

²⁷Nekhu chhangwah henkomin patrii sekmah letma roandông chuthe tabâm leknyan en a?



²⁸“Ngale khet akhurãng chenrãngma sekma eken a? Sûtan en, wunwah chongpô heh chenroh dongeka: Thinma moatlemmin momah, ngale khet akhumin hôanmah.

²⁹Rohkomin ngama thôkoh eka, Solomon Lowang tumin chhu alu ngale khetsen khusen tonglahma ere chongpô wanthe sêntô dangho.

³⁰Joban ma wunwah hin hehnâng khet akhu kepcoh eka - hinpa thejâ metong akomin, nènep ko wennâng rokthhekmin. Atema nenâng jâtanga erenoma ajah khet akhu lekep kohminne? Ne dâlempa atôrînne!

³¹“Erohwha neksekma en: ‘Chenwah ngama jokphhek chhah thin chohmin a, ngale khet akhu chohmin a ngama?’

³²(Are sêmmak hehrãngma Joban lejetta mihnyan heh roantang sekma eka.) Rangkethung wah tângte ne Wa Joban ma ajet, nema areheh lemeken ngama.

³³Ere noma khebeng thôanko Joban Hahsông pa benglem mêngen, ngale atema newah hun ehèn moatlem heh momêngen, erediko nema lemeken chentôpa atema ekohhèn.

³⁴Erohwha nèneprãng neksekma en; nènep rangwopa atedede nènep ko esekma a. Thejâ rãngma sekma en, rangwo roakweih mãmâ sekma demnâng ehûra.

Mathiu 7

Mihnâng Atheloat

(Luk 6.37-38, 41, 42)

¹“Mihnâng athe neklo en, erohkoba Joban memin nenâng athe lomahhèn,

²Nema mihnâng chenroh athe loeken a, ererãngrãng Joban memin nenâng athe elohèn. Ngale nema mihnâng chenroh hôanjôan eken a, ererãngrãng Joban memin nenâng ehôan ejôan hèn.

³Nedede mit wah janchhup lebeng kherii thangma, nepho anaa mitwah mitchhup pa chenrãngma lepkhe eken a?



⁴Nedede mitwah janchhup pa thienletma nepho anaa nâng, ‘nangmit wah mitchhup pa rephekoh e’ ngama chenroh jienna eken a?

⁵Ahuhkhoanglep heh! khebengko nemit wah janchhup pa bengre pherii mêngen, erediko ba nema nepho anaa mitwah mitchhup pa senthemthem kheletma eta rephekoh en.

⁶“Asâthôan sêmmak pa hu hehnâng nekkoh - thinma ngakkek ba ere hèn. Ngale wak mathahko kem nekphekoh - thinma dakhenko ewoatnek a.

Tha en, Lem en, Kâsekko Rahkõngen

(Luk 11.9-13)

⁷“Tha en, eko nema echoh en, lem en, eko nema echohkhe en; kâsekko rahkõngen, eko nenâng kâsek pa elaang kohhèn.

⁸Henhen ma thaeka, erehehema echoh a, alemte hehema echoh khea, ngale henhenma kâsekko rahkõng eka hehnâng kâsekpa elaangkoh a?

⁹Ne-khuwah henma komin, mâmâ chhama phhekchhah thâko longkohte tongen a?

¹⁰Roh akole atema ngah thâko pû ekoh en a?

¹¹Mihnyan chhih nema tumin mâmâ chhako asenli kohpa jet eken. Rangkhethung wah tôngte ne Wa Joban mejã tanga atewah thâte hehnâng asenlipa kohrãng chentô bâmjet eka!

¹²“Mihnâng nerãng chenroh moatthuk hun eken a, ererãngrãng nememin mihrãng eroh mokoh en: Arepa Mosa Niemarang ngale Mõng hehema hethô wah ngin.

Lemkit

(Luk 13.24)

¹³“Lemkit pumma khoam en, chenrãngma ngako khomah lemnâng katlem pa lemdong, ngale ere lempa khoamrãng ala, ngale eko khôamte pa ajah.

¹⁴Roh-komin khopô chohthin lemkhôpa lemkit, ngale ereko khôampa alat, ngale eko khôamte mihnyan pa mãnchha.

Bãng ngale Bãngri

(Luk 6.43, 44)



¹⁵“Mongmõang hehwah jetletma dangen; thin a ne tânâng tokkhoh pa saak rãngrãng, rohkomin thin rinkhen pa wunwah soanchhieh rãngrãng ehûra.

¹⁶Nema thin moatlem junma ejetlo waken. Suhche bukwah anguri jienhong rimah, ngale suhbukwah phukri jienhong rimah.

¹⁷Bãngsen pumma risen ehongria, ngale bãngchhieh pumma richhieh ehongria.

¹⁸Bãngsen pumma richhieh jienhong rimah, ngale bãngchhieh pumma risen jienhong rimah.

¹⁹Penri risen lehongri bãngpa joatphe lahma wennâng thhekmin..

²⁰Mongmõang heh thin moatlem junko ejetlo waken.

Ngama Ne Jetmah

(Luk 13.25-27)

²¹“Teso, Teso, ngama nganâng roote chentôpa rangkhethung nâng leta wãngmin, rangkhethung wah tângte Joban ma huneka moatlem moatte heh loloba tâwâng min.

²²Chenthu metloatjâ rangwo mehû theko, ajahthem mihnyan ma nganâng aroh enga hang, Teso, Teso, nangmîngo nima Joban ngin phoangthôtih, ngale nangmîngo nima juchhiehmin junlotih, patritli moatlemmin motih!

²³Ephumma ngama thinnâng edânthang ang, ‘ngama ne jetmah, nea mihnyan chhieh, ngatâwah taangchhoan en!’

Humhôte Wani Thakthô

(Luk 6.47-49)

²⁴“Erohawah henhenma nga nginpa tatlahma kepeka, ere mihnyan pa chhin achhiak, ate humpa longrã khohnâng hôante rãngrãng.

²⁵Pôngdong patdong ngale jodông thunma ere humko ethin a, rohkomin ere humpa tarunjâ mah, chenrãngma ngako ere humpa longrã khohnâng hoaneka.

²⁶“Rohkomin henhenma nga nginpa tatlahma lekep dangeka, ere mihnyan pa aba, ate humpa phihchha khohnâng hôante rãngrãng.



²⁷Pôngdong patdong ma thinko ngale jodôngma lûmhokko ere humpa runjâ erea. Phumma ere hum runjâpa chentô cheili dângmin a.”

Jisu Chaan

²⁸Chenthu Jisu ma erengin heh thôkoh diko, mihnyan heh ma atema hethôeka nginpa tatlahma bârit rewah.

²⁹Atea niemarang hethôte heh rãngrãng ledang; chaan demnâng hethô wah.

Mathiu 8

Jisu ma Mihnyan Mesiet

(Mak 1.40-45; Luk 5.12-16)

¹Jisu hahhokho wah jâkhoamkat rienrien, mihnyan heh jahmông ate diko junkhoam wah.

²Eko angêm khoanchetma chêmte wathe ate tâko hûlahma dakuh thohû lahma ngatwah, “Teso nangma mehun oko, nga eta sensiet hang.”

³Jisu ma atedek loatsiet lahma angêm wako sahloatwah, ngale atema ngatwah, “Ngama sensiet huneki,” “sen o!” phumma lemlienma angêm khoanchet kowah senwah.

⁴Erediko Jisu ma Atenâng ngatwah, “Tattan! hennângjô nekthôkoh, tintin wãnglohma soam aroakte nâng khesok wãngo, atema chenthatsû tanho; ngale nanga sentoh ngama anga ngama jetrãngma, Mosa ma chienwah soam aroak thinpa kohwen o.”

Jisu ma Roman Sipâhi Haa Mesiet

(Luk 7.1-10)

⁵Chenthu Jisu Kaparnam hahnâng hokko, Roman sipâhi sahhab chohmîn hû lahma Jisu nâng chohsok rãng roatsep wah:

⁶Atema ngatwah, “Teso, ngahaa pa kôasô ma cheili chêm lahma jupthinko tonga.”

⁷Jisu ma ngatwah, “Ngama wãnglekma ate emesiet wãngang.”



⁸Sipâhi sahhab ma dânthâng wah, “Teso, eroh dangmah, ngama nanga ehumkhenko tâsiet hoktô mihnyan dangmek, jabkhab melolo chien o, ekojô ngahaa pa esen a.

⁹Ngamin nganoma sahhabdong khenko moekang, ngale ngakhen komin sipâhi heh tonga, wathe nâng ngama, ‘kao!’ menga angko, ate rângka a, ngale wathe nâng ‘wângro, ngama meroo angko, ate rângwângra! ngahaako,’ arepa mo o, ngama mechien angko, atema rângmoa.”

¹⁰Chenthu Jisu ma erepa chohtatko, ate bârit rewah, erediko Jisu ma ate diwah junkhômte hehnâng ngatwah, “ngama linlin thôkoh eka, Isrial diak khenko are mihnyan rângrâng dâlemsen machohkhe ekang.

¹¹Ngama linlin thôkoh eka, jahmõang mihnyan sankat ngewah, sannyup ngewah hûlahma Abraham, Isak, ngale Jakob demnâng rangkhethung wah Joban Hahsông theko aroamma ephhekchhah wak a.

¹²Rohkomin Joban Hahsông thenâng tângte jatlinlin heh rangnyek khennâng petphê katmin, eretheko pâchupkek lahma seplahma etongwak a.”

¹³Erediko Jisu ma sipâhi sahhab wako ngatwah, “humnâng wângo, nangma chenroh dâlem eko ererângrâng edang kohho.” Ngale ere sanpoatko sipâhi sahhabwa haapa mewah.

Jisu ma Mihnyan Jahmõang Mesiet

(Mak 1.29-34; Luk 4.38-41)

¹⁴Jisu piter humnâng wâng lahma piter tangnyu nyong pa chetloatma jupthinko khunlahma khehokwah.

¹⁵Jisu ma ate dekho sahloatko khoanchet pa mewah. Ephumma atema toansat lahma Jisu nâng khoakhêm wah.

¹⁶Chenthu rangjâthah hokko, mihnyan hehma Jisu tâko juchhih lupte mihnyan heh siethokwah. Jisu ma juchhih heh jabkhab ma junloatwah, ngale chentô khoanchette heh mesiet rewah.



¹⁷Atema ere moatlem pa Isaia mǒng ma jabtah pa toangtang dângkatrǎng moatwah, “Ate dedema nǎngkhun atam pa kep eka, ngale nǎng khoanchet pa sahèn phetah.”

Hen Jisu dijunte Tâdângmin a

(Luk 9.57-62)

¹⁸Jisu ma ate tûmlitko mihnyan heh jahmǒang khelahma, ate dijunte hehnâng joranka nâng danwâng rǎng chienwah.

¹⁹Niemarang jettema ate tâko kalahma ngatwah, “Hethôte, nang chennângjô medang okomin nga nangdem demko ejoh chhoan e.”

²⁰Jisu ma atenâng dânthâng wah, “Hien hehnâng thin tǒngrǎng ken tonga, ngale wo hehnâng thinrǎng arup tonga, rohkomin Mihnyan Chharǎng chenkejô ate boantông rǎng the aho.”

²¹Dijunte ahan wathema ngatwah, “Hethôte, khebengko ngakka lekma ngawa mang rukamêng ang.”

²²Jisu ma dânthâng wah, “Nangma ngadijun hang, mangpa mang rôande chenrumîn a.”

Jisu ma Pông Apat Mesiet

(Mak 4.35-41; Luk 8.22-25)

²³Jisu khôankhoko chhangwah, ngale ate dijunte hehmin ate demko johchhoan wah.

²⁴Lemlien ma pôngdong patdongma josiko metlahma khôankho pa thumjâ nemnem dângwah. Ere sanpoatko Jisu juplek dângwah.

²⁵Dijunte heh ate tânâng kalahma satsiet katwah, thinma ngatwah, “Teso pânghi!” “nia lâmahrii eki!”

²⁶Jisu ma dânthâng wah, “Ne chenrǎngma aretô patrii eken a? nenâng dâlempa atôrînne!” erediko Jisu toanchep lahma pông apat pa jeksietwah, phumma kihchepchep jekwah.

²⁷Anga ngama barii lahma ngatwah, “Arepa chenni mihnyan a? pôngpat memin ate nginkep eka!”



Jisu ma Juchhih Lupte Mihnyan Wanii Sênsiet

(Mak 5.1-20; Luk 8.26-39)

²⁸Chenthu Jisu josi ranka wah Gadara diaknâng hokko, enângwah mihnyan wanii mangruk kenwah loatwãng lahma chohmîn wah. Ere mihnyan waniiko juchhih luplahma nyahrãng cheili dângwah, ngale erelem pumma henjô lechin dankhoam dângwah.

²⁹Lemlien ma thinma hongrak lahma ngatwah, “Joban Chha, nangma ninâng chenni rehun ehia? sanpoat mathângma nichêmsiet rãng kaeroa?”

³⁰Erekowah chentô letaangko wak jahmõang phhekchhah joaklahma dângwah.

³¹Ephumma juchhihma Jisu nâng roatsep wah, “nangma ni mejunlo hiko, irewak chhangko lupkathuk hi”

³²Jisu ma thinnâng ngatwah; “Ka en,” phumma mihnyan kowah loatchhoan lahma wak chhangko lupkatwah. Erediko wak heh phangtang ka pumma jâchhoan kalahma josiko mahritkat wah.

³³Wak heh sok arête mihnyan heh huhchhoan lahma hahdaang nâng wângwah, erediko thinma nginpa phangtang loatthôkoh wah, ngale juchhih lupte mihnyan heh nginpa thôkoh rewah.

³⁴Ephumma hahdaang kowah chentô mihnyan heh Jisu chohmînãng hokwah; chenthu thinma Jisu kheko, Atenâng nihah kowah chhoan o, ngama roatsep wah.

Mathiu 9

Jisu ma Kôasôte Mihnyan Sênsiet

(Mak 2.1-12; Luk 5.17-26)

¹Jisu khôankhoko chhang lahma, josi ranka wah thin hahnâng ngakwâng wah,

²Chuthe diko mihnyan khuthema Atenâng kôasôte mihnyan wathe jupthin ko jupthuk lahma pêhok kohwah. Jisu ma thinnâng dâlem pa ajah chohkhe lahma, kôasôte mihnyan ko ngatwah, “Hung dongsiet o, ngachha! nangpap heh map lâkohtih.”



³Erediko niemarang jette heh thindede tungko thômîn wah, “Are mihnyan pumma Joban thãse eka!”

⁴Jisu ma thinhung khennâng chenni thonghun eka arepa jetlo lahma, thinnâng ngatwah, “Nema arerãngrãng achhih heh chenrãngma thonghun eken a?”

⁵Chenroh ngat pa ala a, ‘nangpap heh map lâkohtih’ ngama ngatpa ala ale, ‘toanchep lohma khoam o’ ngama ngatpa ala a?

⁶Nenâng ngama are hahtokkhoh ko, Mihnyan Chha nâng pap mapkoh rãng chaanwin, ngama ekhesok a.” Ephumma atema kôasôte mihnyanko ngatwah, “toanchep o, ngale nang jupthin pa toanpe lohma humnâng wãngo!”

⁷Mihnyan pa toanchep lahma humnâng wãngwah.

⁸Mihnyan heh ma erepa khelahma chei rewah, ngale mihnyan nâng atô chaan kohdi Joban nâng dangkoh a, ngatwak wah.

Jisu ma Mathiu Roo

(Mak 2.13-17; Luk 5.27-32)

⁹Jisu erethe kowah loatkhoam chhoan thuko, thãkho thâte mînpa Mathiu ate Ofic ko tonglahma khewah. Phumma, Jisu ma Atenâng ngatwah, “ngadijun hang.” Mathiu toanchep lahma ate dijun wah.

¹⁰Mathiu humko Jisu phhekchhah chhahthuko, thãkho thâte ngale papi mihnyan heh jahmõang hûlahma Jisu le ate dijunte heh demnâng johphhek chhahhok wah.

¹¹Erepa Farasi heh ma khelahma Jisu dijunte hehnâng chhienwah, “Ne hethôte pa arerãngrãng mihnyan chinheh demnâng chenrãngma roam phhekchhah eka?”

¹²Jisu ma erepa leptat lahma dânthâng wah, “Khoanchet hote mihnyan heh ma doktor lemmah, khoanchette mihnyan heh ma loloba doktor lemeka.

¹³Choan en, ngale jet en, Joban nyapraangma arepa chenni ngaeka: ‘ngama mînchen ba hun ekang, ngem angah ma soamroak hunmek.’ Ngama



mihnyansen heh roorãng katdangmek, papi mihnyan heh roorangba kaerâng.”

Lepheh Lechhah thangma Rangsoam junko Chhien

(Mak 2.18-22; Luk 5.33-39)

14Erediko Jon baptis dijunte heh Jisu tâko hûlahma chhienwah, “Chenrãngma ni ngale Farasi heh ma roantang lepheh lechhah thangma rangsoam ekia, nang dijunte heh ma lepheh lechhah thangma soamwak mah?”

15Jisu ma dânthâng wah, “Nemnyan wapa thin demnâng dânghoatko nemnyansiet thinnâng hokte heh hungchhih rekma etonga ngama thonghun eken a? eroh tongmah! rohkomin nemnyan wapa thintâwah sietchhoan rangwo ehûra, ere diphumma ba thinma lepheh lechhah thangma etonga.

16“Henmejô khetpã khohko khetnyan chhuppa petphin mah, chenrãngma ngako khetnyan pumma khasiet lahma khetpã pa lodong elojâa.

17Ngale henmejô angurti anyan pa angurti pã khohko petkien mah, chenrãngma ngako angurti thòpa apoak erea, ephumma angurti pa jenchhoan ngale thòpa chhihjà erea. Ere noma angurti anyan pa thònyan nâng kienmin, erohkoba thòniinii asen edanga”

Sahhabwa Chha Dihiaknya Hînsiet ngale Dihiaknyu Jisu Khetko Sahloatte

(Mak 5.21-43; Luk 8.40-56)

18Jisu ma arepa thòthuko, Jews sahabwa wathe kalahma ate mako dakuh thoka lahma ngatwah, “ngachha dihiaknya pa arohroh riieka; Wãnglohma nangdekma Atenâng sahlo wãngmêngro, eko ate engakhin a.”

19Ephumma Jisu toanchep lahma sahabwa demnâng johwângwah, ngale ate dijunte hehmin thin demnâng johwâng wah.

20Dihiaknyu wathe echhi pânii heichhoan khoanchetma chêmte Jisu tokdiko hûlahma Jisu khetsako sahloatwah.

21Dihiaknyu pumma atedede ngatritwah, “ngama Jisu khetko mesahlo tekkojô, khoanchetpa esen ang.”



²²Jisu litphong lahma dihiaknyu pa chohkhe wah, eko Atenâng ngatwah, “Ngachha, hungdongsiet o! nang dâlem pumma nang khoanchet pa lâmetho.” Ere sanpoat poatko dihiaknyu khoanchet pa mewah.

²³Ephumma, Jisu sahabwa humko wângwah. Chenthu atema jãmtênte ngale asepte heh kheko,

²⁴Atema ngatwah, “Anga nga chhoan en! are dihiakchha pa rit dangmah - atea jup reka!” Ephumma Jisu nâng anga ngama angit rewah.

²⁵Mihnyan heh tâjunloat rienrien, dihiakchha tâko Jisu wãng lahma ate dekko sietwah, eko dihiakchha pa tôansat wah.

²⁶Are nginpa erediak phangtang nâng khêmtatwah.

Jisu ma Mitdoak Wanii Sênsiet

²⁷Jisu erethe kowah khôamchhoan thuko, mitdoak wanii atediko junkhôm wah. Thinma raksep wah, “Devit Chha! ninâng mammîn chenhi”.

²⁸Jisu humkhen nâng lupwâng phumma, mitdoak wanii pa ate tânâng hokwah, eko Jisu ma ateni nâng ngatwah, “Ngama nechhe tasensiet a, ngama putedâlem eken a?” Thinma dânthâng wah, “Teso putedâlem eki.”

²⁹Ephumma Jisu ma thinnâng mitko sahlo lahma ngatwah, “nema chenroh putedâlem eken a, eroh chendanga!”-

³⁰Ephumma thinmit pa kanlahma jienkhe wah. Ngale Jisu ma thinnâng ngatwah, “Arepa hennâng min nekthôkoh en!”

³¹Rohkomin thinma chhoanwak lahma Jisu nginpa diaktang nâng phoangthô kohwah.

Jisu ma Aba Jabmuh Sênsiet

³²Mihnyan heh loatchhoan poatko, mihhan khuthema Jisu tânâng juchhih luplahma aba jabmuh wathe siethok wah.

³³Juchhih pa junloatkoh rienrien mihnyan pumma jienjab wah, eko anga nga bârit rewah. Thinma ngatwah, “nima arerãngrãng Isrial diakko chenthujô mathatkhe eki!”



³⁴Phumma Farasi hehma ngatwah, “Arepa juchhih lowang ma Atenâng juchhih junloat rãng chaankoh eka.”

Jisu ma Mihnyan hehnâng Mînchen

³⁵Jisu chentô diak ajaa ngale hahdaang rupnâng phoangkhôam wah, atema Joban Hahsông nginkongsen pa chentô Sanagog hehnâng phôngthôkoh wah, ngale jatrup khoanchet, khun atamte hehmin sênsietwah.

³⁶Jisu ma mihnyan heh khelahma thinnâng mînchenma ate hung nyahrãng chhihwah. Chenrãngma ngako, abemte aho saak rãngrãng sekmah patrit ngale mînchenli khewah.

³⁷Ephumma Jisu ma ate dijunte hehnâng ngatwah, “Chhah munchoan pa jahmông, rohkommin ere chhahmun eka heh khôankhente pa amãnhha.

³⁸Erohwhah munchoan chhah tângte wako, ate chhahthong munchoan heh khôankhente chienkatrãng rangsoam en.”

Mathiu 10

Echhi Wanii Jisu Moattat Chhoante

(Mak 3.13-19; Luk 6.12-16)

¹Jisu ma ate dijunte echhi wanii pa roamroo lahma, thinnâng juchhih junloat rãng, jatrup khoanchet, ngale khun atam heh sênsietrãng chaan kohwah.

²Echhi wanii Jisu moattat chhoante mînpa areheh dângwah: Khebâng pa Simon (Atenâng piter ngamemin ngaeka) ate pho Andru; Jems ngale ate pho Jon Zibidi chha;

³Filip ngale Batholomi; Thomas le thãkho hâte Mathiu; Alfais chha Jems, ngale Thadi:

⁴Diakrãng latte Simon, ngale Jisu chênsângte Juda.

Echhi Wanii Moattat Chhoante heh Moatlem

(Mak 6.7-13; Luk 9.1-6)

⁵Are echhi wanii mihnyan heh Jisu ma rîn akhah lahma chienchhoan wah: Atema ngatwah, “Jews ledangte diak hendiak nângmin nekchhoan en ngale Samaritan hah nângmin nekchhoan en.



- ⁶Ere noma Isrial humkâ wah mahsamte saak heh tânâng chhoan en.
- ⁷Chhoan letma thôchhoankoh en, ‘Rangkhethung Hahsông pa lânam katha!’
- ⁸Khun atamte heh mesiet, ritte heh ngakhinsiet, angêm khoanchette heh sensiet, juchhih heh junlo re en, nema thâhoma chohkenpa thâhoma koh en.
- ⁹Ne tống akhak nâng ngun akem ngale lihân sêmmak nek hèn chhoan en;
- ¹⁰Ne lemkhôam korăng tống akhak, khet akhu bâm, dapheng ngale menthun min nekkep en, chenrăngma ngako, moatlem moatte hehnâng thinma chenni lemeka erepa kohmin.
- ¹¹“Chenthu mihnok mihhah hehnâng mehû tetko, henma ne tângroo ehèn a, erepa lemsû en, ngale erehah kowah mangak ngakchhoan ate demnâng tongen.
- ¹²Chenthu ne humkhen nâng menyup wãng tetko, ‘nenâng Joban ma rang ekohhèn ngama rânjab en.’
- ¹³Ere hum kowah mihnyan heh ma metângroo hènko, nema thinrăng rangsoam kotet pa thinkhoh nâng chentonga; rohkomin thinma letangroo medang hènko, nema rangsoam kotet heh ngakkep re en.
- ¹⁴Ngale chenre humkâ ba hahdaang ma ne letangroo, erediko ne ngin lekep medang hènko, erethe kowah loatchhoan ko neda wah bum kheb eka pemin finekthien en.
- ¹⁵Ngama nenâng linlin thôkoh eka, Joban ma metloat rangwo jâko erehah kowah mihnyan hehnâng mînchen noma Sodom ngale Gomora wah mihnyan hehnâng ba ajah emînchèn a!

Ahokmin Chêmchei
(Mak 13.9-13; Luk 21.12-17)

- ¹⁶“Tat en! Ngama nekhu soan chhangnâng saak răngrăng chienchhoan eka. Erohwah, pû răngrăng nyahhîn dangen, ngale phâriwo răngrăng mihnum dangen.



¹⁷Jetletma dangen, chenrãngma ngako, nea khhek lahma metloat thinnâng siethok rãng mihnyan heh tonga, ngale Sanagog nãng siethû lahma ewat hèn.

¹⁸Diak pête ngale lowang heh, erediko Jews ledangte hehnâng ngawah Nginkongsen pa jienthòkoh rãng thin tânâng met elohû hèn.

¹⁹Chenthu thinma metloat ko, chenroh dânthâng min a, ngale chenli dânthâng min a ngama neksekma en; nema dânthâng thinpa ere sanpoatko Joban ma ethòkoh hèn.

²⁰Chenrãngma ngako nema loatjabmin jabkhab pa newah ledangmin; ere jabkhab heh ne Wa Joban Ju ngawah kalahma nema ehongjab en.

²¹“Phoma naapa eritphethuk a, ngale wama chha hehmin eroh eritphethuk a; chha hehmemin thin nyong awa lelatnâng dãnglahma eritphe thuk a.

²²Anga ngama ngajunma nenâng emithek hèn. Rohkomin henhen pa athôn kotuk dâlemsen lektong eka ere hehba khope min.

²³Chenthu thinma hahdaang wantheke mechêmsiet hènko, hahdaang ahan wantheke danchhoan en. Ngama linlin thòkoh eka, Mihnyan Chha ngakkat mako Isrial hahdaang kowah nemoatlem pa chenthumin leta thônamin.

²⁴“Ahete henmin ate hethôte noma adong dangmah; ngale haa henmin ate tângtewa noma adong dangmah.

²⁵Erohawah ahete pa hethôte rãngrãng dãngko rinmemin, ngale haapa ate tângtewa rãngrãng dãngko rinmemin. Humkâ kowah khhepho thòanko Bilzibul ngama menga ako, humkhen kowah ahan mihnyan heh nãngjã chentô chhih ngatmin a!”

Henran Cheimin a

(Luk 12.2-7)

²⁶“Erohawah mihnyan ran nekchei en. Athângheh chentô huhthien eka heh phangtang laangjã rêmin, ngale athângheh chentô riem eka ereheh loatjã rêmin.



²⁷Ngama rangnyek nâng chenni thôkoh eka, arepa nema rangwo nâng thengak thôngthô kohmin, ngale nema chenni huhtat eken a, arepa humkho nâng kowāng letma rakthômin.

²⁸Phoang ritphete ran nekchei en, thinma ju taritphe mah; Ere noma phoang ngale ju wanniiini pap wendô nâng rokthhek lahma târitphete Joban ran chei en.

²⁹Nema ngunpha phathe pumma wasaangsut wochha wannii tarii en, rohkomin ne Wa Joban ma lejet thangma wochha wanthemmin hahko mahjâ riimah.

³⁰Nekho wah khochoo heh tumin phangtang weih lahma thieneka.

³¹Erohwhah nekchei en; nea jahmōang wochha nomemin thāchaan!

Krista Nginkepte ngale Lekepte

(Luk 12.8, 9)

³²“Henma komin nok atang mathahko atea ngarāng ngama meloatjab ako, ngamemin rangkethung wah tōngte nga Wa mathahko erohjô eloatjab ang.

³³Phumma henma komin nok atang mathahko nga medak hangko, ngamemin rangkethung wah tōngte nga Wa mathahko atemin erohjô edak ang”.

Mêmo dangmah Dăng

(Luk 12.51-53; 14.26, 27)

³⁴“Are hahtokkhoh ko ngama mêmo kohrāng kaerāng ngama nekthonghun en. Ngama mêmo kohrāng kat dangmek, dăng loamrāng kaerāng.

³⁵Nga kaerāng pa delachha pa ate wa lelatnâng dang, erediko dihiakchha pa ate nyong lelatnâng dang, ngale nem pa ate nyipanyu lelatnâng dangthuk rerāng kaerāng;

³⁶Mihnyan rāngma ranchhih thônpa ate humkâ wah mihnyan pa dângmin.”

³⁷“Henhen ma ate nyong awa nâng nganoma ajah huneka arepa ngadijunte tadangmah; ngale henhenma ate chha dela ba dihiak nâng nganoma ajah huneka arepa ngadijunte tadangmah.



³⁸Henhen ma ate bãngphak pa lepe thangma nga damãnko toanlahma ngadijun ehanga, arepa ngadijunte tadangmah.

³⁹Henhen ma ate roandông rãng lololem eka, arepa mahto nãng edanga. Rohkomin henhenma ate roandông pa ngarãng koheka, erehehema khope echoh a”

Moatlem Moatthã Choh

(Mak 9.41)

⁴⁰“Henma komin ne metãngroo hènko, erepa nganâng tãngroo ehang; ngale henma nga tãngroo ehanga, arepa nga chienkatte pa tãngroo eka.

⁴¹Henma komin môngnâng atea mông dãngjunko asenma tãngroo eka, atema môngthã echoh a. Ngale henma komin mihnyan senpa, atea mihnyansen dãngthã asenma chohtãngroo eka, erpumma mihnyan senthã chohmin.

⁴²Erediko henma komin, ngadijunte dãngthã, ngadijunte hehwah arinthôn wathe nãng jokih koapthe mejokthuk ako, ere thãpa atema metkep chohmin.”

Mathiu 11

Jon Baptis ngewah Nginmatte

(Luk 7.18-35)

¹Chenthu Jisu ma ate dijunte echhi wanii nãng rín akhah diko, atea erethe kowah loatchhoan lahma, ere kêanâ wah hahdaang hehnâng Joban ngin hethô rãng chhoanwah.

²Chenthu Jon Baptisma phâtek khenma Krista ma moeka moatlem heh chohtat diko, atema ate dijunte heh Jisu tânâng chienkat wah.

³Thinma Jisu nãng chhienwah, “Ninâng thôkohhi, nanga Jon ma wathe hôngmin ngama ngatah pa dangole, roh akole nima ahan ngiakmin a?”

⁴Jisu ma dânthâng wah, “Ngakwãng letma nema chenni tat eken a, ngale chenni khe eken a, ereheh Jon nãng thôwãngkoh en:

⁵Mitdoak ma jienkhe eka, dakò heh jienkhoam, angêm khoanchet ma chêmte heh sen rewak eka nâba hehema tat, ritte heh ngakhinsiet, ngale Joban nginkongsen pa tangchhih naadi hehema chohtat reka.



⁶Nganâng henma letûngmaang thangma dâlem ehanga, erehehma rangkepmin!”

⁷Chenthu Jon dijunte heh ngakchhoan ko, Jisu ma Jon junma mihnyan hehnâng thôkoh wah: “Chenthu ne sehah nâng Jon tânâng chhoantet ko, nema chenni echokhe e ngama thonghuntut a? wun heh pôngma juhmet lahma chokhe e ngama thonghuntut a?

⁸Chenni chokhe rãng chhoantet a? Khet akhusen kepte mihnyan echokhe e ngama thonghuntut a? Khet akhusen kepte mihnyan heh Lowang heh humnângba songeka!

⁹Thôkohha, nema chenni chokherãng chhoantet a? Mông chokherãng chhoantet a? Mông chokherãng tadangthem a, rohkomin nema mông noma ajahthem adong chohekhe eken.

¹⁰Chenrãngma ngako Joban nyapraangma ngatah pa Jon rãngma ngatwah: ‘Joban ma ngatwah, ngama nginmatte nang mako nangrãng lemlaang kohrãng echienkat ang.’

¹¹Ngama nenâng nginlinlin thôkoh eka, Jon baptis noma adong mihnyan nyuchha mahongchha eka. Rohkomin henpa rangkethung wah hahsôngko arinthôn dangeka arepa Jon noma dong.

¹²Jon baptisma Joban nginthô sanpoat thuwah, athâng sanpoat tôkotuk rangkethung Hahsông pa patrit chêmchoh dangeka, ngale arepa mihnyan chhih hehma chaanma nyenkep hunwak eka.

¹³Jon baptis sanpoat tôko, chentô mông hehma Mosa Niem ngale Joban Hahsông ngin heh thôwah;

¹⁴Ngale, Jon pa, Ilija katmin ngama thôtah pa kaera ngama thinma thôeka ko nema mepute enko.

¹⁵Eroh medang ako, nenâng nâ metong hênko tet en!



16“Ngama arethâng sanpoat wah mihnyan heh chenni nâng thakthô anga? Thin a bôjat nâng phông tôngte leta lechhih khuthema khuthe nâng chohrak mînte rângrâng,

17‘Nima nerângma nemnyansiet pupe metkoh eka, rohkomin ne boangmet! nima mangrûsê sekoh eka, rohkomin nea sepmet!’

18Jon baptisma chenjô lejok lechhah thangma dângko, anga ngama, ‘Atenâng joak lup eka ngama ngatwah!’

19Phumma chenthu Mihnyan Chhama jokphhek chhahko, anga ngama Atenâng, ‘Are mihnyan ko sûtan en! rem awak ngale jokphhek chhahte, thâkho thate ngale papi mihnyan heh lemruçha, ngama ngaeken!’ Joban wah buthi mongthem pa moatlem pumma ekhesok wênra.”

Hunglelit Hahdaang

(Luk 10.13-15)

20Jisu ma ajahthem patritli moatlem motah hahdaang hehwah mihnyan heh thin papwah hung lengaklit dâng phumma, Jisu ma ere hahdaang hehnâng ritngat wah.

21“Korajin, nangrângma chentô cheili dângmin a! Batsida, nangrâng memin chentô cheili dângmin a! Ne tânâng patritli moatlem motek pa Tair ngale Sidon nâng moat ngako, thinma papwah hunglittih ngama jetthukrâng, enângwah mihnyan heh chenthu thuma bosta khetpakep ngale bumma thinkhoko phuhrii chenre waktah!!

22Ngama nginlinlin thôkoh eka, metloatjâ rangwo ko nenoma Tair ngale Sidon wah mihnyan hehnâng Joban ma ate mînchen pa ajah ekhesok a!

23Ngale Kaparnam! nangmin rangkethung nâng lanleproh choangrit huntah a? nanga pap wendô ko ejâsietkat e! nang tânâng patritli moatlem motek heh Sodom nâng moat ngako, erepa athângheh min asenthu chenlek tongtah!

24Ngama nginlinlin thôkoh eka, metloatjâ rangwo ko nang noma Sodam wah mihnyan hehnâng Joban ma ate mînchen pa ajah ekhesok a!”

Ngatânâng Boantong Wängrên

(Luk 10.21-22)



²⁵Ere sanpoatko Jisu ma ngatwah, “Ewa, nanga rangkhethung ngale hahtokkhoh Teso! ngama nangnâng dangkoh a ngaeki, chenrãngma ngako, jet ajien hehnâng lekhesok thangma huhriem lohma nokba hehnâng khesok eko.

²⁶Ewa, are pa nangma aroh chendanga ngama hun lohma dangthuk eko.

²⁷“Ewa ma nganâng chentôpa lâkoh thang. Chhapa henmemin jetmah, Wa maloloba jeteka, ngale Wa min henmejô jetmah, Chha maloloba jeteka, ngale henhen nâng Chhama khesok rãng ren eka erehehnâng ekhesok a.”

²⁸“Henhen hênlih henletma boanrii eken a, ngatânâng wãngrên, ngama boanjek tongthuk a.

²⁹Nga ngewah kengpa kepletma ne chhoakhoko pe en, ngale nga ngewah heha; chenrãngma ngako, nga Jupa numnene ngale noapnene.

³⁰Chen-rãngma ngako ngama koheka apethin kengpa aperãng ala, ngale ngama nenâng hènthuk eka hênpa hênchã.”

Mathiu 12

Joban Pientôngjâ rãngma Nginchhien

(Mak 2.23-28; Luk 6.1-5)

¹Ere sanpoat kowah chentô letaangko, Jisu Pientông jâko chhah thongma dânkhoam wah. Ate dijunte heh rêmrii lahma chhahri kowah punphhek wah.

²Farasi hehma erepa lepkhe lahma, thinma Jisu nâng ngatwah, “Sûtan, nang dijunte hehma, Pientông jâko lemoli pa moeka, arepa nãngniem junko dangmah!”

³Jisu ma dânthâng wah, “Devit ngale ate mihnyan heh rêmrit poatko Devit ma chenni retah a erepa nema mathat weihne?

⁴Joban humnâng wãng lahma, ate ngale ate mihnyan hehma Joban nâng kohtah Joban phhekchhah pa tôanchhah wah, phumma erepa Niem junko soam aroak tema loloba tâphhek chhahthin dângwah.



⁵Roh akole nema Mosa Niem nâng chohweih hone, Pientông rangwo roakweih rangsoamhum wah soam aroakte hehma Pientông rangwo Niem tahwak pa, rohkomin thin a themah?

⁶Ngama nenâng thôkoh eka, rangsoamhum noma dong ako tonga.

⁷Joban nyapraangma ngaeka, ‘ngama ngem anghah ma soamroak hunmek, mînchen ba hunkâng.’ Arepa nema linlin jetno meko, lethe mihnyan hehnâng nema leseksam minwah;

⁸Chenrãngma ngako Mihnyan Chhapa Pientông rangwo rãng memin Teso.”

Wathe Dekkò Mihnyan

(Mak 3.1-6; Luk 6.6-11)

⁹Jisu erethe kowah loatchhoan lahma Sanagog nâng wângwah,

¹⁰Enâng wathe dekkò mihnyan dângwah. Ngale eko mihnyan khuthema Jisu nâng athe lolahma sekhâmhun dângwah, ephumma thinma Jisu nâng chhienwah, “Pientông jâko nâng Niem junko khoanchette tamesiet ele?”

¹¹Jisu ma dânthâng wah, “Nekhuwah wathema saak lâpemtet, phumma arepa Pientông jâko jonglunâng mejârii ako, chenni rêmin a? atema erepa letoan sietka minne?

¹²Mihnyan nyuchha pa saak noma bâmbâm adong! Erohawah nâng Niem junkomin Pientông jâko mihnyan nyuchha nâng chohsok rãng tângmahhi.”

¹³Erediko Jisu ma dekkò wako ngatwah, “nang dekpa chen o” Atema dekpa chênwah, ephumma dekpa deksente heh rãnggrãng ngaksênwah.

¹⁴Ere diphumma Farasi heh chhoan lahma Jisu ritphe rãng themawa wakwah.

Joban ma Aren Haa

¹⁵Jisu ma ate khûm apânrãng themawa pa tatlahma, ate erethe kowah loatchhoan wah; ngale mihnyan heh jahmõang ate dijun wakwah. Ngale chentô khun atamte hehmin atema mesietwah.

¹⁶Ngale atema ngajunma nekphoangthô en ngama ngatwah.



¹⁷Atema are moeka pa Mõng Isaia ma Joban ngin jabtah pa toangtang dângwãng rãngma moatwah:

¹⁸“ngama rentek ngahaa pa ana, ngama Atenâng hun ekang, ngale ate demnâng nga rinme ekang. Ngama nga Ju ate seknâng echienkat ang, Ngale chentô diak akanko ngama metloat Nginpa atema ephoang thôkoh a.

¹⁹Atea lephoang chhiakmînmin, ngale lephoang rak akakmin, erediko noknyu lemdong hehnângmin henmejô ate jab letatmin.

²⁰Atea boan anaa heh demnâng min noapnene, ngale wentitdô rãngrãng dôeka wenpa lemut thukmin. Toangtang pumma mata tajien atema letôanmin,

²¹Ngale Atenâng chentô mihnyan nyuchha ma edâlem a.”

Jisu ngale Bilzibul

(Mak 3.20-30; Luk 11.14-23)

²²Erediko mihnyan khuthema Jisu tânâng juchhih luplahma mitdoak ngale lejienjab mihnyan siethok wah. Jisu ma ere mihnyan pa sênsietwah, erediko atema jienjab wah ngale jienkhe wah.

²³Jisu ma ere moatpa khelahma, mihnyan heh bârit rewah. Thinma chhienwah, “Atea Devit chha danga?”

²⁴Farasi heh ma erepa tatlahma, thinma dânthâng wah, “Atema juchhih junlo ekapa thin pête bilzibul ma Atenâng chaankoh lahma junlo eka.”

²⁵Thin hungwah thonghun ekapa Jisu ma jetlo lahma thinnâng ngatwah, “Hendiak komin thindede tungko phanmîn lahma, thindede memênmîn ako, ere diakpa leta rongmin. Ngale hen hahdaang komin, ba, hen humkâ komin thin tungko phanmîn lahma, thindede memênmîn ako, arepa aphanjâ area.

²⁶Eroh wah, joak hahsông komin khuthema khuthe demko memênmîn ako, thin a mâmâ khukhu dangeka, ngale sitsiak ephanjâ!

²⁷Nema ngaeken, bilzibul ma nganâng chaankoh lahma ngama juchhih junlo ekang, eroh medan ako, ne dijunte hehnâng henma ereheh junloat chaankoh eka? Ne dijunte heh ma moeka moatlem junko ne athe ngama jetloeka!



²⁸Dangmah, arepa bilzibul ma kohdangmah, Joban Juma nganâng juchhih heh junloat rãng chaankoh ehang, erejunko Joban Hahsông pa nekhu khohnâng râkatha ngama khesok eka.

²⁹“Henmemin lochaanwa humpa chhihsiet lahma ate sêmmak heh tatoan chhoanmah; khebengko lochaan wapa khhekmêng lahmaba ate humpa tâlôngmin.”

³⁰“Hen komin ngarãng ledangte pa, alinlin nga lelatnâng dângte; ngale henma nganâng khôansietko lechohsûte a, erepa alinlin aphânsiette.

³¹Ngale erohwah ngama nenâng thôkoh eka: mihnyan nâng chenni pap komin ngale jabchhih jabkhah mejab akomin map tâkohmin; rohkomin henhenma Asâthôanju lelatnâng chhihjab eka erehehnâng chenthumin map lekohmin.

³²Henma komin Mihnyan Chharãng mechhihjab ako map tâkohmin; rohkomin henma Asâthôanju lelatnâng chhihjab eka erehehnâng map lekohmin, athângheh min, ngale roantang roanjêng komin lekohmin.

Bãng ngale Bãngri
(Luk 6.43-45)

³³“Bãngpa bãngsen medang ako, rimirisen eria; nenâng bãngchhih metong hênko, rimirichhih echoh en. Bãngpa ateri junko ejet e.

³⁴Pûchha heh - ne achhih dangletma jabsen chenroh ejien hongjab en a? chenrãngma ngako hungnâng mênchong danglahma ba thunma hongjab eka.

³⁵Mihnyan senma ate hungnâng asentong lahma jabkhabsen hongjabwên era; ngale mihnyan chhih ma ate hungnâng achhih tonglahma jabkhab chhih hôngjabwên era.

³⁶“Ngama nenâng thôkoh eka, metloatjâ rãngwoko chentô mihnyan ma atema chentô jabkhab chhih jabtah a ereheh eloat sietkoh a.

³⁷Ne jabkhab heh nenâng metloatrãng kepmin, ne asenba achhih pa ne jabkhab pumma eloatsiet a.”

Apatritli Moatlem Khesokrãng Chien
(Mak 8.11-12; Luk 11.29-32)



³⁸Erediko Niemarang jette ngale Farasi khuthema hongjab lahma ngatwah, “Hethôte”, “nangma patritli moatlem molohma ninâng khesok hi ngama huneki.”

³⁹Jisu patrii lahma dânthâng wah, “Areroan wah mihnyan heh chentô chhih a, ngale Joban min jetwak mah!” “nganâng patritli moatlem khesokrăng chien eha? khesokmah! Mõng Jona patritli petah pa loloba nerăng patritli moatlem dângmin.

⁴⁰Chenroh Mõng Jona ngahdong wokkhen nâng ngihrem penrem tongtah a, ererăngrăng jôba, Mihnyan Chha pemin ngihrem penrem hahken khennâng etonga.

⁴¹Metloat rangwo jâko, Ninivi wah mihnyan heh ne mathahko toanchep lahma nenâng achhih engahèn, chenrăngma ngako Jona ma Joban nginthô tatlahma thinpap wah hungngaklit wah; ngale ngama nenâng thôkoh eka, Jona noma ajahthem adongpa thejâ ako tonga!

⁴²Khope renjâ rangwo ko, sannyup wah Siba wangcha memin toanchep lahma achhih engahèn, chenrăngma ngako, ate diak hahtaang wah Solomon lowang buthi mongthem senpa herăng hokwah; phumma ngama nenâng thôkoh eka, Solomon nomemin ajahthem adongpa thejâ ako tonga!

Juchhih Ngakhok

(Luk 11.24-26)

⁴³“Chenthu juchhih pa mihnyan wah meloatchhoan tahko, hahran khojêng jêngnâng phoangchhoan lahma ate boantông răng the rânglem chhoan a. Phumma the lechoh medang ako,

⁴⁴atedede rângngariia, ‘chenre ngahum kowah loatchhoantek a, ere kojô ngakwang ang’ ephumma chenthu ere humko ngakhokko, humpa sekho, sâpoangpoang ngale tiamtete etongla a.

⁴⁵Erediko ate ngakchhoan lahma ate noma ajahthem juchhih ahan wanengit lêsiet lahma ere humko ngaksong hûeka. Ere diphumma, ere mihnyan pa khebâng wah noma ajahthem achhih dangeka. Eroh jôba arerôan wah mihnyan chhih hehnângmin dângmin.”



Jisu Nyong ngale Ate Naa heh

(Mak 3.31-35; Luk 8.19-21)

⁴⁶Jisu mihnyan heh demnâng jabmîn thuko, ate nyong ngale atena heh hokwah. Thin a thakhoko cheplahma Jisu demnâng jabmîn hunwakwah.

⁴⁷Ephum-ma erekowah mihnyan wathema Jisu nâng ngatwah, “Sûtan, nang nyong ngale nangnaa heh thakhoko chepwak eka, ngale nang demnâng jabmîn hunwak eho.”

⁴⁸Jisu ma dânthâng wah, “Nga nyong pa hen a? ngale nganaa heh hen a?”

⁴⁹Erediko ate dijunte hehnâng thhetkat lahma Jisu ma ngatwah, “Sûtan en! nga nyong ngale nganaa heh anã heh!”

⁵⁰Hen-henma rangkethung wah nga Wa Joban ma huneka ere moatlem heh moeka ere hehba nga pho, nga nya, ngale nga nyong.”

Mathiu 13

Chhahli Wênte Nginthakthô

(Mak 4.1-9; Luk 8.4-8)

¹Erejâjâko Jisu hum wah loatchhoan lahma josi ngenâng kalahma hahko tonglahma hethô wah.

²Ate tumlit ko khôanhûtah mihnyan heh jahmông dangjunko khôankhoko chhangkat wah, ngale mihnyan heh jophako chepwah.

³Jisu ma ngingthakthô keplahma thinnâng ajahthem nging thôkoh wah. Atema ngatwah, “tat en, rekthenâng mihnyan wathema chhahli wênchhoan eka.

⁴Atema pitnâng chhahli wênko, wanwanthe chhah pa lemôngko chatjâeka, phumma wo heh hûlahma tuphhek eka.

⁵Wanwanthe chhahpa longrã khohko chatjâeka. Phumma hahpa alu ledang dangjunko chhahpa sitsiak koat eka.

⁶Phumma san chaanhông rienrien koatnyan chhahpa sanma ritsah eka; chenrângma ngako, chhahrin pa alu lesut dangjunko sitsiak choakjâeka.

⁷Wanwanthe chhahpa suhbuk mongnâng chatjâeka, phumma suhbuk pa donglahma chhahpa tahbuk eka.



⁸Rohkomin, wanwanthe chhah heh hahsen nâng chatjâ lahma chhahbâng pumma chhahri hongrieka; wanwanthe ma châthe, wanwanthe ma roak erok, ngale wanwanthe ma roakrem chhahri hongrieka.”

⁹Ngale Jisu ma athôanko, “Nenâng nâ metong hênko tat en!” ngama ngalahma jekthô wah.

Nginthakthô pa chenni rãngma Thôwah a

(Mak 4.10-12; Luk 8.9, 10)

¹⁰Erediko dijunte heh hûlahma Jisu nâng chhienwah, “mihnyan heh demnâng jabmîn poatko nangma nginthakthô pa chenni rãngma kep ekoa?”

¹¹Jisu ma dânthâng wah, “rangkhethung Hahsông nginpa thinnâng ledang nenâng jetthuk rãng kepekãng.

¹²Hen mihnyan ma chenni komin cheieka, ere mihnyan ko ajah lêkohmin, erohkoba atenâng lephang leleng edanga; phumma hen mihnyan nâng chenjô aho dangeka, ere mihnyan kowah atema chenni cheieka erepemin tôanchhoan rêmin.

¹³Thin demnâng jabmîn poatko ngama nginthakthô kep ekangpa, thinma esûwak a, rohkomin khemah, ngale thinma ejetat wak a, rohkomin jettatmah, ba jetlomah.

¹⁴Erohawah Isaia môngma thôtah nginpa thin khohnâng toangtang dangkaera: ‘Are mihnyan hehma chentojô mejetat akomin, lejet tatmin; thinma chentôjô mesû akomin, lejet khemin,

¹⁵Chenrãngma ngako thinhung thinrin pa batah, thinnâ memin tattumah, ngale mitmemin khetumah. Joban ma ngaeka, ‘Eroh ledang ngako, thin mitma chenketah, ngale nâma chentattah, Ngale thin hungma chenjetlotah, ngale ngatânâng chenngak hûwaktha, Joban ma ngaeka, ngale ngama thin chenme siettek.’

¹⁶“Phumma ne chentô khengraangsen a! nemitma khe eken, ngale nâmemin tat eken.



¹⁷Ngama nenâng nginlinlin thôkoh eka, ajahthem môngama hehma ngale toangtang mihnyan hehmemin, nema chenni khe eken a, erepa khehun eka, rohkomin thinma chohkhe mah, ngale nema chenni tat eken a, erepa chohtat huneka, rohkomin thinma chohtatmah.

Jisu ma Chhahli Wênte Nginthakthô pa Ngaksên Thôkoh

(Mak 4.13-20; Luk 8.11-15)

¹⁸“Tat en, chhahli wênte nginthakthô pa chenni nâng thakthô eka, ngale ekowah he en.

¹⁹Hen akomin rangkethung Hahsông nginpa chohtat lahma lejetlo dangeka, ere mihnyan heh lemông nâng chatjâte chhah răngrăng. Juchhih hûlahma thinhung nâng Joban ngin wêntah heh nyen chhoan eka.

²⁰Longrã khohnâng chatjâte chhah răngrăng pa, henma komin Joban nginpa chohtat rienrien khuhah nâhah kepte heh.

²¹Rohkomin erengin pa thinhung khennâng lulitlit lupmah, erohwah thin lekrôngmah. Erohwah, chenthu Joban jabkhab junma chêmchei ba mihma chêmthukko, thinma lemlienma ethinpha.

²²Suhbuk mongnâng chatjâte chhah răngrăng heh dangeka, Joban nginpa chohtat lahma hei angem roandông răng sekmah patritte mihnyan heh, thin hungko chhu alu dânghun pumma Joban nginpa tangbuk eka, erohwah thinma ari hongrimah.

²³Ngale hahsen nâng wênte chhah răngrăng heh dangeka, Joban nginpa chohtat lahma jienjet loatte mihnyan heh: wawathe ma châthe, wawathe ma roak erok, ngale wawathe ma roakrem hongri eka.”

Hin Nginthakthô

²⁴Jisu ma thinnâng ahan nginthakthô min thôkoh wah: “Rangkethung Hahsông pa arerăngrăng. Mihwa pumma ate pitko chhahli lisen wênkat eka.

²⁵Jâthe rangpen nâng anga nga jup diko, ran hûlahma chhah heh demko hin johwênthien kolahma ngakchhoan eka.



²⁶Chhahbãng pa donglahma chhahpo chhahri riiphûngko, hin pemin hôngphoak wah.

²⁷Ere mihwa haapa wãng lahma Atenâng ngatwah, ‘Tângte, nangma nang pitko chhahli lisen wênwah dangmohne; chenwah are hinheh hongphoak eka?’

²⁸Atema dânthâng wah, ‘Arepa ran hehma wênhû eka’, phumma haa hehma Atenâng ngatwah, ‘nima hinheh phuphe kaea?’

²⁹Tângtewa ma dânthâng wah, ‘nekphu pheka en,’ ‘chenrãngma ngako, nema hinheh phuphe poatko chhahmin hinheh demnâng môangjoh phuphe en.

³⁰Chhah pa mamun munko, chhah ngale hinnii aroamma chendonga. Erediko ngama chhah khente hehnâng hinpa bângphuphe lahma roapkhek lahma wennâng thekrãng echien ang. Ngale erediko chhah pa khen lahma pumnâng sekthien rãng ethôkoh ang.’ ”

Jokangken Nginthakthô

(Mak 4.30-32; Luk 13.18, 19)

³¹Jisu ma thinnâng eredikomin ahan nginthakthô thôkoh wah: “Rangkhethung Hahsông pa arerãngrãng. Mihnyan wathema jokangken keplahma ate pitnâng wênkat eka.

³²Are jokangken pa chentô wah kenrinthôan, rohkomin ere kenpa mehongphoak tahko chentô noma adongthôan dangeka. Bãng rãngrãng danglahma ate phak hehnâng wo heh memin arup rupeka.”

Wichhi Nginthakthô

(Luk 13.20, 21)

³³Jisu ma eredikomin thinnâng ahan nginthakthô thôkoh wah: “Rangkhethung Hahsông pa arerãngrãng. Dihiaknyu wathema wichhi pa toak roakbelii pheban demko sakmîn lahma pheban pa phangtang mabiet bietja thien eka rãngrãng.”

Jisu ma Nginthakthô Demnang Thôkoh

(Mak 4.33, 34)



³⁴Jisu ma mihnyan hehnâng chentôpa nginthakthô demnâng thôkoh wah; Atema nginthakthô demnâng ledangma chenmin thôkohho.

³⁵Arepa atema mông hehma jabtah nginpa toangtang dângrăng moatwah: “Nga thin demnâng jabmînko nginthakthô demnâng ejabmîn ang; Rangbâng habbâng thuwah lelep jetthin heh ngama thinnâng ethôkoh ang.”

Jisu ma Hin Nginthakthô pa Ngaksên Thôkoh

³⁶Chenthu Jisu loangchhang pa phethien lahma humkhen nâng lupwângko, ate dijunte heh ate tânâng junwãng lahma Atenâng ngatwah, “Pitwah hin nginthakthô pa chenni nâng ngaeka erepa ninâng ngaksen thôkohhi.”

³⁷Jisu ma dânthâng wah, “Chhahli lisen wênte pa Mihnyan Chhapa;

³⁸Pitpa are hahtokkhoh pa; chhahli lisen pa rangkhethung Hahsông nâng tâchoh wângte mihnyan heh; hinpa Juchhih rãng dângte mihnyan heh;

³⁹ngale hinken wênkohte ranpa joak ajo heh. Chhah pômûn pa rangle hahkho thôn sanpoat pa, ngale chhah munchoan khênte heh Joban ngintatte heh.

⁴⁰Chenroh hinheh khônaphu lahma wennâng thek eka, ererãnggrãngjô rangle hah thôn sanpoat komin dângmin:

⁴¹Mihnyan Chhama ate ngintatte heh ate Hahsông khen wah mihnâng pap phoangmoat thukte ngale ahan chentô kaamchhih moatte heh khônansiet rãng echien chhoan a,

⁴²ngale thinma ereheh pap wendô khohko ephekat a, phumma eretheko thin asepp nungma pâchupkek lahma etongwak a.

⁴³Erediko Joban chha heh thin Wa Hahsông theko sanphiak rãnggrãng phiak lahma etonga. Nenâng nâ metong hênko arepa tat en!

Ahuhriem wah Ngun Nginthakthô

⁴⁴“Rangkhethung Hahsông pa arerãnggrãng. Mihnyan wathema pitnâng huhriem wah ngun choh eka. Phumma atema erepa ngak huhriem lahma, nyahrãng rinroan bahsa wãng lahma ate chhahkhem chentô heh sengwâng wah, ngale erediko atema ngakka lahma ere pitpa riieka.



Litpha Nginthakthô

⁴⁵“Rangkhethung Hahsông pa arerăngrăng min dăngmin. Mihnyan wathema litpha phasen lemeka,

⁴⁶Chenthu tema asenthôanpa mechohtahko, chhoan lahma ate chhahkham heh phangtang senglahma ere litphapa riieka.

Chaak Nginthakthô

⁴⁷“Rangkhethung Hahsông pa arerăngrăng min dăngmin. Ngahloatte mihnyan pumma ate chaakpa josiko hatkat lahma jatrup ngah loeka.

⁴⁸Chaakko mênchong memen tahko, thinma bamko chaakpa sietwên lahma, hahko tonglahma ngah heh renwak eka: asen senpa thin tốngko sekwak eka, ngale achhih chhihpa petphe rewak eka.

⁴⁹Rangle hah thôn sanpoat komin erohjô dăngmin: rangwah Joban ngintatte heh chhoan lahma mihnyan chhih heh mihnyansen chhang wah ekhôansiet a

⁵⁰ngale ereheh pap wendô khohko ephekat a, enâng thin asep nungma pâchupkek lahma etonga.

Toangtang Nyan ngale Toangtang pa

⁵¹“Nema are heh jet ekenle?” Ngama Jisu ma thinnâng chhienwah. Thinma, “Jet eki” ngama dânthâng wah.

⁵²Ephumma atema thinnâng dânthâng wah, “Are ngaeka pa chentô, niemarang hethôte hehma rangkhethung Hahsông dijunte rãng dangwak eka, erepa hum tângte wama ate pum wah chhahkhem anyan ngale apã aroamma loatsiet răngrăng dangeka.”

Nazarat nâng Jisu Thāsê

(Mak 6.1-6; Luk 4.16-30)

⁵³Jisu ma ngingthakthô heh tathô kolahma erethe kowah loatchhoan wah

⁵⁴ngale ate songtah hahdaangko ngakhok wah. Atema Sanagog nâng hûlahma hethô wah, ngale ate nging chohtatte heh bârit rewakwah. Thinma thôngphâ wah, “Atema are nging ariat pa chenko wah chohjet eka?” “ngale are patritli moatlem heh chenroh jienmo eka?”



⁵⁵Atea khoangtekte chha ledangne? Mariam pa ate nyong ledangne? ngale Jems, Josep, Simon, ngale Juda heh ate naa ledangne?

⁵⁶Ate naa dihiaknya heh anângwah sôngte heh ledangne? phumma atema are chaanpa chenwah choh eka?”

⁵⁷Ere diphumma thinma ate thāsê wah. Jisu ma thinnâng dânthâng wah, “Mông pa chentô thenâng toaksân wakeka, rohkomin thinnok ahah ngale ate humkâ kololoba toaksân mah.”

⁵⁸Thinma leputedâlem junko, atema enâng ajahthem patritli moatlem moho.

Mathiu 14

Jon Baptis Rit Ngin

(Mak 6.14-29; Luk 9.7-9)

¹Ere sanpoatko Galili pête Hirot ma Jisu ngin chohtat wah.

²Atema ate khenwah sahhabdong hehnâng thôkoh wah, “Atea linlin Jon Baptis, ngakhîn reka,” “Erohwal Atenâng are patritli moatlem moatrăng chaantong eka.”

³Chenrăngma ngako, Hirot ma Jon loatkhek răng chienwah, phumma janruma khhek lahma phâtek nâng sekwal. Atema arepa atena Filip tangnyu Hirodik ma ngatjunko moatwal.

⁴Chenrăngma ngako, khema nâng Jon baptisma Hirot nâng, “nangma Hirodik pa nang tangnyu răng kepniem aho ngama ngatwal!”

⁵Hirot ma Jon baptis ritphe hunwal, rohkomin Jews mihnyan heh ranchei rewah, chenrăngma ngako, thinma Jon pa mông ngama ngatwal.

⁶Hirot chhatjâ rangwo ko Hirodik chha dihiaknya pa nok atang mako bôangwal. Erepa khelahma Hirot nyahrăng hungsên wah

⁷Hirot ma dihiaknya ko toamsem jabkhab jablahma ngatwal, “ngama toamsem ekang nangma chenni tha ehanga erepa ngama ekoh e!”



⁸Ate nyongma thôkoh junks dihiaknya pumma Hirot ngewah thâwah. “Nganâng athângheh areheko Jon baptis khophang pa wankhoang nâng kohhu hang!”

⁹Lowang pa nyahrâng hungchhih wah, rohkomin, atema rootah mihnyan heh mako toamsêm wah dâng phumma, dihiaknya ma hun ekapa moatkoh râng chienwah.

¹⁰Ephumma Jon khopa phâtek khenko thahdoak katwah.

¹¹Khophang pa wankhoang ko thien lahma dihiaknya ko kohwah, ngale dihiaknya pumma ate nyong nâng katkohwah.

¹²Jon dijunte heh hûlahma ate mangpa pechhoan lahma ruchhoan wah; erediko thinma Jisu nâng thôkoh wah.

Jisu ma Hahjat Bangâ Mihnyan nâng Phhekchhah thuk

(Mak 6.30-44; Luk 9.10-17; Jon 6.1-14)

¹³Jisu ma Jon nginpa chohtat diko, erethe kowah khôankhoma atelolo mihnyan lesongthe nâng chhoanwah. Mihnyan heh ma arepa chohtatwah, Ephumma thin hahpa phethien lahma dakhoam lemma Jisu diko junchhoan wah.

¹⁴Jisu khôankho kowah loatkhôam ko, mihnyan heh jahmông chohkhe wah, phumma thinnâng atema nyahrâng mînchen wah, ngale khun atamte heh atema mesiet wakwah.

¹⁵Erejâ rangjâ thahko ate dijunte heh ate tânâng hûlahma ngatwah, “San nyahrâng lâhementah, ngale areheko mihnyan min hênjô songmah. Are mihnyan heh chienchhoan eko, hahdaang hehnâng chhoan lahma thin dedema phhekchhah chenri chhah chhoanwak a.”

¹⁶Jisu ma dânthâng wah, “Thin nekchen chhoan eka, nema chenli komin phhekchhah liwah koh en!”

¹⁷Thinma dânthâng wah, “Ninâng bankên wanbangâ ngale ngah lanii loloba etonghi”

¹⁸Jisu ma ngatwah, “Ereheh nganâng wênkohha,”



¹⁹Atema mihnyan hehnâng hinkhohko tongen ngama chienwah; erediko atema bankên wanbangâ ngale ngah lanii pa semlahma rangkhethung nâng sùwên lahma Joban nâng dangkoh a ngalahma rangsoam wah. Erediko atema bankên pa chhupsiet lahma ate dijunte hehnâng kohwah, ngale ate dijunte hehma mihnyan hehnâng phênkohwah.

²⁰Anga ngama phoatphoat phhekchhah wah. Erediko dijunte hehma abâ achâ heh echhi phâni chōngchōng khôantôan wah.

²¹Erekowah phhekchhah tah mihnyan heh dihiak ngale leta lechhih heh leweih thangma hahjat bangâ dângwah.

Jisu Jokhohng Khoam

(Mak 6.45-52; Jon 6.15-21)

²²Erediko Jisu ma dijunte heh khôankhoko chhangthuk lahma josi rankanâng dânwânglâ thukwah, ngale mihnyan han hehmin chienchhoan wah.

²³Mihnyan heh chienchhoan diko, hahhokho nâng wãng lahma atelolo ma rangsoam wah. Sanhêmthah komin erethoko Jisu atelolo dângwah;

²⁴Ngale ere sanpoat phumma khôankho pa ataangnâng josi mongtang nâng pōngpōng junko jowakma ditwak lahma dângwah.

²⁵Rangkhahkho wanrem ngale wan erok sanpoat tôko, dijunte heh tânâng Jisu jokhohma khôamhok wah.

²⁶Jo-khohko khoam lahma kheko, thin patrit rewah, ngale chei nungma, “Arepa mihdâpha khe eki!” ngama rakwak wah.

²⁷Jisu ma thinnâng lemlienma rânjab lahma ngatwah, “Hungdongsiet en!” “Ngae, nekchei en!”

²⁸Erediko Piter ma dânjabwah, “Teso, linlin nang medang oko, ngamin jokhohma nang tânâng khoamka thukhang.”

²⁹Jisu ma dânthâng wah, “Karoo!” Ephumma Piter khôankho kowah jâkhoam lahma jokhohma Jisu tânâng khoamkat wah.



³⁰Phumma atema pôngdong pônghok khelahma chei rewah, ngale ate joko lûmjâkat wah. Ephumma, “Teso pênghang!” ngama Piter raksepwah.

³¹Lemlienma Jisu Piter tâko hûka lahma Atenâng lolahma ngatwah, “Nangnâng dâlem pa atôrîn ne! chenrãngma rinsamtoh a?”

³²Waniinii khôankhoko chhangwãng phumma pôngpông pa jekwah.

³³Erediko khôankho kowah dijunte hehma Jisu nâng soamwah, ngale “Linlin nanga Joban Chha!” ngama Atenâng ngatwah.

Jisu ma Ginisarat nâng Khunte Mesiet

(Mak 6.53-56)

³⁴Thinma josi danlahma Ginisarat hahnâng hokwah,

³⁵Enângwah mihnyan hehma Jisu jetloatwah. Ephumma khoanchette mihnyan heh Jisu tânâng siethok kohrãng thin tûm arien diak hehnângmin thinma ngin matchhoan wah.

³⁶Jisu nâng thinma khunte hehnâng nang khetsako sahlothuk mêngo ngama roatsep wah; ngale ate khetsako sahloatte chentô heh khoanchet wah mêwah.

Mathiu 15

Nãngte Nãngwa hehma Hethô wah Niemarang

(Mak 7.1-13)

¹Erediko Farasi ngale Niemarang hethôte heh Jeroselem wah kalahma Jisu nâng chhienwah,

²“Chenni rãngma nang dijunte hehma nãngte nãngwa hehma hethô wah Niemarang heh lekep re eka? Thinma phhekchhah chhah mako dek senthemthem soanmah!”

³Jisu ma dânthâng wah, “Nema chenni rãngma Joban nginpa lekep thangma nededema thôeken junko dangekena?”

⁴Chenrãngma ngako, Joban ma aroh ngaeka, ‘Nang nyong nangwa nginkepkep dango,’ ngale ‘henhenma mâmâ nyong awa nâng tem athoak eka, arepa ritphe rêmin.’



⁵Phumma nema māmâ nyong awa nâng chohsok thiakpa, ‘Joban nâng lâkohtih’ ngama hethô eken,

⁶Ephumma thinma thinnyong awa ngin keptumah. Eroh nema Joban nginpa chhihsiet letma nededema thôeken junko songtong eken.

⁷Ahuhkhoanglep heh! Isaia ma nerãngma profisi hôantahpa toangtang dângwah!

⁸Joban ma ngaeka, ‘Are mihnyan heh ma nganâng thunma loloba soamtô ehang, Phumma thin hungpa linlinko nga tâwah ataangnâng.

⁹Thinma nganâng soamtô pejô mahto nâng soamtô wak ehang, chenrãngma ngako, thinma mihnyan ma hôaneka niemarang heh nganiem ngarang rãngrãng hethôeka!’ ”

Mihnyan Hung Ngeksiet thin Sêmmak

(Mak 7.14-23)

¹⁰Erediko Jisu ma mihnyan heh ate tânâng roolahma thinnâng ngatwah, “Tat en, ngale jetlo en!

¹¹Mihnyan thunko chenni chhahwen eka erepumma niemarang junko ate ngeksiet mah; ate thunwah chenni loatchhoan eka ere pummeba ngeksiet eka.”

¹²Erediko dijunte heh ate tânâng hûlahma Atenâng ngatwah, “Nangma jet ekole, nangma chennijab eko erepumma Farasi heh hungnâng chet reka?”

¹³Jisu ma dânthâng wah, “Rangkhethung wah Ewa ma lekhiet bãng chentôpa phuphe rêmin,”

¹⁴“Thinrãngma neksek mah en! thin a mitdoak, ngale mitdoak heh lemsênte; ngale chenthu mitdoak wathema ahan mitdoak lem mesen ako waniinii jongnâng ejâriiwak a.”

¹⁵Piter ma dânthâng wah, “Are nginpa ninâng senthemthem thôkoh tanhi.”

¹⁶Jisu ma thinnâng ngatwah, “Nea athângheh min ahan heh noma chhin achhiak dangmetne.



¹⁷Nema jetmetne? mihnyan thunko chenni chhahwên eka, arepa ate woknâng kaeka, ngale ate phoangwah loatchhoan reka.

¹⁸Phumma mihnyan thunwah loatjab ekapa ate hungkhen wah loatjabwên era, ngale ere jabkhab pumma mihnyan pa ngeksiet eka.

¹⁹Chenrãngma ngako, ate hungkhen wah buthi mongthem chhih hongeka, erejunko atema mihritphe, mihtangnyu demnâng kaamchhih moat, ngale lirup kaamchhih moat; mihwahnyen, mothô khoanglep, erediko mihphoang chhihthô.

²⁰Ereheh meba mihnyan pa ngeksiet eka. Phumma, thinma ngaeka rãngrãng nema deklesoan thangma chhahrãngma mihnyan pa ngeksiet mah.”

Dihiaknyu Putedâlem

(Mak 7.24-30)

²¹Jisu erethe kowah loatchhoan lahma Tair ngale Sidon hah ngenâng katwah.

²²Ere diaknâng sôngte Kananet dihiaknyu ate tânâng hûlahma raksepwah, “Devit Chha!” “nganâng mammînchen hang! echha dihiaknya sekko juchhih lupeka, phumma nyahrãng cheili chêmeka.”

²³Rohkomin Jisu ma Atenâng khabthemîn rânjabho. Phumma ate dijunte heh ate tâko wãng lahma roatsep wah, “Dihiaknyu pa chienchhoan eko! Atema nãngdidi ko junkhoam lahma are chentôpa chaptin eka!”

²⁴Ephumma Jisu ma dânthâng wah, “Nga a amakhôamte saak rãngrãng Isrial mihnyan mahhâm eka heh tânâng loloba chienkat ehang”

²⁵Ephumma dihiaknyu ma Jisu dathongko khupjup kalahma ngatwah. “Teso, nganâng mamchoh sùhang!”

²⁶Jisu ma dânthâng wah, “Leta heh phhekchhah pa hu hehnâng joakli dangmah.”

²⁷Dihiaknyu ma dânthâng wah, “Teso erepete edanga,” “rohkomin thin tângtewa ma jâphe eka chempha heh hu hehma rãngchhah a.”



²⁸Ere diphumma Jisu ma Atenâng dânthâng wah, “Nanga putedâlem dong dihiaknyu! nangma chenni hun eko erepa edang kohho.” Phumma ere sanpoat poatko ate chhapa mewah.

Jisu ma Mihnyan Jahmoang Mesiet

²⁹Jisu erethe kowah loatchhoan lahma, Galili josi ngenâng katwah. Phumma hahhokho ko kowâng lahma tôngwâng wah.

³⁰Mihnyan hehmate ate tânâng dakò, mitdoak, dekke dake, aba jabmuh, ngale lihân khoanchetma chêmte heh siethû lahma ate dathongko thienhok wah, phumma atema mesiet wah.

³¹Aba jabmuh jienjab, dekke dake heh sen, dakò heh jienkhoam, ngale mitdoak hehmate jienkhe rewah; erepa khelahma mihnyan heh bârit wah; ephumma thinma Isrial heh Joban nâng dangkoh a ngalahma choangpe wah.

Jisu ma Hahjat belii Mihnyan nâng Phhekchhah thuk

(Mak 8.1-10)

³²Jisu ma ate dijunte heh roolahma ngatwah, “Ngama are mihnyan hehnâng nyahrâng mînchen ekang, chenrângma ngako, nga demnâng jârem lâjohkhoam wakthang, ngale ade phumma thinnâng phhekchhah thin chenmin ahotu. Chenmin lephhek chhahthuk thangma chienchhoan hunmek, chenrângma ngako thin humnâng wânglemko bânrit môangrewak a.”

³³Dijunte hehmate Atenâng chhienwah, “Are hahran khokowah aretô mihnyan hehnâng lanle phhekchhah thukroh chenwah phhekchhah chohmin a?”

³⁴Jisu ma thinnâng chhienwah, “Nenâng bankên chentô tonghèn a?” Thinma dânthâng wah, “Ninâng bankên wanengit, ngale, ngah arinchha heh roanche tonghi.”

³⁵Ephumma Jisu ma mihnyan hehnâng hahko tongen ngama chienwah.

³⁶Erediko Jisu ma bankên wanengit ngale ngah heh semlahma Joban nâng dangkoh a ngat rangsoam soamlahma chhupsiet wah, erediko atema dijunte hehnâng kohwah; ngale dijunte hehmate mihnyan hehnâng phenkoh wah.



³⁷Thin chentôma phoatphoat phhekchhah wah. Erediko dijunte heh ma bâachâ heh phâengit chõngchõng khôantôan wah.

³⁸Erekowah phhekchhahte mihnyan heh dihiak ngale leta lechhih heh leweih thangma hahjat belii dângwah.

³⁹Erediko Jisu ma mihnyan heh chienchhoan lahma, atea khôankhoko chhangka lahma Magadan diaknâng katwah.

Mathiu 16

Apatritli Moatlem Khesokrăng Chien

(Mak 8.11-13; Luk 12.54-56)

¹Farasi ngale Saduki Jisu tânâng hutah heh ma Jisu bukritthuk rãng hunwah, ngale Joban pa ate demnâng ngama jetrăngma, ninâng patritli moatlem molohma khesok hi ngama chienwah.

²Phumma Jisu ma dânthâng wah, “Chenthu sannyup katko, nema rângnga en, ‘rangsen edanga, chenrăngma ngako rangpa cheksoaksoak.’

³Ngale rangkhahko rangpa cheksoaksoak ngale rangkhu dângko, ‘rang epat a’ ngama rângnga en. Nema rangnâng sùletma rangchhih rangme pa jetlo eken, rohkomin nema athângwah sanpoat pa jienjet lomet!

⁴Areroan wah mihnyan heh achhih ngale Joban nâng putedâlem wakmah! nema nganâng patritli moatlem khesok rãng chien eha? khesokmah! Nenâng khesokthin pa Jona patritli petah peloloba khesok eka.” Ere diphumma thin tâwah ate loatchhoan rewah

Farasi ngale Saduki heh Wichhi

(Mak 8.14-21)

⁵Chenthu dijunte heh josi ranka nâng dânko, thinma phhekchhah lekphe lahma dânwakwah.

⁶Jisu ma thinnâng ngatwah, “Jetletma dangen, Farasi ngale Saduki heh wichhi wah ataangnâng dangen.”

⁷Phumma thindede tungko jabmîn wah, “Atema are ngaeka pa nângma phhekchhah lekep dângjunko ngaehi.”



⁸Jisu ma thin jabmîn ekapa jetlo lahma ngatwah, “Nedede tungko phhekchhah aho junko chenrãng jabmîn eken a? nenâng putedâlem atô rînne!

⁹Nema athâng nângmin mata jetlo ekenne? Ngama bankên wanbangâ pa hahjat bangâ mihnyan nâng phhekchhah thuktekpa thonghun metne? ngale phâmerôan bâlahma nema khôantoan tet a?

¹⁰Ngale bankên wanengit kowah hahjat belii mihnyan hehnâng phhekchhah thuktekpa thonghun ekenle? Ngale phâmeroan bâlahma khôantoan tet a?

¹¹Ngama nenâng bankên lekep junko ngat dangmahhi ngama chenrãngma lejet reken a? Farasi ngale Saduki heh wichhi hehwah jetletma dangen!”

¹²Erediko dijunte heh ma pheban nâng rêmthin wichhi kowah taang ngat dangmahhi, rohkomin Farasi ngale Saduki heh ma hethôeka niemarang chhih hehwah taangrãng ngaehi ngama jetloat wah.

Piter ma Jisu Ahin Joban Chha ngama Loatjab

(Mak 8.27-30; Luk 9.18-21)

¹³Jisu Kasaria Filipi kêwah hahnâng hûlahma ate dijunte hehnâng ngatwah, “Mihnyan Chha ko mihnyan heh ma hen edanga ngama ngaeka?”

¹⁴Thinma dânthâng wah, “wawathema Jon baptis ngaeho, Ilija ngamemin ngaeho, ngale wawathema Jirimia, erediko hen akomin mông ngamemin ngaeho.”

¹⁵Phumma atema thinnâng chhienwah, “Nema chenroh ngaeken a?” “Nema nga hen edangang ngama ngaeha?”

¹⁶Simon Piter ma dânthâng wah, “Nanga Krista ahin Joban Chha.”

¹⁷Jisu ma dânthâng wah, “Jona chha Simon, nanga rangkepte!” “chenrãngma ngako, are toangtang jabkhabpa mihnyan nyuchha hei angem hungwah hongjab dangmoh, rangkethung wah tângte Ewa Joban ma nangnâng hongjab thuk eho.

¹⁸Ngale piter, ngama nangnâng thôkoh eki: “nanga longrã, are longrã khohko ngama nga Asâthem pa ehoan ang, ngale arepa ritchaan memin leta jienmin.



¹⁹Ngama rangkethung Hahsông kowah sâbipa nangnâng ekoh e; nangma hahtokkhoh ko chenpa tâng eko, arepa rangkethung nângmin tângmin, ngale nangma hahtokkhoh ko chenpa letâng dangeko arepa rangkethung nângmin letângmin.”

²⁰Erediko Jisu ma ate dijunte hehnâng atea Krista ngama hennâng min nekthôkoh en ngama ngatwah.

Jisu ma Ate Chêmchei ngale Arit junma Hôngjab

(Mak 8.31—9.1; Luk 9.22-27)

²¹Ere sanpoat phumma Jisu ma ate dijunte hehnâng laangthôkoh wah, “Nga Jeroselem nâng metkep katmin, phumma khhepho phannang, soam aroakte adong, ngale Niemarang hethôte hehma echêmsiet hang. Nga ritphe ere hang, rohkomin, jârem diko ngakhîn ereang.”

²²Phumma Piter ma sietchhoan lahma Jisu nâng ritngat wah. “Teso! Joban ma arepa ledang thukmin!” ngale “Arepa nangnâng chenthumin ledangmin!”

²³Jisu ma tokdi litphong lahma Piter nâng ngatwah, “joak! ngatâwah taangchhoan o nanga nga lemnâng tângbâng thukte, chenrãngma ngako nangma are thonghun ekopa Joban wah dangmah, mihnyan hei angem hungwah thonghun eko”

²⁴Erediko Jisu ma ate dijunte hehnâng ngatwah, “Hen akomin nga demnâng chhoan mehun enko, atedede lekpherii lahma, ate bãngphak pa pelahma nga dijunmin.

²⁵Chenrãngma ngako, henhenma atedede roandôngpa pêsietrit huneka, erepumma mahphe erea; rohkomin henhenma atedede roandôngpa ngarãng mahphe eka, erehehma echoh a.

²⁶Nema rangkhen hahtok pa phangtang tachoh letma nedede roandôngpa memahphe enko nema chenni echoh ena?

²⁷Chen-rãngma ngako, Mihnyan Chhapa ate Wa chaan keplahma rangkethung wah ngintatte heh demnâng ekara, ngale erediko anga nganâng mâmâ moatlem junko atema thã ekoh a.



²⁸Ngale ngama nenâng linlin thôkoh eka, Mihnyan Chhapa Lowang danglahma kat lekhe thangma ako leriite mihnyan tongen.”

Mathiu 17

Thhenphăng Litjâ

(Mak 9.2-13; Luk 9.28-36)

¹Jâerok diko Jisu ma ate demnâng Piter ngale pho anaa Jems ngale Jon sietlahma hahho choang khonâng wângwah, ereko thinlolo dangwah.

²Thin mitkhe kheko, Jisu litjâ lahma khewakwah: Ate thhenphăng pa san rângrăng phiakwah, ngale ate khetpa nyahrăng potutu pôphiakwah.

³Erediko dijunte warem pumma Mosa le Ilija nii Jisu demnâng nginthômîn lahma khewah.

⁴Ephumma piter ma Jisu nâng ngatwah, “Teso nâng aretheko tôngpa chentôsên a! nangma mehun oko, ngama ako hum phangrem hoan ang, nangrăng phangthe, Mosa răng phangthe, ngale Ilija răng phangthe hoan ang.”

⁵Ate jabmîn thuko, thinkhoko phoam phiakjaja bukhok wah, ngale phoam kowah jabkhab hongjab lahma ngatwah, “Arepa nga Chha linlin, ngama Atenâng nyahrăng hun ekang, ngale nga ate demnâng nyahrăng rinme ekang-ate ngin tat en!”

⁶Dijunte hehma ere jabkhabpa tat lahma, nyahrăng cheiwak lahma hahko khupjup wah.

⁷Jisu thin tânâng kalahma, thinnâng sahlo kalahma ngatwah, “Chepen” “Nekchei en!”

⁸Ephumma, thinma toansok wênko ahan henjô lekhetu thangma Jisu leklek chohkhe wah.

⁹Thin hahkongkho wah ngakkatko, Jisu ma thinnâng ngatwah, “Mihnyan Chha ritwah mangak ngakhinko, are nema chohkhe tetpa hennâng min nekthôkoh en.”



¹⁰Erediko dijunte hehma Jisu nâng ngatwah, “Chenni rãngma Niemarang hethôte hehma Ilija khekho katmin ngama ngaeka?”

¹¹Jisu ma dânthâng wah, “Ilija pa linlin khekho ekara,” “ngale rongruppa atema ekhoakhem a.

¹²Rohkomin ngama nenâng thôkoh eka, ‘Ilija rãkatha’ phumma mihnyan hehma ate lejet thangma thinma chenroh huneka eroh Atenâng hânjôn wah. Erohjô Mihnyan Chha komin thinma ehânjôn a.”

¹³Erediko ba atema thinnâng Jon bapris junma thôkoh wah ngama dijunte hehma jetloat wah

Jisu ma Juchhih Lupte Dela Chha Sênsiet

(Mak 9.14-29; Luk 9.37-43a)

¹⁴Chenthu thin loangchhang tânâng ngakhokko, mihnyan wathe hûlahma ate mathahko dakuh thôhok wah,

¹⁵ngale atema ngatwah, “Teso, ngachha ko mammînchen mêngo! atea wobuhte ngale cheili loangrii lahma roantangma wen ngale jonâng chijârii eka.

¹⁶Ngama nang dijunte heh tânâng siethok wah, rohkomin thinma tasensiet mah.”

¹⁷Jisu ma dânthâng wah, “Nema putedâlem met, ngale nea mihnyan chhih! Chentô rangwo nga nedemnâng eta johtonga? ngale chentô rangwo ngama nenâng eta chohsûa? naa pa ngatâko sietwênro!”

¹⁸Jisu ma juchhih ko chhoanrãng chien phumma naa sekkowah loatchhoan wah, phumma ere sanpoatko naa pa sênwah.

¹⁹Erediko dijunte heh Jisu tânâng thin lolo hûlahma Atenâng thôngphâ wah, “Nima chenrãngma juchhih pa letajunlo rekia?”

²⁰Jisu ma dânthâng wah, “Nenâng putedâlem pa ajah aho dângkawah nema letajunlo reken” “Ngama nenâng nginlinlin thôkoh eka, nenâng jokangken dôngtô putedâlem metong hênko, nema are hahkong komin, ‘arekawah ireko kao!’ ngama tanga en, eko are hahkong pa eka a. Nema chenmin tamo en!”



Jisu ma Ate ritjunma Wienthe Jabwah

(Mak 9.30-32; Luk 9.43b-45)

²²Dijunte heh Galili nâng phangtang roamkhôn hokko, Jisu ma thinnâng ngatwah, “Mihnyan Chhapa ate ritphete mihnyan heh deknângkoh lâthângtah

²³thinma ate ritphe erea; rohkomin, jârem diko ate ngakhîn erea.” Ephumma dijunte heh nyahrãng hungchhih wah.

Rangsoamhum Thãkhokoh

²⁴Chenthu Jisu le ate dijunte heh Kaparnam hahnâng hokko, rangsoamhum thã thãkho thâte hûlahma Piter nâng thôngphâ wah, “Ne hethôte ma rangsoamhum thã thãkhokoh ekale?”

²⁵Piter ma, “Koh eka” ngama dânthâng wah, Chenthu Piter humkhen nâng lupwângko, Jisu ma ranjabkho ranjabwah, “Simon nangma chenroh thonghun eko? Are hahtokkhoh wah lowang hehrãng moatlem pa henma mokoh eka, ngale thinnâng thãkho henma koheka? ate diakwah mihnyan hehma koh ekale, mihiak wah mihnyan hehma koheka?”

²⁶Piter ma dânthâng wah, “Mihiak wah mihnyan hehma koheka” Jisu ma wien dânthâng wah, “Sen a,” “eroh medang ako are diakwah mihnyan hehma lethummin.

²⁷Rohkomin nãngma are mihnyan heh hungkethuk hunmih. Erohwah ngahnôn janphoan pa kepletma josiko noankat en. Nema khebâng thôn chohnôn eken ngah thunkâko ngunpha echoh en, ere ngunphapa ngarãngmin, ngale nekhû rãngmin rangsoamhum thãkho lânle thumroh edanga. Erepa kepletma nãngkhû anga ngarãng thumwên en.”

Mathiu 18

Henpa Adongthôn a?

(Mak 9.33-37; Luk 9.46-48)

¹Ere sanpoatko dijunte heh hûlahma Jisu nâng thôngphâ wah, “Rangkhethung Hahsông theko henpa adongthôn dãngmin a?”

²Phumma, Jisu ma letachha wathe roolahma thinmako chepthuk wah,



³Ngale atema ngatwah, “Ngama nenâng nginlinlin thôkoh eka, nemin hung arin litletma are letachha rãngrãng ledang kenko, rangkhethung Hahsông thenâng chenthumin leta chohwãngmin.

⁴Rangkhethung Hahsông thenâng adong thônpa, are letachha rãngrãng atedede hen numnene dangeka ereheh dãngmin.

⁵Ngale henma akomin are letachha rãngrãng danglahma ngamînko tãngroo eka, erepa nganâng tãngroo ehang.

Pap Moatthuk

(Mak 9.42-48; Luk 17.1, 2)

⁶“Henma akomin nganâng putedâlemte are arinchha hehwah wathe nganâng putedâlem pa memah phethuk ako, ere mihnyan rãngma ate bohko longdong khhek lahma josiko jâtoakkat peba asen edanga.

⁷Are hahtokkhoh wah mihnyan heh putedâlem mahphe thukthin tongeka pa thinrãngma chentô cheilia! phumma arerãngrãng pa roantangma edanga - rohkomin ere mahphe thukte hehrãngma chentô cheili dãngmin a!

⁸“Nedek ba neda ma ne putedâlem pa memah phethuk hênko, erepa thahdoak letma petphe en! nerãngma dektu datu dangletma khope choh peba, dek ada kaniinii thienletma chenthujô lemutthin papwendô nãng khâmrit rãng phekat noma asen edanga.

⁹Ngale nemit ma ne putedâlem pa memah phethuk hênko, erepa loatphe re en! nerãngma mitka dangletma khope choh peba, mit kaniinii thienletma chenthujô lemutthin papwendô nãng khâmrit rãng phekat noma asen edanga.

Amahkhôm wah Saak Nginthakthô

(Luk 15.3-7)

¹⁰“Jetletma dangen, nema are arinchha thôn hehnângmin thã nekjô en. Ngama nenâng thôkoh eka, thin nãngmin rangkhethung nãng thin ngintatte tonga, ereheh rangkhethung wah nga Wa Joban demko roantangma johtong eka.

¹²“Nema chenroh thonghun eken a, chenjô komin mihnyan wathema ate saak châthe kowah wanthe lâmah phetah? Atema roak ekhu wan ekhupa hahkong



khoko phemphhek thukthien lahma, mahkhôam re eka saak wantheпа lemrãng echhoan a.

¹³Ngama nenang thôkoh eka, chenthu atema erepa mechoh tahko, lemah khoamte roak ekhu wan ekhu noma, mah retah wanthe demko ajahthem rin eroan a.

¹⁴Ererãngrãng nekhu Wa rangkhethung nang tôngte Joban memin are arinchha hehwah wathe tomin mahphe hunmah.

Pap Moatte nãng Pho anaa

¹⁵“Nepho nena pumma nerãng pap memo ako, ate tãnang kaletma ate chenni nang theka erepa khesok en. Phumma erepa nechhe tungko lolo huhphen sietmîn en. Phumma atema nang ngin mekep hoko nangma nangpho ba nangnaa pa lâta ngaksiettoh.

¹⁶Rohkomin atema nang nginpa lekep medang hoko, Joban nyapraang nang raangeka rãngrãng, ‘nang demko wathe ba wani mihnyan lesiet o, erohkoba wani warem hãkhi demnang kaletma ate chentõnang thê eka ereheh loatthôkoh en.’

¹⁷Ngale atema thin nginmin lekep medang ako, chentõpa Asãthem hehnang thôkoh en, ngale atema Asãthem heh nginmin lekep medang ako, Joban lejette mihnyan ngale thãkho thãte mihnyan heh rãngrãng thinphe en.

Lemothin ngale Amoatthin Moatlem

¹⁸“Ngale ngama nekhu anga nganang thôkoh eka: Nekhuma are hahtokkhoh ko chenpa lemothin moatlem a erepa rangkhethung nangmin lemomin, ngale nekhumã are hahtokkhoh ko chenpa moeken a arepa rangkhethung nangmin moatmin.

¹⁹“Ngale ngama nenang ademin thôkoh eka: Are hahtokkhoh ko nekhu wah wani hungjut letma chenni rãng komin rangmesoam enko, rangkhethung wah nga Wa Joban ma erepa nerãng emokohhèn.

²⁰Chenrãngma ngako, chenko wani ba warem ngamînko khõan eka, ereko ngamin thin demnang etongang.”



Map Leta kohte Haa Nginthakthô

²¹Erediko Piter Jisu tânâng kalahma thôngphâ wah, “Teso, nga pho anaa ma ngarãng pap metham depmo ako, ngama Atenâng depmeroan map kohmin a? Dep engit kohminne?”

²²Jisu ma dânthâng wah, “Dangmah, Dep engit dangmah,” “roakengit dep engit kohmin,

²³Chenrãngma ngako, rangkethung Hahsông pa arerãngrãng. Rekthenâng lowang wathema ate haaheh demnâng thăpê phênsietmîn rãng phungwah.

²⁴Atema phênsietmîn rãng ngatko, Atenâng hahjat echhi thăpê pête wathe bângsiet hokkohwah.

²⁵Phumma haako ate thăpê pa lanta ngakthumroh ngun aho dângwah, ephumma lowang pumma ate thăpê pa tâthum rãng, ere haako ate tangnyu, ate chha heh, ngale ate chhahkhem wanlem phangtang mihnâng hu ahaarãng senglohma thăpê heh thumhang ngatwah.

²⁶Haa pumma dakuhtô lahma lowang ko roatsep wah, ‘Nganâng mammînchen hang,’ ‘ngama chentôpa ethum e!’

²⁷Lowang pumma Atenâng mînchenwah, ngale ate thăpê heh map kohlahma chhoanthuk wak.

²⁸“Erediko ere haapa chhoan lahma ate rãngrãng haa Atenâng chăthe thăpê pête chohmînwah. Phumma atema lolahma bohko phiet lahma, ‘ngawah thapê pêthangpa ngakthum ehang!’ ngama ngatwah.

²⁹Ephumma ere haa pumma khupjup lahma Atenâng roatsep wah, ‘nganâng mammînchen hang, ngama chentôpa ethum e!’

³⁰Rohkomin, atema mapkohmah; mapkoh noma, thapê heh phangtang mata tathum phătek nâng sekwah.

³¹Chenthu haa ahan hehma chenni dangeka arepa khelahma, thin nyahrãng hungchhih lahma lowang tânâng wãng lahma chentôpa thôkoh wah.



³²Ephumma ate haapa roolahma ngatwah, ‘Nanga sekhothôan haa! nangma roatsep junko ngama nangwah thapê heh phangtang map lâkohtih.

³³Ngama nangnâng map kohtih rãngrãng, nang memin nang rãngrãng haako mapkohli dangmah tohne.’

³⁴Ephumma lowang pumma nyahrãng rinkhah lahma ere haapa Atenâng thapê heh mata tangak thum phâtek nãng sek lahma chêmsiet wah.”

³⁵Ngale Jisu ma jekthô wah, “Nememin nepho anaa hehnâng nehung khenma maplekoh kenko, rangkethung wah tãngte nga Wa memin nenâng eroh ehôanhèn.”

Mathiu 19

Jisu ma Tangnyu Chiakphe junko Hethô (Mak 10.1-12)

¹Chenthu Jisu ma are nginpa thôkoh diko, Galili wah chhoan lahma jordanjo ranka wah Judia diaknâng katwah.

²Loangchhang dongpa ate diko junkhoam wah, ngale Atema eretheko mesiet wakwah.

³Farasi khuthe hûlahma ate bukritthuk hunlahma Atenâng thôngphâ wah, “Nãng Niem junko, tangwa ma ate tangnyu pa atema chenni junko chiakphe huneka, erejunko tachiakphe ale?”

⁴Jisu ma dânthâng wah, “Joban ma rang ahah bãnghôan thuko mihnyan pa dihiak ngale dela hânwah, ngama Joban nyapraang nãng raang ekapa nema mathat chohweihne?”

⁵Ngale Joban ma ngatwah, ‘Are junko tangwa ma ate nyong awa thinphe lahma ate tangnyu demnâng johroam sãngmin, ngale wanii pa phoangtherãng dânmin.’

⁶Eroh wah thin a wanii dangtumah, wathe lâdangtah. Joban ma chenpa roapsiet eka, erepa mihnyan ma lephan sietmin.”



⁷Phumma Farasi hehma atenâng chhienwah, “Eroh medang ako, Mosa ma kohwah ate Niem junko tangwa ma ate tangnyu ko chiakphe nyapraang raang kolahma chenchien chhoan a, ngama chenrãng ngatwah a?”

⁸Jisu ma dânthâng wah, “Nenâng hethô pa alat dângjun ko Mosa ma ne tangnyu tachiakphe en ngama ngatwah. Rohkomin rang ahah bengahôn thuko eroh ledangwah.

⁹Ngama nenâng thôkoh eka, henma komin ate tangnyu mihdela demnâng kaamchhih moatjun wah ledang thangma chiakphe lahma tangnyu ahan methe ngakkep ako, ere thêkep reka dihiaknyu demko kaamchhih lâmotah.”

¹⁰Ate dijunte hehma atenâng ngatwah, “Tangnyu tangwanii are ngin junko lolo tâchiakphe mînmin ngama medang ako, lechêm kepmin peba asen.”

¹¹Jisu ma dânthâng wah, “Are hethô ekapa anga ngama takepmah, Joban ma henhen nâng koh eka ereheh ma loloba takep eka.

¹²Chenrãngma ngako mihnyan nâng mâmâ jat apat junko dihiak lekep thangma tângte hongeka: wawathe pa achhat mejû lekep jat hongchha eka; wawathe pa mihnyan hehma dihiak lekepte dangthuk eka. Ngale wawathe pa rangkethung Hahsông rãngma sênrãngma lekep thangma tongwak eka. Are niem pa chente ma takep eka ereheh ma chenkep a.”

Jisu ma Letachha hehnâng Rangkoh

(Mak 10.13-16; Luk 18.15-17)

¹³Mihnyan khuthema thin chhuchha heh Jisu tânâng ate dekma sahlo lahma rangsoam koh rãng siethok wah, phumma dijunte hehma mihnyan hehnâng ritngat rewah.

¹⁴Jisu ma thinnâng ngatwah, “Nekjek tangen, letachha heh ngatânâng chenwãngra, chenrãngma ngako rangkethung Hahsông pa are letachha rãngrãng heh thiak.”

¹⁵Atema letachha heh khoko dekma sahlo lahma chienchhoan wah.

Techhuwa

(Mak 10.17-31; Luk 18.18-30)



¹⁶Rekthenâng mihnyan wathe Jisu tânâng hûlahma atenâng chhienhok wah. “Hethôte,” “ngama roantang roanjêng lerii roandông chohrăngma chenni moatlemsen moatmin a?”

¹⁷Jisu ma dânthâng wah, “Nganâng chenpa moatlemsen moatthin a erepa chenrăngma chhien ehanga?” “Asenpa wathe loloba tonga. Nangma roantang roanjêng lerii roandông chohhun medang oko, Joban hôkum heh phangtang kep o.”

¹⁸Mihwa pumma dânthâng wah, “Joban hôkum heh chenheh a?” Jisu ma dânthâng wah, “Mih nekriphe, mihdihiak demnâng kaamchhih nekmo; ahuh nekre; mihnâng ledangli nâng neksekham;

¹⁹Nang nyong nangwa rancheichei dango; ngale nang kêanâ wah mihnyan hehnâng nangdede phoangko hunrii eko răngrăng hun o.”

²⁰Techhuwa ma dânthâng wah, “Are chentô hôkum heh ngama kep kangjû” “Are leko ngama lihân chenni moatthin tongtûa?”

²¹Jisu ma atenâng ngatwah, “Nanga rongrup ngenâng asen dânghun medang oko, chhoan lohma nang chhahkhem chentôpa senglohma ngunpa tangchhih hehnâng koh o, ephumma nanga rangkhethung nâng techhu thôn edango; ngale erediko ngakka lohma ngadijun hang.”

²²Chenthu techhuwa ma erengin pa chohtattah diko hungkeke danglahma ngakchhoan wah, chenrăngma ngako atea nyahrăng techhu dânghwah.

²³Erediko Jisu ma ate dijunte hehnâng ngatwah, “Ngama nenâng nginlinlin thôkoh eka: Techhu hehrăngma rangkhethung Hahsông thenâng wângpa nyahrăng alat.

²⁴Ngama ademin thethôkoh eka: Techhuwa pa Joban Hahsông thenâng tâwâng noma, ut peba metku polo pumma eta lienlup a.”

²⁵Chenthu dijunte hehma erengin pa chohtatko, thin bârit rewakwah, ngale thinma chhienwah, “Eroh medang ako henkho tâpemin a?”



²⁶Jisu ma thinnâng thongthong sùkat lahma ngatwah, “Arepa mihnyan ma chenthumin letamin, rohkomin Joban rãngma chenjo letathin aho.”

²⁷Erediko Piter ma loatjab lahma ngatwah, “Sûtan” “nima chentôpa thînphehien lihma nang dijun eki. Phumma nima chenni chohmin a?”

²⁸Jisu ma thinnâng ngatwah, “Ngama nenâng nginlinlin thôkoh eka, chenthu roannyan pa mehong tahko, Mihnyan Chhapa ate tângthin phiakko etonga, ngale ngadijunte nekhu echhi wani pa, ngademko johtong letma echhi jatnii Isrial mihnyan heh pênmin.

²⁹Ngale henhenma ngarãngma ate hum ahah, pho nya, nyong awa, chhuchha, ngale pitthin jolem heh thînphe eka, erehehma châthe nomemin depjah engakchoh a, ngale roantang roanjêng roandôngmin echohwak a.

³⁰Rohkomin, athângheh ajahthem khekho dangeka heh khedinâng elit danga, ngale athângheh ajahthem khedi dangeka heh khekho elit danga.

Mathiu 20

Angurthong nâng Kaammoatte

¹“Rangkhethung Hahsông pa arerãngrãng. Rekthenâng rangkhah rangkhoma wathe mihnyan ate angurthong moatrãng dekbi bite lemchhoan eka.

²Atema dekbi thãpa jengre wah rãngrãngjô jâtheko phathe ngunpha koh a ngama thômîn lahma ate angurthong moatrãng chienkat eka.

³Ngale eredikomin atema wan ekhu sanpoatko bôjatnâng wientheka lahma khuthe mihnyan chenjô lemo thangma phoangchep lahma chohkhe wah,

⁴Phumma atema thinnâng ngatwah, ‘nemin nga angurthong ko kaletma moka en, ngama dekbi thãpa senthem themjô koh a.’

⁵Ephumma thin katwakwah. Eredikomin echhi wannii sanpoat ngale wanrem sanpoat komin erohjô thômîn lahma chienkatwah.

⁶Wanbangâ sanpoat komin bôjat nâng kalahma mihnyan khuthe chenjô lemo phoangchep lahma khekatwah. Phumma atema thinnâng thôngphâ wah, ‘nekhu aretheko nghiliangma chenjô lemo chenrãngma mahtong eken a?’



⁷Thinma dânthâng wah. ‘Henmemin ni dekbi birãng sietmahhi,’ ephumma atema thinnâng ngatwah. ‘Roh medang ako, nemin nga angurthong ko kaletma moka en,’

⁸“Phumma chenthu sanhêmthah hokko, tângtewa pumma dekbi bite heh sokrãng thieneka mihnyan ko ngatwah, ‘Dekbi bite heh roolohma thinnâng dekbi thãpa koh o, khedithôn wah chepte hehnâng bengkoh lohma khema thônawah chepte hehnâng khedi koh o.’

⁹Wanbangâ sanpoatko dekbi birãng chepte hehnângmin phatherujô kohwah.

¹⁰Ephumma dekbi birãng khekthôn chepte mihnyan heh nãngkoh sanpoat hokko, nima ajah echoh e ngama thinma thonghunwah; rohkomin thinnângmin dekbi thãpa phatherujô kohwah.

¹¹Thinma ngun thalahma thinnâng dekbi bithukte demko chhiakmîn wah.

¹²Thinma ngatwah, ‘Are khedithôn wah chepte mihnyan hehma koantathe loloba mowaktah,’ ‘phumma nia ngihliang sanko sahrii lihma moatwah-phumma nangma ninâng chentô kohehia eretôjô thinnângmin koh eko!’

¹³Tângte pumma thinkhuwah wathe nãng dânthâng wah, ‘Lemruchha, tattan,’ ‘Ngama nenâng diapchahmah. Nangma ngihtheko phathênâng mo ang ngama nyoaktôh.

¹⁴Nang dekbi thãpa thalohma humnâng wãngo. Ngama nangnâng chentô koh ekia eretôjô are khedithôn chepte komin kohhun ekang.

¹⁵Ngadede ngunpa ngama chenroh kohhun ekanga eroh leta kohminne? roh akole nga chhahme dãng phumma nema phetwân eha?”

¹⁶Ngale Jisu ma jekthôwah, “Eroh wah henhen khedinâng dangeka, ereheh khema nãng edangwak a, ngale henhen khema nãng dangeka, ereheh khedinâng edangwak a.”

Jisu ma Ate ritjunma Lôrem Jabwah

(Mak 10.32-34; Luk 18.31-34)

¹⁷Jisu Jeroselem nãng wãngthuko, atema echhi wanii ate dijunte heh khhesiet chhoan lahma thinlolo nãng khoam nungnungko thôkoh wah.



¹⁸Atema thinnâng ngatwah, “Tattan en, nãnga jeroselem nãng wãngeki, enâng Mihnyan Chhapa soam aroakte adong, ngale Niemarang hethôte hehnâng elo thuk a. Ngale thinma hânjôan lahma ritphe erea

¹⁹ngale erediko Jews ledangjat heh deknâng ekoh a, phumma thinma atenâng jôjêm, buh awat, ngale bãngphakko etek a; rohkomin, jârem diko ate ngakhîn erea.”

Nyong ma Roatsep

(Mak 10.35-45)

²⁰Erediko Zibidi tangnyu ate chha dela wanii pa sietlahma Jisu mathahko khupjup lahma chenni akomin mammo mêngkohhang ngama roatsep wah.

²¹Jisu ma atenâng ngatwah, “nangma chenni hun ekoa?” Dihiaknyu ma dânthâng wah, “Nang Lowang medang tohko, are ngachha wanii pa nang dekhith wathe ngale dekchah wathe tongthuk ang ngama toam mamsem o.”

²²Jisu ma ere dihiaknyu chha waniiko dânthâng wah, “Nema chenni thaeken a erepa jetmet” “Ngama chêmchei chohmin pa nema tatha ena?” Thinma “Nima tathae” ngama danthângwah.

²³Jisu ma thinnâng thôkoh wah, “Ngama chohmin chêmchei pa linlin nechhe memin etatha en”, “Rohkomin nga dekchahko hentôngmin a, ngale dekhithko hentôngmin a arepa rênrãng nganâng chaan aho. Erethepa nga Wa Joban ma henrãng khoakhem koheka ereheh rãngba.”

²⁴Chenthu ahan waechhi dijunte hehma erengin pa leptat phumma, ere pho anaa wanii demko rinkhah wah.

²⁵Ephumma Jisu ma phangtang roamroo lahma thinnâng ngatwah, “nemajet Jews ledangjat mihnyan heh khoko thin pête heh leng achaaarii lahma pên eka, ngale thin lemsente khhepho phannang heh thinkhoko leng achaaarii wakeka.

²⁶Phumma arerãngrãng pa nekhu tungnâng nekdangen. Nekhuwah henkomin adongdâng mehun enko, atea anga ngarãngma haa rãngrãng chendanga;



²⁷ngale nekhuwah hen komin wathe khekhodâng mehun enko, atea nekhu haa dângmin-

²⁸Mihnyan Chha pemin mihnyan heh ma atenâng khoakhêm rãng katwah dangmah, atema mihnâng khoakhêm rãng ngale ate roandông pa kohlahma ajahthem mihnyan heh pêsietrãng katwah.”

Jisu ma Mitdoak Wanii Sênsiet

(Mak 10.46-52; Luk 18.35-43)

²⁹Jisu le ate dijunte heh Jeriko hahwah loatchhoan poatko, loangchhang dong thin diko junkhôm wah.

³⁰Lemkah kowah tângte mitdoak wanii pumma Jisu thinkê pumma dânkhôm pa tat lahma rakwah, “Devit Chha! ninâng mammînchen hi!”

³¹Loangchhang pumma thinnâng ritnga lahma kihchepchep tongen ngatwah. Phumma mitdoak wannii pumma, “Devit Chha! ninâng mammînchen hi!” ngama jêngchaan chaanrak rakwah.

³²Jisu ma tahchep lahma thinnâng roolahma chhienwah, “Ngama nerãng chenni moatkoh hun eken a?”

³³Thinma dânthâng wah, “Teso, nimit sensiet kohhi!”

³⁴Jisu ma thinnâng mînchen lahma thin mitko sahloat kohwah; ephumma lemlienma jienkhe wakwah, ngale Jisu didiko junkhôm wakwah.

Mathiu 21

Tajien lahma Jeroselem nâng Hok

(Mak 11.1-11; Luk 19.28-40; Jon 12.12-19)

¹Jisu le ate dijunte heh Jeroselem nâng hunemnem dângko, Oliv hahho wah Batphas theko hokwah. Erethe kowah Jisu ma ate dijunte wanii pa thinmako chienwên lâwah

²Atema thinnâng aroh thôkoh wah, “Ne mawah hahdaangko wângen, eko nema Gado thiet lahma echokhe en, ngale ate chha pemin ate kêko edanga. Erepa jânletma ngatânâng sietkat kohha.



³Ngale henma komin chenjô mechhien hen komin, ‘Teso ma lemeka’; ngama thôkoh en, phumma atema lemlienma echhien katra.”

⁴Arepa mông ma jabtah nginpa chûrăng dangwah:

⁵“Zion chha hehnâng thôkoh en, sô en, ne Lowang pa netânâng hûera! atea numnene ngale Gado khohko chhang eka Ngale Gado chha khohko chhang eka.”

⁶Ephumma dijunte heh chhoan lahma Jisu ma chenroh thôkotah a eroh moatwah:

⁷Thinma Gado le ate chhanii sietkat wah, erediko thinma khet akhu heh Gado khohko kêmwên wakwah, ngale Gado khohko Jisu chhangwah.

⁸Jahmông mihnyan hehma thin khet akhu heh lemko kêm rewakwah, ngale khaka hehma bãngphak doaklahma lemko kêmwakwah.

⁹Jisu diama wah khôamte mihnyan hehma, rakwah “Devit Chha nâng rôe! Teso mînko hokteko Joban ma rangkoh eka! Joban nângrôe!”

¹⁰Chenthu Jisu Jeroselem nâng nyuphok phumma, hahdaang phangtang hahjam tijam dangwah. Mihnyan hehma, “Atea hen a?” ngama thôngphâ wah.

¹¹Loangchhang pumma, “Arepa Galilijaa wah Nazarat hah wah mông Jisu” ngama dânthâng wah.

Jisu Rangsoamhum nâng Hok

(Mak 11.15-19; Luk 19.45-48; Jon 2.13-22)

¹²Jisu ma Rangsoamhum khenko wãng lahma phinsâng thāsengte heh phangma junloat wah. Ngale atema ngun litmînte khoangheh dâthin phekoh rewah, erediko phariwo sângte tôngthin heh rephekoh rewah,

¹³ngale thinnâng ngatwah, “Joban nyapraang nâng Joban ma aroh jablahma raangeka, ‘Nga Hum pa Rangsoamhum ngama ngatmin.’ Phumma nekhuma arepa huh aliak heh huhtôngthin therăng hân eken!”



¹⁴Mitdoak dakò heh ate tâko rangsoamhum ko hokwakwah, phumma atema ereheh sênsietwah.

¹⁵Soam aroakte adong ngale Niemarang hethôte hehema chenthu Jisu ma patritli moatlem moat kheko, ngale leta lechhih hehema Rangsoamhum khenko, “Devit Chha nâng rô lahma rak tatphumma!” thin rinkhah wah

¹⁶Ephumma thinma Jisu nâng ngatwah, “Thinma chenni ngaeka erepa nangma tat ekole?” Jisu ma “Tat ekang” ngama dânthâng wah, ngale atema thinnâng ngatwah, “Nema are Joban nyapraang pa mathat weihne? ‘nangma leta lechhih ngale naajengchha hehnâng Joban nâng chenroh senthemthem jienrômin a arepa hethô wakeko ngama raang ekapa.’ ”

¹⁷Jisu ma thin phethien lahma Bathani hahnâng katwah, ngale ere rangpenko ate enâng jêmwah.

Jisu ma phukribăng ko Têm Athoak

(Mak 11.12-14, 20-24)

¹⁸Eredijâko ate rangkhah rangkhoma hahdaang nâng ngakwângko, lemnhâng rêmritwah.

¹⁹Tema lemkahko phukbăng khelahma phukri lêmsokrăng katwah, phumma phukri lechoh thangma adek lolo tônglâwah. Ephumma atema bângko “nangma chenthumin penri leri tumin!” ngama ngatwah, ephumma lemlienma phukbângpa choakjâwah.

²⁰Dijunte hehema arepa khelahma patrit rewah. Thinma thôngphâ wah, “Phukbângpa lemlienma chenroh jienchoak jâeka?”

²¹Jisu ma dânthâng wah, “Ngama nenâng nginlinlin thôkoh eka, nememin meputedâlem enko, ngama are phukbângpa chenroh jienchoaksiet ekanga ererăngrăng nememin tamo en. Atô lolo ledang, nema are hahkong komin, ‘josi ko rutjâkao’ ngama tanga en, eko hahkôngpa erutjâka a.

²²Nema meputedâlem enko, rangsoam letma chenni thaeken a arepa echoh en.”

Jisu ma Chaanpa Chenwah Choh eka ngama Chhien

(Mak 11.27-33; Luk 20.1-8)



²³Jisu Rangsoamhum nâng ngakhû lahma atema hethô thuko, soam roakte adong ngale khhepho phannang heh hûlahma atenâng thôngphâ wah, “Nangma areheh chenni chaan junma tamo ekoa? are chaanpa henma koh ehoa?”

²⁴Jisu ma dânthâng wah, “Ngama nenâng ngin khapthe chhien a, phumma nema nganâng mejien dânthang hako, ngama areheh chenni chaan junko tamo ekanga ereheh nenâng thôkoh a.

²⁵Jon ma baptijem kohrăng henwah chaan chohwah a: Joban wah chohwah ale, mihnyan wah chohwah a?” Ephumma thindede tungko chhiakmîn wah, “năngma chenroh dânthangea? Năngma, ‘Joban wah,’ ngama medânthang eko, atema năngnâng, ‘eroh medang ako Jon nâng chenrăngma putedâlem met a ngama engahi?’

²⁶Ngale năngma, ‘mihnyan wah menga eko,’ năngdemnâng are mihnyan heh rin ekhahwak a, chenrăngma ngako, are mihnyan heh ma Jon nâng mông ngama thonghun eka.”

²⁷Ephumma, thinma Jisu nâng, “Nima jetmih” ngama dânthâng wah. Ngale atema thinnâng ngatwah, “Eroh medang ako ngamemin chenni chaanma moekănga erepa nenângmin thôkomah.

Chhepho Wanii Nginthakthô

²⁸“Nema chenroh thonghun eken a? rekthenâng mihnyan wathenăng chhepho wanii dăngwah. Atema khhepho chha tâko kalahma ngatwah, ‘echha thejâ nangma angurthong mokao.’

²⁹Phumma ate chha pumma, ‘nga moatkat hunmek’ ngama dânthâng wah, rohkomin khediko hungngaklit lahma atema moatkatwah.

³⁰Erediko wapa naadiwa tâko kalahma erohjô ngatkatwah. Phumma naadiwa pumma ‘moka ang’ ngama dânthang lahma mokaho.

³¹Are chhepho wanii kowah henma thinwa ngin kepeka?” “Khhepho chha pumma,” ngama thinma dânthâng wah. Ephumma Jisu ma thinnâng



ngatwah. “Ngama nenâng thôkoh eka: thăkho thâte ngale phoangseng chhahte dihiak heh nemako Joban Hahsông thenâng wăngwak eka.”

³²Chenrăngma ngako Jon bapisma nenâng toangtangko sôngtông răngma hethô ehèn, phumma nema atenâng putedâlem met; rohkomin thăkho thâte ngale phoangsang chhahte dihiak heh ma putedâlem eka. Nema ereheh kheletma jômin khediko nehung litletma atenâng putedâlem met.

Angurbăng Khoakhêm Sokte Nginthakthô

(Mak 12.1-12; Luk 20.9-19)

³³Jisu ma ngatwah. “Nginthakthô ahânmin jetat tan en,” “Rekthenâng pit tângte wathema ate pitko angrur khiet lahma dăngwah, angrurthong pa panma tûmhoan rewah, ngale angrurti koakthin koan thienrăng hahken thu rewah, erediko angrurthong bente tôngrăng humchoangpa hoan rewah. Erediko tângte pumma mih khuthe năng aroamrăng mothukthien lahma atea hahtaang năng chhoanwah.”

³⁴Chenthu angrur chum lahma khôanpûn rangkuh hokphumma, tângte pumma aroamrăng mothuk thientah heh tâko ate thiak thârăng ate haaheh chienkat wah.

³⁵Aroamrăng motah mihnyan heh ma tângtewa haaheh lolahma watheko buh awat, wathepa ritphe, ngale wathepa longma ritpet rewah.

³⁶Eredikomin tângte pumma ate haa ahan heh khema wah noma ajah ngakchien katwah, phumma aroamrăng motah mihnyan heh ma khema wah răngrăngjô hânjôn wah.

³⁷Khedithôanko tângte pumma ate chhapa chienkatwah, atema, ‘Ngachha ran echei wakthem a’ ngama thonghunwah.

³⁸Phumma ate chhapa khelahma erekowah moatte heh thindede tungko thômîn wah, ‘Tângte chhapa lâkatha, chepen, năngma ate chhapa ritphe lihma are angrurthongpa năngrăng kep e!’

³⁹Ephumma thinma lolahma, angrurthong panlien năng phekat lahma, ritphewah.



⁴⁰Jisu ma thinnâng chhienwah. “Phumma, angurthong tângte wapa mehû theko, atema aroamrãng mothuktah mihnyan hehnâng chenni rêmin a?”

⁴¹Thinma dânthâng wah, “Ere mihnyan chhieh heh atema ritphe erea”, “ngale angurthong pa angur chum sanpoatko atenâng senthemthem kohte mihnyan hânông aroamrãng engak mothuk a.”

⁴²Jisu ma thinnâng ngatwah, “Joban nyapraang nâng chenroh raangeka arepa nema mathat chohweihne? ‘Humhôte ma achhieh ngama petphe eka longpa chentô noma alemthôn longrãng dangeka; Arepa Teso ma moeka; Phumma arepa chentô nyoaksok lisên moeka!’

⁴³Jisu ma ngatwah, “Ngama nenâng thôkoh eka,” “Joban Hahông pa newah toanchhoan lahma kaamsen moatte hehnâng ekoh a.”

⁴⁵Jisu ma nginthakthô thôkoh ekapa soam aroakte adong ngale Farasi hehma tatlahma thinma ninông ngaehi ngama jetwah,

⁴⁶Ephumma thinma Jisu loatkhek rãng phungwah. Rohkomin Jisu pa mông ngama thônghunte loangchhang heh ran thin chei rewah.

Mathiu 22

Nemnyansiet Kuhhôn Nginthakthô

(Luk 14.15-24)

¹Jisu ma nginthakthô wienkep lahmejô mihnyan heh demông jabmînwah.

²“Rangkhethung Hahông pa arerôngrãng. Rekthenông lowang wathema ate chharông nemnyansiet kuhhôn khoakhêm wah.

³Lowang pumma nemnyansiet thinnông hokrông bisuntah mihnyan heh roorông ate haaheh chienchhoan wah, phumma ere mihnyan heh ahok hunwak ho.

⁴Phumma Lowang pumma ate haa ahan hehnông nginthôko lahma chienchhoan wah: Atema aroh thôkoh en ngama ngatwah, ‘Ngama phhekchhah heh lâta khoakhemtek, ngama leepondong pemin lâjoattek, ngale chentôpa phangtang lâta khoakhemtek. Nemnyansiet kuhhôn thinko phhekchhah rãng hûren!’



⁵Rohkomin bitangtah mihnyan hehma nâletha thangma mâmâ moatlem nâng choanwak wah: wathepa ate pitnâng katwah, ahan wathepa ate duken nâng katwah,

⁶Ahan hehma bisun hokte haaheh lolahma buh awat relahma ritphewah.

⁷Phumma Lowang pa nyahrãng rinkhah wah; ngale ate haa ritphete mihnyan heh ritphe letma thin hahdaang pa wenma rokphe en ngama ate sipâhi heh chienchhoan wah.

⁸Erediko Lowang pumma ate haa ahan heh khôanroo lahma thinnâng ngatwah, ‘Ngama phhekchhah heh lâta khoakhemtek, rohkomin ngama bisuntek mihnyan hehma arepa chhahrãng punwakmah.

⁹Erohwhah noknyu lemdongnâng chhoan letma nema chentô mihnyan chohmîn eken a ereheh phangtang roohuren.’

¹⁰Ephumma haaheh chhoan lahma thinma noknyu lemdongnâng chentô chohmîn eka ereheh phangtang chhih asen mihnyan khoakthe siethok wah; ephumma nemnyansiet kuhhôn humpa mihnyan ma mênchong dângwah.

¹¹“Lowang pumma humkhen nâng wãng lahma mihnyan khôanhutah hehnâng sokwângko nemnyansiet kuhhônankhet lekep thangma hûlahma chohkhe wah.

¹²Phumma Lowang pumma atenâng ngatwah, ‘lemruchha, nemnyansiet kuhhônankhet lekep thangma chenroh jienhu eroa?’ ngama thôngphâ wah. Phumma ere mihnyan pumma chenmin dânthangmah.

¹³Erediko lowang pumma ate haaheh nâng ngatwah, ‘Ate dek ada heh khhek letma rangsâ wah rangnyek khenko petphekat en. Ereko ate pâchupkek lahma seplahma chentonga.’ ”

¹⁴Jisu ma aroh jekthô wah, “Aroo pa ajah roeeka, rohkomin arenpa amãnchha ren eka.”

Thăkhokoh junma Chhien

(Mak 12.13-17; Luk 20.20-26)



¹⁵Farasi heh chhoan lahma Jisu atedede jabkhab junko bukrit thukrăng buthi hânwah.

¹⁶Erediko Farasi heh ma thin dijunte ngale Hirot mihnyan hehwah khuthe Jisu tânâng chienkat wah, thinma Jisu nâng ngatwah, “Hethôte, nima jet nanga toangtang ko thôte. Ngale hennâng min adong arin roak atoak weihmoh, erediko mihnyan heh ma manga hango, ngamemin lesoang thangma hethô eko, nangma mihnyan hehnâng Joban nginpa toangtangma phoangthôkoh eko.

¹⁷Nangma chenroh thonghun eko erepa ninâng thôkoh tanhi? Nima Roman Chofa nâng thăkho takoh ele takohmih a?”

¹⁸Thinma achhih themawa wak ekapa Jisu ma jetlahma, thinnâng ngatwah, “Ahuhkhoanglep heh! Nema nga chenrăngma thethuk huneha?”

¹⁹Thăkho kohthin janngun pa nganâng khesok tanha!” Ephumma thinma Jisu nâng janngun kohhokwah,

²⁰Ngale Jisu ma thinnâng chhienwah, “Arepa hen thenphanga, ngale arepa henmîn raangeka?”

²¹Thinma, “Chofa thenphăng ngale atemîn raangeka” ngama dânthâng wah. Ephumma Jisu ma thinnâng ngatwah, “Eroh medang ako Chofa thiakpa Chofa nâng koh en, ngale Joban thiakpa Joban nâng koh en.”

²²Ere mihnyan heh ma Jisu nginpa tat lahma bârít rewah; ngale thinma Jisu phethien lahma ngakchhoan wah.

Aritwah Ngakhîn răngma Chhien

(Mak 12.18-27; Luk 20.27-40)

²³Erejâjâ ko, Saduki khuthe Jisu tânâng hûlahma mihnyan pa riichoanwah ngakhinmah ngama ngathok wah.

²⁴Thinma ngatwah, “Hethôte, Mosa ma ngatwah, delawa wathe chha machhama merii ako, atema phethien eka janthoinyu pa ate naa pumma chhachhat răngma ngakkepmin, phumma ere wanii pumma chhaeka pa rit retahwa chha ngama ngatmin.



²⁵Phumma rekthenâng chhepho waengit dângwah. Phumma khhepho thôn pumma dihiak keplahma chha machhama ritwah. Phumma ate tangnyu pa naako phethien kohwah.

²⁶Phumma medemwa pemin erohjô ritwah, ere diwah pemin erohjô ritwah, ngale chhepho waengitlat eroh thônrit wah.

²⁷Athôanko dihiaknyu pemin ritwah.

²⁸Phumma chenthu ritte heh ngakhîn jâko, atea hen tangnyu dângmin a? chenrăngma ngako chhepho waengitlat ma ate kepwah.”

²⁹Jisu ma thinnâng dânthâng wah, “Nea nyahrăng athe! Nema Joban nyapraang pa lejet junko arepa jetmet! ngale Joban chaan pemin nema jetmet.

³⁰Chenthu ritte heh mengakhin tahko, thin a rangkethung wah ngintatte heh răngrăng dângmin ngale dihiak delamin lekepmîn tumin.

³¹Aritte heh ngakhîn junma Joban ma nenâng thôkohthen pa nema mathat chohweihne? Joban ma ngatwah,

³²‘Nga a Abraham Joban, Isak Joban, ngale Jakob Joban.’ Atea ahînte heh Joban, aritte heh Joban dangmah.”

³³Chenthu loangchhang pumma erepa chohtat phumma, Jisu ma hethôeka junko thin bârit rewakwah.

Joban wah Hôkum Adongthôn

(Mak 12.28-34; Luk 10.25-28)

³⁴Jisu ma Saduki heh jienchhiak pa Farasi hehma tatlahma, thin aroamma chohmîn wah,

³⁵Thinkhuchhang wah Niemarang hethôte wathema Jisu bukritthuk răng atenâng ngin chhienwah.

³⁶Atema chhienwah, “Hethôte, Mosa Niem wah chenpa adongthôn a?”



³⁷Jisu ma dânthâng wah, “ ‘Nang Teso Joban nâng nanghung nangrñ phangtang kohlohma hun o, ngale nangju amoangmin phangtang koh o, erediko nangchaan phangtang kohlohma hun o.’

³⁸Are hôkum pa adongthôn ngale alemthôn hôkum.

³⁹Are dikowah wanthe nyahrãng alemli thôn hôkum pa arepa: ‘Nangdede nâng hunrieko rãngrãng mihhan nângmin eroh hun o.’

⁴⁰Mosa Niem phangtang nâng ngale mông hehma hethôeka heh are hôkum junko tuta jôba hethôeka.”

Misaia Junma Chhien
(Mak 12.35-37; Luk 20.41-44)

⁴¹Farasi khuthe aroamma khôn poatko Jisu ma thinnâng thôngphâ wah,

⁴²Nema Misaia junma chenroh thonghun eken a? Atea hen Chhuchha a? “Atea Devit Chhuchha” ngama thinma dânthâng wah.

⁴³Jisu ma thinnâng chhienwah, “Eroh medang ako,” Devit ma Misaia nâng ‘Teso’ ngama roorãng Juma chenrãng chhienwah a? Devit ma ngatwah,

⁴⁴‘Teso ma nga Teso nâng ngaeka: Ngama nangran heh nang daphâ khenko mathien thienkoh are nga dekchahko tongo.’

⁴⁵Phumma, Devit ma atenâng ‘Teso,’ ngama meroo ako, Misaia pa Devit Chhuchha chenroh jiendângmin a?”

⁴⁶Henmemin Jisu nâng chenjô jiendân thangho, ngale erejâ phumma henmemin Jisu nâng chenni nginjô chinchhien tuho.

Mathiu 23

Jisu ma Niemarang Hethôte ngale Farasi hehnâng Achhieh Ngat
(Mak 12.38-39; Luk 11.43-46; 20.45, 46)

¹Erediko Jisu ma loangchhang ngale ate dijunte hehnâng ngatwah.

²“Mosa Niem pa Niemarang hethôte ngale Farasi heh meba tâthô kohmin.



³Erohwah thinma nenâng chenni thôkoh ehèn a areheh phangtang kepen, ngale erejunko mo en; rohkomin thinrãngrãng nekdangen, chenrãngma ngako thinma chenroh thôeka eroh momah.

⁴Thinma mihnyan heh temko ahênrãng alat ngale alih hênpa henthuk wakeka, phumma ere hênpa tahên rãngma thinma deksu metômin chohtôanpê hunmah.

⁵Thinma chentô moatlem pa mihnyan hehema chenkhehi ngama hunlahma moeka. Thin khowah khhek eka khet ngale thin phhekthem wah khhek eka khet hehnâng sûtan en, Joban nyapraang pa raanglahma khhek eka, sûtan en chentôdong khhek eka, ngale thin khetsa wah sitkhhek eka riisa heh chentôloat thien eka!

⁶Thinma kuhhôanthin nângmin tângthin senpa hunwak eka, ngale Sanagog nângmin tângthin senpa châwak eka;

⁷Thinma bôjat nângmin mihnyan hehema thin ranchei nungma rânjab huneka, ngale 'hethôte' ngama roohun wakeka.

⁸Phumma nenâng 'hethôte' ngama leroomin, chenrãngma ngako, nekhua pho anaa tuta, 'hethôte' pa wathe loloba tonga.

⁹Ngale nekhuma are hahtokkhoh ko hennâng min 'Wa' ngama leroomin, chenrãngma ngako nekhua rãngma wathe loloba 'Wa' rangkhethung nâng tonga.

¹⁰Ngale nenâng 'lemsênte khhepho', ngamemin leroomin, chenrãngma ngako nekhurãng 'lemsênte khhepho' wathelolo tonga, arepa Krista.

¹¹Nekhu wah henpa adongthôn dangtea erepa nekhua haarãng dângmin.

¹²Hen komin atedede adong dangriieka erepa rînsiet rêmîn, ngale hen komin atedede chentô noma rinthôn dangriieka erepa dôngsiet rêmîn.

Jisu ma Thinnâng Ahuhkhoanglep pa Achhih Ngat

(Mak 12.40; Luk 11.39-42, 52; 20.47)

¹³"Niemarang hethôte ngale Farasi heh nekhua rãngma chentô chhih dângmin a! Nea ahuhkhoanglep! Nema mihnyan hehrãngma rangkhethung Hahsông



lempa tangsekkoh eken, ngale nededemin ereko wǎngmet, erediko eretheko wǎnghunte hehmin nema wǎngthukmet!

¹⁵“Niemarang hethôte ngale Farasi heh nekhu rǎngma chentô chhih dǎngmin a! Nea ahuhkhoanglep! Nema jodong ranka danletma ngale chentô diak akan heh dan reletma ne dijunte rǎng dangthuk eken; phumma chenthu ne dijunte rǎng meta dangthuk tetko, nenoma dûmnii achhih dangthuk letma nerǎngrǎng pap wendôko khamrii kathuk eken!

¹⁶“Mitdoak dangletma lemsente heh, nekhu rǎngma chentô chhih dǎngmin a! nema aroh hethô eken, ‘Henma komin Rangsoamhum mǐnchheh lahma toam mesem ako, atema sekho nǎng sem eka; phumma Rangsoamhum khenwah kem mǐnchheh lahma mesem ako arepa sekwin nǎng sem eka.’

¹⁷Nea aba mitdoak! Chenpa adonga, kempa ale, kem sâsiette Rangsoamhum pa adonga?

¹⁸Nema arohmin hethô eken, ‘henma komin Joban nǎng chhahkohtin chaammǐn chheh lahma toam mesem ako ere toampa sekho nǎng sem eka; phumma chaam khohwah thienkoh eka hǐnhô mǐnchheh lahma mesem ako arepa sekwin.’

¹⁹Nea nyahrǎng mitdoak! Chenpa adonga, chaam khohkawah hǐnhô pa adong ale, ere hǐnhô sâsiette chaampa adonga?

²⁰Erohwhah chenthu mihnyan pumma chaam mǐnchheh lahma toam mesem ako, atema chaam ngale chaam khohkawah chentô hǐnhô heh mǐnko sem eka;

²¹Ngale chenthu atema Rangsoamhum mǐnchheh lahma toam mesem ako, atema Rangsoamhum ngale erekowah sǒngte Joban mǐnko sem eka;

²²Ngale chenthu mihnyan ma rangkethung mǐnchheh lahma toam mesem ako, atema Joban tǒngthin, ngale ere tǒngthin kowah tǒngte mǐnko sem eka.

²³“Niemarang hethôte ngale Farasi heh nekhu rǎngma chentô chhih dǎngmin a! Nea ahuhkhoanglep! Nema chentô rangkuh sanha roakweih rongrup pôari,



pheru wahra, hehwah Joban nâng thăkho kohhu eken, phumma Mosa Niem kowah alemthôan Niem pa nema momet, mihbab mihbâm ledang, mihnâng mînchen, ngale toangtang ererângrăng heh nema momet. Ahan heh moatleko nema ereheh bengmoatmin dângwah.

²⁴Mitdoak dangletma lemsente heh! Nema ne koap kowah mitchit pa rephe letma ut pa jokkat eken!

²⁵“Niemarang hethôte ngale Farasi heh nekhu rãngma chentô chhih dângmin a! Nea ahukhoanglep! Nema ne wankhoang ngale bâti heh tokkhoh pa sâpa eken, phumma, akhenpa nema mihnâng phetwan letma nyenkep wahheh lolo.

²⁶Mitdoak Farasi heh! Khebengko bâti khenwah heh bângsâ sietmêngen, eredikoba tokkhoh pemin etasâa!

²⁷“Niemarang hethôte ngale Farasi heh nekhu rãngma chentô chhih dângmin a! Nea ahukhoanglep! Nea rongma pôhut wah mangruk rângrăng, tokkhohko sokko sênmông, phumma akhenko mangrok mangrã sânjâwah lolo.

²⁸Ererângrăng nema tokkhohko anga nganâng asen khesok eken, phumma nehung khenpa ahukhoanglep ngale pap moatlem lolo.

Jisu ma Thin Chêmchei Chohthin pa Amama Jetloat

(Luk 11.47-51)

²⁹“Niemarang hethôte ngale Farasi heh nekhu rãngma chentô chhih dângmin a! Nea ahukhoanglep! Nema mông heh rukpa senthemthem hôankoh eken, ngale toangtang mihnyan riitah heh rukpa soangraang letma khoakhem eken;

³⁰Ngale nema ngaeken, nita niwa heh roanko ni dôngwah dângnomeko, thinma motah rângrăng nima lemo minwah, ngale mông hehmin leritphe minwah.

³¹Are junko nea ere mông heh ritphete heh chhuchha jôba ngama loatjab eken!



³²Nekjek en, nete newa hehema bengmo thientah dekmãnpa nema laangmo en!

³³Nea pû! Ngale pû chha jôba! Pap wendôko khâmrit minwah epe e ngama chenroh jienthonghun eken a?

³⁴Ngama nenâng thôkoh eka, ngama netânâng mông ngale mihnyansen, erediko hethôte mihnyan heh echien hûrâng; phumma nema khuthepa ritphe, khuthepa bãngphakko rittek, ngale khuthepa Sanagog nâng siethû letma buh awat letma chentô hahdaang rupwah ephoang junlo waken.

³⁵Ere toangtang mihnyan senheh ritphe thãpa nekhu khohko chêmchei ehûra, ngale nema toangtang mihnyan Abel ngale Bekaria chha Zakaria nii Rangsoamhum ngale Joban chhah kohthin chaam tungko ritphetet thãpa echoh en.

³⁶Ngama nenâng nginlinlin thôkoh eka: Ere mihnyan heh ritphethã chêmchei pa arerôan wah mihnyan heh khohnâng ehûra!

Jisu ma Jerosalem nâng Hun

(Luk 13.34, 35)

³⁷“Jerosalem, Jerosalem! Nangma mông heh ritphe eko, ngale Joban ma nang tânâng nginmatte chienkat era heh longma ritpet eko! Wo nyongma ate chha heh ate rangkhenko rângkhôanwok arãngrãng, ngamemin nang mihnyan heh phangtang ngadekma roapkhit lekma thienrãng chentô thathuntek a, rohkomin nangma eroh mothuk mahhang!

³⁸Ngale erohwah nang Rangsoamhum pa petphe rêmin ngale sekhota rãng edangjâa.

³⁹Ngama nangnâng thôkoh eki, chenthu nangma ‘Teso mînko hokteko Joban ma rangkoh eka’ ” ngama manga nga ekoko nangma nga chenthumin lechoh khetumin.

Mathiu 24

Jisu ma Rangsoamhum Chhihsiet junma Jab

(Mak 13.1, 2; Luk 21.5, 6)



¹Jisu Rangsoamhum kowah khôamchhoan thuko ate dijunte heh hûlahma atenâng Rangsoamhum pa sûtan chentôsên a ngama khesokwah.

²“Edenga,” ngama atema ngatwah, “nema are heh sênmoang khe eken. Ngama nenâng arepa thôkoh eka: long phangthem in ate theko letongtumin; phangtang runjâ erea.”

Chêmchei ngale Mihma Chêmsiet

(Mak 13.3-13; Luk 21.7-19)

³Jisu Oliv Hahhokho ko tângpoatko, ate dijunte heh ate tâko mihnâng lejetrii thangma hokwah. Thinma Jisu nâng ngatwah, “Arepa chenthu dângmin a” erepa ninâng thôkohhi, “Ngale nang ngakkat sanpoat, erediko rangle hahtokkhoh thôn sanpoat pa khesokrăng chenroh dângmin a ngama chhienwah.”

⁴Jisu ma dânthâng wah, “Ne jetletma tongen, ngale hennâng min nekdiap chhahrii en.

⁵Ajahthem mihnyan ma ngamîn keplahma ehûra, ngale thinma ‘nga a Krista!’ ngama hûlahma ajahthem mihnyan heh ediapchhah a.

⁶Nema ne kêanâ jêngkomin ngale hahtaang nângmin ranloatmîn ngin echohtat en; rohkomin neksekma en. Athôn sanpoat hokmako eroh ebengdanga, rohkomin erepa athôn sanpoat pa dangmah.

⁷Diakthe pumma Diakthe demko ran elongmîn a, ngale wanthe Hahsông pumma wanthe Hahsông demko longmîn erea. Rêmdong, ngale chentô therupnâng hah etiia.

⁸Are chentôpa naachhatrăng wokchet wah răngrăng edanga.

⁹“Erediko nea khhek ere hèn, ngale chêmsiet lahma ritphe ere hèn. Mihnyan nyuchha chentôma nga junko echhihchoh hèn.

¹⁰Ere sanpoatko ajahthem mihnyan hehwah putedâlem pa echhihjâa; Thinkhu tungko wathema wathe echen esâng mîn a, ngale chhihchohmîn erewak a.

¹¹Erediko ajahthem môngmông heh hong lahma mihnyan heh ediapchhah a.



¹²Ererãngrãng achhihpa liamlahma ajahthem mihnyan wah hun achetmîn pa emahjâa.

¹³Phumma henhen athôankotuk rongtêngtêng putedâlem eka ereheh meba khope chohmin.

¹⁴Ngale are rangkethung Hahsông Nginkongsen pa hahtokkhoh phangtang nâng chentô mihnyan nyuchha nâng phoangthôkoh mêngmin; erediko athôn sanpoat pa ehûra.

Nyahrãng Cheili

(Mak 13.14-23; Luk 21.20-24)

¹⁵“Mõng Daniel ma thôtah nyahrãng acheili pa nema echohkhe en. Erepa Asâthôn theko ehonga.” (Arepa chenni nâng ngaeka erepa are nyapraang weihte hehma jetlo en!)

¹⁶“Ere sanpoatko Judia wah sôngte mihnyan heh hahkong khonâng huhchhoan wângmin.

¹⁷Ere sanpoatko humkho nâng koatwângte mihnyan heh humkhen wah ate sêmmak heh toankatrãng sanpoat lechohmin.

¹⁸Pitnâng dângwah mihnyan heh memin ate humnâng wãng lahma sêmmak heh ngaktoanwâng sanpoat pa lechohmin.

¹⁹Ngale ere sanpoat kowah naawunte dihiaknyu ngale naajeng nyong dângte dihiaknyu hehrãngma chentô cheili dângmin a!

²⁰Ne huhchhoanjâ rangwopa rangpa nâng nekchen dangeka, ngale Pientông rangwo jânâng nekchen dangeka ngama Joban nâng rangsoam en!

²¹Ere rangwojâ kowah chêmchoh pa rangbeng habbeng thuwah athângheh tôko chêmeki kowahmin achhihthôn dângmin. Ngale ererãngrãng chêmpa khedi nângmin lethong dangtumin.

²²Phumma ere rangwopa Joban ma lâthoan siettah; Joban ma aroh lethoansiet nomeko henmin leta peminwah. Joban ma ren eka mihnyan hehrãng sênrãngma Joban ma ere rangwopa thoansiet eka.



²³“Phumma ere sanpoatko nenâng henma akomin, ‘Sûtan Krista ako anã!’ ba ‘Atea ireko tonga!’ ngama menga hèn komin, atenâng nekpute en.

²⁴Chenrãngma ngako, Misaia mōang ngale mōngmōang heh ehongwak a; Ngale Joban ma ren eka mihnyan heh meta diapchhah ekorãng ngama thinma nyahrãng patritli ngale bâritli moatlem heh emoa.

²⁵Tat en! Nenâng ngama arepa ere chêmchoh sanpoat hokmako thôkoh eka.

²⁶“Ngale mihnyan hehma ‘Krista pa ire sehahko tonga!’ ngamemin ethôkoh hèn - phumma eretheko nekwãng; ngale ‘atea areko huhtong lahma tonga!’, ngamemin engahèn, rohkomin atenâng nekpute en.

²⁷Chenrãngma ngako Mihnyan Chha katpa rangdeng khiapda sankatma sannyp nâng rângdanliap arãngrãng katmin.

²⁸“Chenko mang tongeka, eretheko mang phhekte wo heh ekhoanjâa.

Mihnyan Chha Ngakkat Ngin

(Mak 13.24-27; Luk 21.25-28)

²⁹“Ere chêmchoh sanpoat pa thôn diko, lemlienma sanpa nyekjâ erea, dâmin leliat tumin, rangkho wah merit hehmin jârit erea, ngale rangkho wah chentô heh thinthe kowah jârit erewak a.

³⁰Erediko Mihnyan Chha ngakkat sanpoat pa jetrãng rangkho nâng ajatjat hong lahma ekhe e; ngale Mihnyan Chhapa rangkho wah phoam khohko tonglahma chaan ahâng ngale phiakto phiakja katpa khelahma hah khohwah mihnyan heh phangtang esepwak a.

³¹Poakpo rahdongpa merah mettahko, atema rangwah ate ngintatte heh hahtokkhoh ko sukbelii nâng echien chhoan a, phumma ngintatte hehma Joban ma ren eka mihnyan heh hahtokkhoh phangtang wah ekhôansiet a.

Phukbãng wah He

(Mak 13.28-31; Luk 21.29-33)

³²“Phukbãng ma chenhethô hèn. Chenthu phukbãng pa hinchîchî, noapjokjok, ngale bãngchhong chhongnyan mechhong tahko, nema rangcho lânâm hûtha ngama rângjet en.



³³Chenthu ngama nenâng thôkotah heh rãngrãng danglahma mekhe tetko, nema athôan sanpoat pa lânamtha, ngale lâhûera ngama jet en.

³⁴Thonghun en, are chentôpa athângwah ahînte mihnyan heh phangtang târit mako edanga.

³⁵Rangle hah eta chhihjàa, rohkomin Nga jabkhab pa chenthumin leta chhihjàmin.

Henmemin Rangwo ngale Sanpoat pa Tajetmah

(Mak 13.32-37; Luk 17.26-30, 34-35)

³⁶“Ere rangwo le sanpoat pa chenthu hokmin a erepa henmemin jetmah - rangkethung wah Joban ngintatte hehmemin jetmah, ngale Chha memin jetmah; Wama loloba jet a.

³⁷Mihnyan Chha ngakkat pa Noa sanpoatko chenroh dangtah a ererãngrãng dângmin.

³⁸Jodôngma lummako, mihnyan heh jokphhek chhah lahma dângwah, ngale Noa khôankho khenko lupwângjâ tôkotuk dihiak dela kepmîn lahma dângwah;

³⁹Jodông pumma malumlumko thinma chenni dangeka ere pejô lethonghun dângwakwah. Mihnyan Chha katjâ komin ererãngrãng dângmin.

⁴⁰Ere sanpoatko mihnyan wanii pitnâng eroam moa: Phumma wathepa sietwên lahma wathepa ephethien a.

⁴¹Dihiaknyu wanii chhahthut themko eroam thuwak a: Phumma wathepa sietwên lahma wathe ephethien a.

⁴²Erohwhah jetletma dangen, chenrãngma ngako, chenre jâko ne Teso pa katmin a ere rangwopa nema jetmet.

⁴³Hum tângtewa pumma ahunte hok sanpoat pa mejet ako, atema bemtong lahma ahunteko humpa lehu thukmin.

⁴⁴Erohwhah nemin roantangma jetletma tongmin, chenrãngma ngako, Mihnyan Chhapa nema lechhemhun sanpoatko ekara.

Haasen ngale Haachhih Nginthakthô



(Luk 12.41-48)

⁴⁵“Henpa dâlemlî ngale jet ajien haa a? Atenâng ate tângte ma haa ahan hehnâng phhekchhah pa achhah sanpoatko chhahthukrăng ethien a.

⁴⁶Chenthu tângtewa pa humnâng hokko, atema chenroh chientah a eroh molahma metongla ako haapa chentô khuhah dângmin a!

⁴⁷Ngama nenâng nginlinlin thôkoh eka, ere haapa tângtewa pumma ate chhahkhem heh phangtang sokare răng ethien a.

⁴⁸Phumma ere haapa mihnyan chhih medang ako, nga tângte pa rangwo lorăng ngakhû mahra ngama ethonghun a,

⁴⁹Phumma atema ate lemru haa ahan hehnâng buh awat erea, ngale ate răngrăng mihnyan chhih heh demnâng mokjok mokchhah lahma etonga.

⁵⁰Phumma ere haa tângtewa pa haa pumma lethonghun ngale lejet sanpoatko engak hûra.

⁵¹Phumma tângtewa pumma haapa khihkhîh nyahnyah khihdoak lahma ahuhkhoanglep heh demnâng ejoh chêmthuk a. Ereko atema asepe nungma ate pâchupkek lahma etonga.

Mathiu 25

Janchhô Waechhi Nginthakthô

¹“Ere sanpoatko rangkethung Hahsông pa arerăngrăng dângmin. Rekthenâng janchhô waechhi ma thin wentit semlahma nemnyanwa chohmînưrăng chhoan wakwah.

²Phumma wabangâ pa nokba dângwah, ngale ahan wabangâ pa jet ajien dângwah.

³Nokba wabangâ pumma wentit keplahma thin demnâng wentien abâm kepmah,

⁴Phumma ahan wabangâ pumma thin demnâng wentien abâm kepwah.

⁵Phumma nemnyanwa hokpa lektong lahma thin a jupmetrii lahma juplek wakwah.



⁶“Rangpen mongtãngko hôngrakwah, ‘Nemnyanwa lâhûtha! hûren ate demnâng chohmîn hûren!’

⁷Phumma janchhô waechhi pa toansat lahma thin wentit pa dôrepwah.

⁸Ephumma nokba wabangâ pumma jet ajien wabangâ ko ngatwah, ‘Ne wentien kowah roanruto nênthuk mêngghi, chenrãngma ngako, ni wentien thôn lahma wentit pa lâmuttah.’

⁹‘Jiennêm thukmah,’ ngama jat ajien heh ma dânthâng wah, ‘nãngkhu anga ngarãng lemah. Chhoan letma nerãng richhoan en.’

¹⁰Ephumma nokba heh wentien riakrãng chhoanwah; ngale thin chhoan diko nemnyanwa pa hokwah. Ephumma jet ajien wabangâ pa nemnyanwa demko phhekchhah chhah thinnâng johwângwah, ngale thinwâng diko kâsekpa sekwah.

¹¹“Khediko ahan wabangâ pa hûlahma, ‘hethôte, hethôte!’ nimin akhennâng lupwãng thukhi, ngama raksepwah.

¹²Nemnyanwa pumma ‘lupwãng thukmah, ngama ne jetmah’ ngama dânthâng wah.”

¹³Athôanko Jisu ma ngatwah, “jetletma dangen, chenrãngma ngako, nema rãngwo sanpoat pa jetmet.

Haa Warem Nginthakthô

(Luk 19.11-27)

¹⁴“Ere sanpoatko rangkethung Hahsông pa arerãngrãng dãngmin. Rekthenâng mihnyan wathema ate hum phethien lahma hahtaang nãng chhoanwah; phumma ate haaheh roolahma ate chhahkhem heh sokare thukthien wah.

¹⁵Atema haa chentô nãng mâmâ tôtô moatlem kohthien wah: Wathenâng hahjat bangâ ngun kohthien wah, ahan watheko hahjatnii ngun kohthien wah, ngale ahan watheko hahjatthe ngun kohthien wah. Erediko tãngte pa chhoanwah.



¹⁶Hahjat bangâ kohtah haapa lemlienma chhoan lahma ahan hahjat bangâ ngun chohbi wah.

¹⁷Ererângrângjô hahjatnii kohtah haa pummemin ahan hahjatnii ngun chohbi wah.

¹⁸Phumma hahjatthe kohtah haa pumma chhoan lahma ate tângtewa ngunpa hahken thulahma bînthien wah.

¹⁹“Melâng rãngpâ diko tângtewa pa ngakhû lahma ate haaheh demnâng atema kohthientah ngunheh phensietmîn wah.

²⁰Hahjat bangâ kohtah haapa hûlahma atema chohbitah ahan hahjat bangâ pemin kohwah. Haa pumma ngatwah, ‘Tângte nangma hahjat bangâ kohthang.’ ‘Sûtan! phumma ngama ahan hahjat bangâ chohbila ekang.’

²¹Tângtewa pumma haako ngatwah, ‘lâsenmotoh, nanga asen ngale dâlemlî!’ ‘nangma are amãnychha ngun pumma senthemthem jienmo eko, erohwah ngama nangnâng ngun jahmõang ethienthuk e. Wãngro nga demnâng khu johhah wãnghang!’

²²Erediko hahjatnii ngun kohtah haapa hûlahma tângtewa ko ngatwah, ‘nangma nganâng hahjatnii ngun kohwah, phumma sûtan tângte! ngama ahan hahjatnii chohbila ekang.’

²³Tângte pumma haako ngatwah, ‘lâsenmotoh, nanga asen ngale toangtang, nangma amãnychha ngun pumma senthemthem jienmo eko, ngama nangnâng jahmõang ngun ethienthuk e. Wãngro nga demnâng khu johhah wãnghang!’

²⁴Erediko hahjatthe kohtah haapa hûlahma tângtewa ko ngatwah, ‘Tângte, ngama jet nanga nyahrâng mihchhihjat; nangma lekhiet leliwah khôanhente, ngale nangma chhahthong lemowah chhah khôankhente.

²⁵Nga nangran cheilekma nang ngunpa hahkennâng bînthien wah. Sûtan! nang ngunpa ana’.



²⁶Ate tângtewa pumma haako ngatwah, ‘nanga achhih ngale ajõ’, ‘nangma jet dangwah, dangale rohkole, nga a, ngama lekhiet leliwah khôanhente, ngale ngama chhahthong lemowah chhah khôankhente ngama?’

²⁷Nangma nga ngunpa ngunthien humnâng sek lohmeke, nga ngakhokko ngunchha demnâng ngakchohmîn wah.

²⁸Atewah ngunpa thaletma hahjat echhi chohte wako koh en ngama ngatwah.

²⁹Chenrângma ngako, hennâng roanchhe tongeka ereko lephang lelâng chendanga ngama ajah lêkohmin; rohkomin, hennâng chenjô aho dangeka, atenâng roanchhe tongeka pejô ngaktôan chhoan rêmin.

³⁰Are sekho haapa rangnyek khenko petphek at en; ereko asepe nungma ate pâchupkek lahma chentonga.’

Athôan Khope Rên

³¹“Chenthu Mihnyan Chhapa rangkethung wah ngintatte heh phangtang demnâng Lowang danglahma katko, atea Lowang tângthinko etonga,

³²ngale chentô diak akan wah mihnyan heh ate mathahko ekhôanhûa. Erediko kien chhangwah saak rângrephea rângrâng, mihnyan heh atema khunii korâng ephansiet a.

³³Atema toangtang mihnyan heh ate dekchahko etongthuk a, ngale ahan heh ate dekhitko etongthuk a.

³⁴Erediko Lowang pumma ate dekchahwah mihnyan hehnâng enga a, ‘wãngrên, nenâng nga Wama rang lâkohthen! rangbâng habbâng thuwah nerâng khoakhem kohthen Hahsông pa kepwãngrên.

³⁵Nga rêmrîtko nema chhahthuktha, ngale jolân ritko nema jo jokthuktha; nga mihwun dângpoatko nema nehumnâng jekthuktha,

³⁶nga boangloang dângko nema khet kepthuktha; nga akhun poatko nema chohsûtha, ngale phâtek khennâng dângpoatko nema chohsûtha.’

³⁷Erediko toangtang hehema edânthanga, ‘Teso, nima chenthu nang rêmrît khelihma chhahthukthih a, roh akole jolânrit khelihma jokthukthih a?’



³⁸Chenthu nanga mihwun khelihma nihum nâng jekthuktih a, roh akole boangloang khelihma khet kepthuktih a?

³⁹Chenthu nanga akhun khetih a, ngale phâtek nâng tonglohma chohsû hûtih a?’

⁴⁰Phumma Lowang pumma edânthanga, ‘Ngama nenâng thôkoh eka, chenthu nema ngadijunte arinthôn wathe nâng chohsûtet a, arepa nganâng chohsok wah!’

⁴¹“Erediko atema ate dekhith wah hehnâng enga a, ‘nga tâwah taangen, nea Joban wah achhih chohte! Joak le ate ngintatte hehrãng khoakhem kotah roantang roanjêng khâmthin wendôko ka en!

⁴²Nga rêmritko nema chhahtuk mahtha, ngale jolân ritko jo jokthuk mahtha;

⁴³Nga mihwun dângpoatko ne humnâng jekthuk mahtha, ngale boangloang dângpoatko nema khet kepthuk mahtha; nga khun poatko ngale phâtek nâng tongpoatko nema chohsû mahtha.’

⁴⁴Erediko thinma atenâng edânthanga, ‘Teso, nima nang rêmrii lohma chenthu khetih a, ngale chenthu jolânrit khetih a, ngale mihwun danglohma khetih a, rohkole boangloang khetih a, ngale khun khetih a, rohkole phâtek nâng khelihma lechohsû dangtih a?’

⁴⁵Ephumma Lowang pumma edânthanga, ‘Ngama nenâng thôkoh eka, chenthu nema arinthôn wathe nâng lenyoak chohsû dangtet a, arepa nganâng lenyoak chohsû dangeha.’

⁴⁶Ereheh roantang roanjêng chêmchoh thinnâng chienkatmin, phumma toantang heh roantang roanjêng roandông chohtin nâng wângthukmin.”

Mathiu 26

Jisu Lelatnâng Ranchep

(Mak 14.1, 2; Luk 22.1, 2; Jon 11.45-53)

¹Chenthu Jisu ma areheh tâhethô diko, atema ate dijunte hehnâng ngatwah,



²“Nema ajet, jânii diko Adankhoam lokuh dângmin, ngale erediko Mihnyan Chhapa rittekthuk rêmin.”

³Erediko soam aroakte adong ngale khhepho phannang heh soam aroakte adong Kaipas humko aroamma khôanchohmîn wah,

⁴ngale ahuhma Jisu huhlokhhek lahma ritphe rãng thômîn wah.

⁵Thinma ngatwah, “Arepa nãngma lokuh poatko lemomin”, “chenrãngma ngako mihnyan heh rin môangkah a.”

Bathani hahnâng Jisu nâng Tienma Lokkoh

(Mak 14.3-9; Jon 12.1-8)

⁶Jisu Bathani hahwah angêm khoanchette Simon humko dângwah.

⁷Jisu phhekchhah chhah thuko, dihiaknyu wathema longwah hôanwah thòko thâchaantien thòthe kephu lahma Jisu khoko lokkohwah.

⁸Dijunte heh ma erepa khelahma rinkhah wah, thinma ngatwah, “Arepa mahto nâng chenrãngma diphe ekoa”

⁹“Are tienpa jahmông ngunnâng sânglihma ngunpa tangchhih hehnâng chenkoh mahtihne!”

¹⁰Thinma chenni ngaeka erepa Jisu ma jetlahma, thinnâng ngatwah, “Nema are dihiaknyu pa chenrãngma sekham eken a? Atema arepa ngarãngma asenli moeka.

¹¹Nedemnâng tangchhih heh roantangma echoh en, phumma nema nga roantangma chohmahha.

¹²Atema ngaphoangko tienma lokkoh ehangpa ngabînjâ rangwo rãng moeka.

¹³Ngama nenâng nginlinlin thòkoh eka, rangkhenko chenriang thenângjô akomin are nginkongsen pa phoangthòko, atema chenni moeka erepa ate thônghunrãng thômîn.”

Jisu Chênseng Rãng Juda Nyoak

(Mak 14.10, 11; Luk 22.3-6)

¹⁴Erediko echhi wanii dijunte kowah wathe - ate mînpa Juda Iskarot - pa soam aroakte adong tânâng wângwah



¹⁵ngale atema thôngphâ wah, “Ngama nenâng Jisu melothuk ako nema nganâng chenni kohha?” Thinma roakrem janngun weihlahma Juda Iskarot nâng kohwah.

¹⁶Ere diphumma Juda Iskarot ma thinnâng Jisu loatthukrăng sanpoat senpa lemsokwah.

Jisu ma Ate Dijunte heh demnâng Adankhoam Lokuh Phhekchhah Chhah

(Mak 14.12-21; Luk 22.7-13, 21-23; Jon 13.21-30)

¹⁷Wichhi lesak pheban phek lokuh khebeng jâko dijunte heh Jisu tâko hulahma atenâng thôngphâ wah, “Nima nangrăngma Adankhoam lokuh phhekchhah pa chenriang nâng khoakhemkoh ea?”

¹⁸Jisu ma thinnâng ngatwah, “Hahdaang kowah wathe mihnyan tânâng wāngen”, “Ngale atenâng thôkoh en: ‘Hethôte ma ngaeka, nga sanpoat pa lâhûtha; nga ngale ngadijunte heh nanghumko Adankhoam lokuh pa kuhmin.’”

¹⁹Jisu ma chenroh thôkotah a eroh dijunte heh ma Adankhoam lokuh phhekchhah pa khoakhêm wah.

²⁰Rangjâthah phumma, Jisu ngale ate dijunte echhi wanii pa phhekchhah chhahrăng tôngwakwah.

²¹Phhekchhah chhahthuko Jisu ma ngatwah, “Ngama thôkoh eka, nekhuwah wathema nga echen esengha.”

²²Dijunte heh nyahrăng hungke lahma wathe diko wathema atenâng thôngphâ wah, “Teso, nangma nganâng ngaehanga?”

²³Jisu ma dânthâng wah, “henma ate bankên pa nga demnâng johrôm phhekkat ehanga erepumma echen esenghang.

²⁴Joban nyapraang nâng chenroh raangeka eroh Mihnyan Chhapa eriaa, rohkomin henma Mihnyan Chhapa chensăng eka ererăngma chentô chhih dângmin a! Ere mihnyan răngma ate lechêm hongchha peba asen dângmin wah!”



²⁵Chen asãngte Juda hongjab lahma chhienwah, “Hethôte, nangma nganâng lenga ehanga?” “Nangma lâpun jabtoh,” ngama Jisu ma dânthâng wah.

Teso Rangjâ Phhekchhah

(Mak 14.22-26; Luk 22.14-20; 1 Korint 11.23-25)

²⁶Thin phhekchhah chhahthuko, Jisu ma bankên chhupthe toanlahma Joban nâng dangkoh a ngat rangsoam lahma chhupsiet lahma ate dijunte hehnâng kohwah. Atema ngatwah; “Thaha ngale phhek en,” “arepa ngaphoang.”

²⁷Erediko atema bâti toanlahma Joban nâng dangkoh a ngat rangsoam lahma thinnâng kohwah, atema ngatwah, “nekhu chentôma arepa jok en,”

²⁸“arepa ngahei, areko Joban wah toamsemwin, ngahei pa ajahthem mihnyan heh pap mapkoh rãng hongeka.

²⁹Ngama nenâng thôkoh eka, Ewa Hahsông theko nedemnâng angurti anyan maroam roamjokko, ngama arepa lethe ngakjok tumin.”

³⁰Erediko thinma rangsoamsê selahma Oliv hahho nâng wângwakwah.

Piter ma Jisu Jetmek ngama Ngatpa Jisu ma khemama Jetwah

(Mak 14.27-31; Luk 22.31-34; Jon 13.36-38)

³¹Erediko Jisu ma thinnâng ngatwah, “Thejâ rangpen nekhu phangtang huhchhoan letma ngalolo ephethienha, chenrãngma ngako Joban nyapraang nâng ngaeka, ‘Joban ma saaksoktepa eritphea, ngale saak chhangpa mâmâ phânychhoan ephan chhoan a.’

³²Rohko-min nga ngakhîn diko, nga nemako Galili nâng ewãngla ang.”

³³Piter ma loatjab lahma Jisu nâng ngatwah, “Ahân heh ma phangtang mejô mephethien hokomin, ngama nang chenthumin phethienmih!”

³⁴Jisu ma piter nâng ngatwah, “Ngama nangnâng thôkoh eki, thejâ rangpen wowen mako, nangma nga jetmahang ngama ditrem enga hang.”

³⁵Piter ma dânthâng wah, “Nga nang demnângjô mejohrii ekomin eroh chenthumin jabmek!” Ngale dijunte ahan hehmemin mănthe ngatwah.

Jisu Gathemani nâng Rangsoam

(Mak 14.32-42; Luk 22.39-46)



³⁶Erediko Jisu ate dijunte heh demnâng Gathemani theko wângwah, ngale atema thinnâng ngatwah, “Nga ire theko wânglekma rangsoam wângthuko, ne areko tongla en.”

³⁷Ate demko piter ngale Zibidi chha wanii johsietwên wah. Ereko Jisu nâng hungchhih chêmchoh hokwah,

³⁸Ngale atema thinnâng ngatwah, “Nga hungkhen wah hungchhih pa atôdông ngajômin lânkhasietroh hûera. Areko tongen ngale nga demnâng met hinhin johdangha.”

³⁹Roanche taangwãng lahma ate thhenpa hahko khupjup katlahma rangsoam wah, “Ewa, meta dangako, are ngawah chêmcheipa rephe kohhang! rohkomin ngama hunkang junko dangmah, nangma chenrohhun eko erejunko chendanga.”

⁴⁰Erediko dijunte warem tâko ngakka tahpa juplek lahma khekatwah; ngale atema piter nâng ngatwah, “Ne warem nga demnâng koantathe tômin met tajoh hintong mahhane?”

⁴¹Met hin dangen ngale rangsoam letma tongen, nemin achhihma hungtôanko nekchen jârii eken. Juma mehun akomin, hei angem pa aboan.”

⁴²Eredikomin rekthe Jisu chhoan lahma rangsoam wah, “Ewa are ngawah chêmcheipa leta repheli medang ako, ngama hèn ang, nanghung junko chendanga.”

⁴³Ate wienngak katkomin dijunte heh juplek lahma tônglâwah; thin a mitkân lahma tatongwak ho.

⁴⁴Eredikomin thin phethien lahma Jisu chhoan lahma lôremrãng mánthethin pa rangsoam wah.

⁴⁵Erediko dijunte heh tânâng ngakka lahma thinnâng ngatwah, “Nea athângheh min boanjup boantong thune? Sûtan en! Mihnyan Chhapa papi mihnyan heh deknângkoh lâthângtah.

⁴⁶Chepen, chhoan eki. Sûtan en, ngachen asângte mihnyan pa anã!”



Jisu Loatkhek

(Mak 14.43-50; Luk 22.47-53; Jon 18.3-12)

⁴⁷Jisu ma nginthô thuko echhi wanii dijunte kowah wathe ate mînpa Juda hokkhoam hokwah. Ate demko soam aroakte adong ngale khhepho phannang hehma mihnyan jahmõang dǎng apah demnâng chienhokwah.

⁴⁸Jisu chên asângte pumma mihnyan hehnâng ngatwah: “Ngama chup ekang mihnyan pa nema lem ekenpa. Nema ate lokhhek en!”

⁴⁹Juda Jisu tâko tintin wǎng lahma, “salem hethôte”, ngama ngatwah, ngale erediko atema Jisu nâng chupwah.

⁵⁰“Lemruchha sitsiakmo o!” ngama Jisu ma dânthâng wah. Erediko thin loatwǎng lahma Jisu loatkhek wah, ngale rongtêngtêng khhekwah.

⁵¹Jisu demwah wathema ate dǎng toanlahma soam aroakte adonghaa nâ jâdoak wah.

⁵²Jisu ma ngatwah, “Nang dǎngpa amǎnmǎnko ngakthien o”, “Henhenma dǎng sem eka ereheh dǎngnângjô ritmin.

⁵³Ngama Ewa nga pângrǎng etaroo ang ngama nema jetmetne, ngale lemlienma atema rangwah echhi wanii ngintatte heh chenta chienkattha?

⁵⁴Phumma ngama eroh meroo angko, Joban nyapraang nâng nga aroh dângmin ngama raang ekapa chenroh toangtang jiendângmin a?”

⁵⁵Erediko Jisu ma mihnyan hehnâng ngatwah, “Nga a mihngoan rǎngrǎng nema nga loatkhek rǎng dǎng apah heh kepletma hûeren a? Rangwo roakweih ngama rangsoam humko tonglekma hethôtek poatko lokhhek mahthani.

⁵⁶Are chentôpa mǒng hehma Joban nyapraang nâng raangtah heh toangtang dângrǎngma dangeka.” Erediko dijunte hehma ate phethien lahma huhchhoan wah.

Jisu Jews heh Ngoang awang Mathah nâng

(Mak 14.53-65; Luk 22.54, 55, 63-71; Jon 18.13, 14, 19-24)



⁵⁷Jisu loatkhekete heh ma soam aroakte adong Kaipas, humko Niemarang hethôte, ngale khhepho phannang heh khôn eka chhangko siethokwah.

⁵⁸Piter ataang taangma soam aroakte adong humthakho tôko junhokwah. Ate thakhoko wãng lahma abemte sipâhi heh demko chenroh chendanga ngama jetrãng johtông wãngwah.

⁵⁹Soam aroakte adong ngale Jews khhepho phannang heh ma Jisu jienritphe rãng atenâng athe chohloatrãng hunwakwah;

⁶⁰Ajahthem mihnyan heh ma Jisu lelatnâng mothô khoanglep heh hôngthô hokwah, rohkomin thinma athe pa jienchoh loho. Athôanko wanii mihnyan hongchep lahma ngatwah

⁶¹wanii pumma ngatwah, “Are mihnyan pumma ngatah, ‘Ngama are Joban rangsoamhum pa chhihsiet lekma jârem diko amãnmãn tangak hoan ang ngama.’ ”

⁶²Soam aroakte adongpa toanchep lahma Jisu nãng ngatwah, “Are nang lelatnâng jab ekako nangma chenjô dânthângthin ahone?”

⁶³Rohkomin Jisu kihchepchep tôngwah. Eredikomin soam aroakte adong pumma atenâng ngatwah, “Ahinte Joban mênko toamsem lekma nangnâng ngaeki: Ninâng thôkohhi, nanga Joban Chha Misaia ne.”

⁶⁴Jisu ma atenâng dânthâng wah, “Nangma lâpun jabtoh. Rohkomin ngama nekhu phangtang nãng thôkoh eka: Are sanpoat pumma nema Mihnyan Chhapa Achaanthôn Joban dekchahko tonglahma phoamkhohnâng kalahma ekhe en!”

⁶⁵Aroh ngatko, soam aroakte adong pumma ate khetpa khasiet lahma ngatwah, “Joban thãse eko! Nima ahan hâkhi lemtumih! Nangma Joban thãse pa nima athângheh lâchoh tattih!

⁶⁶Nema chenni thonghun eken a?” “Atea lâthetah, ritphe rêmin” ngama thinma dânthâng wah.



⁶⁷Erediko thinma Jisu thhenko thoakkah ma thoakwak lahma watwah; ngale atenâng watte hehma

⁶⁸ngatwah, “Misaia! nangnâng wattepa hen a, arepa profesi hôantan, jettan nangnâng henma wat ehoa!”

Piter ma Jisu Jetmek ngama Ngat
(Mak 14.66-72; Luk 22.56-62; Jon 18.15-18, 25-27)

⁶⁹Piter hum thakhoko tongthuko, soam aroakte haa dihiaknya wathe kalahma atenâng ngatwah, “Nangmin Galili wah Jisu demko johdângwah”,

⁷⁰Phumma thinkhu phangtang mako, Piter ma “Nema chenni ngaeken a, erepa ngama jetmek” ngama sâhângwah.

⁷¹Ngale erediko piter thakho kowah chhoan lahma, panlien nâng katwah. Eredikomin, ahan dihiaknya haa wanthe ma piter wienkhe lahma ere thekawah mihnyan hehnâng ngatwah, “Atemin Nazarat wah Jisu demko dângwah.”

⁷²Erekomin piter ma daklahma dânthâng wah, “Ngama toamsem ekang, are mihnyan pa ngama jetmek.”

⁷³Chuthe ritko erekowah chepte mihnyan kalahma piter nâng ngatwah. Thinma ngaeka rângrâng, “Nangmin ire heh khukowah wathe eta dangthem o,” “Chenrângma ngako nang jabnyoung pa thin jabnyoung rângrâng jab eko!”

⁷⁴Erediko piter ma ngatwah, “Ngama toamsem lekma toangtang jabekang! mothô methô angko Joban ma chenchêmsiet hang! ngama ire mihnyan pa jetmek!” Ere rienrienko wowenwah,

⁷⁵Ngale Jisu ma atenâng chenni thôkotah a erepa piter ma thônghun wah: “Wowen mako, nangma nga jetmek ngama ditrem enga hang.” Erediko piter loatchhoan lahma nyahrâng chhisep chhoanwah.

Mathiu 27

Jisu Pilat tânâng Sietkat
(Mak 15.1; Luk 23.1, 2; Jon 18.28-32)



¹Rangkhah rangkhoma chentô soam aroakte adong ngale khhepho phannang heh ma Jisu ritphe rãng themawa wah.

²Thinma janruma khhek lahma Roman Govono Pilat tânâng sietkat wah.

Juda Rit Ngin

(Moatlem 1.18, 19)

³Chenthu Jisu loatthukte Juda ma Jisu ritphe nginpa chohtat phumma ngakchhih thonghun lahma roakrem janngunpa soam aroakte adong ngale khhepho phannang hehnâng ngakwên kohwah.

⁴Atema ngatwah, “Ngama toangtang mihnyan pa ritphethuk lekma pap lâmotek!” Thinma dânthâng wah, “Are nginpa nima chenni ejet ea?” “Arepa nangma jetthin ba!”

⁵Juda ma ngunpa rangsoamhum ko petphethien kolahma ngakchhoan wah; erediko ate chhoan lahma chethietrit wah.

⁶Phumma soam aroakte adong pumma ngunpa toansem lahma ngatwah, “Are ngunpa mihnyan heithã, erohwah nãng Niemarang junko are ngunpa Rangsoamhum kowah ngunsek bâkoatko leta sekmin.”

⁷Phumma ngin pûnthômîn diko, thinma ere ngun pumma mihwun heh mangruk hân rãng tithôante pit riakwah.

⁸Erejunko thenep thejã nãngmin erepitko “Heima riakwah pit” ngama mîn eka.

⁹Erediko Jirimia mông ma jabtah nginpa toangtang dãngwah: “Isrial mihnyan heh punthômîn lahma ate thãrãng kohtah roakrem ngunpa thinma kepwah,

¹⁰Ngale Teso ma nganâng chienthang rãngrãng, thinma ere ngun pa tit hôante pit riakrãng kepwah.”

Pilat ma Jisu nãng Nginchhien

(Mak 15.2-5; Luk 23.3-5; Jon 18.33-38)

¹¹Roman Govono mako Jisu chepwah, eko atenâng “Nanga Jews heh Lowang dangoa?” ngama chhienwah. “Nangma lâpun jabtoh” ngama Jisu ma dânthâng wah.



¹²Rohkomin soam aroakte adong ngale khhepho phannang hehma atenâng sekhâmko atema chennimin dânthangho.

¹³Ephumma Pilat ma atenâng ngatwah, “Thinma nang lelatnâng are ngin thôeka heh nangma tatmohne”

¹⁴Phumma Jisu ma khapthemín danthangho, phumma Govono pa nyahrâng patritwah.

Jisu Ritpherâng Ngin Pat

(Mak 15.6-15; Luk 23.13-25; Jon 18.39—19.16)

¹⁵Adankhoam lokuh roakweih henpa nok atang hehma laangphe kohhi ngama ngaeka ere mihnyan pa Roman Govono ma phâtek wah chilaang phewah.

¹⁶Ere rangkuhko anga ngama jetlahma phâtek nâng tângte ate mînpa Jisu Barabas ngama wathe mihnyan dângwah.

¹⁷Ephumma chenthu loangchhang pa khôanhok phumma, Pilat ma thinnâng thôngphâ wah, “Ngama henpa laangphêrâng nema hun eken a? Jisu Barabas pa laangphe ang ale, Misaia ngama ngaeka Jisu pa lêngphe anga?”

¹⁸Pilat ma senthemthem jetlahma dângwah, Jews heh khhepho phannang hehma Jisu nâng phetwan mitchek junko nganâng lohûkoh ehang ngama.

¹⁹Metloatthin hum kowah tângthinko Pilat tâng thuko, ate dihiak pumma atenâng ngin matkatwah: “Are toangtang mihnyanko nangma chenjô nekre, chenrângma ngako ate junma thepen metmãngnâng ngama nyahrâng chêmchoh ekang.”

²⁰Soam aroakte adong ngale khhepho phannang hehma mihnyan hehnâng ngatwah, nema pilat nâng nga en, Barabas laangphe kohhi, ngale Jisu pa arittek reo, ngama.

²¹Phumma Pilat ma mihnyan hehnâng thôngphâ wah, “Are wanii kowah henpa laangphekoh a?” Thinma “Barabas laangphe kohhi” ngama dânthâng wah.



²²Phumma Pilat ma thinnâng thôngphâ wah, “Eroh medang ako, ngama Misaia ngama roeka Jisu ko chennire anga?” Thinma, “Arittek reo!” ngama dânthâng wah.

²³Rohkomin Pilat ma thôngphâ wah, “Atema chenni chhihmotah a?” Ere diphumma “arittek reo!” ngama chaan chaanma danrak wenwah:

²⁴Chenthu Pilat ma mihnyan heh demnâng ngin thamlek thômînpa sekhotu, ngale aroh metham thômîn angko rinba ekhawak a ngama jetlahma, atema jo toanlahma thin mathahko atedek sâsoan lahma ngatwah, “Are mihnyan ritpa ngamet dangmah! arepa nemaba ritphe eken!”

²⁵Mihnyan heh phangtangma dânthâng wakwah, “Are mihnyan ritthâpa ni ngale nichhu nichha heh khohnâng chendanga!”

²⁶Erediko Pilat ma Barabas laangphewah; ngale atema Jisu nâng wathlahma, rittekthuk rewah.

Sipâhi hehma Jisu nâng Jôannam

(Mak 15.16-20; Jon 19.2, 3)

²⁷Erediko Pilat sipâhi hehma Jisu Govono humnâng sietkatwah, ngale Jisu tumlitko mihnyan heh phangtang tumchepwah.

²⁸Thinma Jisu khetpa koakphe wakko lahma, khethek ngaklit pohkohwah.

²⁹Erediko suhkãngwah khaphokrãng hân lahma Jisu khoko phokkoh rewah, ngale Jisu dekchahko menthunpa semthuk rewah; erediko ate mako dakuhto lahma, “Jews heh Lowang roandonglo dongo!” ngama ngawak lahma jôannam wah.

³⁰Thinma atenâng thoakkahma thoak rewah, ngale thankah toan lahma ate khokowat rewah.

³¹Chenthu thinma Jisu nâng joannam diko, khetkepka ngakkoakphe kolahma ate khetpa ngakpoh kohwah. Erediko rittekrãng sietchhoan wah.

Jisu Rittek

(Mak 15.21-32; Luk 23.26-43; Jon 19.17-27)



³²Thin loatchhoan poatko, Kren hahwah mihnyan wathe ate mînpa Simon ngama lemko chohmîn wah, phumma sipâhi hehma atenâng Jisu ma peka bângphakpa pêthukwah.

³³Thin a Golgotha theko wângwakwah, arepa, “Khorã sekthinthe” ngama ngaeka.

³⁴Eretheko thinma Jisu nâng angurti demko lihân akhahli saklahma jokthukwah; phumma atema thatliapdek lahma erepa jok ho.

³⁵Thinma Jisu rittek diko, ate khetpa longkendoh nâng tan lahma phenkepwah.

³⁶Erediko thinma eretheko tonglahma bemwah.

³⁷Ate khotokko atenâng dûmmek nyapraang raang lahma bângphakko betkohwah: “Are Jisu pa Jews heh Lowang” ngama raanglahma betkohwah.

³⁸Erediko thinma Jisu demko ahuhte wanii, ate dekchah wathe ngale dekhitko wathe johrittek wah.

³⁹Adankhômamte mihnyan hehma thinkho hek lahma Jisu nâng dûmmek wah:

⁴⁰“Nangma Rangsoamhum pa chhihsiet lohma jârem khenko tangak hoan ang ngatohni! Joban Chha medang oko nangdede pepângriio! ngale bângphak khokowah jâkhoam katanrô!”

⁴¹Ererângrângjô soam aroakte adong ngale Niemarang hethôte, erediko khhepho phannang hehma atenâng jôjêmwah:

⁴²“Atema mihhan heh pepâng eka, phumma atedede tape pângriimah! atea Isrial heh Lowang dangmahne? Ate bângphak khokowah athângheh mejâkhoam karako, nângmemin atenâng putedâlem e!

⁴³Atema Joban nâng tok anaa lahma atedede Joban Chha ngarii eka. Thatsutan e, athângheh Joban ma ate pepâng chenhun ale!”

⁴⁴Ate demwah joh rittektah ahuh heh memin atenâng erohjô dûmmek wah.

Jisu Rit

(Mak 15.33-41; Luk 23.44-49; Jon 19.28-30)



- ⁴⁵Sanhêmtah ko diaktangma koantarem rãng rangnyek dãngwah.
- ⁴⁶Wanrem sanpoat tôko Jisu ma chaanmõang hôngrakwah, “Eli, Eli, lama sabatthani” are ngaeka pa, “Joban, Joban, chenrãngma thinphe ehanga?” ngama ngaeka.
- ⁴⁷Erekowah tôngte mihnyan heh ma tat lahma, “Atema Ilija roeeka!” ngama ngatwah.
- ⁴⁸Thinkhu tungwah wathe lemlienma chhoanka lahma jochhupli pongpe noappa angurti chhihnâng rûmka lahma thankah rako hetlahma atenâng jokthukrãng phungwah.
- ⁴⁹Phumma ahan heh ma ngatwah, “Mamêngtan, Ilija ate pepâng rãngma chenka ralema thatsutan e!”
- ⁵⁰Eredikomin Jisu ma chaanmõang wientherak lahma rekthôansiet wah.
- ⁵¹Jisu ritdiko Rangsoamhum wah khet tintahpa rangkhoh pumma daphang tôko khani korãng khâjâwah. Erediko hahtii, longjan heh chhupjâ rewah,
- ⁵²Mangruk heh lãngjâ rewah, ngale ajahthem Joban nãng putedâlemte mihnyan riitah heh ngakhîn rewah
- ⁵³Thin a mangruk kowah loatchhoan wah, ngale Jisu ritwah ngakhîn diko Asâthôan Hahdaang Jerosalem nãng wãngwakwah, eko ajahthem mihnyan heh ma thin khewah.
- ⁵⁴Chenthu Jisu bemte Sipâhi sahhab ngale ate demwah sipâhi heh ma hahtii ngale ere sanpoat kowah chentô dangtah heh khelahma chei rewakwah, ngale thinma, “Linlinjo atea Joban Chha dãngwah!” ngama ngatwah.
- ⁵⁵Eretheko Jisu nãng hahtaangma sùlahma ajahthem dihiaknyu dãngwah, thin a Galili wah Jisu diko atenâng chohsok rãng ngama junkhoam wah.
- ⁵⁶Thinkhu chhangko Mariam Makdalani, Jems ngale Josepnii nyong Mariam, ngale Zibidi tangnyu heh dãngwah.

Jisu Mangbîn

(Mak 15.42-47; Luk 23.50-56; Jon 19.38-42)



⁵⁷Sanhêmthah ko Arimatha hahwah techhuwa wathe hokkhoam hokwah; atemîn pa Josep dângwah, ngale atemin Jisu dijunte dângwah.

⁵⁸Atema Pilat tânâng wãng lahma Jisu mangpa thâwângwah. Pilat ma Jisu mangpa rûchhoan thukwah.

⁵⁹Ephumma Josep ma mangpa jâtoan lahma khetnyan nâng doapwah,

⁶⁰ngale atema longrãwah thutah ate mangruk nyanko rûkatwah. Erediko atema mangruk kenpa longkâsek ma sekthien lahma chhoanwah.

⁶¹Mariam Makdalani, ngale ahan Mariam nima mangruk ngeko sûkat lahma tôngwakwah.

Mangruk Bênte

⁶²Khedi jâpa Pientông rangwojâ dângwah, phumma soam aroakte adong heh ngale Farasi heh Pilat demnâng chohmînwah

⁶³ngale thinma ngatwah, “Sir, nima chhemhun eki, are mothô wapa ahîn thuko, ‘nga a jârem diko ngakhîn rêmin,’ ngama ngatwah.

⁶⁴Eroh wah jârem maleleko ate mangruk pa senthemthem bemsokrâng chien o, eroh ledang kako ate dijunte hehmate mangpa huhka lahma ngakhintah ngama ephoangthôa. Are athôn wah thôeka mothôpa khebângko thôtah nomemin achhih edanga”.

⁶⁵Pilat ma thinnâng ngatwah, “Abemte sipâhi hehwah sietletma, mangrukpa senthemthem bemka en.”

⁶⁶Ephumma thin chhoan lahma longkâsek pa lejien laangli tângmiem katwah, ngale abemte sipâhi hehnâng bemthuk rewah.

Mathiu 28

Angakhîn

(Mak 16.1-10; Luk 24.1-12; Jon 20.1-10)

¹Pientông rangwo dijâko, dobatjâ wowen khoko, Mariam Makdalani, ngale ahan Mariamni mangruk nâng kalahma sokkatwah.



²Phumma lemlienma hahtii dong hôngtiwah; rangkethung wah Teso ngintatte kalahma long kêsekpa loangphe kalahma ere khohko tôngkatwah.

³Ate thenphăng pa rangdăng khiapda răngrăng dăngwah, ngale ate khetpa mien răngrăng potutu dăngwah.

⁴Abemte sipâhi heh nyahrăng chei lahma atii rewakwah, ngale riichoan mihnyan răngrăng dăngwah.

⁵Rangkethung wah ngintatte ma dihiaknyu niinâng ngatwah, “Nekchei en,” “Ngama ajet nema rittek retah Jisu pa lemeken.

⁶Ate aretheko ahotu; atema ngatah răngrăng ngakhintah. Wăngletma ate thientah theko sŭwăng tanrên.

⁷Athângheh sitsiak wăngletma ate dijunte hehnâng thôkoh en, ‘atea ngakhintah, ngale ate athângheh nekhu mako Galili nâng wănglaeka; enâng nema ate echokhe en!’ Ngama nenâng chenni thôkotah a erepa thonghun en.”

⁸Ephumma mangruk wah sitsiak loatchhoan wakwah, ngale cheimin rewakwah, erediko khuhah nâhah chhoanwăng waklahma ate dijunte hehnâng thôkoh wah.

⁹Lemlienma Jisu thin demnâng chohmîn lahma ngatwah, “Khuhah nâhah dangen.” Phumma thinkhu Jisu tâko wăng lahma, ate dako lowăng waklahma rangsoam wah.

¹⁰Jisu ma thinnâng ngatwah, “Nekchei en,” “Wăngletma nga naa hehnâng Galili nâng wăngrăng thôkoh en, ngale enâng thinma nga echok khewak hang.”

Mangruk Bemte hehwah Ngin

¹¹Dihiaknyu heh wangthuko, mangruk bemte hehwah hahdaang nâng wăng lahma chenni dangtah a ereheh phangtang soam aroakte adong hehnâng thôkoh wah.



¹²Soam aroakte adong heh khhepho phannang heh demnâng chohmîn lahma thômîn wah; Ngale thinma sipâhi hehnâng jahmõang ngun kohwah

¹³Ngale thinma ngatwah, “Nema aroh thô en, ni rangpen jupthuko ate dijunte heh hûlahma mangpa huh pechhoan tah ngama.

¹⁴Are nginpa Govono ma metat ako, nima atenâng ethôkoh e, ererãngma ne chenjô sekma patritthin aho nima epânga.”

¹⁵Sipâhi hehma ngunpa tha lahma thinnâng chenroh thôkotah a ererãnggrâng thôwakwah. Ngale erohwah, thenep thejâ nângmin jews hehma nginpa eroh phoangthô eka.

Jisu Ate Dijunte heh tânâng Hôngloat

(Mak 16.14-18; Luk 24.36-49; Jon 20.19-23; Moatlem 1.6-8)

¹⁶Jisu ma thinnâng wângrâng thôkotah Galili wah hahhoko ate dijunte echhi wathe pa wângwah.

¹⁷Chenthu thinma Jisu chohkheko atenâng rangsoam wah. Rohkomin khuka pumma lepute dângwah.

¹⁸Jisu thintâko hehka lahma thinnâng ngatwah, “Nganâng Rangkhethung le hahtokkhoh kowah chentô Chaanpa lâkoh thang.

¹⁹Erohwah chentô mihnyan nyuchha, ngale chentô thenâng chhoan en, ngale ngadijunte rãng dangthukwak en: Ngale Wa mînko, Chha mînko, erediko Asâthôanju mînko baptijem koh en,

²⁰Ngale ngama nenâng chentô thôkotah ngin heh keprãng hethô en. Ngale nga nedemnâng roantang roanjêngma athôn kotuk ejoh tonga.”



Mak

Mak 1

Jon Baptisma Joban Ngin phoangthô

(Mathiu 3.1-12; Luk 3.1-18; Jon 1.19-28)

- ¹Arepa Joban Chha, Jisu Krista Nginkongsen.
- ²Arepa Isaia môngma raangtah rãngrãng bengdâng wah: “Joban ma ngatwah, ‘ngama nangmako nga nginmatte nanglem laangkoh rãng echienkat ang.’
- ³Sehah khonâng wathe phoangrak lahma tonga, “Teso rãngma lem khoakhem koh en; ate khômãng lemtin hôankoh en!”
- ⁴Jon baptis sehakhô nâng hong lahma baptijem phoangkoh wah ngale Joban nginpa phoangthôkoh rewah. “Ne papwah hungngaklit letma baptijem kepen,” ngama atema mihnyan hehnâng thôkoh wah, erohkoba “Joban ma nepap heh map ekohhên.”
- ⁵Judia diak ngale Jeroselem hahwah ajahthem mihnyan heh Jon ngin chohtatrãng chhoanwak wah. Thinma pap hehrãngma mappa thâwah, ngale Jordan joko thinnâng Jon ma baptijem kohwah.
- ⁶Jon ma ut banwah hânwah khetpa kepwah, ngale ate roamko ngemkhoan roamdít pa dít rewah. Ate phhekchhah pa wunwah kupchhang phanphe ngale nyahti heh dângwah.
- ⁷Atema mihnyan hehnâng thôkoh wah, “Nga diwah katte mihnyan pa nga noma abâmbâm adong. Ngama kunjup lekma ate dapheng putkoh rãngjô punmek.
- ⁸Ngama nenâng joma baptijem koheka, rohkomin atema Asâthôanju ma baptijem ekohhên.”

Jisu Baptijem Kep ngale Ate Hungtôan Ngin

(Mathiu 3.13—4.11; Luk 3.21, 22; 4.1-13)

- ⁹Chentô letaang thangma Jisu Nazarat wah Galili nâng katwah, ngale Jon ma Jordan joko atenâng baptijem kohwah.



¹⁰Jisu joko wah loatwâng rienrien, atema rangkethung pa laanglahma khewênwah, ngale Ju ate khohko phariwo rãngrãng kalahma khewah.

¹¹Ngale rangkethung wah jabkhab hôngjab katwah, “Nanga ngama nyahrãng ahun Chha. Nga nangdemnâng nyahrãng rinme ekang.”

¹²Lemlienma Juma atea sehahkho nâng chhoanthuk wah,

¹³Enâng joakma hungtoan lahma jâroak belii tôngwah. Eretheko wunnagem hehmin dângwah, rohkomin rangkethung wah Joban ngintatte heh kalahma atenâng chohsok katwah.

Jisu ma Ngahloatte Wabelii Roo

(Mathiu 4.12-22; Luk 4.14, 15; 5.1-11)

¹⁴Jon pa phâtek nâng sekdiko, Galili nâng Jisu kalahma Joban wah Nginkongsen pa phoangthô katwah.

¹⁵Atema ngatwah, “Sanpoat pa lâthângtah,” “ngale Joban Hahsông pa lânam hutha! nepapwah hungngaklit letma Nginkongsen ko putedâlem en!”

¹⁶Galili josi kêmma Jisu lienkhoam poatko, atema ngahloatte wanii khewah, Simon ngale ate naa Andru chaakma ngahhat dângwah.

¹⁷Jisu ma thinnâng ngatwah, “Ngadijun ha, ngama mihnyan loatrãng hethôa.”

¹⁸Lemlienma thin chaakpa phethien lahma johchhoan wah.

¹⁹Ate nôangthe khôamdiko ahan pho anaa wanii wienchoh khewah, Zibidi chha Jems ngale Jon dângwah. Khôankhoko tonglahma chaak sênphîn dângwah.

²⁰Jisu ma thin lepke rienrien lemlienma roowah; ephumma thinma thinwa Zibidi khôankhoko dekbi bite siettah mihnyan heh demnâng phethien lahma Jisu demnâng johchhoan wah.

Juchhah Lupte Mihnyan

(Luk 4.31-37)

²¹Jisu le ate dijunte heh Kaparnam hahnâng hokwah, ngale eredijâ wah Pientông jâko Sanagog nâng hûlahma hethô wah.



²²Ate ngin chohtatte mihnyan heh atema hethô junko bârit rewah, chenrãngma ngako, atea Niemarang hethôte heh rãngrãng ledang; atema chaan demnâng hethô wah.

²³Ere sanpoatko juchhih lupte mihnyan Sanagog nãng hûlahma rak hokwah,

²⁴“Nazarat wah Jisu, nangma ninâng chennire hun ehia? nanga ako nichhih sietrãng hûeroa? Ngama nanga hen a erepa jet e - nanga Joban wah Asâthôn nginmatte!”

²⁵Jisu ma juchhihko ngatwah, “kihtongo, ngale mihnyan kowah loatchhoan o!”

²⁶Juchhih pumma mihnyan pa cheili tiithukwah, ngale chaanmõang raklahma mihnyan kowah loatchhoan wah.

²⁷Mihnyan heh phangtang nyahrãng barii lahma wathema watheko jabmînwah, “arepa chenni dangeka? arepa chenni anyan wien hethôeka? are mihnyanko juchhih heh junloat chaanmin win, ngale juchhih hehmate ate ngin kepeka!”

²⁸Ngale Galilijaa chentô nãng Jisu nginpa lemlienma chohtat wah.

Jisu ma Jahmõang Mihnyan Sênsiet

(Mathiu 8.14-17; Luk 4.38-41)

²⁹Jisu le ate dijunte heh, erediko thindem ko Jems ngale Jon, Sanagog wah loatchhoan lahma Simon ngale Andru humnâng tintin katwah.

³⁰Simon tangnyu nyongpa chetloat khoanchetma jupthinko juplahma dãngwah, phumma Jisu hokkhôamhok rienrien lemlienma ate ngin pa thôkoh wah.

³¹Jisu ate tânâng wãng lahma ate dekkosiet lahma satsietwah. Phumma khoanchetpa senlahma atema thinnâng khoakhêm wah.

³²Sannyupdi rangjâthahko, mihnyan hehmate Jisu tâko chentô khun atamte ngale juchhih lupte heh siethokwah.

³³Erehah kowah mihnyan heh phangtang hum thakhoko khôanhok wah.



³⁴Jisu ma jatrup khoanchetma chêmte heh jahmõang mesiet wah, ngale juchhih min jahmõang junloat kohwah. Atema juchhih hehnâng chennimin jab aja thuk ho, chenrãngma ngako, ate hen a erepa thinma jetwah.

Jisu ma Galili nâng Joban Nginthô

(Luk 4.42-44)

³⁵Eredijâ wowen khoko, rangwo mabâng thângma, jisu satlahma humwah loatchhoan wah. Ate hahdaang kowah chhoan lahma mihnyan lesongthe nâng chhoan lahma rangsoam wah.

³⁶Phumma Simon ngale ate lemru heh Jisu lemrãng chhoanwah,

³⁷ngale thinma Jisu chohlem lahma atenâng ngatwah, “Anga ngama nang lem eho.”

³⁸Phumma Jisu ma dânthâng wah, “Nãnga are nãng kêanâ wah hahdaang hehnângmin chhoanmin. Ngama thinnângmin Joban nginpa thôkoh min, are rãngma jôba nga katwah.”

³⁹Ephumma Galilijaa phangtang nâng phoangkhoam lahma Sanagog hehnâng Joban ngin phoangthô kohwah, ngale juchhih hehmin junloat kohwah.

Jisu ma Delawa Mesiet

(Mathiu 8.1-4; Luk 5.12-16)

⁴⁰Angêm khoanchette delawa wathe Jisu tâko hûlahma dakuh thohû lahma atenâng roatsep wah. Atema ngatwah, “Nangma mehun oko, nga tasensiet hang.”

⁴¹Jisu ma mihwako nyahrãng mînchenwah, ngale ate dek loatsiet lahma sahloatwah. Atema ngatwah. “Ngama sênsiet huneki,” “sen o!”

⁴²Lemlienma mihwa kowah khoanchet pa chhoanwah, ngale sênwah.

⁴³Erediko Jisu ma atenâng senthemthem thôko lahma lemlienma chienchhoan wah,

⁴⁴Atenâng ngatwah, “Tattan, arepa hennâng min nekthôkoh. Rohkomin soam aroakte tânâng tintin wãngo atema chenthatsû tanho; erediko chentôma



nanga sentoh ngama jetrãng, Mosa ma chienwah soam aroak thinpa wênkoh.”

⁴⁵Rohkomin ere mihwa pa chhoan lahma nginpa chentô nãng phoangthô kohwah. Ere hahko Jisu mihnyan heh mitkhesok ko lejiën hongkhoam lândangroh atema phoangthô wah. Erohwah, Jisu mihnyan henjô lesongthe nãng tóngchhoan wah, ngale eretheko mihnyan heh chentô thewah ate tânãng hokwah.

Mak 2

Jisu ma kôasôte Delawa Sênsiet

(Mathiu 9.1-8; Luk 5.17-26)

¹Jâthe jâniï diko Jisu kaparnam nãng ngakhok wah, ngale Jisu ngakhok nginpa chohtat wakwah.

²Ephumma mihnyan heh jahmõang khôanhû lahma humko thechaakjô ahotu dãngwah, rangsâ wah kêsek lemthong komin thechaak ahotu dãngwah. Eko Jisu ma thinnãng Joban ngin thôkoh wah

³Wabelii mihnyan ma Jisu tânãng kôasôte delawa wathe pehok wah.

⁴Mihnyan heh jahmõang dãng phumma, kôasôte pa Jisu tânãng humkhen nãng lejiën sietwên dãngwah. Ephumma thinma Jisu tongeka punko supkho rapdoak wah. Chenthu thinma suptok khopa rapdoak diko, kôasôte mihnyan pa ate hemko jupthuk lahma waangphe katwah.

⁵Jisu ma thin putedâlem pa adong khelahma, kôasôte mihnyan ko ngatwah, “Echha, nangpap heh map lâkohtih.”

⁶Erethe kowah tóngte Niemarang hethôte hehma thonghun wah,

⁷“Aroh atema chenroh chinjab eka? Arepa Joban thãse eka! Joban loloba pap map tâkoh tepa!”

⁸Thin hungnãng chenni thonghun eka arepa Jisu ma lemlienma jetlo lahma thinnãng ngatwah, “Nema aroh chenrãngma thonghun eken a?”



⁹Are kôasôte mihnyanko, ‘nangpap heh map lâkohtih ngatpa chenjô latmah dangmahne,’ ngale, ‘Toanchep o, nang hempa toanpeo, ngale khoam o, ngamemin tanga ang?’

¹⁰Ngama Mihnyan Chha nâng are hahtokkhoh ko pap mapkoh rãng chaanwin, ngama nenâng ekhesok a.” Ephumma atema kôasôte mihnyanko ngatwah,

¹¹“Ngama nangnâng chien eki, toanchep o, nang hempa toanpeo, ngale humnâng wãngo!”

¹²Thin phangtangma sokpoatko, mihwapa ate hempa pelahma tôanchep wah, ngale lemlienma khôamchhoan wah. Thin phangtang nyahrãng bâritwah, ngale Joban nâng rôwakwah, thinma ngatwah, “Nima arerãngrãng chenthumin mathat chohkhe eki!”

Jisu ma Livi Roo
(Mathiu 9.9-13; Luk 5.27-32)

¹³Galili jophanâng Jisu wienngak katwah. Phumma ate tânâng mihnyan heh hokwah, ngale thinnâng Jisu ma hethô wah.

¹⁴Jisu khôam jenjenko, Alphias chha thãkho thâte Livi ate Ofic ko tonglahma chohkhe wah. Jisu ma atenâng ngatwah, “ngadijun hang.” Phumma Livi toanchep lahma Jisu dijunwah.

¹⁵Ere chuthe diko Jisu ma Livi humko phhekchhah chhahwah. Thãkho thâte ngale papi mihnyan heh Jisu diko jahmõang junkhôm wah, ngale Jisu le ate dijunte heh demnâng phhekchhah jahmõang ma johchhah wah.

¹⁶Niemarang hethôte ngale Farasi hehma Jisu papi mihnyan ngale thãkho thâte heh demnâng phhekchhah roamchhah lahma khewah, ephumma thinma Jisu dijunte hehnâng thôngphâ wah, “Arerãngrãng mihnyan heh demnâng ate chenrãngma roam phhekchhah eka?”

¹⁷Jisu ma erepa tatlahma thinnâng dânthâng wah, “Khoanchet hote mihnyan hehma doktor lemmah, khoanchette mihnyan hehma loloba doktor lemeka.



Nga a dong aleng dângte mihnyan heh roorângkat dangmahrâng, papi mihnyan heh roorâng kaerâng.”

Lephhek Lechhah Thangma Rangsoam rãngma Chhien

(Mathiu 9.14-17; Luk 5.33-39)

18Jon baptis dijunte ngale Farasi heh chenjô lephhek lechhah thangma rangsoam wah. Phumma mihnyan khuthe hûlahma Jisu nâng thôngphâ wah, “Jon baptis dijunte ngale Farasi heh dijunte heh ma chenrãngma lephhek lechhah thangma rangsoam eka, nang dijunte heh ma eroh soammah?”

19Jisu ma dânthâng wah, “Nemnyansiet kuhhôn thinnâng hûera heh lephhek lechhah thangma engakchhoan a ngama thonghun eken a? eroh chenthujô ngakchhoan mah! Nemnyanwa pa thin demnâng tôngpoatko, thin eroh letongmin.

20Phumma thintâwah nemnyanwa pa sietchhoan rangwô ehûra, eredikoba thinma lephhek lechhah thangma etonga.

21“Henmemin khetnyan chhuppa khetpã khohko petphinmah, chenrãngma ngako khetnyan chhup pumma tinsiet lahma khetpã pa khajâ lahma lodong elojâa.

22Ngale henmajô angurti nyanpa angurti pã thòko petkienmah, chenrãngma ngako angurti pumma thòpa epoakthuk a, phumma angurti ngale angurti thò wanniiini echhihjâa. Erohwah, angurti nyanpa thònyan nâng kienmin.”

Joban Pientôngjâ rãngma Nginchhien

(Mathiu 12.1-8; Luk 6.1-5)

23Pientông jâko Jisu chhahthongma dânkhôm wah. Ate dijunte hehmin ate demnâng johdan khômwah, eko dijunte heh ma chhahri pûnphek wah.

24Ephumma Farasi heh ma Jisu nâng ngatwah, “Sûtan, nâng Niem junko Pientông jâko lemolipa nang dijunte heh ma moeka!”

25Jisu ma thinnâng dânthâng wah, “Chenthu Devit rêmrii lahma chenni komin phhekchhah hun poatko Atema chenni retah a erepa nema mathatweih ekenne? Ate ngale ate mihnyan heh rêmrit dângwah,



²⁶Ephumma Joban humko wãng lahma Joban nãng kohtah phhekchhah pa chhahwâng wah. Arepa Abiathar pa soam aroakte adong dângpoatko dângwah. Nãng Niem junko soam aroakte ma loloba ere phhekchhah pa tâphhek chhahwah - phumma arepa Devit ma chhahwah, ngale ate demwah mihnyan hehnângmin chhahthuk wah.”

²⁷Ngale athôanko Jisu ma ngatwah, “Pientông rangwopa mihnyan rãngma asenrãng hânwah; mihnyan pa Pientông rangwojâ rãng hân dangmah.

²⁸Erohwah Mihnyan Chhapa Pientông rangwo rãngmemin Teso.”

Mak 3

Jisu ma Delawa Dekkò Sênsiet

(Mathiu 12.9-14; Luk 6.6-11)

¹Erediko Jisu Sanagog nãng ngakwâng wah, eko delawa dakkò wathe dângwah.

²Eretheko khuthe mihnyan ma Jisu nãng lâthe motoh ngama sekhamhun dângwah; erohwah Pientông jâko mihnyan pa chensensiet ale ngama namhû lahma sokhokwah.

³Jisu ma thinnâng, “Anâng khema nãng wãngrên” ngama ngatwah.

⁴Erediko atema mihnyan hehnâng chhienwah, “Nãng Niem junko Pientông jâko chenni tâmoatmin a? Mihnâng chohsok moatlem tâmoatmin ale, mihrãng chhihli tâmoatmin a? Mihnyan roandông pepâng moatlem tâmoatmin ale, mihiroandông chhihsiet moatlem tâmoatmin a?” Phumma thinma chenjô jabwak ho.

⁵Jisu ma rinkhah lahma thinnâng tumlit phoangsok wah, ngale thinnâng mînchenmin rewah, chenrãngma ngako thinhungpa chehâ ngale bâjâ rewah. Erediko atema mihwako ngatwah, “Nangdek pa chen o.” Ephumma atema chênsietko dekpa ngaksênwah.

⁶Ephumma Farasi heh Sanagog kowah lemlienma loatchhoan lahma Hirot mihnyan heh demnâng chohmîn lahma Jisu ritphe rãng themawa wah.

Jophanâng Loangchhang Dong



⁷Jisu le ate dijunte heh Galili jophanâng katwah, phumma loangchhang dong ate diko junkatwah. Thin a Galili ngale Judia diakwah hokwah,

⁸Erediko Jerosalem, Idumia, Jordan rãngma sankat ngewah, ngale Tair le Sidon hah kêanâ hahwahmin hokwah. Are chentô mihnyan heh Jisu ma moeka moatlem ngin heh chohtat lahma ate tânâng hokwah.

⁹Loangchhang pa jahmõang dâng phumma Jisu ma ate dijunte hehnâng khôankho lemkohha ngatwah, erohkoba mihnyan hehma atenâng lesahtiet edangwak a.

¹⁰Atema jahmõang mihnyan khoanchet mesietwah, ngale khoanchette mihnyan heh atenâng sahloatrãng khema nâng thinmîn wângwah.

¹¹Ngale chenthu juchhih lupte mihnyan hehma ate chohkheko, Jisu mathahko kôanjâ lahma, “Nanga Joban Chha!” ngama rakwah.

¹²Jisu ma juchhih hehnâng atea hen a erepa hennâng min nekthôkoh en ngama senthemthem ngatwah.

Jisu ma Echhi Wanii Moattat Chhoante Ren

(Mathiu 10.1-4; Luk 6.12-16)

¹³Erediko Jisu hahhokho nâng wãng lahma atema lemeka mihnyan heh ate tânâng roowah. Phumma ate tâko hokwah,

¹⁴ngale atema echhi wanii renlahma thinnâng moattat chhoante ngama ngatwah. “Ngama ne nga demnâng dângrãng ren eka,” ngama thinnâng thôkoh wah. “Ngama nea Joban ngin phoangthô rãng echienchhoan a,

¹⁵ngale nema juchhih junloat rãng chaan echoh en.”

¹⁶Atema echhi wanii rentah heh areheh dângwah: Simon (Jisu ma atenâng Piter ngama mînwah);

¹⁷Zibidi chha Jems ngale Jon (Jisu ma thinnâng Boanagas ngama mînwah, are ngaeka pa “Rangmok rangphak rãnggrãng mihnyan” ngama ngaeka);

¹⁸Andru, philip, Bartholomi, Mathiu, Thomas, Alpha chha jakob, Thadaus, ngale diak pête Simon,



¹⁹Jisu chên asângte Juda Iskarot.

Jisu ngale Bilzibul

(Mathiu 12.22-32; Luk 11.14-23; 12.10)

²⁰Erediko Jisu humnâng wângwah. Phumma Jisu le ate dijunte heh phhekchhah chhah sanpoatjô lechoh mihnyan heh jahmõang khôanhok wah.

²¹Chenthu Jisu humte tangkâ heh ma erengin heh chohtat phumma, ate sietrãng hokwah, chenrãngma ngako, mihnyan heh ma, “bâ aphâ reka ngama ngatwah!”

²²Jeroselem wah hokwah Niemarang hethôte heh ma ngatwah, “Atenâng Bilzibul tonga! Arepa juchhih heh lowang ma atenâng juchhih heh junloat rãng chaankoh eka.”

²³Ephumma Jisu ma ate tâko roolahma thinnâng nginthakthô demnâng thôkoh wah: “Joakma joakpa chenroh jienjunloat min a?”

²⁴Diak wanthe pa phanjâ lahma thintungko memênмін ako, ere diakpa chhihjà rêmin.

²⁵Ngale humthe khenwah mihnyan heh phanjâ lahma thintungko memên ako, ere humkâ pa chhihjà erea.

²⁶Eroh wah joak hahsôngpa thintungko mephanjâ ako, erepa leta lekrôngmin, thôanchhihjà erea.

²⁷“Khebengko lochaan wapa khhek lahma ledang kako, henmemin ate humpa chhihsiet lahma ate chhahkhem heh leta toanchhoan min; khhekthien lahmaba ate humpa etalonga.

²⁸“Ngama nenâng linlin thôkoh eka, mihnyan nâng ate pap heh phangtang map tâkohmin, ngale atema chentô jabchhih jabkhah jabtah hehmin map tâkohmin.

²⁹Rohkomin henma komin Asâthôanju lelatnâng mechhihjab ako chenthumin map lekohmin, chenrãngma ngako atema roantang roangjêng rãng pap moeka.”



³⁰(Jisu ma are ngaeka pa mihnyan heh ma atenâng, “Juchhihlup eka ngama ngat junko ngatwah.”)

Jisu Nyong ngale Ate Naa heh

(Mathiu 12.46-50; Luk 8.19-21)

³¹Erediko Jisu nyong le ate naa heh hokkhoam hokwah. Thin a rangsâko cheplahma ate roorâng humkhen nâng nginmatwên wah.

³²Mihnyan heh ate tumlitko jahmõang tonglahma dângwah, ngale atenâng ngatwah, “Sûtan, nang nyong le nang naa delachha le dihiaknya heh rangsâko tonga, thinma nang chohmîn hun eho.”

³³Jisu ma dânthâng wah, “Nga nyongpa hen a? ngale nganaa heh hen a?”

³⁴Atema ate tumlit wah tângte mihnyan hehnâng sùlahma ngatwah, “Sûtan en! Nga nyongpa anã, ngale nganaa hehmin anã heh!

³⁵Henhenma Joban ma huneka moatlem moeka erehehba nganaa delachha, nganaa dihiaknya, ngale nga nyong.”

Mak 4

Chhahli Wênte Nginthakthô

(Mathiu 13.1-9; Luk 8.4-8)

¹Eredikomin Jisu ma Galili josi kênâng wien hethô wah. Ate túmlit wah khôan eka mihnyan heh jahmõang dâng phumma atea khôankhoko chhangkat wah. Khôankhopa joko dângwah ngale mihnyan heh jokahko chepwah.

²Atema nginthakthô demnâng mihnyan hehnâng ajahthem ngin thôkoh wah, ngale thinnâng ngatwah:

³“Tattan en! rekthenâng mihnyan wathema chhahli wênchhoan wah.

⁴Atema pitnâng chhahli wênpoatko, wanwanthe pa lemdongko chatjâeka, phumma wo heh hùlahma thôantu eka.

⁵Wanwanthe pa longrã khohnâng chatjâeka. Phumma hah aho dângjunko chhah pa sitsiak koateka.



⁶Phumma chenthu sanchaan hông phumma koatnyan chhahpa choaksah eka; chenrãngma ngako rinpa alunâng lesutka dângjunko sitsiak choakjâeka.

⁷Wanwanthe pa suhbuk nâng chatjâeka, phumma suhheh donglahma chhahpa tahbuk eka, erohwah chhahri hongrimah.

⁸Rohkomin, khakapa hahsen nâng chatjâeka, phumma chhahpa koatlahma, donglahma chhahri hongrieka: Wanwanthe ma roakrem chhahri hongrieka, wanwanthe ma roak erok, ngale wanwanthe ma châthe hongrieka.”

⁹Ngale Jisu ma athôanko ngatwah, “Tattan en, nenâng nâ metong hênko!”

Jisu ma Nginthakthô Chenrãng Kepwah a

(Mathiu 13.10-17; Luk 8.9, 10)

¹⁰Jisu ate lanlan dângpoatko, ate dijunte echhi wani demko mihhan atewah ngin chohtatte heh khuthe hûlahma atenâng nginthakthô pa ngaksen thôkohhi ngama ngatwah.

¹¹Jisu ma dânthâng wah. “Nenâng Joban Hahsông nginpa loatjetthuk eka,” “Phumma, ahan heh ma, erepa nginthakthô rãng tateka,

¹²erohwah, ‘Thinma mesû akomin, jetkhe mah; Thinma mejetat akomin, jetlo mah. Thinma jetloat ngako, Joban tânâng chenngak hûwaktha, ngale atema thinnâng map chenkohtah.’ ”

Jisu ma Chhahli Wênte Nginthakthô pa Ngaksên thôkoh

(Mathiu 13.18-23; Luk 8.11-15)

¹³Erediko Jisu ma thinnâng chhienwah, “Nema are nginthakthô pa jetlo metne? eroh medang ako ahan nginthakthô hehjã chenroh ejien jetlo en a?

¹⁴Chhah wênte pumma Joban ngin wên eka.

¹⁵Wawathe mihnyan pa lemdongnâng chatjâte chhah rãngrãng; thinma Joban nginpa chohtat rienrien, joak hûlahma thinwah nyenchhoan eka.

¹⁶Ahan mihnyan heh longrã khohnâng chatjâte chhah rãngrãng. Thinma Joban ngin chohtat rienrien khuhah nâhah kepeka.



¹⁷Rohkomin erepa thinhung khennâng lupmah, erohwah thinhungnâng lekroi tongmah. Erohwah chenthu Joban ngin junma chêmchei ba mihma chêmsietko thinma lemlienma thinphe eka.

¹⁸Ahan mihnyan heh suhbuk nâng chatjâwah chhah rângrâng. Ere hehma Joban nginchohtat eka,

¹⁹Phumma mâmâ roandông rãng sekmah patrit, techhu dânghun, ngale lihân jatrup hungwah phôngthônghun pumma Joban nginpa tanghep eka, phumma thinma chhahri hongri mah.

²⁰Rohkomin ahan mihnyan heh hahsen nâng chatjâte chhah rângrâng. Thinma Joban nginpa chohtat lahma keplahma chhahri hoangri eka: Wawathe ma roakrem hongrieka, wawathe ma roak erok, ngale khaka ma châte hongrieka.”

Khokkhennâng Wentit

(Luk 8.16-18)

²¹Eredikomin Jisu ma thinnâng thôkoh wah, “Henma komin wentit keplahma khokkhen nâng ba jupthin khennâng etoak a? erepa wentit toakthinko letoak minne?”

²²Chentô huhriem re eka heh phangtang loatsiet rêmin, ngale chentô huhthien reka heh phangtang laangphê rêmin.

²³Tat en, nenâng nâ metong hênko!”

²⁴Atema thinnâng ngatwah, “Nema chennitat eken a erepa senthemthem thongtat en! Nema mihnâng chenroh hânjôan eken a erejunko Joban memin nenâng ehôn ejôan hên - ere nomemin chhih ehôn ejôan hên.

²⁵Hennâng roanchhe tongeka ereko lêkoh rêmin, ngale hennâng chenjô aho dangeka, thinma amãnhha cheieka memin toanchhoan rêmin.”

Chhah Phoak Đôngwâng Nginthakthô

²⁶Jisu ma thinnâng choatthôkoh wah, “Joban Hahsông thepa arerângrâng. Mihnyan wathema ate pitnâng chhahli wênkat eka.



²⁷Rangwo rangnyek, ate ajup dangkollah, asat dangkollah, erepoatko chhahpa koatlahma rangwo roakweih dongeka. Erepa chenroh dongeka epa atema jetmah.

²⁸Hah pumma chhahpa dongthuk lahma chhahri rieka; khebengko chhongnoap bengchhong eka, erediko apô, ngale khedithôan ko ari rieka.

²⁹Chenthu chhahpa memun tahko, mihnyan pumma ate mitchha pumma ekhen a, chenrăngma ngako, chhahkhen sanpoat pa hûera.”

Jokangken Nginthakthô

(Mathiu 13.31, 32, 34; Luk 13.18, 19)

³⁰Jisu ma chhien wah, “Joban Hahsôngpa chenni nâng thakmîn ea?”
“Chennâng thakthô lihma arepa thôkohmin a?”

³¹Erepa arerăngrăng. Mihnyan wathema rangkhen kowah chentô nomemin kenrinthôan jokangken pa keplahma wênkat eka.

³²Phumma erepa phoak lahma chentô noma bãngdong thôn dangeka. Bãngphak rangbîn hehnâng wo hehma arup lanruproh bãngpa dongeka.”

³³Ererăngrăng ahan nginthakthô ajahthem thôko lahma Jisu ma mihnyan hehnâng Joban nginpa thôkoh wah; thinma chentô tajet eka ereto atema thôkoh wah.

³⁴Atema thinnâng nginthakthô lethôkoh thangma chennimin thôkohho, phumma chenthu ate dijunte heh demnâng atelolo dângpoatko chentôpa thêsên thôkoh chîrewah.

Jisu ma Pông Apat Mesiet

(Mathiu 8.23-27; Luk 8.22-25)

³⁵Erejâ sanhêmthah ko Jisu ma ate dijunte hehnâng, “Nângkhu joranka nâng danwãnge,” ngama ngatwah.

³⁶Ephumma thinma mihnyan heh phethien wakwah; ngale Jisu chhangeka khôankhoko dijunte heh chhangka lahma thindem ko Jisu sietchhoan wah. Ereko ahan khôankhomin dângwah.



³⁷Lemlienma pông dôngmõang pônghokwah, ngale jowaak heh khôankhoko waakhû lahma khôankhoko jo mênchong dangnemnem dângwah.

³⁸Jisu a khôankho thangko ate khopa khhelêngko lênglahma juplek dângwah. Dijunte heh ma satsiet lahma atenâng ngatwah, “Hethôte, nanga sekmah mohne, năng lârieki dangmihne?”

³⁹Jisu toansat lahma pôngko ngatwah, “jek o!” ngale atema jo komin, “Môngmông dango!” ngatwah. Phumma pôngpôngpa jeklahma kihrumrum dângwah.

⁴⁰Erediko Jisu ma ate dijunte hehnâng ngatwah, “Ne aretô chenrăngma chei eken a? Nenâng athângheh min putedâlem ahone?”

⁴¹Phumma thin nyahrăng chei lahma wathema wathe năng jabmînwah, “Are mihnyan pa hen a? pông apat le jodông memin ate nginkep eka!”

Mak 5

Jisu ma Juchhih Lupte Delawa Wathe Sênsiet

(Mathiu 8.28-34; Luk 8.26-39)

¹Jisu le ate dijunte heh Galili josi ranka wah Girasa hahnâng hokkhôm wah.

²Khôankho kowah Jisu jâkhôm rienrien mangruk wah loatwăng lahma mihwa wathe chohmînwah. Are mihnyan ko juchhih luplahma dângwah

³ngale atea mangruk năng sôngte dângwah. Henma min atenâng janru memin leta lokhhek dângwah;

⁴Melâng deprăng ate dek ada khhek lahma thienwah, rohkomin roantang janrupa patsiet lahma ate dako chîkhihwat wah. Henmemin ate leta lothien dângwah.

⁵Rangwo rangnyek phoangrak nungma pông apa chîrewah, ngale long heh ma khihkhenrii lahma mangruk ngale hahkong heh tungko chîphoang khômwah.

⁶Chenthu atema Jisu lepke poatko atea roanchhe ataangnâng dângwah; ephumma chhoanka lahma Jisu mako dakuh thoka lahma khupjup wah,



⁷Ngale chaanmõang rakwah, “Jisu, choangthõanwah tõngte Joban Chha! nangma nganâng chennire hun ehanga? Joban mîngo ngama nangnâng rosep eki, nga nekchêm thukhang!”

⁸(Jisu ma, “Juchhihko, mihnyan kowah loatchhoan o!” ngatdi, atema arepa ngatwah)

⁹Ephumma Jisu ma atenâng chhienwah, “Nangmîn chenroh a?” Mihnyan pumma, “Nga mînpa ‘Mob’ - nia jahmõang tonge!” ngama dânthâng wah.

¹⁰Ngale atema Jisu nâng juchhih heh erethe kowah lechien chhoanrãng roatsep wah.

¹¹Thin kêko wah hahkongkho ko wak jahmõang phhekchhah lemchhah lahma dangwah.

¹²Ephumma juchhih pumma Jisu nâng roatsep wah, “wak heh tânâng chienkat hi, ngale thinsek khennâng lupkathuk hi.”

¹³Atema chhoan thukwah, ngale juchhih heh mihnyan kowah loatchhoan lahma wak hehnâng nyupkat wah. Wak heh phangtang tungkohahjatnii rãng dânghwah - phumma ka pumma jâchhoan kawak lahma josiko mahlumjâ katwah.

¹⁴Wak sokte mihnyan heh huhchhoan lahma nginpa thin hahdaang ngale thin kêanâ wah hahdaang hehnâng phoangthô kohwah. Phumma mihnyan heh chenni dangeka erepa sokrãng katwah,

¹⁵ngale chenthu thin Jisu tâko hokko, juchhih jahmõang luplahma dangtah mihnyan pa chohkhe wah. Atea khet akhu keplahma senthemthem eko tonglahma dânghwah; ephumma thin phangtang chei rewah.

¹⁶Erekowah mitma khête hehmi mihnyan hehnâng juchhih lupte mihnyan ngale wak hehnâng chenni dangtah a erepa thôkoh wah.

¹⁷Ephumma mihnyan hehmi Jisu nâng thindiak wah chhoan eko ngama roatsep wah.



¹⁸Jisu khôankhoko chhangwâng thuko, juchhih luptah mihnyan pumma, “ngamin nang demnâng johchhônârâng!” ngama roatsep wah.

¹⁹Phumma Jisu ma johchhoan thuk ho. Rohkomin Jisu ma atenâng ngatwah, “Humnâng ngakwǎng lohma nang humte tangkâ hehnâng Teso ma nangrǎng chentôdong mokoh ehoa, ngale atema nangnâng chentô mînchen ehoa ereheh thôwǎngkoh.”

²⁰Ephumma mihwa pumma Jisu ma ate rǎngma chenni mokotah a ereheh hahdaang wan echhilat dankhoam lahma thinnâng thôthien kohwah. Ngale ate ngin chohtatte heh phangtang bârit wah.

Jairas Chha Dihiaknya ngale Jisu Khetnâng Sahloatte Dihiaknyu

(Mathiu 9.18-26; Luk 8.40-56)

²¹Jisu josi rankanâng thêngak katwah. Ere josi kêko jahmông mihnyan heh ate tumlitko khôanhok wah.

²²Erehah Sanagog kowah adong Jairas hokkhôm hokwah, ngale chenthu tema Jisu kheko, Jisu dathongko kunjup katwah

²³ngale Jisu nâng roatsep wah, “Ngachha dihiaknya pa nyahrǎng khun eka. Mamwǎng lohma nangdekma atenâng sahlo wǎngmêngro, erohkoba ate akhun wah senlahma ehin a!”

²⁴Ephumma Jisu ate demnâng johwǎngwah. Ngale Jisu demko jahmông mihnyan johwǎng lahma chentô sukma Jisu nâng sahchhô wah.

²⁵Ereko dihiaknyu wathe heichhoan khoanchetma echhi pâni nyahrǎng chêm lahma dângwah,

²⁶Ajahthem doktor ma ate lâthat sûtah. Ngale ate ngun phangtang ereko thônmet phetah, phumma sên renoma roantangma ajah jahba ngakchhih jâwah.

²⁷Atema Jisu nginpa chohtatwah, ephumma loangchhangko Jisu tokdiko hokwah,

²⁸ngale atedede ngatritwah, “Ngama ate khet kojô mesahlo takkomin nga esen ang.”



- ²⁹Atema Jisu khetko sahloatwah, ngale ate hei chhoanpa lemlienma jekwah; ngale ate dedema sekkhen nâng ate khoanchet sênpa jetritwah.
- ³⁰Lemlienma ate sekawah chaan loatchhoan pa Jisu ma jetritwah, ephumma atema loangchhang ko ngiaksûkat lahma, “Nga khetko henma sahlo eha?” ngama ngatwah.
- ³¹Ate dijunte hehma dânthâng wah, “Nangma ajet nang tumlitko mihnyan pa chentôjah a; phumma nganâng henma sahlo eha ngama chenroh jienthôngphâ ehia?”
- ³²Rohkomin atenâng sahloattepa jetrãng Jisu ma tûmlit phoangsok wah.
- ³³Dihiaknyu pumma atenâng chenni dangtah a erepa jetritwah, ephumma tiichei lahma Jisu dathongko dakuhtô lahma khupjup kalahma atenâng toangtang nginpa phangtang loatthô kohwah.
- ³⁴Jisu ma atenâng ngatwah, “Ngachha, nang putedâlem junko sen eko. Khuhah nâhah chhoan o, ngale khoanchet kowah lâsentoh.”
- ³⁵Jisu ma arepa ngatthuko, Jairas humwah nginmatte kalahma Jairas nâng thôkoh wah, “Nang chhapa riitah. Hethôtepa chenrãngma chêmsietwên tûea?”
- ³⁶Jisu ma thin nginko nâletha thangma, atema Jairas nâng ngatwah, “Nekchei, Joban nâng putedâlem o.”
- ³⁷Ephumma ate demko henjô johwãng thuk ho, piter, Jems, ngale ate pho Jon lolo johwâng thukwah.
- ³⁸Thin Jairas humnâng hokkhôam hokko, Jisu ma mihnyan heh hahjam tijam ngale nyahrãng raksep waklahma khewah.
- ³⁹Atema humkhen nâng wãng lahma thinnâng ngatwah, “Aroh chenrãngma phaangjaang eken a? Chenrãngma sep eken a? Naachha pa riimah - atea jupba reka!”



⁴⁰Thinma Jisu nâng angit rewah, ephumma atema phangtang junloatwah, ate demko naachha nyong awanii ngale ate dijunte warempa, sietlahma naachha mang chêntah theko wângwah.

⁴¹Jisu ma naachha dekho lolahma ngatwah, “Talitha, Koum,” ere ngaeka pa, “dihyak chha, ngama nangnâng toansatrãng chien eki!”

⁴²Phumma lemlienma toansat lahma tumlit phoangkhôm wah. (Ate rangpâ pa echhi pânii dângwah.) Arepa khelahma thin nyahrãng bâritwah.

⁴³Phumma Jisu ma thinnâng arepa hennâng min nekthôkoh en ngama jektângwah. Erediko, “Atenâng chenni akomin phhekchhah thuk en” ngama chienwah.

Mak 6

Nazarat nâng Jisu Thāsê

(Mathiu 13.53-58; Luk 4.16-30)

¹Jisu erethe kowah chhoan lahma ate hahnâng katwah, eko ate dijunte hehmin junkatwah.

²Phumma Pientông jâko Jisu ma thinnâng hethô wah. Ereko jahmông mihnyan dângwah; ngale chenthu thinma ate ngin chohtatko, phangtang bârit rewah. Thinma ngatwah, “Atema areheh chenwah chohjet eka?” “Henma are buthi mongthem heh atenâng kohlahma areheh jeteka?” ngale are patritli heh chenroh jienmo eka?

³Atea Mariam chha khoangtek tepa ledangne, ngale atea Jems, Josep, Juda, ngale Simon heh pho ledangne? Arekawah song eka heh ate naa dihiaknya heh ledangne?” ephumma thinma ate thāsê wah.

⁴Jisu ma thinnâng ngatwah, “Mông heh chentô thenâng toak asân eka, thinnok ahah ngale thintang amang, erediko thinhumte tangkâ heh ma lolo toak asân mah.”

⁵Atema eretheko chenni patritli moatlemjô jienta moho, ate dekma sahlo lahma khunte wathe wanii loloba mesietwah.



⁶Ate nyahrãng patritwah, chenrãngma ngako, mihnyan hehnâng putedâlem hothangma dângwah.

Jisu ma Echhi Wanii Dijunte heh Chienchhoan

(Mathiu 10.5-15; Luk 9.1-6)

Erediko erethe tûm arien wah hahdaang hehnâng Jisu phoangkhoam lahma Joban ngin phoang hethô wah.

⁷Atema dijunte echhi waniipa aroamma khôanroo lahma wani waniima chienchhoan wah. Atema thinnâng juchhih heh junloat rãng chaan kohwah

⁸ngale atema thinnâng ngatwah, “Nedemnâng chennimin nekkep chhoan en, menthun loloba kepen - phhekchhah, tǒng, ngale khetthok chhemchong, tǒngnâng ngun akem min nek hènchhoan en.

⁹Dapheng phãngen, rohkomin chhemchong bâm nekkepen ngama ngatwah.”

¹⁰Atema thinnâng arohmin ngatwah, “Ne chenke tãngroo ehèn a, ere humko erethe kowah ne mangak ngakchhoan eko tongen.

¹¹Ne letangroote ba ne ngin lekepte heh hahdaang nãng mehûkhoam enko, erethe kowah loatchhoan re en, ngale neda wah bum khep eka pemin finekthien re en. Erepa thinnâng achhih ngama ngat ranchâ thiakpa edanga!”

¹²Ephumma thin chhoan lahma mihnyan hehnâng thin papwah hunglit rãng Joban nginpa phoangthô kohwah.

¹³Thinma juchhih jahmõang junlo phekoh rewah, ngale ajahthem khunte hehnâng Oliv tienma hutko lahma mèsiet wah.

Jon Baptis Rit Ngin

(Mathiu 14.1-12; Luk 9.7-9)

¹⁴Hiro Lowang ma are nginpa chohtatwah, chenrãngma ngako, Jisu mînpa chentô thenâng chohtatwah. Khaka mihnyan hehma ngatwah, “Jon baptis pa ngakhinwãng era! Erohwah atema are patritli moatlem heh tamoeaka.”

¹⁵Ahân hehma, “Atea Ilija” ngama ngatwah. Khaka hehma, “Atea mǒng, tewa rôanpa nãng dangtah mǒng heh rãngrãng” ngama ngatwah.



¹⁶Hirots ma arepa chohtat lahma, ngatwah, “Atea Jon baptis! ngama ate khopa thahdoakwah, phumma ate ngakhinwãng era!”

¹⁷Hirots ate dedema Jon loatkhhék rãng chienwah, ngale atema khhek lahma phâtek nãng sekwah. Arepa Hirots ma Hirodik ma ngat junko moatwah. Hirodikpa ate naa Filip tangnyu dãngwahjô medang akomin Hirots ma ate tangnyu rãng thêkepwah.

¹⁸Jon baptisma Hirots nãng, “Nangma nangnaa tangnyupa nang tangnyu rãng takepmoh!” ngama ngatwah.

¹⁹Erohwha Hirodik ma Jon nãng nyahrãng chhiehchôh lahma ritphe hunwah, rohkomin Hirots junko atema jienritpheho.

²⁰Hirots pa Jon ranchei dãngwah, chenrãngma ngako Jon pa mihnyansen ngale Asâthôn mihnyan ngama Hirots ma jet dãngwah, erohwha atema pepãng lahma thienwah. Jon wah ngin chohtat roakweih Hirots hungjô mephaang akomin, atema Jon wah ngin jetat chihunwah.

²¹Athônko Hirodik ma Jon ritphe rãng wanthe helem chohwha. Erepa Hirots chhat rangwo jãko Hirots ma Galili wah chentô govmen sahhabdong, Sipâhi sahhabdong, ngale khhepho phannang heh roolahma phhekchhah ngetwah.

²²Hirodik chha dihiaknya hulahma bôangkohwah, eko Hirots le atema kuhhôn phhekchhah chhahrãng lemru rootah heh nyahrãng khuhahwah. Ephumma Lowang pumma dihiaknya ko ngatwah, “Nangma chenni hun ekoa? Nangma chenjô mehun okomin thahang arepa ngama ekoh e.”

²³Ngale ajahthem toamsem jabkhab demnãng atema dihiaknya ko ngatwah, “Ngama toamsem ekang nangma chenjô metha hang komin koh e, nga Hahsông kowah khakajô metha hangkomin koh e!”

²⁴Ephumma dihiaknya pa chhoan lahma, “Ngama chennitha anga?” ngama ate nyong nãng thôngphâ wah. Ate nyong pumma, “Jon baptis khophangpa thao,” ngatwah.



²⁵Dihiaknya pa lemlienma Lowang tâko ngakwãng lahma thâwângwah, “Are theko athâng thângheh Jon baptis khophangpa wankhoang nâng pehu kohhang!”

²⁶Ephumma Lowang pa nyahrãng hungchhih wah, rohkomin kuhhôn thinwah ate lemru rootah heh nâtatko toamsêm wah dâng phumma atema dihiaknya ko jienkohmih ngama tadak tûho.

²⁷Ephumma ate sipâhi heh Jon khopa thahrãng lemlienma chienchhoan wah. Sipâhi heh chhoan lahma phâtek khenkawah Jon khopa thahdoak katwah;

²⁸erediko atema wankhoang nâng pewên lahma dihiaknya ko kohwah, ngale dihiaknya pumma ate nyong nâng wênkohwah.

²⁹Jon dijunte heh ma erengin pa chohtat wah. Phumma thin hûlahma Jon mangpa pechhoan lahma ruchhoanwah.

Jisu ma Hahjat Bangâ Mihnyan nâng Phhekchhah thuk

(Mathiu 14.13-21; Luk 9.10-17; Jon 6.1-14)

³⁰Moattat chhoante heh ngakhû lahma Jisu demnâng chohmînwah, ngale thinma motah le hethôtah heh phangtang thôkoh wah.

³¹Jisu le ate dijunte heh ma phhekchhah chhah sanpoatjô lechoh mihnyan heh jahmõang hokte achhoante ditkhoam lahma dângwah. Erohwah Jisu ma ate dijunte hehnâng ngatwah, “Mihnyan henjô aho thenâng nãnglolo tongchhoan e, nemin poatthetô boantong mêngen.”

³²Ephumma khôankhoma chhoan lahma mihnyan henjô aho thenâng thinlolo tongchhoan wah.

³³Rohkomin jahmõang mihnyan heh ma thin loatchhoanpa khewah, ngale mihnyan heh ma atea Jisu ngama lemlienma jetloatwah; ephumma chentô hahdaang hehwah mihnyan heh loatchhoan lahma dakhôm lemma Jisu le ate dijunte heh tângchhoanrãng ngaeka theko thinmama hokkhôm lâwah.

³⁴Chenthu Jisu khôankho kowah loatkhôam katko, atema ere mihnyan khupa chohkhe wah, phumma atema thinnâng nyahrãng mînchenwah, chenrãngma



ngako, thin a asokte ahoma phoanghâm ritwah saak rãngrãng dãngwah. Ephumma Jisu ma thinnâng ajahthem ngin hethô wah.

³⁵Sanhêmthah dãng phumma, ate dijunte heh Jisu tânâng wãng lahma atenâng ngatwah, “Nyahrãng sanhêmthah ledangtah, ngale aretheko mihnyan henjô songmah.

³⁶Mihnyan heh chien chhoan eko, nãng kêanâ wah duken ngale hahdaang hehnâng chhoan lahma chenkommin chenri phhekchhah chhoanwak a.”

³⁷Jisu ma dânthâng wah, “Nema chenni akomin phhekchhah thin koh en.” Phumma thinma Jisu nãng chhienwah, “Nima thinnâng phhekchhah thukrãng châni janngun ma chenri chhoankoh e ngama thonghun ehia?”

³⁸Ephumma Jisu ma thinnâng ngatwah, “Sûwãng tan en, Nenâng bankên chentô tonghên a?”

³⁹Erediko Jisu ma dijunte hehnâng mihnyan heh phangtang mâmâ khukhu hinkoh hehnâng phantongthuk en ngama ngatwah.

⁴⁰Ephumma mihnyan heh châthema roak bangâ ma phântông thukwah.

⁴¹Erediko Jisu ma bankên wanbangâ ngale ngah laniipa sem lahma rangkethung nãng sủwên lahma, Joban nãng dangkoh a ngalahma rangsoam wah. Atema bankênpa chhupsiet lahma ate dijunte hehnâng mihnyan hehnâng phenkoh en ngama kohwah. Ngale atema ngah lanii pemin thinkhu phangtang nãng phenkohwah.

⁴²Anga ngama phoatphoat phhekchhah wah.

⁴³Erediko dijunte heh ma bankên le ngah bâ heh echhi phâni chõngchõng khõantõan wah.

⁴⁴Erekowah jokphhek chhahte mihnyan heh hahjat bangâ dãngwah.

Jisu Jokhohma Khõam
(Mathiu 14.22-33; Jon 6.15-21)



⁴⁵Jisu ma lemlienma ate dijunte heh khôankhoko chhang thuk lahma josi rankawah Batsida hahko ate mako dânwânglâ thukwah, erepoatko atema mihnyan heh chienchhoan wah.

⁴⁶Mihnyan heh demnâng phânmîn diko, hahkong khonâng wãng lahma rangsoam wãngwah.

⁴⁷Chenthu sanhêmthah dâng phumma khôankhopa josi mongtângnâng hûchoan dângwah, phumma Jisu a atelolo bamko dângwah.

⁴⁸Jisu ma ate dijunte heh khôankho kowah thõngko rõngrõng khitwak lahma khewah, chenrãngma ngako thintâko pôngpông hokwah; Rangkhahkho wanrem le wanrok sanpoat tungko Jisu jokhohma thintanâng khôamhokwah. Atea thintâ pumma dânkhôamrãng ngatwah,

⁴⁹Phumma thinma Jisu jokhohko khoamlahma khewah. Ngale thinma, “Mihdâpha khe eki!” ngama thonghun lahma rak wakwah.

⁵⁰Thin phangtangma Jisu khelahma patrit rewah. Jisu ma thinnâng lemlienma rânjabkat lahma ngatwah, “Hungdongsiet en!” “Arepa ngae. Nekchei en!”

⁵¹Erediko atemin thindem ko khôankhoko johchhang wãngwah, ngale pôngpôngpa jekrewah. Phumma dijunte heh nyahrãng bârit wah,

⁵²chenrãngma ngako, hahjat bangâ mihnyan nâng phhekchhah thuk pejô thinhungma senthemthem jetmah; thin hungma erepa tajetlo wakmah.

Jisu ma Ginisarat nâng Akhunte Mesiet

(Mathiu 14.34-36)

⁵³Thinma josi ranka dan lahma Ginisarat hahnâng hokkhôam wakwah, ngale khôankhopa erehahko khhekthien wah.

⁵⁴Thin khôankho kowah jâkhoam chhoan rienrien mihnyan hehma lemlienma Jisu nâng jetloatwah.

⁵⁵Ephumma mihnyan heh phoangchhoan lahma erethe kowah chentô mihnyan hehnâng phoangthô kohwah; ngale thinma Jisu chenriang nâng



chohtat eka, eretheko thinma khoanchette mihnyan heh thinhemko jupthuk lahma pehok wah.

⁵⁶Ngale chentô hahdaang, sumhah, ngale chentô thenâng Jisu phoangkhôm wah, ngale mihnyan heh ma khun atamte heh Jisu diko bôjat nângmin junpehû lahma khoanchet sênrãngma nangkhet sakojo medang akomin mamsahlo thukmêngo, ngama roatsep wah. Ngale Jisu khetko sahloatte chentôpa sênwah.

Mak 7

Te Awi heh ma Hethô wah Ngin

(Mathiu 15.1-9)

¹Jeroselem wah katwah Farasi ngale Niemarang hethôte heh Jisu tûmlitko khôanhok wah.

²Thinma Jisu dijunte heh dekngekma phhekchhah chhah khewah - erepa, Farasi heh ma ngaeka junko thinma dek soanmah.

³(Chenrãngma ngako, Farasi ngale Jews heh ma thin te awi niemarang pa kepwah: Thinma dek senthemthem lesomanma chenjô phhekchhah mah;

⁴ngale bôjatwah riakwahmin khebângko lesomanma chenjô phhekchhah mah. Ngale lihânmin thin te awi niemarang ajahthem kepwah, bâti, chemchhahwan, tit alek, ngale jupthin tôngthin heh senthemthem sâsiet rewakwah.)

⁵Ephumma Farasi ngale Niemarang hethôte heh ma Jisu nâng thôngphâ wah, “Chenrãngma nang dijunte heh ma nâng te awi heh ma hethô wah niemarang pa lekep thangma dekngekma chhah eka?”

⁶Jisu ma thinnâng dânthâng wah, “Isaia ma nerãngma profesi hôantah pa chentô toangtang hôanwah a! Ate ma raangtah rãngrãng, nea ahukhoanglep: ‘Joban ma ngaeka, are mihnyan heh ma jabkhab melolo toak asân ehang, rohkomin thin hungpa linlinko nga tâwah ataangnâng.

⁷Thinma nganâng rangsoam pejô sekho, chenrãngma ngako thinma mihnyan ma hôanwah niemarang heh nga ngewah niemarang rãngrãng hethôeka!’



- ⁸“Nema Joban nginpa pheletma mihnyan ma hethôeka niempa kep eken.”
- ⁹Ngale Jisu ma eredikomin thôkoh wah, “Nededema hânwah niemarang pa keprăng Joban hôkum pa nyahrăng buthisen hânletma phe eken.
- ¹⁰Mosa ma aroh ngatwah, ‘Ne nyong newa nginkepkep dangen,’ ngale, ‘henma ate nyong awa nâng tem athoak eka, erepa ritphe rêmin.’
- ¹¹Phumma, mihnyan ma ate nyong awa nâng chohsokmin wahpa, nema ‘Arepâ korban’ (are ngaeka pa, are litpa Joban nângba kohmin, ngama hethô eken),
- ¹²erohwah thinma thin nyong awa nâng chohsû tumah.
- ¹³Nema mihnâng eroh phoanghethô eken junko Joban jabkhabpa lekep dangeka. Ngale nema arerăngrăng moletma lihânmin ajahthem tonga.”

Mihnyan Ngeksiet thin Sêmmak

(Mathiu 15.10-20)

- ¹⁴Erediko Jisu ma mihnyan heh ate tâko theroo lahma thinnâng ngatwah, “Nekhu anga ngama nga nginpa jetat letma hungnâng thien en.
- ¹⁵Rangsâwah ne sekkhen nâng hûera phhekchhah pumma ne ngeksiet mahhèn. Erenoma ne sekkhenwah chenni loatchhoan eka ere pummaba ne ngeksiet ehèn.”
- ¹⁷Mihnyan heh tâwah chhoan lahma humkhen nâng wângdiko, ate dijunte heh ma are nginpa ngaksen thôkohhi ngatwah.
- ¹⁸Jisu ma thinnâng ngatwah, “Nemin mihhan heh noma bâmjetmet,” “Nema jetmetne? Rangsâwah ne sekkhen nâng hûera pumma ne ngeksiet mahhèn,
- ¹⁹Chenrăngma ngako erepa nehung khennâng kat dangmah, erepa wokkhen nâng kalahma ngakloatchhoan eka.” (Jisu ma, are ngaeka pa, chentô phhekchhah pa tâphhek tâchhahmin, ngama ngaeka.)
- ²⁰Ngale atema are choatko thôkoh wah, “Newah chenni loatchhoan eka erepumma ne ngeksiet ehèn.



²¹Chenrãngma ngako ne sekkhen wah loatchhoan ekapa, ne hungwah buthi mongthem chhih heh loatchhoan lahma nenâng kaamchhih mothuk ehèn, mih wah nyenkep, ngale mihritphe,

²²mihdihiak dela kaamchhih moat, chhahnyoak, ngale lihân chentô achhihli heh mothuk ehèn; mihdiapchhah, pongapa, mihphetwan, mihsethò, ngam apoa, ngale bâatâ thukre ehèn-

²³are chentô achhihli heh nehungkhen wah loatchhoan lahma ne ngeksiet ehèn.”

Dihiaknyu Putedâlem

(Mathiu 15.21-28)

²⁴Erediko Jisu eretheko wah loatchhoan lahma Tair hah kêanâ wah hah hehnâng chhoanwah. Erethe kowah wathe humnâng Jisu hokwah, phumma Jisu ere humko tonga ngama henmemin nekchenjet ehang ngama atema thônghun wah, rohkomin ate tahuhtongho.

²⁵Dihiaknya wathe nâng juchhih luplahma dângwah, phumma ate nyongma Jisu tonga ngama leptat lahma, lemlienma Jisu tâko hûlahma ate dathongko khupjup hokwah.

²⁶Dihiaknyu pa Jews ledang dângwah, atea Syria diakwah Fonika hahnâng chhatwah. Atema Jisu nâng ate chha dihiaknya kowah juchhih junloat kohrãng roatsep wah.

²⁷Phumma Jisu ma dânthâng wah, “Khebângko naachha heh ma chenbâng chhahmênga. Chenrãngma ngako, naachha heh phhekchhah pa hu hehnâng phekoh pa senmah.”

²⁸Dihiaknyu pumma dânthâng wah, “Hethôte,” “rohkomin, khoangkhen kowah naachha heh ma jâphe eka heh hu heh ma rângchhah a!”

²⁹Ephumma Jisu ma atenâng ngatwah, “Nangma aroh dânthângdi, nang humnâng wãnglohma sũwãngtan, nangchha sekwah juchhihpa chhoanchoan echoh khewãngo!”



³⁰Dihiaknyu pa humnâng wãng lahma ate chhapa jupthinko juplahma chohkhe wah; ngale juchhih pemin ate chha sekwah loatchhoan choan tônglâwah.

Jisu ma Aba Jabmuh Sênsiet

³¹Erediko Jisu Tair hah kêana hah hehwah chhoan lahma Sidon hah ngema Galili josi nâng, Sumhah Wan echhi ngama ngaeka nâng katlem ngema wângwah.

³²Mihnyan khuthema ate tânâng nâba rohkomin mǎnmǎnchha jienjab lahma mihnyan wathe siethokwah. Ngale thinma Jisu nâng nangdekma sahlomêngo ngama roatsep wah.

³³Ephumma Jisu ma loangchhang kowah atelolo sietchhoan lahma ate nâko deksuma kehkohwah, ngale thoakkah thoaklahma ate thheliko sahlokoh rewah.

³⁴Erediko Jisu ma rangkhethung nâng sũwên lahma, khòrek sietwah rǎngrǎng roat awâwah, ngale erediko mihwako ngatwah, “Ephphatha,” arepa, “Laangjâo!” ngama ngaeka.

³⁵Lemlienma mihwa pumma jientatwah, ngale theli pa senlahma lechêm thangma senthemthem jienjabwah.

³⁶Erediko Jisu ma are nginpa hennâng min nekphoang thôkoh en ngama mihheh nâng ngatwah; rohkomin, mihnâng nekthôkoh en jêngnga, thinma erengin pa jêngphoang phoangthôkoh rewah.

³⁷Ngale erengin tatte chentôpa bârit rewah. Thinma ngatwah, “Atema chentôpa asen moeka!” “Atema nâbamin tatthuk eka, ngale jabmuhmin jienjabthuk eka.!”

Mak 8

Jisu ma Hahjat Belii Mihnyan nâng Phhekchhah Thuk

(Mathiu 15.32-39)



¹Erediko wah chentô letaangko ahan loangchhang dong wienroam hokwah. Mihnyan hehnâng jokphhek chhahthin thôandiko, Jisu ma dijunte heh ate tâko roolahma thinnâng ngatwah,

²“Ngama are mihnyan hehnâng nyahrâng mînchen ekang, chenrãngma ngako, ngademko jârem lâjoh khoamthang, ngale ade phumma thinnâng jokphhek chhahthin chenjô ahotu.

³Ngama chenjô lephhek chhahthuk thangma humnâng mengak chienchhoan angko, lemko rêmritma chêm lahma môangweri wak a, chenrãngma ngako, wawathe pa taangmõang wah hûera.”

⁴Ate dijunte heh ma Jisu nâng thôngphâ wah, “Are seah kowah aretô mihnyan hehnâng lânle phhekchhah thukroh chenwah phhekchhah chohmin a?”

⁵Jisu ma thinnâng thôngphâ wah, “Nenâng bankên chentô tonghèn a?” Thinma, “Wanengit tonghi” ngama dânthâng wah.

⁶Atema loangchhangko hahko tongen ngama chienwah. Erediko atema bankên wanengit pa semlahma Joban nâng dangkoh a ngalahma chhupsietwah, erediko ate dijunte hehnâng loangchhangko phenkoh en ngama kohwah; ngale dijunte heh ma phenkohwah.

⁷Dijunte hehnâng ngahmin roanchhe dângwah. Jisu ma ngahrâng memin Joban nâng dangkoh a ngat rangsoam lahma dijunte hehnâng phenkohrãng chienwah.

⁸⁻⁹Anga ngama phoatphoat phhekchhah wah - erekowah mihnyan heh hahjat beliirãng dângwah. Erediko dijunte heh ma bâachâ heh phâengit chõngchõng khôantôan wah. Erediko Jisu ma mihnyan heh chienchhoan wah

¹⁰Ngale lemlienma ate dijunte heh demko khôankhoko chhangwãng lahma Dalmanutha jaa nâng wângwah.

Farasi heh ma Apatritli Moatlem Khesokhi ngama Ngat

(Mathiu 16.1-4)



¹¹Farasi khuthe Jisu tânâng hûlahma ate demnâng chhiakmîn wah. Thinma Jisu bukritthuk hunwah, erohwah thinma Jisu nâng nanga Joban demwah kaero ngama jetrăng patritli moatlem molohma khesokhi ngama ngatwah.

¹²Phumma Jisu ma khòreksiet răngrăng rowa lahma ngatwah, “Chenrăngma arerôan wah mihnyan hehma patritli moatlem khehun eka? ngama nenâng thôkoh eka! arerăngrăng patritli moatlempa are mihnyan hehnâng lekhesokmin!”

¹³Phumma thintâ wah chhoan lahma, khôankhoko ngakchhang kalahma joranka nâng ngakdânwâng wah.

Farasi ngale Hirot Wichhi

(Mathiu 16.5-12)

¹⁴Dijunte hehma bankên ajah lekep thangma lekphewah, khôankhoko thin demnâng bankênpa wanthe loloba dângwah.

¹⁵Jisu ma thinnâng ngatwah, “Jetletma dangen” “Farasi ngale Hirot wichhi wah jetletma dangen.”

¹⁶Dijunte heh thindede tungko jabmînwah: “Atema are ngaeka pa nângrâng bankên aho dâng phumma ngaeka.”

¹⁷Thinma chenni jabmîn eka erepa Jisu ma jetloatwah, ephumma atema thinnâng ngatwah, “Bankên aho junko chenrăngma jabmîn eken a? Nema athângnâng majet ekenne? Nema tajetlo metne?”

¹⁸Nenâng mit tonghèn - phumma mit pumma khemetne? Nenâng nâ tonghèn - phumma nâ pumma tatmetne? Nema thonghun metne

¹⁹ngama bankên wanbangâ pa hahjat bangâ nâng phhekchhah thuktekpa? Ngale nema bâachâ heh phâmeroan khôantoan tet a?” Thinma, “Echhi phâni, ngama dânthâng wah.

²⁰“Ngale bankên wanengit pa hahjat belii mihnyan nâng phhekchhah thuktek pa thonghunan en,” “Nema bâachâ heh phâmeroan khôantoan tet a?” Thinma, “Phâengit” ngama dânthângwah.



²¹Erediko Jisu ma thinnâng ngatwah, “Phumma nema athâng hehmin jetmetne?”

Jisu ma Batsida nâng Mitdoak Sênsiet

²²Thin Batsida nâng katko, mihnyan khuthema Jisu tânâng mitdoak wathe siethu kolahma atenâng dekma sahloatrăng roatsep wah.

²³Jisu ma mitdoakwa dekko sietlahma hahdaang kowah panthong liennâng sietchhoan wah. Jisu ma mihwa mitko thoakkahma thoakkoh diko ate dekma sahlo lahma atenâng chhienwah, “Jienkhe ekole?”

²⁴Mihnyan pumma toaksûwên lahma ngatwah, “Ngama mihnyan heh khe ekang, rohkomin thin a bângheh phoangkhôm wah răngrăng khe ekang.”

²⁵Phumma Jisu ma mihwa mitko ate dekma thengak sahloat kohwah. Erediko mihwa pumma senthemthem kanlahma sokwah, eko ate mitpa senchhoan dângwah, ngale chentôpa sâpoangpoang jienkhe wah.

²⁶Jisu ma mihwapa humnâng chienwênwah, ngale atenâng ngatwah, “Hahdaangko nekngakwăng.”

Piter ma Jisu pa Ahin Joban Chha ngama Loatjab

(Mathiu 16.13-20; Luk 9.18-21)

²⁷Erediko Jisu le ate dijunte heh Filipien wah Kasaria hah kêanâ wah hahdaang hehnâng chhoanwah. Lemko Jisu ma thinnâng thôngphâ wah, “Thôkoh tanha, mihnyan hehman nganâng hen edanga ngama ngaehanga?”

²⁸Thinma dânthâng wah, “Khakama nanga Jon baptis ngaeho,” “Khakama Ilija ngaeho, ngale khakama mông ngaeho.”

²⁹Jisu ma ate dijunte hehnâng thôngphâ wah, “Nema chenroh thonghun eken a?” “Nememin nganâng hen ngama ngaeha?” Piter ma dânthâng wah, “Nanga Misaia.”

³⁰Erediko Jisu ma, “Nga junma mihnâng hennâng min nekthôkoh en” ngama ngatwah.

Jisu ma ate Chêmchei ngale Rit Junma Loatjab

(Mathiu 16.21-28; Luk 9.22-27)



³¹Erediko Jisu ma ate dijunte hehnâng hethô wah: “Mihnyan Chhama nyahrâng chêmchohmin, ngale khhepho phannang, soam aroakte adong, erediko Niemarang hethôte hehma ate roak atoak leweihmin. Atea ritphe erea, rohkomin jârem diko ngakhîn erea.”

³²Jisu ma dijunte hehnâng chentôpa laangthô kohwah. Ephumma piter ma sietchhoan lahma Jisu nâng ritngatwah.

³³Phumma Jisu litphong lahma, ate dijunte ahan hehnâng sûwên lahma, piter nâng ritngatwah. “Joak, nang ngatâ wah taangchhoan o,” “Nangma Joban ngewah thonghun dangmoh, mihnyan hungwah thonghun eko!”

³⁴Erediko Jisu ma loangchhang ngale ate dijunte heh ate tâko roolahma thôkoh wah. “Nekhuwah henma komin ngadijun hun medan enko, nedede lekpherii letma, ne bângphakpa peletma ngadijun ha.

³⁵Chenrângma ngako, nema nedede roandôngpa pêsietrit mehun enko, nema mahphe ere en; rohkomin ne roandôngpa ngarângma erediko Nginkongsen rângma memahphe enko, nema ne roandông pa eta pesiet en.

³⁶Nema rangkhen kowah chentô sêmmak heh phangtang nerâng takep letma ne roandôngpa memahphe enko, nema chenni echoh en a? chenjô chohmet!

³⁷Ne roandôngpa ngakchohrâng chenjô talit kohmet.

³⁸Are Joban lejetrôan ngale papi rôanko mihnyan heh nganâng rêsê, erediko ngama hethô ekang nginkong rângma rêsê mere ako, Mihnyan Chhamin ate Wa chaan keplahma Asâthôan ngintatte heh demnâng katjâko thinnângmin rêsê erea.”

Mak 9

¹Ngale eredikomin atema ngatwah, “Ngama nenâng linlin thôkoh eka, aretheko chepte khuthe Joban Hahsông pa chaan demnâng kalahma makhe kheko leriite tongen.”

Thenphâng Litjâ
(Mathiu 17.1-13; Luk 9.28-36)



- ²Jâerok diko Jisu ma ate demko Piter, Jems, ngale Jon hahkong choang khonâng sietwênwah, eretheko thinlolo dângwah. Thinma Jisu nâng sokjenjen ko litjâ lahma khewah,
- ³ngale Jisu khetpa pômông phiakwah - rangkhenko henmemin eretô leta posettô pôwah.
- ⁴Erediko dijunte warem pumma Ilija ngale Mosa Jisu demko jabmîn lahma khewah.
- ⁵Piter ma hongjab lahma Jisu nâng ngatwah, “Hethôte, nâng aretheko tôngpa chentôsên a! Nima tembu humwah phangrem hoan e, nangrăng phangthe, Mosa rãng phangthe, ngale Ilija rãng phangthe hoan e.”
- ⁶Piter le ate lemru heh nyahrăng chei lahma atema chenni ngatthin a erepajô lechêm jetthangma dângwah.
- ⁷Erediko phoambuk bukhû lahma mahbuk wah, ngale phoamkhen kowah jabkhab hôngjab katwah, “Arepa nga Chha ngama atenâng nyahrăng hun ekang - ate ngin kepen!”
- ⁸Thinma lemlienma tumlit phoangsû tahpa henjô chohkheho; Jisu loloba thindem ko dângwah.
- ⁹Thin hahkong kowah jâkhoam katko, Jisu ma ngatwah, “Mihnyan Chhapa ritwah mangak ngakhinko, nema chenni khetat a erepa hennâng min nekthôkoh en.”
- ¹⁰Thinma Jisu nginpa kepwah, rohkomin thindede tungko thômîn wah, “Are ‘ritwah ngakhînpa’ chenni nâng ngaeka?”
- ¹¹Ngale thinma Jisu nâng thôngphâ wah, “Chenni rãngma niemarang hethôte hehma Ilija khekho ekara ngama ngaeka?”
- ¹²Jisu ma dânthâng wah, “Ilija pa linlinjô khekho kalahma chentôpa ekhoakhem kara. Rohkomin Joban nyapraangma chenrãngma Mihnyan Chhama chêmchei chohmin ngale mihnyan hehma ate roak atoak leweih min ngaeka?”



¹³Ngama nenâng toangtang thôkoh eka, Ilija râkatha, ngale Joban nyapraang nâng ngaeka rãngrãng mihnyan heh ma atenâng chenroh huneka eroh hôanjôanwah.”

Jisu ma Juchhih Lupte Dela Chha Sênsiet

(Mathiu 17.14-20; Luk 9.37-43a)

¹⁴Chenthu thin tânâng dijunte ahan heh hokko, mihnyan jahmõang thin tumlitko khewah, ngale Niemarang hethôte heh thindem ko chhiakmîn wah.

¹⁵Chenthu mihnyan heh ma Jisu kheko, nyahrãng patrit wah, ngale ate tânâng chhoanka lahma atenâng rânjab katwah.

¹⁶Jisu ma ate dijunte hehnâng chhienwah, “Nea thin demnâng chenni junko chhiakmîn eken a?”

¹⁷Loangchhang kowah mihnyan wathema dânthâng wah, “Hethôte, ngama nang tânâng ngachha pa siethû erâng, chenrãngma ngako, ate seknâng juchhih tonga ngale erejunko atema jienjabmah.

¹⁸Chenthu juchhihma atenâng melo tahko, hahko chiloangsiet eka, ngale ate thunwah thoakwoak heh hong, erediko páchupkek lahma chichehjá eka. Ngama nang dijunte hehnâng juchhih pa junloatkoh rãng chientekpa, thinma tajunlomah.”

¹⁹Jisu ma thinnâng ngatwah, “Nenâng putedâlemjô aho! Nedemnâng nga chentô tâjoh tongmin a? Ngale nedemnâng nga chentô tâjoh sôngmin a? Leta pa ngatânâng sietwênro!”

²⁰Phumma thinma Jisu tâko sietwên kohwah. Juchhih ma Jisu khe rienrien, leta ko loatwah, ephumma leta pa hahko loangjá lahma ate thunwah thoakwoak lietliet tumlit phoangloang jáwah.

²¹Jisu ma naachha wako, “Chentô rãng ate aroh medanga?” ngama thôngphâ wah. Phumma, “letachhathu mejû aroh dângwah” ngama atewa ma dânthâng wah.



²²“Juchhih ma wenkhoh hehnâng ngale jokhoh hehnâng loangjâ thuklahma ate ritphe rãng ajahthem lâphungtah. Nangma meta oko, ninâng mînchen lohma mamchoh sômênghi!”

²³“Ta ang,” Jisu ma ngatwah, “Nang dedema meta oko! ngale hennâng putedâlem tongeka ere hehma chentôpa eta a.”

²⁴Naawa pa lemlienma raksepwah, “Ngama putedâlem ekang, rohkomin arepa lemah. Senthemthem jien putedâlem rãngma nangma nganâng mamchoh sûhang!”

²⁵Jisu ma loangchhangpa thintâko hehwâng lahma khewah, ephumma atema juchhihko ngatwah. “Phhekba nâbaju,” “Ngama nangnâng are naachha kowah loatchhoan o ngama chieneki, ngale atenâng chenthumin lengak lumphû tumin!”

²⁶Juchhih pumma raklahma naachha pa nyahrãng cheili chehjâ thuklahma loatchhoan wah. Naachha pa riichoan mang rãngrãng dângwah, phumma anga ngama, “Riitah!” ngatwah.

²⁷Phumma Jisu ma naachha dekko sietlahma chepsietwah, eko naachha pa tôanchepwah.

²⁸Jisu humkhen nâng lupwâng diko, ate dijunte hehma atelolo nâng thôngphâ wah, “Nima chenrãngma juchhih pa leta junlo dangekia?”

²⁹Jisu ma dânthâng wah; “Arerãngrãng pa rangsoam junma loloba tâjun loatmin,” “Lihânma chenni mejô tajun lomih.”

Jisu ma Ate Rit junko Wienthe Jabwah

(Mathiu 17.22, 23; Luk 9.43b-45)

³⁰Jisu le ate dijunte heh erethe kowah loatchhoan lahma Galilijaa nâng katwah. Jisu ma ate chenke tongeka erepa hennângjô jetthuk lehun dângwah,

³¹Chenrãngma ngako atema ate dijunte hehnâng hethô sanpoat dângwah: “Mihnyan Chhapa ate ritphete heh deknâng ekoh a. Rohkomin, atea jârem diko ngakhîn rêmin.”



³²Phumma dijunte hehma erepa chennâng ngaeka erepa jet ho, ngale atenâng thôngphâ rãngmin chei rewah.

Henpa Adongthôn a?

(Mathiu 18.1-5; Luk 9.46-48)

³³Thin Kaparnam hahnâng hokwah, phumma humkhen nâng lupwâng diko Jisu ma ate dijunte hehnâng thôngphâ wah, “Ne lemko chenjunma chhiakmintet a?”

³⁴Phumma thinma Jisu nâng dânthangho, chenrãngma ngako, thinkhuchhang kowah henpa adongthôn dânghin a ngama lemko chhiakmîn wah.

³⁵Jisu ma tonglahma, dijunte echhi waniipa roolahma ngatwah, “Hen akomin khekthôn dânghin mehun ako, ate dedema chentô noma khedithôn rãng hânritmin, ngale anga nga haarãng dânghin.”

³⁶Erediko atema letachha sietlahma thinkhu mako chepthuk wah. Ngale naachhako atedekma khitlahma thinnâng ngatwah,

³⁷“Henma komin are leta rãngrãng hehwah ngamînko wathe nâng asenma metãngroo ako, arepa nganâng tãngroo ehang; ngale henma komin nga metãngroo hangko, erepa ngalolo tãngroo dangmah hang, nga chienkatte pemin tãngroo eka.”

Hen nãng Lelatnâng Ledangtea erepa nãng Demnâng Dânghin

(Luk 9.49, 50)

³⁸Jon ma atenâng ngatwah, “Hethôte, mihwa wathema nangmînko juchhih junlo lahma khetih, phumma atea nikhu demwah ledang dânghin phumma, nima atenâng jektãngtih.”

³⁹Jisu ma thinnâng thôkoh wah, “Atenâng nekjek tângghin,” “Chenrãngma ngako, henmemin ngamînko patritli moatlem molahma nga lelatnâng chhihjabmah.

⁴⁰Chenrãngma ngako, henhen nãng lelatnâng ledangtea epa nãngdemnâng dânghin.

⁴¹Ngama linlin thôkoh eka, henma akomin ngadijunte dânghin nenâng jowah koapthe mejokthuk hênko atema erethâpa metkep echoh a.



Pap Moatthuk

(Mathiu 18.6-9; Luk 17.1, 2)

⁴²“Henma komin nganâng putedâlemte are arinchha thôn kowah wathe nganâng putedâlem pa memah phethuk ako, ere mihnyan rãngma ate bohko longdong khhek lahma josiko mejâ toakka akoba ate rãngma asen edanga.

⁴³Erohwah, nedek pumma ne putedâlem pa memah phethuk hênko, thahdoakphe en, nerãngma dek kaniinii thienletma roantang roanjêng lemutthin pap wendô nâng khâmritkat noma, dektu dangletma ju khope chohpeba asen.

⁴⁵Ngale neda pumma ne putedâlem pa memah phethuk hênko, thahdoakphe en, nerãngma da kaniinii thienletma roantang roanjêng lemutthin pap wendô nâng khâmritkat noma, datu dangletma ju khope chohpeba asen.

⁴⁷Ngale nemit pumma ne putedâlem pa memah phethuk hênko, loatphere en! nerãngma mit kaniinii thienletma roantang roanjêng lemutthin pap wendô nâng khâmritkat noma, mit kathelolo demnâng Joban Hahsông thenâng chohwâng peba asen.

⁴⁸‘Erethe kowah thinnâng kekte dõngpa chenthumin riimah, ngale thinnâng khâmte wendô pa chenthumin mutmah.’

⁴⁹“Joban nâng joapsoap thinpa summa sâsiet eka rãngrãng, chentô mihnyan heh wenma sâsietmin.

⁵⁰“Sumpa asen; rohkomin sumtupa mesejâ tahko, nangma chenroh jienngak tusiet tumin a? “Nedede tungko sumtu rãngrãng lemruçha dangen, ngale wathema wathe demnâng mêmoma songtongen.”

Mak 10

Jisu ma Tangnyu Chiakphe junma Hethô

(Mathiu 19.1-12; Luk 16.18)

¹Erediko Jisu erethe kowah loatchhoan lahma Jordan Jo rãnkawah Judia diak ngenâng katwah. Enângmin mihnyan heh ate tânâng jahmõang hokwah, ngale jâhanwah rãngrãng atema thinnângmin hethô wah.



²Farasi khuthe hûlahma Jisu bukritthuk hunwah. Thinma ngatwah, “Ninâng thôkoh tanhi, nãng Niem junko dela ma ate tangnyupa tachiakphe ale?”

³Jisu ma thinnâng chhien nungma dânthâng wah, “Mosa ma nenâng chenrãngrãng Niem kohthen a?”

⁴Thinma dânthâng wah, “Dela ma ate tangnyuko chiakphe nyapraang raangko lahma ate tangnyupa tachiakphe ngama Mosa ma ngatwah.”

⁵Jisu ma thinnâng ngatwah, “Nenâng hethôpa nyahrãng alat dângkowah, Mosa ma ere Niempa nerãngma raangwah.

⁶Rohkomin, rang ahah bengahôn thuko, ‘Joban ma dihiak le dela hôanwah,’ Joban nyapraangma aroh ngaeka

⁷‘ngale erejunko dela ma ate nyong awa tâwah chhoan lahma ate tangnyu demko roamsôngmin,

⁸ngale wani pa phoangtherãng dângmin.’ Erohwah thin a wani dangtumah, wathe lâdangtah.

⁹Erohwah chenpa Joban ma roapsiet eka arepa mihnyan nyuchha henmemin lephan sietmin.”

¹⁰Chenthu thinkhu humkhen nãng ngakwâng diko dijunte hehma Jisu nãng nginpa thôngphâ wah.

¹¹Jisu ma thinnâng ngatwah, “Dela ma ate tangnyupa chiakphe lahma dihiak han mekep ako ate tangnyu demko kaamchhih lâmotah.

¹²Ererãngrãng dihiak memin ate tangwa pa chiakphe lahma dela hannâng methe wãngako ate tangwa demko kaamchhih lâmotah.”

Jisu ma Letachha hehnâng Rangkoh

(Mathiu 19.13-15; Luk 18.15-17)

¹³Mihnyan hehma Jisu tânâng letachha heh ate dekma sahloatrãng siethok kohwah, phumma mihnyan hehnâng dijunte hehma ritngatwah.



¹⁴Jisu ma erepa khelahma rinkhah wah, ngale ate dijunte hehnâng ngatwah, “Letachha heh ngatânâng chenwãngra, nekjektangen, chenrãngma ngako, Joban Hahsôngpa are letachha rãngrãng heh thiak.

¹⁵Ngama linlin thôkoh eka, henhenma Joban Hahsôngpa are letachha heh rãngrãng danglahma lekep dangeka, ereheh chenthumin rangkhethung nâng leta wãngmin.”

¹⁶Erediko atema letachha heh ate dekho khithwah, ngale chentô nâng sahlo lahma thinnâng rangkoh wah.

Techhu Wa

(Mathiu 19.16-30; Luk 18.18-30)

¹⁷Erethe kowah Jisu loatchhoan rãng ngatko, mihwa wathe chhoanhû lahma atemako khupjup hokwah, ngale atenâng ngatwah, “Hethôte Sen, ngama roantang roanjêng roandông chohrãng chenni moatmin a?”

¹⁸Jisu ma atenâng chhienwah, “Nangma nganâng asen ngama chenrãngroo ehanga?” “Asen henjô aho, Joban loloba asen etonga.

¹⁹Nangma are hôkum heh ajet: ‘Mih nekriphe; mihdihiak dela tungko kaamchhih nekmo; ahuh nekre; mihnâng ledangli nâng neksekhãm; mih nekdiap chhah; ngale nang nyong awa nginkepkep dango.’ ”

²⁰Mihwa pumma dânthâng wah, “Hethôte,” “Are chentô hôkum heh ngama letachha thuma kepwah.”

²¹Jisu ma atenâng mînchen nungma thongthong sùlahma ngatwah, “Nang rãngma wanthe loloba lemeka. Wãnglohma nangnâng chhahkhem chentô tongho heh phangtang sengwãng lohma ngunpa tangchhih hehnâng koh o, ngale nanga rangkhethung nâng techhu thôn edango; erediko kalohma nga demnâng johchhoan hang.”

²²Mihwa pumma are nginpa tatlahma, ate thenpa khûjâwah, ngale hung keke ngakchhoanwah, chenrãngma ngako, atea nyahrãng techhu dângwah.

²³Jisu ma ate dijunte hehnâng tûmlit phoangsû lahma thinnâng ngatwah, “Techhu hehrãngma Joban Hahsông thenâng wãngpa chentolat a!”



²⁴Dijunte heh ere nginko patrit rewah, rohkomin Jisu ma thinnâng ngatwah, “Ngachha heh Joban Hahsông thenâng wângpa chentolat a!

²⁵Techhu heh Joban Hahsông thenâng tâwâng noma ut peba metku polo pumma eta lienlup a.”

²⁶Are nginko dijunte heh nyahrãng barii lahma wathema wathe nâng chhienmînwah, “Eroh medang ako henkho tâpemin a?”

²⁷Jisu ma thinnâng thongthong sùlahma dânthâng wah, “Mihnyan nyuchha rãngma arepa letadangli, rohkomin Joban rãngma chenjô letadangthin aho.”

²⁸Erediko Piter ma loatjabwah, “Sûtan, nima chentôpa thinphe lihma nang dijun eki.”

²⁹Jisu ma thinnâng ngatwah, “Danga,” “Ngale ngama nenâng linlin thôkoh eka, nekhu henhenma mâmâ humte tangkâ, pho anya, nyong awa, chhuchha, pit ajo heh ngarãng ngale Nginkongsen rãngma thinphe thien eken a,

³⁰ereheh ma are rôanko ajah echohwak a. Châthethiak nomemin ajah hum ahah, pho anya, nyong awa, chhuchha, ngale pit ajo echohwak a, ngale mihma chêmchei thukmin echohwak a; ngale khediwah hokmin rôanko roantang roanjêng roandông echohwak a.

³¹Rohkomin, athângheh ajahthem khebeng thôn dangeka heh khedinâng elitdanga, ngale athângheh ajahthem khedi dangeka heh khekho elitdanga.”

Jisu ma Lôremrãng Ate Rit junma Jabwah

(Mathiu 20.17-19; Luk 18.31-34)

³²Jisu le ate dijunte heh Jeroselem nâng wãng lahma lemnâng dângwah. Jisu ma dijunte heh mamako lemsên danglahma khôamwah, phumma dijunte heh bârit rewah; ngale thin diwah junkhômte mihnyan heh achei rewah. Eredikomin rekthe Jisu ma ate dijunte heh sietchhoan lahma Jeroselem hahnâng ate khohnâng chenni hokmin a ereheh thôkoh wah.

³³Atema thinnâng thôkoh wah, “Tattan en,” “Nãnga Jeroselem nâng wãngeki, enâng Mihnyan Chhapa soam aroakte adong ngale Niemarang hethôte heh



deknâng ekoh a. Thinma ritphe rêmin ngama nginpat lahma Jews ledangte heh deknâng ekoh a,

³⁴erehehema atenâng thâjô lembe ehôan ejôan a, ngale thoakkahma thoak erea, erediko wat rewak lahma ritphe erea; rohkomin jârem diko ate ngakhin erea.”

Jems ngale Jon ma Roatsep

(Mathiu 20.20-28)

³⁵Zibidi chha Jems ngale Jon Jisu tânâng hokwah. Thinma ngatwah, “Hethôte,” “Nangma nirãng chenni komin momêng kohhi.”

³⁶Jisu ma thinnâng, “Erepa chennia?” ngama thôngphâ wah.

³⁷Thinma dânthâng wah, “Chenthu nang Hahsông phiak kowah Lowang Tongthinko metong tohko, nang demko dekhith wathe ngale dekchah wathe johtong thuk hi.”

³⁸Jisu ma thinnâng ngatwah, “Nema chenni thaeken a arepa jetmet. Ngama chêmchei chohmin pa nema tatha en a? ngale Nga chenroh baptijem kepmin a eroh nema takep en a?”

³⁹“Nima tae,” ngama thinma dânthâng wah. Jisu ma thinnâng ngatwah, “Linlin nema nga chêm rãngrãng etachêm en, ngale chenroh ngama baptijem kepmin a eroh eta kepen.

⁴⁰Rohkomin nga dekhith dekchah ko hentôngmin a arepa ngama tarenmek. Joban ma henrãng khoakhem kotah a erehehnâng atema ekoh a.”

⁴¹Chenthu ahan waechhi dijunte hehema erepa tatlahma Jems ngale Jon demnâng rinkhah wah.

⁴²Ephumma Jisu ma phangtang roamroo lahma ngatwah, “nemajet Jews ledangte jat mihnyan heh khoko thin pête heh leng achaaanrii lahma pên eka, ngale thin lemsente khhepho phannang heh thinkhoko leng achaaanrii eka.

⁴³Phumma ererãngrãng pa nekhu nâng ledangmin. Nekhuwah wathe adongdâng mehun enko, nanga ahan heh haarãng dango;



⁴⁴ngale nekhuwah wathe khekhodâng mehun enko, nanga anga nga haarâng dango.

⁴⁵Chenrângma ngako, Mihnyan Chha tumin mihma khoakhêmrâng katwah dangmah; atema mih khoakhêmrâng katwah ngale ate roandôngpa ajahthem mihnyan pesietrâng koheka.”

Jisu ma Mitdoak Bartimias Sênsiet

(Mathiu 20.29-34; Luk 18.35-43)

⁴⁶Thin Jeriko nâng hokwah, phumma Jisu ate dijunte ngale loangchhang demko erehah kowah loatchhoan poatko, chutphhek chhahte mînpa Timaias chha Bartimias lemko tônglâwah.

⁴⁷Chenthu atema Nazarat wah Jisu dankhoam eka ngama tatphumma, ate hôngrakwah, “Jisu! Devit Chha! nganâng mammînchen hang!”

⁴⁸Ajahthem mihnyan hehma atenâng ritnga lahma kihchepchep tongo ngatwah. Rohkomin ate jêngjah jahchaanrak rakwah, “Devit Chha, nganâng mammînchen hang!”

⁴⁹Jisu ma cheplahma ngatwah, “Ateroo en.” Ephumma thinma mitdoak wapa roowah. Thinma ngatwah, “Khuhah nâhah dango,” ngale “Toanchep o, atema nangroo eho.”

⁵⁰Ephumma atema khet heh koakphethien lahma, toaklahma Jisu tâko katwah.

⁵¹Jisu ma atenâng chhienwah, “Ngama nangrâng chenni moatkoh hun eko?” Mitdoakwa pumma dânthâng wah, “Hethôte,” “Nga mitma khehun ekang.”

⁵²Jisu ma atenâng ngatwah, “Choan o,” “Nangwah putedâlem pumma lâsensiettho.” Phumma lemlienma jienkhe lahma Jisu diko lemko junkhôm chhoanwah.

Mak 11

Tajien Lahma Jeroselem nâng Hok

(Mathiu 21.1-11; Luk 19.28-40; Jon 12.12-19)



¹Thin a Jeroselem nâng hunemnem dângko, Batphas ngale Bathani hah wah Oliv hahhoko wângwah. Phumma Jisu ma ate dijunte wanii khema nâng chienwên lâwah

²Jisu ma aroh ngatwah: “Nema kowah hahdaangko wângen. Ereko ne hokwâng rienrien, Gado chha henjô mathat chhang thiet lahma etongla a. Erepa jânletma anâng sietkatren.

³Ngale henma komin chenrăng sietchhoan eken a ngama mechhien hênko, Hethôtema lemeka, sitsiak engak sietwênkoh e ngama thôkoh en.”

⁴Ephumma thin wãng lahma Gado chhapa lemka wah hum kêsekko thietlahma chokhe wah. Thinma erepa jân poatko,

⁵erekowah chepte hehma thinnâng chhienwah, “Nema chenre eken a, Gado chhapa chenrăng jân eken a?”

⁶Thinma chenroh Jisu ma thôkotah a eroh dânthâng wah, ephumma mihnyan hehma chhoanthuk wah.

⁷Thinma Gado chhapa Jisu tâko sietkat kohwah, ngale thin khet heh Gado khohko kêmkoh lahma Jisu chhangthuk wah.

⁸Jahmông mihnyan hehma thinkhet heh lemko kêmkoh rewah, ngale ahan hehma pitwah bãngphak doak lahma lemko kêmkoh rewah.

⁹Jisu diama kowah johkhômte mihnyan hehma, “Joban nângrôe! Teso mînko hoktenâng Joban ma rangkoh eka! ngama rakwah.

¹⁰Joban ma ahokmin wah nãngwa Devit Lowang Hahsôngko rangkoh eka! Joban nângrôe!”

¹¹Jisu Jeroselem nâng hûlahma Rangsoamhum nâng wângwah, ngale atema chentôko tumlit phoangsok wah. Phumma nyahrăng sanhêmthah dangchoan dâng phumma, ate dijunte echhi wanii demnâng Bathani hahnâng katwah.

Jisu ma Phukbãng nâng Têm Athoak

(Mathiu 21.18, 19)

¹²Eredijâko, thin Bathani wah ngakwângko, Jisu rêmritwah.



¹³Jisu ma roanchhe ataang manko Phukbãng dek jahmõang demnâng khekatwah, phumma phukri machohlek o ngama Jisu kalahma sokkatwah. Bãngthongko hũka lahma phoangsokko atema bãngdek loloba chohkhe wah, chenrãngma ngako ere rangkuhpa phukriri rangkuh ledangwah.

¹⁴Phumma Jisu ma Phukbãngko, “Henmemin nangwah phukri lechoh chhahtumin!” ngama ngatthien wah. Ere ngatpa ate dijunte heh ma leptatwah.

Jisu Rangsoamhum nãng Wãng

(Mathiu 21.12-17; Luk 19.45-48; Jon 2.13-22)

¹⁵Thin Jeroselem nãng hokdiko, Jisu Rangsoamhum nãng wãng lahma chentô phinsâng thãsenge heh junloatwah. Ngale ngun litmĩnte heh khoang heh dâthinphe rewah, erediko phariwo sãngte tãngthin heh rephekoh rewah,

¹⁶Ngale Jisu ma Rangsoamhum thakho ma hennâng min chenjô danpe thuktuho.

¹⁷Erediko Jisu ma mihnyan hehnâng hethô wah: “Joban nyapraang nãng Joban ma aroh ngalahma raangeka, ‘Nga Rangsoamhum pa chentô diak akanwah mihnyan hehrãngma Rangsoamhum ngama ngatmin.’ Phumma nema ahuh heh huhtong thinrãng hõan eken!”

¹⁸Soam aroakte adong ngale Niemarang hethôte heh ma erengin pa chohtat lahma, thinma Jisu chenrohma jienritphe ea ngama lemkhô lêmsokwah. Thin Jisu ranchei dãngwah, chenrãngma ngako mihnyan heh phangtang atema hethôeka junko bãrit rewah.

¹⁹Sanhêmthah phumma Jisu le ate dijunte heh erehah kowah loatchhoan rewah.

Phukbãng wah Chohjet

(Mathiu 21.20-22)

²⁰Eredijã rangkhah rangkhoma, thin lemko khõam jenjenko phukbãngpa lepkhewah. Ere phukbãngpa phak ara ma bãngrin tãkotuk choakjã lahma dãngwah.



²¹Piter ma chhemthonghun lahma Jisu nâng ngatwah, “Sûtan, Hethôte, nangma temtoh phukbãngpa choakjâta!”

²²Jisu ma thinnâng dânthâng wah, “Joban nâng putedâlem en.

²³Ngama nenâng linlin thôkoh eka, henma komin ate hungnâng letûngmaang thangma are hahkongko nangdede josiko rutjâkao, ngama chien lahma atema jab ekapa metkep edanga, ngama meputedâlem ako, erepa metkep erutjâa.

²⁴Erohwhah ngama nenâng thôkoh eka: Chenthu nema rangsoam letma chenni komin metha enko, erepa lâchohtih ngama putedâlem en, ngale nema chenni thaeken a, erepa nenâng ekohhèn.

²⁵Chenthu nema toanchep letma rangmesoam enko, nema hen demnâng komin chenrãngma komin chhihchohmîn letma lelat metong hènko erepa map bãngkoh mêngen, erohkoba nema chenni chhihmotet a erepa rangkethung nâng tângte ne Wa Joban ma map ekohhèn.”

Jisu Chaanpa Chenwah Choh eka ngama Thôngphâ

(Mathiu 21.23-27; Luk 20.1-8)

²⁷Jisu le ate dijunte heh Jeroselem nâng ngakhok wah. Phumma Jisu Rangsoamhum khenko phoangkhôamko, soam aroakte adong, Niemarang hethôte, ngale khhepho phannang heh Jisu tâko hûlahma

²⁸atenâng thôngphâ wah, “Nangnâng areheh moatrãng chenwah chaantong ehoa? Are chaanpa henma koh ehoa?”

²⁹Jisu ma thinnâng dânthâng wah, “Ngama nenâng ngin wanthelolo chhien a, phumma nema arepa mejien dânthang hako, ngama areheh chenwah chaanma tamo ekanga erepa nenâng thôkoh a.

³⁰Nganâng thôkoh tanha, Jon ma chenwah chaanchoh lahma baptijem kohwah a: Erepa Joban wah chohwah ale, mihnyan wah chohwah a?”

³¹Phumma thindede tungko chhiakmîn wah: “Nãngma chenroh dânthangea? ‘Joban wah choheka’ ngama medânthang eko, ‘Atema, eroh medan ako, chenrãngma nema Jon nâng lepute dangeken a ngama engahi?’



³²Phumma nāngma, ‘mihnyan wah...’ ” (Thin mihnyan heh ranchei rewah, chenrāngma ngako, anga ngama Jon pa mǒng ngama thōnghun wah.)

³³Ephumma thinma Jisu nāng, “Nima jetmih” ngama dânthāng wah. Jisu ma thinnāng ngatwah, “Eroh medang ako ngamemin chenwah chaanma areheh tamo ekanga erepa nenāng thōkomah.”

Mak 12

Angurthong Khoakhêm Sokte Nginthakthô

(Mathiu 21.33-46; Luk 20.9-19)

¹Erediko Jisu ma thinnāng nginthakthô demnāng thōkoh wah: Atema ngatwah, “Rekthenāng mihnyan wathema angur khiet lahma panma tūmhoan rewah, ngale angurti koakthin koan thienrāng hahkenthū rewah, ngale abemte tōngrāng humchoang hoan rewah. Erediko aroamrāng angurthongpa mihnāng mothukthien lahma atea hahtaang nāng chhoanwah.

²Angur chum lahma khōanpūn rangkuh hokphumma tāngte pumma ate haa heh aroamrāng mothuktah heh tânāng ate thiak thārāng chienkatwah.

³Aroamrāng moatte hehma haapa loatwah, ngale walahma chenjô lekoh thangma ngakchien wēnwhah.

⁴Erediko tāngte pumma haahan wīenthe chienkatwah; phumma aroamrāng moatte hehma haa khokowat lahma rēsê rēphe hōanjōan wah.

⁵Tāngte pumma haahan wīenchien katwah, ngale erepemin thinma ritphewah; ngale ajahthem ahan hehnāngmin thinma erohjô hōanjōan wah, khakako buh awat ngale khakapa ritphe rewakwah.

⁶Tāngte pumma nyahrāng hunlahma thieneka ate chha wathelolo peba machienkat dāngwah. Khedithōan ko aroamrāng mothuktah heh tânāng ate chhapa chienkatwah. Atema ngatwah, ‘Ngama thonghun ekang, thin ngachha ran metkep echeiwak a.’

⁷Phumma aroamrāng motah hehma thindede tungko jabmīnwhah, ‘Arepa tāngte chhapa. Chepen atemin ritphe e, ephumma ate thiak aman heh nāngrāng edanga!’



⁸Ephumma thinma lolahma ritphewah ngale ate phoangpa angurthong panlien nâng phekatwah.”

⁹Jisu ma thinnâng thôngphâ wah. “Eroh medang ako, angurthong tângte pumma chenni rêmin a?” “Tângte pumma angurthong aroamrăng mothuktah heh ritphe lahma angurthong pa ahannâng emothuk a.

¹⁰Linlin nema are Joban nyapraang pa weihtet a? ‘Humhôte ma achhih ngama petphe eka longpa chentô noma alemthôn rãng dangeka.

¹¹Arepa Teso ma moatwah; nãngmit sokko patritli sên moeka!’ ”

¹²Jews khhepho phannang hehma Jisu loatkhekrăng themawa wah, chenrăngma ngako Jisu ma are nginthakthô pa thin lelatnâng thôeka ngama thinma jetloatwah. Rohkomin thin a mihnyan heh rancheiwah, erohwah thinma Jisu phethien lahma chhoanwah.

Thăkhokoh junma Chhien

(Mathiu 22.15-22; Luk 20.20-26)

¹³Jisu nâng ngin thongpha lahma bukrit thukrăng Farasi ngale Hirot mihnyan heh khuthe chienhokwah.

¹⁴Thin Jisu tânâng hulahma ngatwah, “Hethôte, nima ajet nanga mihnyan hehma manga hango ngamemin lesoang thangma toangtangko thôte. Ngale nangma mihnyan heh hennângjô adong arin roak ataokmin leweih thangma Joban nginpa toangtangma phoang hethôeko. Thôkoh tanhi, nãng Niem junko Roman Chofa nâng thăkho takoh ele takohmih a? Nima koh ele kohmih a?”

¹⁵Phumma thinma themawa ekapa Jisu ma lienkhe lahma dânthâng wah, “Nema nga chenrăngma bukritthuk hun eha? Janngun wah kohtanha, ngama sôtan ang.”

¹⁶Thinma janngun wanthe kohwah, ngale Jisu ma thinnâng chhienwah, “Arepa hen thhenphanga ngale henmîn raangeka?” Thinma, “Chofa,” ngama dânthâng wah.



¹⁷Ephumma Jisu ma thinnâng ngatwah, “Eroh medang ako chenpa Chofa thiak a arepa Chofa nâng koh en, ngale chenpa Joban thiak a arepa Joban nâng koh en.” Phumma Jisu nginko thin bârit rewah.

Aritwah Ngakhîn junko Thôngpha

(Mathiu 22.23-33; Luk 20.27-40)

¹⁸Erediko mihnyan ritwah ngakhinmah ngama ngatte Saduki khuthe Jisu tânâng hûlahma atenâng ngatwah,

¹⁹“Hethôte, Mosa ma are Niempa nãngrãngma raangwah: ‘delawa wathe chha machhama merii ako, atema phethien eka janthoinyupa atena ma chhachhatrãng ngakkepmin, phumma erewanii pumma chhaeka naapa rit retahwa chha ngama ngatmin.’

²⁰Rekthenâng chhepho waengit dângwah; Khhepho thôn pumma dihiak keplahma chha machhama ritwah.

²¹Phumma medemwa pumma ere dihiaknyu pa kepwah, ngale atemin chha machhama ritwah. Phumma ere dikowah pummemin erohjô keplahma chha lechha thangma ritwah,

²²ngale ahan hehmin erohjô ritwah: Chhepho waengit latma dihiaknyu pa keplahma chha lechha ma tuta ritwah. Khedithôn ko dihiaknyu pemin ritwah.

²³Phumma ritte heh phangtang ngakhîn jâko, dihiaknyu pa hen dihiak dângmin a? Waengit latma ate kepwah.”

²⁴Jisu ma thinnâng dânthâng wah, “Nea nyahrãng athe! Ngale chenrãngma the eken a erepa nemajet en a? Nema Joban nyapraang ngale Joban chaanpa lejet junko the eken.

²⁵Chenrãngma ngako chenthu ritte heh mengak hintahko thin a rangkethung wah Joban ngintatte rãngrãng dângmin ngale dihiak dela lekepmîn tumin.



²⁶Aritte heh ngakhîn junks: Mosa ma raangwah titabko wunbuk nâng wendô junko raangtahpa nema mathat weihne? Ereko Joban ma Mosa nâng ngalahma raangeka, ‘Nga a Abraham Joban, Isak Joban, ngale Jakob Joban.’

²⁷Atea ahînte heh Joban, aritte heh Joban dangmah. Nea nyahrâng lâthetet!”

Joban wah Hôkum Dongthôn

(Mathiu 22.34-40; Luk 10.25-28)

²⁸Eretheko Niemarang hethôte wathe dângwah, atema are ngin thômînpa tatwah. Ngale Jisu ma Saduki hehnâng senthemthem pundânthang lahma khewah, ephumma atema Jisu tânâng kalahma chhienwah: “Mosa Niem kowah chenpa alemthôn a?”

²⁹Jisu ma dânthâng wah, “Alemthônpa arepa: ‘Isrial heh tattan en! Teso nang Joban pelolo jôba Teso.

³⁰Nang Teso Joban nâng nanghung nangrñ phangtang kohlohma hun o, ngale ju amoangmin phangtang kohlohma hun o, erediko nangchaan phangtang kohlohma hun o.’

³¹Ere dikowah nyahrâng alemthôn hôkum pa arepa: ‘Nangtok akhungwah mihnyan hehnâng nang dedeko hunrieko rângrâng hun o.’ Are wannii noma alem hôkum ahan ahotu.”

³²Niemarang hethôte pumma Jisu nâng ngatwah, “Hethôte, lasen jabtoh! nangma jab ekopa toangtang jôba, Teso lolojôba Joban, ngale joban ahan ahotu.

³³Ngale nangma nang Joban nâng hung arin, chaan ahang phangtang kohlohma hun o; ngale Nangtok akhungwah mihnyan hehnângmin nang dedeko hunrieko rângrâng hun o. Erepa Joban nâng ngem angah demnâng soam aroak nomemin ere wannii hôkum pa ajah alemli.”

³⁴Niemarang hethôte pumma nginsen dânghângpa Jisu ma khelahma, atenâng ngatwah, “Nanga Joban Hahsông kowah taangmoh.” Ere diphumma Jisu nâng henmemin ngin ajah chinchhien tuho.

Misaia junma Thôngphâ

(Mathiu 22.41-46; Luk 20.41-44)



³⁵Jisu ma Rangsoamhum nâng hethô poatko, atema ngin chhienwah, “Niemarang hethôte hehma Misaia pa Devit Chhu achha dângmin ngama chenroh jiennga eka?

³⁶Asâthôanju ma Devit nâng jabthukwah: ‘Teso ma nga Teso nâng ngaeka: Ngama nangran heh nang daphâ khenko mathien thienkoh kiko nanga are nga dekchahko tongo.’

³⁷Devit dedema atenâng ‘Teso’ ngama roowah; eroh medang ako Misaia pa Devit Chhu achha chenroh jiendângmin a?”

Jisu ma Niemarang Hethôte hehnâng Achhih Ngat

(Mathiu 23.1-36; Luk 20.45-47)

Jahmõang mihnyan ma Jisu nang khuhah nâhah jetatwah.

³⁸Jisu ma hethô poatko aroh ngatwah, “Niemarang hethôte hehwah jetletma dangen, thin a bôjat hehnâng khetlo dongpa pohlahma phoangkhoam lahma mihnyan hehma thin rancheichei rânjab hun eka,

³⁹Thinma Sanagog nângmin thin tongthinpa châthien eka ngale kuhhânthin nângmin tângthinsen hunwak eka.

⁴⁰Thinma janthoinyu heh helemrãng keplahma thin humpa longchhah rewak eka, ngale thinnâng ranglolili soamko lahma khesok eka. Erethâ thinma ajahthem chêmchhih echoh a!”

Janthoinyu ma Ngunsek Koh

(Luk 21.1-4)

⁴¹Rangsoamhum wah ngunsek bâkoat tâko Jisu tonglahma mihnyan hehma ngun sekhok pa sokwah. Techhu hehma ngunpa jahmõang sekhokwah;

⁴²erediko tangchhih janthoinyu hûlahma janngun wannii sekhokwah, erepa phanii ngun tôtha dângwah.

⁴³Phumma Jisu ma ate dijunte heh khôanroo lahma thinnâng ngatwah, “Ngama linlinthôkoh eka, are tangchhih janthoinyu pumma Joban chohse ngun bâkoatko chentô noma ajahthôn sek eka.



⁴⁴Chenrãngma ngako, ahan hehma thinnâng lephang leheng bâeka hehwah sekhû eka; rohkomin atea aretô tangchhih danglahma atenâng chentô tonga erepa janthoinyu pumma phangtang sekkoh eka.”

Mak 13

Jisu ma Rangsoamhum Chhihjà junma Jab

(Mathiu 24.1, 2; Luk 21.5, 6)

¹Jisu Rangsoamhum wah loatchhoan poatko ate dijunte wathema atenâng ngatwah, “Sûtan, Hethôte! Are Rangsoamhum kowah longheh chentôdong ngale sên a!”

²Jisu ma dânthâng wah, “Nangma are humdong heh khe ekoa? Long phangthem in ate theko letongtumin; phangtang runjà rêmin.”

Chêmchei ngale Mihma Chêmsiet

(Mathiu 24.3-14; Luk 21.7-19)

³Rangsoamhum rãnkawah Oliv hahhokho ko Jisu tonglahma dangwah, eko Piter, Jems, Jon, ngale Andru, lolo ate tâko hokwah.

⁴Thinma ngatwah, “Arepa chenthu dangmin a erepa ninâng thôkohhi,” “ngale areheh dângrãng sanpoat pa lâthângtah ngama jetrãng chendângmin a erepa ninâng thôkohhi.”

⁵Jisu ma thinnâng ngatwah, “Jetletma dangen, ngale hennâng min nekmok sietrii en.

⁶Ajahthem mihnyan hehma ngamîn keplahma ehuwakra, thinma ‘nga a ate!’ ngama ngalahma ajahthem mihnyan heh emoksiet a.

⁷Ngale ne kêanâ hehnângmin erediko hahtaang nãngmin rantîn metat enkomin nekchei en. Erohpa metkep dangmin, rohkomin arepa athôn sanpoat pa hûera ngama dangmah.

⁸Diakthe pumma diakthe demko emênmin a; wanthe hahsông pumma wanthe hahsông demko khum apanmin. Chentô thenâng hahtii, ngale rem edanga. Areheh naahôngrãng wok bãngkekko chetwah rãngrãng edanga.



⁹“Nededema jetletma dangen. Nea Sanagog hehnâng siethû lahma ewat hèn; ngale nema hahpênte ngale Lowang hehmako ngamînko chepletma thinnâng Nginkongsen pa ethôkoh en.

¹⁰Rohkomin athôan sanpoat hokmako, Nginkongsen pa chentô mihnyan nyuchha nâng bengchoh thômêng kohmin.

¹¹Ngale chenthu ne khhek lahma metloat thinnâng siethokko, nema chenroh dânthâng min a ngama ammama neksekma en; chenthu sanpoat pa mehûthako, Joban ma chenni jabthuk ehèn a erepa dânthangen. Chenrãngma ngako nema jabmin jabkhabpa newah ledangmin; ereheh Asâthôanju ngewah ehûra.

¹²Mihnyan hehma thinpho anaa heh eritphethuk a, ngale wa hehmemin thinchha heh eroh eritphethuk a. Chha hehmemin thinnyong awa heh lelatnâng danglahma eritphethuk a.

¹³Anga ngama ngajunma nenâng emitchek hèn. Rohkomin athôan tokokiet henhenpa dâlemsen danglahma lektong eka ere hehba khopemin.

Nyahrãng Cheili

(Mathiu 24.15-28; Luk 21.20-24)

¹⁴“Nema ‘nyahrãng cheili thônpa’ ate chepthin theko ledang cheplahma ekhe en.” (Arepa chenni nâng ngaeka erepa weihte hehma jet en!) “Erediko Judia wah mihnyan heh hahkong khonâng huhchhoan wângmin.

¹⁵Humkho nâng dângte mihnyan pummemin humkhen nâng kalahma ate sêmmak heh ate demko johtôan chhoanrãng sanpoat pa lechhoan thukmin.

¹⁶Pitnâng dângte mihnyan hehmin humnâng khet akhu toanrãng leta ngakwãngmin.

¹⁷Ngale ere sanpoat kowah naawunte dihiaknyu ngale naajeng nyong dângte dihiaknyu hehrãngma chentô cheili dângmin a!

¹⁸Areheh rangpen nâng nekchen dangeka ngama Joban nâng rangsoam en!

¹⁹Chenrãngma ngako, ere sanpoat kowah chêmcheipa Joban ma rang ahah hôantah thuwah athângheh tôko hahtokkhoh ma chêmchoh eka kowah



achhihthôanpa dângmin. Ngale arerãngrãng khedi nângmin chenthujô ledang tumin.

²⁰Rohkomin Joban ma ere rangwopa thoansiet reka; Joban ma lethoansiet ngako, henmin kho leta peminwah. Atema ren eka mihnyan hehrãngma Joban ma ere rangwopa thoansiet eka.

²¹“Ngale, henma komin nenâng, ‘Sûtan en, Misaia pa areko tonga!’ ba, ‘ireko tonga!’ ngama menga hênko - atenâng nekpute en.

²²Chenrãngma ngako, Misaia mông ngale môngmông heh ehonga; Ngale Joban ma ren eka mihnyan heh meta diapchhah ekorãng ngama thinma nyahrãng patritli ngale bâritli moatlem hehmin emoa.

²³Ne jetletma dangen! Ngama chentôpa sanpoat hokmako thôkoh eka.

Mihnyan Chha Hok

(Mathiu 24.29-31; Luk 21.25-28)

²⁴“Ere chêmchoh sanpoat thôn diwah rangkuhko sanpa nyekjâ erea, ngale dâmin leliettûmin,

²⁵rangkho wah merit heh jârit erea, ngale rangkho wah chentô kheki hehmin thithe kowah emahjâa.

²⁶Erediko Mihnyan Chhapa phoamkhohko tonglahma chaan ahang ngale phiakto phiakja ehongkara.

²⁷Atema rangwah ngintatte heh hahtokkhoh sukbeliiko chienchhoan lahma Joban ma ren eka mihnyan heh sukthe ma sukthe kowah ekhoansiet a.

Phukbãng wah He

(Mathiu 24.32-35; Luk 21.29-33)

²⁸“Phukbãng kowah chohjet en. Chenthu phukbãngpa hinchîchî, noapjokjok, ngale bãngchhong chhongnyan mechhong tahko, nema rangcho lânam hutha ngama rãngjet en.

²⁹Ererãngrãng chenthu ngama nenâng thôkotah heh danglahma mekhe tetko, nema athôn sanpoat pa lânamtha, ngale lâhuera ngama jet en.



³⁰Thonghun en, are chentôpa athângwah ahînte mihnyan heh phangtang târitmako edanga.

³¹Rangle hah eta chhihjâa, rohkomin Nga jabkhabpa chenthumin leta chhihjâmin.

Henmemin Rangwo Sanpoat pa Tajetmah

(Mathiu 24.36-44)

³²“Ere rangwo le sanpoat pa chenthu hokmin a erepa henmemin jetmah - rangkethung wah Joban ngintatte hehmemin jetmah, ngale Chha memin jetmah, ere rangwo sanpoat pa Wa Joban ma lolobajet a.

³³Jetletma dangen, ngale chep achã letma tongen, chenrãngma ngako sanpoat pa chenthu hokmin a erepa nema jetmet.

³⁴Erepa mihnyan wathema ate humpa haa hehnâng phethien kolahma, ngale haa hehnâng mâmâ moatlem phenthienkoh, erediko kêsek bemteko senthemthem bemrãng thôthienkoh relahma ate humwah hahtaang nâng tongchhoanwah rãngrãng dângmin.

³⁵Erohawah chep achã letma bembemjû tongen, chenrãngma ngako hum tângtewa pa chenthu hokmin a erepa nema jetmet - rangjâthah nângmin tahûra, ba rangpen mongtang nângmin tahûra, wowenkho nângmin tahûra, ba rangkhahkho nângmin tahûra.

³⁶Nema lejetpoatko ate sitsiak mehong hûrako, ne juplek letma nekchen khehû ehèn.

³⁷Ngama nenâng chenni ngaeka, erepa chentô nâng ngaekang: Chep achã letma bembemjû tongen!”

Mak 14

Jisu Lelatnâng Ranchep

(Mathiu 26.1-5; Luk 22.1, 2; Jon 11.45-53)

¹Arepa Adankhoam ngale wichhi lesak bankên phhek lokuh rãng jânii mako dângwah. Soam aroakte adong ngale Niemarang hethôte hehma Jisu huhlokhhek lahma ritphe rãng phungwah.



²Thinma ngatwah, “Năngma arepa lokuh poatko lemomin,” “chenrăngma ngako mihnyan heh rin môangkhhah a.”

Bathani năng Jisu năng tienma Lokkoh

(Mathiu 26.6-13; Jon 12.1-8)

³Jisu Bathani wah angêm khoanchette simon humko dăngwah. Jisu phhekchhah chhah thuko, dihiaknyu wathema longwah hōanwah thòko nard băng wah hōanwah thăchaanjat tientumli mênchong pehokwah. Phumma dihiaknyu pumma thòbohpa thahwat lahma tienpa Jisu khoko lokkohwah.

⁴Erekowah mihnyan hehma rinkhah lahma thindede tungko jabmînwah, “Are tienpa chenrăngma mahto năng hōaneka?”

⁵Arepa chârem ngun noma ajahnăng chenta chohsăngtih ngale ngunpa tangchhih hehnăng kohminwah!” ngale thinma dihiaknyuko nyahrăng ritngatwah.

⁶Phumma Jisu ma ngatwah, “Nekchhihsû en ate hungsiko thien en! nema atenăng chenrăngma sekham eken a? Atema arepa ngarăngma asenli moeka.

⁷Nedemnăng tangchhih heh roantang echoh en, ngale chenpoatnăng hun eken a erepoatko nema thinnăng eta chohsû en. Phumma nema nga roantangma chohmahha.

⁸Atema chentô taeka eretô lâmotah; Atema nga phoangko tienma lokkoh ehangpa ngarit mama nga mangbinrăng khoakhem eka.

⁹Ngama nenăng nginlinlin thòkoh eka, rangkhenko chenriang năngmin are nginkongsen pa phoangthô eka, ereko atema chenni moeka erepemin ate thônghunrăng thômin.”

Jisu Chênseng Răngma Juda Nyoak

(Mathiu 26.14-16; Luk 22.3-6)

¹⁰Erediko Juda Iskarot echhi wanii dijunte kowah wathe, Soam aroakte adong heh tânăng Jisu chên asăngrăng hokwah.

¹¹Thinma ate ngin tatlahma nyahrăng khuhahwah, ngale atenăng ngun kohrăng toamsêm wah. Ere diphumma Juda Iskarot ma thinnăng Jisu loatthukrăng sanpoat senpa lemsokwah.



Jisu ma Adankhoam Lokuh Phhekchhah pa Ate Dijunte heh Demnâng Chhahwah

(Mathiu 26.17-25; Luk 22.7-14, 21-23; Jon 13.21-30)

¹²Wichhi lesak bankên phhek lokuh khebeng rangwojâ, ngale erejâpa Adankhoam lokuh rãng Saak joatjâ rangwo dângwah, phumma dijunte heh ma Jisu nâng thôngphâ wah, “Nima nangrãng Adankhoam lokuh phhekchhah pa chenriang nâng khoakhemkoh ea?”

¹³Erediko Jisu ma thinkhu chhangwah wanii are ngin heh thôko lahma chienwênwah: “Hahdaangko wângen, ngale nemako johên lahma mihwa echohmîn en. Phumma ate wângeka

¹⁴humko junlup wângen, ngale hum tângtewa ko thôkoh en: “Tângte ma ngaeka, nga ngale ngadijunte heh Adankhoam lokuh phhekchhah chhahthin thepa chenkoa?”

¹⁵erediko atema lemtok dângko nyahrãng khoakhem lahma the wanthe ekhesok hên, eretheko năngkhurãng chentôpa khoakhem en.”

¹⁶Dijunte heh hahdaangko wãng lahma Jisu ma thinnâng chenroh thôkotah a ererãngrãng chentôpa chohkhe wah; phumma thinma Adankhoam lokuh phhekchhah pa ereko khoakhêm wah.

¹⁷Sanhêmthah ko, Jisu ma ate dijunte echhi waniipa sietlahma hokwah.

¹⁸Thin-khu khoangko tonglahma phhekchhah chhah thuko, Jisu ma ngatwah, “Ngama nenâng thôkoh eka, nekhuwah wathema nga echen esengha - nga demwah roam chhahte pumma echen eseng hang.”

¹⁹Dijunte heh nyahrãng hungke lahma wathe diko wathema atenâng thôngphâ wah, “Teso, nangma nganâng nga ehanga?”

²⁰Jisu ma dânthâng wah, “Are nekhu echhi wanii kowah wathe dângmin, nga demko ate bankên johrôm phhekkat tepa dângmin.

²¹Joban nyapraang nâng chenroh raangeka eroh Mihnyan Chhapa eriaa, rohkomin henma Mihnyan Chhapa chen aseng eka ererãngma chentô chhih dângmin a! Ere mihnyan rãngma ate lechêm hongchha peba asen dângmin wah!”



Teso Phhekchhah

(Mathiu 26.26-30; Luk 22.14-20; 1 Korint 11.23-25)

²²Thin phhekchhah chhahthuko, Jisu ma bankên chhupthe toanlahma Joban nâng dangkoh a ngat rangsoam lahma chhupsiet lahma ate dijunte hehnâng kohwah. Atema ngatwah; “Thaha ngale phhek en,” “arepa ngaphoang.”

²³Erediko atema bâti toanlahma Joban nâng dangkoh a ngat rangsoam lahma thinnâng kohwah; ngale thinkhu chentôma erekowah jokwah.

²⁴Jisu ma ngatwah, “Arepa ngahei, ajahthem mihnyan hehrãng hongeka, are ngahei demko Joban toamsem pa tonga.

²⁵Ngama nenâng thôkoh eka, Ewa Hahsông theko nedemnâng angurti anyan maroam roamjokko, ngama arepa lethejok tumin”.

²⁶Erediko thinma rangsoamsê selahma Oliv hahho nâng wângwah.

Piter ma Jisu Jetmek ngama Ngatpa Jisu ma Khema ma Jetwah

(Mathiu 26.31-35; Luk 22.31-34; Jon 13.36-38)

²⁷Jisu ma thinnâng ngatwah, “Nekhu phangtang huhchhoan letma ngalolo ephethien ha, chenrãngma ngako, Joban nyapraangma ngaeka, ‘Joban ma saaksoktepa eritphea, ngale saak heh mâmâ phânhhoan ephan chhoan a.’

²⁸Rohkomin nga ngakhîn diko, nemako Galili nâng ewãngla ang.”

²⁹Piter ma dânthâng wah, “Ahan hehma phangtang mejô mephethien hokomin, ngama chenthumin phethienmih!”

³⁰Jisu ma piter nâng ngatwah, “Ngama nangnâng thôkoh eki, thejâ rangpen wo khapnii wênmake, nangma nga jetmahhang ngama ditrem engang hang.”

³¹Piter ma dânthâng wah, “Nga nangdemnâng ritjô mejohrii ekomin eroh chenthumin jabmek!” Ngale dijunte ahan hehmemin manthe ngatwah.

Jisu Gathemani nâng Rangsoam

(Mathiu 26.36-46; Luk 22.39-46)

³²Thin Gathemani theko hokwah, ngale Jisu ma ate dijunte hehnâng, “Nga rangsoam poatko ne ako tongla en” ngama ngatwah.

³³Atema piter, Jems, ngale Jon johsietwên wah. Ereko Jisu nâng hungchhih chêmchoh hokwah,



³⁴Ngale atema thinnâng ngatwah, “Ngahung khenwah hungchhihpa atôdông, ngajô lankha sietroh hûera. Areko tongla en ngale nga demnâng met hinhin johdangha.”

³⁵Ate roanche taangwãng lahma, hahko khupjup lahma, rangsoam wah, meta dangako, atema are chêmchei sanpoat pa lechohrãng soamwah.

³⁶Atema soamwah, “Wa,” “Ewa! nangma chentôpa tamo o. Are ngawah chêmchei hûera pa rephe kohhang. Rohkomin ngama hun ekang junko dangmah, nangma chenroh hun eko junko chendanga.”

³⁷Erediko atema ngakka lahma dijunte warempa juplek lahma khehokwah. Phumma atema piter nâng ngatwah, “Simon nanga jupre ekoa? Koantathe rãng met tajohhin mahhangne?”

³⁸Ngale atema thinnâng ngatwah, “Met hin dangen ngale rangsoam letma tongen, nemin achhihma hungtôanko nekchen jârii eken. Juma huneka, rohkomin hei angem pa aboan.”

³⁹Eredikomin ate ngakchhoan lahma mǎnthethin jabkhab pa jablahma rang ngaksoam wah.

⁴⁰Erediko Jisu dijunte heh tânâng ngakhokko juplek lahma khehokwah; thin mitkan lahma tatongho.

⁴¹Chenthu ate lôremrãng ngakhok demphumma, thinnâng ngatwah, “Nea athângheh min bôanjup bôantông thune? Sanpoat pa lâhûtha! Sûtan en! Mihnyan Chhapa papi mihnyan heh deknângkoh lâthângtah.

⁴²Chapen, chhoan eki. Sûtan en, ngachên asângte mihnyan pa anǎ!”

Jisu Loatkhek

(Mathiu 26.47-56; Luk 22.47-53; Jon 18.3-12)

⁴³Jisu ma nginthô thuko echhi wanii dijunte kowah wathe ate mînpa Juda hokkhoam hokwah. Ate demko soam aroakte adong, Niemarang hethôte, ngale khhepho phannang hehmi mihnyan jahmông dǎng apah demnâng chienhokwah.



⁴⁴Jisu chên asângte pumma mihnyan hehnâng ngatwah: “Ngama hennâng chup ekanga ere mihnyan pa nema lem ekenpa. Nema ate lokhhek en!”

⁴⁵Juda hokkhôam rienrien Jisu tâko wǎng lahma, “Hethôte!” ngama roowah, ngale atenâng chupwah.

⁴⁶Ephumma thinma Jisu lolahma kitkit khhekwah.

⁴⁷Phumma thin demwah chepte wathema ate dǎng toanlahma soam aroakte adonghaa wathe nǎng doak lahma nâ jâdoakwah.

⁴⁸Erediko Jisu ma thinnâng ngatwah, “Nga mihngoan rǎngrǎng nga loatrǎng dǎng apah kepletma hûeren a?”

⁴⁹Rangwo roakweih ngama rangsoam humko tonglekma hethôtek poatko lokhhek mahtha. Rohkomin Joban nyapraang pa toangtang dǎngmin.”

⁵⁰Erediko dijunte heh phangtang huhchhoan lahma atelolo phethien wah.

⁵¹Delawa wathe khet chintechha thoklahma Jisu diko junkhômawah. Phumma thinma ate khhekrǎng phungwah.

⁵²Phumma atema khetchinchha thoktahpa jâphethien lahma boangloang huhchhoanwah.

Jisu Jews heh khhepho Phannang heh Tânâng

(Mathiu 26.57-68; Luk 22.54, 55, 63-71; Jon 18.13, 14, 19-24)

⁵³Erediko Jisu soam aroakte adongthôn humnâng sietwênwah, ereko soam aroakte adong, khhepho phannang, Niemarang hethôte heh khôanhû lahma dǎngwah.

⁵⁴Piter taangtaangma junkhoam lahma soam aroakte adongthôn humthakho tôko junhokwah. Ereko abemte sipâhi heh demko wenko johlemtong lahma dǎngwah.

⁵⁵Soam aroakte adong ngale Jews khhepho phannang heh Jisu jienritphe rǎng atenâng athe chohloat hunwah, rohkomin thinma chenjô athe chohlo ho.



⁵⁶Ajahthem mihnyan hehma hâkhi hong lahma Jisu lelatnâng jabwah, rohkomin thin ngin peminkep ho.

⁵⁷Erediko mihnyan khuthe toanchep lahma Jisu lelatnâng are mothô pa thôwah:

⁵⁸“Nima aroh jablahma tattih, ‘Mihnyan dekma hânwah Rangsoamhum pa runsiet lekma, jârem diko mihnyan dekma hânwah ledang ahan wanthe engak hoan ang.’”

⁵⁹Phumma mihnyan hehma erengin peminkep ho.

⁶⁰Soam aroakte adongthôn pa thinmako toanchep lahma Jisu nâng thôngphâwah, “Are nang lelatnâng jab ekako nangma chenjô dânthângthin ahone?”

⁶¹Rohkomin Jisu ma khapthejô ledânjabma kihchepchep tôngwah. Eredikomin soam aroakte adongthôn ma Jisu nâng wîenthe ngatwah, “Nanga Asâthôn Joban Chha, Misaia ne?”

⁶²Jisu ma dânthâng wah, “Dengang,” “ngale nema Mihnyan Chhapa Achaanthôn Joban dekchahko tonglahma rangkethung wah phoam demnâng kalahma ekhe en!”

⁶³Soam aroakte adongthôn pumma ate khetpa khasiet lahma ngatwah, “Nângma ahan hâkhi lemtumih!”

⁶⁴Atema Joban thāsêpa nema lâttattet. Nema chenroh rerãng thonghun eken a?” Thinkhu phangtang Jisu lelatnâng jabwah: Ate lâthetah ngale ritphe rêmin, ngama ngatwah.

⁶⁵Khaka hehma Jisu nâng thoakkahma thoakwah, ngale ate mitpa doapkhhek lahma wat rewakwah. Thinma ngatwah, “Jetlotan henmawat ehoa!” Ngale erediko sipâhi hehma sietchhoan lahma thhenkawat rewakwah.

Piter ma Jisu Jetmek Ngat

(Mathiu 26.69-75; Luk 22.56-62; Jon 18.15-18, 25-27)

⁶⁶Piter thakhoko tôngthuko soam aroakte adongthôn haa dihiaknyu ate tâko katwah.



⁶⁷Dihiaknyu pumma piter wenko lemtong lahma khewah, phumma piter nâng thongthongsû lahma ngatwah, “Nangmin Nazarat wah Jisu demwahni.”

⁶⁸Phumma Piter ma dangmek ngama dakwah. “Ngama jetmek...Nangma chenjâb eko arepa ngama jetlomek,” eroh Piter ma dânthang lahma thakho kowah panlienکو katwah. Ere rienrienکو wowênwah.

⁶⁹Dihiaknyu haa pumma eretheko khelahma ere kêkowah chepte mihnyan hehnâng thôkoh wah, “Atemin Jisu demwah mihnyan!”

⁷⁰Phumma erekomin Piter ma dangmek ngama dakwah. Ere chuthe diko ate kêkowah chepte hehma piter nâng sekhâmwah, “Nanga Jisu demwah dangmek ngama tasâmoh, chenrângma ngako, nangmin Galili wah mihnyan.”

⁷¹Erediko Piter ma ngatwah, “Ngama toamsem lekma toangtang jabekang! mothô methô angko Joban ma chenchêmsiet hang! Nema ngaeken mihnyan pa ngama jetmek!”

⁷²Ere rienrienکو wo khapnii wênwah, ngale Jisu ma atenâng chenroh ngatah a ereheh Piter ma thônghun wah, “Wo khapnii wênmako, nangma nga jetmek ngama lôrem enga hang.” Ngale piter hung nyahrâng chhih lahma sepwah.

Mak 15

Jisu Pilat Mathah nâng Chop

(Mathiu 27.1, 2, 11-14; Luk 23.1-5; Jon 18.28-38)

¹Rangkah rangkhoma soam aroakte adong heh khhepho phannang, Niemarang hethôte, ngale ngoang awang heh demnâng ngin pûnthômîn wah. Thinma Jisu janruma khhek lahma Pilat nâng siethok kohwah.

²Pilat ma atenâng thônghphâ wah, “Nanga Jews heh Lowang ne?” Jisu ma dânthâng wah, “Nangma lâpun jabtoh.”

³Soam aroakte adong hehma Jisu nâng jahmõang athe loatwah,

⁴Ephumma Pilat ma atenâng wien thônghphâ wah, “Nangma ledanthang minne? Thinma nang lelatnâng thôeka heh tattan!”

⁵Erekomin Jisu ma chenjô dânthangmah, phumma Pilat bârit rewah.

Jisu Ritpherâng Nginpat



(Mathiu 27.15-26; Luk 23.13-25; Jon 18.39—19.16)

⁶Adankhoam lokuh roakweih mihnyan heh ma henpa lãngphe kohhi ngama thaeka mihnyan pa Pilat ma phâtek wah chîlaang phewah.

⁷Ere sanpoatko mihwa wathe ate mînpa Barabas ngama mihritphete heh demnâng roamlahma phâtek nâng dângwah.

⁸Chenthu mihnyan heh khôan lahma jâhanwah rãngrãng Pilat wah thâko,

⁹Pilat ma thinnâng thôngphâ wah, “Ngama Jews heh Lowang pa laangphekoh a?”

¹⁰Pilat ma senthemthem jetlahma dângwah, soam aroakte adong heh ma Jisu nâng khûsê mitchek junko nganâng lohûkoh ehang ngama.

¹¹Phumma soam aroakte adong heh ma mihnyan hehnâng Barabas laangphe kohhi ngama thârãng thôkoh wah.

¹²Phumma Pilat ma mihnyan hehnâng wîenthe ngakchien katwah, “Eroh medang ako, nema Jews heh Lowang ngama nga ekenko ngama chenre anga?”

¹³Thinma, “Arittek reo!” ngama dânthâng wah.

¹⁴Pilat ma thôngphâ wah, “Roh medang ako atema chenni chhihmotah a?” Phumma thinma, “Arittek reo!” ngama ajah chaanrak wah.

¹⁵Pilat ma mihnyan heh rinmethuk hunma atema Barabas laangphê kohwah. Erediko atema Jisu nâng watlahma rittekthuk wah.

Sipâhi heh ma Jisu nâng Dûmmek

(Mathiu 27.27-31; Jon 19.2-3)

¹⁶Sipâhi heh ma Jisu Govono hum thakhoko sietwênwah, ngale thinlemru ahan hehmin roowah.

¹⁷Thinma Jisu nâng khetchekpa pohkoh rewah, ngale suhkãngwah khaphok hôan lahma ate khoko phokkoh rewah.

¹⁸Erediko thinma atenâng jôjêm nungma: “Jews heh Lowang roanlo hin o!” ngama ngatwah.



¹⁹Thinma ate khoko thankahma wat rewah, thoakkahma thoak relahma thin dakuhto lahma atemako khupjup wah.

²⁰Chenthu thinma atenâng dûmmek diko, khetchekpa ngakkoakphe kolahma ate khetpa ngakpoh kohwah. Erediko rittekrång sietchhoanwah.

Jisu Rittek

(Mathiu 27.32-44; Luk 23.26-43; Jon 19.17-27)

²¹Thinma lemko mihwa wathe chohmînwah, ate mînpa Simon dângwah, atea thindiak wah sumhah nâng katdângwah. Phumma sipâhi hehma atenâng Jisu bãngphakpa pêthukwah. (Simonpa Kren diakwah dângwah, ngale atea Alexandra ngale Rufus wa dângwah.)

²²Thinma Jisu Golgotha theko sietwênwah, are ngaeka pa, “Mangkhora sekthe” ngama ngaeka.

²³Eretheko thinma Angurti pa Myrh ngama ngaeka phem demko seklahma Jisu nâng jokthukwah, phumma Jisu ma erepa jok ho.

²⁴Erediko thinma Jisu rittekwah, ngale ate khetpa henma chenre chhuppa chenchoh ea ngama longkendoh nâng tan lahma phenkepwah.

²⁵Thinma Jisu rittektah sanpoat pa rangkhah wanekhu sanpoat nâng dângwah.

²⁶Jisu nâng sekham nyapraangpa: “Jews heh Lowang.” Ngama raangkohwah.

²⁷Thinma Jisu demko ate dekhitko wathe ngale dekchah wathe ahuhte wanii johrittek wah.

²⁹Erekowah dankhoamte mihnyan hehma thin kho heklahma Jisu nâng jôjêmwah: “Ha! Nangni Rangsoamhum pa runsiet lohma jâremko ngakhôte pa!

³⁰Bãngphak khokowah jâkhoam kalohma nangdede pepângrii”

³¹Ererãngrãngjô soam aroakte adong ngale Niemarang hethôte hehma Jisu nâng jôjemwah, thinma wathema watheko jabmînwah, “Atema mihhan heh tapepâng eka, phumma atedede tapângrii mah



³²Isrial heh Lowang, Misaia pa bãngphak khokowah jâkhoam katpa sûtan e, ephumma nãngmemin atenâng epute e!” Ngale Jisu demwah wanii johrittektah niimemin Jisu nãng jôjêmwah.

Jisu Rit Ngin

(Mathiu 27.45-56; Luk 23.44-49; Jon 19.28-30)

³³Sanhêmthah ko diaktang rangnyek tungtung dângwah, erepa koantarem rãng leknyekwah.

³⁴Wanrem sanpoatko Jisu chaanmõang raksepwah, “Eloi, Eloi, Lama Sabatthani?” are ngaeka pa, “Nga Joban, Nga Joban, nangma nga chenrãngma thinphe ehanga?”

³⁵Erekowah mihnyan hehma ate rakseppa tatlahma ngatwah, “Tattan en, atema Ilija rooeka!”

³⁶Thinkuwah wathe chhoanka lahma jochupli pongpe noap pa angurti chhihnâng rumkat lahma thankah rako hetwah. Erediko atema Jisu thunkhoap ko tupsuhwên kolahma ngatwah, “mamêngtan! Thatsûtan e, Ilija kalahma bãngphak khokowah chenjâpe karale!”

³⁷Jisu chaanmõang raksep lahma ritwah.

³⁸Jisu ritdiko Rangsoamhum kowah khet tintahpa rangkhoh pumma daphang tôko khaniirãng khâjâwah.

³⁹Bãngphak mathah ngekowah cheplahma dangtah Sipâhi sahhab pumma Jisu chenroh riitah a erepa khewah. “Are mihnyan pa linlinjô Joban Chha dângwah!” ngama atema ngatwah.

⁴⁰Dihiak khuthe hahtaangma sùlahma dângwah. Are dihiaknyu heh, Mariam Makdalani, Jems le Josepnii nyong Mariam, ngale Salomi dângwah.

⁴¹Jisu Galili nãng dângpoatko thinma Jisu diko junkhoam lahma atenâng chohsok wah. Ajahthem dihiaknyu ate demko Jeroselem nãng johkatak hehmin dângwah.

Jisu Mangbin

(Mathiu 27.57-61; Luk 23.50-56; Jon 19.38-42)



⁴²⁻⁴³Sanhêmthah ko Arimatha wah Josep hokkhôm hokwah. Atea Jews heh Ngoang awang chhangko dâlemlî mihnyan dângwah, ngale atema Joban Hahsôngpa chenthu hokmin a ngama bemla lahma tôngte dângwah. Erejâpa khoakhêm rangwojâ dângwah (erepa Pientông majâpa dângwah), Ephumma Josep lechei thangma Pilat tânâng wãng lahma atewah Jisu mangpa thâwângwah.

⁴⁴Jisu riitah ngama tatlahma Pilat patrit rewah. Atema sipâhi dong heh roolahma Jisu ritpa taangtahne ngama thôngphâ wah.

⁴⁵Sipâhi dong hehwah ngin chohtat diko Pilat ma Jisu mangpa tape chhoan o ngama ngatwah.

⁴⁶Josep ma khet kephû lahma mangpa jâtôanwah, ngale khetko doap lahma longrãwah thutwah mangrukko rukatwah. Erediko atema mangruk kenpa long kêsekma sekwah.

⁴⁷Mariam Makdalani ngale Josep nyong Mariam niima Jisu mangthien ekapa jesokwah.

Mak 16

Angakhîn

(Mathiu 28.1-8; Luk 24.1-12; Jon 20.1-10)

¹Pientông rangwo rãdiko, Mariam Makdalani, Jems nyong Mariam, ngale Salomi hehma tientumli heh Jisu mangko hutkat kohrãng riakwah.

²Dobatjâ rangkhah rangkho, sanhông rienrienko, thin mangruknâng katwah.

³⁻⁴Thin lemko jabmînwah, “Mangrukken wah longkâsek pa henma laangphê kohmin a?” (Erepa long dôngmõang dângwah.) Erediko thinma sũwên tahpa longpa loangphechoan khewah.

⁵Ephum-ma thin mangruk kenko lupka tahpa dekchah ngeko mihwa khetpo keplahma tonglahma khewah - ngale eko thin patrit rewah.

⁶Atema ngatwah, “Nekpatrii en,” “Ngama ajet, nema rittek retah Nazarat wah Jisu pa lemsû eken. Atea areko ahotu - ate ngakhintah! Sũtan en, atea aretheko thienwah.



⁷Wăngletma are nginpa ate dijunte hehnâng thôkoh en, ngale piter nângmin thôkoh en: ‘Atea nemako Galili nâng ewăngla a; atema nenâng chenroh thôkohthen a ererăngrăng nema enâng ekhe en.’”

⁸Ephumma hungnâng tungmaang ngale chei, nungma mangruk wah loatchhoan wah. Thinma hennâng min chenjô thôkoh ho, chenrăngma ngako, thin chei rewah.

NGINKONG SEN APĂ PA THÔANTHÔ

(16.9-20)

Jisu Mariam Makdalani Tâko Hongwah

(Mathiu 28.9, 10; Jon 20.11-18)

⁹[Jisu ritwah ngakhîn diko, Dobatjâ rangkhah rangkhoko atema juchhih wanengit junlo kotah Mariam Makdalani tâko khebâng thôn hôngwah.

¹⁰Mariam Makdalani wăng lahma ate dijunte hehnâng thôkoh wah. Thin sep ajoang lahma dăngwah;

¹¹ngale chenthu thinma Mariam Makdalani wah Jisu ahîn, ngale ate memin khetah ngama chohtatko, thinma atenâng pute ho.

Jisu ate Dijunte Wani Tâko Hongwah

(Luk 24.13-35)

¹²Arediko, ate dijunte waniipa thin diaknâng wâng lemko ateni demnâng khemawah răngrăng ledang hôngwah.

¹³Ate niima ngakka lahma ahan hehnâng thôkoh wah, phumma erehehma ateni nângmin pute ho.

Jisu Echhi Wathe Tâko Hôngwah

(Mathiu 28.16-20; Luk 24.36-49; Jon 20.19-23; Moatlem 1.6-8)

¹⁴Khedithôn ko, Jisu ate dijunte echhi wathêpa phhekchhah chhahthuko thintâko hôngwah. Atema thinnâng ritngatwah, chenrăngma ngako, thinnâng putedâlem aho dăngwah, ngale atea ahînma khetih ngama thôkohte hehnângmin lepute thangma thinhungpa chejâwah.

¹⁵Atema thinnâng ngatwah, “Hahtokkhoh phangtang nâng chhoanletma nginkongsen pa chentô mihnyan hehnâng phoangthôkoh en.



¹⁶Henhenma putedâlem lahma baptijem kep eka ereheh khope chohmin; henhenma lepute dangeka ereheh kho lepemin.

¹⁷Putedâlemte hehnâng patritli moatlem moatrăng chaan kohmin: thinma ngamîngo juchhihmin junloatmin; ngale thinma ajatjat jabmemin ejabwak a;

¹⁸thinnâng pûma mekak akomin, ngale bîmejô memen akomin letâmin; thindekma khunte hehnâng sahlo lahma rangmesoam koh ako khunte heh esen a.”

Jisu Rangkhethung nâng Toansietwên

(Luk 24.50-53; Moatlem 1.9-11)

¹⁹Teso Jisu thin demnâng jabmîn diko, atea rangkhethung nâng toansietwên lahma Joban dekchahko tîngwăngwah.

²⁰Dijunte heh chhoan lahma chentô thenâng Joban nginkongsen pa phoangthô chhoanwah, ngale thin demnâng Teso Juma johmoatwah, ngale thinma patritli moatlem moeka junko thinma phoangthô eka Nginkongsen pa toangtang nginkong ngama putewah.

AHAN NGIN PĀ THÔANTHÔ

(16.9-10)

⁹Dihaknyu heh piter ngale ate lemru heh tânâng wăng lahma thinma khetah heh roanche thôkoh wah.

¹⁰Arediko Jisu ate dedema Asâthôn ngale roantang roanjêng ahîn khope Nginkong pa ate dijunte heh junma sankatma sannyup nâng phoangthô chhoanthuk wah.]



Luk

Luk 1

¹Ngama nyahrãng ahun Thiofilas: Ajahthem mihnyan hehma nitânâng chenni dangtah a erengin heh raangthienrãng thatphungwah.

²Khebâng thuma areheh khelahma Joban nginkongsen pa phoangthôte hehma ninâng thôkohthi ngin heh jôba thinma raangthien eka.

³Adongthôan Thiofilas, chenrãngma ngako, ngama are ngin heh khebeng mejô senthemthem lâthat sûtantek. Phumma nangrãng khophen lemphen raangkohpa asen edanga ngama thonghun ekang.

⁴Ngama are raang ekãngpa nangnâng hethô thoheh nangma phangtang toangtang ngama chenjet o ngama raang ekang.

Jon Baptis Chhat Nginpa Loatthô

⁵Hirots pa Judia Lowang dâng sanpoatko, soam aroakte wathe ate mînpa Zakaria ngama dângwah, atea soam aroakte jat Abija kuwah dângwah. Ate tangnyu mînpa Ilijabet dângwah; atemin soam aroakte kuwahjô dângwah.

⁶Atenii wanii niijô Joban mitsokko asen dângwah, ngale Joban Niemarang ngale Hôkum hehmin senthemthem kepwah.

⁷Thin a chhuho chhaho dângwah, chenrãngma ngako Ilijabet pa chhaho dângwah, ngale atenii waniinii nyahrãng wiku teka dângwah.

⁸Jâthenâng atema soam aroak moatlem moatpan jâko Zakaria ma Rangsoamhum ko soam aroak lahma dângwah.

⁹Soam aroakte heh Niem junko, thinma tanlahma Zakaria pa chaamko wenkhuh tûmrok kohrãng renwah. Ephumma Zakaria Teso Rangsoamhum ko wângwah,

¹⁰Wenkhuh pa tûmrokkoh sanpoatko rangsâ wah mihnyan hehma rangsoam wah.

¹¹Atema wenkhuh tumrokkoh eka chaam dekchah ngeko rangkethung wah Teso ngintatte ate tâko hôngchep katwah.



- ¹²Chenthu Zakaria ma ate kheko, patrit ngale chei rewah.
- ¹³Phumma rangwah ngintatte pumma atenâng ngatwah, “Zakaria, nekchei! Joban ma nang rangsoam pa lâtattho, ngale nang tangnyu Ilijabet ma delachha echha a. Nangma ate mînpa Jon ngama mînmin.
- ¹⁴Chenthu atema naa mechha tahko, nang chentô khuhah nâhah dângmin a, ngale ahan mihnyan hehmin ajahthem khuhah nâhah edanga!
- ¹⁵Jon pa Teso mitsokko adong edanga. Atema khem ngale lihân amok aleklimin lejok phhekchhah min. Ate achhat mejû Asâthôanju demnâng echha a,
- ¹⁶ngale atema ajahthem Isrial mihnyan heh Teso Joban tânâng engaksiet hûa.
- ¹⁷Atea Teso mako ekala a, ngale atea Ilija mǝng rǝngrǝng chaanwin edanga. Atema wa achha heh ethe ngakroapsiet a; ngale ngin lekepte mihnyan heh toangtang lemkhôko engak thonghun thuk a; ngale atema mihnyan heh Teso rǝngma khoakhem lahma ethienkoh a.”
- ¹⁸Zakaria ma rangkethung wah ngintatte ko ngatwah, “Ngama nang nginpa toangtang ngama chenroh jienjetmin a? Nga a teka lâdangtek, ngale nga tangnyu pemin wiku lâdangtah.”
- ¹⁹Ngintatte ma dânthâng wah, “Nga a Gabarial,” “Nga Joban tâko chep ekang, atema are nginsen pa nangnâng thôkoh rǝng chienkat ehang.
- ²⁰Rohkomin nangma nga nginko putemoh, arepa sanpoat methang tahko toangtang edang kara. Nangma lepute dângdi, nangma jab lejienjâb dângmin; Ngama nangnâng toamhoan eki rangwopa linlin madang dangkako nanga jabmuhma dângmin.”
- ²¹Ngale mihnyan hehma Zakaria Rangsoamhum ko aretô chenrǝngma lektong eka ngama sekmah lahma bemwah.
- ²²Ngale chenthu ate Rangsoamhum kowah loatkhoam katko, atema mihnyan hehnâng jienranjab tuho. Phumma atema Rangsoamhum khenko thânkhe



lâretah ngama mihnyan hehma thônghun wah. Atema khapthe tumin lejien jabtu thangma mihnyan hehnâng atedekma thak amak kohwah.

²³Chenthu atema Rangsoamhum ko soam aroak sanpoat pa râphumma, Zakaria ate humnâng ngakkatwah.

²⁴Erediko ate tangnyu Ilijabet ma naawun lahma humwah leloat thangma dâjeng bangâ humko tôngwah.

²⁵Ilijabet ma ngatwah, “Teso ma nganâng chohsû ehang,” “ngale mihnyan nyuchha mitsok wah nga rêsêpa lâre phekohthang!”

Jisu Chhat Ngjin Loatthô

²⁶Ilijabet ma jeng erok naawun poatko, Joban ma rangkhethung wah ngintatte Gabarial pa Galilijaa wah Nazarat hahko chienkatwah.

²⁷Atema janchhônnya wathe Devit Lowang pôali Josep demnâng kepminrãng kahkhetmîn choanko ngin thôkat kohwah. Janchhônnya mînpa Mariam dângwah.

²⁸Rangkhethung wah ngintatte pa ate tâko kalahma Mariam nâng ngatwah, “Khuhah nâhah dango! Teso pa nang demnâng, ngale Teso ma nangnâng rangkoh eho!”

²⁹Joban ngintatte ma thôkoh nginko Mariam nyahrãng tungmaangwah, ngale arepa chenni junko ngaeka ngama nyahrãng patritwah.

³⁰Joban ngintatte ma atenâng ngatwah, “Mariam, nekchei o; Joban ma nangnâng nyahrãng mînchen eho.

³¹Nangma naawun lohma delachha echhao, ngale nangma ate mînpa Jisu ngama mînmin.

³²Atea adong dângmin, ngale achoang thônwah tângte Joban Chha ngama roomin. Ate te awa Devit dangtah rãngrãng Teso Joban ma atemin Lowang edangthuk a,

³³ngale atea Jakob pôali hehrãngma roantang roangjêng rãng Lowang edanga; ate Hahsông pa chenthumin leta thônmin!”



³⁴Mariam ma rangkethung wah ngintatte ko ngatwah, “Nga a janchhô asâthu. Arepa chenroh jiendângmin?”

³⁵Rangkethung wah ngintatte ma dânthâng wah, “Asâthôanju nangkhoh ko ekara, ngale Joban chaanpa nangkhohko etong kara. Erohwah Asâthôan Naachha pa Joban Chha ngama ngatmin.

³⁶Nang tang amang Ilijabet nâng thatthong hun tan. Ate memin naa tachha tumek ngatwah, rohkomin atea atô wikujô medan akomin athângheh dâjeng erok naawun lâdangtah,

³⁷Chenrãngma ngako Joban ma letamoli chenjô aho.”

³⁸Mariam ma ngatwah, “Nga a Teso haa,” “Nangma ngaeko rãngrãng nganâng chendang hang.” Ngale erediko ngintatte pa ate tâwah chhoanwah.

Mariam Ilijabet Tanâng Hok

³⁹Erediko lemlienma Mariam chep achã lahma hahkong hahla diak Judia wah wanthe hahnâng wângwah.

⁴⁰Atema Zakaria humko wãng lahma Ilijabet nâng rânjab wângwah.

⁴¹Chenthu Mariam ma rânjabpa Ilijabet ma tatko, ate wokkhen wah naachha pa phôngwah. Ngale Ilijabet nâng Asâthôanju mênchong dângwah

⁴²ngale Ilijabet ma chaanmõang ma ngatwah, “Nanga chentô dihiak khuchhang kowah rangkepte thôn, ngale nangma wun eko naachha pemin rangkepte!

⁴³Nga Teso nyong pa nga tâko hûlahma chohmînhu ehang, atôdông chenrãngma nga tâko hûera?

⁴⁴Chenrãngma ngako nangma rânjabpa tatrienrien nga sekkhen wah naachha pa khuhah ma toak eka.

⁴⁵Nangnâng Teso ngewah ngin kathapa toangtang dângmin ngama putedâlemdi nangma rangkep eko!”

Mariam ma Joban nâng Rôse Sêwah

⁴⁶Mariam ma ngatwah, “Ngahungma Teso nâng rôeka;



- ⁴⁷Joban nga Pângte junma ngaju rinroan eka,
- ⁴⁸Chenrãngma ngako nga a ate haa arinchha thôn wathe phumma atema nganâng chhemhun ehang! Adephumma chentô mihnyan ma nganâng rangkepte ngama roomin,
- ⁴⁹Chenrãngma ngako achaanthôn Joban ma ngarãng adongthôn mokoh ehang. Ate mînpa Asâthôn;
- ⁵⁰Rôanthe kowah rôanthe ko atenâng soam atôte hehnâng atema mînchen eka.
- ⁵¹Atema ate dek achaanthôn pa loatsiet eka, thin hungnâng ngam poarii lahma themawa eka heh phansietkoh eka.
- ⁵²Atema lowang chaan ahang heh thin tângthin kowah jâsiet eka, ngale mihnum mihne heh choangpe eka.
- ⁵³Joban ma rêmritte mihnyan hehnâng asenli chhahthuk lahma wokphoatthuk eka, ngale techhu heh dekphi phâwat chhoan thuk eka.
- ⁵⁴Atema nãngte nãngwa hehnâng toamsem tahpa toangtang dângwah, ngale ate haa Isrial mihnyan heh chohsok rãng kaera.
- ⁵⁵Atema Abraham nâng mînchen khesok rãng thônghun wah ngale ate pôali chentô nângmin roantang roangjêng rãng mînchen khesok rãng thonghun eka!”
- ⁵⁶Mariam Ilijabet demnâng jengrem johtông diko ate humnâng ngakktwah.

Jon Baptis Chhat Ngîn Loatthô

- ⁵⁷Ilijabet ma ate chhachhat sanpoat hokwah, ngale atema delachha chhatwah.
- ⁵⁸Ate demnâng Joban pa patritli sen ekapa ate tok akhung wah mihnyan heh ngale tangkâ humkâ hehma chohtatwah, ngale thinkhu phangtang ate demnâng johrôn wah.



⁵⁹Chenthu naachha pa haptathe dâng phumma, thinma khoankhen niemhôn rãng hokwah, ngale thinma ate mînpa atewa mîn demko Zakaria ngama mîn rãng phungwah.

⁶⁰Phumma ate nyongma ngatwah, “Eroh lemînmin! Ate mînpa Jon ngama mînmin.”

⁶¹Phumma thinma ate nyongko ngatwah, “Arepa ne tangkâmîn dangmah!”

⁶²Erediko thinma atewako nangma naamînpa chenroh mîn hun eko ngama thak amak lahma chhienwah.

⁶³Zakaria ma nyapraang thin thalahma raang kohwah, “Ate mînpa Jon.” Phumma thin nyahrãng patrit wah!

⁶⁴Ere sanpoat poatko Zakaria jienhong jabwah, ngale atema Joban nâng rôwah.

⁶⁵Tok akhung wah mihnyan heh phangtang chei rewah, ngale erengin pa hahkong hahla diak Judia phangtang khêmtatwah.

⁶⁶Are ngin chohtatte chentôma thinhung nâng thonghun lahma chhienwah, “Are naapa chenroh hongdôngmin a?” chenrãngma ngako Joban chaanpa ate khohko tongeka.

Zakaria ma Profisi Hôn

⁶⁷Jon wa Zakaria pa Asâthônju mênchong danglahma atema Joban ngin loatthôwah:

⁶⁸Teso Isrial heh Joban nâng rôe! Atema ate mihnyan hehnâng chohsok rãng kaera, ngale atema thin pepâng eka.

⁶⁹Atema ate haa Devit pôali wah, nângnâng Pângte chaanthôn kohehi,

⁷⁰Atema ate mông asâ heh junma khema thuma toamsêm wah

⁷¹Atema nângran hehwah pepângmin, Nângnâng chhichohte chentô hehwah epânghi.



⁷²Atema nãngte nãngwa hehnâng mìnchente ngama ngaeka ngale atema asâma toamsem tahpa thonghun eka.

⁷³⁻⁷⁴Atema nãngte nãngwa Abraham nãng toamsêm wah Atema nãngan hehwah pepângrãng toamsêm wah ngale lechei lewãn thangma atenâng soamtôthuk ehi,

⁷⁵erohwah ate mako nãng asâ ngale toangtangma nãng roandông dôngtang dângmin.

⁷⁶“Nanga ngachha, nangnâng achoang thônwah tângte Joban mông ngama ngatmin. Nanga Teso mako wãnglohma ate lempiak kohmin,

⁷⁷ngale thinpap heh map kohlahma thin khopemin, ngama nangma ate mihnyan hehnâng thôkohmin.

⁷⁸Nãng Joban pa hun achette ngale mìnchênte Joban. Atema nãng khope pa rangkhah sanphiak rãngrãng nãngkhoh nãng ehongthuk a

⁷⁹rangnyek ngale rit amah thenâng sôngte chentô nãng atema rangkhethung wah ephiakkat thuk a, ngale atema nãngnâng mêmemo moatlem emothuk hi.”

⁸⁰Naapa donglahma phoang aroang ngale Ju amoang nãngmin achaaan dângwah. Atea Isrial nok atang heh anga nga mathahko hôngloat mako sehakhoh nãng sôngwah.

Luk 2

Jisu Chhat Ngin

(Mathiu 1.18-25)

¹Augustas pa Chofa dângpoatko Roman Chofa khenwah chentô diakwah mihnyan heh khoroakweih rãng chienwah.

²Chenthu khebângrãng mihnyan heh khoroakweih poatko, Kurinas pa Siria diakko Govono dângwah.

³Anga ngama mâmâ nok ahah nãng khoroakweih lahma mìnraangrãng chhoanwah.



⁴Josep min Galilijaa Nazarat hahnâng katwah, erehahpa Devit Lowang chhat hah Judia diakwah Bethlehem nâng katwah. Josep pa Devit pôali dângjunko erehahko katwah.

⁵Atea Mariam demnâng katwah. Mariam pa ate demko kepmînřang ngama kahkhetmîn choan dângwah. Phumma Mariam pa naawun dângwah,

⁶ngale thin a Bethlehem nâng dângpoatko Mariam ma ate chha chhatrâng sanpoat pa thângwah.

⁷Mariam ma ate khhepho chha pa chhatwah. Ngale atema khetko doaplahma mânhoko jupthukwah - chenrângma ngako thin tôngrâng humkhen nâng the aho dângwah.

Saaksokte ngale Rangkhethung wah Joban Ngintatte

⁸Ere diakko saaksokte khuthe thin saak heh sok nungma pitnâng rangpen jemlahma dângwah.

⁹Rangkhethung wah Teso ngintatte thintâko hôngkatwah, ngale Teso chaanpa thin khohko phiakkat wah. Thin a nyahrâng chei rewah,

¹⁰Phumma ngintatte pumma thinnâng ngatwah, “Nekchei en! Ngama nenâng nginsen thôkoh râng kaerâng, erengin pumma mihnyan heh phangtang khu ehahthuk a.

¹¹Thejâ Devit hahko ne Pângte Chhaeka - Atea Krista Teso!

¹²Ngale nema are junko jet en: Nema naachha pa khetnâng doaplahma mânhoko jupthuk lahma ekhe en.”

¹³Lemlienma rangkhethung wah ngintatte heh jahmõang hong lahma ngintatte demko Joban nâng rôsê sewah:

¹⁴“Rangkhethung choangthôn nâng Joban mîndong thukeka, ngale hahtokkhoh ko hendemnâng ate rinme eka ereheh mêmô chendanga!”

¹⁵Chenthu ngintatte heh thin tâwah chhoan lahma rangkhethung nâng ngakwâng diko, saaksokte hehma wathema wathe nâng jabmînwah, “Bethlehem nâng wãnglihma Teso ma chenni thôkohthia ereheh sũwãnge.”



¹⁶Phumma thin sitsiak wǎng lahma Mariam le Josepnii chohkhe wah, ngale naachha pa mânhoko jupthuk lahma khêwah.

¹⁷Saaksokte hehma naachha pa khêdiko, naachha junma ngintatte hehma thinnâng chenni thôkotah a ereheh thinma thôkoh wah.

¹⁸Saaksokte hehwah ngin chohtatte heh phangtang bârit rewah.

¹⁹Mariam ma erengin heh chhemhun lahma ate hungnâng lulili thônghun wah.

²⁰Saaksokte hehma chentô tattah le khetah heh junma, thinma Joban nâng rôsê selahma ngakchhoanwah; erepa thinnâng ngintatte ma chenroh thôkotah a eroh dângwah.

Jisu Mînmîn wah

²¹Haptathe diko, naachha khoankhen niemhôn rangwo hokphumma, atenâng Jisu ngama mînwah, ere mînpa ate seknâng dângmako rangkethung wah Joban ngintattema kohwah.

Jisu Rangsoamhum nâng Sietkat

²²Mosa Niem junko Josep le Mariamnii seksâsietrit niemhôn sanpoat pa hokwah. Erohwah atenii ma naachha pa Jeroselem nâng Teso tânâng sietkatwah,

²³Teso Niem nâng raangeka rǎngrǎng: “Chentô khhepho chhapa Teso mîngo rangsoam lahma araangraang Joban moatlem moatte dângrǎng thienmin.”

²⁴Thinmemin Teso Niem junko, phari ba phari rǎngrǎngjat wochha wannii Joban mîngo kohrǎng katwah.

²⁵Ere sanpoatko mihwa wathe ate mînpa Simon ngama Jeroselem nâng songlahma dângwah. Atea mihnyansen ngale Joban rancheite mihnyan dângwah. Ngale Joban ma Isrial mihnyan heh pepângrǎng katpa bemla lahma dângwah. Asâthôanju pa ate demko dângwah

²⁶ngale Teso ma toamsem tah Misaia pa lekhema nanga leriimin ngama atenâng ngatwah.



²⁷Juma sietwên lahma, Simon Rangsoamhum nâng wãngwah. Chenthu nyong awa niima naachha Jisu pa Rangsoamhum nâng niem junko aterãng niemhôn kohrãng sietwênko,

²⁸Simon ma naachha pa ate dekko pelahma Joban nâng dangkoh a ngatwah:

²⁹“Teso, ade phumma nangma toamsem tohpa linlin lâdangtah, ngale nang haapa rinmeme tariithuk o.

³⁰Ngadede mitma nangwah khopepa lâchoh khetek,

³¹Erepa nangma chentô mihnyan nyuchha heh mathahko khoakhem eko:

³²Atea Jews ledangte jat hehnâng nangma hun eko moatlem pa loatkhesokte wen ngale nang mihnyan Isrial heh mînsenthuk eka.”

³³Naachha junma Simon ma jab ekapa tatlahma ate nyong awanii bârit rewah.

³⁴Simon ma thinnâng rangkoh lahma ate nyong Mariam nâng ngatwah, “Are naachha pa Joban ma ren eka, ate junma ajahthem Isrial mihnyan chhihjâmin erea ngale khopete min ehonga. Atea Joban wah ngama jetrãngma ajahthem mihnyan hehmate lelatnâng echhihjab a

³⁵ngale thin hungkhen nâng huhthonghun eka heh eloathôkoh a. Ngale dangnahma nedede mongtoh pumma liensuhwah rãngrãng ere rekwah nehung elien chhihhèn.”

³⁶⁻³⁷Nyahrãng wiku môngnyu wathe dângwah, atea janthoinyu ngale ate mînpa Ana, Phanuil chha dângwah. Ngale ate Ashar jat dângwah. Ate tangwa demko pâengit lolo roamsông diko ate tangwapa ritwah, phumma atea erepoatko roak eset pâbelii rangpâ dângwah. Ate Rangsoamhum kowah leloat thangma; rangwo rangnyek phhekchhah lechhah thangma Joban nâng rangsoam lahma dângwah.

³⁸Ere sanpoat poatko ate hukhoam hûlahma Joban nâng dangkoh a ngatwah, ngale Joban ma Jeroselem pêsietrãng bemlâte mihnyan heh tâko atema naachha junma jabwah.



Nazarat nâng Ngakkat

³⁹Teso Niem junko moatthin moatlem heh phangtang râmoat diko, Josep le Mariamnii thin hah Galilijaa wah Nazarat hahnâng ngakkatwah.

⁴⁰Naapa donglahma chaanthepthep dângwah; ngale atenâng buthi mongthemsen hehmin jêngjah jahhong dângwah, erediko Joban mînchen pemin ate khohko dângwah.

Letachha Jisu pa Rangsoamhum nâng Hok

⁴¹Rangpâ roakweih Jisu nyong awa heh Jeroselem nâng Adankhoam lokuh rãng katwah.

⁴²Chenthu Jisu echhi pânii dângko, jâhan pâhan wah rãnggrãng lokuh rãng katwah.

⁴³Chenthu lokuhpa râphumma thinhumnâng ngakwâng wah, phumma letachha Jisu pa Jeroselem nâng tângtôngwah. Phumma arepa ate nyong awa hehmate lejet dângwah;

⁴⁴Ayong awa hehmate atea thinkhuchhang kojô edangthem a ngama thônghun wah, erohwah ngihjeng khoam diko thintang amang ngale lemru lemchha heh chhangko phoanglemsok wah.

⁴⁵Thinma lechohlem dâng phumma, Jeroselem nâng ate lemsokrãng ngakkatwah.

⁴⁶Jârem jâko Rangsoamhum nâng Jews heh Niemarang hethôte heh demko tonglahma thin ngin jetat ngale thinnâng ngin heh thônghphâ relahma chohkhe wah.

⁴⁷Atema ngin heh chhemlala dânthâng junko ate ngin chohtatte heh bârit rewah.

⁴⁸Chenthu ate nyong awa hehmate ate chohkheko bârit rewah, ngale ate nyongma ngatwah, “Echha, nangma ninâng chenrãngma aroh hân ehia? Nangwa chenii nang chohlem ele ngama nyahrãng lâpatriitih.”



⁴⁹Jisu ma dânthâng wah, “Nema nga chenrãngma lemsû eha? Nema nga Ewa Humnâng edanga ngama jet hone?”

⁵⁰Phumma Jisu ma danthang eka nginpa thinma jetwak ho.

⁵¹Ephumma Jisu thin demnâng Nazarat nâng ngakwâng wah, ngale enâng thin nginkepkep danglahma tôngwah. Are chentô ngin heh ate nyongma hungnâng thienwah.

⁵²Jisu phoang aroang ngale buthi mongthem nâng adông rewah, erediko Joban memin ngale mihnyan hehmemin atenâng sênchohwah.

Luk 3

Jon Baptisma Joban Ngin Phoangthô

(Mathiu 3.1-12; Mak 1.1-8; Jon 1.19-28)

¹Ere sanpoat pa Tiberias Chofa ma echhi pângâ pên sanpoat dângwah; Pontas Pilat pa Judia Govono dângwah, Hirot pa Galili pên dângwah, ngale ate naa Filip pa Ituria ngale Trakonitas nii pên lahma dângwah,

²ngale Anas le Kaipas nii soam aroakte adongthôn dângwah. Ere sanpoatko sehakhô nâng Zakaria chha Jon nâng Joban wah ngin hokwah.

³Ephumma Jon ma Jordan jokemwah chentô diak hehnâng Joban ngin phoangthô kohwah, “Ne papwah hungngaklit letma baptijem kepen, ngale erohkoba Joban ma nepap heh map ekohhên.”

⁴Mông Isaia ma raangwah titab nâng aroh raangeka: “Sehakhô nâng wathe mihnyan phoangrak eka: ‘Teso rãngma lempiakkoh en; ate khoamrãng lemtin hôankoh en!’

⁵Hahkhoanglu chentôpa junsietmin, Hahkong hahla chentôpa thungsiet rêmin. Lemkoang lemnoang chentôpa tinsiet rêmin, ngale chentô lemchhih heh junsiet rêmin.

⁶Mihnyan nyuchha chentôma Joban wah khoe pa echohkhe a!’ ”



⁷Mihnyan heh jahmõang Jon tânâng baptijem keprãng hokwah. Atema thinnâng ngatwah, “Pû heh!” “Joban ma chienhokrãng ngaeka chêmkawah ne etape en ngama henma thôkoh ehèn a?”

⁸Nepap moatlem wah hunglittah ngama kheli moatlem mo en. Ngale Abraham pa nete newa dângwah ngama nededema nekthonghun riitu en. Ngama nenâng thôkoh eka, Joban ma are long heh wahmin Abraham chhuchharãng tahôan a!

⁹Wâka pumma bãngpa thong arinma joatpherãng ngama thienlahma tonga; penri risen leribãng chentôpa runjoat lahma wennâng thhekmin.”

¹⁰Mihnyan heh ma atenâng thôngphâ wah, “Eroh medang ako nima chenremin a?”

¹¹Atema dânthâng wah, “Henhen nâng chhemchong khanii tonghèn a khathe pa ahoteko koh en, ngale henhen nâng phhekchhah tong ehèn a erepa phenphhek chhah re en.”

¹²Thãkho thâte khuthe baptijem keprãng hûlahma atenâng thôngphâ wah, “Hethôte, nima chenremin a?”

¹³Atema thinnâng thôkoh wah, “Nema chentô thâthin a erenoma abâm nektha en,”

¹⁴Sipâhi khuthe memin atenâng thôngphâ wah, “Nia chenroh a? Nima chenremin a?” Atema thinnâng ngatwah, “Henwah min ledangli wah ngun neknyen en, ngale ledangli nâng mih neksekham en. Nema dâjeng ngun choh ekenko rinme letma tongen.”

¹⁵Mihnyan heh ma Misaia katpa nyahrãng ngiak lahma dângwah, phumma Jon pa Misaia madanglah o ngama thonghun lahma patrit wah.

¹⁶Ephumma Jon ma thinnâng ngatwah, “Ngama Joma baptijem koheka, rohkomin nganoma abâmbâm adongpa ekara. Nga ate daphâng putkoahrãng memin punmek. Atema Asâthôanju ngale wenma baptijem ekohhèn.



¹⁷Ate deknâng ate wênkhoang tonga, erepumma chhah heh phangtang chaaplahma chhahsek sekpa ate chhahpum nâng ekhânthien a; ngale chhahpha thoak heh atema chenthumin lemutthin wenko ethhek a.”

¹⁸Jatrup ngema Jon ma Joban nginpa mihnyan hehnâng thôkoh wah, ngale thinnâng hunglit rãng rîn akhahwah.

¹⁹Rohkomin Jon ma Govono Hirot nâng nyahrãng ritngatwah, chenrãngma ngako Hirot ma atena tangnyu Hirodik pa ate tangnyu rãng kepwah, ngale atema lihânmin ajahthem chhihmoat wah.

²⁰Erediko Hirot ma ahan achhihthoan wanthe moatwah, arepa atema Jon phâtek nâng loatkheh wah.

Jisu Baptijem Kep Ngin

(Mathiu 3.13-17; Mak 1.9-11)

²¹Mihnyan heh phangtang baptijem tâkoh diko, Jisu nângmin baptijem kohwah. Atema rangsoam poatko rangkethung pa laangwah,

²²ngale Asâthôanju phariwo rãngrãng danglahma ate khohko tôngkatwah. Ngale rangkethung wah jabkhab hôngjab katwah, “Nanga ngama nyahrãng ahun nga Chha. Nga nangdemnâng rinme ekang.”

Jisu Te Awa heh

(Mathiu 1.1-17)

²³Chenthu Jisu ma ate moatlem heh bângmoat poatko atea rangpâ roakrem dângwah. Mihnyan heh ma atea Josep chha ngama thonghun wah. Josep pa Hali chha,

²⁴Hali pa Mathat chha, Mathat pa Levi chha, Levi pa Malchi chha, Malchi pa Jannia chha, ngale Jannia pa Josep chha,

²⁵Josep pa Mathatias chha, Mathatias pa Amos chha, Amos pa Nahum chha, Nahum pa Esli chha, Esli pa Nagai chha,

²⁶Nagai pa Maath chha, Maath pa Mathatias chha, Mathatias pa Samain chha Samain pa Josach chha, josach pa Joda chha,



- ²⁷Joda pa Joana chha, Joana pa Rasa chha, Rasa pa Zerubabal chha, Zerubabal pa Sialtial chha, Sialtial pa Nari chha,
- ²⁸Nari pa Malchi chha, Malchi pa Adi chha, Adi pa Kosam chha, Kosam pa Elmadam chha, Elmadam pa Er chha,
- ²⁹Er pa Josua chha, Josua pa Elizar chha, Elizar pa Jorim chha, Jorim pa Mathat chha, Mathat pa Lavi chha,
- ³⁰Lavi pa Simon chha, Simon pa Juda chha, Juda pa Josep chha, Josep pa Jonam chha, Jonam pa Eliakim chha,
- ³¹Eliakim pa Malai chha, Malai pa Manna chha, Manna pa Matatha chha, Matatha pa Nathan chha, Nathan pa Devit chha,
- ³²Devit pa Jisi chha, Jisi pa Obad chha, Obad pa Boz chha, Boz pa Salmon chha, Salom pa Nahson chha,
- ³³Nahson pa Aminadab chha, Aminadab pa Admin chha, Admin pa Arni chha, Arni pa Hazron chha, Hazron pa Paraz chha, Paraz pa Juda chha,
- ³⁴Juda pa Jakob chha, Jakob pa Isak chha, Isak pa Abraham chha, Abraham pa Tarah chha, Tarah pa Nahor chha,
- ³⁵Nahor pa Sarug chha, Sarug pa Rau chha, Rau pa Palag chha, Palag pa Ebar chha, Ebar pa Sila chha,
- ³⁶Sila pa Kainan chha, Kainan pa Arphaxad chha, Arphaxad pa Sim chha, Sim pa Noa chha, Noa pa Lamih chha,
- ³⁷Lamih pa Mathusila chha, Mathusila pa Inok chha, Inok pa Jarad chha, Jarad pa Mahalalil chha, Mahalalil pa Kanan chha,
- ³⁸Kanan pa Inos chha, Inos pa Sith chha, Sith pa Adam chha, Adam pa Joban chha.

Luk 4

Jisu Hungtôan
(Mathiu 4.1-11; Mak 1.12, 13)



- ¹Jisu Jordan wah Asâthôanju menchoang ngakwâng wah, ngale Juma seahkho nâng sietchhoan wah,
- ²Enâng juchhih ma jâroakbelii hungtôan wah. Ere sanpoatko atema chennimin phhekchhahho, phumma chenthu erepa râdiko ate rêmritwah.
- ³Juchhih ma atenâng ngatwah, “Nanga Joban Chha medang oko, are long hehnâng bankênrăng litjârăng chien o.”
- ⁴Phumma Jisu ma dânthâng wah, “Joban nyapraangma ngaeka, ‘Mihnyan nyuchha pa phhekchhah loloma hîn ajô dangmah.’ ”
- ⁵Erediko juchhih ma wanthe thechoang khonâng sietwên lahma dekkhîn nyekko hahtokkhoh wah chentô hahsông heh atenâng khesokwah.
- ⁶Ngale juchhih ma atenâng ngatwah, “Ngama are chentôpa nangnâng kohlihma lowang rângrăng epênthuk e,” “Are chentôpa nganâng lâkoh thang, ngale ngama hennânghun ekanga ereko ngama areheh phangtang takoh ang.
- ⁷Phumma, nangma nganâng rangmesoam hangko, areheh phangtang nangrăng dângmin.”
- ⁸Jisu ma dânthâng wah, “Joban nyapraangma ngaeka, ‘Teso nang Joban nâng lolo soam o, ngale atelolo toak asân o!’ ”
- ⁹Erediko juchhih ma Jeroalem wah Rangsoamhum wah choangthôn ko sietwên lahma atenâng ngatwah, “Nanga Joban Chha medang oko, nangdede arekowah jâriikao.
- ¹⁰Chenrăngma ngako, Joban nyapraangma ngaeka, ‘Joban ma rangkhethung wah ate ngintatte hehnâng nang tângloatrăng echien a.’
- ¹¹Erediko aroh ngalahma memin tonga, ‘thinma thindekko nang etângloho, erohwah nangda pa longko lebhrii edango.’ ”
- ¹²Phumma Jisu ma dânthâng wah, “Joban nyapraangma aroh ngaeka, ‘Nang Teso Joban hung nektoan.’ ”
- ¹³Chenthu juchhih ma Jisu nâng rongrup ngema hungtôan diko, atema Jisu chhutherăng thiphewah.



Jisu ma Ate Moatlem Galili nâng Bengmoat

(Mathiu 4.12-17; Mak 1.14, 15)

¹⁴Erediko Jisu Galili nâng ngakkatwah, ngale Asâthôanju chaanpa ate demko dângwah. Ate nginpa erekowah diaktang nâng khêmtatwah.

¹⁵Atema Sanagog hehnâng phoanghethô rewah, ngale anga ngama atenâng rôwah.

Jisu Nazarat nâng Thâsê

(Mathiu 13.53-58; Mak 6.1-6)

¹⁶Erediko ate dong alotah Nazarat hahnâng Jisu katwah, ngale jahan rangwawah rângrâng Pientông jâko Sanagog nâng hokwah. Atema Joban nyapraang weihrâng tôanchepwah

¹⁷atenâng mông Isaia titab pa chohkoh wah. Atema nyapraang tenpa jânlahma are raang ekapa chohkhe wah,

¹⁸Teso Jupa ngakhohko tonga, chenrângma ngako atema tangchhih hehnâng Joban nginkongsen pa thôkoh râng ren ehang. Ngale phâtek khennâng khhekrii lahma tângte hehnâng thinlaangphe nginpa thôkoh râng ren ehang ngale mitdoak hehma jienkhe; ngale mihkhennâng chêmte heh loatsiet

¹⁹Ngale Teso ma ate mihnyan heh pepâng sanpoat pa lânamtha ngama thôkoh râng ren ehang.”

²⁰Jisu ma nyapraangpa tenlahma erekowah moatlem chohsokte ko ngakkoh lahma tângthinko tângwah. Sanagog wah chentô mihnyan hehma atenâng sokwah,

²¹ngale atema thinnâng ngatwah, “Ngama are Joban nyapraang weih ekangpa nema lâttattet, erohwah are raang ekapa thejâ toangtang lâdangtah.”

²²Thin chentôma Jisu nâng senchoh wah ngale Jisu ma jabkhabsen jabpa tat lahma bârit rewah. Thinma ngatwah, “Atea Josep chha ledangne?”

²³Jisu ma thinnâng ngatwah, “Ngama ajet are nginthakthô pa nema nganâng engaha, ‘dokter, nangdede mesietriio.’ Ngale ngama ajet nema nganâng Kaparnam nâng chenroh molohma tattih a ererângrâng nenok nehah nângmin mo o ngama echienha.



²⁴Jisu ma thinnâng ngatwah, Ngama nenâng arepa thôkoh eka,” “Mõng hehnâng thinnok ahah wah heh ma putedâlem mah.

²⁵Nga nginko jetat tanha: Arepa toangtang ngin, Ilija mõng sanpoatko Isrial nâng janthoinyu heh jahmõang dângwah, chenthu rangpâ pârem khathe ranglepat dangtah poatko Isrial diaktang remdong remlahma dângwah.

²⁶Rohkomin Ilija Isrial diakwah mihnyan heh tânâng lechien chhoanwah, Sidon diakwah Zarepha hahko sôngte janthoinyu tânâng loloba chienkatwah.

²⁷Ngale mõng Ilija sanpoatko Isrial nâng ajahthem mihnyan heh angêm khoanchet chohlahma chêmahma dângwah; rohkomin wanthejô senho, Sirien jat Naman loloba angêm khoanchet kowah sênwah.”

²⁸Chenthu Sanagog wah mihnyan heh ma arepa tatphumma thin rinkhah wah.

²⁹Mihnyan heh ma toanchep lahma hahdaang kowah sietphe chhoanwah, ngale thinhah wah hahhokho choangthôn ko sietwênwah. Thinma ere kakho pumma Jisu jâthinkat rãng phungwah,

³⁰Rohkomin mihnyan heh mongtung pumma Jisu loatkhoam chhoanwah.

Mihnyan Wathenâng Juchhih Lup

(Mak 1.21-28)

³¹Erediko Jisu Galili wah Kaparnam hahnâng katwah, ngale enângmin Pientông jâko mihnyan hehnâng hethô wah.

³²Jisu ma hethôpa khelahma thin phangtang bârit rewah, chenrãngma ngako atema chaan demnâng hethô wah.

³³Sanagog khenko juchhih luplahma mihwa wathe dângwah; atema chaanmõang hôngrakwah,

³⁴“O! Nazarat wah Jisu, nangma ninâng chennire hun ehia? Nanga ako ni chhihsietrãng hûeroa? Nanga hen a erepa ngama jet e: Nanga Joban wah Asâthôn nginmatte!”



³⁵Jisu ma juko ngatwah, “Kihtong lohma mihnyan kowah loatchhoan o!” juchhih ma mihnyan pa thinmako loangsiethien lahma atenâng lihân chenjô maksak lehoan thangma loatchhoan wah.

³⁶Mihnyan heh phangtang barii lahma wathema wathe nâng jabmînwah, “Are heh chenni jabeka? Are mihnyan pumma chaan demnâng jablahma juchhihko ngatko, juchhih pa loatchhoan eka!”

³⁷Ngale Jisu nginpa ere diakko phangtang nâng khemchoh tatwah.

Jisu ma Jahmōang Mihnyan Mesiet

(Mathiu 8.14-17; Mak 1.29-34)

³⁸Jisu Sanagog wah loatchhoan lahma Simon humnâng wângwah. Simon tangnyu nyongpa nyahrâng chaankhun lahma dângwah, ngale thinma Jisu nâng ate ngin pa thôkoh wah.

³⁹Jisu wãng lahma khunte jupthin tâko chepwãng lahma khoanchetko atewah loatchhoan o ngama ngatwah. Phumma khoanchet pa atewah loatchhoan wah, ngale lemlienma toansat lahma thinnâng khoakhêm wah.

⁴⁰Sanlup diko māmâ jatjat khoanchetma chêmte heh thin lemruçha hehma Jisu tânâng siethokwah; Chentônâng Jisu ma ate dekma sahlo lahma phangtang mesietwah.

⁴¹“Nanga Joban Chha!,” ngama raklahma melâng mihnyan wah juchhih loatchhoan wah. Jisu ma juchhih hehnâng chennimin jab aja thuk ho, chenrângma ngako thinma atea Misaia ngama jetwah.

Jisu ma Sanagog nâng Joban Nginthô

(Mak 1.35-39)

⁴²Rangwo phumma Jisu erehah kowah loatchhoan lahma mihnyan henjô aho thenâng chhoanwah. Phumma mihnyan hehma ate phoanglêmwah, ngale chenthu thinma chohlem phumma, thindem wah lechhoanthuk turâng thônghûnwah.

⁴³Jisu ma thinnâng ngatwah, “Ngama hahhan hehnângmin Joban Hahsông Nginkongsen pa phoangthô kohmin, are rângma jôba Joban ma nga chienkat ehang.”



⁴⁴Ngale atema erediak kowah Sanagog phangtang nâng Joban nginpa phoangthô kohwah.

Luk 5

Jisu ma Khebângthôn Dijunte Roo

(Mathiu 4.18-22; Mak 1.16-20)

¹Jâthe Jisu Ginisarat Josi kêmko cheplahma dângko mihnyan hehma atewah Joban ngin jetatrăng thinmîn lahma ate tânâng wângwah.

²Atema jophako khôankho phangnii sietthien lahma khewah; Ngahloatte heh khôankhopa phethien lahma thinchaa setphe lahma dângwah.

³Phumma Jisu khôankho phangthenâng chhangwângwah - ere khôankho pa Simon thiak dângwah - ngale atema Simon nâng khôankho pa jopha kowah roanchhe taangthin kathang ngama ngatwah. Phumma Jisu khôankhoko tonglahma mihnyan hehnâng hethô wah.

⁴Chenthu Jisu ma mihnyan hehnâng thôkoh diko, atema Simon nâng ngatwah, “Khôankhopa roanchhe jolunâng thoamkat hang, ngale nang erediko nang lemru nekhuma nechaak pa hatkat en.”

⁵Simon ma dânthâng wah, “Hethôte,” “Nima penliangma phoanghattih rohkomin chenjô chohhatmih. Phumma nangma aroh menga oko, ngama nga chaakpa hatkat ang.”

⁶Thinma hatkattah pa chaakjô lankhajâroh ngah jahmõang chohhatwah.

⁷Ephumma khôankho han wah thinlemru hehnâng chohsûkahi ngama dekma jepwên wah. Thin lemru heh kalahma khôankho wannii joko lânthumjâroh ngah chõngchõng loatwah.

⁸Chenthu Simon Piter ma arepa kheko, Jisu mathahko dakuhtô lahma khupjup lahma Jisu nâng ngatwah, “Teso! ngatâwah chhoan o, chenrăngma ngako nga a papi mihnyan!”

⁹Thinma ngah jahmõang chohloat phumma Simon piter ngale ate demwah heh phangtang bâritwah.



¹⁰Simon lemru Zibidi chha Jems le Jon niimin bâritwah. Jisu ma simon nâng ngatwah, “Nekchei; ade phumma nanga mihnyan loatte dângmin.”

¹¹Thinma khôankho pa jophako sietwên wah, ngale thinma chentôpa phethien lahma Jisu didiko junchhoan wah.

Jisu ma Mihwa Wathe Mesiet

(Mathiu 8.1-4; Mak 1.40-45)

¹²Rekthenâng Jisu wanthe hahdaang nâng dângwah, ere hahdaangko angêm khoanchetma nyahrăng chêm lahma mihwa wathe dângwah. Chenthu atema Jisu kheko, atedede khupjup lahma Jisu nâng roatsep wah, “Hethôte, nangma mehun oko, nangma nga tasâsiet hang!”

¹³Jisu ma ate dekpumma mihwako sahlo lahma ngatwah, “Ngama sâsiet huneki,” “Sâo!” phumma lemlienma mihwa kowah khoanchetpa sâwah.

¹⁴Jisu ma atenâng ngatwah, “Mihnâng hennâng min nekthôkoh, soam aroakte tânâng tintin wângo ngale nangdede atenâng kherii wãngo; erediko anga ngama nanga angêm khoanchet wah lâsâtoh ngama jetrăng Mosa Niem junkowah soam aroak thinpa kohwên o.”

¹⁵Rohkomin Jisu nginpa mihnyan hehma ajah jahba tatwah, ngale jahmõang mihnyan heh Jisu wah nginpa jetat erediko khoanchet hehwah sênrăng ngama hokwah.

¹⁶Rohkomin mihnyan henjô aho thenâng Jisu rangsoam răng chîchhoanwah.

Jisu ma Kôasôte Mihwa Sênsiet

(Mathiu 9.1-8; Mak 2.1-12)

¹⁷Jâthenâng Jisu ma hethô poatko, Galilijaa chentôwah, Judia, ngale Jeroselem wah hûlahma Farasi ngale Niemarang hethôte heh tônghokwah. Ngale Jisu nâng khoanchette heh mesietrăng Teso wah chaanpa kohwah.

¹⁸Mihnyan khuthema jupthinko kôasôte pelahma hokwah, ngale thinma humkhen nâng pewên lahma Jisu tâko thienhokrăng hunwah.

¹⁹Mihnyan heh jahmõang dângjunko thinma humkhen nâng jienpewên ho. Ephumma thinma humkho nâng pewên lahma, suptok khopa rapdoak lahma,



ate jupthinko jupthuk lahma mihnyan heh mongtung pumma Jisu tâko waangphe katwah.

²⁰Jisu ma thinnâng putedâlem pa ajah khelahma, atema mihwako ngatwah, “Ngalemruchha, nangpap heh map lâkohtih.”

²¹Niemarang hethôte ngale Farasi hehma thindede thonghunwah, “Joban thâsê jabkhab jabte are mihnyan pa hen a! Joban ma loloba pap heh map tâkohmin!”

²²Jisu ma thinhung nâng thonghun ekapa jetlahma thinnâng ngatwah, “Nehung nâng arerângrâng heh chenrângma thonghun eken a?”

²³Chenroh ngatpa ala a, ‘Nang pap heh map lâkohtih,’ ngama ngatpa ala ale, ‘Toanchep lohma khoam o’ ngama ngatpa ala a?’

²⁴Mihnyan Chha nâng are hahtokkhoh ko pap map kohrâng chaanwin, ngama nenâng ekhesok a.” Ephumma atema kôasôte mihwako ngatwah, “Ngama nangnâng chien eki, toanchep lohma nang jupthin pelohma humnâng wāngo!”

²⁵Lemlienma mihwapa mihnyan heh tâkawah toanchep lahma ate juptah jupthinpa toanpe lahma Joban nâng rôlahma humnâng wāngwah.

²⁶Mihnyan heh phangtang nyahrâng bâritwah! ngale nyahrâng chei lahma Joban nâng rôwah, thinma ngatwah, “Thejâ nāngma chentô patritli chohkhe ekia!”

Jisu Ma Livi Roo
(Mathiu 9.9-13; Mak 2.13-17)

²⁷Arediko Jisu loatchhoan lahma thākho thâte ate mînpa Livi ate Ofic ko tonglahma khewah. Phumma Jisu ma atenâng “Ngadijun hang” ngama ngatwah.

²⁸Phumma Livi toanchep lahma chentôpa phethien lahma Jisu dijunwah.

²⁹Erediko Jisu nâng Livima ate humko phhekdong chhahdong ngetwah, ngale jokphhek chhahrâng rootah mihnyan heh chhangko thākho thâte heh jahmōang dāngwah, ngale mihnyan ahan hehmin dāngwah.



30Thin demwah Farasi ngale Niemarang hethôte hehma Jisu dijunte hehnâng ngatwah. “Nema thākho thâte ngale papi mihnyan heh demnâng chenrãngma roam phhekchhah eken a?”

31Jisu ma thinnâng dânthâng wah, “Khoanchet hote mihnyan ma doktor lemmah, khoanchette mihnyan hehma loloba doktor lemeka.

32Ngama mihnyansen heh hunglitrang roorângkat dangmek, papi mihnyan heh roorangba kaerâng.”

Lephhek Lechhah thangma Rangsoam rãngma Chhien

(Mathiu 9.14-17; Mak 2.18-22)

33Mihnyan khuthema Jisu nâng chhienwah, “Jon dijunte hehma roantang phhekchhah lechhah thangma rangsoam eka, ngale Farasi heh dijunte hehmemin erohjô soam eka; rohkomin nang dijunte heh jokphhek chhahroh re eka.”

34Jisu ma dânthâng wah, “Nemnyan wapa thin demnâng tôngpoatko nemnyansiet thinnâng jokphhek chhahrãng hûeka mihnyan heh chenjô lephhekchhah thangma etonga ngama thonghun eken a? Eroh tongmah!

35Rohkomin nemnyan wapa thin demwah sietchhoan rangwo ehûra, erediko ba thinma lejok lechhah thangma etonga.”

36Jisu ma are nginthakthô pemin thinnâng thôkoh wah: “Nema khetpã khohko petphintrãng khetnyan pa chiensietmet. Atema eroh mechientsiet ako, atema khetnyan pa chiensiet eka, phumma khetnyan chhuppa khetpã ko petphintrãng lesenmin.

37Roh akole henma akomin angurti anyan pa angurti thòpã ko ekien en a, chenrãngma ngako angurti anyan pumma angurti thòpã pa poakthuk erea, phumma angurti pa jenchhoan erea ngale thòpa chhihjà erea.

38Erenoma, angurti anyan pa thònyan ko kienmin!

39Ngale henmemin angurti apã jokdiko angurti anyan jok lehun tumin. Chenrãngma ngako, nema ‘Apãpa asen,’ ngama ngaeken.”

Luk 6



Joban Pientôngjâ Rãngma Nginchhien

(Mathiu 12.1-8; Mak 2.23-28)

¹Pientông jâko Jisu chhahthongma dânkhôamwah. Jisu dijunte hehma chhahri punlahma thindekko netphhekawah.

²Phumma Farasi khuthema thôngphâ wah, “Nãng Niem junko Pientông jâko leta molipa nema chenrãng moeken a?”

³Jisu ma thinnâng dânthâng wah, “Chenthu Devit ngale ate mihnyan heh rêmrit poatko Devit ma chenni retah a erepa nema mathat chohweih ekenne?”

⁴Atema Joban Humnâng wãng lahma Joban nãng kohtah phhekchhah pa toanlahma atema chhahwah, ngale ate mihnyan hehnângmin chhahthukwah. Phumma nãng Niem junko erepa henmemin leta chhahthin dângwah, soam aroakte hehma loloba tâchhahwah.”

⁵Ngale Jisu ma athôanko ngatwah, “Mihnyan Chhapa Pientông rangwo rãngmin Teso.”

Mihwa Wathe Dekkò

(Mathiu 12.9-14; Mak 3.1-6)

⁶Erediko wah Pientông jâko Jisu Sanagog nãng wãng lahma hethô wah. Eko mihwa wathe ate dekchah ngepa kolahma dângwah.

⁷Niemarang hethôte ngale Farasi hehma Jisu nãng atheloat hun dângwah, erohwah Jisu tâko namwãng lahma Pientông jâko mihwa pa chensensiet ale ngama sokhokwah.

⁸Phumma Jisu ma thinhungwah thonghun ekapa jetlo lahma mihwako ngatwah, “Toanchep lohma anâng khema nãng wãngro.” Phumma mihwapa toanchep lahma khema nãng wãngwah.

⁹Erediko Jisu ma thinnâng ngatwah, “Ngama nenâng chhien eka: Nãng Niem junko Pientông jâko chenni tâmoatmin a? Mihnâng chohsok moatlem ale, mihrãng chhihli moatlem tâmoatmin a? Mihnyan roandông pepâng moatlem ale, roandông chhihsiet moatlem tâmoatmin a?”



¹⁰Jisu ma chentô nâng tûmlit phoangsok wah; erediko atema mihwako ngatwah, “Nangdek pa chen o.” Phumma atema dekpa chensietwah, ngale ate dekpa ngaksênwah.

¹¹Niemarang hethôte ngale Farasi heh nyahrãng rinkhah wah, ngale Jisu nâng chennire ea ngama thindede tungko thômîn wah.

Jisu ma Echhi Wanii Moattat Chhoante Rên

(Mathiu 10.1-4; Mak 3.13-19)

¹²Ere sanpoatko Jisu hahhokho nâng rangsoam rãng wângwah, ngale Joban nâng rangsoam lahma rangpen penliangma tângwah.

¹³Rangkhahko, atema dijunte heh ate tâko roolahma thinkhuchhang wah echhi wanii rênwah, phumma atema thinnâng moattat chhoante ngama ngatwah:

¹⁴Moattat chhoante rãng rentah heh areheh dângwah, Simon (Atênâng Jisu ma Piter ngama mînwah) ngale ate naa Andru; Jems ngale Jon, Filip ngale Bartholomi,

¹⁵Mathiu ngale Thomas, Alpha chha Jems ngale (Diak pête) Simon,

¹⁶Jems chha Juda, ngale Jisu chên asângte Juda Iskarot heh dângwah.

Jisu ma Hethô ngale Khoanchet Mesiet

(Mathiu 4.23-25)

¹⁷Jisu hahhokho wah ate moattat chhoante heh demko jâkhoam kalahma, hahthungko jahmõang ate dijunte heh demko chepkatwah. Judia diak phangtangwah, Jeroselem, ngale Tair le Sidon diakwah jokêm nâng sângte mihnyan heh eretheko jahmõang dângwah;

¹⁸thinma Jisu ngin jetat erediko thin khoanchet hehwah sênrãng hokwah. Juchhih luplahma chêmte hehmin hûlahma sênwah.

¹⁹Mihnyan heh phangtang atênâng sahloat hunwah, chenrãngma ngako atewah chaan loatchhoan lahma thin phangtang sênsietwah.

Khuhah ngale Hungchhih

(Mathiu 5.1-12)



²⁰Jisu ma ate dijunte hehnâng sùlahma ngatwah, “Rangkepte pa tangchhih heh dângmin; Joban Hahsông pa nethiak!

²¹“Rangkepte pa athângwah rêmritma tângte heh; Nema wokphoat phoat echoh chhah en! “Rangkepte pa athângwah asepte heh: Ne angit ere en!

²²“Chenthu mihnyan heh ma nenâng Mihnyan Chha junma mitchek, aphê, dûmmek, ngale achhih menga hênko nea rangkepte dângmin!

²³Chenthu eroh mechhihchoh hênko, rinroan bahsa dangen ngale khuhah nâhah boangen, chenrângma ngako rangkethung nâng nerângma nyahrâng khopedong thienko lahma tonga. Thin te awa hehmemin mông hehnâng erohjô hânjôanwah.

²⁴“Phumma athângwah techhu hehrângma chentô chhih dângmin a; chenrângma ngako ne roandôngko lechêm thangma lâdangtet!

²⁵“Athângheh wah wokphoat phoat tângte heh nerângma chentô chhih dângmin a; Nea rêmritma etongen! “Athângheh wah angit nungma tângte hehrângma chentô chhih dângmin a; Nea sepjoang letma etongen!

²⁶“Chentô mihnyan heh ma ne merângthô hênko chentô chhih dângmin a; chenrângma ngako thin te awa heh ma môngmông heh eroh rângthôwah.

Neran hehnâng Hun en

(Mathiu 5.38-48; 7.12a)

²⁷“Phumma ngangin jêtatte hehnâng thôkoh eka: Neran hehnâng hun en, nenâng mitchekte hehrâng asenli mokoh en,

²⁸nenâng têm athoakte hehnâng rangkoh en, ngale nenâng hânjôante râng rangsoam koh en.

²⁹Henma komin thhenkako mewat hênko, thhenka komin watthuk en; henma komin nekut pa mekep ako, chhemchong pemin chenkep a.

³⁰Newah henma chenni komin metha hênko chentô nâng koh en, ngale nethiak pa henma komin methakep hênko, erepa nekngaktha en.



³¹Mihnâng nerãng chenroh moatthuk hun eken a, ererãngrãng nememin mihrãng eroh mokoh en.

³²“Nenâng hunte mihnyan kololo mehun enko, nema chenrãngma rangkepmin a? Thinnâng hunte hehnângte papi mihnyan hehmemin huneka!

³³Ngale nerãng moatlemsen moatkohte hehrãng lolo nememin moatlemsen memokoh enko, nema chenrãngma rangkepmin a? Ererãngrãng pete papi mihnyan hehmemin moeka!

³⁴Ngale nema ngakchohrãng dâlem eken mihnyan kololo menêmthuk enko, chenrãngma nema rangkepmin a? Chenrãngma ngako amãnmãnpa ngakchohrãng papi mihnyan roandemin nêmthukmîn eka!

³⁵Eroh dangmah! Neran hehnâng hun en ngale thinrãng kaamsen mokoh en; ngakchohrãng ledâlem thangma nêmthuk en. Eroh koba nema rangdong ekepen, ngale nea nyahrãng achoangthôn wah Joban chha eta dangen. Chenrãngma ngako atea dangkoh a ngama lengate heh demnâng min asen ngale mihnyan chhih heh demnâng min asen.

³⁶Ne Wa Joban mihnâng mînchente dangeka rãngrãng nemin mihnâng mînchente dangen.

Mihnâng Athe Loat

(Mathiu 7.1-5)

³⁷“Mihnâng athe neklo en, erohkoba Joban memin nenâng athe lomahhèn; mihnâng chhih neknga en, erohkoba Joban memin nenâng achhih ngamahhèn; mihnâng mapkoh en, erohkoba Joban memin nenâng map ekohhèn.

³⁸Mihnâng koh en, erohkoba Joban memin nenâng ekohhèn. Linlin, nemejô lephang lengtu lândangroh - mênchong ekohhèn. Nema mihnâng chenroh koh eken a erohjô Joban memin nenâng ekohhèn.”

³⁹Ngale Jisu ma thinnâng are nginthakthô pa thôkoh wah: “Mitdoak pumma ahan mitdoak lem jiensenmah; atema mesen ako, waniinii jôngko ejârii a.



⁴⁰Nyapweihte henjô ate hethôte noma adong dangmah; rohkomin chenthu nyapweihte pumma metaweih tahko ate hethôte rãngrãng edanga.

⁴¹“Nedede mitwah janchhuppa lebeng kherii thangma nepho anaa mitwah mitchhuppa chenrãngma lepke eken a?

⁴²Nepho anaa hehnâng chenroh jiennga eken a? ‘nedede mitwah janchhuppa lebeng kherii thangma, Epho, ngama nang mitwah mitchhuppa rephekoh e ngama’ Nea ahuhkhoanglep heh! Khebengko nedede mitwah janchhuppa bengre pherii mêngen, erediko ba nepho anaa mitwah mitchhuppa senthemthem kheletma eta rephekoh en.

Bãng ngale Bãngri
(Mathiu 7.16-20; 12.33-35)

⁴³“Bãngsen pumma richhiih jienhong rimah, roh akole bãngchhiih pumma risen ejien hongria.

⁴⁴Bãng chentôpa ateriri junko ejet e; Nema suhbuk wah Phukri chohpunmet roh akole suhchebuk wah Anguri echohpun en a.

⁴⁵Mihnyansen ma ate hungnâng asenli heh thien lahma asenli ehongmo wênra; ngale mihnyan chhiih ma ate hungnâng achhiihli heh thien lahma achhiih ehongmo wênra. Chenrãngma ngako hungnâng chenni mênchong tongeka arepa thunma ehong loatjab wênra.

Humhôte Wanii
(Mathiu 7.24-27)

⁴⁶“Ngama nenâng chenni moatrãng thôkotah a erepa lemo thangma, nema nganâng Teso, Teso ngama chenrãngma rooeha

⁴⁷Hen komin ngatânâng hûlahma ngajab tatlahma ngangin kepeka - ereheh chenrãngrãng dângmin a erepa ngama nenâng khesok a.

⁴⁸Atea longrã khohko thongken lulu thulahma humhôte rãngrãng. Jodông lumhû lahma ere humko ethin a rohkomin ere humpa phongmah, chenrãngma ngako erepa senthemthem hoaneka.

⁴⁹Phumma henma akomin nga jabkhab tatlahma lekep dangeka erepa thongken senthemthem leluthu thangma humhôte mihnyan rãngrãng;



Chenthu jodông lumhû lahma ere humko thînko ere humpa lemlienma runjâeka - phumma ere runjâpa chentô cheili dângmin a!”

Luk 7

Jisu ma Roman Sipâhi Sahhab Haa Mesiet

(Mathiu 8.5-13)

¹Chenthu Jisu ma mihnyan hehnâng are ngin heh thôkoh diko, ate Karpanam hahnâng katwah

²Roman sipâhi sahhab haa wathe atema nyahrâng hunlahma dângwah; phumma ere haapa lanriroh khunlahma dângwah.

³Chenthu sahhab pumma Jisu ngin chohtat phumma, atema haapa mesietrâng Jews khhepho hehnâng Jisu roochhoan thukwah.

⁴Thinma Jisu tâko hûlahma nyahrâng rosep lahma ngatwah, “Are mihnyan pumma linlinjô nangma chohsokpa nyahrâng lemeka.

⁵Atema ni mihnyan hehnâng nyahrâng hun ehi ngale ate dedema nirâng Sanagog min hôankohthi.”

⁶Ephumma thindemko Jisu johwângwah. Phumma Sipâhi sahhab humko hunem nemko ate lemru heh Jisu nâng thôkoh râng chienkatwah, thinma ngatwah, “Teso, nanga nga humnâng nekchêm wângro. Ngama nanga ngahumnâng lânsiet huroh mihnyan dangmek,

⁷ngale ngadedemin nangdemnâng phoangphoang lanta chohmîn huroh mihnyan dangmek. Nang thunkhab melolo chien o, ngale erekojô nga haapa esen a.

⁸Ngamin nga noma sahhabdong khennâng moekang, ngale nga khennângmin sipâhi heh tonga. Ngama are watheko, ‘kao!’ menga angko rângka a; ngale Ngama ahan watheko, ‘Wângro!’ ngama meroo angko; erepemin rângwângra; ngale Ngama nga haako, ‘arepa mo o!’ ngama mechien angko, atema rângmoa.”

⁹Jisu ma erengin pa tatlahma bârit rewah; ngale atema tumlit litphong lahma ate diwah junkhômte mihnyan hehnâng ngatwah, “Ngama nenâng linlin



thôkoh eka, ngama are mihnyan dâlem rãngrãng mathatkhe ekang, Isrial mihnyan nãngmin mathatkhe ekang!”

¹⁰Nginmat katte heh sahhab humko ngakwãng lahma ate haapa mechoan chohkhe wah.

Jisu ma Janthoinyu Chha Delachha Ngakhinsiet

¹¹Erediko lemlienma Nain ngama ngaeka hahko Jisu le ate dijunte erediko thin demwah mihnyan heh jahmõang johwãngwah.

¹²Thin ere hahdaang wah panthongko hokwãng rienrienko mangrû katte heh chohmînwah. Aritte pa janthoinyu chha wathelolo dãngwah, ngale hahdaang kowah mihnyan heh jahmõang janthoinyu demko mangrû johkatwah.

¹³Teso ma janthoinyu pa khelahma atenãng nyahrãng mînchenwah, ngale janthoinyu ko, “Neksep,” ngatwah.

¹⁴Erediko Jisu ma wãng lahma mangko sahloat wãngwah, phumma mang pete heh chep rewah. Ngale Jisu ma ngatwah, “Paangmih! Ngama chien eki, toanchep o!”

¹⁵Ephumma ritte mihnyan pa toansat lahma phoangkhoam wah, ngale Jisu ma ate nyong nãng ngakohwah.

¹⁶Thin phangtang chei rewah, ngale Joban nãng rôwah. Thinma ngatwah, “Nãng tânãng mõngdong lâhongtah!” ngale “Joban ma ate mihnyan heh pepãngrãng lâkatha!”

¹⁷Are Jisu nginpa diaktangma khêmtatwah, ngale ere kêanã wah diak akan hehmemin chohtatwah.

Jon Baptis wah Nginmatte

(Mathiu 11.2-19)

¹⁸Chenthu Jon dijunte hehema atenãng erengin heh thôkohko, Jon ma ate dijunte wanii roowah

¹⁹ngale Teso nãng thôngphãrãng chienkatwah, thinma thôngphã wah, “Nanga Jon ma katmin ngama thôtah pa dangole, roh akole nima ahan ngiakmin a?”



²⁰Thinma Jisu tâko hûlahma atenâng ngatwah, “Jon baptisma nangnâng thôngphârăng chienkat ehi, nanga atema hokmin ngama thôtah pa dangole, roh akole nima ahan ngiakmin a?”

²¹Ere sanpoat poatko Jisu ma jahmõang khun atamte, lihân khoanchette, ngale juchhih lupte mihnyan heh sênsietwah, ngale mitdoak hehnângmin khethukwah.

²²Atema Jon wah nginmatte hehnâng dânthâng wah, “Ngakwãng letma Jon nâng nema chenni khetet a ngale tattet a ereheh thôkoh en: Mitdoak hehma jienkhe reka, dakò heh jienkhoam reka, angêm khoanchette heh sen reka, nâba hehma tateka, ritte heh ngakhin reka, ngale tangchhih naadi hehnâng Joban Nginkongsen pa phoangthôkoh reka.

²³Hungnâng letûngmaang thangma nganâng putedâlemte heh rangkepte dângmin!”

²⁴Jon wah nginmatte heh chhoandiko, Jisu ma mihnyan hehnâng ate junma thôkoh wah: “Chenthu ne Jon tânâng seahkho nâng chhoantetko, nema chenni echokhe e ngama thonghundet a? wun heh pôngma juhmet lahma echokhe e ngama lethong huntet a?

²⁵Nema chenni chokherãng chhoantet a? Khet akhusen chohkepte mihnyan chohkhe rãng lechhoantet a? Ererãng rãng khet akhusen kepte mihnyan ngale sekma patrit thin aho mihnyan heh Lowang hum nângba echokhe e!

²⁶Nganâng thôkoh tanha, nema chenni chohkhe rãng chhoantet a? mông chokherãng chhoantet a? Linlinjô mông danga, rohkomin nema mông nomemin adong chohkhe eken.

²⁷Chenrãngma ngako Joban nyapraangma ngatah pa Jon nâng ngatwah: ‘Joban ma ngatwah, Ngama nga nginmatte nangmako nang lem laangkoh rãng echienkat ang.’

²⁸Jisu ma ngatwah, “Ngama thôkoh eka,” “Jon pa chentô mihnyan nyuchha kowah adongthôn. Rohkomin henpa Joban Hahsôngko arinthôn dangeka erepa Jon noma adong.”



²⁹Mihnyan chentôma ate ngin pa tatwah; ajahthem pejô thăkho thâte hehma Joban nginpa kepwah ngale thinnâng Jon ma baptijem kohwah.

³⁰Rohkomin Farasi le Niemarang hethôte hehma Joban ma thinrăng jabeka nginpa kep ho, ngale Jon dekwah baptijem kepmin nyoak ho.

³¹Eredikomin Jisu ma thinnâng thôkoh wah, “Ngama thenep thejâ wah mihnyan heh chenni nâng thakmîn anga? Thin a chenni răngrănga?”

³²Thin a bôjatnâng phoangtôngte leta lechhih heh răngrăng. Khuthema khutheko rakmîn eka, ‘Nima nerăngma nemnyansiet nongtem koheka, rohkomin nea boangmet! nima nerăngma mangrûsê sekoh eka, rohkomin nea sepmet!’

³³Jon baptisma chennimin lejok lechhah dăngko nema, ‘Atenâng juchhih lupeka!’ ngatwah.

³⁴Phumma Mihnyan Chhama jokphhek chhah lahma dăngko nema, ‘Are mihnyanko sûtan en! rem awak chenmin le abanmah, ngale khemmok chempa, thăkho thâte ngale papi mihnyan heh lemruçha!’ ngaeken.

³⁵Rohkomin Joban buthi mongthem pa toangtang ngama ate moatlemma khesok eka.”

Jisu Simon Farasi Humnâng Hok

³⁶Farasi wathema ate humnâng Jisu phhekchhah chhahrăng roowah, ngale Jisu ere humko wăng lahma phhekchhah chhahrăng tôngwah.

³⁷Ere hahko papi dihiaknyu wathe songlahma dăngwah. Atema Jisu Farasi humko phhekchhah chhah lahma tonga ngama chohtatwah, ephumma longwah hânwah thônâng thăchaanjat tientumli mênchong pelahma hokwah

³⁸ngale Jisu dathongko tokdi ngeko chephu lahma seplahma ate mitphi pumma Jisu dasôan kohwah. Erediko ate khochoo pumma Jisu dapa choakhut kolahma chupjokwah, ngale erediko thăchaanjat tientumli pumma lokkoh rewah.



³⁹Chenthu Farasi pumma erepa kheko, ate dedema thônghunwah, “Are mihnyan pa linlinjô mông danglahma ko are atenâng sahloate dihiaknyu pa hen a erepa chenjettah; ngale ate chenroh papi roandông dongeka erepa chenjettah!”

⁴⁰Jisu ma hongjab lahma atenâng ngatwah, “Simon, ngama nangnâng chenni akomin thôkohthin tonga.” Simon ma dânthâng wah, “Hethôte, thôkohhang.”

⁴¹Jisu ma ngatwah, “Mihnyan waniima wathe wah ngun nêmwah,” “Wathe ma châbangâ nêmwah, ngale ahan wathe ma roakbangâ nêmwah.

⁴²Phumma wathe memin tangak thumho, ephumma waniinii thăpê pa map kohwah. Eroh medang ako wanii kowah henpumma atenâng ajahthôn hunmin a?”

⁴³Simon ma dânthâng wah, “Ngama thonghun ekang, atema hennâng ajah mapkohtah a erepumma ajah ehun a.” Jisu ma ngatwah, “Nangma lâpun ngatoh,”

⁴⁴Erediko atema dihiaknyu ngeko ngiaksûkat lahma Simon nâng ngatwah, “Nangma are dihiaknyu pa khe ekoa? Nga nanghum nâng hûerâng ko nangma ngada merãng jo kohmahhang, phumma are dihiaknyu ma ate mitphi pumma ngada soanko lahma ate khochoo ma choakhutkoh ehang.

⁴⁵Nangma nganâng chupjok lohma tângroo mahhang, phumma are dihiaknyu pumma nga chenthuma nang humnâng huthangwah nga dako chupjok pa jekmah.

⁴⁶Nangma nga khoko hutrãng Oliv tien kohmahhang, phumma are dihiaknyu pumma ngada pa thăchaanjat tienma lokkoh ehang.

⁴⁷Ngama nangnâng thôkohki, atema nganâng nyahrãng hun khesok ehang junko atewah ajahthem pap heh map lâchohtah ngama khesok eka. Henhenma amãnychha map choh eka erehehma amãnychha hun ekhesok a.”

⁴⁸Erediko Jisu ma dihiaknyuko ngatwah, “Nang pap heh map lâkohtih.”



⁴⁹Jisu demwah tângte ahan heh ma thindede hungnâng thônghun wah, “Arepa hen a, atema chenroh map tâkohmin a?”

⁵⁰Rohkomin Jisu ma dihiaknyuko ngatwah, “Nang putedâlem pumma lâpe pengtho; mêmô ma chhoan o.”

Luk 8

Jisu Demwah Dihiaknyu heh

¹Ere poatthe diko Jisu ma Joban Hahsông Nginkongsen pa phoangthô lahma sumhah ngale hahdaang hehnâng phoangkhoam wah. Dijunte echhi wanii pemin ate demnâng johchhoan wah,

²ngale juchhih lupte erediko khoanchet wah mesiet wah dihiaknyu hehmin khuthe johchhoan wah: Mariam (Atenâng Magdaleni ngamemin roowah), ate wah juchhih wanengit junlo kotah pemin dângwah

³ngale Joana ate tangwa mînpa Chuza atea Hirot nginpatthin humnâng sahhab dângwah; ngale Susana, eredikomin ajahthem dihiaknyu heh ma thindede ngun akem met lahma Jisu le ate dijunte hehnâng chohsû lahma johchhoan wah.

Chhahli Wênte Nginthakthô

(Mathiu 13.1-9; Mak 4.1-9)

⁴Mihnyan heh wanthe wanthema hahdaang kowah Jisu tânâng hokjûjû dângwah; ngale chenthu mihnyan heh jahmông khôanhok diko Jisu ma are nginthakthô pa thôkoh wah:

⁵“Rekthenâng mihnyan wathema chhahli wênchhoan eka. Atema pitnâng chhahli wênko, wanwanthe pa lemdong mongtang nâng chatjâeka, phumma mihnyan heh ma dama namnek eka, ngale wo heh ma tuphek eka.

⁶Wanwanthe pa longrã khohnâng chatjâeka, phumma chhah pa koat ngale lemlienma choakjâeka, chenrângma ngako erehahko jo aho.

⁷Wanwanthe chhah pa suhbuk nâng chatjâeka, phumma suh pa chhah heh demnâng roamdong lahma chhah heh tahbuk eka.



⁸Ngale wanwanthe pa hahsen nâng chatjâeka; phumma chhah heh donglahma châtheru chhahri hongrieka.” Ngale Jisu ma athôanko thôkoh wah, “Tat en, nenâng nâ metong hênko!”

Jisu ma Nginthakthô Chenrăng Kepwah a

(Mathiu 13.10-17; Mak 4.10-12)

⁹Ate dijunte heh ma Jisu nâng are nginthakthô pa chenjunko thakthô eko ngama chhienwah,

¹⁰ngale atema dânthâng wah, “Joban Hahsông nginpa nenâng jetthuk eka, rohkomin ahan heh ma nginthakthô rãng tateka, erohwah thinma sũeka rohkomin khemah, ngale jetat eka rohkomin jetlo mah.

Jisu ma Chhahli Wênte Nginthakthô pa Ngaksên Thôkoh

(Mathiu 13.18-23; Mak 4.13-20)

¹¹“Nginthakthô pumma aroh ngaeka: chhahli pa Joban ngin:

¹²Lemwah chatjâte chhah heh dangeka, thinma Joban ngintat lahma kepeka, rohkomin juchhih heh hũlahma thinhungwah Joban nginko putedâlem lahma kho môangpe a ngama nyenchhoan eka.

¹³Longrã khohko chatjâte chhah rãngrãng heh dangeka, thinma Joban ngin chohtat rienrien khuhah nâhah kepeka. Rohkomin erepa thinhung khennâng lulitlit kepma; thinma poatthe rãng lolo kepeka, phumma chenthu chêmchei sanpoat hokko jârit rewak eka.

¹⁴Suhbuk chhangwah chatjâte chhah rãngrãng heh dangeka, thinma Joban ngin tateka; rohkomin sekmah patrit ngale techhu dânghun, erediko are rangkhen roandôngko khuhah dânghun heh roamlahma tanghep eka, erohwah thin chhahri pa tamunmah.

¹⁵Hahsenko chatjâte chhah rãngrãng heh dangeka thinma Joban ngin tatlahma thinhung nâng senthemthem thien lahma kepeka, ngale ari mahong hongri thinma jabkhab pa kepwak eka.

Khokkhen nâng Wentit

(Mak 4.21-25)



¹⁶“Henmemin wentit pa toaklahma khokma khupthien mah ngale jupthin khennângmin thienmah. Erenoma wentit toakthin ko etoak a, erohkoba mihnyan heh humkhen nâng wângko thinma wenphiak pa ekhea.

¹⁷“Chenni komin huhriem rekapa loatsiet rêmin, ngale chenni komin huhriem lahma thien ekapa rangwo nâng loatsietmin.

¹⁸“Erohwhah, nema chenrohtat eken a erepa senthemthem jettat en; chenrângma ngako, hennâng chenni komin tongeka erehehnâng lekoh rêmin, phumma hennâng chenjô aho dangeka ere hehwhah thinma tonghi ngama thonghun eka ere amãchha pemin toanchhoan rêmin.”

Jisu Nyong ngale Ate Naa heh

(Mathiu 12.46-50; Mak 3.31-35)

¹⁹Jisu nyong le ate naa heh Jisu tânâng hokwah, phumma mihnyan jahmông dangjunko Jisu tânâng tanam húho.

²⁰Phumma Jisu nâng wathema ngatwah, “Nang nyong le nang naa heh rangsâko cheplahma tonga ngale thin nang demnâng chohmîn hun eho.”

²¹Jisu ma thinkhunâng ngatwah, “Henhenma Joban jabkhab tatlahma senthemthem kep eka ereheh ba nga nyong ngale nganaa.”

Jisu ma Pông Apat Mesiet

(Mathiu 8.23-27; Mak 4.35-41)

²²Jâthenâng ate dijunte heh demko Jisu khôankhoko chhangka lahma ngatwah, “Nângkhu Josi rankanâng danwãnge.” Ephumma thin dânwângwah.

²³Thin joko khôankhoma chhoanthuko Jisu juplek rewah. Lemlienma joko pôngdong hôngpông hokwah, ngale khôankho pemin joma mênchong lúmhokwah. Ngale thin a nyahrâng cheili sanpoatnâng dangwah.

²⁴Dijunte heh Jisu tâko kalahma satsiet kalahma ngatwah, “Hethôte, hethôte! Nângkhu lârii eki!” Jisu toansat lahma pông apatko jektâng wah; phumma pông apat pa jekwah, ngale ere diphumma kihrumrum dangwah.



²⁵Erediko Jisu ma ate dijunte hehnâng ngatwah, “Ne putedâlem pa chenkoa?” Phumma thin patrit ngale chei rewaklahma thindede jabmînwah, “Are mihnyan pa hen a? Atema pông apat heh jektâng komin, jek eka!”

Jisu ma Juchhih Lupte Mihwa Wathe Sênsiet

(Mathiu 8.28-34; Mak 5.1-20)

²⁶Jisu le ate dijunte heh Girasa hah ngenâng jogari ma chhangkatwah, erehah pa Galili josi rankanâng dângwah.

²⁷Jisu jophako jâkhômkat rienrien, erehah kowah juchhih jupte mihwa ate demko chohmînwah. Are mihnyan pa melâng rangpârâng khet akhu lekep thangma phôngtong wah ngale ate humnângmin letong thangma dângwah, roantangma ate sanpoat pa mangruk hehnâng phoangtong lahma chhoanthuk wak.

²⁸Chenthu atema Jisu chohkheko, chaanmõang raksep lahma Jisu dathongko khupjup kalahma rakwah, “Jisu, nyahrâng choangthôn wah tôngte Joban Chha! nangma nganâng chennire hun ehanga? Ngama nangnâng rosep eki, nangma nga nekchêm thukhang!”

²⁹Jisu ma juchhihko mihnyan sekkowah loatchhoan o ngama ngat phumma juchhih pumma erepa ngatwah. Juchhih ma atenâng depdep lâlotah, Dek ada khhek lahma phâtek nângjô mesekthien akomin, atema janru heh patsiet lahma juchhih pumma sehakhô jêngjêng phôngchhoan thukwah.

³⁰Jisu ma atenâng chhienwah, “Nangmîn chenroh a?” Atema “ngamîn pa ‘Mob,’” ngama dânthâng wah - chenrângma ngako ate sekkhenko juchhih jahmõang luplahma dângwah.

³¹Juchhih heh ma Jisu nâng letathôn thin hahkenluko nekkathuk hi ngama roatsep wah.

³²Thin kêwah hahkong khoko wak heh jahmõang phhekchhah lemchhah lahma dângwah. Ephumma Jisu nâng juchhih heh ma wak hehnâng lupkathuk hi ngama roatsep wah, ngale Jisu ma wak hehnâng lupkat thukwah.



³³Juchhih heh mihwa kowah loatchhoan lahma wak hehnâng lupkatwah. Phumma wak heh ka pumma jâchhoan kalahma josiko mahlumjâ katwah.

³⁴Erekowah wak heh sokte mihnyan hehma chenni dangtah a ereheh khewah, ephumma chhoanwãng lahma erengin pa sumhah ngale thin kêanâ wah hahdaang hehnâng phoangthô wângwah.

³⁵Chenni dangtah a ereheh sokrãng mihnyan heh loatchhoan katwah, ngale chenthu thin Jisu tâko hokkatko, juchhih luptah mihnyan pa Jisu dathongko khet akhu keplahma mihnyansen rãngrãng tonglahma chohkhe wah; phumma thinkhu anga nga chei rewah.

³⁶Juchhih luptah mihnyan pa senlahma chohkhete mihnyan hehma ahan hehnâng chenroh sentah a erepa thôkoh wah.

³⁷Erediko erejaa wah mihnyan chentôma Jisu nâng thin hah wah loatchhoan o ngama ngatwah, chenrãngma ngako thin nyahrãng cheiwah. Ephumma Jisu khôankhoko chhangka lahma loatchhoan wah.

³⁸Ju-chhih loatchhoantah mihnyan pumma Jisu nâng, “Ngamin nâng demnâng johchhoanrâng” ngama roatsep wah. Phumma Jisu ma atenâng aroh ngalahma chienchhoan wah,

³⁹“Humnâng ngakwãng lohma Joban ma nangrãng chenni mokohtoh ereheh thôwãngkoh.” Mihwa pa sumhah jêngjêng wãng lahma Jisu ma aterãng chenni mokotah a ereheh phoangthô kohwah.

Jairas Chha Dihiaknya ngale Jisu Khetnâng Sahloatte Dihiaknyu

(Mathiu 9.18-26; Mak 5.21-43)

⁴⁰Chenthu Jisu Josi rankanâng dankatko, mihnyan hehma khuhah nâhah tângroo wah, chenrãngma ngako thinkhu anga ngama ate bemlâwah.

⁴¹Erediko mihwa wathe atemîn pa Jairas hokkhoam hokwah; atea Sanagog nâng sahhab dângwah. Atedede Jisu dathongko khupjup kalahma Jisu nâng ate humnâng wângrãng roatsep wah,



⁴²chenrãngma ngako ate chha dihiaknya wathelolo echhi pâniî rangpâ dangtah pa ritwah. Jisu wângthuko mihnyan hehma chentô sukma atenâng sahchhōwah.

⁴³Thinkhu chhangko dihiaknyu wathe echhi pâniî heichhoan khoanchet ma nyahrãng chêm Lahma dângwah; dihiaknyu ma atewah ngun akem heh khoanchet sokko doktor nâng thônmet phewah, rohkomin ate khoanchet pa henmemin tamesiet ho.

⁴⁴Dihiaknyu pumma loangchhangko Jisu tokdiko kalahma Jisu khetsako sahloat katwah, phumma lemlienma ate heichhoan khoanchet pa jekwah.

⁴⁵Jisu ma, “Nganâng henma sahlo ehanga?” ngama thônghpâ wah. Anga ngama sahlomih ngama tuta ngatwah, ngale Piter ma ngatwah, “Hethôte, mihnyan heh nangtûmlit ko chhomîn hûera.”

⁴⁶Phumma Jisu ma ngatwah, “Henma komin nganâng lâsah lothang, chenrãngma ngako ngawah chaan loatchhoan ko ngama jet ekang.”

⁴⁷Dihiaknyu pumma lâlep jethang ngama thônghun wah, ephumma tiilahma atedede wâng lahma Jisu dathongko khupjup katwah. Eretheko anga nga tâko atema chenrãng sahloatwah a ngale lemlienma ate chenroh sentah a erepa thôkoh wah.

⁴⁸Jisu ma dihiaknyuko ngatwah, “Ngachha, nang putedâlem pumma nang lâsensiettho. Khuhah nâhah chhoan o.”

⁴⁹Jisu ma eroh ngatthuko, sahhabwa humwah nginmatte hokwah. Atema Jairas nâng thôkoh wah, “Nangchha dihiaknya pa lâriitah” “Hethôte pa nekchêm sietwên tûro.”

⁵⁰Phumma Jisu ma erengin pa tatlahma Jairas nâng ngatwah, “Nekchei; putedâlem lolo reo, nangchha dihiaknya pa ngaksên erea.”

⁵¹Chenthu humko Jisu hokkhoam phumma, atema henmin ate demko johwângthuk ho, Piter, Jon, Jems, ngale dihiaknya nyong awa loloba johwâng thukwah.



⁵²Erekowah heh anga nga naarit junko sepwah. Jisu ma ngatwah, “Neksep en; naapa rit dangmah - atea jup reka!”

⁵³Thin anga ngama Jisu nâng ngitwah, chenrângma ngako, thinma riitah ngama jetwah.

⁵⁴Phumma Jisu ma ate dekho sietlahma, “Naachha, toansat o!” ngama rakroowah.

⁵⁵Ate ju pa ate sekko ngakhok wah, ngale lemlienma tôansatwah. Ngale Jisu ma thinnâng naachha ko chenni komin phhekchhah thin koh en ngama chhienwah.

⁵⁶Dihiaknya nyong awa heh patrit rewah, phumma chenni dangtah a erepa hennâng min nekthôkoh en ngama Jisu ma thinnâng ngatwah.

Luk 9

Jisu ma Echhi Wanii Dijunte Chienchhoan

(Mathiu 10.5-15; Mak 6.7-13)

¹Jisu ma echhi wanii dijunte heh aroamma roolahma juchhih junloat râng ngale khoanchet heh mesietrâng chaan kohwah.

²Erediko atema Joban Hahsông nginpa phoangthô ngale khoanchette min mesiet en ngama chienchhoan wah,

³Jisu ma thinnâng ngatwah, “Nedemnâng chenijô nekkepchoan en: menthun min nekkep en, tống, phhekchhah, ngun akem min, chhemchong bâmmin nekkepen.

⁴Chenreko tângroo lahma jekthuk ehèn a, erehah kowah mangak ngakchoan mǎnthethinko tongen;

⁵Chenreko ne letangroo dang ehèn a, ere hah kowah ngakchoan re en, ngale neda wah khep eka bumpa thinnâng nea achhih ngama ranchâthiak pa finekthien re en.”



⁶Dijunte heh chentô hahdaang nâng phoangchhoan lahma Joban Nginkongsen pa phoangthô ngale chentô thenâng khoanchet heh mesiet rewah.

Jisu Jun ma Hirot Mokrit
(Mathiu 14.1-12; Mak 6.14-29)

⁷Chenthu Hirot, Galili pête pumma are ngin heh phangtang chohtat phumma, ate nyahrâng mokritwah, chenrângma ngako wawathe mihnyan heh ma Jon baptis ngakhin eka ngamemin ngatwah.

⁸Wawathema Ilija hongeka ngatwah, ngale wawathema tewa rôanpa thuwah mông dangtah hehwah ngakhin eka ngatwah.

⁹Phumma Hirot ma ngatwah, “Ngama Jon khophang pa thahdoaktek; phumma ngama are chohtat ekang mihnyan pa hen a?” Ngale atemin Jisu demnâng chohmîn hunwah.

Jisu ma Hahjat Bangâ Mihnyan nâng Phhekchhah thuk
(Mathiu 14.13-21; Mak 6.30-44; Jon 6.1-14)

¹⁰Moattat chhoante heh ngakhû lahma thinma chentô motah heh Jisu nâng thôkoh wah. Erediko Jisu ma ate demko sietchhoan lahma Batsida ngama ngaeka sumhahko wângwah.

¹¹Chenthu mihnyan heh ma erepa leptat phumma thinmin Jisu diko junchhoan wah. Ngale Jisu ma tângroo lahma thinnâng Joban Hahsông nginpa thôkoh wah, ngale henhenma khoanchetsên huneka ereheh mesiet rewah.

¹²Sannyupkat rienrienko, echhi wanii dijunte heh Jisu tâko hûlahma atenâng ngatwah, “Mihnyan heh chienchhoan eko, nâng kêanâ wah duken ngale hahdaang hehnâng chhoan lahma thin phhekchhah ngale jupthin chenlem chhoanwak a, chenrângma ngako aretheko mihnyan henjô songmah.”

¹³Phumma Jisu ma thinnâng ngatwah, “Nema thinnâng chenni komin phhekchhah thuk en.” Thinma dânthâng wah, “Ninâng bankên wanbangâ ngale ngah lanii loloba etonghi. Phumma are loangchhang phangtangrâng phhekchhah richhoankoh en ngama hun ehia?”



¹⁴(Ereko hahjat bangâ mihnyan rãng dângwah.) Jisu ma ate dijunte hehnâng ngatwah, “Mihnyan heh roak bangâ roak bangâ ma tongthuk en.”

¹⁵Dijunte heh ma eroh tângthuk diko,

¹⁶Jisu ma bankên wanbangâ ngale ngah lanii pa semlahma rangkethung nâng sũwên lahma, Joban nâng dangkoh a ngalahma rangsoam wah, ngale atema bankên pa chhupsiet lahma ate dijunte hehnâng mihnyan hehnâng phenkoh en ngama kohwah.

¹⁷Thin anga ngama phoatphoat phhekchhah wah, ngale dijunte heh ma bâachâ heh echhi phâni khôantôanwah.

Piter ma Jisu Pa Ahin Joban Chha Ngama Loatjab

(Mathiu 16.13-19; Mak 8.27-29)

¹⁸Jâthe Jisu atelolo rangsoam thuko, dijunte heh ate tâko hokwah. Phumma atema thinnâng thôngphâ wah, “Mihnyan heh ma nga hen edanga ngama ngawak ehanga?”

¹⁹Thinma dânthâng wah, “Wawathema Jon baptis ngaeho, wawathema Ilija, ngale wawathema tewa rôanpa thuwah mông dangtah hehwah ngakhin eka ngama ngaeho.”

²⁰Phumma Jisu ma thinnâng chhienwah, “Roh medang ako nema nganâng chenroh ngaeha?” “Nema nga hen edanga ngama ngaeha?” Piter ma dânthâng wah, “Nanga Joban wah Misaia.”

Jisu ma Ate Chêmchei ngale Arit junma Loatjab

(Mathiu 16.20-28; Mak 8.30—9.1)

²¹Erediko Jisu ma are ngin pa hennâng min nekthôkoh en ngama thinnâng ngatwah.

²²Jisu ma thinnâng thôkoh wah, “Mihnyan Chhama nyahrãng chêmchhomin, ngale khhepho phannang, soam aroakte adong, erediko Niemarang hethôte heh ma ate roak atoak leweihmin. Atea ritphe erea, rohkomin jârem diko ngakhin erea.”



²³Ngale Jisu ma thin phangtang nâng ngatwah, “Nema ngadijun hun medang enko, nedede lekpherit mêngmin, ngale rangwo roakweih ne bãngphakpa peletma ngadijun ha.

²⁴Chenrãngma ngako nema nedede roandôngpa pêpangrit mehun enko, nema amahphe ere en, rohkomin nema ne roandôngpa ngarãngma memahphe enko, nema ne roandôngpa eta pepângen.

²⁵Nema rangkhen hahtok phangtang nerãng takep letma nedede roandôngpa mahphe ba jienrit mere enko nema chenni chohmin a? chenjô chohmet!

²⁶Ne ngarek nâng rêsê erediko ngama hethô ekang nginkong ko rêsê mere enko, Mihnyan Chhamin ate Wa chaan keplahma Asâthôan ngintatte heh demnâng katjâko thinnângmin rêsê erea.

²⁷Ngale ngama nenâng linlin thôkoh eka, Joban Hahsông thepa lechokhe thangma ako leriite mihnyan khuthe tongen.”

Thenphăng Litjâ

(Mathiu 17.1-8; Mak 9.2-8)

²⁸Jisu ma are ngin heh jabtahwah haptathe diko, Piter, Jon ngale Jems ate demko sietlahma hahhokho nâng wãng lahma rangsoam wah.

²⁹Jisu ma rangsoam thuko, ate thenphăng litjâwah, ngale ate khet pemin potutu pôjâwah.

³⁰Lemlienma eretheko mihnyan wanii Jisu demnâng jabmîn lahma dângwah. Thin a Mosa ngale Ilija dângwah.

³¹Ngale nyahrãng phiakto phiakja phiak lahma hongwah, erediko ate Jeroselem nâng riilahma chenroh Joban jabkhab pa toangtang jiendângmin a eregin heh Jisu demnâng thômîn wah.

³²Piter le ate lemru heh nyahrãng mokjup wah, phumma jupwah chhin lahma Jisu dongthuk lahma chokhe wah, ate demwah chepte wanii pemin chokhe wah.

³³Mihnyan heh Jisu tâwah loatchhoan diko, Piter ma Jisu nâng ngatwah, “Hethôte, nâng aretheko tôngpa chentôsên a! Nima tembu humwah



phangrem hoan e, nangrãng wanthe, Mosa rãng wanthe, ngale Ilija rãng wanthe hoan e.” (Atema chennijab ekanga ere pejô senthemthem lejet thangma hôngjabwah.)

³⁴Piter ma jabjenjenko, phoam bukhu lahma mahbukwah; ngale phoam pa thinkhoko bukhok phumma dijunte heh chei rewah.

³⁵Phoam kowah jabkhab hôngjab katwah, “Arepa nga Chha, ngama ate lârentek - ate ngin kepen!”

³⁶Chenthu ere jabpa jekphumma, eretheko Jisu lolo dângwah. Ngale dijunte hehema erepa thinhung nâng thienwah, ngale thinma ere sanpoatko chenni khetah a ereheh hennâng min thôho.

Jisu ma juchhih Lupte Dela Chha Wathe Sênsiet

(Mathiu 17.14-18; Mak 9.14-27)

³⁷Eredijâko Jisu le ate dijunte warem pa hahhokho kowah jâkhôam katwah, ngale mihnyan heh jahmông Jisu demnâng chohmînwah.

³⁸Loangchhang kowah mihnyan wathe hôngrakwah, “Hethôte! Ngama rosepki, ngachhako mamsû mêngtan - atea ngachha ate lolojû!

³⁹Juchhih ma lemlienma hongrak lahma atenâng chiloeka, eko ate thunwah thoakwoak heh hong chire eka; atenâng melo tahko chhoan lehuntu chilek loeka!

⁴⁰Ngama nang dijunte hehnâng junloat kohrãng roatsep wah, phumma thinma tajunlumah.”

⁴¹Jisu ma dânthâng wah, “Nema putedâlem met, ngale nea mihnyan chhih! Chentôloat nga nedemnâng eta johtonga? ngale chentôlek ngama nenâng eta chohsúa?” Erediko Jisu ma mihwako ngatwah, “Nang chhapa anâng sietwênro.”

⁴²Letapa khôamwâng thuko juchhih ma lolahma hahko loangsietwah. Phumma Jisu ma juchhih pa junloatwah, ngale letapa sensiet lahma ate wa nâng ngakkohwah.

⁴³Joban ma moatlemdong moatjunko chentô mihnyan heh bârit rewah.



Jisu ma Ate Rit junko wienthe Jabwah

(Mathiu 17.22, 23; Mak 9.30-32)

Jisu ma moatlem moeka heh khelahma mihnyan heh bârit rewah. Jisu ma ate dijunte hehnâng ngatwah,

⁴⁴“Ngama nenâng thôkohmin nginpa nema neklekphe en! Mihnyan Chhapa mihnyan nyuchha heh deknângkoh lâthângtah.”

⁴⁵Phumma dijunte hehma atema chenni nâng ngaeka arepa jet ho. Are nginpa thinnâng lethôkoh thangma huhriem lahma thien junko thinma jetloho, ngale thinma atenâng thôngphâmin chei rewah.

Henpa Adongthôn a

(Mathiu 18.1-5; Mak 9.33-37)

⁴⁶Dijunte hehwah henpa adongthôn dângmin a ngama thinkhu tungko chhiakmîn wah.

⁴⁷Thinma chenni thonghun eka erepa Jisu ma jetloatwah, ephumma Jisu ma naachha wathe sietlahma thintâko chepthuk wah,

⁴⁸ngale thinnâng ngatwah, “Henma komin are naachha pa ngamînko tângroo eka, erepa nganâng tângroo ehang; ngale henhenma nga tângroo ehanga, atema nga chienkatte pemin tângroo eka. Chenrãngma ngako nekhuchhang wah henpa arinthôn a ere peba adongthôn.”

Henhen Ne Lelatnâng ledangtea erepa Nerãng

(Mak 9.38-40)

⁴⁹Jon ma hongjabwah, “Hethôte, nangmînko mih wathema juchhih junlo lahma khetih, phumma nima atenâng jektangtih, chenrãngma ngako atea nidemwah dangmah.”

⁵⁰Jisu ma atenâng ngale dijunte ahan hehnâng ngatwah, “Atenâng nekjek tangen,” “Chenrãngma ngako, hen ne lelatnâng ledangtea erepa nerãng.”

Samaritan Hahdaangte hehma Jisu nâng Tângrooho

⁵¹Jisu rangkhethung nâng toansietwên sanpoat namhok phumma, atema Jeroselem nâng wângrãng thonghun lahma wângwah.



⁵²Jisu ma ate mako ngingmatte Samaria hahdaangko aterãng rongrup khoakhêmãng chienwên lâwah.

⁵³Rohkomin ere hahdaang wah mihnyan heh ma ate tãngrooho, chenrãngma ngako atea Jeroselem nãng wãngte ngama Samaria wah mihnyan heh ma jetwah.

⁵⁴Chenthu dijunte Jems le Jon niima eroh khe phumma, thinma ngatwah, “Teso, are mihnyan heh rokphêrãng nima rangkethung wah wen jãroo ea?”

⁵⁵Phumma Jisu litphong lahma thinnãng ritngatwah.

⁵⁶Erediko Jisu le ate dijunte heh hahdaang hannãng dânchhoanwah.

Jisu Di Tãjunte

(Mathiu 8.19-22)

⁵⁷Thin lemnãng khôamthuko, mihwa wathema Jisu nãng ngatwah, “Nang chennãngjô mechhoan okomin nga nangdiko ejunkhoam e.”

⁵⁸Jisu ma atenãng ngatwah, “Hien hehnãng thin tãngrãng ken tonga, ngale phoangpukte wo hehnãngmin thinrãng arup tonga, rohkomin Mihnyan Chharãng chenkejô ate boantông rãng the aho.”

⁵⁹Jisu ma mihhan wathe nãng ngatwah, “Ngadijun hang.” Phumma mihwa pumma dânthãng wah, “Hethôte, khebengko ngama kalekma ngawa mang rukamêng ang.”

⁶⁰Jisu ma dânthãng wah, “mangpa mang rôande chenrumîn a. Nangma chhoan lohma Joban Hahsông ngingpa phoangthô chhoan o.”

⁶¹Ahan memin ngatwah, “Hethôte, ngamemin nang dijun e; phumma khebengko ngama kalekma nga humte tangkã hehnãng nging rãnthô kamêngang.”

⁶²Jisu ma atenãng ngatwah, “Henma komin hanbê lahma khedinãng ngiaksukat eka erepa Joban Hahsông nãng lekepmin.”

Luk 10

Jisu ma Roakengit - Wani Chienchhoan



- ¹Erediko Teso ma ahan roakengit wani moattat chhoante mihnyan heh rênwah ngale ate chhoanthin hahdaang hehnâng ngale chentô thenâng ate mako wani waniima chienchhoanlâ wah.
- ²Jisu ma thinnâng ngatwah, “Chhah munchoan pa jahmông tonga, phumma ereheh khôankhenrăng moatlem moatte pa amãnhha. Erohwah chhah munchoan tângte wako, ate chhah munchoan heh khôankhenrăng moatlem moatte chenchien katra ngama rangsoam en.
- ³Chhoan en! ngama soanchhang nâng saak rãngrăng chienchhoan eka.
- ⁴Ngunmin nekkepen, ngale tống akhak, erediko daphângmin nekkepen; erediko mihnâng phoanranjab rãng lemnâng nekchepen.
- ⁵Chenthu ne mihhum khennâng melupwãng tetko, khebengko, ‘Are humko Joban ma rangkohmin ngama rânjab en.’
- ⁶Phumma ere humko mêmô - nâng hunte mihnyan mesong ako, nema rangsoam koh eken pa ere humko chentonga; mêmô nâng hunte mihnyan ledang medang ako erepa ngakkep re en.
- ⁷Ere humko tongen, ngale thinma nenâng chenni jokphhek chhahthuk ehèn a erepa jokphhek chhah en, chenrăngma ngako moatlem moatte hehnâng thin dekbi pa kohmin. Humthe wah humthenâng nekphoang chhoan en.
- ⁸Chenthu komin nea sumhahnâng chhoanko metangroo hènko, nenâng chenni koh ehèn a arepa jokphhek chhah en,
- ⁹ere sumhah kowah khoanchette heh sensiet re en, ngale erekowah mihnyan hehnâng, ‘Joban Hahsông pa netânâng lânam hutha’ ngama thôkoh en.
- ¹⁰Rohkomin chenthu ne sumhahnâng chhoanko letangroo medang hènko, noknyu lemdongnâng chhoan letma ngaen,
- ¹¹‘Ne hah wah nida nâng bum khep ekapa nima ne lelatnâng finekthien eki. Rohkomin thonghun en Joban Hahsông pa netânâng namhûtha!’
- ¹²Ngama nenâng linlin thôkoh eka, khope rênjâ rangwo ko Joban ma ere sumhahko mînchen noma Sodom nângba mînchen pa ajah ekhesok a!!



Hunglelit Hahdaang

(Mathiu 11.20-24)

¹³“Korajin, nangrăngma chentô cheili dăngmin a! Batsida, nangrăng memin chentô cheili dăngmin a! Ne tânâng patritli moatlem motekpa Tair ngale Sidon nâng moat nomako, papwah hunglittih ngama jetthukrăng, enângwah mihnyan heh chenthu thuma bosta khetpa kep ngale bumma thinkhoko phuhrii chenre tah!

¹⁴Ju khoepe rênjâ rangwo ko Joban ma nenâng khesok noma Tair ngale Sidon nângba mînchen pa ajah ekhesok a.

¹⁵Ngale Kaparnam! nangmin rangkethung nâng lânleproh chôangritwâng huntoh a? nanga pap wendô dongkhohko ejâsietkat e!”

¹⁶Jisu ma ate dijunte hehnâng ngatwah, “Henhenma ne ngintat ehèn a, erepa nga ngintat ehang; henhenma ne letangroo dang ehèn a, arepa ngamin tangroo mahhang; ngale henhenma nga letangroo dang ehanga arepa nga chienkatte pemin tangroomah.”

Roakengit-Wanii Moattat Chhoante heh Ngakhok

¹⁷Roakengit - wanii moattat chhoante mihnyan heh nyahrăng khuhah nâhah ngakhok wah. Thinma ngatwah, “Teso,” “Nima nangmînko juchhih hehnâng ngatko thinma ni nginkep ehi!”

¹⁸Jisu ma thinnâng dânthâng wah, “Ngama rangwah joak rangdăng khiapda răngrăng jâka lahma khetek.

¹⁹Tat en! Ngama nenâng chaan koheka, erohwah nema pû ngale gusirong khohnângmin takhoam en, ngale chentô Ran heh tâjien Chaanmin koheka, ngale nenâng chenni mejô letâmin.

²⁰Rohkomin juchhih heh ma ne ngin kepdi nekroan en; erenoma ne mînpa rangkethung nâng raangdiba roanrii en.”

Jisu Khuhah

(Mathiu 11.25-27; 13.16, 17)

²¹Ere sanpoatko Asâthôanju demnâng Jisu nyahrăng khuhahwah ngale atema ngatwah, “Wa, rangkethung ngale hahtokkhoh Teso! Ngama nangnâng



dangkoh a ngaeki, chenrãngma ngako, nangma jet ajien hehnâng lekhesok thangma huhriem tohpa nokba hehnâng khesok eko. Linlinjô Wa erohpa nanghung junko dangeka.

²²“Ewama nganâng chentôpa lâkoh thang. Henmemin Chhapa hen a arepa jetmah, Wama loloba jeteka, ngale henmemin Wapa hen a arepa jetmah, Chhama loloba jeteka, ngale hennâng Chhama jetthukrãng ren eka ereheh meba jeteka.”

²³Erediko Jisu ma dijunte heh ngeko ngiaksûkat lahma thinnâng lolo ngatwah, “Nema are kheken heh chohkhe pa nea chentô khengraangsên a!

²⁴Ngama nenâng linlin thôkoh eka nema chenni kheken a erepa ajahthem môngama ngale lowang hehmemin chohkhe huneka, rohkomin thinma chohkhemah, ngale nema chentat eken a erepa chohtat huneka, rohkomin thinma chohtatmah.”

Samaritan Mihnyansen Thakthô

²⁵Niemarang hethôte wathe hûlahma Jisu ngin nâng bukritthuk hunwah. Atema Jisu nâng thôngphâ wah, “Hethôte,” “Ngama roantang roanjêng khope chohrãng chenni moatmin a?”

²⁶Jisu ma atenâng dânthâng wah, “Joban nyapraang nâng chenroh ngaeka? Nangma Joban nyapraangpa chenroh rângweih oa?”

²⁷Mihwa pumma dânthâng wah, “ ‘Nang Teso Joban nâng nanghung nangrin phangtang kohlohma hun, ngale nangju phangtang koh o, erediko nangchaan phangtang kohlohma hun o’; ngale ‘Nang tok akhung wah mihnyan hehnângmin nang dedeko hunriieko rãngrãng hun o.’ ”

²⁸Jisu ma dânthâng wah; “Nangma toantang lâjabtoh,” “Nangma eroh memo oko roantang roanjêng khope echoh o.”

²⁹Rohkomin Niemarang hethôte pa atedede toantang ngatrit hunlahma, atema Jisu nâng ngatwah, “Ngatok ngakhung wah mihnyan heh hen a?”



³⁰Jisu ma atenâng dânthâng wah, “Rekthenâng mihnyan wathe Jeroselem wah Jeriko nâng katwah, phumma ahuhte ma khum lahma ate khet akhu heh chiensiet lahma atenâng watlahma riinemnem phethien wah.

³¹Phumma erelem pumma soam aroakte wathe kalahma dângwah; chenthu atema mihma wattah mihnyan pa khephumma lemhan ngenâng kekhôm chhoanwah.

³²Erelem pummejô soam aroakte hehnâng chohsokte Livi kalahma mihma watlahma phethientah mihnyan pa chohkhe wah, phumma atemin lemhan ngenâng kekhôm chhoanwah.

³³Phumma Samaritan mihnyan erelem pummejô kalahma mihma watlahma phethientah mihnyan tâko hokkatwah, phumma atema ere mihnyan pa khelahma nyahrâng hungchhih ngale mînchenwah.

³⁴Mihwa tâko kalahma tienma hutkohwah, ngale angurtima mâ heh chatko lahma khhekkoh wah; erediko atema mihwa pa ate mokkhohko chhangthuk lahma mihhum khennâng sietwên lahma sokare wah.

³⁵Eredijâko atema janngun phanii loattoan lahma humkhen wah kaammoatte mihnyanko kohwah. Ngale ‘Senthemthem sùare mêngo,’ ngama atenâng ngatthien wah, ngale chenthu nga arelem pumma mengak kathangko, nangma ate sokare ko chentô mettoh heh engakthum e.”

³⁶Ngale Jisu ma athôanko thôkoh wah, “Nang junko, ere warem mihnyan kowah chen pumma ahuhte hehma watthientah mihnyanko ate tok akhung rângrâng danglahma suare tah a?”

³⁷Niemarang hethôte pumma dânthâng wah, “Atenâng mînchente pumma.” Jisu ma dânthâng wah, “Nangmin chhoan lohma eroh mochhoan o.”

Martha Ngale Mariam tânâng Jisu Chohmînhoek

³⁸Jisu le ate dijunte heh thinlemnâng wângthuko, hahdaang wanthenâng lepkoam lahma Martha ma ate humnâng tângroowah.

³⁹Martha demnâng atena Mariam ngama dângwah, phumma Mariam pa Teso dathongko ate ngin jetat lahma tângwah.



⁴⁰Martha ma chentô moatlempa ate loloma moat phumma hungkêwah, ephumma wãng lahma ngatwah, “Teso, nangma thonghun mohne, nganaa pumma chentô moatlem heh nganâng lolo mothuk ehang, atenâng thômêngkoh nganâng chenchoh moka mênghang!”

⁴¹Teso ma dânthâng wah, “Martha, Martha! Nanga ajahtem moatlem hehrãng sekmah patrii ekoa,

⁴²wanthe loloba nyahrãng alemli thôn tonga. Phumma Mariam ma erepa lâpunrentah, ngale erepa ate ngewah leta toanchhoan min.”

Luk 11

Jisu ma Rangsoam Hethô

(Mathiu 6.9-13; 7.7-11)

¹Jâthe Jisu the wanthe thenâng rangsoam lahma dângwah. Chenthu atema rangsoam diko, ate dijunte wathema atenâng ngatwah, “Teso, Jon ma ate dijunte hehnâng rangsoam hethôtah rãngrãng ninângmin rangsoam hethôhi.”

²Jisu ma thinnâng ngatwah, “Ne rangsoamko, aroh soam en: ‘Wa: Nangmîn Asâthôn pa toaksân e; Nang Hahsông karoo.

³Rangwo roakweih nima lem eki phhekchhah chohkohhi.

⁴Nipap heh map kohhi, chenrãngma ngako nirãngma kaamchhih moatte chentô nãng nimemin mapkoh eki. Ngale nihung nektoan thuk hi.’ ”

⁵Ngale Jisu ma ate dijunte hehnâng ngatwah, “Chenjô komin nekhuwah wathe lemruçha humnâng rangpen mongtang nãng chhoan letma, ‘Lemruçha, nganâng bankên wah chhupremtô nênthuk mênghang, ngama lântatet.

⁶Chenrãngma ngako arohroh nga lemruçha hûera, phumma atenâng phhekchhah thukrãng ngahumnâng chenjô aho!’

⁷Ngale chenjô komin nang lemruçha pumma humkhenma, ‘Nga nekphaang siethang! Kâsekmin lâsektih, ngale ngachha hehmin, erediko ngamin jupthinnâng lâjuptih. Nangnâng kohrãng tapeklek toansattumak’ ngama medânthang hênko,



⁸Nema chenre tumin a? Ngama nenâng thôkoh eka, nanga ate lemruçha dângdi nangnâng bankên kohrăng lenyok toansatjô medan komin, nangma letôan thangma methâm thaoko, atema toansat lahma nangma chennilem eko erepa ekohho.

⁹Ngale ngama nenâng thôkoh eka: Tha en eko nema echoh en; lem en, eko nema echohkhe en; kêsekko rahkongen, eko kêsekpa nerăng elaangkohhèn.

¹⁰Chenrăngma ngako henhenma thaeka erehehema echoh a, ngale henhenma lemeka erehehema echohkhe a, ngale henma komin kêsekko merahkong ako atenâng kêsekpa elaangkoh a.

¹¹Nekhuwah henma komin wa dangletma mâmâ chhama ngah thâko pû ekoh en a?

¹²Rohkole atema woti thâko gusirong ekoh en a?

¹³Nea atô chhihjô medan enkomin, nema mâmâ chhanâng asenli kohpa jet eken. Eroh medan ako, rangkethung wah tôngte Joban Wa mejã tanga atewah Asâthôanju thâte hehnâng kohpa chentô bâmjet eka!”

Jisu ngale Bilzibul

(Mathiu 12.22-30; Mak 3.20-27)

¹⁴Jisu ma jab lejien jabte mihnyan wah juchhih junloat kohwah; ngale chenthu juchhih pa loatchhoan phumma mihnyan pumma jienjab wah. Phumma loangchhang pa bârit rewah,

¹⁵Phumma khaka mihnyan hehema ngatwah, “Arepa belzibul, juchhih heh lowang ma atenâng juchhih heh junloat răng chaankoh eka.”

¹⁶Mihhan hehema Jisu bukritthuk hunwah, ephumma thinma Jisu nâng Joban pa ate demnâng ngama jetrăng, ninâng patritli moatlem molohma khesok hi ngama chienwah.

¹⁷Rohkomin thinma chenni thonghun eka erepa Jisu ma jetlo lahma ngatwah, “Hendiak komin thindede tungko phanmîn lahma, thindede memênmîn ako, ere diakpa leta rôngmin. Ngale henhumkâ komin thintungko chhihmîn eka ere humkâpa phânjâ era.



¹⁸Eroh wah joak heh hahsông pa thintungko mephan mên mîn ako, chenroh jienrôngmin a? Nema ngaeken, bilzibul ma nganâng chaan kohlahma ngama juchhieh junlo ekang.

¹⁹Ngama juchhieh eroh junloat medang angko, ne dijunte heh ma chenroh rângjunloa? Ne dijunte heh ma nea athe ngama jet ehèn!

²⁰Eroh dangmah, ngama Joban chaan junma juchhieh junlo ekang, ngale erejunko netânâng Joban Hahsông pa lâkatha ngama khesok ehèn.

²¹“Chenthu lochaanwa ma, ate humpa wentho dăng apah keplahma mebem ako, ate chhahkhem heh lemahmin.

²²Phum-ma chenthu ate nomemin lochaan wama khum lahma ate mejien ako, hum tângte pumma dâlemrâng thientah wentho deng apah heh phangtang etoanchhoan a ngale atema chenni huhtah a ereheh ephen kep a.

²³“Hen komin nga demnâng ledangte pa linlin nga lelatnâng dângte; ngale hen komin nganâng akhôansietko lechohsûtea erepa aphânsiette.

Juchhieh Ngakhok

(Mathiu 12.43-45)

²⁴“Chenthu juchhieh pa mihnyan wah meloatchhoan tahko, hahran khojêng jêngnâng phoangchhoan lahma ate boantôngthe rânglem chhoan a. Phumma the lechoh medang ako, atedede rângnga riia, ‘Ngahum kojô ngakwâng ang.’

²⁵Ephumma chenthu ere humko ngakhokko, humpa sek ho, sâpoangpoang ngale tiamtete ekhehûa.

²⁶Erediko ate ngakchhoan lahma ate noma ajahthem juchhieh ahan wanengit lesiet lahma ere humko ngaksong hûeka. Ere diphumma, mihnyan pa khebângwah noma ajahthem chhieh dangeka.”

Toangtang Khuhah

²⁷Chenthu Jisu ma aroh ngatthuko, mihchhang wah dihiaknyu wathema loatjab lahma ngatwah, “Nang chhatte ngale nang dôngkhêmte dihiaknyu pa chentô khengraangsên a!”



²⁸Phumma Jisu ma dânthâng wah, “Ere nomemin khengraangsen pa, henhenma Joban ngin tatlahma senthemthem kep eka ereheh dânghin!”

Apatritli Moatlem Khesokrăng Chien

(Mathiu 12.38-42)

²⁹Mihnyan heh Jisu tumlitko jêngjah jahhû rewah, ngale atema thinnâng thôkoh wah, “Areroan wah mihnyan heh chentô chhih a! Thinma patritli moatlem khesokrăng chien ehang, rohkomin chenjô lekhesokmin Jona patritli petah pelolo ba khesok eka.

³⁰Mông Jona pa Ninivi wah mihnyan hehrăngma khesoktah răngrăng, arerôan wah mihnyan hehnângmin Mihnyan Chhapa eroh ekhesok a.

³¹Khope rênjâ rangwo ko, sannyup wah Siba wangcha memin toanchep lahma athângwah mihnyan hehnâng achhih enga a, chenrăngma ngako, ate diak hahtaang wah Solomon Lowang ma hethôeka ngin heh jetatrăng hokwah; phumma ngama nenâng thôkoh eka, Solomon nomemin ajahthem adongpa thejâ ako tonga.

³²Khope rênjâ rangwo ko, Ninivi wah mihnyan heh ma ne mathahko toanchep lahma nenâng achhih engahên, chenrăngma ngako Jona ma Joban nginthô tatlahma thin papwah hung litwah; ngale ngama nenâng thôkoh eka, Jona noma ajahthem adong thejâ ako tonga!”

Phoang wah Wenphiak

(Mathiu 5.15; 6.22, 23)

³³“Henmemin wentit toaklahma huhriemmah, ba khokkhen nâng sekma; erenoma, wentit toakthinko etoak a, erohkoba mihnyan heh humkhen nâng lupwângko thinma wenphiak pa ekhea.

³⁴Nemitpa ne phoang răngma wentit răngrăng. Nemitpa asen medan ako, ne phoang phangtang wenphiak edanga; phumma nemitpa achhih medan ako, ne phoang pemin phangtang rangnyek edanga.

³⁵Eroh wah, jetletma dangen, ne wenphiak pa rangnyek nekchendang eka.



³⁶Ne phoang phangtang wenphiak lolo danglahma, rangnyek chhupthem in aho medang ako, wentitma nenâng chhakphiak rãngrãng, ne phoang phangtang phiakjaja edanga.”

Jisu ma Farasi ngale Niemarang Hethôte hehnâng Achhih Ngat

(Mathiu 23.1-36; Mak 12.38-40)

³⁷Chenthu Jisu ma nginthôkoh diko, Farasi ma phhekchhah chhahrãng roowah; ephumma Jisu wãng lahma phhekchhah chhahrãng tôngwah.

³⁸Jisu ma phhekchhah chhahmako ate dek lesolan thangma chhah pa khelahma Farasi pa patrit rewah.

³⁹Ephumma Teso ma atenâng ngatwah, “Ne Farasi hehma ne bâti le wankhoang tokkhohpa lolo sâpaeken, rohkomin akhenpa mihwah nyenkep ngale achhih lolo.

⁴⁰Aba heh! Tokkhoh hôante Joban pumma jôba akhen hehmin hôaneka ledangne?

⁴¹Erohawah ne bâti le wankhoang khenko chenni tonga ereheh tangchhih hehnâng koh en, ngale erohkoba chentôpa nerãngma niemarang junko asâ tuta edang kohhèn.

⁴²“Farasi heh nerãngma chentô cheili dângmin a! Nema chentô rangkuh sanha roakweih rongrup pôari, pheru wahra, hehwah Joban nâng thãkho kohhû eken, rohkomin nea toangtang dangmet ngale Joban nâng hunmet. Phumma ahan heh moatleko nema ereheh bengmoatmin dângwah.

⁴³“Farasi heh nerãngma chentô cheili dângmin a! Nea Sanagog nângmin tôngthinsen pa châletma thien eken ngale bôjat nângmin mihnyan hehma ne ranchei nungma rânjab hun eken.

⁴⁴Nerãngma chentô cheili dângmin a! Nea mangrûmãn lekhe mangruk rãngrãng, mihnyan hehma lejet thangma ererãngrãng mangruk khohko khoam eka.”

⁴⁵Niemarang hethôte wathema atenâng ngatwah, “Hethôte, nangma are jab ekopa ninâng dûmmek thiak jabeko!”



⁴⁶Jisu ma atenâng dânthâng wah, “Niemarang hethôte heh nerãngma chentô cheili dânghmin a! Nema mihnyan heh temko ahênrãng alat ngale alih hênthuk eken, reletmamin ere hênpa tâtoan hênrãng nema deksu metômin chohtôanpê hunmet.

⁴⁷Nerãngma chentô cheili dânghmin a! Nema môngheh mangruk pa sênmông hôankoh eken - ere môngheh nete newa heh ma ritphewah.

⁴⁸Ngale athângheh wah nemoatlem pumma nete newa heh ma motahpa linlinjô dânghwah ngama khesok eken; thinma môngheh ritphewah, phumma nema ere môngheh mangruk pa senhoankoh eken.

⁴⁹Eroh wah Joban buthi mongthem ma ngatwah, ‘Ngama thin tânâng mông ngale nginmatte heh echienkat ang; phumma thinma wawathe pa aritphe erewak a, ngale wawatheko chêmthuk erea.’

⁵⁰Eroh wah rangbeng hahbeng thuma môngama heh ritphe tahthã, arerôan wah mihnyan heh ma chêm echoh a,

⁵¹Abel bengrit phetah pumma danglahma, joapsoaphin chaam ngale Asâthôan the tungko Zakaria ritphetah thãpa. Ngama, nenâng thôkoh eka, arerôan wah mihnyan hehnâng chêmchoh thukmin!

⁵²“Niemarang hethôte heh nerãngma chentô cheili dânghmin a! Nema Joban buthi mongthem hethin humko wângthin sâbipa sem eken; phumma nededemin wãngmet, ngale hen wânghun eka erehehmin wãngthukmet!”

⁵³Chenthu Jisu ma erethepa phethien lahma loatchhoan poatko, Niemarang hethôte ngale Farasi heh ma Jisu nyahrãng chhihthô wah ngale atenâng ajahthem ngin heh thongpha rewah,

⁵⁴erepa Jisu ma chen akomin methejab ako atenâng athe ngama jienloatrãng thinma bechenwah.

Luk 12

Ahuhkhoanglep hehnâng Ritngat

(Mathiu 10.26, 27)



¹Mihnyan heh hahjat bijatma khôan lahma, thindede tupnekmîn wah, ngale Jisu ma ate dijunte hehnâng bângngatwah, “Farasi heh wichhi hehwah jetletma dangen - ngama are ngaeka pa thin ahukhoanglep hehwah jetletma dangen ngaeka.

²Chenpa mumphuh lahma thieneka erepa laangphe rêmin, ngale chentô huhriem lahma thien eka heh loatsiet rêmin.

³Erohwha nema rangnyek khennâng chenni jabtet a erepa rangwo nâng chohtatmin, ngale nema kêsek sekletma chenni huhjabtet a erepa humkhoma hôngrakmin.

Henran Cheimin a

(Mathiu 10.28-31)

⁴“Ngalemruchha heh, ngama nenâng thôkoh eka, phoang ritphete ran nekchei en, khediko thinma chenjô tachhih motumah.

⁵Henran cheimin a erepa ngama nenâng khesok a: Joban ren chei en, atenâng phoang ritphe dikomin, pap wendônâng phêkatrăng chaan tonga. Nganâng puteha, ate ran lolo jôba chei en!”

⁶“Wesaangsut wochha wanbangâ pa phanii ngun nâng lesângne? rohkomin Joban ma wesaangsut kowah wanthe tumin lekphemah.

⁷Nekhowah khochoo heh tumin phangtang roakweih lahma thieneka. Erohwah nekchei en; Nea jahmông wesaangsut nomemin adong!

Krista Nginkepte ngale Lekepte

(Mathiu 10.32, 33; 12.32; 10.19, 20)

⁸“Ngama nenâng linlin thôkoh eka, henma komin nok atang mathahko atea ngarăng ngama meloatjab ako, Mihnyan Chha memin Joban ngintatte heh mathahko thinrăngma erohjô eloatjab a.

⁹Rohkomin nok atang mathahko henma nga dak ehanga, Mihnyan Chha memin Joban ngintatte heh mathahko thinmin erohjô edak a.”

¹⁰Henma akomin Mihnyan Chha răngma mechhihjab ako map tâkohmin; rohkomin henma Asâthôanju lelatnâng chhihjab eka hehnâng map lekohmin.



¹¹“Chenthu thinma Sanagog nâng ba Govono tânâng, ba diak akan pête heh tânâng nginthôngphâ rãng mesiet hûhenko, nema chenroh dânthâng min a, ngale chenli dânthâng min a ngama neksekmah en.

¹²Chenrãngma ngako, Asâthôanju ma ere sanpoatko nema chenni dânthâng min a erepa ethôkoh hên.”

Aba Techhuwa Nginthakthô

¹³Loangchhang wah mihwa wathema Jisu nâng ngatwah, “Hethôte, Ngapho nâng thômêngkoh, niwama chhahkhem wanlem ngale thin amãn phethien kohthi heh nganâng chenphen kohhang.”

¹⁴Jisu ma atenâng dânthâng wah, “Lemruchha, nangpho nechhe tungko chhahkhem wanlem ngale thin amãn heh phenkohrãng nganâng henma chaankoh ehanga?”

¹⁵Ngale erediko Jisu ma mihnyan heh phangtang nâng thôkoh wah, “Jetletma dangen, ngale chhahnyoak nekdangen; chenrãngma ngako nea chentô chhu alujô medang enkomin, ne roandôngpa nema kep alo eken chhahkhem wanlem junko hîn ajô dangmet.”

¹⁶Erediko Jisu ma thinnâng are nginthakthô pa thôkoh wah: “Rekthenâng techhuwa wathe nâng nyahrãng too achhah sênpit dângwah.

¹⁷Phumma ate dedema thônghun wah, ‘Ngama chenni retu anga? Too achhah thienrãng the ahotu.

¹⁸Ate dedema ngatritwah, Ngama aroh hân ang,’ ‘pumpa hakphe lekma adong ngakhoan ang, ereko too achhah ngale lihân chhahkhem hehmin phangtang sekthien ang.

¹⁹Erediko ngama ngadede nâng engarii ang, nyahrãng khengraangsen! melâng rangpârãng nangma lem eko sêmmaksen heh tongho. Ngale nang roandôngko ngam poase tonglohma khuhah nâhah chennângjô lechêmrii jokphhek chhah lohma tongo’



²⁰Rohkomin Joban ma atenâng ngaeka, ‘nanga aba hahphhek! Thejâ rangpenpen nang rit rêmin; phumma nangrăng are chhahkhem khôanthientoh heh henma kepmin a?’”

²¹Ngale Jisu ma athôanko thôkoh wah, “Joban ngenâng techhu ledang thangma are hahtokkhoh ko lolo techhu dangeka heh eroh dângmin.”

Joban nâng Dâlem

(Mathiu 6.25-34)

²²Erediko Jisu ma dijunte hehnâng ngatwah, “Ngama nenâng thôkoh eka, chenwah choh phhekchhah lihma hînmin a ngama neksekma en, ngale ne phoang wah kepthin khetrăng memin neksekma en.

²³Phhekchhah noma roandông peba ajahthem adong, ngale khet akhu noma phoang peba ajahthem adong.

²⁴Wekha wo hehnâng thatsutan en: thinma khiet alimin khietmah, ngale pum nângmin khôanhenmah; thinnâng khôanhenrăng pummin aho; Joban ma lolo kungwak eka! phumma nea wo heh noma ajahthem adong!

²⁵Nekhuwah hen komin patrii sekma letma chuthe tabâm lekhin en a?

²⁶Nema moatlem rinchha pa lebâng tamo medan enko, moatlem ahan răngma chenrăngma sekma eken a?

²⁷Sûtan en wunwah chongpô heh chenroh dongeka: Thinma pitmin momah ngale thinrăng khet akhumin hôanmah. Rohkomin ngama nenâng thôkoh eka, Solomon Lowang tumin atô chhu alu ngale khet akhu tonglahma ere chongpô wanthe sêntô dangho.

²⁸Joban ma wunwah hin hehnâng khet akhu kepcoh eka - hinpa thejâ metong akomin, nènep ko wennâng rokthhekmin. Atema nenâng jâtanga enoma ajah khet akhu lekep kohminne? Ne dâlem pa atorîn ne!

²⁹“Eroh wah nema chenni jokphhek chhahmin a ngama roantang neksekma en.



³⁰(Chenrăngma ngako are hahtokkhoh wah Joban lejette heh roantangma ere hehrăngma sekma patrii lahma tongeka.) Nema ereheh lemeken ngama ne Wa Joban ma ajet.

³¹Erenoma, Joban Hahsông răngma sekma patrii letma tongen, erohkoba atema nenâng ereheh ekohhèn.

Rangkhethung nâng Techhu

(Mathiu 6.19-21)

³²“Loangnejô medang enkomin nekchei en, chenrăngma ngako ne Wa Joban ma nenâng ate Hahsông pa kohhun ehèn.

³³Ne chhahkhem chentôpa sengletma ngunpa tangchhih hehnâng koh en. Roantang roanjêngma techhu dângthinpa kepen, ngale rangkhethung nâng techhu thôn dângrăng khôanthien en, enâng chenthumin tangchhih ledangmin, chenrăngma ngako ereheh ahuhte memin leta huhmin, ngale chhumphithang memin leta chhihphekmin.

³⁴Chenrăngma ngako ne chhahkhem heh chenreko, ereko nehung memin edanga.

Roantangma Bembemjû Tôngte Haa

³⁵“Chenjô mehû rekomin chepchã letmejû tongen, ngale khetkep lihma tongwah răngrăng bemkepma tongen, ngale wentit pa chenphiak a,

³⁶Nemnyansiet kuhhôn thinwah thin tângtewa ngakhok bemlâte haaheh răngrăng dangen. Chenthu ate hulahma kêsekko merakông tahko thinma lemlienma elaangkoh a.

³⁷Chenthu tângtewa pa ngakhokko lejuplek thangma bemtongla lahma khehû eka haaheh chentô khuhah dânmin a! Ngama nenâng thôkoh eka, tângtewa pumma ate khetpa putphe lahma, ate haaheh tongthuk lahma, thinnâng enget a.

³⁸Tângtewa pa penmong nâng ba ereno memin sanhem nâng mehû akomin bemla lahma khehû eka haaheh chentô khuhah dânmin a!



³⁹Ngale ngama nenâng thôkoh eka, hum tângtewa pumma ahuhte hok sanpoat pa mejet ako, atema ahuhte hehnâng ate humpa lehu thukmin.

⁴⁰Ngale nemin, bemla letmajû tongen, chenrăngma ngako, Mihnyan Chha min nema lethonghun sanpoatko ekara.”

Haasen ngale Haa Chhah thakthô

(Mathiu 24.45-51)

⁴¹Piter ma ngatwah, “Teso nangma are nginthakthô pa nirăng thakthô ekole, mihrăngma thakthô ekoa?”

⁴²Teso ma dânthâng wah, “Eroh medang ako henpa dâlemli ngale buthi mongthêmwin haa a? Atenâng ate tângtewa pumma ate chhahkhem heh sũare thuk, erediko hum apum hehmin sũare thuk, ngale haa ahan hehnâng phhekchhah chhah sanpoat thâng roakweih chhahthuk rãng echien a.

⁴³Chenthu tângtewa pa humnâng hokko ere haa pumma eroh molahma mekhehû ako haapa chentô khuhah dângmin a!

⁴⁴Ngama nenâng linlin thôkoh eka, tângtewa pumma ere haako ate chhahkhem heh phangtang esû erethuk a.

⁴⁵Rohkomin ere haa pumma tângtewa pa ngakhok mabâng thangeka, ngama ate dedema thonghun lahma, ate lemru haa ahan hehnâng dihiak dela chentô nâng buhawat, ngale jokphhek chhah lahma mok alek mereako,

⁴⁶Jâthe rangwo haa pumma lethonghun poatko ngale atema lejet sanpoatko tângtewa pa engakhûa. Phumma tângtewa pumma ere haapa khihkhah nyahnyah ekhihdoak a ngale ngin lekepte heh demnâng ejoh chêmthuk a.

⁴⁷“Haa pumma nga tângtewa ma are moatlempa moatrăng chien ehang ngama jetrii lahma, atema lemo dangeka, ere haako ajah watlahma chêmstetmin.

⁴⁸Rohkomin haa hen pumma ate tângtewa ma are moatlempa moatrăng chien ehang ngama lejet thangma, atema ere moatlem pa lemo dangeka, ere haa komin watmin, rohkomin ere haako rãngkuh watmin. Hennâng ajah kohwah



a erekowah ajah thâmin; ngale hennâng abâmbâm jahkohwah a erekowah abâmbâmjô jahthâmin.

Jisu junma Phâmin

(Mathiu 10.34-36)

⁴⁹“Ngama hahtokkhoh ko wen rokthhekrăng kaerâng, ngale arepa khamchhoan ba ledangtah a ngama thonghun ekang!

⁵⁰Ngama baptijem kepthin tonghang, ngale erepa ngama mara râkep kăngko ngahung senmek!

⁵¹Nema nga are hahtokkhoh ko mêmô kohrăng kaera ngama lethonghun eha? mêmô kohrăng katdangmek, aphan sietrăng kaerâng.

⁵²Adephumma hum wanthe khenko wabangâ mihnyan meroam songako, warem pa wanii lelatnâng dângmin, ngale wanii pa warem lelatnâng dângmin.

⁵³Wa heh thinchha heh lelatnâng edanga, ngale chha hehmin thinwa heh lelatnâng edanga; Nyong hehmin thinchha dihiaknya heh lelatnâng edanga, ngale dihiaknya hehmin thinnyong heh lelatnâng edanga; Nyipanyu heh thin nem heh lelatnâng edanga, ngale nem heh thin nyipanyu heh lelatnâng dang erea,”

Rangkuh Sanha Jetloat

(Mathiu 16.2, 3)

⁵⁴Jisu ma mihnyan hehnâng ngatwah, “Chenthu nema sannyup nâng phoam mekhe enko, lemlienma rangpatrăng ngaeka ngama rângjet en - phumma rangpatmin rângpat a.

⁵⁵Ngale chenthu dekchah ngema pông mepong hûrako, nema rangngup rangkhâm dângrăng ngaeka ngama rângnga en - phumma rangngup rangkhamjô rângdanga.

⁵⁶Ahuhkhoanglep heh! Nema rangle hahko sûletma rangchhih rangme pa jienjetlo eken; phumma athângheh wah rangkuh sanha pa chenrăng lejien jetlo dangeken a?

Ne Lelatnâng Dângte Demko Phensietmîn en



(Mathiu 5.25, 26)

⁵⁷“Chenrãngma nema moatlem asenli moatrãng lethonghun reken a?

⁵⁸Henma komin ne lelatnâng ngin hongsiet lahma metloatthin humnâng mesietchhoan hènko, metloatthin humnâng wângmako phensietrãng thonghun en. Eroh ledang kako, nginpatte heh tâko siethû lahma, thinma sipâhi hehnâng ekhhekthuk hèn, ngale phâtek nâng esekhèn.

⁵⁹Ngama nenâng thôkoh eka, nema chêngpa phangtang mata tathum eko esekhienhèn.”

Luk 13

Ne Papwah Hunglit letma tongen, eroh ledang kenko Arit rêmin

¹Ere sanpoatko mihnyan khuthema Jisu nâng Galili wah mihnyan hehma Joban nâng joapsoap thuko Pilat ma ritphetah ngin heh thôkoh wah.

²Jisu ma thinnâng dânthâng wah, “Galili wah mihnyan ahan heh noma thin a papi thôn mihnyan dângkawah ritphe eka ngama nema thonghun eken a?

³Eroh wah ritphe dangmah! Ngale ngama nenâng thôkoh eka, nemin nepap wah hung lengaklit kenko erohjô eriien.

⁴Ngale Silom hum runjâ lahma echhi waeset mihnyan ritpettah pa nema chenroh thonghun eken a? Thin a Jerosalem wah sôngte mihnyan ahan heh noma papi thôn dângkawah ritpet eka ngama lethonghun eken a?

⁵Eroh dangmah! Ngale ngama nenâng thôkoh eka, nemin nepapwah hung lengaklit kenko erohjô eriien.”

Penri leri Phukbãng Nginthakthô

⁶Erediko Jisu ma are nginthakthô pa thinnâng thôkoh wah: “Mihnyan wathema phukbãng khiet lahma dângwah. Phumma atema phukri lemsûka tahpa chohkheho.

⁷Ephumma atema bãngthong pânteko ngatwah, ‘Sûtan, rangpâ pârem ngama are phukbãngko phukri lêmsokrãng lâkathang, phumma wanthejô mathat chohpun ekang. Ajoatphe reo! hahmên tôtô nekchenphoak eka’



⁸Phumma bãngthong pânte pumma dânthâng wah, “Tângte, ademin pâthetô chenthat tongtan a; Ngama hahken thulekma hahpîn thatkohtan ang.

⁹Phumma nèpa phukri meri ako, ajahthem asen edanga; eroh komin penri leri medang ako nangma tajoat pheo.’ ”

Jisu ma Joban Pientông jâko Dihiaknyu Dakò Wathe Sênsiet

¹⁰Pientông jâko Jisu ma Sanagog nãng hethô lahma dãngwah.

¹¹Dihiaknyu wathe nãng juchhih luplahma echhi pâset khun lahma dãngwah; ngale leta tinjâttû kunjâ lahma dãngwah.

¹²Chenthu Jisu ma ate khephumma atenâng rakkatwah, “Dihiaknyu, nanga nang khoanchet kowah lâsentoh!”

¹³Jisu ma atenâng dekma sahloatwah, ngale lemlienma dihiaknyu pa jienchên chepwah ngale atema Joban nãng rôwah.

¹⁴Jisu ma Pientông jâko khoanchette pa sênsiet phumma Sanagog wah sahabwa pa nyahrãng rinkhah wah, ephumma atema hongjab lahma mihnyan hehnâng ngatwah, “Nãngma jâerok rangwo khenko moatlem heh moatmin; ere rangwo khenko hûletma khoanchet heh chenmesiet hèn, phumma Pientông jâko dangmah!”

¹⁵Teso ma atenâng dânthâng wah, “Nea ahuhkhoanglep! Nekhuma ne mânpong ba gado pa thinhoo kowah jânletma Pientông jâko jojok thukrãng rângsietchhoan en.

¹⁶Phumma are Abraham pôali pa joakma echhi pâset lâkhhek thientah; Phumma Pientông jâko leta jânphemin ne?”

¹⁷Jisu ma dânthang eka ngin pumma ate ran hehnâng rêsê thângwah, ngale Jisu ma patritli moatlem moatjunko mihnyan heh nyahrãng khuhahwah.

Jokangken Nginthakthô

(Mathiu 13.31, 32; Mak 4.30-32)

¹⁸Jisu ma thôngphâ wah, “Joban Hahsông thepa chenrãnggrãnga? Erepa ngama chennâng thakmîn lekma thakthô anga?”



¹⁹Erepa arerãngrãng. Mihnyan wathema jokangken pa ate pitko wênkat eka. Jokangken pa phoak lahma bãng rãngrãng dongeka, ngale wo hehmemin ate bãngphakko rup rupeka.”

Wichhi Nginthakthô

(Mathiu 13.33)

²⁰Eredikomin Jisu ma wîen thôngphâ wah, “Ngama Joban Hahsông thepa chendemnâng thakmîn lekma thakthô anga?

²¹Erepa arerãngrãng. Dihiaknyu wathema wichhi pa toak roakbelii pheban demko sakmîn lahma phangtang mabiet bietjâ thieneka rãngrãng.”

Kâsek Kit

(Mathiu 7.13, 14, 21-23)

²²Jisu ma Jeroselem nâng wângnung nungma ate wânglemko chentô sumhah ngale hahdaang heh dankhoam eka hehnâng Joban ngin phoangthô lahma wângwah.

²³Mihnyan wathema atenâng thôngphâ wah, “Teso, khopete mihnyan pa mãnchha dângminne?” Jisu ma thinnâng dânthâng wah,

²⁴“Kâsek pumma dânkhoamrãng latrii en; chenrãngma ngako ajahthem mihnyan hehma erepumma dânkhôamrãng ehunwak a, rohkomin thinma leta dankhoammin.

²⁵Hum tângte pumma toansat lahma kâsekpa sek erea; erediko nema rangsâko chepletma kâsekko rahkông letma enga en, ‘Teso!, nirãng kâsekpa laangkohhi,’ phumma atema edânthanghèn, ‘ne chennângwah hûeren a erepa ngama jetmah!’

²⁶Erediko nema edânthangen, ‘Nia nangdemnâng aroamma jokphhek chhahtih dangmahne; ngale nangma ni hahnâng hethô huthi dangmahne!’

²⁷Rohkomin atema engak ngahèn, ‘ne chennâng wah hûeren a arepa ngama jetmah. Ne mihnyan chhih phangtang ngatâwah taangchhoan en!’

²⁸Nema Abraham, Isak, Jakob, ngale chentô môngama heh Joban Hahsông theko ekhe en, phumma nea erethe kowah apetphe erehèn, ereko nema pâchupkek letma sep ere en!



²⁹Mihnyan heh sankatwah, sannyupwah, dekhith dekchahwah, hûlahma Joban Hahsông thekawah kuhhôn thinko etonghûa.

³⁰Ere diphumma athâng hehwah henhen khedi dangeka ereheh khema edanga, ngale henhen athângheh khema dangeka ereheh khedi edanga.”

Jisu ma Jeroselem nâng Hun

(Mathiu 23.37-39)

³¹Ere sanpoat poatko Farasi khuthe hûlahma Jisu nâng ngathôkwah, “Nanga are thekawah loatchhoan ko, ngale chenriangnâng komin tongchhoan o, chenrăngma ngako Hirot ma nâng ritphe rãng lem eho.”

³²Jisu ma thinnâng dânthâng wah, “Wăngletma ere hien ko thôkoh en: ‘Ngama juchhieh junlo re ekang ngale thejâ ngale nènep, tungko ngama khoanchet heh mesiet ereang, ngale jârem jâko ngamoatlem heh phangtang etamo ang.’

³³Rohkomin thejâ, nènep, ngale sennep pa nga a lemnâng edangang; môngpa chenriang nângjô leritphe min, Jeroselem nâng lolo jôba ritphemin.

³⁴“Jeroselem, Jeroselem! nema môngama heh ritphe re eken, ngale Joban ma ate ngingmatte netânâng chienkat era hehnâng longma ritpetre eken! Chenroh wonyong ma ate chha heh ate rangkhenko rãngwok arãngrãng, ngama nemin ngadek khenko khôansiet rãng chentô thathuntek a, rohkomin nema nganâng eroh khoansietthuk mahha!

³⁵Ngale erohwah nema ne Rangsoamhum pa mahto nâng erâphe en. Ngama nenâng linlin thôkoh eka, nema “Teso mîngo kattedko Joban ma rangkoh eka ngama ngat sanpoat mahûhû erako nema nga lechoh khetumin.’ ”

Luk 14

Jisu ma Khoanchette Mihwa wathe Mesiet

¹Jâthe Pientông jâko Farasi hehwah wanthe khhepho humnâng Jisu phhekchhah chhahrãng chhoanwah; ngale mihnyan heh ma Jisu tâko nyahrãng namhû lahma sokhokwah.

²Mihnyan wathe ate dek ada heh phin lahma Jisu tânâng hokwah,



³Ngale Jisu ma loatjab lahma Niemarang hethôte ngale Farasi hehnâng ngatwah, “Nãng Niem junko Pientông jâko khoanchette tamesiet ele tamesietmih a?”

⁴Rohkomin thinma chenjô dânthangho. Phumma Jisu ma mihwako lolahma mesiet lahma chienchhoan wah.

⁵Erediko atema thinnâng ngatwah, “Nekhuwah henchha komin ba hen mânpong komin Pientông jâko jôngnâng mejârii ako, Pientông jâjô medang akomin nema lemlienma letoansietka minne”

⁶Phumma thinma ere nginko chenmin jiendânthangho.

Numnene ngale Mihnâng Khuhah Nâhah khoakhêmte

⁷Mihnyan hehma kuhhôn thinnâng tângthin sensenko phoanglemtông pa Jisu ma khelahma, are nginthakthô pa thinnâng thôkoh wah:

⁸“Chenthu ne nemnyansiet kuhhôn thinnâng meroo hênko, tângthin sensenko nekren tongen. Chenrãngma ngako, ne nomemin lemrudong matwahmin etonga,

⁹phumma nechhe waniinii matthen tângtewa pumma, ‘Are tângthinko ate chentonga’ ngama nenâng engakahèn. Ephumma nea rêsê letma tângthin nûmko etongka en.

¹⁰Erohwhah, chenthu ne meroo hênko wãngletma tângthin anumthôanko tonghû en, erohkoba ne roote tângtewa pumma kalahma, ‘Nga lemruçha, wãngro tângthin senko tongwãngro’ ngama nenâng eroohèn. Eroh koba mihhan heh mako thensânsân edangen.

¹¹Chenrãngma ngako, henhen thindede dongsietre eka ereheh rînsiet rêmîn, ngale henhen thindede arin dangrii eka ereheh dôngsiet remin.”

¹²Erediko atenâng phhekchhah chhahthukte mihwako Jisu ma ngatwah, “Chenthu nangma mihheh phhekchhah chhahrãng meroo oko, nang lemruçha, pho anaa, tang amang, ngale tok akhungwah techhu heh nekroo, chenrãngma ngako thinma ngakmat ereho, ngale nangma chenpa ngettoh a erepa thinma engak nget ho.



¹³Erohwah chenthu nema kuhhôn letma phhekchhah menget enko, tangchhih heh, dekkò dakò, ngale mitdoak heh roo en;

¹⁴erohkoba nema rang ekepen, chenrăngma ngako thinma nenâng leta ngaknetmin. Ere thãpa, mihnyansen heh ritwah ngaksat jâko Joban ma nenâng engak kohhèn.”

Kuhhôn Dong Nginthakthô

(Mathiu 22.1-10)

¹⁵Are nginpa Jisu demwah johtongte wathema chohtatwah, phumma atema Jisu nâng ngatwah, “Joban Hahsôngthe kowah kuhhôn thinko chohtôngte heh chentô khuhah dângmin a!”

¹⁶Jisu ma atenâng ngatwah, “Rekthenâng wathema kuhdong hânlahma mihnyan heh jahmông roowah.

¹⁷Phhekchhah chhah sanpoatthâng phumma atema bisuntah mihnyan heh roorăng ate haaheh chienchhoan wah, ‘Hûren, chentôpa lâta khoakhemti!’

¹⁸Phumma wathe diko wathema phangtangma danwah. Khebengwah pumma haako thôkoh wah, ‘Ngama pitnyan riekăng, erohwah nga pitsok katmêngmin; nganâng nekjông mênggha nga jienwăng mahrâng.’

¹⁹Ahan wathe pummemin ngatwah, ‘ngama mânpong jutbangâ riekăng, erohwah ngama ereheh han thatbe katmêngmin; nganâng nekjông mênggha jienwăng mahrâng.’

²⁰Ahan wathe pummemin ngatwah, ‘Ngama arohjû nemnyan bengsiet, erohwah nga tahû mahrâng.’

²¹Phumma haapa ngakwăng lahma chentôpa ate tângtewa ko thôkoh wah. Phumma tângtewa pa nyahrăng rinkhah lahma haako ngatwah, ‘Sitsiak noknyu lemdong hehnâng chhoan en, ngale sumhah nâng katthin lemsiep hehnâng chhoan en, ngale tangchhih, dekkò dakò, mitdoak heh khôansiet hûren.’

²²Haa pumma lemlienma ngatwah, ‘Tângte, nangma chienthi pa lâsiet huthi, rohkomin ademin ajahthem thechaak tonga.’



²³Ephumma tângtewa pumma haako ngatwah, ‘Chentô noknyu lemdong ngale lemsiep hehnâng chhoan en, mihnyan heh ngahum lanmenroh chienhûren.

²⁴Ngama nenâng linlin thôkoh eka, ngama bisuntek mihnyan heh ma henmejô arekowah lechoh chhahmin!’ ”

Dijunte Dêngthã

(Mathiu 10.37-38)

²⁵Rekthenâng jahmõang mihnyan heh Jisu demnâng johkhoam lahma ma dângpoatko, Jisu ma litphong lahma thinnâng ngatwah,

²⁶“Hen komin ngatânâng hûlahma nganâng ate nyong awa, ate tangnyu, chhu chha, ngale pho anya erediko atedede nâng hunrii eka noma ajah lehun hangko atea ngadijunte tadangmah.

²⁷Hen komin ate bângphak pa pelahma ngadiko lejunkhoam hangko atea ngadijunte tadangmah..

²⁸Nekhuwah henma komin humhôn mehun enko, khebângko tongletma chentô lemmin a erepa bângsok mêngmin, erediko nenâng humpa lânta hoanroh ngun tonghole ahoa erepa bângsurii mêngmin.

²⁹Nema eroh lesû medan enko, humhôn rãng khoakhemtet humthinpa leta laanghônmin; ngale nema lãngka ma leta laanghôn thien ekenpa khelahma chentôma dûmmek ere hèn.

³⁰Thinma engahèn, ‘nema humhôn rãng chepletma talaang hônmet!’

³¹Lowang wathêpa hahjat echhi mihnyan sietlahma ahan lowang hahjat roaknii mihnyan sietlahma ate demnâng ranloatmîn rãng meka ako, khebengko atema tonglahma ate lelatwah chepte lowang demko taloatmîn angle taloatmînme a ngama thônghun mêngmin.

³²Phumma atema leta loatmîn medan ako, lowang wathêpa lem nâng dângthuko nomerãng nginmatte chienwênmin.

³³Ererãng rãng,” Jisu ma athônko thôkoh wah, “Chenthu nema ne ngewah heh phangtangma lethinphe kenko, henjô ngadijunte tadangmet.



Sekhota Sum

(Mathiu 5.13; Mak 9.50)

³⁴“Sumpa asen, phumma chenthu sumtupa mesejâ tahko, erepa lejiën tusiet tumin.

³⁵Erepa hahrãng memin senmah, ngale hahpîn rãngmin senmah; erepa petphe ba retumin. Erohwah, Tattan en, nenâng nâ metong hènko!”

Luk 15

Amahkhoam wah Saak

(Mathiu 18.12-14)

¹Jâthenâng thãkho thâte ngale papi mihnyan heh Jisu ngin jêatrãng jahmõang hokwah,

²phumma Farasi ngale Niemarang hethôte hehma ngatwah, “Are mihnyan pumma papi mihnyan hehmin roeeka ngale thin demnâng phhekchhah roamchhah eka!”

³Ephumma Jisu ma thinnâng are nginthakthôpa thôkoh wah:

⁴“Chenjô komin nekhuwah wathe nâng châthe saak lâcheittet, phumma ekowah wanthe memahkhoam ako - nema chenrêmin a? nema roak ekhu wan ekhu pa phemphhek phethien letma mahkhoam reka saak wanthe pa machoh chohlem elemchhoan en.

⁵Chenthu nema erepa mechohtetko, nyahrãng khuhah letma chhoakkhoko etoanpe en

⁶ngale humnâng engak pewên en. Erediko nema ne lemruçha ngale ne tok akhung wah mihnyan heh aroamma khôanroo letma thinnâng enga en, ‘Ngasaak pa mahkhoam wah ngakchoh ekang, erohwah nga nyahrãng khuhah ekang. Nãngkhu anga nga khuhah nâhah dangmênge!’

⁷Ererãngrãng, Ngama nenâng thôkoh eka, roak ekhu waekhu hung lelitte mihnyan heh noma papi mihnyan wathe hungmelit ako rangkethung nâng ajah khuhah nâhah dangeka.

Amahphe wah Ngunpha



⁸“Ngale chenjô komin dihiaknyu wathema ate ngunpha phaechhi kowah phathe memahphe ako - atema chenni rêmin a? Atema wentit toaklahma ate hum phangtang rulahma machoh chohlem elem a.

⁹Chenthu atema ere ngun pa mechoh tahko ate lemruçha heh ngale ate tok akhung wah mihnyan heh aroamma khôanroo lahma thinnâng eng a, ‘Ngama mahphetek ngunpa ngakçoh phumma nyahrâng khuhah nâhah dangekang. Nãngkhu anga nga khuhah nâhah dangmênge!’

¹⁰Ererãngrãng, Ngama nenâng thôkoh eka, wathe papi mihnyan hungngak litko rangkethung wah Joban ngintatte heh khuhah eka.”

Amahçhoan wah Chha

¹¹Eredikomin Jisu ma ngatwah, “Mihnyan wathe nâng ate chha dela wanii dângwah.

¹²Naadiwa pumma atewa nâng ngatwah, ‘Ewa, athâng thângheh ngama chohtin thiak aman heh nganâng koh ehang.’ Ephumma atewa pumma chhepho wanii tungko ate chhahkhem ngale pitthin jolem chentôpa phênkohwah.

¹³Jâthe jâni diko naadiwa pumma ate thiak aman heh phangtang sengphe lahma ngun keplahma humwah chhoanwah. Hahtaang diaknâng chhoan lahma ate ngunpa bamet tamet phoangmet phewah.

¹⁴Atenâng chentô tongtong apa phangtang thônmetphe wah. Erediko ere diakko nyahrâng rêmdong remwah, ngale atenâng ere phumma chenmin hotu dângwah.

¹⁵Ephumma erediak kowah mihwa wathe tânâng dekbi bîrãng hokwah, ngale ere mihwa pumma ate wak heh sokrãng chienwah.

¹⁶Atema wakçhah khôankho kowah phhekçhah pejû chhahhun dângwah, rohkommin atenâng henmejô chhahthuk ho.

¹⁷Khediko ate hungnâng hûlahma ngatwah, ‘Ewa wah dekbi bîchhahte heh lephang leleng çoh phhekçhah wakeka, phumma nga aretheko rêmma chêmrii ekang!



¹⁸Ngama ewa tânâng wãnglekma ewa nâng ngawãng ang, “Ewa, ngama Joban ngale nangrãng nyahrãng pap lâmotek.

¹⁹Nga nangchhadâng khemtumek; nang ngewah wathe dekbi bíchhahte rãngrãng tumin thienhang.” ’

²⁰Ephumma cheplahma atewa tânâng ngakwâng wah. “Ate humwah melâng taangnâng dângthuko ate wama lepkhêkat wah; atewa pa nyahrãng hungchhihwah, ngale chohchhoan kalahma ate chhako dekma khitka lahma chupjokwah.

²¹Chha pumma ngatwah, ‘Ewa,’ ‘Ngama Joban ngale nangrãng nyahrãng pap lâmotek. Ngale nga nangchhadâng khemtumek.’

²²Rohkomin atewa ma haaheh roolahma thinnâng ngatwah, ‘sitsiak!’ ‘Khetsen senthôn pa toanhû letma atenâng pohkoh en. Ate dekho dekkhepwah phengkohre en, ngale daphengmin phengkoh en.

²³Erediko leetet tetthôn pa joat en, ngale phhekdong chhahdong demnâng kuhhoan e!

²⁴Chenrãngma ngako are ngachhapa riichoan dângwah, rohkomin athângheh atea ahîn; atea mahchhoan dângwah, rohkomin athângheh lãngakchohtek.’ Ngale ephumma thinma kuhhônwah.

²⁵“Ere sanpoatko khhepho chhapa pitnâng dângwah. Phumma pitwah ngakwângko, hum hunemnemko, atema nongtem lahma boang aloamte heh tatwênwah.

²⁶Ephumma atema haa wathe roolahma chhienwah, ‘chenrãngma boangloam eka?’

²⁷Haa pumma dânthâng wah, ‘Nangnaa ngakhûera,’ ‘ngale nangwa ma lee thãchaanthôn pa joat eka, chenrãngma ngako atema ate chhapa senthemthem ngakchoh eka.’

²⁸Khhepho chhapa nyahrãng rinkhah lahma humnâng lehûwah; phumma atewa kalahma humnâng wãngro ngama roatsep katwah.



²⁹Rohkomin atema wako ngatwah, ‘Sûtan, rangpâ pâtang ngama nangrãngma haa rãngrãng danglekma motek, ngale ngama chenthumin nangngin thatdânmi. Phumma nangma nganâng chenni thatkoh thanga? Kienjoat lohmemin nga lemruçha heh demnâng mathat jokphhek chhahthuk ehang!

³⁰Rohkomin are nangchha pumma nangthiak aman heh phangtang senglahma dihiak phoangsengte heh demnâng thônmetphê diko humnâng ngakhûera, phumma nangma atenâng thâchaanthôn leepa joatkoh eko!’

³¹Awa ma dânthâng wah, ‘Echha,’ ‘Nanga roantang nga demkojû, ngale ngawah chentôpa nangthiak.

³²Rohkomin khuhah nâhah boangloam ekipa nangnaa pa riichoan dângwah, rohkomin ade phumma lâhintah; atea mahchoan dângwah rohkomin ade phumma ate lêngak chohtih.’ ”

Luk 16

Haa Chhîh Thakthô

¹Jisu ma ate dijunte hehnâng ngatwah, “Rekthenâng techhuwa wathe nâng atehaa pumma ate thiak aman heh sùare kolahma dângwah. Phumma techhu wako nanghaa pumma nangngun heh mahto nâng phoangmah metphekoh eho ngama thôkoh wah,

²Ephumma humkhen nâng roolahma atenâng ngatwah, ‘Ngama nang nginpa chenchohtat ekanga? Nangma ngangun chentô thientoh a ereheh phangtang kephûro, chenrãngma ngako nanga ngangun thiente ledangtumin.’

³Haa pumma atedede nâng ngatritwah, ‘Nga tângte pumma ngakaam wah junloatmin lâdangthang. Ngama chenre tumin a? Ngama hahthut kaammin tamomek, ngale mihwah chutphhek chhahrãngmin rêê.

⁴Ngama chenni moatmin a erepa ngama jet ang! Chenthu nga kaamwah mejek tekko, ngalemruçha hehma thinhumnâng eroo hang.’



⁵Ephumma haa pumma ate tângtewa wah thăpê kepte heh phangtang khôanroo lahma thinnâng thôngphâ wah. Atema khebeng wahko thôngphâ wah, ‘Nangma nga tângte wako thăpê chentô pêlohma tongoa?’

⁶Atema dânthâng wah, ‘Oliv tien châthe litat pêlekma tonghang,’ phumma haa pumma atenâng thôkoh wah, ‘tongo, ngale roakbangâ raango.’

⁷Erediko atema ahan wathe nâng chhienwah, ‘nangma chentô pêlohma tongoa?’ ‘Ngama chhah hahjatthe din pêlekma tongang,’ ngama dânthâng wah. Haa pumma ngatwah, ‘nang nyapkha pa anã, nangma châset din raango.’

⁸Erediko haachhih pumma nyahrăng buthithi lahma moatdi ate tângtewa pumma atenâng rôwah; eroh jôba Joban wenphiak nâng tângte mihnyan heh noma are hahtokkhoh kowah tângte mihnyan chhih hehma ajah chhihmo eka.”

⁹Ngale Jisu ma ngatwah, “Ngama nenâng thôkoh eka: Hahtokkhoh kowah ne ngun akem le too achhah heh lemruçhha pekrăng kepen, chenthu nema eroh memotetko, nea roantang roanjêng humnâng eroohen.

¹⁰Henhen-ma amãnhha pa senthemthem toantangma jiensem eka erepumma ajah pemin toantangma ejiensem a; Henhenma amãnhha pa toantangma lejiensem dangeka erehehma ajah pemin toantangma lejiensemmin.

¹¹Nema are hahtokkhoh kowah chhahkhem heh toantangma lejiensem medang enko, rangkethung wah toantang chhahkhem heh jâtang chenroh ejiensemthuk a?

¹²Ngale mihhan thiakpa nangma toantangma lesem medang oko, nangthiakpa henma nangnâng ekohhoa?

¹³“Henmin tângte waniihaa tajien dangmah; ererãngrăng haa pumma watheko chhihchoh erea, ngale watheko sênchoh erea, ba wathe nginkepkep edanga ngale wathe nginkepkep edanga. Nema Joban le ngun waniinii jienroam khoakhem met.”



Jisu ma Jabwah Nginkhab
(Mathiu 11.12, 13; 5.31, 32; Mak 10.11, 12)

14Chenthu Farasi hehma erengin heh tatphumma thinma Jisu nâng dûmmek wah, chenrăngma ngako thinma ngun nâng hunwah.

15Jisu ma thinnâng ngatwah, “Nea nededema mihnyan heh mitsokko toangtang răngrăng dangrii eken, rohkomin nehung pa Joban ma ajet. Chenrăngma ngako chenre pa mihnyan răngma nyahrăng alemli thôn dangeka erepa Joban răngma sekhota.

16“Mosa Niemarang le Mông hehma raangwah heh Jon baptis sanpoat tôko lolo mihnyan hehma kepwah; phumma chenthu Joban Hahsông Nginkongsen pa hongthô phumma chentô mihnyan heh Joban Hahsông Nginkongsen lemkhôko anga nga jienhokrăng latriieka.

17Rohkomin Joban jabkhabwah mitchhuptô wanthe mahjâ noma rangle hah ba eta mahjâa.

18“Henma komin ate tangnyu pa chiakphe lahma tangnyu ahan methekep ako atea ere dihiaknyu demko kaamchhih lâmotah; ngale henma komin achiakphe retah dihiaknyu pa kepeka ere kepte pumma dihiaknyu demko kaamchhih moeka.

Techhuwa ngale Lazaras

19“Rekthenâng techhuwa wathema nyahrăng thâchaan khet akhu heh kep ngale rangwo roakweih chenmin lethoam thangma songtong lahma dângwah.

20Ngale tangchhihwa ate mînpa Lazaras ngamemin wathe dângwah, Lazaras sekko mâlolo dângwah, ngale Lazaras pa techhuwa kâsekthong ko chîsiethok wah,

21Techhuwa pumma jâphe eka chempha heh echoh toanchhah ang ngama dâlem lahma chîhokwah. Ngale hu hehmemin hûlahma ate mâ hehnâng thhelima liapdek hokwah.



²²Tangchhihwa pa ritdiko rangkethung wah Joban ngintatte hehma sietwên lahma rangkethung wah kuhhôn thinnâng Abraham tâko tângwâng thukwah. Techhuwa pemin riilahma ate mangpa bînkawah.

²³Ngale ritthin thenâng, ate nyahrâng chêmchoh lahma dângwah, ngale atema sîwên tahpa Abraham tâko Lazaras tonglahma taangmõang nâng khewên wah.

²⁴Ephumma atema rakroo wênwah, ‘Wa Abraham! nganâng mammînchen hang, ngale Lazaras chienkat mêngro, ate deksupa jonâng rumkat lahma nga thheliko jokihma chenkihthhên katmênghang, chenrângma ngako nga are wenkhenko nyahrâng chêmrii ekang!’

²⁵Rohkomin Abraham ma dânthâng wah, ‘Thatthong hun tan, echha, hahtokkhoh wah nang roandông poatko nangnâng chentô sensenlipa phangtang kohtih, phumma Lazaras ma chentô achhih chhihlipa chohtah a. Rohkomin atea anâng khuhah nâhah tongeka, nanga chêmchoh lohma tongeko.

²⁶Ngale nântungko jông lûmõang tonga, erohwah are thekawah nang tânângmin jiendanka mahra, ngale nangtong eko thekawahmin anâng henjô jiendanwãng mahren.’

²⁷Techhuwa pumma ngatwah, eroh medan ako ‘Ewa Abraham, ngama nangnâng rosep eki, Lazaras pa ngawa humnâng ngakchien katmêngo,

²⁸Nganaa paangmih Wabangâ tonga. Lazaras wãng lahma thinnâng chentô mêngkoh a, erohkoba thinmin are chêmchohtheko leka edangwak ra.’

²⁹Abraham ma ngatwah, ‘Nangnaa hehnâng thôkoh rãng Mosa ngale mông hehma raangwah heh tonga; thinma chenni ngaeka erepa nangnaa hehma chentat a.’

³⁰Techhuwa pumma dânthâng wah, ‘Ewa Abraham! erepumma lolo thôkoh pa lemah, Hen komin ritwah ngaksat lahma thinnâng lethôkoh kako thinpap wah hung lelitmin.’



³¹Rohkomin Abraham ma ngatwah, ‘Thinma Mosa ngale mǒng hehma raangwah hehnâng lepute kako, rit wahjô ngaksat lahma methôkoh akomin thinma lepute min.’ ”

Luk 17

Pap

(Mathiu 18.6, 7, 21, 22; Mak 9.42)

¹Jisu ma ate dijunte hehnâng ngatwah, “Mihnyan heh pap dângthukthin pa metkep hôngmin, phumma pap dângthukte hehrăngma chentô chhih dângthuk a!

²Are chentô noma arinthôn mihnyan hehwah wathe pap dângthuk noma ate bohko longdong khhek lahma josiko mejâtoakka akoba ate răngma asen edanga.

³Erohwhah nema chenni moeken a erepa jetletma mo en! “Nepho anaa ma pap memo ako, atenâng ritngat re en, ngale ate hung melit ako, atenâng mapkoh en.

⁴Atema jâtheko nangrăngma pap dep engit molahma, dep roakweih nang tânâng kalahma, ‘nga lâthetek,’ ngama mengaka hoko, nangma atenâng mapkoh o.”

Putedâlem

⁵Moattat chhoante hehma Teso nâng, “Ni putedâlem pa dongsiet kohhi” ngama ngatwah.

⁶Teso ma dânthâng wah, “Nenâng putedâlem pa jokangken dôngtô metong hènko, nema are mulbary bãngko, ‘nangdede bãngthong rinma phurii lohma josiko nangdede khietrii kao!’ ngama mechien enkomin ne ngin ekephèn.

Haa ma moatthin Moatlem

⁷“Chenjô komin nekhuwah wathe nâng haa lâtonghen, ngale ere haa pumma hanbê, ba saak heh lâsû lâretah. Phumma chenthu haapa pitwah hokko, nema lemlienma phhekchhah chhahrăng rângchien en a?



⁸Eroh chenthujô chienmet! erenoma, ‘nga phhekchhah heh khoakhem kohhang, ngale sôngdângkhet keplohma nga phhekchhah poatko bemtonghang; erediko ba nangma taphhekchhah o,’ ngama rângnga en.

⁹Haa pumma nginkepkep dângdi dangkoh a ngat lemmah, roh akole atema rânglem a?

¹⁰Nemin eroh jôba; chenthu nenâng moatrăng chien ehèn moatlempa phangtang meta motetko, nema enga en, ‘Nia haa dangkoh e; nima moatthin moatlem ba moeki.’ ”

Jisu ma Delawa Waechhi Mesiet

¹¹Jisu Jeroselem nâng wângko, Samaria le Galili nii jatrii tungma dânwângwah.

¹²Ate hahdaang wanthenâng hokko angêm khoanchet ma chêm lahma mihnyan waechhi chohmînwah. Angêm khoanchette heh ataangnâng cheplahma dângwah

¹³ngale thinma rakkatwah, “Jisu! Hethôte! Ninâng mammînchen hi!”

¹⁴Jisu ma thin khelahma thinnâng ngatwah, “Wângen soam aroakte hehma chenthatsû tanhèn.” Thin lemnâng wângpoatko angêm khoanchet pa sênwah.

¹⁵Chenthu thin khuchhang wah wathema atea senchoan kherii lahma, Joban nâng dangkoh a ngama chaanmõang rakroo lahma ngakkatwah.

¹⁶Ate dedema Jisu dathongko hahko khupjup kalahma Jisu nâng dangkoh a ngatwah. Ere mihnyan pa Samaritan mihnyan dângwah.

¹⁷Jisu ma ngatwah, “Waechhi sentet pela; ahan waekhu pa chenkoa?”

¹⁸Chenrăngma are mihdiak mihnyan pumma lolo Joban nâng dangkoh a ngaknga kaera?”

¹⁹Ngale Jisu ma atenâng ngatwah, “Chep o, ngale choan o; nang putedâlem pumma sensiet eho.”

Joban Hahsông Kat Ngin

(Mathiu 24.23-28, 37-41)



²⁰Farasi khuthema Jisu nâng Joban Hahsông pa chenthu katmin a ngama chhienwah. Jisu ma dânthâng wah, “Joban Hahsông pa mihnyan mitma kheli katmin dangmah.

²¹Henmemin, ‘sûtan en, Joban Hahsông pa anã!’ ba, ‘ireko tonga!’ ngama lengamin; chenrãngma ngako Joban Hahsông pa ne hungkhenko tonga.”

²²Erediko atema dijunte hehnâng ngatwah, “Nema Mihnyan Chha sanpoat kowah rangwo hehwah wothe komin chohkhe lihmele ngama hun rangkuh ehûra, rohkomin nema ere rangwopa leta chohkhemin.

²³Erediko mihnyan hehema nenâng engahèn, ‘Ireko sũka tan en!’ ba, ‘Anâng, sũka tanrên!’ rohkomin nema nekphoang sũchhoan en.

²⁴Rangdeng khiapda ma rangkho nâng sukka ma sukka nâng rângdanliap arãngrãng, Mihnyan Chha katjâ rangwo pemin eroh edanga.

²⁵Rohkomin khebângko atema nyahrãng chêmchoh mêngmin ngale arerôan wah mihnyan hehema ate roak atoak leweih edanga.

²⁶Noa sanpoatko chenroh dangtah a ererãngrãng Mihnyan Chha sanpoat komin erohjô edanga.

²⁷Noa khôankho khenko tôngwâng sanpoat tôko anga nga jokphhek chhah lahma dângwah, ngale dihiak dela kepmin lahma dângwah, ngale erediko jodôngma lumhû lahma phangtang ritphewah.

²⁸Ngale Lot sanpoatko chenroh dangtah a ererãngrãng edanga. Anga nga jokphhek chhah lahma dângwah, seng alengte, ariak achâte, khiet alîte toatmin, humpa toatmînhoan lahma dângwah.

²⁹Phumma Sodom hahdaang kowah Lot loatchhoan jâko rangkhethung wah wen jâka lahma phangtang ritkhâm wah.

³⁰Ererãngrãng jôba Mihnyan Chha katjâ komin edanga.

³¹“Erejâ rangwo ko henpa ate humkho nâng dângtea erepumma min humkhen nâng kalahma ate sêmmak heh letoan kamin; ererãngrãngjô pitnâng dângte hehmin humnâng lengakwãng min.



³²Lot tangnyu pa thonghontan en!

³³Henhenma atedede roandông pêpângrit huneka erehehma mahphe erea; ngale henhenma atedede roandông mahphe eka erehehma thin roandông pa eta pesiet a.

³⁴Ngama nenâng thôkoh eka, erejâ rangpenko, mihnyan wanii jupthin wanthenâng eroamjup a: Phumma wathepa sietwên erea, ngale wathepa phethien erea.

³⁵Ngale dihiaknyu waniima chhah eroam thua, phumma wathepa sietwên erea ngale wathepa phethien erea.”

³⁷Dijunte hehma Jisu nâng thôngphâ wah, “Teso, arepa chenke dângmin a?” Jisu ma thinnâng dânthâng wah, “Chenriangko mang tongeka, eretheko mangphhekte hogunwo heh ekhoanjâa.”

Luk 18

Janthoinyu ngale Nginpatte Thakthô

¹Erediko Jisu ma ate dijunte hehnâng roantang hung lechha thangma rangsoam nungmejû tôngrăng nginthakthô thôkoh wah.

²“Hahdaang wanthenâng nginpatte wathe dângwah, atea Joban ranmin lechei, ngale mihnyan ranmin lechei dângwah.

³Ngale ere hahdaangko janthoinyu wathema atenâng roantang hûlahma, ‘Nga lelatnâng dângte ngaran hehwah mampânghang!’ ngama butbut roatsep hokwah.

⁴Melâng rangwo rãng ere nginpatte pumma dihiaknyuko lechohsû dângwah, phumma athôanko nginpatte pumma atedede ngatritwah, ‘Nga a Joban ranmin cheimek ngale mihnyan roak atoakmin leweih medan angkomin,

⁵are janthoinyu pumma butbut thamngat hokphumma, ngama atenâng chohsû ang. Ngama lechohsû medan angko, atema butbut thamhû lahma athôanko nga eboansiet hang!’ ”



⁶Ngale Teso ma thôkoh wah, “Tattan en, are nginpatte chhih pumma chenni ngaeka.

⁷Joban nâng putedâlemte mihnyan hehma rangwo rangnyek atenâng merosep ako Joban ma thinnâng lechohsû minne? Joban ma thinnâng sitsiak lechohsû thangma dângminne?

⁸Ngama nenâng thôkoh eka, atema thinrãng emoa ngale sitsiak echohsûa. Phumma chenthu Mihnyan Chhapa ngakkat jâko atema hahtokkhoh ko putedâlemte echohkhe karã?”

Farasi ngale Thăkho Thâte Nginthakthô

⁹Jisu ma are nginthakthô pa thindede asen thonghun lahma mihhan nâng achhih thônghunte hehnâng thôkoh wah.

¹⁰“Rekthenâng wanii mihnyan Rangsoamhum nâng rangsoam rãng roamhokwah: Wathepa Farasi dângwah, ngale ahan wathepa thăkho thâte dângwah.

¹¹Farasi pumma ataangnâng ate araangraang cheplahma rangsoam wah, ‘Joban, ngama dangkoh a ngaeki, chenrãngma ngako mihnyan ahan heh rãngrãng nga chhahnyoak dangmek, mothô khoanglepmin dangmek, ba mih tangnyu demnâng kaamchhih moatte min dangmek. Ngama nangnâng dangkoh a ngaeki chenrãngma ngako are thăkho thâte rãngrãngmin dangmek.

¹²Ngama heptako lephhek lechhahma rang jâni rãngsoam ang, ngale ngama chentô chohbi ekang hehwahmin thăkho rãngkoh ang.’

¹³Rohkomin thăkho thâte pa ataangnâng cheplahma ate khojô rangkhethung nâng leta toansûwên thangma ate thhenkhuhko teprii lahma soamwah, ‘Joban nga papi mihnyan, nganâng mammînchen hang!’

¹⁴Jisu ma ngatwah, “Ngama nenâng thôkoh eka, Farasi noma thăkho thâte pa Joban wah rangkep lahma ate humnâng ngakchhoanwah. Chenrãngma ngako henhen atedede dong sietrii eka erepa arînsiet rêmîn, ngale henhen atedede arin dangrii eka erepa dôngsiet rêmîn.”



Jisu ma Letachha hehnâng Rangkoh

(Mathiu 19.13-15; Mak 10.13-16)

¹⁵Mihnyan heh ma thin chhuchha heh Jisu tânâng ate dekma chensahloa ngama siethok kohwah. Phumma erepa dijunte heh ma lepkhe lahma thinnâng ritngatwah,

¹⁶Rohkomin Jisu ma naachha heh ate tâko roolahma ngatwah, “Nekjektang en naachha heh ngatânâng chenwãngra, chenrãngma ngako Joban Hahsông pa arerãngrãng heh thiak.

¹⁷Arepa thonghontan en! Henhenma Joban Hahsông pa are naachha heh hung arin rãngrãng danglahma lekep dangeka ereheh chenthumin Joban Hahsông theko leta chohwãngmin.”

Techhuwa

(Mathiu 19.16-30; Mak 10.17-31)

¹⁸Jews khhepho wathema Jisu nâng thôngphâ wah, “Hethôte sen, ngama roantang roanjêng roandông tâchoh rãng chenni moatmin a?”

¹⁹Jisu ma atenâng thôngphâ wah, “Nangma nganâng asen ngama chenrãng roo ehanga?” “Asen henjô aho, Joban loloba asen etonga.

²⁰Nangma Joban hôkum pa ajet: ‘Mihtangnyu demnâng kaamchhih nekmo; mih nekritphe; ahuh nekre; lethenâng mih neksêkham; nang nyong nangwa nginkepkep dango.’ ”

²¹Mihwa pumma dânthâng wah, “Nga letachha thumajû are hôkum heh phangtang lâkeptek.”

²²Chenthu Jisu ma are nginpa tatphumma atenâng ngatwah, “Nangma moatthin ademin wanthe tonga. Nang chhahkhem heh phangtang senglohma ngunpa tangchhih hehnâng koh o, ngale erohkoba nanga rangkhethung nâng techhu thôn edango; erediko kalohma ngadijun hang.”

²³Rohkomin chenthu atema are nginpa tatphumma nyahrãng hungkêwah, chenrãngma ngako atea nyahrãng techhu dângwah.

²⁴Jisu ma ate hungkê khelahma ngatwah, “Techhu heh Joban Hahsông thenâng wãngpa chentolat a!



²⁵Techhu heh Joban Hahsông thenâng tâwâng noma ut peba metku polo pumma eta lienlup a.”

²⁶Ate ngin tatte mihnyan heh ma Jisu nâng thôngphâ wah, “Eroh medang ako henkho tâpemin a?”

²⁷Jisu ma thinnâng dânthâng wah, “Chenpa mihnyan nyuchha ma letalia, erepa Joban ma tamoa.”

²⁸Erediko Piter ma ngatwah, “Sûtan! nima ni humte tangkâ heh phethien lihma nang dijun eki.”

²⁹Jisu ma thinnâng ngatwah, “Ngama nenâng thôkoh eka, henma komin Joban Hahsông rãngma ate humte tangkâ, ate tangnyu, pho anaa, nyong awa, ba chhuchha, heh phethien eka

³⁰ereheh ma are roanko ajahthem echoh a, ngale ahokmin roandông komin roantang roanjêng roandông echoh a.”

Jisu ma Lôremrãng Ate Rit junma Jabwah

(Mathiu 20.17-19; Mak 10.32-34)

³¹Jisu ma dijunte echhi waniipa araangrang sietchhoan lahma ngatwah, “Tattan en! Nãnga Jeroselem nâng wãngeki, ngale mông heh ma Mihnyan Chha junma chentô raangtah a ereheh phangtang toangtang edanga.

³²Atea Jews ledangte heh deknâng ekoh a, phumma thinma thãjõ lembe ehôan a, erediko jôjêm lahma thoakkahma thoak erea.

³³Thinma watalahma ritphe erea, rohkomin jârem diko atea ngakhîn erea.”

³⁴Rohkomin are ngin thôkoh ekapa dijunte heh ma jetloho; are nginpa thinnâng lejetthuk thangma huhthien lahma dângwah, ngale Jisu ma chenni jabeka erepa thinma jetloho.

Jisu ma Chutphek Chhahte Mitdoak Sênsiet

(Mathiu 20.29-34; Mak 10.46-52)

³⁵Jisu Jeriko hah kêko hokko, mitdoak wathe lemkahko tonglahma thaphhek chhah lahma dângwah.



³⁶Chenthu atema mihnyan heh dânkhoam pa tatko, “chenni dangeka?” ngama thôngphâ wah.

³⁷“Nazarat wah Jisu dankhoam eka” ngama mihnyan heh ma atenâng thôkoh wah.

³⁸Phumma, “Jisu! Devit Chha! Nganâng mammin chenhâng!” ngama ate raksepwah.

³⁹Ate mathah kowah mihnyan heh ma kihchepchep tongo ngama ritngatwah. Rohkomin atema, “Devit Chha! nganâng mammînchen hang!” ngama ajahjah chaanrakwah.

⁴⁰Ephumma Jisu ma cheplahma mitdoak wapa ate tânâng sietwênrãng ngatwah. Ate tâko hokwâng phumma Jisu ma atenâng chienwah,

⁴¹“Ngama nangrãng chenni moatkohhun eko?” Mitdoak pumma, “Teso, ngamitma ngakkhe hun ekang,” ngama dânthâng wah.

⁴²Jisu ma atenâng ngatwah, “Eroh medang ako kheo! Nang putedâlem pumma lâsensiettho.”

⁴³Ephumma atema lemlienma jienkhe wah, ngale Joban nâng dangkoh a ngama ngalahma Jisu diko junkhoam wah. Chenthu mihnyan heh ma erepa khelahma phangtangma Joban nâng rôwah.

Luk 19

Jisu ngale Zakaria

¹Jisu Jeriko hahdaang pumma dânkhôamwah.

²Ere hahko thâkho thâte kowah dongthônâpa dângwah, ngale ate mînpa Zakaria dângwah, atea nyahrãng techhu dângwah.

³Atema Jisu pa hen a ngama nyahrãng khehun dângwah, rohkomin atea hathoan dâng phumma ngale mihnyan heh jahmông dângjunko atema tachoh kheho.

⁴Eroh wah mihheh mako chhoanwângla lahma Jisu nâng sokrãng ate katlem wah Sykomor bãngko koatwâng lâwah.



⁵Jisu ma eretheko hûlahma bãngkhoko suwên lahma Zakaria nâng ngatwah, “Zakaria, sitsiak jâkaro, chenrãngma ngako thejâ nga nanghumnâng tângmin.”

⁶Zakaria sitsiak jâka lahma khuhah nâhah Jisu nâng tângroowah.

⁷Erepa khête mihnyan heh phangtang jabwah, “Are mihnyan pa papi mihnyan humnâng hûeka!”

⁸Zakaria toanchep lahma Teso nâng ngatwah, “Teso tattan! Ngama nga chhahkhem hehwah khakapa tangchhih hehnâng ekoh ang, ngale ngama hennâng komin mediapchhah tekko, ngama erenoma thiakbelii ajah engakkoh ang.”

⁹Jisu ma atenâng ngatwah, “Thejâ khope pa are mihnyan humko lâkatha, chenrãngma ngako are mihnyan pemin Abraham pôali jôba.

¹⁰Chenrãngma ngako, Mihnyan Chhapa mah asante heh lemtê ngale pepângrãng kaera.”

Kem Ngunpha Thakthô

(Mathiu 25.14-30)

¹¹Mihnyan heh ma are nginpa jetat poatko, Jisu ma thinnâng nginthakthô wanthe thôkoh wah. Ere sanpoatko atea Jeroselem nâng hunemnem dângwah, ngale thinma Joban Hahsông pa arohroh ehongka themra ngama thônghun wah.

¹²Ephumma atema ngatwah, “Rekthenâng sahhabdong wathe hahtaang diak wantenâng chhoan lahma atea ere diakko Lowang rãng dângchoanwah, ngale erediko ate humnâng ngakhokrãng themawa wah.

¹³Ate chhoan mako, ate haa waechhi pa roolahma thinnâng kem ngunpha kohlahma ngatwah, ‘Nga chhoan diko nema are ngun pumma biila en.’

¹⁴Phumma ate mihnyan heh ma atenâng mitchekwah, ngale erohwah thinma ate diko nginmatte junchien katwah, thinma ngatwah, ‘Nima are mihnyan pa ni lowang rãng dângthuk hunmih.’



- ¹⁵“Ere wapa lowang danglahma ngakhok wah. Ngale ate haa hehma chentôru khôanbitah a ngama jetrăng atema haaheh lemlienma khôanroo thukwah.
- ¹⁶Khebâng wah pa hûlahma ngatwah, ‘Tângte, nangma nganâng phathe kohthang pumma ngama kem ngunpha phaechhi lâchoh biilatek.’
- ¹⁷Tângte pumma ngatwah, ‘Kaamsen lâmotoh’ ‘Nanga haasen! ngale nangma amănchha pa toangtangma jiensemdi, ngama nangnâng hahdaang wanechhi epênthuk e.’
- ¹⁸Erediko wah haa wathapa hûlahma ngathokwah, ‘Tângte, nangma wanthe kohthang pumma ahan wanbangâ kem ngunpha lâchoh biilatek.’
- ¹⁹Erewa komin atema ngatwah, ‘Nangmemin hahdaang wanbangâ pênmin.’
- ²⁰Ahan haa wanthe pa hûlahma ngatwah, ‘Tângte, nang kem ngunpha pa anã; ngama khetnâng sitlekma huhthienwah.
- ²¹Nga nangran chei rekăng, chenrăngma ngako nanga nyahrăng mihchhihjat. Nangma chenpa nangthiak ledanga erepemin kepeko ngale nangma lekhiat leliwah hehmin kepeko.’
- ²²Tângte pumma atenâng ngatwah, ‘Nanga haachhih! Nangdede jabkhab junko ngama nangnâng echêmsiet e! Nangma ajet nga mihchhihjat ngama, ngale chenpa ngarăng ledanga erepemin ngama rângkep ang ngama, erediko ngama lekhiat leliwah hehmin rângkep ang ngama.
- ²³Ephumma nangma nga ngunpa chenrăngma ngunthien humnâng lethien dangtoh a? Nangma ngunthien humnâng thien lohmeke nga ngakhokko ngunchha demnâng ajah chohminwah.’
- ²⁴Erediko erethe kowah chepte hehnâng atema ngatwah, ‘Ate ngewah kem ngunpha pa thaletma wanechhi Cheiteko koh en.’
- ²⁵Phumma thinma tângteko ngatwah, ‘Tângte, atenâng wanechhi pa tongajû dangmahne!’



²⁶Atema dânthâng wah, ‘Ngama nenâng thôkoh eka,’ ‘hennâng chenni komin tongeka, ereko ajah lêkohmin; rohkomin hennâng chennimin aho dangeka, atema chenni cheieka erepemin toanchhoan rêmin.

²⁷Ade dangeka, Nga thin lowang rãng dângthuk lehunte ngaran heh aretheko siethu letma nga tâko ritphe en!’ ”

Tajien Lahma Jeroselem nâng Hok

(Mathiu 21.1-11; Mak 11.1-11; Jon 12.12-19)

²⁸Jisu ma arepa ngatdiko, thin mathah pumma Jeroselem nâng dânwângwah.

²⁹Ate Oliv hahho kowah batphas ngale Bathani hahko hokko, atema khemanâng dijunte wanii chienwên lâwah

³⁰Atema are ngin heh thôko lahma chienwên lâwah: “Nema wah hahdaangko wãngla en; eko nema Gado chha mihnyan henjô mathat chhang thietlahma echohkhe en. Erepa jânletma anâng sietkatrên.

³¹Henma komin chenrãng jân eken a ngama methongpha hênko, atenâng Teso ma arepa lemeka ngama thôkoh en.”

³²Wãng lahma thinnâng Jisu ma chenroh thôkotah a eroh chohkhe wângwah.

³³Thinma Gado chhapa jân thuko, tângte pumma ngatwah, “Chenrãng jân eken a?”

³⁴“Teso ma lemeka,” ngama thinma dânthâng wah,

³⁵Ngale thinma Gado chhapa Jisu tânâng sietkat kohwah. Erediko thinma khet ekhu heh Gado khohko kêmwên lahma chhangthuk wah.

³⁶Jisu Gado khohko chhang lahma khôamko, mihnyan heh ma thin khet heh lemko kêmwah.

³⁷Chenthu Jeroselem kêwah Oliv hahho nâng jâkhôm katthin lemtheke hokko, ate dijunte jahmõang dangtah heh ma chentô moatlem dong patritli heh khelahma Joban nâng chaanmõang raklahma rôwah:

³⁸“Teso mînko hokte lowang ko Joban ma rangkoh eka! Rangkhethung nâng mêmo dangeka ngale Joban mîn dongthuk eka!”



³⁹Erediko mihnyan heh chhangwah Farasi heh ma Jisu nâng ngatwah. “Hethôte” “Nang dijunte hehnâng kihchepchep tângrăng chien o!”

⁴⁰Jisu ma dânthâng wah, “Ngama nenâng thôkoh eka, areheh mekihtong ako, long heh ma ehongrak a.”

Jisu Jeroselem Răngma Sep

⁴¹Ate Jeroselem tâko hokkhoam rienrien, Jeroselem pa khelahma sep rewah,

⁴²Atema ngatwah, “Thejâ nema chenroh mêmô jiendângmin a erepa jetngako chentôsên dângmin wah a! rohkomin athângheh erepa khemet!”

⁴³Neran heh ma netumlitko panhoan lahma chentô suk anoangma nelemtek lahma kôam sanpoat pa ehûra.

⁴⁴Thinma nemin erediko ne mihnyan heh phangtang eritphehên; longphang phangthem in khohkhoh petpet thintheko letong tumin, chenrăngma ngako Joban ne pepângrăng katha sanpoat pa nema jetmet!”

Jisu Rangsoamhum nâng Wâng

(Mathiu 21.12-17; Mak 11.15-19; Jon 2.13-22)

⁴⁵Erediko Jisu Rangsoamhum nâng wâng lahma erekowah phinseng thāsengte heh junloatwah,

⁴⁶Thinnâng ngatwah, “Joban ma aroh jablahma Joban nyapraang nâng raangeka, ‘Nga Hum pa Rangsoamhum ngama ngatmin.’ Rohkomin arepa nema ahuhete heh huhtông thin therăng hân eken!”

⁴⁷Rangwo roakweih Jisu ma Rangsoamhum ko hethô wah. Soam aroakte adong, Niemarang hethôte, ngale khhepho phannang heh ma Jisu ritphe râng hunwah,

⁴⁸Rohkomin thinma jienritpheho, chenrăngma ngako mihnyan heh phangtang Jisu jabkhab khabthem in lienphe lehun thangma jetat hunwah.

Luk 20

Jisu ma Chaan chenwah Choh eka ngama Thôngphâ

(Mathiu 21.23-27; Mak 11.27-33)



¹Jâthenâng Jisu ma Rangsoamhum nâng mihnyan hehnâng hethô ngale Joban wah nginkongsen pa thôkoh rewah, phumma ere sanpoatko Soam aroakte adong ngale Niemarang hethôte erediko khhepho phannang heh hûlahma

²thinma Jisu nâng ngatwah, “Ninâng thôkohhi, nangma chenni wah chaanma areheh moekoa? Are chaanpa nangnâng henma koh ehoa?”

³Jisu ma thinnâng dânthâng wah, “Ngamemin nenâng ngin wanthe chhien a. Nganâng thôkoh tanha,

⁴Jon ma baptijem kohrăng chaanpa Joban wah chohtah ale mihnyan wah chohtah a?”

⁵Ephumma thindede tungko chhiakmîn wah, “Năngma chenroh danthang ea? Năngma, ‘Joban wah choh eka,’ ngama menga eko, ‘eroh medang, ako nema Jon nâng chenrăngma leputedâlem re eken a?’ ngama engahi.

⁶Rohkomin năngma, ‘mihnyan wah choh eka, ngama menga eko are mihnyan hehma năngnâng longma epet hi,’ chenrăngma ngako thinma Jon pa Mông ngama putedâlem eka.”

⁷Eroh wah thinma, “chennângwah choh eka erepa nima jetmih” ngama dânthâng wah.

⁸Ngale Jisu ma thinnâng ngatwah, “Eroh medang ako ngamemin areheh chenni chaanma moekănga erepa thôkomah.”

Angurthong khoakhêm Sokte Nginthakthô

(Mathiu 21.33-46; Mak 12.1-12)

⁹Erediko Jisu ma mihnyan hehnâng are nginthakthô pa thôkoh wah: “Rekthenâng mihnyan wathema angurthong khietlahma, mihnâng aroamrăng mothukthien lahma, melâng rangpârăng ate humwah chhoanwah.

¹⁰Chenthu angur chûm rangkuh hokphumma, aroamrăng mothuktah mihnyan heh tânâng ate haahêh ate thiak thârăng chienkatwah. Rohkomin aroamrăng mothuktah mihnyan hehma haa hehnâng walahma chenjô lekoh ngakchienwên wah.



¹¹Ephumma atema haa ahan wîenthe chienkatwah; rohkomin aroamrãng moatte mihnyan hehma erekomin awat rewah, ngale thājô lembe hōanjōan lahma chenjô lekoh ngakchienwên wah.

¹²Erediko atema haa ahan lôremrãng chienkatwah; angurthong moatte hehma ere haa komin watwah, ngale panlien nâng phekatwah.

¹³Erediko angurthong tângtewa pumma ngatwah, ‘Ngama chenre anga? Ngama ngachha nyahrãng hunlekma thien ekãngpa chienkat ang; thinma ate ngin ekepthêm a!’

¹⁴Roh-komin chenthu aroamrãng moatte mihnyan hehma ate chhapa khephumma, thindede tungko jabmînwah, ‘Arepa tângtewa chhapa. Nãngma ate ritphe e, ephumma ate thiak aman heh nãngrãng edanga!’

¹⁵Ephumma angurthong kowah petphekat lahma ritphewah. “Eroh medang ako, angurthong khiette tângtewa pumma aroamrãng mothuktah hehnâng chenremin a?” ngama Jisu ma thôngphâ wah.

¹⁶“Ate kalahma ere mihnyan heh phangtang eritpheka a, ngale angurthongpa mihhan demnâng eroam motûa.” Mihnyan hehma erengin pa tatlahma, “Aroh chenthumin dangmah!” ngama ngatwah.

¹⁷Jisu ma thinnâng sûlahma chhienwah, “Eroh medang ako, are Joban nyapraang pa chenni nâng ngaeka? ‘Humhôte ma longchhih ngama phe eka longpa chentô noma alemthōan longrãng dangeka.’

¹⁸Ere long khohko chentô chatjâeka ereheh khihkhiih nyahnyah dângmin; ngale ere longpa henkhohnâng komin mechatjâ ako, ere mihnyan pa bumrãng lândangroh ekhihpet a.”

Thăkhokoh junma Ngin Chhien

(Mathiu 22.15-22; Mak 12.13-17)

¹⁹Niemarang hethôte ngale soam aroakte adong hehma Jisu ere thetheko loatkheh rãng phungwah, chenrãngma ngako Jisu ma are nginthakthô pa nilelat nâng thôkoh eka ngama thinma jetritwah; rohkomin thin a mihnyan heh ranchei dângwah.



²⁰Ephumma thinma sanpoat ahan lêmsokwah. Thinma mihnyan khuthe nâng mihnyansen rãngrãng diapdangthuk lahma Jisu nâng nginthongpha lahma bukritthukrãng chienkatwah, erohkoba thinma thôte jabte ngale Roman Govono nâng ejien lokhhek thuk a.

²¹Erekowah mihnyansen rãngrãng diapdang lahma katte hehma Jisu nâng ngatwah, “Hethôte, nima ajet nangma chenni jab eko ngale hethô eko ereheh toangtang. Nima ajet nangma hennâng min adong arin roak atoak weihmoh, rohkomin Joban nginpa toangtangma mihnyan hehnâng phoangthôkoh eko.

²²Ninâng thôkohtanhi, Nima Roman Chofa nâng thãkho takoh ele takohmih a?”

²³Rohkomin thinma buthi hân ekapa Jisu ma lepke lahma thinnâng ngatwah,

²⁴“Nganâng janngunpha khesok tanha. Ereko hen thenphãng raangeka ngale henmin raanglahma tonga?” “Chofa,” ngama thinma dânthâng wah.

²⁵Ephumma Jisu ma ngatwah, “Eroh medang ako, chenpa Chofa thiak a arepa Chofa nâng koh en, ngale chenpa Joban thiak a arepa Joban nâng koh en.”

²⁶Ereko mihnyan heh mathahko thinma chenni nângmin jienbukrii thuk ho, ephumma thin a kihchepchep kihtôngwah, ngale atema dânthang eka ngin junko barii lahma tôngwah.

Arit wah Ngakhîn rãngma Thôngphã

(Mathiu 22.23-33; Mak 12.18-27)

²⁷Erediko mihnyan ritwah ngakhinmah ngama ngatte Saduki heh hûlahma Jisu nâng ngatwah,

²⁸“Hethôte, are Niemarang pa Mosa ma nirãng raangkohwah: ‘delawa wathe chha machhama merii ako, atema phethien eka janthoinyu pa ate naa pumma chhachhatrãng ngakkepmin, phumma ere wanii pumma chhaeka pa rit retahwa chha ngama ngatmin’.

²⁹Rekthenâng chhepho waengit dângwah; Khhepho thôn pumma dihiak keplahma chha machhama ritwah.



- ³⁰Phumma medemwa pumma ere dihiaknyu pa kepwah,
- ³¹ngale erediko ate naa pumma wienkepwah. Chhepho waengitlat eroh dângwah - phangtang chha lechha thangma ritwah.
- ³²Athôanko dihiaknyu pemin ritwah.
- ³³Phumma, aritte heh ngakhin jâko atea hen tangnyu dângmin a? Chenrăngma ngako chhepho waengit latma ate kepwah.”
- ³⁴Jisu ma thinnâng dânthâng wah, “Areroan wah dihiak dela hehba kepmin eka,
- ³⁵Rohkomin ritwah ngakhin lahma ahokminwah roandôngko dôngte dihiaknyu ngale delawa heh lekepmîn tumin.
- ³⁶Thin a rangkethung wah Joban ngintatte heh răngrăng dângmin ngale ritmin lerii tumin. Thin a Joban chharăng dângtûmin, chenrăngma ngako thin a ritwah ngakhin eka.
- ³⁷Ngale mihnyan heh ritwah ngakhin eka ngama Mosa ma sâpoangpoang khesok eka. Wunbuk nâng wendô ngin raangtahko atema Teso pa, ‘Abraham Joban, Isak Joban ngale Jakob Joban ngama jabwah.’
- ³⁸Atea ahînte heh Joban, aritte heh Joban dangmah, ate demnâng dângte heh phangtang ahînte.”
- ³⁹Niemarang hethôte khuthema loatjabwah, “Hethôte, nyahrăng lâpun dânthangtoh!”
- ⁴⁰Ere diphumma thinma chenjô chinthôngphâ tuho.

Misaia junma Thôngphâ
(Mathiu 22.41-46; Mak 12.35-37)

- ⁴¹Jisu ma thinnâng thôngphâ wah, “Misaia pa Devit chhuchha ngama chenroh jienngatmin a?
- ⁴²Chenrăngma ngako Devit ate dedema Rangsoamsê titabko ngaeka, ‘Teso ma nga Teso nâng ngaeka: Ngama nangran heh nang daphâ khenko mathien thienkohko



⁴³Are nga dekchah ko tongwãngro.’

⁴⁴Devit ma atenâng ‘Teso’ ngama roowah; eroh medang ako Misaia pa Devit chhuchha chenroh jiendângmin a?”

Jisu ma Niemarang Hethôte hehnâng Achhih ngat

(Mathiu 23.1-36; Mak 12.38-40)

⁴⁵Mihnyan heh phangtang ate ngin jêtatthuko, Jisu ma ate dijunte hehnâng ngatwah,

⁴⁶“Niemarang hethôte hehwah jetletma dangen, thin a bôjat nâng khetlo dongpa pohlahma phoangkhoam lahma mihnyan hehma thinran cheichei rânjab huneka, Thinma Sanagog nângmin thin tângthin pa châthien eka ngale kuhhânthin nângmin tângthinsen hunwak eka;

⁴⁷Thinma janthoinyu heh helêmrãng keplahma thin humpa longchhah rewak eka, ngale thinnâng rang lolili soamlahma khesok rewak eka. Erethã thinma ajahthem chêmchhih echohwak a!”

Luk 21

Janthoinyu ma Ngun Sekkoh

(Mak 12.41-44)

¹Techhu hehma Rangsoamhum wah ngunsek bâkoatko thin hînhô heh sekhok pa Jisu ma tumlit phoangsok wah,

²ngale nyahrãng tangchhih janthoinyu ma janngun phanii sekhok pemin atema khewah.

³Jisu ma ngatwah, “Ngama nenâng thôkoh eka, are tangchhih janthoinyu pumma chentô noma ajahthôn sek eka.

⁴Chenrãngma ngako, ahan hehma thinnâng lephangleng bâeka hehwah sekhûera; rohkomin atea aretô tangchhih danglahma atema chentô chêika erepa phangtang sek eka.”

Jisu ma Rangsoamhum Chhihjá Ngin Jab

(Mathiu 24.1, 2; Mak 13.1, 2)



⁵Dijunte khuthe ere Rangsoamhum junma jabmînwah, chentô nyoaksokli sên a, long heh sênpa ngale Joban nâng hînhô kohhû eka heh sênpa ngama jabmînwah. Phumma Jisu ma ngatwah,

⁶“Nema are chentô khe eken long heh phangthemîn ate theko letongtu sanpoat pa ehûra; phangtang runjâ erea.”

Chêmchei ngale Mihma Chêmsiet

(Mathiu 24.3-14; Mak 13.3-13)

⁷Thinma thôngphâ wah, “Hethôte, arepa chenthu dângmin a? ngale areheh dângrăng sanpoat pa lâthângtah ngama jetrăng chenni dângmin a?”

⁸Jisu ma ngatwah, “Jetletma dangen; mihnâng nekdiep chhahrii en. Ajahthem mihnyan heh ma ngamîn keplahma ehûra, thinma ‘nga a ate!’ ngama engawak a, ngale ‘Sanpoat pa lâhûtha!’ ngamemin engawak a, rohkomin thindi nekjun en.

⁹Chenthu nema ranloatmîn ngale rantîn ngemtîn metat enkomin nekchei en; ererăngrăng heh khebeng bengdâng mêngmin, rohkomin ereheh junko athôn sanpoat pa lân amtha ngama dangmah.”

¹⁰Jisu ma thôkoh wah, “Diakthe pumma diakthe demko eloatmîn a; wanthe hahsông pa ahan wanthe hahsông demko elongmîn a.

¹¹Hahtiidong pa tii erea, rêmdongpa hû erera, chentô thenâng khoanchet chhih hong erea; rangkho wah cheili ngale ajatjatmin ehong kara.

¹²Are chentôpa dângmako, khebângko ne loatkhek ere hên ngale chêmthukmin ere hên; nea Sanagog nâng siethû lahma sekham lahma phâtek nâng esek hên; nea ngadijunte dângdi lowang ngale diak pête hehmako siethû lahma esekham hên.

¹³Are sanpoatko nema Nginkongsen pa eta thôkoh en.

¹⁴Ere sanpoat pa hokmako nema chenroh pêthângmin a ngama lesekmah thangma dângrăng thonghun letma tongen,



¹⁵chenrãngma ngako neran hehma ne nginko lejien dakli ngale lejien dânthangtuli nema jiendânthâng rãng ngama nenâng jabkhab ngale buthi mongthem ekoh a.

¹⁶Ne nyong newa, nepho anaa, ngale netang amang, ngale ne lemruçhha hehma elokhhek thuk hèn; ngale nekhuwah aritphemin erehèn.

¹⁷Nganâng putedâlem junko anga ngama chinnya ere hèn.

¹⁸Rohkomin nekhawah khochoo lathemin lemahmin.

¹⁹Putedâlem nâng rôngtângtâng dangen, erohkoba nedede eta pesietrii en.

Jisu ma Jeroselem Chhihjà Rãngma Jab

(Mathiu 24.15-21; Mak 13.14-19)

²⁰“Chenthu nema Jeroselem pa Sipâhi ma tùmchep lahma makhetetko, Jeroselem pa sitsiak chhihjárãng ngaeka ngama ejet en.

²¹Erediko Judia wah sôngte mihnyan heh hahhokho nâng ehuh chhoanwãnga; Hahdaang kowah hehmin loatchhoan rêmin, ngale erediak kowah rangsâ nâng dângwah hehmin hahdaang nâng lengak hûtumin.

²²Chenrãngma ngako ere sanpoat pa, Joban nyapraangma ‘Chêmchoh sanpoat dângmin ngama,’ ngaeka chentôpa linlin edanga.

²³Ere sanpoat kowah naawunte dihiaknyu ngale naajeng chha demnâng dângte dihiaknyu hehrãngma chentô chhih dângmin a! Are hahtokkhoh ko nyahrãng chêmchhih ehûra, ngale ere mihnyan heh khohko Joban wah chêmchei pa ekara.

²⁴Khakapa dengnâng eriaa, ngale khakapa chentô diak akan hehnâng ekhhek chhoan a; ngale Jews ledangte hehma Jeroselem pa thin sanpoat pa mathâng thângkako dama ewoatnek a.

Mihnyan Chha Hok

(Mathiu 24.29-31; Mak 13.24-27)

²⁵“San, Dâ, ngale Merit hehmin ajatjat edangjâa. Hahtokkhoh wah chentô diak akan heh hungchhih rek mah edanga, ngale josi rahlîn rek akah heh tatlahma nyahrãng echeiwak a.



²⁶Hahtokkhoh kowah patrit sekma thin hokpa khelahma mihnyan heh cheima moklek lahma ritwâng erewak a, chenrãngma ngako rangkho wah san, dâ, ngale merit erediko chentôpa jârit erea.

²⁷Erediko Mihnyan Chhapa phoamkhoh nâng chaan ahâng demnâng ehong kara.

²⁸Chenthu ererãngrãng heh medang tahko, sekma patrit lere thangma khuhah nâhah dangletma toansûwên en, chenrãngma ngako ne khope pa namhû era.”

Phukbãng wah He

(Mathiu 24.32-35; Mak 13.28-31)

²⁹Erediko Jisu ma are nginthakthô pa thôkoh wah: “Phukbãng ngale ahan bãnghehnâng thatthonghun tan en.

³⁰Chenthu nema bãngheh achhong mechhong tahko, nema rangchodâng lâthângtah ngama rângnga en.

³¹Ererãngrãngjô, chenthu nema areheh danglahma mekhetet ko, nema Joban Hahsông pa lânam hûtha ngama ejet en.

³²“Thonghun en, areheh phangtang athângwah ahînte mihnyan heh phangtang târitmako edanga.

³³Rangle hah eta chhihjâa, rohkomin nga jabkhab pa chenthumin leta chhihjâmin.

Jetlihma Dângmin

³⁴“Jetletma dangen, ngale jokphhek chhah, erediko are hahtokkhoh roandông rãng sekma patritjû nekdangen, eroh medang enko ere rangwo pumma lemlienma

³⁵benâng mânwah rãngrãng môangleplo hûhên. Chenrãngma ngako ererangwopa hahtokkhoh wah chentô mihnyan heh khohnâng hokmin.

³⁶Eroh-wah jetletma dangen, ngale are chentô dângwângthin hehwah tapeletma Mihnyan Chha mathahko tâhokwâng rãng chaan chenchoh en ngama roantang rangsoam letma tongen.”



³⁷Ere sanpoatko rangwo roakweih Jisu ma mihnyan hehnâng Rangsoamhum nâng hethô lahma dângwah, ngale sanhêmthah ko, chhoan lahma rangpen pa Oliv hahhokho ko tôngwângwah.

³⁸Rangkhahkho roakweih mihnyan heh phangtang atewah ngin chohtatrâng Rangsoamhum nâng chîhokwah.

Luk 22

Jisu Lelatnâng Ranchep

(Mathiu 26.1-5; Mak 14.1, 2; Jon 11.45-53)

¹Wichhi lesak pheban phhek lokuh pa thângnemnem dângwah, arepa Adankhoam lokuh ngamemin ngaeka.

²Soam aroakte adong ngale Niemarang hethôte heh mihnyan heh ranchei dângwah, ngale erohwah thinma Jisu ahuhchha ma ritphe rãng themawa wah.

Jisu Chênseng Rãng Juda Nyoak

(Mathiu 26.14-16; Mak 14.10, 11)

³Erediko Jisu dijunte echhi wanii kowah wathe nâng juchhih lupwah, ate mînpa Juda Iskarot dângwah.

⁴Ere diphumma Juda soam aroakte adong ngale Rangsoamhum bemte adong heh tânâng wãng lahma atema thin demnâng Jisu chênsâng ngin thômîn wah.

⁵Thin nyahrãng khuhah lahma ngun koh e ngama ngatwah.

⁶Juda thin nginko nyoak lahma mihnâng hennâng min lejetrii thangma thindeknâng Jisu loatthukrãng sanpoatsen lêmsokwah.

Jisu ma Adankhoam Lokuh Phhekchhah chhahrãng Khoakhêm

(Mathiu 26.17-25; Mak 14.12-21; Jon 13.21-30)

⁷Wichhi lesak pheban phhek lokuh poatko Adankhoam Lokuhrãng saak joatjâ rangwo pa hokwah.

⁸Jisu ma Piter ngale Jon ninâng are ngin heh thôko lahma chienwênwah: “Wãngletma năngkhuma chhahrãng Adankhoam lokuh phhekchhah pa khoakhem wângen.”



⁹“Nangma chenriang nâng khoakhêm rãng hun ekoa?” ngama thinma atenâng chienwah.

¹⁰Atema dânthâng wah, “Ne hahdaangko wângko, jo hènlahma mihwa echohmin hèn. Phumma ate lupwãng eka humko junlup wãngen,

¹¹ngale ere hum tângte wako thôkoh en: ‘Hethôte ma nangnâng chhien eho, chenko ngadijunte ngale ngama Adankhoam lokuh phhekchhah chhahmin a?’

¹²Atema lemtokdâng ko nyahrãng khoakhem lahma thewanthe ekhesok hèn, eretheko nema chentôpa khoakhem lahma echohkhe en.”

¹³Thinma wãng lahma Jisu ma chenroh thôkohtah a ererãng rãng chohkhe wah, ephumma thinma Adankhoam lokuh phhekchhah pa eretheko khoakhêm wah.

Teso Phhekchhah

(Mathiu 26.26-30; Mak 14.22-26; 1 Korint 11.23-25)

¹⁴Sanpoat hokphumma, Jisu ma moattat chhoante heh demko khoangko tôngwângwah.

¹⁵Jisu ma thinnâng ngatwah, “Ngama chêmchoh mako are Adankhoam lokuh phhekchhah pa nedemnâng nyahrãng roamchhah hun ekang!

¹⁶Chenrãngma ngako ngama nenâng thôkoh eka, Joban Hahsông moatlem pa phangtang mata tamo, ngama are phhekchhah pa lethechhah tumin.”

¹⁷Jisu ma bâti toanlahma Joban nâng dangkoh a ngat rangsoam lahma ngatwah, “Arepa thaha ngale nekhuma phenjok en.

¹⁸Ngama nenâng thôkoh eka, ade phumma Joban Hahsông pa makakako ngama are penriti kowah lethejok tumin.”

¹⁹Erediko atema bankên chhupthe toanlahma Joban nâng dangkoh a ngat rangsoam lahma chhupsietwah, ngale thinnâng kohlahma ngatwah, “Arepa ngaphoang, nekhurãng koh ekang. Arepa nema nganâng chhemhunrãng mo en.”



²⁰Ererãngrãngjô, rangjâ phhekchhah chhah diko atema aroh ngalahma thinnâng bâti kohwah, “Are bâti kowah ngahei demko Joban wah toamnyan semlahma tonga, are ngahei pa nekhurãng hongeka.

²¹“Rohkomin sûtan en! Nga chênsângte pa ngademko are khoangko johtong lahma tonga!

²²Mihnyan Chhapa Joban ma chenroh themawa eka eroh eriaa, rohkomin are nga chênsengte mihnyan rãngma chentô chhih dãngmin a!”

²³Nãngkhuwah are moattepa hendãngmin a ngama, thindede thôngphâ mìnwah.

Adongthôn Dãng junma Chhiakmìn

²⁴Dijunte heh wah henpa adongthôn dãngmin a ngama chhiakmìn wah.

²⁵Jisu ma thinnâng ngatwah, “Joban lejette mihnyan heh lowang hehma thin mihnyan heh khohko leng achaaarii lahma pên eka, ngale thôte jabte hehma nia ‘Mihnyan nãng chohsokte’ ngama ngarii eka.

²⁶Rohkomin nekhuh eroh ledangmin; erenoma, nekhuchhang wah adongthôn pa letathôn rãngrãng dãngmin, ngale lemsênte khhepho thôn pa haa rãngrãng dãngmin.

²⁷Henpa adongthôn a, phhekchhah chhahrãng tângte pele akhoamkhêmte pa? Phhekchhah chhahrãng tângte pa adongthôn eta dangthêm a. Rohkomin nga a nekhuh chhangko khoamkhêmte rãngrãng dangekang.

²⁸“Ngama chêmchoh poatko nekhuh nga demnãng johtongtha;

²⁹ngale rangkethung wah nga Wama nganâng chenroh pênthuk ehanga, ererãngrãng ngamemin nenâng pênthuk eka.

³⁰Nga Hahsông theko nemin ngademko aroamma ejoh jokphhek chhahha, ngale nemin Lowang tângthinko tongletma echhi kunii Isrial heh epên en.

Piter ma Jisu Jetmek ngama ngat pa Jisu ma khemama Jetwah

(Mathiu 26.31-35; Mak 14.27-31; Jon 13.36-38)



³¹“Simon, Simon! Tattan! juchhihma ne phangtang hungtoanrãng chaan lâchohtah, pitmoatte ma chhahphathoak kowah chhahsek heh rãngrenthien arãngrãng mihnyansen hehmin mihnyan chhih heh demwah renthienmin.

³²Simon, rohkomin ne putedâlem pa nekchen chhihjâ eken ngama rangsoam koh eka. Ngale chenthu nanga ngatânâng mengak huthoko nangpho anaa heh hung dongsiet o.”

³³Piter ma dânthâng wah, “Teso, nga nangdemnâng phâtek nãngmin tajoh wãngrãng, ngale ritmin tajohriie!”

³⁴Jisu ma ngatwah, “Piter, ngama nangnâng thôkoh eki, thejâ rangpen nangma nga jetmahhang ngama ditrem lenga koko wo lewênmin.”

Ngun, Tõng akhak, ngale Deng

³⁵Erediko Jisu ma ate dijunte hehnâng chhienwah, “Chenthu ngama nekhu, ngun, tõng akhak, ngale dapheng lekep thangma chienchhoantah ko nekhumma chennâng thoamtet a?” “Chenni nãngmin thoamho,” ngama thinma dânthâng wah.

³⁶Ngale Jisu ma ngatwah, “Adephumma, henhen nãng ngun akem ngale tõng akhak tonghèn a ereheh nema kepen; ngale henhen nãng dãng ahoa nememin ne chhemchong heh sengletma dengri en.

³⁷Joban nyapraangma ngaeka pa ngama nenâng thôkoh a, ‘Atemin kaamchhih moatte heh demnâng johdangthuk eka’ ngama ngaeka pa toangtang dãngwãngmin, chenrãngma ngako ngarãng chenni raangtah a ereheh toangtang dangwãng era.”

³⁸Dijunte hehma ngatwah, “Sûtan! Teso! areko dãng wannii tonga!” “Erepa lâletah!” ngama ate dânthâng wah.

Jisu ma Oliv Hahhokho ko Rangsoam

(Mathiu 26.36-46; Mak 14.32-42)

³⁹Jisu ere hahdaang kowah loatchhoan lahma jãhanwah rãngrãngjô Oliv hahhoko wãng lahma rangsoam wãngwah; ngale dijunte hehmin ate demko johwãngwah.



⁴⁰Jisu eretheko hukhoam lahma ate dijunte hehnâng ngatwah, “Achhih nâng nekchen jârii ekenma nemin rangsoam en,”

⁴¹Erediko thin tâwah amãnhha taangchhoan lahma dakuhttho lahma rangsoam wah.

⁴²Atema ngatwah, “Ewa, nangma mehun oko are ngawah chêmchei pa rephe kohhang. Rohkomin ngama hun ekang junko dangmah, nangma chenroh hun eko erejunko chendanga.”

⁴³Rangkhethung wah Joban ngintatte kalahma atenâng chaan chohkoh katwah.

⁴⁴Nyahrâng chêmrii lahma rang chaansoam wah; ate ranglêmti pa hei jenwah rãngrãng hahko jâjenwah.

⁴⁵Rangsoam wah toanchep lahma ate dijunte heh tânâng katwah, phumma juplek lahma khekat wah, ngale nyahrâng hungchhih rekma dângwah.

⁴⁶Atema thinnâng ngatwah, “Chenrãngma juplek eken a? Toansat en, ngale achhih ma hungtôanko nekchen jârii ekenma rangsoam en.”

Jisu Loatkhek

(Mathiu 26.47-56; Mak 14.43-50; Jon 18.3-11)

⁴⁷Jisu ma ngin thôthuko echhi wanii dijunte kowah wathe ate mînpa Juda ma lemsen lahma mihnyan heh jahmõang hokwah. Juda khoamwãng lahma Jisu nâng chupjok wah.

⁴⁸Phumma Jisu ma ngatwah, “Juda, nangma chuplohma Mihnyan Chhapa chêsãng ekoa?”

⁴⁹Chenthu Jisu demwah dijunte hehma erekowah chenni dangeka erepa khelahma thinma Jisu nâng ngatwah, “Teso, nimemin nidãng ma doak ea?”

⁵⁰Ngale thinkhuchhang kowah wathema soam aroakte dong haa nâng doaklahma ate nâ jâdoakwah.

⁵¹Rohkomin Jisu ma ngatwah, “Thânga, are tôko chendanga!” Phumma Jisu ma erewa nâko sahlo lahma mesiet kohwah.



⁵²Erediko soam aroakte adong, ngale Rangsoamhum bemte, erediko erethe kowah ate loatkhek rãng hokte khhepho phannang hehnâng ngatwah, “Nga a mihngoan rãng rãng dãng apah kepletma nga loatkhek rãng hûeren a?”

⁵³Nga roantang nedemko Rangsoamhum nãng dãngko, nema lokhek mahtha. Rohkomin athângheh nema moat sanpoat, ngale rangnyek ma pên sanpoat.”

Piter ma Jisu Jetmek ngat

(Mathiu 26.57, 58, 69-75; Mak 14.53, 54, 66-72; Jon 18.12-18, 25-27)

⁵⁴Erediko thinma Jisu khhek lahma soam aroakte adongthôn humnâng sietwênwah; ngale Piter taangtaang manko danglahma junkhoam wah.

⁵⁵Hum thakho nyahrãng mongtangko wen thekwah, ngale erekowah wentûmlit tângte heh demnâng Piter min johtông wah.

⁵⁶Chenthu dihiaknya haa wathema wenko tonglahma khe phumma, atenâng nyahrãng thongthong sùlahma ngatwah, “Are mihnyan pemin Jisu demko dãngwah!”

⁵⁷Rohkomin Piter ma dangmek ngatwah, “Dihiaknyu, nangma chenni ngaeko erepa ngama jetmek!”

⁵⁸Eredi chuthe ritko mihwa wathema Piter lepke lahma ngatwah, “Nangmin Jisu dijunte heh demwah jôba!” Piter ma dânthâng wah, “Mihwa, nga a thin demwah dangmek!”

⁵⁹Ngale koantathetô diko mihhan wathema nangmin Jisu demwah jôba ngama nyahrãng chaanloatwah, “Chêmtungmaang thin aho, are mihnyan pemin Jisu demwah jôba, chenrãngma ngako atemin Galili jat!”

⁶⁰Rohkomin Piter ma dânthâng wah, “Mihwa, nangma chenni jab eko arepa ngama jetmek!” Lemlienma, atema jabthu thuko wo hôngwênwah.

⁶¹Teso ma litphong lahma Piter nãng thongthong ngiaksok katwah, ngale erepoatko Teso ma atenâng ngatah pa Piter ma thônghun wah, “Thejâ rangpen wowên mako, nangma nga jetmahhang ngama lôrem engahang.”

⁶²Piter loatchhoan lahma nyahrãng sepchhoanwah.



Jisu nâng jôjêm ngale Awat

(Mathiu 26.67, 68; Mak 14.65)

⁶³Jisu bêmte mihnyan heh ma atenâng jôjêm lah ma wat rewah.

⁶⁴Ngale thin ma mit doapkhhek lah ma atenâng chhienwah, “Henmawat eho? That jettan!”

⁶⁵Ngale ahan jabkhab chhih heh min atenâng jôjêm lah ma ngatwah.

Jisu Jews heh Khhepho heh tânâng siethok

(Mathiu 26.59-66; Mak 14.55-64; Jon 18.19-24)

⁶⁶Eredijâ rangkhahko, khhepho phannang heh, soam aroakte adong heh, ngale Niemarang hethôte heh chohmînwah, ngale ngoang awang heh tâko Jisu siethokwah.

⁶⁷Thin ma ngatwah, “Ninâng thôkohhi, Nanga Misaia ne?” Ate ma dânthâng wah, “Ngama nenâng methôkoh akomin nema nganâng pute mahha;

⁶⁸ngale ngama nenâng ngin wah methongpha komin nema dânthang mahha.

⁶⁹Rohkomin ade phumma Mihnyan Chhapa Achaanthôn Joban dekchahko etonga.”

⁷⁰Thin phangtang ma ngatwah, “Eroh medang oko nanga Joban Chhane?” Ate ma dânthâng, “Nema Joban Chha ngama lâpun ngatha.”

⁷¹Ngale thin ma ngatwah, “Nima lihân hâkhi lemtumih! Ate ma chenni jabeka arepa nidedema lâchoh tattih!”

Luk 23

Jisu Pilat tânâng siethok

(Mathiu 27.1, 2, 11-14; Mak 15.1-5; Jon 18.28-38)

¹Mihnyan heh phangtang cheplah ma Jisu Pilat tânâng sietkatwah,

²Enâng thin ma bângsekham wah: “Are pumma nãng mihnyan heh phoangkesiet lah ma chohloeki, atema Chofa nãng thãkho lekohmin ngama phoangthôkoh eka, ngale ate dedema nga a Misaia, ngale lowang ngama phoangthôrii eka.”



³Pilat ma Jisu nâng chhienwah, “Nanga Jews heh lowang ne?” “Nangma lâpun jabtoh,” ngama Jisu ma dânthâng wah.

⁴Erediko Pilat ma soam aroakte adong ngale mihnyan hehnâng thôngphâ wah, “Ngama are mihnyan pumma chenni nângjô thelahma chohlomek.”

⁵Rohkomin thinma jahjah chaanjab wah, “Atema phoanghethô lahma Judia diakwah mihnyan heh phangtang phoangjamsiet eka. Atema Galili nâng bângphoang jâmsietwah, ade phumma anângmin lâhû jamsiet katha.”

Jisu Hirot tânâng chienkat

⁶Chenthu Pilat ma are nginpa tatphumma atema chhienwah, “Are mihnyan pa Galili jatne?”

⁷Chenthu Pilat ma Jisu pa Hirot ma pênêka diak khenwah ngama jetphumma, atema Hirot tânâng chienwênwah, erepoatko Hirot a Jeroselem nâng dângwah.

⁸Chenthu Hirot ma Jisu kheko atea nyahrâng khuhahwah, chenrângma ngako atema Jisu nginpa tatlahma chenthu thuma Jisu khehunwah. Jisu ma patritli moatlem molahma echokke ang ngama Hirot ma thônghun wah.

⁹Ephumma Hirot ma Jisu nâng melâng ngin thôngphâ wah, rohkomin Jisu ma chenjô dânthangho.

¹⁰Soam aroakte adong le Niemarang hethôte heh khema nâng cheplahma Jisu nâng nyahrâng chaan sekhamwah.

¹¹Hirot le ate sipâhi hehma Jisu nâng nyahrâng jôjêm lahma rêsethuk wah; erediko thinma khetsenwah pohko lahma Pilat tânâng ngaksietkat wah.

¹²Erejâ pumma Hirot le Pilat nii lemruçhha râng pekmînwah; ere mako thin a randângwah.

Jisu Ritpherâng Ngin Pat

(Mathiu 27.15-26; Mak 15.6-15; Jon 18.39—19.16)

¹³Pilat ma soam aroakte adong, khhepho phannang heh erediko mihnyan heh phangtang khoanroowah,



¹⁴ngale thinnâng ngatwah, “Nema are mihnyan pumma nãng mihnyan heh phoangkesiet eka ngama ngatânâng siethû koh eha. Phumma ngama ne tâko lâthat thôngphatek, rohkomin nema sekham eken rãngrãng ngama atea thelahma chohlomek.

¹⁵Hirok memin atenâng thelahma chohloho, erohwah atema nãngtânâng ngakchienwên era. Are mihnyan pumma ate lanritpheroh chenjô chhihmomah.

¹⁶Eroh wah ngama atenâng watekma chienchhoan ang.”

¹⁸Mihnyan heh phangtangma rakwah, “Ritphere en! Barabas laangphe kohhi!”

¹⁹(Barabas pa hahdaangko phoangjamsiet lahma mih ritphedi phâtek nãng khhekwah.)

²⁰Pilat ma Jisu chhoanthuk hunwah, rohwah atema mihnyan hehnâng thêngak thôngphâ wah.

²¹Phumma mihnyan hehma ngakrakwên wah, “Arittekre en! Arittekre en!”

²²Pilat ma thinnâng lôremrãng ngatwah, “Eroh medang ako atema chenni chhihmotah a? Atea lanritpheroh chenjô chhihmo lahma ngama chohlomek! Ngama atenâng watekma chienchhoan ang.”

²³Rohkomin thinma Jisu pa arittek jôba rêmin ngama chaanmõang rakwah, phumma athôanko linlinjô thinma ngaeka junko dãngwah.

²⁴Ephumma mihnyan hehma ngaeka rãngrãng Pilat ma Jisu ritphe rãng nginpat hânwah.

²⁵Thinma chenpa thatah a ere mihnyan pa Pilat ma laangphê kohwah, ere mihnyan pa hah phoangjamsiet lahma mih ritphedi phâtek nãng khhekwah, ngale nema chenni rehun eken a eroh hânjôan en ngama thindeknâng Jisu kohwah.

Jisu Rittek

(Mathiu 27.32-44; Mak 15.21-32; Jon 19.17-27)



²⁶Sipâhi hehma Jisu sietchhoan wah, ngale thinma lemko Kren diakwah mihwa wathe chohmînwah, ate mînpa Simon dângwah, atea thin diakwah sumhah nâng katwah. Phumma thinma lolahma ate khohko bângphak pa loakko lahma, atenâng Jisu tokdiko pêthukwah.

²⁷Mihnyan jahmõang ate diko junkhoam wah; thin demko dihiaknyu khuthe ate rãngma nyahrãng seplahma dângwah

²⁸Jisu ma thinnâng ngiaksûkat lahma ngatwah, “Jerosem wah dihiaknyu heh! Ngarãng neksepen, nekhu dederãng ngale ne chhuchha hehrãngma sepen.

²⁹Chenrãngma ngako mihnyan hehma, ‘Chha ahote dihiaknyu, naa lethat chhate, ngale naanyong lethat dangte dihiaknyu heh chentô khangraangsên a!’ ngama ngat sanpoat pa lâhûera.

³⁰Ere sanpoatko mihnyan hehma hahkong hehnâng, ‘Ni khohko rutjâkahi!’ ngale hahho hehnâng, ‘Ni tekpetkathi!’ ngama engawak a.

³¹Mihnyan hehma bângpa ahin poatko tumin aroh mehôn mejôn ako, mechoaktah kojâtanga chentô hânjôn min a?”

³²Ahanmin mihngoan wanii Jisu demko johrittek rãng sietchhoan wah.

³³Chenthu, “Mangkhora sekthinthe,” ngama ngaeka theko siethok phumma, eretheko thinma Jisu rittekwah, ngale mihngoan wanii pemin Jisu dekhitko wathe ngale dekchahko wathe johrittekwah.

³⁴Jisu ma ngatwah, “Ewa thinnâng mapkoh o! chenrãngma ngako thinma chenni moeka erepa jetmah.” Thinma thintungko Jisu khetpa longkendoh nâng tanlahma phenkep wah.

³⁵Jews khhepho phannang hehma Jisu nâng jôjêm poatko eretheko mihnyan heh cheplahma sokwah: “Atema mihhan tapepâng eka; phumma Joban ma rênwah Misaia medang ako atedede min chenpe pângriitan a!”

³⁶Sipâhi hehmemin atenâng jôjêm wah: thinma ate tâko kalahma atenâng penriti chhih kohwah,



³⁷Ngale ngatwah, “Nanga Jews heh Lowang medang oko nangdede pepângriio!”

³⁸Ate khherahko: “Arepa Jews heh lowang.” Ngama raanglahma betkohwah.

³⁹Erekowah mihngoan wathe pumma ate khopa heklahma dûmmek wah: “Nanga Misaia dangmohne? Nangdede pepângrii lohma, nimin pepânghi!”

⁴⁰Ahan wathe pumma atenâng ritngatwah, “Nanga Joban ran cheimohne? nangmin ate rãngrãng jôba rittek eho.

⁴¹Nãngheh a, nãnghehema chhihmoat thãba rittek kohehi; rohkomin atea chenjô lechhihmo nãng rittek eka.”

⁴²Ngale erediko atema Jisu nãng ngatwah, “Jisu, Nanga chenthu Lowang danglohma katjâko nganângmin thonghunhang!”

⁴³Jisu ma atenâng ngatwah, “Ngama nangnâng toamsem eki, thejâ phumma nanga nga demnâng rangkethung nãng tângmin.”

Jisu Rit

(Mathiu 27.45-56; Mak 15.33-41; Jon 19.28-30)

⁴⁴⁻⁴⁵Rangngih echhi wannii sanpoat pumma danglahma sanhêmthah wanrem sanpoat tôko san lephiaktu thangma hahtokkhoh phangtang nyekjâ wah; ngale Rangsoamhum kowah khettin ekapa lengnii korãng lãngjâ wah.

⁴⁶Jisu ma, “Ewa! Nang dekko Nga Jupa chohkoh eki!” ngama chaanmõang raklahma ate ritwah.

⁴⁷Ereko chenni dangtah a erepa Sipâhi sahabwa pumma khelahma atema Joban nãng rôwah, atema ngatwah, “Linlinjô atea mihnyansen dãngwah!”

⁴⁸Eretheko sokrãng khôanhutah mihnyan hehema ereko chenni dangtah a ereheh khewah, thin nyahrãng hungchhih rekma danglahma humnãng ngakwãng wah.

⁴⁹Jisu nãng senthemthem jette heh erediko Galili wah ate diko junkhômte dihiaknyu heh roanche ataang manko cheplahma sokwah.

Jisu Mangbîn

(Mathiu 27.57-61; Mak 15.42-47; Jon 19.38-42)



⁵⁰⁻⁵¹Josep ngama mihnyan wathe dângwah, atea Judia diakwah Arimatha hahwah dângwah. Atea mihnyansen ngale chentôma atenâng hunlahma dângwah, ngale atemin Joban Hahsông pa bemla lahma dângwah. Ateamin Jews heh ngoang awangjô medang akomin, thinma Jisu ritphe rãng phung eka moatlemko johdangho.

⁵²Atema Pilat tânâng wãng lahma Jisu mangpa thâwângwah.

⁵³Erediko atema Jisu mangpa jâtoan lahma, khetnâng doaplahma, longjanwah thutwah henjô mathatru mangruk kenko rukatwah.

⁵⁴Erejâpa hokut batjâ dângwah, ngale Pientông rangwo jâpa dangnemnem dângwah.

⁵⁵Galili wah Jisu demnâng johkatah dihiaknyu hehema Josep demnâng johka lahma mangruk pa sũka, ngale Jisu mangpa chenroh rukat eka erepa sokkatwah.

⁵⁶Erediko thinma humnâng ngakwãng lahma Jisu mangko hutkatrãng tientumli heh khoakhêm wah. Mosa Niemma ngat junko thinmin Pientông jâko boantong rewah.

Luk 24

Angakhîn

(Mathiu 28.1-10; Mak 16.1-8; Jon 20.1-10)

¹Dobatjâ rangkhah rangkhoma dihiaknyu hehema thinma khoakhem tah tientumli heh semlahma mangruk nâng katwah.

²Thinma mangruk kenpa longkâsek ma sekthien tahpa laangphechhoan khekatwah,

³ephumma thinma akhennâng lupwãng lahma sũwãng tahpa; Jisu mang chohkhe ho.

⁴Erejunko mokrii lahma eretheko chepwakwah, phumma lemlienma nyahrãng khet phiakjaja keplahma mihnyan wanii eretheko hongchep hokwah.



⁵Nyahrãng chei lahma dihiaknyu hehna hahko khupjup wah, phumma mihnyan wanii pumma thinnâng ngatwah, “Nema ahînte pa riichoan heh chhangnâng chenrãngma lemeken a?”

⁶Atea ako aho; Atea ngakhintah. Thonghun tan en, atema Galili nâng dângpoatko nenâng chenni thôkohthen a:

⁷“Mihnyan Chhapa papi mihnyan heh deknâng kohmin, relahma rittek erea, ngale jârem diko ngakhîn erea.’ ”

⁸Erediko dihiaknyu hehna ate ngin pa thonghun wah,

⁹mangruk wah ngakwãng lahna erengin pa dijunte echhi wathe ngale ahan heh phangtang nâng thôkoh wah.

¹⁰Dihiaknyu heh dangeka Mariam Makdalani, Joana, ngale Jems nyong Mariam dângwah; thin ngale thindem ko ahan dihiaknyu hehna erengin pa moattat chhoante hehnâng thôkoh wah.

¹¹Rohkomin dihiaknyu hehna ngaeka pa ledangli ngin ngama thonghun wah, ngale thinma ere nginko puteho.

¹²Rohkomin Piter toanchep lahna mangruk nâng chhoankatwah; atema kunjup lahna mangrukko sũka tahpa lihân chenjô lekhe thangma mangkhet pelolo chohkhe wah. Erediko barri lahna chenni dangeka ngama humnâng ngakwâng wah.

Imaos Lemnâng Khoam

(Mak 16.12, 13)

¹³Erejâjâko Jisu dijunte wanii pa Imaos hahnâng wângwah, erehahpa Jeroselem wah mee engit dângwah,

¹⁴ngale ateniima erekowah chenni dangtah a erengin heh thômîn wah.

¹⁵Atenii thômîn thuko, Jisu atenii tâko hehka lahna thindemko johkhoamwah;

¹⁶thinma Jisu nâng khewak eka, rohkomin jetloho.



¹⁷Jisu ma thinnâng ngatwah, “Nechhema akhoam nungnung chenni ngin thômîn eken a?” Thin thhenphăng pa hungchhih litlit danglahma tahchep wah.

¹⁸Atenii wah wathe, mînpa kliopas pumma Jisu nâng chhienwah, “Jeroselem ko mihwun pa nang lolone, are jânii jârem mako Jeroselem nâng chenni dangtah a ereheh lejet thangma?”

¹⁹Atema chhienwah, “Erepa chenni dângwah a?” Thinma dânthâng wah, “Nazarat wah Jisu nginpele,” “Are mihnyan pa Joban memin ngale chentô mihnyan hehmemin mông ngama thônghun wah, ngale chentô ate jab ajâ ngale moat akat heh chaan demnâng dângwah.

²⁰Phumma nãng soam aroakte dong ngale hah pête khhepho phannang hehma ritphethuk eka, ngale ate arittek rewah.

²¹Ngale atema Isrial mihnyan heh epesiet a ngama nima thonghun lihma dângwah! phumma ate ritphetah wah thejâ ma jârem lâdangtah.

²²Nilemru dihiaknyu hehma patriithuk ehi; rangkhah rangkhoko thin mangruknâng katwah,

²³phumma thinma ate mangpa chohkhe wakmah. Thinma ngakwãng lahma, rangkhetung wah Joban ngintatte hehma thinnâng Jisu ahîn ngama thôko lahma thânkhe eki ngama thôkoh ehi.

²⁴Nilemru heh mangruk nâng kalahma sũka tahpa dihiaknyu hehma thôkotah rãngrãngjô chohkhe katwah, ngale thinma Jisu chohkhe ho.”

²⁵Erediko Jisu ma thinnâng ngatwah, “Ne meroh taba eken a, mông hehma jabtah ngin komin lepute chenroh jiendang eken a!

²⁶Misaia ma ere chêm heh chohlahma atema mîndông chohmin ngama nema lejetwah ne?”

²⁷Ngale Jisu ma Joban nyapraang nâng ate junma chentô raangtah heh thôkoh wah, Mosa ma raangwah titab pumma danglahma chentô mông hehma raangtah hehmin thôkoh wah.



²⁸Thin wãngeka hahdaang kêko hokrienrien, Jisu ma atea ademin roanchhe ataangnâng wângte rãngrãng diapdângwah;

²⁹rohkomin thinma atenâng ngatwah, “Nidemnâng johtonghi; chenrãngma ngako sanhêmthah lâdangtah, ngale rang lânyek eka.” Ephumma thin demnâng johtông wângwah.

³⁰Jisu thin demnâng phhekchhah chhahrãng tôngko, atema bankên toansem lahma Joban nang dangkoh a ngat rangsoam wah; erediko atema chhupsiet lahma thinnâng kohwah.

³¹Erediko thinmit hongkhin lahma Jisu nãng jetloat wah, rohkomin thinmakhe rienrien mahjâ rewah.

³²Ephumma thin jabmînwah, “Atema chenthu nãngdemnâng lemko jabmîn thiko, ngale atema Joban nyapraang wah nãngnâng thôkoh thiko nãngnâng wenma khamwah rãngrãng ledang wahne?”

³³Thin lemlienma toanchep lahma Jerosalem nãng ngakkatwah, ereko thinma echhi wathe dijunte heh mihhan heh demnâng roamkhôan lahma khehokwah

³⁴ngale thinma ngatwah, “Teso pa linlinjô ngakhintah! Atea Simon demnâng min chohmîntah!”

³⁵Lemnâng chenni dangtah a ereheh mihnyan wanii pumma dijunte hehnâng thôkoh wah, ngale Teso ma thinnâng bankên phênkohko thinma chenroh jetlotah a ereheh thôkoh wah.

Jisu Dijunte heh tânâng Hôngwah

(Mathiu 28.16-20; Mak 16.14-18; Jon 20.19-23; Moatlem 1.6-8)

³⁶Wanii pumma are ngin heh thôkoh thuko, lemlienma thinmongko Teso hongchep hûlahma thinnâng ngatwah, “nedemnâng mêmo chentonghèn.”

³⁷Thinma mihdâpha kheki ngama thonghun lahma patrit rewah.

³⁸Phum-ma atema thinnâng ngatwah, “Ne chenrãngma patrii eken a? Nehung nãng chenrãngma tungmaang eken a?”



³⁹Ngadek adako sûtanha, sûtanha Nga jôba. Nema jetrăng sahlo tanha, chenrăngma ngako nema Nganâng kheha răngrăng mihdâpha nâng sek asâ ngale rok arã aho.”

⁴⁰Atema eroh ngalahma thinnâng ate dek ada heh khesokwah.

⁴¹Thinma mitma linlinjô chohkhe eki ngama lechhang pute thangmemin nyahrăng khuhah nâhah ngale bâritmin rewah; ephumma Jisu ma thinnâng thôngphâ wah, “Areko nenâng chenni akomin phhekchhah thin tonghèn a?”

⁴²Phumma thinma atenâng behchoan ngah kohwah,

⁴³Erepa atema thalahma thintâko chhahwah.

⁴⁴Erediko atema thinnâng ngatwah, “Ngama are ngin heh nga nedemnâng dângthuko thôkotah: Mosa Niemarang nâng, ngale chentô môngama, erediko Rangsoam titab nâng ngajunma raangtah heh phangtang linlin dângwângmin ngama.”

⁴⁵Erediko Joban nyapraang heh jienjetrăng atema thinhung arin heh laangkohwah,

⁴⁶ngale thinnâng ngatwah, “Aroh raanglahma tonga: Misaia pa metkep echêm a ngale jârem diko ritwah engakhin a,

⁴⁷ngale ate mînko, Jerosalem hahma bânghun lahma chentô diak akan hehnâng papmoatlem wah hungngaklit ngin ngale pap heh mapkoh ngin phoangthô kohmin.

⁴⁸Nema are kheken heh phoangthômin.

⁴⁹Ngale nga Wama chenni toamsem tah a ereheh Nga dedema nekhoh nâng echien katrăng. Rohkomin rangkethung wah Joban chaanpa nekhuh khohnâng makaka hênko nema hahdaangko bemtongen.”

Jisu Rangkethung nâng Toansietwên

(Mak 16.19, 20; Moatlem 1.9-11)

⁵⁰Erediko atema dijunte heh Bathani hah tôko sietkatwah, eretheko atema ate deklaang lahma thinnâng rangkoh wah.



⁵¹Atema thinnâng rangkoh jenjenko, thin tâwah rangkethung nâng toansietwên wah.

⁵²Thinma atenâng rangsoam lahma nyahrâng khuhah nâhah danglahma Jeroselem nâng ngakwâng wah,

⁵³ngale thinma roantang Joban nâng dangkoh a ngama ngalahma Rangsoamhum nâng tôngwakwah.



Jon

Jon 1

Roandông jabkhab

- ¹Khebengko jabkhab dângwah; Jabkhab pa Joban demnâng dângwah, ngale Jabkhab pa Joban dângwah.
- ²Khebeng mejû Jabkhab pa Joban demnâng dângwah.
- ³Joban ma chentôpa jabkhab junma hôanwah; ate aho thangma lithemin hôanho.
- ⁴Jabkhab ko roandông dângwah, ngale roandông pumma mihnyan nyuchha nâng wenphiak kephûkoh era.
- ⁵Wenphiak pumma rangnyek ko phiak eka, ngale rangnyek pumma wenphiak pa tamahsiet mah.
- ⁶Joban ma ate ngingmatte mihnyan wathe chienkatwah, ate mînpa Jon dângwah,
- ⁷Atema mihnyan hehnâng wenphiak junma thôkohrãng katwah, erohkoba anga ngama nginkongpa chohtat lahma eputedâlem a.
- ⁸Ate dedea ere wenphiak pa dangmah; rohkomin atema ere wenphiak pa thôkoh rãng katwah.
- ⁹Arepa linlin wenphiak pa dângwah - are wenphiak pa hahtokkhoh ko kalahma chentô mihnyan hehnâng phiakka era.
- ¹⁰Jabkhab pa hahtokkhoh ko dângwah, ngale ate junma Joban ma hahtokkhoh hôanwah, rohkomin hahtokkhoh ma ate jetlomag.
- ¹¹Atea ate dede diakko katwah, rohkomin ate mihnyan hehma ate kepmah.
- ¹²Khakama atenâng putedâlem lahma kep eka; erohwah atema thinnâng Joban Chha dangthuk eka.



¹³Thin a mihnyan nyuchha nyong awa hei angem junma chha lahma Joban Chha dâng dangmah; Joban dede thin Wa dâng phumma thin a Joban Chha dangeka.

¹⁴Jabkhab pa mihnyan nyuchharãng litdang kaera, ngale atenâng mînchenchaan, ngale toangtang pa mênchong danglahma nãngdemnâng songkaera. Nãngma ate rânghôngpa kheki, ererânghông pa ate Wa Chha atelolo dângthã rânghông chohlahma khe eki.

¹⁵Jon ma ate junma jabwah. Atema ngatwah, “Ngama ngatekpa ate junma ngatwah, ‘Atea ngadiko ekara, rohkomin atea nga noma adong, chenrãngma ngako ngachhat mama ate dângwah.’ ”

¹⁶Atenâng ajahthem mînchenchaan tôngjunko atema nãngnâng rongrup lemma rangkoh ehi.

¹⁷Joban ma Mosa junma nãngnâng Niemarang heh kohwah, rohkomin mînchenchaan le toangtangpa Jisu Krista junma kohehi.

¹⁸Henmemin Joban mathatkhe eka. Rohkomin Joban danglahma Joban Wa demko tôngte wathelolo ate Chha pumma Joban pa jetthuk ehi.

Jon Baptis wah Joban Nginkong

(Mathiu 3.1-12; Mak 1.1-8; Luk 3.1-18)

¹⁹Jeroselem wah Jews thôte jabte ngale soam aroakte ngale Livi hehma Jon nãng, “Nanga hen a?” ngama thôngphârãng chienkatwah.

²⁰Jon ma letûngmaang thangma, “Nga a Misaia dangmek” ngama sâpoangpoang dânthâng wah:

²¹Ephumma thinma Jon nãng thôngphâ wah, “Eroh medang oko, nanga hen a?” “Nanga Ilija ne?” Jon ma, “Dangmek,” ngama dânthâng wah. Thinma wîenthông phâwah, “Nanga môngne? “Dangmek,” ngama atema dânthâng wah.

²²Thinma ngatwah, “Eroh medang ako, nanga hen a erepa ninâng thôkohhi,” “Chenrãngma ngako ni chienkate hehnâng nima ngakthôwên kohmin. Nanga nangdede hen ngama ngarii ekoa”



²³Jon ma Isaia mǒng ma jabwah jabkhab pa jablahma dânthâng wah: “Nga a ‘hahran khonâng phoangrak tepa: Teso khômãng lemting hôankoh en!’ ”

²⁴Farasi hehma chienkattah nginmatte heh,

²⁵ma Jon nâng thôngphâ wah, “Nanga Misaia min ledang ngale Ilija min ledang erediko mǒngmin ledang medang oko nangma chenrãngma baptijem koh eko?”

²⁶Jon ma dânthâng wah, “Ngama joma baptijem koh ekang, rohkomin nekhu chhangko nema lejet thangma wathe tonga.

²⁷Atea ngadiko ekara, nga a ate daphâng putkoh rãngjô punmek.”

²⁸Are heh Jon ma baptijem koh ekathe Bathani hahwah Jordanjo sankat ngenâng dângwah.

Joban Saak

²⁹Eredijâko Jon ma Jisu ate tânâng wãng lahma khewah, ngale eko atema ngatwah, “Sû en, hahtokkhoh wah pap hênphete Joban Saak pa anã!

³⁰Ngama ngatekpa ate junma ngatwah, ‘Ngadiko wathe ekara, rohkomin atea nganoma adong, chenrãngma ngako atea ngachhat mama dângwah.’

³¹Atea henpa dângmin a erepa ngama lejetwah, rohkomin ngama atea Isrial mihnyan hehnâng jetthuk rãng joma baptijem koheka.”

³²Ngale Jon ma thinnâng thôkoh wah: “Ngama rangkethung wah Jupa wo rãngrãng litlahma kalahma ate khohko tongka lahma khetek.

³³Ngamemin ate majet dângwah, rohkomin nganâng joma baptijem kohrãng chiente Joban ma nganâng ngatwah, ‘Nangma Ju kalahma henkhoh nâng tongka lahma khe eko; erepumma Asâthôanju ma baptijem ekoh a.’

³⁴Jon ma ngatwah, “Ngama erepa khetek,” ngale “Ngama nenâng atea Joban Chha ngama thôkoh eka.”

Khebeng Jisu Dijunte

³⁵Eredijâ komin ate dijunte wanii demnâng eretheko Jon cheplahma dângwah,



³⁶Phumma chenthu atema Jisu loatkhoam lahma kheko, “Joban Saak pa anã!” ngama ngatwah.

³⁷Dijunte wanii pumma ere jabpa tatlahma Jisu demnâng johchhoan wah.

³⁸Jisu ma litphong lahma ngiaksok katko ate diko junkhoam lahma khewah, ephumma atema chienwah, “Nema chenni lemsû eken a?” Thinma dânthâng wah, “Rabi, Nanga chenko songkoa?” (Are ngaeka pa “Hethôte” nâng ngaeka.)

³⁹Atema dânthâng wah, “Kaletma sùkaren,” (Erepa sanhêmthah wanbelii sanpoatko dânghwah.) Ephumma ate demnâng johka lahma ate sôngthepa khekat wah, ngale erejâko ate demnâng johtông wah.

⁴⁰Wathepa, Simon Piter naa Andru dânghwah.

⁴¹Lemlienma ate pho Simon chohmîn lahma, “Nima Misaia khetih” ngama thôkoh wah. (Are ngaeka pa “Krista” ngaeka.)

⁴²Erediko atema Simon Jisu tânâng siethokwah. Jisu ma atenâng sùlahma ngatwah, “Nangmînpa Simon, Jon chha, rohkomin nangnâng Kaipas ngama roomin.” (Arepa Piter ngama ngaeka, ngale arepa “Long” ngaeka.)

Jisu ma Philip ngale Nathaniel Nii Roo

⁴³Eredijâko Jisu Galili nâng katrăng chepwah. Atema Philip chohmin lahma ngatwah, “Nga demnâng johchhoan hang!”

⁴⁴(Philip pa Batsida wah dânghwah, Andru le Piter niimin erehahko sôngte dânghwah.)

⁴⁵Philip ma Nathaniel chohmin lahma atenâng thôkoh wah, “Mosa ma Niemarang titab nâng raang tahpa nima lâchoh khetih, ngale ate junma mông hehmemin raangtah. Atea Nazarat wah Josep chha Jisu.”

⁴⁶Nathaniel ma chhienwah, “Nazarat hah wah chenni komin asenli eta jienhonga.” Philip ma, “Wãnglohma sùwãngro,” ngama dânthâng wah.

⁴⁷Chenthu Jisu ma Nathaniel ate tânâng wâng khelahma ngatwah, “Isrial jat linlinpa anã; atenâng chenmin achhih aho!”



⁴⁸Nathaniel ma atenâng chhienwah, “Nangma nga chenroh jienjet ehanga?” Jisu ma dânthâng wah, “Philip ma nangroo mako nanga phukbãng thongko tonglohma khetih.”

⁴⁹Nathaniel ma dânthâng wah, “Hethôte, Nanga Joban Chha! Nanga Isrial heh Lowang!”

⁵⁰Jisu ma atenâng ngatwah, “Ngama nanga phukbãng thongko tonglohma khetih ngatrãngma nangma pute ekoa? Nangma ere nomemin adong echohkheo!”

⁵¹Ngale atema thinnâng ngatwah, “Ngama nenâng toangtang ngin thôkoh eka: Nema rangkethung pa laang lahma ekhe en, ngale Mihnyan Chha khohko rangwah Joban ngintatte heh awângte akatte ditkhoam lahma ekhe en.”

Jon 2

Kana Hahnâng Nemnyansiet

¹Jânii diko Galili wah Kana hahnâng nemnyansiet kuhhôn dângwah. Jisu nyong min nemnyansiet thinnâng dângwah,

²ngale jisu le ate dijunte hehmin nemnyansiet thinnâng roowah.

³Chenthu angurti thôn phumma Jisu nâng ate nyong ma ngatwah, “Thin angurti lâthôantah.”

⁴Jisu ma dânthâng wah, “Ngama moatthin moatlempa nangma nekthôkoh hang,” “Ngama moatrãng sanpoat mahûera.”

⁵Erediko Jisu nyong ma haa hehnâng ngatwah, “Atema nenâng chenni chien ehèn a erepa mo en.”

⁶Jews hehnâng seksâsoan niem tonga, erohwah ere niemko keprãng eretheko longwah hôanwah jotêm phangerok dângwah, ngale jotêm phangtheko châthe litat lâchhamroh dângwah.

⁷Jisu ma haa hehnâng ngatwah, “Are jotêm heh joma menkien en.” Ephumma haa hehma mênkienwah,



⁸ngale erediko atema thinnâng ngatwah, “Arejo kowah kholetma kuhhôn semwa khhepho nâng wênkoh en.” Ephumma thinma jokowah khoatwên kohwah,

⁹erejopa angurtirãng litjâ lahma dângwah, ngale sêmwa khhepho pumma erepa thatjokwah. Phumma ere angurti pa chenwah choh ekapa atema lejetwah (rohkomin jokhoatwênte haa pumma epa jetwah); ephumma kuhhôn sêmwa khhepho pumma nemnyan wapa roowah

¹⁰ngale atenâng ngatwah, “Anga ngama khebeng khoko angurtisen senpa rângbengkoh a, phumma mihhehema melejok takoba, khediko achhih pa rângkoh a. Rohkomin nangma athâng hehmin asen pa thien eko!”

¹¹Jisu ma arepa khebengrãng patritli moatlem Kana nâng bengmoatwah; Enâng Jisu ma ate chaanpa bengkhesok wah, ngale ate dijunte hehmen atenâng putedâlem wah.

¹²Erediko Jisu le ate nyong, naa heh, erediko ate dijunte heh Kaparnam nâng kalahma jâthe jânii tongkatwah.

Jisu Rangsoamhum nâng Hok

(Mathiu 21.12, 13; Mak 11.15-17; Luk 19.45, 46)

¹³Ere sanpoat pa Adankhoam Lokuh thângnemnem dângwah, erohwah Jisu Jeroselem nângkatwah.

¹⁴Atema Rangsoamhum ko lee amân, saak, phari sengte heh erediko ngun akem litminte heh tonglahma khehokwah.

¹⁵Ephumma atema ruhepma watlahma chentô ngem heh Rangsoamhum kowah junloatwah, saak ngale lee amân hehmin junloatwah; ngale atema ngun litminte khoang heh dâthin phekoh relahma thin ngun heh rêmpehokwah;

¹⁶ngale phariwo sengte hehnângmin atema, “Erekowah kepchhoanrãng chienwah! Nga Wa Hum pa phîn athã sengthin therãng nekhôn en!” ngama ngalahma junloatwah.



¹⁷Joban nyapraangma ngaeka heh ate dijunte heh ma thônghun wah, “Joban, Ngama nang Hum ko hun ekang pumma wenma khâmwah rãngrãng kham ehang.”

¹⁸Jews heh thôte jabte heh ate tânâng ngin chhienrang ngakhok wah, “Nangnâng areheh moatrãng chaan tongho ngama nima jetrãng, nangma ninâng chenni patritli molohma khesok hia?”

¹⁹Jisu ma dânthâng wah, “Nema are Rangsoamhum pa runsiet en, Ngama jârem khenko ngakhoan ang.”

²⁰Thinma chhienwah, “Nangma jârem khenko tangakhoan oa?” “Are Rangsoamhum pa hânãng roakbelii pâerok rangpâ lemwah!”

²¹Rohkomin Jisu ma ngaeka rangsoamhum pa ate phoangpa ngatwah.

²²Ephumma chenthu Jisu ritwah ngakhîn diko, ate dijunte heh ma atema jabtah pa thônghunwah, ngale Jisu ma jabtah Joban nyapraangko thinma putedâlem wah.

Jisu ma Mihnyan jat apat pa Jet

²³Jisu Adankhoam Lokuh rãng Jeroselem nãng dângpoatko, atema patritli moatlem heh moat khelahma jahmõang mihnyan heh ma atenâng putedâlem wah.

²⁴Rohkomin Jisu ma thinnâng puteho, chenrãngma ngako Jisu ma mihnyan heh phangtang jetlahma dângwah.

²⁵Thinjunma atenâng chêmthôkoh thinjô aho dângwah, chenrãngma ngako thinhungnâng chenni thônghun eka erepa ate dedema jet dângwah.

Jon 3

Jisu ngale Nikodima

¹Jews heh khhepho ate mînpa Nikodima ngama wathe dângwah, ngale atea Farasi dângwah.

²Jâthe rangpen nãng Jisu tânâng wãng lahma atenâng ngatwah, “Rabi, nima ajet nanga Joban ma chienkatwah hethôte. Henmemin nangma moeko



rãngrãng patritli heh leta momin chenthu ate demnâng Joban chaan letong kako.”

³Jisu ma atenâng dânthâng wah, “Ngama nangnâng toangtang thôkoh eki: henmin atea depnii lengakchha kako Joban Hahsông lechokhe min.”

⁴Nikodima ma chhienwah, “Dongchoan mihnyan pa chenroh depnii jienthe ngakchhat min a?” “Depnii ngakchhat rãng chenthumin ate nyong wokkhen nãng jienthe ngaklupmah!”

⁵Jisu ma dânthâng wah, “Ngama nangnâng toangtang thôkoh eki” “Henmin jo ngale Juma lechha kako Joban Hahsông thenâng leta wãngmin.

⁶Mihnyan hei angem phoangpa nyong awa ma chhaehi, rohkomin jupa Juma chhatmin.

⁷Ngama nangnâng nanga depnii ngakchhatmin ngama ngatrãngma nekpatrii.

⁸Pôngpa atema chenngê nãng pôngchhoan huneka enge nãng rãngpong chhoan a; ngale nangma pônglin peba rãngtat o, rohkomin nangma chenwah ponghûera, ngale chennâng pongchhoan eka erepa rãngjetmoh. Henhen Juwah chhaeka erehehmin ererãngrãng jôba dãngmin.”

⁹“Aroh chenroh jiendângmin a?” ngama Nikodima ma chhienwah.

¹⁰Jisu ma dânthâng wah, “Nanga Isrial ko hethôte adong wathe, phumma nangma arepa jetmohne?

¹¹Ngama nangnâng toangtang thôkoh eki: Nima chenni jet ekia erepa thôeki, ngale chenni khe ekia erepa jôba thôeki, rohkomin nekhuma henmemin ni nginko putemet.

¹²Ngama nangnâng are hahtokkhoh wah ngin heh thôkohko pute mahhang; phumma ngama nangnâng, rangkethung wah ngin heh methôkoh eko jâtanga, nangma chenroh ejien pute hanga?

¹³Ngale henmin rangkethung nãng mathat wãngeka, Mihnyan Chhapa loloba rangkethung wah kaera.”



¹⁴Mosa ma janwah hôanwah pû sehahnâng thankah ranâng laangtah rãngrãng, Mihnyan Chhamin eroh laangmin,

¹⁵erohkoba henhenma atenâng putedâlem eka ereheh ma roantang roanjêng roandông echoh a.

¹⁶Joban ma are hahtokkhoh ko nyahrãng hunlahma ate Chha wathelolo pemin koheka, erohwah henhenma atenâng putedâlem eka ereheh leriimin rohkomin thinma roantang roanjêng roandông echoh a.

¹⁷Chenrãngma ngako Joban ma ate Chhapa hahtokkhoh chhihsietrãng chienkat dangmah, hahtokkhoh pepãngrãng chienkat era.

¹⁸Henhenma Chhako putedâlem eka ereheh nãng achhih lengamin; rohkomin henhenma leputedâlem dangeka ereheh achhih ngama rãngatah, chenrãngma ngako, thinma Joban Chha wathe loloko putedâlem mah.

¹⁹Achhih asen pa aroh ren eka: wenphiak pa hahtokkhoh ko kaera, rohkomin mihnyan heh ma wenphiakko hunnoma rangnyekko huneka, chenrãngma ngako thin moatlem heh achhih.

²⁰Henhenma achhihli moeka ereheh ma wenphiakko chhihchoh eka ngale wenphiakko hûwakmah, chenrãngma ngako thinma moatlem chhih heh kherit hunmah.

²¹Rohkomin henhenma asenli moeka ereheh ma thin moatlem pa Joban junko moeka ngama wenphiak pumma chenkhesok a ngama wenphiakko hûeka.

Jisu ngale Jon

²²Erediko, Jisu le ate dijunte heh Judia diak ngenâng katwah, thindem ko enâng jãthe jãni rãng tongthien lahma baptijem kohthienwah.

²³Salim tâwah Ainon hahko Jon memin baptijem kohlahma dãngwah, chenrãngma ngako eretheko jo ajah dãngwah. Mihnyan heh ate tâko hûlahma thinnâng atema baptijem kohwah.

²⁴(Arepa Jon phãtek nãng sekmako dãngwah.)



²⁵Jon dijunte khuthe Jews heh demnâng niemarang junks seksâsoan rãngma chhiakmîn wah.

²⁶Ephumma Jon tânâng wãng lahma thinma thôkoh wah, “Hethôte, nangma thonghun ekole Jordanjo rãngma sankat ngewah nang demko mihnyan wathe dangtah pa, nangma mihnyan hehnâng ate junma thôkotoh pa? atema athângheh baptijem koheka, ngale anga nga ate tânâng hûeka!”

²⁷Jon ma dânthâng wah, “Joban ma lekoh kako, mihnyan ma chenmin leta chohmin.

²⁸Ngama jab ekãngpa nema lâtattha, ‘Nga a Misaia dangmek, rohkomin nga a ate mako chienkatla ehang.’

²⁹Nemnyanwa pa nemnyannyu rãng; rohkomin nemnyanwa tâwah cheplahma atenâng jetat eka ate lemruçha pa, nemnyanwa kahra tatko khuhah eka. Ererãng rãng ngamin khuhah ekang.

³⁰Ate jêngdong dongwãng rêmin, rohkomin nga jêngrin rinjâ rêmin.”

Rangkhethung wah Katta

³¹Rangkhethung wah hen kaera erepa chentô noma adong. Henpa hahtokkhoh wah a ereheh a hahtokkhoh thiak ngale hahtokkhoh ngin ethôa, rohkomin henpa rangkhethung wah kaera erepa chentô noma adong.

³²Atema chenpa khetah a ngale tattah a ereheh thôkoh eka, rohkomin ate ngin pa henmemin pute mah.

³³Rohkomin henhenma ate nginpa kep eka erehehma Joban pa toantang ngama jet eka.

³⁴Henpa Joban ma chienkat era erepumma Joban ngin thôeka, chenrãngma ngako atenâng Joban ma ate Jupa mênchong koheka.

³⁵Wama ate Chhanâng hunlahma chentôpa atenâng pênthuk eka.

³⁶Henhenma Chhako putedâlem eka erehehma roantang roanjêng roandông chohmin; Henhenma Chha nginlekep dangeka erehehma roantang roanjêng



roandông lechohmin, rohkomin ereheh nâng Joban ma roantangma echêmthuk a.

Jon 4

Jisu ngale Samaritan Dihiaknyu

¹Jisu ma Jon noma dijunte ajah chohlahma baptijem koheka ngama Farasi hehma tatwah.

²(Linlinko Jisu ate dedema wathenângjô baptijem kohho, ate dijunte hehma loloba kohwah.)

³Chenthu are nginpa Jisu ma chohtat phumma, ate Judia wah loatchhoan lahma Galili nâng katwah:

⁴Atema Samaria pa dankhoam lahma Galili nâng katwah.

⁵Atea Samaria wah Sanchar hahko hokwah, arepa Jakob ma ate chha Josep nâng kohtah pit tâko dângwah.

⁶Jakob ma thutah jokenpa eretheko dângwah, ngale Jisu boankhoam lahma ere joken tâko bôantôngwah. Erepa rangngihmong dângwah.

⁷Samaritan dihiaknyu wathe jokhoatrâng katwah, phumma Jisu ma atenâng ngatwah, “Nganâng jowah jokthuk hang.”

⁸(Ate dijunte heh bôjat nâng phhekchhah riakchoanwah.)

⁹Dihiaknyu pumma dânthâng wah, “Nanga Jews, phumma nga Samaritan, nangma ngawah chenroh jienthajok ehanga?” (Jews hehma Samaritan hehma kepeka tit alek, le jojok bâti heh aroamma kepma.)

¹⁰Jisu ma dânthâng wah, “Nangma Joban ma chenni koheka erepa jetlohmeke, ngale nangwah jo thâjoktepa hen a erepa jetlohmeke, nangma atewah chenthajoktoh, ngale atema nangnâng roandông kohthinjo chenjuk thuktho.”

¹¹Dihiaknyu pumma dânthâng wah, “Hethôte, nangnâng jokhoat thinmin aho, ngale joken pemin kenlu. Nangma chenwah - roandông chohthinjo jokthukmin a?



¹²Are joken pa ninâng nite niwa Jakob ma kohwah; ate memin akowah jokwah, ate chhuchha ngale atema pentah ngem angha hehmemin arekowah jokwah. Nanga Jakob noma adong ngama thonghunrii ekoa?”

¹³Jisu ma dânthâng wah, “Henhenma are jokowah jok eka ereheh jolân ngakritmin,

¹⁴Rohkomin henhenma ngama koh ekang jokowah jok eka ereheh chenthumin jolân lengak riimin. Ngama thinnâng koh ekang jopa, thinhung khennâng thinnâng roandông kohte jokhông edanga, ngale thinnâng roantang roanjêng roandông ekoh a.”

¹⁵Dihiaknyu ma dânthâng wah, “Hethôte, nganângmin ere jopa kohhang! erohkoba nga chenthumin jolân lethe ngakriitu edangang, ngale areko jokhoatrâng letham ngakkatu edangang.”

¹⁶Jisu ma atenâng ngatwah, “Wãnglohma nang tangwa roowãngo,” “erediko anâng ngakkaren.”

¹⁷Dihiaknyu pumma dânthâng wah, “Nganâng tangwa aho,” Jisu ma dânthâng wah, “Nangma tangwa aho ngaeko pa toantang lâjabtoh.

¹⁸Nanga mihnyan wabangâ nâng lâwãngtoh, ngale athângheh nâng rôamsong eko delawa pemin nang tangwa dangmah. Nangma nganâng toantang lâthôkoh thang.”

¹⁹Dihiaknyu pumma ngatwah, “Hethôte, ngama nanga mônglêlê kheki,”

²⁰“Nite niwa Samaritan hehma Joban nâng are hahkong khoko soamwah, rohkomin ne Jews hehma Joban nâng rangsoam thithe pa Jeroselem ngaeken.”

²¹Jisu ma atenâng ngatwah, “Dihiaknyu, nganâng putedâlem hang, sanpoat pa ehûra, mihnyan hehma Wa nâng are hahkong khokomin lesammin ngale Jeroselem nângmin lesammin.



²²Ne Samaritan hehma hennâng soam eken a erepemin senthemthem laangjetmet; rohkomin ni Jews hehma hennâng soam ekia erepa jeteki, chenrãngma ngako khope pa ni Jews hehwah choheki.

²³Rohkomin sanpoat pa ehûra, ngale lâhûtha, Joban Juchaan chohte mihnyan hehma Wa nâng Ju ngale toangtangma esoam a, ngale eroh soampa Joban Wama huneka.

²⁴Joban pa Ju, ngale ate Juchaan meloloba mihnyan hehma atenâng atema huneka rãngrãng toangtangma jiensoammin.”

²⁵Dihiaknyu pumma atenâng ngatwah, “Ngama Misaia ekara ngama ajet, ngale chenthu ate meka theko, atema ninâng chentôpa ethôkohhi.”

²⁶Jisu ma dânthâng wah, “Epa nga, nangdemnâng ngin thôminte pa Misaia.”

²⁷Ere sanpoatko Jisu dijunte heh hokwah, ngale thinma dihiaknyu demnâng ngin thômînthu khehû lahma nyahrãng patritwah. Rohkomin dihiaknyuko henmemin, “Chenni hun ekoa?” ba, “Ate demnâng chenrãngma thômîn eko?” ngama ngaho.

²⁸Erediko dihiaknyu pumma ate jotitpa phethien lahma hahnâng ngakwâng wah, ngale atema enângwah mihnyan hehnâng thôkoh wah,

²⁹“Suka tanrên, mihnyan wathema ngama chenni motek a erehêh phangtang thôkoh ehang. Atea Misaia edangthêm a?”

³⁰Ephumma thinhahwah mihnyan heh Jisu sokrãng katwah.

³¹Ere sanpoatko dijunte hehma Jisu nâng ngatwah, “Hethôte, chenni komin phhekchhah o!”

³²Rohkomin atema dânthâng wah, “Nganâng nema lejetli phhekchhah tonghang.”

³³Ephumma dijunte heh thindede tungko jabmînwah, “Atenâng henma akomin phhekchhah lâkephû themkotah.”

³⁴Jisu ma thinnâng ngatwah, “Nga phhekchhah pa, nga chienkatte nginkepkep danglekma atema chien ehang moatlem heh râmôatpa.



³⁵Nema aroh rãngnga en, ‘Chhahmùn rãng jengbelii tonga.’ Rohkomin, Ngama nenâng thòkoh eka, pit hehnâng senthemthem sùtan en; chhah heh lâmuntah, ngale khòankhen lâthângtah!

³⁶Chhah khòankhente hehnâng dekbithã kohmin, ngale atema roantang roanjêng roandông rãng khòanthien eka; erohwah akhiette le khòankhente nii aroamma khuhah nâhah edanga.

³⁷Arepa toantang ngin, ‘wathema chhahwên eka, ngale ahânma khòankhen eka.’

³⁸Nema moatwah ledang pitkowah chhahmun eka heh khòankhen rãng ngama ne chienchhoan eka; ere pitpa mihhânma moatwah, phumma thinma moatmãn kowah chhahpa nema kep eken.”

³⁹Dihiaknyu pumma thòkoh junko erehah wah Samaritan mihnyan heh jahmõang Jisu nãng putedâlem wah, “Ngama chenni motek a ereheh phangtang atema thòkoh ehang.”

⁴⁰Ephumma Samaritan heh ate tânâng kalahma thin demnâng johtông rãng roatsep wah, ngale thin demnâng Jisu jânii johtôngwah.

⁴¹Jisu nãng ate ngin junko ahan memin ajahthem ma putedâlem wah,

⁴²ngale thinma dihiaknyuko ngatwah, “Nima ade phumma lâputetih, rohkomin nangma ninâng thòkoh junko dangmah, nidedema ate ngin lâchohtattih, ngale linlin atea rangkhen Pângte ngama nima lâjettih.”

Jisu ma Sahhab wa Chha Paangmih Mesiet

⁴³Erehahko Jisu jânii tonghien lahma Galili nãng katwah.

⁴⁴Chenrãngma ngako ate dedema ngatwah, “Mõng heh thindiak akan nãnglolo roak atoak leweih thangma hân eka.”

⁴⁵Ate Galili nãng hokkhoam phumma, enângwah mihnyan hehmate roowah, chenrãngma ngako thinkhu Adankhoam Lokuhrãng Jeroselem nãng katwah, ereko lokuh poatko atema chentô motah heh thinma khewah.



⁴⁶Erediko Jisu Galili wah Kana hahko ngakktwah, ngale erehahko atema jowah angurtirãng litsietwah. Kaparnam hahwah Lowang khennâng moatte sahabwa chha paangmih pa khunlahma dângwah.

⁴⁷Atema chenthu Judia wah Galili nâng Jisu lâkatha ngama chohtat phumma, atema Jisu demnâng chohmin kalahma Kaparnam nâng wãng lahma ate chha riinemnem khun ekapa mesiet kohrãng roatsep wah.

⁴⁸Jisu ma atenâng ngatwah, “Nekhuma patritli le bâritli moatlem heh lekhe kenko henmemin putedâlem met.”

⁴⁹Sahhab pumma dânthâng wah, “Hethôte, Nga chhapa ritmako nga demnâng johwãng mênghang.”

⁵⁰Jisu ma atenâng ngatwah, “Wãngo: Nang chhapa riimah!” Ere mihwa pumma Jisu nginko putedâlem lahma wãngwah.

⁵¹Ate humnâng wãnglemko ate haa chohka lahma thôkoh wah, “Nang chhapa lâsentah!”

⁵²Atema thinnâng ate chhapa chenre sanpoatko sentah a ngama thôngphâ wah. Thinma dânthâng wah, “Mejâ sanhêmthah wanthe sanpoat tôko khoanchet pa sênwah.”

⁵³Ephumma atenâng, “Nang chhapa riimah,” ngama Jisu ma thôkotahpa ere sanpoatko thôkoh wah ngama naawa pumma thônghun wah. Ephumma ate ngale ate humte tangkâ heh phangtangma putedâlem wah.

⁵⁴Arepa Jisu Judia wah Galili nâng katdiko depniirãng patritli moatlem moatwah.

Jon 5

Binnâng Khoanchet Mesiet

¹Arediko Jisu Jews heh lokuh rãng Jeroselem nâng katwah.

²Jeroselem wah saak luphokthin lemkam tâko bin wanthe dângwah ereko kânthong wan - bangâ dângwah; erepa Hebru jabma Batjatha ngama ngaeka.



- ³Lemkam tâko khoanchette jahmõang juplahma dângwah mitdoak, dakò, kôasôte.
- ⁵Eretheko roakbelii pâesat khoanchetma chêm lahma mihwa wanthe dângwah.
- ⁶Jisu ma mihwa pa eretheko juplahma khewah, ngale mihwa pa ajahthem rangpâ khoanchetma lâchêmtah ngama Jisu ma ajet dângwah; ephumma atenâng Jisu ma thôngphâ wah, “Nangma asên hun ekole?”
- ⁷Khoanchette mihwa pumma dânthâng wah, “Hethôte, jopa phetpoatko nga thien-katte aretheko henmin aho; ngadedema katrăng phungkohle, ngamako hen komin khekho chikep kaeka.”
- ⁸Jisu ma atenâng ngatwah, “Toanchep o, nang hempa toanpe lohma khoam o.”
- ⁹Lemlienma mihwapa senlahma tôanchep wah; atema ate hempa toanpe lahma khôamwah. Ere sentah jâpa Pientôngjâ dângwah,
- ¹⁰Ephumma Jews thôte jabte hehma ere sentah mihwako ngatwah, “Thejâ Pientôngjâ, erohwah nãng Niem junko nangma nang hempa leta toanpemin.”
- ¹¹Atema dânthâng wah, “Nga sênsiette mihwa pumma nga hempa toangpe lekma khôamrăng chien ehang.”
- ¹²Thinma atenâng thôngphâ wah, “Hen a nangnâng are hempa tôanpe chientepa?”
- ¹³Rohkomin khoanchette mihwa pumma Jisu pa hen a erepa lejetwah, chenrăngma ngako eretheko mihnyan heh jahmõang dângwah, ngale Jisu min sitsiak mahkhoam wah.
- ¹⁴Erediko Jisu ma Rangsoamhum nâng lepke lahma ere mihwako ngatwah, “Tattan, ade phumma nanga lâsentoh; erohwah papkaam nekthõng motu, eroh ledang koko erenoma khoanchet chhih etechoh o.”
- ¹⁵Erediko ere mihwa pumma chhoan lahma Jews heh thôte jabte hehnâng ate sênsiette pa Jisu dângwah ngama thôkoh wah.



¹⁶Ephumma thinma Jisu nâng chêmsiet rãng bengphung wah, chenrãngma ngako atema Pientông jâko khoanchet mesietwah.

¹⁷Jisu ma thinnâng dânthâng wah, “Nga Wa pa roantangma moatjûjû tongeka, ngale erohwah Ngamemin moatmin.”

¹⁸Aroh ngat junko Jews heh thôte jabte hehmate ritphe rãng ajahthem phungwah; erepa atema Pientôngjâ Niem chhihsiet lolo ledang atema Joban pa atedede Wa ngamemin ngaeka, ngale atedede Joban tôthã hânrii eka.

Achha Chaan

¹⁹Ephumma thinnâng Jisu ma dânthâng wah, “Ngama nenâng toangtang thôkoh eka: Chhama ate dedema chennimin tamomah; Ate Wama chenni molahma kheka erepaba moeka. Wama chenni moeka erepa Chha memin moeka.

²⁰Chenrãngma ngako Wa pumma Chha ko hunlahma ate moatlem chentô moeka heh phangtang khesok eka. Wama are nomemin moatlemdong heh ate Chha ko ekhesok a, ngale nekhu phangtang bârit ere en.

²¹Wama chenroh ritwah ngakhinsiet lahma roandôngkoh eka ererãngrãng, Chha memin atema henhen nâng huneka ereheh nâng roandông ekoh a.

²²Ngale Wama hennâng min achhih asen ngama renmah. Atema ate Chha ko achhih asen rênrãng chaan phangtang lâkohtah,

²³erohwah thinma chenroh Wa nâng soangraang eka, ererãngrãng chentôma Chha memin soangraangmin. Henma komin Chha nâng lesoangraang medang ako, ate chienkatte Wa nângmin soangraangmah.

²⁴“Ngama nenâng toangtang thôkoh eka: Henhenma ngajab pa tatlahma nga chienkatte ko putedâlem eka erehehmate roantang roanjêng roandông echoh a. Thinnâng achhih ngama lengamin, rohkomin ritwah ahîn thinnâng lâdangtah.

²⁵Ngama nenâng toangtang thôkoh eka: Sanpoat pa hûera - ere sanpoat pa lâhûtha - riichoante hehmate Joban Chha kahra echohtat a, ngale henhenmate erepa chohtat eka ereheh engakhin a.



²⁶Chenroh Wa ngewah roandongchoh ekia ererãngrãng, atema ate Chhapa roandông kohterãng hânêka.

²⁷Ngale atema Chha nâng achhih asen rênrãng chaankoh eka, chenrãngma ngako atea Mihnyan Chha.

²⁸Are nginko nekpatrii en; chentô riichoante hehema ate kahra chohtat sanpoat pa ehûra

²⁹ngale mangrukwhah engaksatwãng wakra: Henhenma moatlemsen motah a ereheh roandông choh lahma engakhin a, ngale henhenma moatlem chhih motah a ereheh ngakhin lahma pap wendô nâng ekhamrii kawak a.

Jisu Rãngma Hâkhi

³⁰“Ngadede chaanma ngama chenmin tamomek; Nganâng Joban ma chenroh thôkoh ehanga eroh jôba ren ekang, erohwah ngama toangtangko ren ekang, chenrãngma ngako Ngama chenrohhun ekanga eroh momêk, rohkomin nga chienkattê pumma chenroh moat hunêka eroh moekang.

³¹“Ngama ngadede lolo merãngthôrii angko, ngama chenni thôekãnga erepa linlin ngama lekepmin.

³²Rohkomin nga rãngthôte tonga, ngale ngama ajê, atema ngajunma chenni thôeka erepa toangtang.

³³Nema Jon tânâng ne nginmatte chienkattê, ngale atema toangtang thôkoh wah.

³⁴Ngama mihnyan wah hâkhi hunmek; Ngama arejab ekangpa nekho chenpe en ngama jabekang.

³⁵Jon pa wentitdô ma rãngphiak arãngrãng phiak lahma dângwah, phumma nea ate wenphiakko poatthelolo khuhah nâhah dângwah.

³⁶Rohkomin Jon ma hâkhi hôantah noma adong ngarãng hâkhi hôante tonga: Ngama chenni moekanga, erepa Nga Wama mothuk ehâng, are pumma ngajunma hâkhi hôanlahma jabeka, ngale nga a nga Wama chienkatwah ngama khesok eka.



³⁷Ngale nga chienkatte Wama min ngajunma hâkhi hânêka. Nema ate kahramin mathat chohtat eken, ngale ate thhenphăng min mathat chohkhe eken,

³⁸ngale nema ate ngin pemin ne hungnâng thienmet, chenrăngma ngako atema chienkat erako nema putedâlem met.

³⁹Nema Joban nyapraangpa weih eken, chenrăngma ngako nema erekowah roantang roanjêng roandông chohmin ngama putedâlem eken. Phumma are Joban nyapraang pumma ngajunma jabeka!

⁴⁰Rohkomin nea ngatânâng roandông chohrăng hok hunmet.

⁴¹“Ngama mihnyan ma rô hunmek.

⁴²Rohkomin nea chenrăngrăng mihnyan a erepa ngama jet a, ngale ngama ajet ne hungnâng Joban nâng hun achetpa aho.

⁴³Nga a nga Wa chaan demnâng kaerâng, rohkomin nema nga kepmaaha; ngale henkomin atedede hungsima mehûrako erepa nema kep eken.

⁴⁴Nema wathema wathe rânghômin hun eken, rohkomin nema wanthe lolo Joban pumma rânghô pa hunmet; eroh medan enko nema nganâng chenroh ejien putedâlem ha?

⁴⁵Nema aroh nekthonghun en, Ewa tâko ngama nenâng esekhamhi ngama. Nima putedâlem eki ngama ngaeken Mosa ma jôba nenâng esekham hèn.

⁴⁶Nema linlinjô Mosa nâng putedâlem medan enko, nganângmin putedâlem min dângwah, chenrăngma ngako atema ngajunma raangwah.

⁴⁷Rohkomin atema chenni raangtah a ereko nema leputedâlem dâng phumma, ngama jabekang kojã tanga chenکو eputedâlem en a?”

Jon 6

Jisu ma Hahjat Bangâ Mihnyan nâng Phhekchhah thuk

(Mathiu 14.13-21; Mak 6.30-44; Luk 9.10-17)

¹Erediko Jisu Galili Josi rankanâng dânwângwah (ba, ereko Tiberias, ngamemin ngatwah).



²Jisu ma khoanchette heh patritli mēsiet pa khelahma jahmōang mihnyan heh ate diko junkhoam wah.

³Jisu hahhokho nāng wāng lahma ate dijunte heh demnāng tōngwāngwah.

⁴Ere sanpoatko Adankhoam lokuh thāngnemnem dāngwah.

⁵Jisu ma tūmlit phoangsū tahpa mihnyan heh ate tānāng jahmōang hūlahma khewah, ephumma atema Filip nāng chhienwah, “Are mihnyan hehnāng lânle phhekchhah thukroh chenwah phhekchhah chohrii ea?”

⁶(Atema arepa Filip hungtōan rāng ngatwah; linlinko atema chenremin a erepa jet dāngwah.)

⁷Filip ma dānthāng wah, “Anga ngama chhupruchha lânle chhahroh phhekchhah riakrāng memin chānii ngun noma ajah lēmin.”

⁸Dijunte ahan wathe Simon Piter pho Andru ma ngatwah,

⁹“Delachha wathe nāng wongwah hōanwah bankēn wanbangā ngale ngah lanii keplahma tonga. Rohkomin erepa are mihnyan hehrāng lemah.”

¹⁰Jisu ma thinnāng ngatwah, “Mihnyan heh tongthuk en,” (Eretheko hin jahmōang dāngwah) Ephumma mihnyan heh phangtang tongwah; ereko mihnyan heh hahjat bangā rāng dāngwah.

¹¹Jisu ma bankēn pa semlahma Joban nāng dangkoh a ngat rangsoam soamlahma erekowah tōngte mihnyan hehnāng phenkohwah. Ngale atema ngah lanii pemin eroh soamlahma kohwah, ngale thinma chentō tachhah eka eretō anga ngama chhahwah.

¹²Thinkhu phangtang phoatphoat chhah diko, Jisu ma ate dijunte hehnāng ngatwah, “Bāachā heh phangtang khōantoan en, chhupthemmin nekphahwa en.”

¹³Ephumma mihnyan hehma phhekchhah tah bankēn wanbangā kowah bāachā heh phangtang khōantoan lahma echhi phānii chōngchōng dāngwah.

¹⁴Jisu ma are patritli moatlem moatpa khelahma erekowah mihnyan hehma, “Linlinjō arepa mōng hahtokkhoh ko katte pa dāngmin ngama ngatwah!”



¹⁵Jisu ma ajet dângwah, mihnyan heh kalahma thin lowang rãng metkep dângmin jôba ngama ekhetlohang ngama; erohwah atelolo hahhokho nâng ngakwâng wah.

Jisu Jokhohnâng Khoam

(Mathiu 14.22-33; Mak 6.45-52)

¹⁶Sanhêmthah ko Jisu dijunte heh Galili josi ngenâng katwah,

¹⁷Ngale khôankhoko chhang lahma josi rankawah Kaparnam hah ngenâng wângwah. Rangnyek komin thin tânâng Jisu lehû dângwah.

¹⁸Erepoatko pông chaanmõang pông lahma josi pemin denmetwah.

¹⁹Dijunte heh meerem beliirãng chhoandiko thinma Jisu jokhoh pumma thin khôankho tâko khoamka lahma khewah, ngale erepa khelahma thin chei rewah.

²⁰Jisu ma thinnâng, “Nekchei en, arepa Ngaba!” ngama ngatwah.

²¹Erediko thinma khôankhoko khuhah nâhah chhangthukwah, ngale khôankhopa lemlienma thinwângrãng ngaeka theko chepkatwah.

Mihnyan heh ma Jisu Lem

²²Eredijâko josi rankawah mihnyan heh ma khôankhopa phangthe loloba etonga ngama thonghun wah. Atea dijunte heh demnâng lejohchhoan thangma atelolo phethientah ngama thinma jetwah.

²³Khôankho ahan Tiberias wah katte heh, Teso ma Joban nâng dangkoh a ngama ngat rangsoam soamlahma jahmõang mihnyan heh ma phhekchhah chhahtah josi kahko chepkatwah.

²⁴Chenthu mihnyan heh Jisu le ate dijunte heh eretheko lekhe dâng phumma, khôankhoko chhangwak lahma ate lêmsok Kaparnam hah ngenâng katwah.

Jisu pa Roandông Phhekchhah

²⁵Chenthu mihnyan heh ma Jisu josi rankanâng chohkhe phumma thinma atenâng ngatwah, “Hethôte, nang aretheko chenthu katoh a?”



²⁶Jisu ma dânthâng wah, “Ngama nenâng toangtang thôkoh eka: Nema bankên phoatphoat chohphhek junko nga lemsû eha, ngama patritli moatlem motekpa jetloat junkolêm dangmahha.

²⁷Achhihjà thin phhekchhah rãngma nekmo en; erenoma roantang roanjêng roandông chohtin phhekchhah rãngma mo en. Arerãngrãng phhekchhah pa Mihnyan Chhama nenâng ekohhèn, chenrãngma ngako Joban Wama atenâng erepa moatrãng chaankoh eka.”

²⁸Ephumma thinma atenâng thôngphâ wah, “Joban ma huneka moatlem moatrãng nima chenni moatmin a?”

²⁹Jisu ma thinnâng dânthâng wah, “Joban ma hen chienkattha ereko chen putedâlem a ngama hun ehèn.”

³⁰Thinma dânthâng wah, “Nima khelihma nangnâng jien putedâlem rãng nangma patritli moatlem chennimo oa? Nangma chennimo oa?”

³¹Nite niwa hehema sehakhô nâng mana chhahwah, Joban nyapraangma aroh ngaeka, ‘Atema thinnâng rangkethung wah phhekchhah kohlahma chhahthuk eka.’”

³²Jisu ma ngatwah, “Ngama toangtang thôkoh eka,” “Mosa ma chenni kohthen a erepa rangkethung wah phhekchhah dangmah; Ewa meba rangkethung wah phhekchhah linlinpa nenâng koh ehèn.

³³Chenrãngma ngako Joban ma koheka phhekchhah pa rangkethung wah kalahma hahtokkhoh nâng roandông chohkoh tepa.”

³⁴Thinma chhienwah, “Hethôte, ninâng are phhekchhah pa roantang roanjêngma kohhi.”

³⁵“Nga a roandông phhekchhah pa,” ngama Jisu ma thinnâng thôkoh wah. “Henhen ngatânâng hûera ereheh rêm leriimin; ngale henhenma nganâng putedâlem ehanga ereheh jolânmin leriimin.

³⁶Ngama nenâng thôkoh eka, nema nga khetha rohkomin nema nganâng putedâlem mahtha.



- ³⁷Ewa ma nganâng henhenkoh ehanga ereheh ngatânâng ehûra. Henhen ngatânâng hûera ereheh ngama chenthumin lejunlomin,
- ³⁸Chen-rãngma ngako nga rangkethung wah nga hungsiko moatrãngkat dangmahrâng, ngachien katte hungsiko moatrãng kaerâng.
- ³⁹Ngale ngachien katte pumma hun ekapa atema nganâng henhen kohthanga ereheh wah wathemin lemahphe rãng huneka, athôanjâ rangwo ko ngama ereheh phangtang hînsietmin.
- ⁴⁰Chen-rãngma ngako Ewa ma huneka pa henhenma Chhapa khelahma atenâng putedâlem eka erehehma roantang roanjêng roandông chohrãng huneka. Ngale athôanjâ rangwo ko ngama thin engak hinsiet ang.”
- ⁴¹Atema “Nga a rangkethung wah katte phhekchhah pa” ngama jabphumma mihnyan heh ate lelatnâng nyahrãng chhihjabwah.
- ⁴²Ephumma thinma atenâng ngatwah, “Arepa Josep chha jisu ledangne? Nãngma ate nyong awa niimin jet e. Phumma atema nga rangkethung wah katte phhekchhah ngama chenroh jienjab eka?”
- ⁴³Jisu ma dânthâng wah, “Nekhu dede tungko phoangchhih jabpa jekre en.
- ⁴⁴Ngachien katte Nga Wama lesiethû erako mihnyan heh henmin ngatânâng leta hûmin; ngale ereheh ngama athôanjâ rangwo ko engakhinsiet ang.
- ⁴⁵Mõng hehma raangwah, ‘Joban ma anga nganâng hethômin.’ Ngale henhenma Wa ngin keplahma atewah he eka ereheh ngatânâng ehûra.
- ⁴⁶Rohkomin arepa henma komin Wa lâthat chohkhetah ngama ngat dangmah; henpa Joban tâwah kaera erepumma loloba Wa pa lâchohkhetah.
- ⁴⁷Ngama toangtang thôkoh eka: henhenma putedâlem eka ereheh nâng roantang roanjêng lethôan roandông tonga.
- ⁴⁸Nga a roandông phhekchhah.
- ⁴⁹Nete newa hehma sehakhô nâng mana chhahwah, rohkomin thinmin riitah.



⁵⁰Phuma rangkhetung wah kaera phhekchhah kowah henhenma chhah eka ereheh leriimin.

⁵¹Nga rangkhetung wah katte ahin roandông phhekchhah. Henma komin are phhekchhah kowah chhah eka erepa roantang roanjêng rãng hînmin. Ngama atenâng kohmin phhekchhah pa nga phoangpa, ngama erekoh ekangpa hahtokkhoh wah mihnyan heh ahînma tongrãngkoh ekang.”

⁵²Are junko thintungko nyahrãng rinkhah lahma chhiakmîn wah. Thinma ngatwah, “Are mihnyan pumma ate phoangpa nãngnâng chenroh jienphhekthuk hia?”

⁵³Jisu ma thinnâng ngatwah, “Ngama tongtang thôkoh eka: Nema Mihnyan Chha phoang kowah lephhek kenko, ngale ate hei lejok kenko, nededema roandông leta chohmin.

⁵⁴Henhenma ngaphoang kowah phhek eka, ngale nga hei jok eka erehehma roantang roanjêng lethôan roandông echoh a, ngale athôanjâ rangwo ko ngama engakhinsiet ang.

⁵⁵Chenrãngma ngako nga phoangpa phhekchhah linlin; ngale nga hei pa jokthin linlin.

⁵⁶Henhenma ngaphoang kowah phhek eka ngale nga hei jok eka ereheh nga demnâng dângmin, ngale ngamin thin demnâng edangang.

⁵⁷Nga a ahînte Wama chienkat ehang, ngale ere junwah ngamin ahîn dangekang. Ererãngrãng henhenma ngaphoang kowah phhek eka erehehmin ngajunma ahîn edanga.

⁵⁸Are phhekchhah pa rangkhetung wah kaera; arepa nete newa hehma chhah lahma khediko rit rewaktah rãngrãng dangmah. Henhenma are phhekchhah pa chhah eka ereheh roantang roanjêng rãng hînmin.”

⁵⁹Jisu ma arepa Kaparnam wah Sanagog ko hethô nungma ngatwah.

Roantang Roanjêng Roandông Chohthin Jabkhab



⁶⁰Ajahthem ate dijunte heh ma are nginpa tatlahma ngatwah, “Are hethô ehipa nyahrãng alat. Arepa henma tâkepmin a?”

⁶¹Jisu nâng henmemin lethôkoh thangmejô thinma phoangjab ekapa jetwah, ephumma Jisu ma thinnâng ngatwah, “Are ngin pumma ne putedâlem thinphe hunthuk ehèn a?”

⁶²Thatthong hun tan, Mihnyan Chhapa khemako ate chenke tongtah a ereheko ngakwãng lahma khepa?

⁶³Roandông pa Joban Juma kohehi; hei angem phoangpa chennijô dangmah. Nga nedemnâng jabmîn eka jabkhab pumma Joban ngewah roandông chothhin Ju kephûkoh ehèn.

⁶⁴Rohkomin nekhuwah khaka pumma putedâlem met.” (Henhenma atenâng leputedâlem min a, ngale henma ate chênssângmin a erepa Jisu ma jetwah.)

⁶⁵Jisu ma ngatwah, “Are junko ngama nenâng thôkoh wah, Wama lehûthuk erako mihnyan henmin ngatânâng leta hûmin.”

⁶⁶Are junkowah Jisu dijunte heh ajahthem ate demnâng lejoh chhoantu ngakchhoan wah.

⁶⁷Ephumma Jisu dijunte echhi waniiko thôngphâ wah, “Nemin ngakchhoan hun eken a?”

⁶⁸Simon Piter ma atenâng dânthâng wah, “Teso, nia hen demnâng echhoan ea? Nangnâng roantang roanjêng lethôan roandông kohthin jabkhab pa tongho.

⁶⁹Ngale ade phumma nima lâpute dâlemtih, ngale nanga Joban tâwah katte Asâthôn pa ngama lâjettih.”

⁷⁰Jisu ma dânthâng wah, “Ngama nekhu echhi wani ren eka, rohkomin nekhuwah wathe nâng juchhih etonghèn!”

⁷¹Atema Simon Iskarot chha Juda rãngma jabwah. Chenrãngma ngako, Juda pa echhi wani dijunte chhang kowah wathêjô medan akomin, atema Jisu chênssângmin.



Jon 7

Jisu ngale Ate Naa heh

¹Arediko Jisu Galilijaa nâng phoangkhôam wah; atema Judia ngenâng wângpa lehun dângwah, chenrăngma ngako Jews heh thôte jabte hehmate ritphe rãng hunwah.

²Tembu hum hân lahma wângchhah lokuh sanpoat pa thâng lahma dângwah,

³Ephumma Jisu naa hehmate atenâng ngatwah, “Nanga arethe kowah Judia nâng wângo, erohkoba nangma chenni moeko ereheh nang dijunte hehmate ekhea.

⁴Chentôma chenjethang ngama methonghun oko mihnyan hehmate thinma chenni moeka ereheh rânghuhriem mah. Nangma are chentô moeko hehmin rangkhen phangtangma chenjet ho!”

⁵(Ate naa hehmemin atenâng putedâlem ho.)

⁶Jisu ma thinnâng ngatwah, “Ngarãng sanpoat mathang eka. Rohkomin nekhu rãngma chentôpa sanpoatpun tuta.

⁷Hah-tokkhoh mihnyan ma nenâng jienchhihchoh mahhên, rohkomin nganâng chhihchoh ehang, chenrãngma ngako ngama thin moatlem pa achhih ngaekang.

⁸Nea lokuh thinnâng wângên. Nga a are lokuhko wângmahrâng, chenrãngma ngako ngarãngma sanpoat pa mathâng eka.”

⁹Atema aroh ngalahma Galili nâng jektôngwah.

Jisu Tembu Hum Wângchhah Lokuh thinnâng

¹⁰Ate naa heh lokuh thinnâng wângdiko Jisu min junwângwah; rohkomin atea sansanma leloatkhoam thangma, huhchha ma hokwah.

¹¹Jews heh thôte jabte hehmate lokuh thinnâng ate lêmsokwah. Thinma, “Ate chenkoa?” ngama chhienwah.



¹²Mihnyan heh chhangko ate junma nyahrãng phoanghuh jabmînwah. Khaka heh ma, “Atea mihnyansen” ngatwah, rohkomin khaka heh ma, “Dangmah, Atea aba apha” ngawah.

¹³Rohkomin ate junma henmejô laanglaang chinthôho, chenrãngma ngako thin a Jews heh thôte jabte heh ranchei wah.

¹⁴Lokuh khaka râchoanko Jisu ma Rangsoamhum nãng wãng lahma hethô wah.

¹⁵Jews heh thôte jabte heh nyahrãng patrii lahma ngatwah, “Are mihnyan pumma nyapweih nyapraangmin aho thangma aretô chenroh jienjet eka?”

¹⁶Jisu ma dânthâng wah, “Ngama chenni hethô ekanga erepa ngadede wah hethô dangmek, erepa ngachien katte Joban ngewah hethô ekang.

¹⁷Henhenma Joban ma chenni huneka erepa moat huneka ereheh ma, ngama Joban junko hethô ekang ale ngadede chaanmajab ekanga erepa ejet a.

¹⁸Henhenma thindede chaanko jabeka erepumma atedede mîndôngpa ehun a. Rohkomin henma ate chienkate mîndôngrãng huneka erepa toangtang, ngale atenâng chenni athejô aho.

¹⁹Mosa ma nenâng Niemarang pa kohthen, rohkomin erepa henmemin kepmet. Nema nga chenrãngma ritphehun eha?”

²⁰Mihnyan heh ma dânthâng wah, “Nangnâng juchhih tongho erepumma nang ritphehun eho?”

²¹Jisu ma dânthâng wah, “Ngama patritli moatlem wanthe moatko, nekhu phangtang patritre eken.

²²Mosa ma nenâng delachha heh khoankhen niemhônãrãng chienwah (Erepa Mosa ma ledang nete newa heh ma hôngmoatwah), ngale erohwah nema delachha heh Pientông jâko khoankhen niemhôn eken.

²³Delachha pa nema Joban Pientông jâko khoankhen niem hânletma nema Mosa Niemarang pa lechhihsiet medan enko, Ngama khoanchette mihnyan



pa Pientông jâko senthemthem mêsietrângma nga demnâng chenrângma rinkhah eha?

²⁴Khoankhoh nâng sûletma achhih asen ngama rênpa jekre en, toangtangma ren en.”

Atea Misaia ne?

²⁵Jeroselem wah mihnyan khuthema ngatwah, “Jews heh thôte jabte hehma ritphe râng lemeka mihnyan pa arepa ledangne?”

²⁶Sûtan! atema nok atang heh chhangko thôkoh eka, rohkomin thinma ate lelatnâng chenjô jabmah! Thinmemin atea linlinjô Misaia ngama jetthem eka?

²⁷Rohkomin chenthu Misaia pa meka theko, henmemin ate chenwah hûera erepa lejetmin. Phumma ate chenwah hûera erepa nângkhu chentôma jet e.”

²⁸Jisu ma Rangsoamhum nâng hethô poatko, atema chaanmõang rakjabwah, “Nema nga linlinjô jet ha, ngale nga chenwah hûerânga erepa jet ha? Nga a ngadede chaanko hok dangmahrâng. Rohkomin, ngachien kattepa toangtang. Phumma erepa nema jetmet,

²⁹Ngale ngama ate jet ang, chenrângma ngako nga ate tâwah kaerâng ngale atema chienkat ehang.”

³⁰Ephumma thinma ate loathunwah, rohkomin henmemin atenâng dek chinjâho, chenrângma ngako ate sanpoat pa mahû dângwah.

³¹Rohkomin mihnyan heh chhangwah melângma atenâng putedâlem lahma ngatwah, “Chenthu Misaia meka theko, are mihnyan pumma moeka nomemin ajahthem patritli heh emoa?”

Jisu Loatkhek râng Sipâhi heh Chienkat

³²Mihnyan hehma Jisu junma huhthômîn pa Farasi hehma leptatwah, ephumma thinma ngale soam aroakte hehma Jisu loatkhek râng sipâhi heh chienkatwah.



³³Jisu ma ngatwah, “Nga nedemnâng poatthe rãngba etongang, ngale erediko ngachienkate tânâng ewãng ang.

³⁴Nekhuma nga elemsûha, rohkomin nema lechoh khemin, chenrãngma ngako nga chenre theko chhoan ekanga eretheko nekhu leta wãngmin.”

³⁵Jews heh thôte jabte heh thindede tungko jabmînwah, “Nãngma lechohlem thinnâng ate chenke chhoanrãng ngaeka? Nãnglemru Griik heh songeka hahnâng kalahma Griik hehnâng hethôkat rãng lengaeka?

³⁶Atema ngaeka, nãngma ate elemsûe, rohkomin nãngma ate lechoh khemin, ngale ate chenke chhoan eka eretheko nãng leta wãngmin. Atema chenni junkojob eka?”

Roandông Kohthin Jokhô

³⁷Lokuh râjâ rangwo ngale erejâpa nyahrãng alemthôanjâ rangwo ko Jisu toanchep lahma chaanmông rakjabwah, “Henhen jolânrii eken a ereheh ngatânâng hûren, ngale

³⁸Henhenma nganâng putedâlem ehanga erehehma jok en. Joban nyapraangma ngaeka rãngrãng, ‘Ate phoangwah roandông kohthin jokhô ehongjen kara.”

³⁹Arepa Jisu ma Ju junko jabwah, henhen ma atenâng putedâlem eka erehehma ere Ju pa chohmin. Ere sanpoatko Ju pa makoh dângwah, chenrãngma ngako, Jisu Joban chaan keplahma ritwah ma ngakhin dângwah.

Mihnyan heh Phoangphanjâ

⁴⁰Mihnyan heh chhangwah khakama are jabkhab pa leptat lahma ngatwah, “Are mihnyan pa linlinjô mông!”

⁴¹Khaka hehma, “Atea Misaia!” ngatwah Rohkomin khaka hehma, “Misaia pa Galili wah lehûmin! ngatwah,

⁴²Joban nyapraangma ngaeka, Misaia pa Devit Lowang chhuchha wah dângmin ngale atea Devit songtah hah Bathlehem nâng chhatmin.”

⁴³Erohawah Jisu junko mihnyan heh phoangphanjâ wah.



⁴⁴Khaka hehma loathunwah, rohkomin atenâng henmemin dek chinjâho.

Jews thôte jabte hehma putedalam mah

⁴⁵Chenthu abemte sipâhi heh ngakwâng phumma soam aroakte adong le Farasi hehma chhienwah, “Nema ate chenrăng lelowên dangeren a?”

⁴⁶Sipâhi hehma dânthâng wah, “Are mihnyan pumma jabeka răngrăng hen mihnyan memin mathat jabeka!”

⁴⁷Farasi hehma thinnâng ngatwah, “Atema nemin baphhek thenne?”

⁴⁸“Jews thôte jabtema komin ba Farasi ma komin wathemejô atenâng putedâlem lahma nema thatjettet a?”

⁴⁹Mihnyan hehma Mosa Niemarang pa jetmah, erohwah thin a Joban ma echhihsiet a!”

⁵⁰Phumma ereko amanâng Jisu demnâng chohmîn hokte Farasi wathe ate mînpa Nikodima dângwah. Atema ahan hehnâng ngatwah,

⁵¹“Năng Niem junko mihnyan kowah machohtat ma, ngale atema chenni chhihmoeka erepa machohkhe ma hennâng min athe jien ngamih.”

⁵²Thinma dânthâng wah, “Nangmin Galili wahne? Joban nyapraang meweih oko nangma ejet o chenthumin Galili wah mông lehongmin.”

Jon 8

Dihiaknyu Dela Demnâng Kaamchhih Moatte Chohloat

¹Erediko anga nga humnâng chhoanwah, rohkomin Jisu Oliv hahho nâng wângwah.

²Eredijâ rangkhah rangkhoma Jisu Rangsoamhum nâng ngakkatwah. Phumma mihnyan heh phangtang ate tumlitko khôantông wah ngale atemin tonglahma thinnâng hethô wah.

³Niemarang hethôte ngale Farasi hehma dihiaknyu dela demnâng kaamchhih moatte lohû lahma, thin phangtang mathahko chepthuk wah.

⁴Thinma Jisu nâng ngatwah, “Hethôte, are dihiaknyu pa dela demnâng kaamchhih molahma chohloeki.



⁵Nãng Niem junko arerãngrãng dihiaknyu pa longma ritpetmin ngama Mosa ma chienwah. Phumma nangma chenroh ngaekoa?”

⁶Thinma arepa Jisu bukrii thuklahma atenâng athe jienloatrãng ngatwah. Rohkomin Jisu ma kunka lahma ate deksuma hahko raanglahma dãngwah.

⁷Mihnyan heh eretheko cheplahma atenâng nginthongphâ poatko, ate toanchep lahma thinnâng ngatwah, “Nekhuwah henma pap mathat motea erepumma atenâng bengpet en.”

⁸Eredi-komin atema thengak kunka lahma ate deksuma hahko raanglahma tãngwah.

⁹[Chenthu mihnyan hehma are nginpa tatphumma phannang thôn pumma thunlahma wathe wathema phangtang thônchhoan wah. Eretheke Jisu lolo dihiaknyu demko lekchep lahma phethien wah.

¹⁰Jisu ma toanchep lahma dihiaknyuko ngatwah, “Mihnyan heh chenke dangeka? nangnâng achhih ngatrãng wathemin ahotune?”

¹¹Dihiaknyu pumma, “Hethôte, henjô ahotu,” ngama dânthâng wah. Phumma Jisu ma ngatwah, “Sen a, eroh medang ako, ngamemin nangnâng achhih ngamih. Choan o, rohkomin papkaam nekthe ngakmotu.”]

Jisu Hahtokkhoh Rãngma Wenphiak

¹²Jisu ma Farasi hehnâng wienthe ngatwah. “Nga a hahtokkhoh rãngma wenphiak,” “Henhenma ngadiko junkhoam ehanga erehehma roandông wenphiak pa echoh a ngale thin chenthumin rangnyek nãng lekhoammin.”

¹³Farasi ma atenâng ngatwah, “Nangma nangdede rãngthôrit hun eko; erohwah nangma chenni thôeko ereheh sekhota.”

¹⁴Jisu ma dânthâng wah, “Eroh dangmah, phumma nga dedejô merãngthôrii angkomin, ngama chenni thôekanga ereheh tongtang, chenrãngma ngako, nga chenwah hûerâng a ngale nga chenke chhoanmin a ereheh ngama ajet. Phumma nema nga chennângwah hûerâng a ba chennâng chhoan ekanga erepa jetmahha.



¹⁵Nema mihnyan nyuchha hung arin junko ren eken; phumma Ngama hennâng min renmek.

¹⁶Rohkomin Ngama meren angko, ngama toangtangko eren ang, chenrângma ngako arepa nga loloma rên dangmek; Nga chienkatte nga Wa min ngademko tonghang.

¹⁷Nãng Niem nâng aroh raanglahma tonga, chenthu hâkhi wanii mehongtahko, thinma chenni thôeka erepa toangtang.

¹⁸Ngama ngadede rângthôrii ekang, ngale nga chienkatte nga Wa memin nga jôba rângthô ehang.”

¹⁹Phumma thinma, “Nang Wa pa chenkoa?” ngama thôngphâ wah. Jisu ma dânthâng wah, “Nema nga jetmahha, ngale nga Wa min jetmet,” “Nema nga jetngako, nga Wa min chenjettet.”

²⁰Jisu ma are chentôpa Rangsoamhum wah ngun bâkoat thieneka theko thinnâng hethô nungma ngatwah. Rohkomin henmemin ate lokhhek ho, chenrângma ngako ate sanpoat pa mahû dângwah.

Nga Chenko Dang ekanga Eko Ne Tachhoanmet

²¹Eredikomin Jisu ma thinnâng ngatwah, “Nga chhoan ere ang; phumma nema nga elemsûha, rohkomin nea nepap junko erii en. Nga chennâng dang ekanga eretheko ne tachhoan met.”

²²Ephumma Jews heh thôte jabte hehma ngatwah, “Ate chenko dangeka eretheko nãng leta chhoanmin ngaeka. Arepa atedede ritpherit rãng ngaeka”

²³Jisu ma dânthâng wah, “Nea are rangkhenko tôngte, rohkomin nga a rangkho wah kaerâng. Nea are hahtokkhoh kowah, rohkomin nga a are hahtokkhoh wah dangmek.

²⁴Erohwhah ngama nea nepap demko erii en ngama thôkoh eka. Ngale ‘NGA, HEN NGA A’ ngama ngarii ekako leputedâlem kenko nepap khenkojô erii en.”

²⁵Thinma atenâng, “Nanga hen a?” ngama chhienwah. Jisu ma dânthâng wah, “Ngama khebengma chenni thôkotah a.



²⁶Ngama nenâng ajahthem thôkohthin tonga, ngale ajahthem achhih ngatthinmin tonga. Ngachien katte pa toangtang, ngale ngama atewah chenni chohtat ekanga erepa hahtokkhoh ko thôkoh ekang.”

²⁷Jisu ma thinnâng Joban Wa junma thôkoh eka erepa thinma jetmah.

²⁸Ephumma atema thinnâng ngatwah, “Chenthu nema Mihnyan Chhapa mechoangpe tetko ‘NGA, HEN NGA A’ ngama ngatrit tepa ejet en; erediko nga hungsima chennimin momek ngama ejet en, rohkomin Wama chenni jabrãng thôkoh ehanga erepa jôba jabekang.

²⁹Ngale ngachienkatte pa ngademko tonga; atema ngalolo thinphe mahhang, chenrãngma ngako ngama roantangma atema chenni huneka erepa lolo moekang.”

³⁰Jisu ma are jab ekapa chohtatte heh ajahthem ma atenâng putedâlem wah.

Toangtang Pumma elaang phehèn

³¹Ephumma atenâng putedâlemte hehnâng Jisu ma ngatwah, “Ngama hethô ekapa nema mekep enko, nea linlin ngadijunte;

³²Nema toangtang pa ejet en, ngale toangtang pumma ne elaang phehèn.”

³³Thinma ngatwah, “Nia Abraham chhuchha” “ngale nia henhu ahaamin mathat dangeki. ‘Ne elaang phehèn’ ngama nangma chenni ngatthiak jab eko?”

³⁴Jisu ma thinnâng ngatwah, “Ngama nenâng toangtang thôkoh eka: Henhenma pap moeka ereheh paphaa.

³⁵Haaheh hen humnângmin roantang roangiêng rãng dangmah, rohkomin humkâ kowah delachha peba roantang roangiêng rãng tângte.

³⁶Chha pumma ne melaang phehèn koba, nea linlinrãng laangphe ehèn.

³⁷Ngama ajet nea Abraham chhuchha. Rohkomin nema nga ritphe rãng huneha, chenrãngma ngako ngama hethôeka pa nemakep hunmet.

³⁸Nga Wama chenni khesok thanga erepa ngama thôekãng, rohkomin nema newama chenni thôkohthen a erepa moeken.”



³⁹Thinma atenâng dânthâng wah, “Niwa pa Abraham.” Jisu ma dânthâng wah, “Nea linlinjô Abraham chhuchha dângnoseko, nememin atema motah rângrâng chenmotet.

⁴⁰Ngama Joban wah chohtattek toangtang nginpa nenâng thôkoh eka, rohkomin nema nga ritphe râng huneha. Phumma Abraham ma arerângrâng moho!

⁴¹Newa hehma chenni motah a erepa nememin moeken.” Thinma ngatwah, “Niwa wathe loloba etonga, erepa Joban, ngale nia ate chha linlin.”

⁴²Jisu ma thinnâng ngatwah, “Joban pa linlin newa dângnoseko, nema nganâng hun reminwah, chenrângma ngako nga Joban tâwah kaerâng, ngale athângheh akotong ang. Nga a ngadede chaankokat dangmahrâng, atema chienkat lahmeba kaerâng.

⁴³Ngama jab ekangpa nema chenrângma lejet reken a? Arepa nema nga nginpa lenyoaktat junko dangeka.

⁴⁴Nea newa joakchha, ngale newa ma chenni huneka ere junko kep eken. Rangbâng hahbâng thuma atea mihritphete, ngale atea toangtang lemkhôko chenthumin mathat khoam eka, chenrângma ngako atenâng toangtang aho. Atema mothô thôekapa, mothô thôtejat dâng phumma thôeka, chenrângma ngako atea mothô ngale mothô khoanglep heh wa.

⁴⁵Rohkomin ngama toangtang thôkoh eka, erohwah nema nganâng putedâlem mahha.

⁴⁶Nekhuwah henma ngama pap molek-ma thatkhetha? Ngama toangtang methô angko, nema nganâng chenrângma lepute dangeha?

⁴⁷Henhen Joban tâwah kaera erehehma Joban nginpa ejetat a. Rohkomin nea Joban tâwah dangmet, erohwah nema Joban nginko lejetat dangeken.”

Jisu ngale Abraham

⁴⁸Thinma Jisu nâng ngatwah, “Nanga Samaritan jat ngale nangnâng juchhih lup eho. Nima arepa punnga ekile?”



⁴⁹Jisu ma dânthâng wah, “Nganâng juchhih lupmahhang, Ngama nga Wa soangraang ekang, rohkomin nema nga soangraang mahha.

⁵⁰Ngama ngadede mîndôngpa hunmek. Rohkomin nga mîndôngthuk hunte wathe tonga, ngale atema ngarãngma ejab a.

⁵¹Ngama nenâng toangtang thôkoh eka: Henhenma nga nginkep eka ereheh chenthumin leriimin.”

⁵²Thinma Jisu nâng ngatwah, “Athângheh nima linlin lâjettih nangnâng juchhih lâluptho! Abraham min riitah, ngale mông hehmin riitah, rohkomin athângheh nangma nganâng henhenma putedâlem ehanga ereheh leriimin ngaeko.

⁵³Niwa Abraham riitah; Nanga Abraham, nomemin adong thonghunrii ekoa? Ngale mông hehmin erohjô riitah. Nanga hen ngama thonghunrii ekoa?”

⁵⁴Jisu ma dânthâng wah, “Ngama ngadede merângthôrii angko, erepa sekhotâ dângmin. Nga rângthôte pa nga Wa - ere kojôba nememin ni Joban ngama ngaeken.

⁵⁵Nema ate mãthatjet eken, rohkomin ngama ate jet ang. Ngama ate jetmek menga angko, ngamin nekhû rãngrãng mothô jôba. Rohkomin Ngama ate jet ang, ngale ngama ate ngin kepekãng.

⁵⁶Newa Abraham ma ngakat sanpoat pa khelek mele ngama thonghun lahma khuhah nâhah dângwah; Erepa atema khelahma khuhahwah.”

⁵⁷Thinma atenâng ngatwah, “Nanga rangpâ roak bangâ min madang eko - phumma nangma Abraham khetoh o?”

⁵⁸Jisu ma dânthâng wah, “Ngama toangtang thôkoh eka, Abraham mako ‘NGA’ dângwah.”

⁵⁹Ephumma thinma atenâng longma petrãng long tânwah, rohkomin Jisu huhtong lahma Rangsoamhum wah loatchhoan wah.

Jon 9

Jisu ma Achhat Mejû Mitdoak Dela wathe Sênsiet



- ¹Jisu dankhôm poatko, atema chhat mejû mitdoak chhatwah dela wathe lepkhewah.
- ²Ate dijunte hehma atenâng chhienwah, “Hethôte, Hen pap junma atea mitdoak chhaeka? Atedede pap junko ale ate nyong awa heh pap junko mitdoak chhaeka?”
- ³Jisu ma dânthâng wah, “Ate mitdoak pa ate pap junmemin dangmah ngale ate nyong awa heh pap junmemin dangmah. Ate mitdoak ekapa atenâng Joban chaan ma molahma jienkherãng doak eka.
- ⁴Rangwo poatko, nãngma ngachienkatte moatlempa moatmin; rangnyek pa lâhûera, erepoatko henmemin lejiên motumin.
- ⁵Nga a hahtokkhoh ko dângpoatko, Hahtokkhoh rãngma wenphiak.”
- ⁶Atema arepa ngatdiko, Jisu ma hahko thoakkah thoak lahma hahwah ngeknyetwah; ngale atema ere hahngék pa mihwa mitko hutkohwah
- ⁷ngale atenâng ngatwah, “Nang thenpa Silom binko mutphekao.” (Are ngaeka pa “achienchhoan” ngama ngaeka.) Ephumma mihwa pa kalahma ate thenpa mutphê katwah, eko mitma jienkhe lahma ngakwâng wah.
- ⁸Ate tok akhung wah hehma, ngale khemako chutphhekchhah kheta h mihnyan hehma ngatwah, “Are mihnyan pa tonglahma chitha phhekchhah tahpa ledangne?”
- ⁹Khaka ma, “Danga” ngatwah, ngale khaka ma, “Ate dangmah; rohkomin ate rãngrãngjô” ngama ngatwah. Ephumma mihwa pumma ate dedema hôngngatwah, “Nga ere mihnyan pa dangang”
- ¹⁰Thinma chhienwah, “Nangma athângheh chenroh danglohma jienkhe ekoa?”
- ¹¹Atema dânthâng wah, “Mihnyan wathe ate mînpa Jisu, atema hahngék ngeknyet lahma ngamitko hutkoh ehang, ngale atema nang thenpa Silom bin ko mutphekao ngama chienwah. Ephumma nga kalekma mutphêkat wah, ngale ngama mutphê rienrienko jienkhe ekang.”



¹²“Ate chenkoa?” ngama thinma thôngphâ wah. “Ngama jetmek,” ngama dânthâng wah.

Farasi hehma Khoanchet Mêsiet junma Lênte

¹³Erediko mitdoak dangtah mihwa pa thinma Farasi heh tânâng siethokwah.

¹⁴Jisu ma hahngék ngeknýet lahma ate mitdoak sensiétta h jâpa Joban pientôngjâ dângwah.

¹⁵Erediko Farasi hehma mihwako ate mitpa chenroh jienhong sentah a erepa thengak thôngphâ wah. Atema thinnâng thôkoh wah, “Atema nga mitko hahngék hutkohwah; erediko ngama then mutphe lekma jienkhe wah.”

¹⁶Farasi khuthema ngatwah, “Are moatte mihnyan pa Joban tâwah ledangmin, chenrãngma ngako atema Pientông niem pa kepma h.” Ahan heh ma aroh ngatwah, “Arerãngrãng patritli moatlem heh papi mihnyan ma chenroh ejienmoa?” Ngale thintung komin mâmâ khukhu dangjâwah.

¹⁷Ephumma Farasi hehma ere mihwako wîenngak chhienwah, “Nangma nang mitpa atema sensiét ehâng ngaeko - sen a, eroh medang ako nangma atea hen ngama ngaekoa?” “Atea mông,” ngama mihwa pumma dânthâng wah.

¹⁸Rohkomin Jews heh thôte jabte heh ma ate nyong awa heh roomako atea mitdoak dângwah jienkhe eka ngama lepute dângwah

¹⁹ngale thinma ate nyong awa hehnâng chhienwah, “Arepa nechha ne? ngale nema atea mitdoak chhat wahne; eroh medang ako, atema athângheh chenroh jienkhe eka?”

²⁰Ate nyong awa heh ma dânthâng wah, “Nima ajet atea nichha, ngale nima ajet atea mitdoak chhatwah.

²¹Rohkomin athângheh atema chenroh jienkhe eka erepa nimemin jetmih, ngale ate mitdoakpa henma sensiétta h a erepemin nima jetmih. Atenâng chhien en; atea phannang lâdangtah, ate rãngma atedede mejô ejien dânthângheh”



²²Ate nyong awa heh ma arepa Jews heh thôte jabte heh rancheima ngatwah, chenrãngma ngako Jews heh thôte jabte heh ma henhenma Jisu nãng atea Misaia ngama putedãlem eka ereheh Sanagog wah junloatmin ngama nginpatwah.

²³Eroh wah ate nyong awa heh ma, “Atea phannang lâdangtah; atenãng thõngphã en!” ngama ngatwah.

²⁴Eredikomin mitdoak dãngwah sentah pa rekthe thengak roolahma atenãng ngatwah, “Joban mathahko toangtang thõang ngama toamsem o! Nima ajet are nang sãnsiette mihnyan pa papi mihnyan.”

²⁵Mihwa pumma dãnthãng wah, “Ngama atea papi dang ale dangmah a erepa jetmek” “Ngama wanthe loloba jet ang: Nga mitdoak dãngwah, ade phumma ngama lâjienkhetek.”

²⁶Thinma thõngphã wah, “Atema nangnãng chenni rethoa? nang mitdoak pa chenroh sensietthoa?”

²⁷Atema dãnthãng wah, “Ngama thõkotah, rohkomin nema putemet. Chenrãngma thẽngaktat hun eken a? Nemin ate dijunte dãnghun eken a?”

²⁸Thinma atenãng dũmmek lahma ngatwah, “Nanga ere mihnyan dijunte; rohkomin nia Mosa dijunte.

²⁹Nima ajet Mosa demnãng Joban jabmĩn rewah; phumma are mihnyan pa chenwah hũera erepa nima ajetjõ lemjetmih!”

³⁰Mihwa pumma dãnthãng wah, “Arepa chentõ patritli ngin a! Nema ate chenwah hũera erepa jetmet, rohkomin atema nga mitdoak pa sensiet ehãng!”

³¹Nãngma ajet Joban ma papi mihnyan hehnãng jetatmah; Ate rancheite le atema huneka moatlem moatte mihnyan hehnãng ba atema jetat eka.

³²Rangbãng habbãng thuwah achhatma mitdoak chhatte nãng henmemin mitsensiet lahma mathat chohtat eki.

³³Eroh wah are mihnyan pemin Joban tãwahkat ledang nãng, atema arerãngrãng pa leta momin”



³⁴Thinma dânthâng wah, “Nanga achhat mejû papi chhaeho - phumma nangma ninâng hethô hun ehia?” Ephumma thinma atea Sanagog wah junloat rewah.

Ju nâng Mitdoak

³⁵Ere nginpa Jisu ma chohtat diko, atema mihwa pa chohmîn lahma atenâng chhienwah, “Nangma Mihnyan Chha nâng putedâlem ekole?”

³⁶Mihwa pumma dânthâng wah, “Hethôte, Atea hen a erepa nganâng thôkoh hang, ephumma ngama atenâng eputedâlem ang!”

³⁷Jisu ma atenâng ngatwah, “Nangma ate lâkhetoh, ngale erepa athângheh nang demnâng thômîn ehopa.”

³⁸Mihwa pumma ngatwah, “Teso!, ngama putedâlem ekang,” eroh ngalahma Jisu mathahko khupjup wah.

³⁹Jisu ma ngatwah, “Nga are hahtokkhoh ko achhih asen rên rãngma kaerâng, erohwah mitdoak hehma ejienkhea, ngale henhenma jienkhe eka ereheh mitdoakrãng edanga.”

⁴⁰Ate demwah Farasi khuthe dangtah hehma erepa tatlahma atenâng ngatwah, “Nangma ninângmin mitdoak ngaehia?”

⁴¹Jisu ma dânthâng wah, “Nea mitdoak dângnomeko nenâng pap aho dângmin wah; rohkomin nema nia mitdoak dangmih ngama ngatdi, nenâng pap tonghèn.”

Jon 10

Saaksokte Thakthô

¹Jisu ma ngatwah, “Ngama toangtang thôkoh eka: Hen komin Saak heh tânâng kêsek pumma ledang lemhânma mekohûako, erepa ahuhte.

²Henhen kêsek pumma luphueka ere peba Saaksokte.

³Kêsek bemte pumma aterãng kêsekpa elaangkoh a; ngale atema saak hehnâng mînma roko saak hehma ate kahra pa etat a, ngale atema esen chhoan a.



⁴Chenthu atema mesen chhoan ako, saak heh mamako ate ekhoam a, ngale saak hehmin atediko ejûnkhoam a, chenrãngma ngako thinma ate kahra pa jîn eka.

⁵Thinma mihhândi lejûnmin; erenoma, ererãngrãng mihnyan heh tâwah huhchhoan erea, chenrãngma ngako, thinma ate kahra jînmah.”

⁶Jisu ma thinnâng are nginthakthô pa thôkoh wah, rohkomin atema chenni nâng ngaeka erepa thinma jetmah.

Jisu Pa Saaksokte Sen

⁷Ephumma Jisu ma wîenthe ngatwah, “Ngama toangtang thôkoh eka: Nga a saak hehrãngma kêsek.

⁸Ngamawah katte heh phangtang ahuh tuta, ngale saak hehma thinngin kepmah.

⁹Nga a kêsek. Henhen nga kêsekkam pumma humkhen nâng lupwãng eka ereheh khope chohmin; thin a humkhen nâng wãng lahmemin ngakloat chhoan lahma thinma phem echohphhek a.

¹⁰Ahuhte heh ahuhrãng, ngale ritphe rãng, erediko chhihsiet rãng lolo ehûra. Nga a nema roandông chenmamchoh en ngama hûerâng - chenni nângmin lethoam lethang roandông chenmamchoh en ngama hûerâng.

¹¹“Nga a saaksokte sen, ngale saak hehrãngma ritmin tariiang.

¹²Saaksokte ngale saaktangte ledang thăkoh lahma thieneka mihnyan pumma chenthu soan mekhe ako atema saak heh phethien lahma huhchhoan erea; ephumma soan hehma saak heh kek lahma ephan chhoanthuk a.

¹³Thă kohlahma thieneka mihnyan pa huhchhoan erea, chenrãngma ngako atea thă nângba moeka, atema saak hehrãngma patriimah.

¹⁴⁻¹⁵Nga a saaksokte sen. Ewa ma nga jet ehang rãngrãng, ngamemin Ewa jet ekang, ererãngrãngjô ngama ngasaak heh jet ang, ngale ngasaak hehmemin nga jethang. Ngamin ngasaak hehrãngma ritmin tariiang.



¹⁶Are saak chhangko ledangte ngasaak ahan nângmin tonga. Ngama erehehmin metkep siethokmin; thinmemin nga kahra tatlahma saaksokte wanthe khennâng khuthe dângtumin.

¹⁷“Wama nganâng hun ehang, chenrãngma ngako ngama nga roandôngpa koh ekang. Ngama ade ditthe ngakchohrãng nga roandôngpa koh ekang.

¹⁸Henmemin nga roandôngpa nga ngewah tanyen mahhang. Ngama ngadede hungsima koh ekang. Ngama akohmin takoh ang, ngale ngakkeppmin tare ang. Ngawama nganâng aroh moatrãng chien ehang.”

¹⁹Eredikomin are jabkhab junko thintungnâng mâmâ khukhu dângjâwah.

²⁰Melâng mihnyan hehma atenâng ngatwah, “juchhih lup eka! Ngale apâ reka! ate ngin chenrãngma kep eken a?”

²¹Rohkomin khaka hehma ngatwah, “Juchhih lupte mihnyan ma arerãngrãng jienjabmah! Juchhih ma mihnyan mitdoak pa chenroh jiensensiet koh a?”

Jisu nâng Thājô

²²Arepa rangpa nâng dângwah, ngale Jeroselem wah Rangsoamhum wâng niemhôn lokuh dângwah.

²³Rangsoamhum wah Solomon Kânthong ngama ngaeka theko Jisu phoangkhoam lahma dângwah,

²⁴Mihnyan heh ate tumlitko khônahu lahma atenâng chhienwah, “Nangma ni chentô lektûngmaang thukmin a? Ninâng laangthôkoh ehi: Nanga Misaia dangole?”

²⁵Jisu ma dânthâng wah, “Ngama nenâng râthôkotah, rohkomin nema nganâng putedâlem mahha. Ngama Ewa ma chien ehang moatlem moekang pumma ngarãngma jabeka;

²⁶roh akomin nema putedâlem met, chenrãngma ngako nea ngasaak dangmet.

²⁷Ngasaak hehma ngakahra pa tateka; Ngamemin thin jet ang, ngale thinma ngadijun ehang.



²⁸Ngama thinnâng roantang roanjêng roandông koh ekang, ngale thin chenthumin leriimin. Henmemin thin a ngadek wah leta nyenchhoanmin.

²⁹Ngawama nganâng chenni koh ehanga erepa chenni nomemin adongthôn, ngale henmemin Wa dekwah leta nyenchhoan min.

³⁰Ewa chenii a wanthe.”

³¹Erediko mihnyan hehma atenâng petrângma long tôanwah.

³²Jisu ma thinnâng ngatwah, “Wama nganâng mothukthang moatlemsen ajahthem ne mathahko mokotah; erehehwah chenre moatlemsen moatthã nema nga ritpetâng huneha?”

³³Thinma dânthâng wah, “Nima nangnâng moatlemsen moatthã ritpethun dangmih, nangma Joban thãse jabkhab jabthãba ritpetrâng ngaeki! Nanga mihnyan danglohma, nangdede Joban rãng dângrit huneko!”

³⁴Jisu ma dânthâng wah, “Ne Niem nâng, Joban ma atenâng ‘Nanga Joban’ ngama raanglahma tonga.

³⁵Nãngma ajet Joban nyapraangma chenni ngaeka erepa roantang roanjêng rãng toangtang; ngale Joban ma ate ngin thôkotah mihnyan hehnâng joban ngawak eka.

³⁶Nga dangeka, Wama renlahma hahtokkhoh ko chienkat ehang. Phumma ngama nga a Joban Chha ngatrângma nema nganâng chenroh Joban thãse eko ngama jienngaeha?

³⁷Ewa ma mothuk ehang moatlempa ngama lemo medang angko nganâng nekpute dâlemha.

³⁸Rohkomin ngama erehejô memo angkomin nema nganâng putedâlem mahha, nganângjô leputedâlem eha komin, ngama moekang moatlem hehnâng putedâlem letmeko, nema Ewa pa nga demnâng ngale nga a Ewa demnâng ngama chenjettet.”

³⁹Eredikomin rekthe thinma Jisu loatrâng hunwah, rohkomin thindekwah Jisu pechhoanwah.



⁴⁰Erediko Jisu Jordanjo rankawah Jon ma baptijem koheka theko thengak wângwah, ngale ate eretheko tângwah.

⁴¹Eretheko ate tânâng ajahthem mihnyan hokwah. Thinma ngatwah, “Jon ma chenni patritli moatlemjô momah, rohkomin atema are mihnyan junma chenni ngatah a ereheh phangtang toangtang.”

⁴²Ngale ajahthem mihnyan heh ma atenâng putedâlem wah.

Jon 11

Lazaras Rit Ngin

¹Bathani hahnâng sângte mihnyan wathe ate mînpa Lazaras pa khun rewah. Mariam ngale ate naa Martha niimin erehahko sângwah.

²(Are Mariam pumma Teso dako tientumli ma lokko lahma ate khochoo pumma choakhut kohwah; phumma are khuntepa ate naa Lazaras dângwah.)

³Ate khakho pumma Jisu nâng ngin matkatwah: “Teso, nang lemruhasen pa riitah.”

⁴Chenthu Jisu ma are nginpa tatphumma atema ngatwah, “Are khun junwah Lazaras leriimin; arepa Joban mîndôngthuk rângba khun eka, ngale are junko Joban Chha mîn edongthuk a.”

⁵Jisu ma Martha ngale ate khakho ngale Lazaras nâng nyahrâng hunwah.

⁶Rohkomin chenthu atema Lazaras khun nginpa chohtat lahmemin leka thangma ate tongtah theko jâni tângthienwah.

⁷Erediko atema dijunte hehnâng ngatwah, “Nâng Judia nâng ngakwânge.”

⁸Dijunte heh ma dânthâng wah, “Hethôte,” “Enângwah mihnyan heh ma nang longma ritpetrâng phungtahwah chentô mataang eka; phumma nanga enâng ngakwâng phung ekoa?”

⁹Jisu ma dânthâng wah, “Jâtheko echhi koantani dangmahne? Erohwah henhen rangwo poatko khoam eka ereheh dakho lethutrii min, chenrângma ngako are hahtokkhoh kowah wenphiak pa thinma khe eka.



¹⁰Rohkomin thin rangnyek nâng mekhoam ako dakho ethut a, chenrãngma ngako thinnâng wenphiak aho.”

¹¹Jisu ma arepa ngatdiko thinnâng thôkoh wah, “Nãng lemruçha Lazaras pa juplekre eka, phumma nga kalekma ate satsiet katmin.”

¹²Dijunte hehma dânthâng wah, “Teso, atea ajup medang ako, asen erea.”

¹³Jisu ma Lazaras riitah ngama ngatthiak ngatwah, rohkomin thinma jup nângjô ngathem eka ngama thônghun wah.

¹⁴Ephumma Jisu ma thinnâng, “Lazaras riitah, ngama thôkoh wah.

¹⁵Rohkomin nga khuhah ekang, chenrãngma ngako nga ate demko ledangpa nekhurãng asen dangeka, ade phumma nema eputedâlem ha. Nãngkhu ate tânâng kae.”

¹⁶Thomas (atenâng Didimas ngamemin roowah) ma ate lemru hehnâng ngatwah, “Nãngkhu phangtang nãng hethôte demnâng johkae, erohkoba nãngkhumín ate demnâng ejohriie!”

Jisu pa Arit wah Ngakhînte ngale Roandông

¹⁷Chenthu Jisu hokkhoam phumma, Lazaras pa rukat tahwah jâbelii lâdangtah ngama tônglâwah.

¹⁸Bathani hah pa Jeroselem kowah meenii nomemin athe dângwah,

¹⁹ngale Jews mihnyan heh ajathem Mariam le Martha tâko thinnaa ritjunko chohmîn hûlahma dângwah.

²⁰Chenthu Martha ma Jisu lâhûtha ngama chohtat phumma ate lemchohrãng loatchhoan wah, rohkomin Mariam pa humko tônglâwah.

²¹Martha ma Jisu nâng ngatwah, “Teso, nang anâng dângwah dângnomeko, nganaa pa leriimin wah!

²²Rohkomin ngama jet athâng hehmin nangma Joban wah chenni thaeko erepa ekohho.”

²³Jisu ma atenâng thôkoh wah, “Nangnaa pa ngakhîn erea,”



²⁴Martha ma dânthâng wah, “Ngama ajet,” “Athôanjâ rangwo ko ate engakhin a.”

²⁵Jisu ma atenâng ngatwah, “Nga a ritwah ngakhînte ngale roandông. Nganâng henhenma putedâlem ehanga ereheh ritjô mere akomin, ahîn erea;

²⁶ngale henhenma nganâng putedâlem lahma tongeka ereheh chenthumin leriimin. Nangma areko putedâlem ekole?”

²⁷Atema dânthâng wah, “Teso, putedâlem ekang!” “Ngama nanga hahtokkhoh ko katte, Joban Chha Misaia ngamemin putedâlem eki.”

Jisu Sep

²⁸Martha ma arepa ngatdiko, ngakwãng lahma ate khakho Mariam pa huhchhama roowângwah. Ate khakho nâng thôkoh wah, “Hethôte pa ako tonga,” “ngale atema nang lem eho.”

²⁹Chenthu Mariam ma tatphumma, toanchep lahma Jisu chohmînřang sitsiak loatkatwah.

³⁰(Ere poatko Jisu hahdaang nâng mahuwãng dângwah, ate demnâng Martha chohmîntah theko tonglahma dângwah.)

³¹Mariam demnâng humko johtongtah mihnyan hehma Mariam tôanchep lahma sitsiak loatchhoan pa khelahma ate diko junchhoan wah. Mariam ma mangruk nâng kalahma sepkatrãng ngaeka ngama thinma thônghun wah.

³²Mariam, Jisu tâko hûka lahma Jisu chohkhe rienrien, Jisu dathongko khupjup katwah. Atema ngatwah, “Teso,” “Nanga anâng dângwah dângnomeko nganaa pa leriiminwah!”

³³Jisu ma Mariam seplahma khewah, ngale ate demwah mihnyan hehmin seplahma khewah; eko Jisu min nyahrãng hungchhihwah.

³⁴Jisu ma thinnâng, “Chenriang nâng binkattet a?” ngama chhienwah. Thinma dânthâng wah, “Teso, wãnglohma sũwãng tanro,”

³⁵Jisu sepwah.

³⁶Mihnyan hehma ngatwah, “Sũtan en atema chentô huneka!”



³⁷Rohkomin khaka hehma ngatwah, “Atema mitdoak hehmin sensiеттаh dangmahne? phumma atema Lazaras ritwah leta ngakhinsiet minne?”

Lazaras ngakhinsiet

³⁸Eredikomin nyahrãng hung wienthe chhih lahma, Jisu mangruk nãng katwah, mangruk pa longwah thutwah, ngale lupwãng thinko longkhama tangsek lahma dãngwah.

³⁹Jisu ma “Longkhapa rephe en!” ngatwah. Martha aritte nyadem, pumma dãnthãng wah, “Teso lânemtah dãngmin. Ate binkat tihwah jãbelii lâdangtah!”

⁴⁰Jisu ma atenãng ngatwah, “Putedãlem mere oko nangma Joban chaanpa echokheo ngama lethôkoh wahne?”

⁴¹Thinma longpa rephewah. Jisu ma rangkho nãng sũwên lahma ngatwah, “Wa nangma nganãng chohtatdi dangkoh a ngaeki.

⁴²Ngama ajet nangma roantangma tatkat ehang, rohkomin arekawah mihnyan hehrãng sênrãngma arepa ngaeki, erohkoba nga a nangma chienkatwah ngama thinma eputedãlem a.”

⁴³Atema arepa ngatdiko, chaanmõang raklahma, “Lazaras, loatkaro!” ngama roowah.

⁴⁴Ate dek ada heh mangdoapkheth pumma doapkhhek, ngale ate thenphãng komin khetma doaplahma loatkatwah. Jisu ma thinnãng ngatwah, “Khet heh jãnphekoh en,” “ngale chenwãnga.”

Jisu Lelatnãng Ranchep

(Mathiu 26.1-5; Mak 14.1, 2; Luk 22.1, 2)

⁴⁵Mariam demnãng chohmînãng jahmõang mihnyan hutah hehma Jisu ma chenni motah a erepa khelahma atenãng putedãlem wah.

⁴⁶Rohkomin khaka heh ngakchhoan lahma Jisu ma chenni motah a ereheh Farasi hehnãng thôkoh wah.



⁴⁷Ephumma Farasi le Soam aroakte adong heh ngoang awang heh demnâng chohmîn lahma ngatwah, “Nãngma chenre ea? Are mihnyan pumma patritli moatlem moeka hehnâng thatsûtan en!

⁴⁸Nãngma arohjû medangthuk eko, chentôma atenâng eputedâlem a, ngale Rom diakma nãngnâng chhihchoh lahma nãng Rangsoamhum ngale nãng diakpa echhihsiet kohhi!”

⁴⁹Kaipas ngama wathe ere rangpâko atea Soam aroakte adongthôn dângwah, erepumma ngatwah, “Nea talânbatet a!

⁵⁰Diaktangma chhihjâ noma mihnyan hehrãngma wathe mihnyan ritpeba asen ngama nema chhemhun metne?”

⁵¹Linlinko ate hungsiwah hôngjabwah dangmah; phumma ere rangpâko atea Soam aroakte hehwah adongthôn dângwah dâng phumma, atema Jisu Jews hehrãngma ritmin ngama Joban ngewah loatjabwah,

⁵²ngale atelolo rãng ledang, Joban nãng putedâlemte mihnyan phoangphan chhoan eka heh wathe mihnyan rãngrãng roamsiet hokrãngma jabwah.

⁵³Erejâ phumma Jews heh thôte jabte hehma Jisu ritphe rãng themawa wah.

⁵⁴Ephumma Jisu Judia nãng mihnyan heh mitkheko leloat khoamtu thangma, sehad kêwah Ifariem hahko tôngwângwah, ereko ate dijunte heh demnâng tôngwah.

⁵⁵Adankhoam lokuh thângnemnem dângwah, ngale mihnyan heh jahmông thindiakwah Jeroselem nãng lokuh mako seksâsoan niemhôn rãng hokwah.

⁵⁶Thinma Rangsoamhum ko khôanhû lahma Jisu lemsokwah, thinma wathema wathe nãng chhienmîn wah, “Nangma chenroh thonghun eko? Linlinjô atea lokuh rãng lehû minne?”

⁵⁷Soam aroakte adong ngale Farasi hehma ngatwah, Jisu chenriang nãng tongeka erepa jette hehma ninâng sitsiak thôhok kohmin, chenrãngma ngako thinma ate loatkhek rãng ngatwah.

Jon 12



Bathani Hahnâng Jisu nâng Tienma Lokkoh

(Mathiu 26.6-13; Mak 14.3-9)

¹Adankhoam lokuh rãng jâerok mako, Bathani hahwah atema riichoanwah ngakhinsiettah mihwa Lazaras humko Jisu hokwah.

²Thinma ere humko Jisu rãng rangjâ phhekchhah khoakhêm kohwah, phhekchhah kohtepa Martha dângwah; ngale Lazaras min Jisu demko johphhekchhah lahma dângwah.

³Phumma Mariam ma nard bângrin wah hôanwah tien thãchaanjat kephû lahma Jisu dako lokkohwah, ngale ate khochoo ma choakhutkoh rewah. Ngale tien pumma hum tangma tûmsietwah.

⁴Jisu dijunte wathe, ate mînpa Juda Iskarot ate chênsângte pumma ngatwah,

⁵“Are tienpa chârem ngun nâng sângminwah ngale ere ngunpa tangchhih hehnâng kohminwah”

⁶Atema arepa tangchhih hehnâng mînchen lahma ngatwah dangmah, atea ahuh dângkowah ngatwah. Atea ngun thiente dâng phumma ere ngun kowah atedede rãng chîkepwah.

⁷Phumma Jisu ma ngatwah, “Nekchhihsû en, ate hunsiko thien en! Atema nga ritjâ rangwo rãngma chenni moeka erepa chenmoa.

⁸Nema ne demko tangchhih heh roantangma echoh en, rohkomin nema nga roantang chohmahha.”

Lazaras Lelatnâng Ranchep

⁹Jahmõang mihnyan hehma Jisu Bathani hahnâng tonga ngama chohtatwah, ephumma thin Bathani hahnâng katwah, Jisu tânâng lolo ledang atema aritwah ngakhinsiettah Lazaras sokrãng memin katwah.

¹⁰Ephumma soam aroakte adong hehma Lazaras min ritphe rãng themawa wah,

¹¹chenrãngma ngako ate junma ajahthem Jews hehma thinnâng leputetu thangma Jisu nâng putedâlem wah.

Tajien lahma Jeroselem nâng Hok



(Mathiu 21.1-11; Mak 11.1-11; Luk 19.28-40)

¹²Eredijâko jahmõang mihnyan Adankhoam lokuh rãng hokte hehma Jisu Jeroselem nãng hûera ngama chohtatwah

¹³Ephumma thinma Pam bãngphak heh semlahma Jisu chohmînřãng katwah, thinma, “Joban nãng rõe! Teso mînko hokte nãng Joban ma rangkoh eka! Joban ma Isrial Lowang nãng rangkoh eka!” ngama rakwah.

¹⁴Joban nyapraangma ngaeka rãngrãng, Jisu ma Gado chha choh lahma ere khohko chhangwah,

¹⁵“Zion chha heh, nekchei en! Ne Lowang pa lâhûtha, Gado chha khohko chhang lahma hûera.”

¹⁶Ere sanpoatko ate dijunte hehma arepa jetloho; phumma Jisu ritwah Joban chaan chohlahma ngakhîn diko Joban nyapraangma arepa ate junma ngatwah ngale thinmemin arepa aterãng moatwah ngama thõnghun wah.

¹⁷Jisu ma Lazaras mangruk wah rookat lahma ritwah ngakhinsiettah poatko ate demnãng dangtah mihnyan hehma Jisu ma chenni retah a ereheh thõkoh wah.

¹⁸Ere junko mihnyan heh ate demnãng chohmînwah - chenrãngma ngako Jisu ma are patritli moatlem moeka pa thinma chohtatwah.

¹⁹Ephumma Farasi heh jabmînwah, “Thatsûtan en, nãngma tajek tãngmih! rangkhenpa phangtang ate diko jun eka!”

Griik hehma Jisu Lêm

²⁰Lokuh poatko Jeroselem nãng rangsoam rãng kate heh demnãng Griik jatmin khuthe dãngwah.

²¹Thinma Filip tânãng wãng lahma (atea Galilijaa wah Batsida hah wah dãngwah) ngatwah, “Hethôte, nimemin Jisu demnãng chohmînhun eki.”

²²Filip wãng lahma Andru nãng thõkoh wah, ngale ere waniipa wãng lahma Jisu nãng thõkoh wah.



²³Jisu ma thinnâng dânthâng wah, “Mihnyan Chhama Joban wah nyahrãng chaandong choh sanpoat pa thângheh lâhûtha.

²⁴Ngama toangtang thôkoh eka: chhahpha pa hahko wênkat lahma leriikako phathelolo jôba dângmin. Erepa meriako jôba, erekowah chhahpha ahan ajah ehonga.

²⁵Henhenma thindede roandôngko huneka erehehema mahphe erea; henhenma are hahtokkhoh ko thin roandôngko lehun dangeka erehehema thin roandông pemin lemahphe thangma roantang roanjêng roandông echoh a.

²⁶Henhenma ngadijun hun ehanga erehehema chenjunhang, erohkoba nga chenko dang ekanga eretheko ngahaa pemin edanga. Ngale henma nga khoakhem ehanga erepa nga Wa memin atenâng echhoanpôan a.

Jisu ma ate Rit Ngjin Jab

²⁷“Athângheh ngahungpa nyahrãng chêm ekang - ngale ngama chenni jab anga? ‘Wa, are sanpoat pa nga khohnâng nekhu thukro’ ngama jabanga? Rohkomin ererãngma nga katwah - erohwah Ngama are chêm sanpoat pa chohmin jôba.

²⁸Wa, nangmînpa dongthuk e!” Erediko rangkho wah jabkhab jabkatwah, “Ngama Wa mînpa lâdong thuktek, ngale ademin edongthuk ang.”

²⁹Erekowah chepte mihnyan hehema ere jabkhab pa tatwah, phumma khaka hehema rangmok eka ngama ngatwah, erediko khaka hehema, “Atenâng rangkethung wah Joban ngintatte hehema jabkat eka!” ngatwah.

³⁰Rohkomin Jisu ma thinnâng ngatwah, “Are jabkhab hongjab ekapa ngarãngma dangmah, nekhurãng sênrãngma hongjab eka.

³¹Athângheh are hahtokkhoh pa achhih asen rên sanpoat pa; ngale are hahtokkhoh pênthe juchhihpa rephe sanpoat.

³²Chenthu nga are hahtokkhoh kowah metoansietwên thangko, Ngama chentôpa ngatânâng sietwêmin.”

³³(Jisu ma arepa ate chenroh ritmin a erengin pa thôkoh wah.)



³⁴Mihnyan hehma dânthâng wah, “Ni Niemma Misaia pa roantang roangjêng rãng hînmin ngama thôkoh ehi. Nangma Mihnyan Chhapa tôansietwên min ngama chenroh jiennga eko? Mihnyan Chhapa hen a?”

³⁵Jisu ma dânthâng wah, “Wenphiak pa nekhu demko chutherãng tôngmin. Erohwah nema wenphiak pa chohpoatko khoam en, erohkoba nenâng rangnyek ma lelep edanghèn; chenrãngma ngako rangnyek nâng henkhoam eka erepumma ate chennâng chhoan eka erepa jetmah.

³⁶Nema wenphiak pa chohpoatko wenphiakko dâlem en, erohkoba nea wenphiak chha edangen.”

Mihnyan hehma Putedâlem wah

Jisu ma areheh ngatdiko, thintâwah chhoan lahma bîntông chhoanwah.

³⁷Jisu ma thintâko are chentô patritli hejô memo akomin, thinma atenâng putedâlem ho,

³⁸Erohwah mông Isaia ma chenni jabtah a ereheh toangtang dângwah: “Teso, nima thôkoh eki nginko henma putedâlem eka? Teso ma hennâng ate chaanpa khesoktah a?”

³⁹Ngale thinma putedâlem ho, chenrãngma ngako Isaia ma ngatwah,

⁴⁰“Joban ma thinmit pa doaksiet eka ngale thinhung pa basiet eka, erohwah thinmitma khe mah, ngale thinhung memin tajet mah, ngale Joban ma ngaeka, ngama thin sênsiet rãngma, thin ngatânâng hûmahra.”

⁴¹Chenrãngma ngako Isaia ma are jabkhab jab ekapa atema Jisu mîndôngpa khelahma Jisu junma jabwah.

⁴²Eroh akomin ajahthem Jews thôte jabte hehmemin Jisu nâng putedâlem wah; rohkomin Farasi hehma Sanagog wah nekchen junlo ehi ngama thinma mihheh tânâng chinloat jabho.

⁴³Thinma Joban wah rô chohhun noma mihnyan hehwah rô chohba hunwah.

Jisu Jabkhab ma Achhih Asen pa Ren eka



⁴⁴Jisu ma chaanmõang rakjabwah, “Henhenma nganâng putedâlem ehanga erepa nganâng lolo putedâlem dangmah, ngachienkatte komin putedâlem eka.

⁴⁵Henhenma nga khe ehanga erepumma ngachienkatte pemin khe eka.

⁴⁶Nga a hahtokkhoh ko wenphiak rãngrãng kaerâng, erohwah henhenma nganâng putedâlem ehanga ereheh rangnyek khennâng letongtûmin.

⁴⁷Mihnyan hehema nga nginpa tatlahma lekep medang akomin, ngama thinnâng achhih lengamin. Nga a hahtokkhoh wah mihnyan hehnâng achhih asen rênrãngkat dangmahrâng, mihnyan heh pepâng rãngba kaerâng.

⁴⁸Henhenma nganâng lepute dâlemte ngale nga nginlekep dangeka ereheh nâng achhih ngate tonga. Ngama jabekang jabkhab pumma athôn jâko thinnâng achhih engawak a!

⁴⁹Arepa toangtang, chenrãngma ngako, ngama ngadede chaanjunko jab dangmek, rohkomin ngachienkatte Wama ngama chenni jabmin a ereheh thôkoh ehang.

⁵⁰Ngale ngama ajet ate ngin junko roantang roanjêng roandông choheki. Erohwah, Wama chenni thôkoh ehanga, ereheh ngama jabekang.”

Jon 13

Jisu ma Ate Dijunte heh Dasôan koh

¹Arepa Adankhoam lokuh majâko dângwah. Jisu ma hahtokkhoh pa phethien lahma Wa tânâng wâng sanpoat pa lâhûtha ngama jetritwah. Atema hahtokkhoh wah ate mihnyan hehnâng roantang hun achetjû dângwah, ngale atema thinnâng athôn sanpoatko kiat hunwah.

²Jisu le ate dijunte heh rangjâ phhekchhah chhah lahma dângwah. Simon Iskarot chha Juda hungnâng Jisu chênsâng rãng thônghun thukte juchhihpa luplahma dângwah.



³Wama nganâng chaan kohlahma chentôpa ngakhennâng lâdang thuktah ngama Jisu ma jetwah; ngale atea Joban tâwah katwah ngale Joban tânâng ngakwângmin ngamemin jetwah.

⁴Ephumma phhekchhah chhahthin kowah toanchep lahma, akhohwah poh eka khetpa koakphe lahma, ate roamko khet tôankhhekwhah.

⁵Erediko wankhoang nang jokien lahma ate dijunte heh dasôan kohwah ngale ate roamwah khak eka khet pumma choakhut kohwah.

⁶Ate Simon Piter tâko hokko, Simon Piter ma ngatwah, “Teso, nangma ngada soankohrăng ngaekoa?”

⁷Jisu ma atenâng dânthâng wah, “Ngama athângheh chenni moekanga erepa nangma jetmoh, rohkomin nangma khediko erepa ejet o.”

⁸Piter ma ngatwah, “Nangma chenthumin ngada lesuan kohmin!” Jisu ma dânthâng wah, “Ngama nangda lesankoh medang eko,” “Nanga ngadijunte leta dângmin.”

⁹Simon Piter ma dânthâng wah, “Teso, eroh medang ako ngada lolo neksoan kohhang! Ngadekmin soankohhang, ngale nga khomin setkohhang!”

¹⁰Jisu ma ngatwah “Henhen josoanchoan a ereheh senthemthem lâsâtah, athê depsôanthin dangtumah, thinma dalolo ba soantumin. Nekhu phangtang lâsâtet wathe loloba ngek etonga.”

¹¹(Jisu ma erepa ate chênsângte pa jetlahma dângwah; erohwah atema ngatwah, “Nekhu phangtang lâsâtet, wathe loloba ngek etongen.”)

¹²Jisu ma thinda soankoh diko, atema koakphetah khetpa ngaktoanpoh lahma phhekchhah chhahthin ko ngaktông katwah. Ngale atema chhienwah, “Ngama athângheh nenâng chenni mokotah a ereheh jet ekenle?”

¹³“Nema nganâng Hethôte ngale Teso ngama roeoha, erepa nema lâpun rootha, chenrăngma ngako nga dangang jôba.

¹⁴Nga ne Teso ngale ne Hethôte danglekma athângheh neda soankoh eka. Erohwah nemin wathema watheda soanmînkoh en.



¹⁵Nema chenjet en ngama ba soankoh eka, erohwah ngama athângheh nerãng chenroh moekanga ererãngrãng nememin erohmo en.

¹⁶Ngama toangtang thôkoh eka: haaheh henjô ate tângtewa noma adong dangmah, ngale ngintat chhoante heh henmin ngintat chiente noma adong dangmah.

¹⁷Athângheh nema are toangtang pa lâjettet, phumma nema ererãngrãng memo enko chentôsên dângmin a!

¹⁸“Ngama nekhu anga nga nginthô dangmek; Ngama henhen ren ekanga ereheh jet ang. Rohkomin Joban nyapraangma are ngaeka pa toangtang dângmin, ‘Ngadem kowah ngama chhah ekang phhekchhah kowah johchhahte pa nga lelatnâng dangeka.’

¹⁹Ngama nenâng arepa dângwâng mako thôkoh eka, phumma chenthu arepa medangwãng thako, nema ‘NGA, HEN NGA A,’ erepa ejet ha.

²⁰Ngama toangtang thôkoh eka: Henma komin ngama chienchhoan ekang mihnyan pa metângroo ako erepa nga tângroo ehang; ngale henhenma nga tângroo ehanga erepa ngachien katte pemin tângroo eka.”

Jisu ma Ate Chênsengmin ngama Jet

(Mathiu 26.20-25; Mak 14.17-21; Luk 22.21-23)

²¹Jisu ma areheh ngatdiko, ate hungnâng nyahrãng chêmchoh lahma loatthôkoh wah, “Ngama toangtang thôkoh eka: Nekhuwah wathema nga echên esengha.”

²²Dijunte heh nyahrãng mokrii lahma arepa hendângmin a ngama wathema wathe nâng sokmînwah.

²³Dijunte wathe nâng Jisu ma nyahrãng hunlahma dângwah, erepa Jisu tâko tângwah.

²⁴Simon Piter ma atenâng thak amak kohlahma ngatwah, “Atema hennâng ngaeka erepa chhientan.”

²⁵Ephumma ere dijunte pa Jisu tâko hehtong wãng lahma chhienwah, “Teso, erepa hen a?”



²⁶Jisu ma dânthâng wah, “Ngama penritiko bankên rumkat lekma hennângkoh ekanga; ere mihnyan pa dângmin.” Ephumma atema bankên toanlahma rumkat lahma Simon Iskarot chha Juda nâng kohwah.

²⁷Juda ma bankên pa thârienrien ate hungnâng juchhih lupwah. Jisu ma atenâng ngatwah, “Nangma chenni moatthin tonga erepa sitsiak mo o!”

²⁸Jisu ma arepa atenâng chenrãngma ngaeka erepa phhekchhah chhahrãng khoang kowah johtôngte hehma henmemin jet ho.

²⁹Juda pa ngunthiente dâng phumma, dijunte khaka ma, Jisu ma Juda nâng thinma lokuhko kepthin heh riakchhoanrãng chienthem eka, ba tangchhih hehnâng chenni komin kohchhoan o, ngama komin chienthem eka ngama thônghun wah.

³⁰Juda ma bankên pa thâdiko lemlienma khoamchhoan wah. Erepa rangpen nâng dângwah.

Hôkum nyan

³¹Juda loatchhoan diko, Jisu ma ngatwah, “Adephumma Mihnyan Chhapa mîndong lahma ekhe e; ngale ate junma Joban mîndong lahmemin ekhe e.

³²Ngale ate junma Joban mîndong lahma mekhetihko, Joban memin ate junma Mihnyan Chha mîndongthuk lahma ekhe e, ngale erepa atema lemlienma edongthuk a.

³³Ngachhu achha heh, nga nekhu demnâng ajah talek tongtumek. Nema nga elemsûha; rohkomin ngama Jews heh thôte jabte hehnâng chenni thôkotek a ereheh ngama athângheh nenâng thôkoh eka, ‘Nga chenko chhoan ekanga eretheko ne leta hûmin.’

³⁴Ngale athângheh ngama nenâng hôkum anyan koheka: wathema wathe nâng hun achhâmîn en. Ngama nenâng huneka rãngrãng, eroh nemin wathema wathe nâng hunmîn en.

³⁵Nema wathema wathe nâng mehunmîn enko, anga ngama nea ngadijunte ngama ejet hèn.”

Piter ma Jisu Jetmek ngatpa Jisu ma Khema ma Jetwah



(Mathiu 26.31-35; Mak 14.27-31; Luk 22.31-34)

³⁶Simon Piter ma chhienwah, “Teso, nang chenke dângmin a?” Jisu ma dânthâng wah, “Nga chenke chhoan ekanga eretheko ne athângheh tajun chhoanmah ren,” rohkomin; “nea khediko ejun chhoanha.”

³⁷Piter ma chhienwah, “Teso, chenrăngma ngama athângheh leta junchhoanmin a?” “Nga nanrăng ritmin tarii ang!”

³⁸Jisu ma dânthâng wah, “Nanga linlin ngarăng ritmin tariioa? Ngama toangtang thôkoh eki: wowên mako nangma nga jetmah hang ngama ditrem engao.

Jon 14

Jisu pa Wa tânâng Wângthin Lemkhô

¹Jisu ma thinnâng thôkoh wah. “Neksekma patrii en,” “Joban nâng putedâlem en ngale nganângmin putedâlem ha.”

²Ewa humnâng the jahmông tonga, ngale nga nerăng the khoakhêm kohrăng wãngekang. Ereko the aho dânngomeko ngama nenâng lethôkoh minwah.

³Ngale nga wãnglekma nerăng the khoakhêm kohdiko, Nga ngakka lekma nga demnâng esietwên a, ephumma nga chenke dangekanga eretheko nemin eta wãngrên.

⁴Ngawãng ekang theko wângthin lempa nemajet en.”

⁵Thomas ma ngatwah, “Teso, nang chenke dangekoa erepa nima jetmih; phumma nang wãngeko theko ni hokwângrăng lempa chenroh jienjetmin a?”

⁶Jisu ma atenâng dânthâng wah, “Nga a Lemkhô, toangtang, ngale roandông; Wa tânâng henjô leta wãngmin, ngajunma lolojôba Wa tânâng tâwâng min.

⁷Atema thinnâng ngatwah, Nema athângheh nga lâjettha,” “Ngale nema Ngawa min ejet en, ade phumma nema atemin lâjettet ngale lâkhetet.”

⁸Filip ma atenâng ngatwah, “Teso, Wa pa ninâng khesok hi; ere khepa lolojôba nima huneki.”



⁹Jisu ma dânthâng wah, “Filip, chenthu thuma nga nekhu demnâng dângwah; rohkomin athângheh nângmin nangma nga majet ehangne? Henhenma ngakhe ehanga erehehema Wamin lâkhetah. Nangma chenrãngma, ‘Wa pa ninâng khesok hi’ ngaekoa?

¹⁰Filip, nga a Wa demnâng ngale Wa pa nga demnâng, erepa nangma putedâlem mohne? Jisu ma ate dijunte hehnâng ngatwah, Ngama nenâng thôkoh eka jabkhab pa ngadede wah loatjab dangmek.” Ngadem wah johtôngte Wama atedede moatlempa moeka.

¹¹Wa pa nga demnâng ngale nga a Wa demnâng ngama ngatko nganâng putedâlem ha. Eroh komin leputedâlem medang hako, ngama moekang moatlem heh junma komin putedâlem ha.

¹²Ngama toangtang thôkoh eka: henhenma nganâng putedâlem ehanga erehehema ngama chenni moatlem moekanga ereheh emowak a, ngale erenoma moatlem dongmin eta mowak a, chenrãngma ngako Nga a Wa tânâng wãngekang.

¹³Ngale nema ngamînko chenjô metha enkomin erepa ngama emokoh a, erohkoba Chha junma Wa mîndong lahma ekhe en.

¹⁴Nema ngamînko chenjô metha enkomin, erepa ngama emo ang.

Asâthôanju kohrãng Toamsem

¹⁵“Nema nganâng mehun hako, nema nga hôkum pa ekep en.

¹⁶Ngama Wa wah etha ang, ngale atema nenâng chohsokte ahan ekohhèn, erepa nedemnâng roantang roangjêng rãng ejohtonghen.

¹⁷Atea Ju, ngale atema Joban toangtang pa eloatsiet katra. Hahtokkhoh wah hehema ate kepmah, chenrãngma ngako thinma ate khemah ngale ajetmin jetmah. Rohkomin nema ate jet eken, chenrãngma ngako atea nedemnâng johtong ehèn ngale ne khennâng tong ehèn.

¹⁸“Chenthu nga mewãng tekko, ngama ne lolo phethienmah; Nga netânâng engak karâng.



- ¹⁹Chuthe diko hahtokkhoh wah hehma nga lekhe tumin, rohkomin nema nga ekheha; chenrãngma ngako nga a ahîn erohwah nemin ehin en.
- ²⁰Chenthu ere rangwo pa mehû theko, nema nga a Ewa demnâng ngale nea nga demnâng, erediko Ngamin nedemnâng dangekang pa ejet en.
- ²¹“Henhenma nga hôkum pa keplahma erejunko dangeka ereheh nganâng hunte. Henhenma nganâng hun ehanga ereheh nâng Ngawa memin ehun a; Ngamemin thinnâng ehun ang ngale ngadede min thinnâng ekherii ang.”
- ²²Juda (rohkomin Juda Iskarot pa dangmah) erepumma ma ngatwah, “Teso, nanga hahtokkhoh wah hehnâng lekherii thangma ninâng lolo chenroh jienkherit min a?”
- ²³Jisu ma atenâng dânthâng wah, “Henhenma nganâng hun ehanga erehehma ngama hethô ekang nginpa ekep a. Ngawa memin thinnâng ehun a, ngale Ewa chenii thin tânâng kalihma thin demnâng ejoh songkae.
- ²⁴Henhenma nganâng hunmahhang a erehehma ngama hethô ekang ngin pemin kepma. Ngale nematat ekenpa nga ngewah hethô dangmek, erepa Ngachienkatte Wa ngewah hethôeka.
- ²⁵“Ngama areheh nedemnâng dângpoatko thôkoh eka.
- ²⁶Wama ngamînko nenâng chohsokrãng Asâthôanju echien katra, ngale atema nenâng chentôpa ehethô hèn, ngale ngama nenâng chentô thôkotah a, ereheh phangtang ethonghun thuk hèn.
- ²⁷“Mêmo pa ngama nenâng phethien koheka; erepa ngadede ngewah mêmo koheka. Ngama erepa hahtokkhoh ma koheka rãngrãng koh dangmek. Nekpatrii sekmah en; ngale acheimin nekchei en.
- ²⁸Ngama nenâng thôkoh pa nema lâttattet, ‘Nga choan ekang, rohkomin nga netânâng engakkarâng.’ Nema nganâng mehun hako, Nga a Wa tânâng wângdi nerin eroan en; chenrãngma ngako atea Nga noma adong.



²⁹Ngama athângheh nenâng areheh phangtang linlin hongdâng mako thôkoh eka, erohwah chenthu areheh mehong dangwãng theko, nema eputedâlem en.

³⁰Nga nekhu demnâng ajah talek jabmîn tumah, chenrãngma ngako are hahtokkhoh pête pa lâhûtha. Rohkomin atema nganâng chennimin tare mahhang,

³¹Phumma ngama Wa nâng hun ekang ngama hahtokkhoh wah hehma jetmin; erohwah chentôpa atema nganâng chenroh thôkoh ehanga eroh ngama moekang. “Chepen, are thekawah chhoan e.

Jon 15

Jisu pa Angur Linlin

¹“Nga a angur linlin, ngale Ngawa pa bãngthong pânte.

²Atema ngawah penri leri bãngphak chentôpa doakphe eka, ngale penri rite bãngphak chentôpa pân reka, erohkoba senthemthem donglahma penri ajah eria.

³Ngama nenâng hethôeka jabkhab pumma ne lâsâsietthen.

⁴Nga demnângjû dangen, ngale ngamin ne demnângjû danglekma etongang. Bãngphak pumma ate dedema penri jienhong rimah; bãng demkojû danglahma metong ekoba penri jienhong rimin. Ererãngrãng nemin nga demnângjû dangletma letong kenko nema penri jienrimet.

⁵“Nga a angurbãng, ngale nea bãngphak. Henhen nga demnângjû danglahma tongeka, ngale ngamin hen demnângjû danglekma tongekãnga, erehehema penri ajah eria; chenrãngma ngako nga aho thangma nema chennimin leta momin.

⁶Henhen nga demnângjû lejohdang thangma dangeka ereheh a petphe lahma bãngphak choakjâwah rãngrãng echoakjâa; Arerãngrãng bãngphak heh khôantoan lahma wennâng phêkatmin, ngale ere wenko jemkhâm erewak a.



⁷Nea nga demnângjû medang enko ngale nga jabkhab pemin ne demnângjû medang hènko, nema chenni komin hun letma metha enko, erepa nema echoh en.

⁸Ngawa mîndông pa nema penri ajah rijunko ekhesok a; ngale erohkoba nemin ngadijunte eta dangen.

⁹Wama nganâng hun ehang rãngrãng ngamemin nenâng huneka; erohwah ngawah hunkojû tongen.

¹⁰Ngama chenroh Ewa hôkum keplekma ate hunkojû danglekma tong ekanga, ererãngrãng nemin nga hôkumpa kepletma ngawah hunkojû dangletma tongen.

¹¹“Ngama nenâng are thôkoh ekapa, nga ngewah khuhah linlinpa nema kepletma, nehung khennâng nyahrãng khuhah nâhah chendangen ngama thôkoh eka.

¹²Nga ngewah hôkumpa arepa: Ngama nenâng chenroh huneka, ererãngrãng nekhumîn wathema wathe nâng hunmîn en.

¹³Nema ne lemruçha nâng hun achet kowah adongthôanpa thinrãngma ne roandông kohpa.

¹⁴Ngale ngama nenâng chenni chieneka erepa nema memo enko nea ngalemruçha.

¹⁵Ngama nenâng haa ngama rootumah, chenrãngma ngako thin tângtewa pumma chenni moeka erepa haa hehma jetmah. Erohwah, ngama nenâng lemruçha ngama roeka, chenrãngma ngako ngama Ewa wah chentô chohtat ekanga ereheh phangtang nenâng thôkoh eka.

¹⁶Nema nga rên dangmahha; Ngameba ne renlahma chenthumin lechhihjâ thangma lektôngli penri richhoanthuk eka. Ngale ngamînko Wa ngewah nema chenni thaeken a ereheh atema ekohhèn.

¹⁷Erohwah ngama arepa nenâng chieneka: wathema wathe nâng hunmîn en.

Hahtokkhoh wah hehma Chhihchoh



¹⁸“Hahtokkhoh ma nenâng mechhihchoh hênko, thonghun en, khebengko nganâng chhihchoh ehang.

¹⁹Nea hahtokkhoh rãng medang enko, hahtokkhoh ma nenâng aterãng dângdi ehunhèn. Rohkomin ngama nea are hahtokkhoh wah ren eka, ngale nea hahtokkhoh rãng dangmet; erohwah hahtokkhoh ma nenâng chhihchoh ehèn.

²⁰Ngama nenâng chenni thôkotah a ereheh thonghunta en: ‘Haaheh thin tângtewa noma adong dangmah.’ Mihnyan heh ma nganâng mechêmsiet hangko, thinma nemin echêmsiet hèn; ngale ngama hethô ekangpa thinma mekep ako, thinma ne nginmin ekephèn.

²¹Rohkomin nea ngarãng dângdi are chentôpa thinma nenâng ehôan ejôan hèn; chenrãngma ngako ngachienkate pa thinma jetmah.

²²Ngale kalekma hahtokkhoh wah mihnyan hehnâng lethôkoh ngako thinnâng pap aho dângmin wah; Ade phumma thinpap heh map lekohtumin.

²³Henhenma nganâng chhihchoh ehanga nga Wa nangmin chhihchoh eka.

²⁴Henmemin lethat moli moatlem heh ngama thin tânâng lemo ngako thinnâng pap aho dângmin wah; phumma ngama chenni moekanga erepa thinma lâkhetah, rohkomin thinma Ewa chheni waniinii nâng chhihchoh ehi.

²⁵Arepa metkep dângmin, erohkoba thin Niem nâng chenni raangtah a erepa toangtang edanga: ‘Thinma nganâng ledangli nâng chhihchoh ehang.’

²⁶“Achohsokte Ju ekara, atema Wa tâwah kalahma Joban toangtang pa ekhesok kahèn. Ngale atea ngama Wa tâwah nekhuh tânâng echienkat rãng, ngale atema nenâng ngangin ethôkoh hèn.

²⁷Ngale nememin nga nginpa mihnâng ethôkoh en, chenrãngma ngako nea khebengma nga demnângjû.

Jon 16

¹“Ngama ne putedâlem pa nekchen chhihjâ eken ngama arepa thôkoh eka.

²Nea Sanagog wahmin ejunlo hèn, ngale mihnyan heh ma ne ritphe lahma thinma Joban nâng soamtô eki ngama thônghûn sanpoat pa ehûra.



³Mihnyan hehma Wa min lejet ngale Nga min lejet dâng phumma ne eritphe hèn.

⁴Phumma ngama nenâng arepa thôkoh eka, erohkoba chenthu thinma arohmoat sanpoat mehûthako, ngama nenâng chenni thôkotah a ereheh nema ethonghun en.

Asâthôanju Moatlem

“Ngama areheh nenâng khebengko thôkomah, chenrãngma ngako, Nga nedemko dângwah.

⁵Rohkomin ade phumma Nga a ngachienkate tânâng wãngakang, rohkomin nekhuwah henmemin nga chennâng dângrãng ngaekanga erepa thongphâ mahha.

⁶Ngale athângheh ngama nenâng thôkoh eka, phumma nea nyahrãng hungchhih rekma dangeken.

⁷Rohkomin ngama toangtang thôkoh eka: Nga chhoan ekangpa nerãng sênrãng chhoan ekang, chenrãngma ngako Nga lechhoan medan angko, chohsokte Jupa netânâng lekamin. Phumma Nga mechhoan angkoba Ngama netânâng ate echienkatrãng.

⁸Ngale chenthu ate meka theko, atema hahtokkhoh wah mihnyan hehnâng, pap, ngale toangtang, erediko Joban ma khope rênjunma ekhesok a.

⁹Thin a pap junko athe, chenrãngma ngako thinma nganâng putedâlem mahhang;

¹⁰ngale thin a toangtang junkomin athe, chenrãngma ngako Nga a Wa tânâng wãngakang ngale nema nga lechoh khetûmin;

¹¹ngale thin a chhih asen rên junkomin athe ngama ekhesok a, chenrãngma ngako, are hahtokkhoh pên-teko athe lêngatah.

¹²“Ngama nenâng ajahthem thôkohthin tonga, rohkomin athângheh nema ereheh phangtang takepmet.



¹³Ephumma chenthu toangtang Ju pa meka theko, atema Joban toangtang pa ekhesokkat hèn, ngale atema nemin toangtang lemnâng esenhèn. Atema atedede hungwah lehong jabmin, rohkomin atema chenni chohtat eka erepa ethôa, ngale khediko chenni dângmin a erehehmin ethôkoh hèn.

¹⁴Atema ngamîn edongthuk hang, chenrãngma ngako, ngama chennijab ekanga erepa atema nenâng thôkoh ehèn.

¹⁵Ewa ngenâng chentô tongtong apa phangtang ngarãng; erohwah ngama ngaekang, ngama Junâng chennikoh ekanga erepa atema thalahma nenâng ethôkoh hèn.

Asep Ajông ngale Khuhah Nâhah

¹⁶“Chuthe diko nema nga lechohkhe tumin, ngale ere chuthe diko nema nga echohkheha.”

¹⁷Ate dijunte khuthema thindede chhienmînwah, “Arepa chenni junko jabeka? Ngale atema nângnâng chenni junko thôkoh ehia, Nãngma chuthe diko ate lechohkhe tumin ngale ere chuthe diko nãngma ate echohkhe e; ngale atema arohmin ngaeka, ‘Chenrãngma ngako Nga a Wa tânâng wângekang.’

¹⁸‘Chuthe diko’ pa chennâng ngaeka? Atema chenni junko jabeka erepa nãngma jetmih!”

¹⁹Thinma nganâng thôngphâ hun ehang ngama jetlahma, Jisu ma thinnâng ngatwah, “Ngama ngaekang, ‘chuthe diko nema nga lechohkhe tumin, ngale ere chuthe diko nema nga echohkheha.’ Are junma nekhu dede tungko lechhienmîn eken a?

²⁰Ngama toangtang thôkoh eka: Nea sep ajoang ere en, rohkomin hahtokkhoh pa khuhah nâhah edanga; nea hungchhih rekma edangen, rohkomin ne hungchhih rekma dang ekenpa khuhah nâhahrãng elitjâa.

²¹Chenthu dihiaknyu pumma naachhatrãng menga tahko, atenâng nyahrãng chhâ lahma rângchêm a; rohkomin chenthu naapa mechha tahko, atema



naachhat poatwah chêmpa lekphe rângrea, chenrângma ngako, hahtokkhoh ko naapa tachhakat era.

²²Ererângrâng jôba nekhu demnâng dângmin: athângheh nekhu hungchhih rekma dangeken, rohkomin nekhu demnâng Nga engak chohmîn a, ngale ephumma khuhah nâhah edangen, ere khuhah ekenpa newah henmemin leta rephe tumin.

²³“Chenthu ere rangwo pa mehû theko, nema nga ngewah chenmin lethatumin. Ngama toangtang thôkoh eka: Nema Ngamînko chenni komin Wa ngewah metha enko atema nenâng ekohhèn.

²⁴Nema ngamînko chenmin mathattha eken; tha en ekoba nema echoh en, erediko ba nema linlin dangletma khu ehah en.

Hahtokkhoh Jien

²⁵“Ngama are ngin heh nenâng nginthakthô rângrâng keplekma thôkoh eka. Rohkomin ngama nginthakthô lekep thangma thôkoh sanpoat pa ehûra, ere sanpoatko ngama nenâng Wa nginpa eloat thôkoh a.

²⁶Chenthu ere rangwo pa mehû theko, nema atewah ngamînko etha en; ngale ngama atewah nerângma ethakoh a ngama ngamek,

²⁷chenrângma ngako, Wama nenâng hun ehèn. Atema nenâng hun ehènpa nema nganâng hundi ngale nga a Joban tâwah kaerâng ngama nganâng putedâlemdi hun ehèn.

²⁸Nga a hahtokkhoh ko Wa tâwah kaerâng; ngale ade phumma Ngama hahtokkhoh pa phethien lekma Wa tânâng wângekang.”

²⁹Ephumma ate dijunte hehema atenâng ngatwah, “Athângheh nangma nginthakthô demnâng ledang thangma nima jetli thôkoh ehi.

³⁰Nima athângheh lâjettih, nangma chentôpa jet eko; nangnâng henma komin nginthôngphâ mehun ako, thinma thôngphâ mama nangma rângdânthango. Erejunko nanga Joban tâwah kaero ngama nima putedâlem eki.”

³¹Jisu ma thinnâng dânthâng wah, “Nema athângheh ba putedâlem ehane?”



³²Nekhu phangtang phânychhoan sanpoat pa ehûra, ngale erepa lâhûtha, nekhu anga nga mâmâ humnâng phanchhoan letma ngalolo ephe thienha. Rohkomin nga a linlinko ngalolo dangmek, chenrãngma ngako Ewa nga demnâng tonghang.

³³Ngama nenâng areheh thôkoh ekapa nga demnâng dangletma mêmô chenchoh en ngama thôkoh eka. Hahtokkhoh ma nenâng echêmthuk hèn. Rohkomin hung dongdong dangen! Ngama hahtokkhoh pa lâjientek!”

Jon 17

Jisu ma Ate Dijunte heh Rãngma Rangsoam

¹Jisu ma are ngin heh thôkoh diko, atema rangkhethung nâng sêwên lahma ngatwah, “Wa, sanpoat pa lâhûtha. Nangchha mînpa dongthuk o, erohkoba Nangchha memin nangmînpa edongthuk ho.

²Chenrãngma ngako, nangma atenâng chentô mihnyan nyuchha khohko chaankoh eko, ngale nangma atenâng kohtoh hehnâng atema roantang roanjêng lethôan roandông koh eka.

³Ngale roantang roanjêng lethôan roandông ngaeka pa nanglolo jôba toantang Joban ngama jetpa, ngale nangma chienkattho Jisu Krista jet ekipa.

⁴Nangma nganâng moatrãng chienthang moatlempa tamo lekma; ngama hahtokkhoh ko nangmîn dongthuk lekma khesok ekang.

⁵Ewa! athângheh nang tâko ngamîn dongthuk hang, chenroh rang ahah hôanmako nga nangdemnâng mîndong thukthang rãngrãng dongthuk hang.

⁶“Are hahtokkhoh wah nangma nganâng henhen kohthanga ereheh nâng ngama nang jetthuk ekang. Ereheh nang mihnyan, ngale nangma ereheh nganâng koh ehang. Thinma nang nginpa kepeka,

⁷ngale nangma nganâng chentô koh ehang heh nang tâwah kaera ngama thinma athângheh lâjettah.



⁸Nangma nganâng thôkohthang ngin heh ngama thinnâng lâthô kotek, ngale thinma erengin heh kep eka; ngale nga a linlinjô nang tâwah kaerâng ngama thinma lâjettah, ngale nga a nangma chienkat ehang ngama thinma putedâlem wakeka.

⁹“Ngama thinrãng rangsoam ekang. Ngama hahtokkhoh wah hehrãng soamkoh dangmek, nangma nganâng kohthang hehrãngba soam ekang, chenrãngma ngako, thin a nangthiak.

¹⁰Nga ngewah chentôpa nerãng, ngale ne ngewah chentôpa ngarãng; ngale thin junma ngamîn dôngpa kheki.

¹¹Ngale athângheh nga nang tânâng wãngerâng; Nga a hahtokkhoh ko dangtumek, rohkomin thin a are hahtokkhoh ko tongeka. Asâthôan Wa! nangmîn chaan pumma thin pepâng lohma thien o, nangma nganâng kohthangmîn pumma, Erohkoba nãngheh wanthe dangeki rãngrãng thinmin wantherãng danglahma etonga.

¹²Nga thin demnâng dãngpoatko, nangmîn chaan pumma ngama pepâng lekma thienwah, nangma nganâng kohthangmîn pumma. Ngama pâng ahâng lekma thien ekang, ngale wathemin mahphemek, henpa amah rangjû hongtah a ere peba mahwah - erohwah Joban nyapraangpa toantang dangeka.

¹³Ngale athângheh nga nang tânâng wãngerâng, Ngale Nga a hahtokkhoh ko dãngpoatko are ngawah khuhah pa thinhungnâng mênchong chentonga ngama jabekang.

¹⁴Ngama thinnâng nang nginpa thôkoh ekang, phumma hahtokkhoh wah hehma thinnâng chihchih eka, chengrãngma ngako, Nga a are hahtokkhoh rãng ledang dangekang rãngrãng, thinmin are hahtokkhoh rãng dangmah.

¹⁵Ngama nangnâng thin a are hahtokkhoh wah toansietwên o ngama ngatdangmih, rohkomin Achhah wah pepâng lohma thien o ngama rosep eki.

¹⁶Chenroh nga are hahtokkhoh rãng ledang dangekanga, ererãngrãng thinmin are hahtokkhoh rãng dangmah.



¹⁷Nang toangtang pumma sâsiet lohma nangrăng hônwak o; chenrăngma ngako, nang jabkhab pa toangtang.

¹⁸Nangma Nga hahtokkhoh ko chenroh chienkat thanga, ererăngrăng ngamemin thin a are hahtokkhoh ko chienchhoan ekang.

¹⁹Ngale thinrăng sênrăngma Nga dedema nangnâng kohrii eki, erohkoba thinmin linlin danglahma nangnâng ekohriiwak ho.

²⁰“Ngama thinrăng lolo rangsoam koh dangmek, thin ngin keplahma henhenma nganâng putedâlem ehanga, ereheh rangmemin soamkoh ekang.

²¹Thinkhu phangtang wantherăng chendanga ngama soam ekang. Wa! thinmin năngdemnâng chendanghi, chenroh nga nangnâng ngale nang nganâng dangeki răngrăng thinmin wanthe chendanga. Eroh koba hahtokkhoh mihnyan nyuchha ma nga a nangma chienkatwah ngama eputedâlem hang.

²²Nangma ngamîn dongthukthang răngrăng ngamemin thinmîn dongthuk ekang, erohkoba, năng heh wanthe dangeki răngrăng, thinmin wanthe edanga:

²³Nga thin hungkhen năng, ngale nanga nga hungkhen năng, erohkoba thin a linlin wantherăng eta danga, ngale erohkoba hahtokkhoh mihnyan hehma nga nangma chienkatwah ngama ejet a, ngale nganâng hun ehanga răngrăng thinnângmin huneko, ngama ejetwak a.

²⁴“Wa! thin a nangma nganâng lâkoh thang, ngale nga chenko dangekanga eretheko thinmin nga demnâng dăngthuk hun ekang, erohkoba thinma nga mîndông pa ekhe hang, ere mîndông pa nangma nganâng kohwah; chenrăngma ngako, are hahtokkhoh hôn mama nangma nganâng hunwah.

²⁵Toangtang thôn Wa! Hahtokkhoh ma nang jetmahho, rohkomin ngama nang jeteki, ngale are hehma nga a nangma chienkatwah ngama jeteka.



²⁶Ngama nang thinnâng jetthuk eki, ngale Ngama roantangma nang jetthukjû edangang, erohkoba, nangma nganâng hun pa thinnângmin etonga, ngale ngamin thinnâng edangang.”

Jon 18

Jisu Loatkhek

(Mathiu 26.47-56; Mak 14.43-50; Luk 22.47-53)

¹Jisu ma are rangsoam pa tâsoam diko, ate dijunte heh demnâng Kidron hahthung ranka ngenâng dânkatwah. Eretheko penri thong dângwah, phumma Jisu le ate dijunte heh eretheko wângwah.

²Jisu chên sângte, Juda ma erethepa jetlahma dângwah, chenrãngma ngako, eretheko Jisu ate dijunte heh demnâng chîchohmîn wah.

³Juda ma ate demko Soam aroakte adong ngale Farasi heh ma chienkatwah Roman sipâhi ngale Rangsoamhum bente heh sietlahma penri thongko hokwah; thinma dãng apah, wentit, ngale wennan heh semlahma hokwah.

⁴Jisu ma ate khohnâng chenni hokmin a ereheh phangtang jetchoan dângwah, ephumma chohkhoam kalahma atema thinnâng ngatwah, “Nema henlem eken a?”

⁵Thinma, “Nazarat wah Jisu lemki,” ngama dânthâng wah. Jisu ma, “Erepa Nga,” ngama dânthâng wah. Thin demko chên sângte Juda johchep lahma dângwah.

⁶Chenthu Jisu ma thinnâng, “Erepa Nga,” ngama ngatko, thin a tokdi ngenâng ngadâ lahma hahko kôanjâwah.

⁷Eredikomin Jisu ma thinnâng thôngphâ wah, “Nema henlem eken a?” Thinma, “Nazarat wah Jisu lemki,” ngama dânthâng wah.

⁸Jisu ma thinnâng ngatwah, “Erepa Nga, ngama nenâng lâthô kotah,” “Nema ate lem medang enko, are ahan heh chenchhoan eka.”

⁹(Arepa khemako atema chenni jabtah a erepa toangtang dângrãng ngatwah: “Wa, Nangma nganâng kohthang heh ngama wathemin mahphemek.”)



¹⁰Simon Piter ngenâng dǎng dǎngwah, phumma atema dǎngpa toanlahma Soam aroakte adongthôn haanâng doaklahma ate nâchahpa jâdoakwah. Ere haa mînpa Malkus dǎngwah.

¹¹Jisu ma Piter nâng ngatwah, “Nang dǎngpa ate thienthin theko ngakthien o! Ewa ma ngenâng kohthang chêmchei pa ngama nekchenchoh eka ngama thonghun ehanga?”

Jisu Anas tânâng Siethok

¹²Roman Sipâhi sahhab le ate sipâhi erediko Jews heh Rangsoamhum bemte hehma Jisu loatwah, ngale thinma khhek rewah,

¹³Thinma khebengko Anas tâko siethokwah. Atea Kaipas dihiak wa dǎngwah, ere rangpâko Kaipas pa Soam aroakte adongthôn dǎngwah.

¹⁴Kaipas ma Jews heh thôte jabte hehnâng mihnyan heh phangtangrǎng wathe mihnyan ritpeba asen ngama thôkoh wah.

Piter ma Jisu Jetmek ngat

(Mathiu 26.69, 70; Mak 14.66-68; Luk 22.55-57)

¹⁵Simon Piter ngale dijunte ahan wathe Jisu diko junchhoan wah. Ere dijunte wathe pumma Soam aroakte adongthônpa senthemthem jetlahma dǎngwah, erohwah Soam aroakte adongthôn humthakho ko Jisu demnâng ate johwǎngwah,

¹⁶Ere poatko Piter a panlienke tǔngwah. Phumma ere dijunte pa rangsâ nâng ngakka lahma pankâsek kowah chepte dihiaknya ko ngalahma, Piter pankhen nâng sietwênwah.

¹⁷Pankâsek kowah chepte dihiaknya pumma Piter nâng ngatwah, “Nangmin ire mihnyan dijunte wanthe dangoni?” Piter ma, “Nga dangmek,” ngama dânthâng wah.

¹⁸Erepa rangchhông poatko dǎngwah, erohwah, haa ngale abemte hehma wenthhek lahma wenke tumlit cheplahma lêmsahrit wah.

Soam Aroakte Adongthôn ma Jisu nâng Ngîn Chhien

(Mathiu 26.59-66; Mak 14.55-64; Luk 22.66-71)



¹⁹Soam aroakte adongthôn pumma Jisu nâng ate dijunte heh ngale atema hethôeka ngin heh junma chhienwah.

²⁰Jisu ma dânthâng wah, “Ngama roantangma mihnyan heh nâtatko chentô nâng thôkotek; Ngama chentôpa mihnyan heh anga nga roamkhôn thin Sanagog ngale Rangsoamhum nâng hethô wah. Ngama chenthumin ngale chennimin huhchhama thôho.

²¹Nangma nganâng chenrãngma chhien ehanga? Henhenma Ngangin tatthanga ere mihnyan hehnâng chhien o. Ngama thinnâng chenni thôkotek a erepa thinnâng thongpha en - ngama chenjabtek a erepa thinma jet a.”

²²Chenthu Jisu ma aroh ngat poatko, erethe kowah abemte wathema Jisu thhenko walahma ngatwah, “Nangma Soam aroakte adongthôn nâng chenroh tapaanglaang dânthang ekoa!”

²³Jisu ma atenâng dânthâng wah, “Ngama chenni komin methe jabtekko, chenpa thejabtek a erepa arekowah hehnâng thôkoh. Rohkomin ngama toangtang jabwah medang angko nangma nganâng chenrãngma wat ehanga?”

²⁴Erediko Anas ma khhek lahma Soam aroakte adongthôn Kaipas tânâng chienwênwah.

Piter ma Jisu Jetmek ngama Wiengatwah

(Mathiu 26.71-75; Mak 14.69-72; Luk 22.58-62)

²⁵Eretheko Piter cheplahma wenko lemsahrii lahma tôngwah. Ephumma ahan hehma atenâng ngatwah, “Nangmin ire mihnyan dijunte dangoni?” Phumma Piter ma, “Nga dangmek,” ngama dânthâng wah.

²⁶Soam aroakte adongthôn haa, atea Piter ma nâ jâdoaktah rãngma tangkâ dângwah, phumma erepumma ngatwah. “Nanga ngama ate demnâng penri thongko khetih?”

²⁷Erepoat komin Piter ma, “Nga dangmek,” ngama wiengat wah - phumma lemlienma wowênwah.

Jisu Pilat tânâng Siethok

(Mathiu 27.1, 2, 11-14; Mak 15.1-5; Luk 23.1-5)



²⁸Rangkhahkho ma Jisu, Kaipas humwah Govono humnâng sietkatwah. Jews heh thôte jabte heh Govono humkhen nâng lupwǎngwak ho, chenrǎngma ngako, Adankhoam lokuh phhekchhah jienchhahrǎng, thin a niemarang junko asâma tōnghunwah.

²⁹Ephumma Pilat ma rangsâ nâng thintâko loatka lahma thinnâng thôngphâ wah, “Nema are mihnyan pa chennâng thelahma sekham eken a”

³⁰Thinma, “Atema lechhihmo nomeko nima nang tânâng lesiet huminwah” ngama dânthâng wah.

³¹Pilat ma thinnâng ngatwah, “Eroh medang ako nema sietchhoan letma neniem junko sekham en.” Thinma dânthâng wah, “Niniem junko nima mih henjô tarit phemih.”

³²(Arepa Jisu ma rekthe ate chenroh ritmin a, erejunma jabtah pa toangtang dângrǎng dânghwah.)

³³Pilat ma ate humkhen nâng ngakwǎng lahma Jisu nâng roowah. Ngale atema chhienwah, “Nanga Jews heh Lowang ne?”

³⁴Jisu ma dânthâng wah, “Are nginpa nangdede hungwah thôngphâ ehangle, nangnâng ngajunma henma komin thôkoh thoa?”

³⁵Pilat ma dânthâng wah, “Nangma Nga a Jews ngama lethonghun ehanga? Nedede mihnyan ngale Soam aroakte adong hehma nanga nga dekho siethukoh ehangle. Nangma chenni motoh a?”

³⁶Jisu ma ngatwah, “Nga Hahsôngpa are hahtokkhoh korǎng dangmah; Nga Hahsôngpa are hahtokkhoh korǎng dânghomeko, ngadijunte heh loatmîn lahma Jews heh thôte jabte hehnâng Nga lelo thukminwah. Nga Hahsôngpa are hahtokkhoh korǎng dangmah!”

³⁷Ephumma Pilat ma atenâng chhienwah, “Eroh medang ako nanga lowangne?” Jisu ma dânthâng wah, “Nangma Nga a Lowang ngama lâpun ngathang. Ngama toangtang thôrǎng, ngale ererǎngma lolo jôba nga



chhatwah, ngale ererãngma lolo jôba are hahtokkhoh ko kaerâng. Erohwah henhen toangtangko dangeka erehehema ngangin etathang.”

38Pilat ma chhienwah, “Toangtang pa chennia?”

Jisu Ritpherãng Nginpat

(Mathiu 27.15-31; Mak 15.6-20; Luk 23.13-25)

Erediko Pilat rangsâ nãng mihnyan heh tânãng ngakka lahma thinnãng ngatwah, “Ngama ate ritphe rãng chenjô chhihmo lahma chohkhemek.

39Rohkomin neniem junko, Ngama Adankhoam lokuh roakweih phâtek nãng khhekte nerãng rãnglaang phekoh a. Phumma nema Jews heh Lowang pa laangphekoh hun ekenle?”

40Thinma raklahma dânthâng wah, “Nima ate hunmih! Nima Barabas ba huneki!” (Barabas pa mihngoan dãngwah.)

Jon 19

1Erediko Pilat ma Jisu sietchhoan thuk lahma wathukwah.

2Sipâhi hehema suhkãngwah khophok hôanlahma Jisu khoko phokkohwah; erediko thinma atenãng khetchek pa pohkoh rewah

3ngale ate tâko hûlahma atenãng ngatwah, “Jews heh Lowang roandônglo hin o!” Ngale thinma ate tâko wãng lahma thhenko watwãngwah.

4Eredikomin Pilat rangsâ nãng thengakka lahma mihnyan hehnãng ngatwah, “Sûtan en, Ngama ate ritphe rãng chenjô themo lahma chohkhemek, erepa nema chenke en ngama netânãng rangsâko sietkatkoh a.”

5Erediko Jisu sukhophok pa phok ngale khetchek pa poh lahma loatkatwah. Pilat ma thinnãng ngatwah, “Sûtan en! Mihnyan pa anã!”

6Chenthu Soam aroakte adong ngale Rangsoamhum bente hehema ate khephumma, thinma rakwah, “Arittekre en! Arittekre en!” Pilat ma thinnãng ngatwah, “Eroh medang ako, nema sietchhoan letma rittek chhoan en. Ngama ate ritphe rãng chenjô themo lahma chohkhemek.”



⁷Mihnyan hehma ngakdânthâng wah, “Ninâng niem tonghi, ngale ere niem junko ate ritphe rêmin, chenrãngma ngako, atema Joban Chha ngariieka.”

⁸Chenthu Pilat ma erepa tatphumma, ate ajahthem bâmcheiwah.

⁹Atema humkhen nâng ngakwãng lahma Jisu nâng chhienwah, “Nanga chennangwah hûeroa?” Rohkomin Jisu atenâng dânthangho.

¹⁰Phumma Pilat ma atenâng ngatwah, “Nangma nganâng ledanthang minne? Thonghun o, Ngama nang laangphemin tare e, ngale rittek thukmin tare e.”

¹¹Jisu ma dânthâng wah, “Joban ma nangnâng koh diba ngakhohko nangnâng chaantong eho. Erohwah henma nang tânâng Nga siethu ehanga erepumma papchhihthôn moeka.”

¹²Chenthu Pilat ma erepa tatphumma atema, Jisu laangpherãng hunwah. Rohkomin mihnyan hehma rakwênwah, “Nangma ate melaangphe oko, nanga Chofa lemrujô dangmoh! Henma komin atea Lowang ngama châeka pa Chofa lelatnâng dangeka!”

¹³Chenthu Pilat ma are jabkhab heh tatphumma, atema Jisu rangsâ nâng sietkat lahma “Longwah hânwah the” ngamamîn eka kowah nginpatte tângthinko tângkatwah. (Areko Hiebru jabma “Gabbatha” ngaeka.)

¹⁴Erepa Adankhoam lokuh majâ rangngih mongko dângwah. Pilat ma mihnyan hehnâng ngatwah, “Ne Lowang pa anã!”

¹⁵Phumma thinma danrakwên wah, “Aritphe re en! Aritphe re en! Arittekre en!” Pilat ma thinnâng chhienwah, “Ngama ne Lowang pa rittek chenrea ngama huneha?” Soam aroakte adong pumma dânthâng wah, “Nirãngma Lowang pa Chofa loloba etonga!”

¹⁶Ere diphumma Pilat ma thinnâng Jisu ritphe thukwah.

Jisu Rittek

(Mathiu 27.32-44; Mak 15.21-32; Luk 23.26-43)

Ephumma thinma Jisu sietchhoanwah.



- ¹⁷Jisu ma ate bāngphak pa pelahma chhoanwah, ngale “Khora sekthithe,” ngaeka theko pêwênwah. (Erethepa Hibrû jabma “Golgotha” ngaeka.)
- ¹⁸Eretheko thinma Jisu rittekwah; ngale ate demko mihhanmin wanii johrittek wah, ere waniipa akêruko ngale Jisu amongko rittekwah.
- ¹⁹Pilat ma nyapraang raanglahma bāngphakko betkohwah. Atema, “Nazarat wah Jisu, Jews heh Lowang,” ngama raanglahma betkohwah.
- ²⁰Ajahthem mihnyan heh ma erepa weihwah, chenrāngma ngako, thinma Jisu rittektah thepa erehah kêko dāngwah. Nyapraang pa Hibrû jabma, Latin jabma, ngale Griik jabma raangwah.
- ²¹Soam aroakte adong pumma Pilat nāng ngatwah, “‘Jews heh Lowang’ ngama nekraang, ‘Are mihnyan pumma nga a Jews heh Lowang’ ngaeka, ngama raango.”
- ²²Pilat ma dānthāng wah, “Ngama chenni raangtek a erepa lâraangtek, lerephe tumin.”
- ²³Sipâhi heh ma Jisu rittek diko, thinma ate khet pa toanlahma chinbelii rāng chinsiet lahma sipâhi heh chinru phenwah. Ngale khetkhen nāng pohthin khetlo pemin tōanwah, are khetpa choatphin wah ledang dāngwah.
- ²⁴Sipâhi heh jabmînwah, “Are khetpa chinsietmih; henma chenchoh ea, ngama longkendoh lihma tan e.” Arepa Joban nyapraangpa toantang dāngrāng lôamwah: “Thinma ngakhet pa thintungko phenkep eka ngale ngakhetlo rāngma longkendoh lahma tanwak eka.” Ngale Sipâhi heh ma eroh rewah.
- ²⁵Jisu rittek bāngphak kêko ate nyong, ate nyong naa dihiaknya pa, Klopas tangnyu Mariam, ngale Mariam Makdalenî cheplahma dāngwah.
- ²⁶Jisu ma ate nyong ngale atema nyahrāng huneka dijunte pa ereko cheplahma khewah; Ephumma Jisu ma ate nyong nāng ngatwah, “Atea nangchha.”



²⁷Erediko atema ate dijunte ko ngatwah, “Atea nang nyong.” Erejâ phumma dijunte pumma ate humnâng johsongrãng sietwênwah.

Jisu Rit

(Mathiu 27.45-56; Mak 15.33-41; Luk 23.44-49)

²⁸Ade phumma phangtang lâta dangtah ngama Jisu ma jetwah; ngale Joban nyapraangpa toangtang jiendângrãng atema, “Nga jolân riiekãng” ngatwah.

²⁹Eretheko titnâng angurti chhih mênchong thienlahma dângwah; ephumma jochupli pongpe noappa angurti chhihko rûmkatwah, ngale erepa Hisop bãngkãng rako hetlahma Jisu thunko tupsuh wênkohwah.

³⁰Jisu ma ere angurti pa joklahma, “Arepa lâthôantah!” ngatwah. Erediko ate khongut lahma ritwah.

Jisu Chham ko Pah ma Suhwah

³¹Erediko Jews heh thôte jabte hehma rittektah mihnyan heh da heh ngoakkiak lahma thin mang heh bãngphak kowah jâtôanrãng Pilat wah thâwah. Thinma arepa Hokut batjâ dângkowah thâwah, ngale thinma Pientông jâko ere mang heh bãngphak khoko thienpa hunmah, chenrãngma ngako, ere Pientôngjâ rangwopa nyahrãng Asâthôn rangwo dângwah.

³²Ephumma Sipâhi hehma kalahma Jisu demko johrittektah mihnyan khebwah dapa bengngoakkiak wah, ngale ere dikowah watheda pemin ngoakkiakwah.

³³Phumma chenthu thinma Jisu da ngoakkiak rãng katko, thinma Jisu riichoan khewah, erohwah thinma Jisu dapa lengoakkiak dângwah.

³⁴Rohkomin Sipâhi wathema ate pah pa toanlahma Jisu chhamko suhwênwah, phumma lemlienma hei le jo roamjenkat wah.

³⁵(Henma arepa khetah a ere mihnyan pumma nema chen putedâlem en ngama loatjabwah. Atema chenni thôtah a erepa toangtang, ngale atema toangtang thôekãng ngama ate dedema ajet.)

³⁶Arepa Joban nyapraangpa toangtang dângrãng moatwah: “Aterã hehwah wanthemîn lethahmin.”



³⁷Ngale Joban nyapraangma arohmin ngatwah, “Thinma pahma suh ekako, mihnyan heh ma esûa.”

Jisu Mangru

(Mathiu 27.57-61; Mak 15.42-47; Luk 23.50-56)

³⁸Erediko, Arimatha hahwah Josep ma Jisu mangpa tajâtoan angle ngama Pilat nâng chhienwah. (Josep pa Jisu dijunte dângwah, rohkomin atea huhhuhchha dângwah, chenrăngma ngako, atemin Jews heh thôte jabte heh ranchei dângwah.)

³⁹Khemako rangpen nâng Jisu tânâng chohmîn hutah Nikodima min myrh ngale aloe demnâng sakmîn lahma tientumli pa roakrem litat dangnemnem keplahma Josep demnâng johwângwah.

⁴⁰Mihnyan wanii pumma Jisu mangpa jâtoan lahma Jews heh mangru niem junko thinma tientumli heh demnâng johdoapwah.

⁴¹Jisu ritphetah kêko penri thong dângwah, ngale eretheko mihhan mang henjô mathatru mangruk nyan dângwah.

⁴²Ngale erejâpa Pientông majâ dângwah, erediko mangruk pa atheko dâng phumma, thinma Jisu mangpa ere mangrukko rukatwah.

Jon 20

Sekhota Mangruk

(Mathiu 28.1-8; Mak 16.1-8; Luk 24.1-12)

¹Dobatjâ rangkhah rangkhoko, rangnyek thuma, Mariam Makdaleni mangruk nâng kalahma mangruk kenwah longpa loangphe chhoan khekatwah.

²Atema ngakchhoanwãng lahma Simon Piter le Jisu ma dijunte atema nyahrăng huntah niinâng thôkoh wah, “Thinma mangruk wah Teso pechhoantah, ngale thinma chenko thienchhoan eka erepa nima jetmih!”

³Ephumma Piter le ere dijunte nii mangruk nâng katwah.

⁴Waniilat chhoanchhoan katwah, rohkomin wanthe dijunte pa Piter noma achaan chhoankala lahma mangruk nâng khekho hokkatwah.



⁵Atema kunjup lahma sŭwên tahpa khetlolo khewênwah, rohkomin ate akhennâng lupwãnggho.

⁶Ate didiko Simon Piter katwah, ngale ate kalahma mangruk khenko tintin lupwângwah. Phumma ate memin ereko khetlolo tongla lahma khewah

⁷ngale ere khetpa Jisu khokowah khetpa dângwah. Ere khetpa Jisu mang doapkhet demko ledang thehannâng atedede tenrii lahma dângwah.

⁸Erediko mangrukko khema hukatah dijunte pemin junlup wângwah; ate memin erepa khelahma putewah.

⁹(Thinma ere poatkomin Joban nyapraangma ate ritwah ngakhînmin ngama ngatahpa letajet dângwah.)

¹⁰Erediko dijunte nii humnâng ngakwâng wah.

Jisu Mariam Makdaleni tâko Hông

(Mathiu 28.9, 10; Mak 16.9-11)

¹¹Mariam mangruk thakhoko seplahma dângwah. Atema asep jenjenma, kunjup lahma mangruk khenko sokwênwah

¹²ngale rangkethung wah Joban ngintatte wanii khetpo keplahma Jisu mang thientah theko, kho ngeko wathe ngale da ngeko wathe cheplahma khewênwah.

¹³Thinma atenâng chhienwah, “Dihiaknyu, nanga chenrãngma sep ekoa?” Dihiaknyu pumma dânthâng wah, “Thinma nga Teso pa pechhoan eka, ngale thinma chenke thienchhoan eka erepa ngama jetmek!”

¹⁴Erediko atema litphong lahma eretheko Jisu cheplahma chohkhe wah; rohkomin erepa Jisu ngama atema jet ho.

¹⁵Jisu ma atenâng chhienwah, “Dihiaknyu, nanga chenrãngma sep ekoa?” “Nangma hen lemsû ekoa?” Dihiaknyu pumma erepa penri thong bemte edangthem a ngama thonghun lahma atenâng ngatwah, “Hethôte, nangma ate mangpa mepe chhoan tohko, chenke thienchhoantoh a erepa nganâng thôkohhang, ngama pechhoan lekma akhennâng ngaksekhû ang.”



¹⁶Jisu ma atenâng, “Mariam” ngama roowah. Mariam ma Jisu ngeko litphong kalahma Hibru jabma, “Raboni!” ngama ngatwah, (Arepa “Hethôte” ngaeka.)

¹⁷Jisu ma atenâng ngatwah, “Nganâng neksahlo hang,” “Chenrãngma ngako, Nga a Ewa tânâng mangak wãngekang. Rohkomin wãnglohma nganaa hehnâng thôkoh, nga a Ewa, ngale thin Wa min danga, erediko nga Joban, ngale thin Joban min danga, ate tânâng ngakwãng ekang.”

¹⁸Ephumma Mariam Makdaleni wãng lahma dijunte hehnâng ngama Teso khetek ngama thôkoh wah, ngale Jisu ma atenâng thôkotah hehmin thôkoh wah.

Ate Dijunte heh tânâng Jisu Hông
(Mathiu 28.16-20; Mak 16.14-18; Luk 24.36-49)

¹⁹Erejâpa dobatjâ dãngwah, ngale dijunte heh rangjâ thahko kâsekpa seklahma aroamma khôanwah, chenrãngma ngako, thin a Jews heh thôte jabte heh ranchei dãngwah. Ere poatko Jisu hûlahma thinmongko chephokwah. Ngale atema, “Nekhu mêmô dangen” ngatwah.

²⁰Atema aroh ngatdiko, thinnâng ate dak le chham pa khesokwah. Phumma Teso khelahma dijunte heh nyahrãng khuhah nâhah dãngwah.

²¹Jisu ma thinnâng eredikomin ngatwah “Nekhu mêmô dangen. Ewa ma nga chienkatthang rãngrãng ngamemin nekhu chienchhoan eka.”

²²Erediko atema thinnâng rekma metlahma ngatwah, “Asâthôanju tangchohtha en.

²³Nema mihnyan heh pap heh map mekoh enko, thinma map echoh a; nema thinnâng map lekoh kenko, thinma map lechohmin.”

Jisu ngale Thomas

²⁴Jisu thin tânâng hokpoatko echhi wanii dijunte kowah wathe, erepa Thomas (atenâng Didimas ngama ngaeka), aho dãngwah.

²⁵Ephumma dijunte ahan heh ma atenâng, “Nima Teso khetih,!” ngama thôkoh wah. Thomas ma thinnâng ngatwah, “Ngama ate dekwah sema



tekmãn heh khelekma setekmãn hehnâng nga deksuma keh, erediko ate chhamko nga dekma sahlo lere kengko ngama putedâlem mek.”

²⁶Haptathe diko dijunte heh humkhen nâng wienthe ngakroam khônwah, ngale erepoatko Thomas min dângwah. Kâsekpa seklahma dângwah, rohkomin Jisu hûlahma thinmongko chephû lahma ngatwah, “Nekhu mêmô dangen.”

²⁷Erediko atema Thomas nâng ngatwah, “Nang deksuma ako thatkeh tanhang, ngale ngadek hehnâng thatsû tanhang; erediko nang dekma ngachhamko thatlo tanhang. Nang hungnâng tungmaang pa jek reo, ngale nganâng putedâlem hang!”

²⁸Thomas ma Jisu nâng, “Nga Teso ngale nga Joban,” ngama dânthâng wah.

²⁹Jisu ma atenâng ngatwah, “Nangma nga khelohma ba putedâlem ehangni? Lekhe thangma putedâlemte hehma rangkepmin!”

Are Titab pa Chenrângma Raangwah a

³⁰Jisu ma ate dijunte heh tâko lihân patritli moatlem hehmin ajahthem motah, ereheh are Titab ko raangthienmah.

³¹Rohkomin are raangthien eka heh nema chenmam putedâlem en ngama raangthien eka Jisu pa Joban Chha, Misaia, ngale nema atenâng putedâlem junma ba nema roandông tâchohmin.

Jon 21

Dijunte Waengit tânâng Jisu Hông

¹Are dikomin rekthe, Tiberias josi kênâng Jisu ate dijunte heh tânâng hôngwah. Erepa aroh dângwah.

²Simon Piter, Thomas (atenâng Didimas ngama ngaeka), Nathaniel (Galilijaa Kana hah kowah), Zibidi chha heh, ngale Jisu dijunte ahan wanii, thinkhu phangtang aroamma dângwah.

³Simon Piter ma ahan hehnâng, “Ngama ngah lochhoan ang,” ngatwah. “Nimin nang demnâng johchhoanrii,” ngama ahan hehma atenâng ngatwah.



Ephumma khôankhoma chhoanwah, rohkomin ere rangpen penliangko thinma chohloho.

⁴Rangkah san bânghongko Jisu jokahko cheplahma dângwah, rohkomin dijunte hehma erepa Jisu ngama jet ho.

⁵Phumma Jisu ma thinnâng chhienwah, “Lemruchha heh, nema chenjô chohlo metne?” “Chennijô chohlomih,” ngama thinma dânthâng wah.

⁶Jisu ma thinnâng ngatwah, “Nechaak pa khôankho dekchahko hatkattan en, eko nema roanche echohhat en.” Ephumma thinma chaakpa hatkat tahpa thinma tangak sietwên tûho, chenrãngma ngako, thinma ngah jahmõang chohhat wah.

⁷Jisu ma nyahrãng huntah dijunte pumma Piter nâng ngatwah, “Arepa Teso!” Chenthu Piter ma erepa Teso ngama chohtat phumma, Piter ma ate khet akhohwah pohthin pumma atedede doapkhhek ritwah (chenrãngma ngako ere sanpoatko atema khet koaklahma dângwah) ngale atea joko jâtoak katwah.

⁸Dijunte ahan hehma chaakko ngah jahmõang keplahma khôankho pumma sâranko wângwah. Thin a bam kowah chentô letaangko dângwah, mitat roak ekhu totaangko dângwah.

⁹Chenthu bamko hokwângko, thinma wenko ngah behlahma khewah, ngale bankênmin roanche chohkhe wah.

¹⁰Erediko Jisu ma thinnâng ngatwah, “Nema athânggeh lotet ngah kowah kattan ren.”

¹¹Simon Piter ma khôankhoko kalahma chaakko ngah mênchong bamko sietwênwah, phangtang tungko châthe roakbangâ larem dângwah; ngah pa atô jahjô medan komin chaakpa khajâho.

¹²Jisu ma thinnâng, “Wãngren ngale chhah wãngren,” ngatwah. Ate dijunte hehma henmemin atenâng, “Nanga hen a?” ngama chinchhien ho, chenrãngma ngako, atea Teso ngama thinma jetwah.



¹³Ephumma Jisu ma bankên pa semlahma thin tânâng kalahma thinnâng kohwah; ngale atema ngah pemin kohwah.

¹⁴Jisu ritwah ngakhîn diko arepa ate dijunte heh demnâng lôremrăng chohmînwah.

Jisu ngale Piter

¹⁵Thinma ereheh phhekchhah diko, Jisu ma Piter nâng ngatwah, “Jon chha Simon, are ahan heh noma nangma nganâng ajahhun ehangle?” “Teso huneki,” “Nangma ajet ngama nangnâng huneki,” ngama dânthâng wah. Jisu ma atenâng ngatwah, “Nga saakchha heh senthemthem sũareo.”

¹⁶Eredikomin depnii Jisu ma atenâng ngatwah, “Jon chha Simon, nangma nganâng hun ehangle?” “Teso huneki,” “Nangma ajet ngama huneki,” ngama dânthâng wah. Jisu ma atenâng ngatwah, “Nga saak heh senthemthem sũareo.”

¹⁷Lôremrăng Jisu ma atenâng wiennngat wah, “Jon chha Simon, nangma nganâng hun ehangle?” Piter hungkewah, chenrăngma ngako Jisu ma atenâng lôrem “nangma nganâng hun ehangle”? ngama thôngphâ wah, ephumma Piter ma Jisu nâng ngatwah, “Teso, nangma chentôpa jet; nangma ajet ngama huneki!” Jisu ma atenâng ngatwah, “Nga saak heh senthemthem sũareo.”

¹⁸Ngama toangtang thôkoh eka: Chenthu nea roandông lochaan poatko, nedede hungsiko chennâng chhoan hun eken a ereko rângchhoan en; phumma chenthu ne teka phannang medang tetko, nema nedek pa loatsiet ere en, ngale mihhanma khhek lahma chenke ne chhoan lehunthe a eretheko esiet chhoanhên.”

¹⁹(Jisu ma arepa Piter chenroh riilahma Joban mîn dôngthuk min a erengin pa jabwah.) Erediko Jisu ma Piter nâng, “Ngadijun hang!” ngatwah.

Jisu ngale Dijunte Ahan wathe

²⁰Piter litphong lahma sũtahpa ate tokdiko dijunte ahan wathe chohkhe wah, erepa Jisu demnâng phhekchhah chhahpoatko Jisu tâko kietong kalahma,



“Teso, nang henma chênsângmin a?” ngama thongphâte pa dângwah, ngale atenâng Jisu ma nyahrãng hunwah.

²¹Chenthu Piter ma ere dijunte pa khephumma, atema Jisu nâng chhienwah, “Teso, are mihnyan pa chenroh dângmin a?”

²²Jisu ma atenâng dânthâng wah, “Atea Nga mangak ngakka ahînma tôngthuk mehun angko, Nangjã tanga chenroh dângmin a? Ngadijun hang!”

²³Ephumma Jisu dijunte heh chhangko are dijunte wathêpa leriî tumin ngama thôlahma ngin hôngwah. Rohkomin Jisu ma ate leriimin ngama ngaho; Jisu ma, “Ngama atea Nga mangak ngakka ahînma tôngthuk mehun angko, Nangjã tanga chenroh dângmin a?” ngamaba ngatwah.

²⁴Ere dijunte pumma are ngin heh jabwah, ngale areheh atema raangthienwah; ngale nãngma ajet atema chenni jabtah a erepa toangtang.

Athôan

²⁵Are heh lekomin lihân moatlemmin Jisu ma jahmõang moatwah. Ereheh wanwanthe ma phangtang raangthien nomeko, Ngama thonghun ekang hahtokkhoh ma leta toanpetu lândangroh raangmin wah.



Moatlem

Moatlem 1

¹Thiofilas: Khebengwah ngama raangtek titab ko Jisu ma ate moatlem bengmotah thuma chenni motah a, ngale chenni hethôtah a ereheh raang ekang, erediko

²ate rangkethung nâng tôansietwên tôkotuk chenni motah a ereheh raang ekang. Ate rangkethung nâng tôansietwên mako, Asâthôanju chaanma atema ate moattat chhoante rãng rentah mihnyan hehnâng hethô thienwah.

³Ate ritdi jâroak belii khenko thin demnâng depdep chohmînwah, ngale atea ahîn ngama jien putedâlem rãng thinnâng rongrup moatlem heh molahma khesokwah. Thinma ate khetah, ngale thinnâng atema Joban Hahsông ngin hehmin thôkotah.

⁴Ngale chenthu thin aroamma khôanpoatko, thinnâng atema arepa ngatwah: “Jeroselem wah nekchhoan mêngen, ngama nenâng thôkotah hínhô pa machoh chohkenko bemla letma tongen, ere hínhô pa kohrãng ngawama toamsêm wah.

⁵Jon ma joma baptijem kohwah, phumma jâthe jânii diko nenâng Asâthôanju ma baptijem kohmin.”

Jisu Rangkethung nâng Tôansietwên

⁶Chenthu moattat chhoante heh Jisu demnâng aroamma chohmîn poatko, thinma chhienwah, “Teso, nangma Isrial hehnâng Hahsông pa athângheh ngakkoh minne?”

⁷Jisu ma thinnâng ngatwah, “Rangkuh sanhapa ngawama ate chaan koba hôaneka, erepa chenthu dângmin a epa nema jetthin dangmah.

⁸Rohkomin chenthu Asâthôanju nekhoah nâng meka theko, nema chaan echoh en, ngale nema Jeroselem nâng, Judia phangtang nâng, ngale Samaria, erediko hahtokkhoh phangtang nâng phoangchhoan letma ngangin ephoang thôkoh en.”



⁹Atema arepa ngatdiko, thin mitkhesok jenjenko rangkhethung nâng tôansietwên wah, ngale phoamma thin mitkhe jenjen kowah mahbuk wênwah.

¹⁰Ate rangkhethung nâng wâng dikomin, thinma mitma rangnâng leksûwên lahma chepwah. Phumma mihnyan wanii khetpo keplahma thintâko hôngchep hokwah

¹¹ngale thinma ngatwah, “Galili wah mihnyan heh, rangnâng sûwên letma aretheko chenrãngma chep eken a? Netâwah toansietwên eka are Jisu pa, nema chenroh rangkhethung nâng wãng lahma khe eken a ererãngrãngjô engak kara.”

Juda Litko Dângte

¹²Erediko moattat chhoante heh Oliv Hahho wah Jeroselem nâng ngakwâng wah, erepa Jeroselem wah kilo mitatthe taangko dângwah.

¹³Thin Jeroselem nâng wãng lahma rangkho dângwah thin tongtah humko tôngwângwah: Piter, Jon, Jems, ngale Andru, Filip, Thomas, Bartholomi, Mathiu, Alphaus chha Jems, Diak akan rãngma latte Simon, ngale Jems chha Juda dângwah.

¹⁴Thinkhu roantang rangsoam rãng aroamma chîkhôn wah, thindemko dihiaknyu heh, Jisu nyong Mariam ngale atenaah hehmin chîhokwah

¹⁵Jâthe jânii diko putedâlemte heh ngoangthun rãng khônwah, eko chentô tungko châthe roaknii dângwah, ngale Piter nginthôrãng tôanchepwah.

¹⁶Atema ngatwah, “Ngalemruchha heh,” “Joban nyapraangpa toantang dangeka, Asâthônju ma Devit nâng, Juda ma Jisu khhekte heh lemsên hokrãngma jabthuk tahpa toantang dangeka.

¹⁷Juda pa nãngkhu demnâng dângwah, ngale nãngkhu demnâng moatlem moatrãng rênwah.”

¹⁸(Atema kaamchhih molahma ngun chohtah pumma Juda ma pitthin riieka, ere pitko atea khokesongma ritah; ate wok pa khapoak lahma puk adi heh phangtang loatjâwah.



¹⁹Erepa Jeroselem wah sôngte mihnyan heh ma chentôma tatwah, ngale erohwah, thinjabma ere pitko Akeldama ngama mîn eka, are ngaeka pa, “Hiema riakwah Pit” ngaeka.)

²⁰“Erohwah Rangsoamsê titab nâng aroh raangeka,, ‘Ate humpa sekhota chendangjâa; ere humko henjô nekchen songeka.’ Ngale arohmin raangeka, ‘Ate moatlempa ahanma chenmoa.’

²¹⁻²²“Erohwah hen komin wathe Teso Jisu ngakhîn nginkongpa phoangthô rãng nãngdemnâng johchepmin. Ere mihnyan pa Teso Jisu nãngdemnâng phoangkhoamtah sanpoatko nãngdemnâng roantangma johkhôamwah mihnyan dângmin, ngale Jon ma baptijem kep ngin bengphoang thôtah thuma nãngdemnâng dângwah mihnyan dângmin ngale nãngdem kowah Jisu rangkhetung nâng toansietwên tah jâkotuk nãngdemnâng dângwah mihnyan dângmin.”

²³Ephumma thinma wanii mihnyan rênwah: Josep, atenâng Barsabas ngama ngatwah (ngale atenâng Justus ngamemin ngatwah), erediko Mathias rênwah.

²⁴Erediko thinma rangsoam wah, “Teso, nangma chentô hung rinpa jet, are wanii kowah nangma henpa

²⁵Juda litko moattat chhoante rãngren eko erepa ninâng khesokkat hi. Erepa Juda ma ate theko chhoanrãng thînphe thienwah.”

²⁶Erediko thinma longkendoh lahma wanii kowah rênwah, ereko Mathias pa hôngwah. Ephumma echhi wathe moattat chhoante heh demko Mathias moattat chhoante rãng johdângwah.

Moatlem 2

Asâthôanju Kat Ngin

¹Pentikos rangwojâ hokko, chentô putedâlemte heh phangtang thethenâng roamkhôan wah.



²Phumma lemlienma pôngchaan pônghokko lînwah rângrăng rangkho nâng linlahma dângwah, ngale ere rahlin tahpa thin khôantongtah humkhenwah heh ma anga ngama tatwah.

³Erediko thinma wentheli rângrăng khewah, ngale erepa phoangpu lahma thin chentô nâng khemsahriet wah.

⁴Thin anga ngama Asâthôanju chohwah, ngale Juma thinnâng chenroh jabthuk eka eroh thinma mihhanjat jabma jabwah.

⁵Ere sanpoatko Jerosalem nâng Jews mihnyan songlahma dângwah, ereheh a rangkhen kowah chentô diak akan wah Joban nâng rangsoamte Jews heh khôanhok wah.

⁶Phumma chenthu thinma are lîntîn heh tatphumma, mihnyan heh jahmông khôanhok wah. Thin nyahrăng bârítwah, chenrăngma ngako, thin chentôma putedâlemte heh nginpa thinjabma jablahma tatwah,

⁷Nyahrăng patrit ngale bârít rewak lahma thinma ngatwah, “Are jabte mihnyan heh a Galili wah mihnyan!”

⁸Phumma nângkhuma nâng jabma jablahma chenroh jientat ekia?

⁹Nângkhua Partha, Media, Ilam; Misopotomia, Judia, Kapadokia; Pontas ngale Asia wah,

¹⁰erediko Phigia, Pamfalia, Iqip, Kren hah kêko wah Libia wah. Ngale khaka heh Rom wah,

¹¹Jews ngale Jews ledangjat wah Juda jetrăng litdângte heh, ngale nangkhu khaka heh Kret ngale Arabia - eroh akomin Joban ma nyahrăng moatlem dong moekapa nângkhu chentôma nângjabma jablahma tateki!”

¹²Nyahrăng bârít ngale mokrit nungma, thindede chhienmîn wah, “Arepa chenni dangeka?”

¹³Rohkomin khuka heh ma putedâlemte hehnâng dûmmek nungma, “Are mihnyan heh khemma mok eka!” ngatwah.

Piter ma Nginthôkoh



¹⁴Erediko dijunte ahan echii wathe demko Piter toanchep lahma chaanmõang raklahma mihnyan hehnâng ngatwah: “Lemruchha Jews heh ngale Jeroselem nâng sôngte chentô heh, ngangin jetat tanha, ngale arepa chenni dangeka erepa ngama nenâng thôkoh a.

¹⁵Nema thonghun eken rãngrãng, are mihnyan heh khemjok lahma mok dangmah, athângheh rangkhah wanekhu sanpoat bengdang.

¹⁶Arepa, mõng Joil pa jabtah pa dangeka:

¹⁷Joban ma ngaeka: ‘Athôn rangwo ko ngama aroh emo ang, Ngama Nga Jupa chentô khohnâng ekoh ang. Nechhu nechha hehma ngangin pa ephoang thôa; Roandông janchhō paangmih hehma thânkhe ere en, ngale teka wiku nekhuma metmãngnâng emãngen.

¹⁸Ngale ngahaa hehnângmin dihiak dela anga nganâng, ere rangkuhko ngama nga Ju pa thinnâng ekoh ang, ngale thinma nga nignpa ephoang thôa.

¹⁹Ngama rangkho nâng patritli emo ang ngale hahtokkhoh nângmin bâritli emo ang. Erediko hei, wen, ngale wenkhuhyek ehonga;

²⁰San pa anyekjâ erea, ngale dâ min hei rãngrãng echekjâa, erepa Teso mîndong lahma katjâ rangwo dong hokmako edanga.

²¹Ngale, henhenma Teso nâng tok anaa lahma tongeka ereheh kho epea.’

²²“Lemruchha Jews heh! are ngingpa jetat tan en, Nazarat wah Jisu nâng Joban chaanwin ngama nenâng ate junma Joban ma chentô patritli moatlem ngale bâritli heh molahma khesokthen. Erepa nedede maminjet, chenrãngma ngako, ereheh netâko aretheko dângwah.

²³Joban ma mongthem junko atema Jisu ne deknâng loatthukrãng khemama themawa wah; ngale papi mihnyan wathema chohsû lahma nema Jisu bãngphak khohko rittekwah.

²⁴Rohkomin Joban ma ritwah ngakhinsiettah, ngale ritchaan kowah loatsiettah, chenrãngma ngako ritchaan pumma atea phâtek nâng khhekritte rãngrãng leta khhekthien min.



²⁵Chenrãngma ngako, Devit ma ate junma ngatwah, ‘Ngama sanpoat roakweih nga mathahko Teso khe ekang; atea ngakeko, ngale erohwah nga tachêmsiet mahhang.

²⁶Ngale nga nyahrãng rinroan ekang, ngale nga jabkhab hehmin khuhah nãhah jabekang. Ngale Nga a hei angem mihnyanjô medang angkomin, Joban nãng putedâlem lekma etongang,

²⁷chenrãngma ngako, nangma rit amah thintheko nga lephethien min; ngale nangnãng senthemthem putedâlemte haapa mangruk khenko lesãnjâ thukmin.

²⁸Nangma roandông chohthin lemkhôpa nganãng khesokthang, ngale nanga nga demnãng dângjunko nga khuhah ekang.’

²⁹“Ngalemruchha heh, Ngama nenãng nãngte nãngwa Devit Lowang nginpa loatthôkoh a. Ate min riilahma mangpa bĩnkatwah, ngale ate mangruk pa athãng hehmin nãngdemko tonga.

³⁰Atea mông dângwah, ngale Joban ma atenãng chenni toamsem tah a erepa atema ajet dângwah: Joban ma Devit chhuchha hehwah Devit dangtah rãngrãng wathe Lowang rãng hõanmin ngama toamsêm wah.

³¹Joban ma khediko chenni rêmin a erepa Devit ma khewah, ngale atema Misaia ngakhĩnwãng junma jabwah, ‘Atea rit amah thintheko thinthethien mah; ate phoangpa mangruk khennãng sãnjãmah.’

³²Joban ma are Jisu pa ritwah ngakhinsiettah, ngale are linlin nginpa nikhu phangtang mitma khelihma thõeki.

³³Atea ritwah ngakhin lahma Joban, ate Wa dekchahko tongwãngtah, ngale Joban ma toamsem tah Asãthõanju pa atema chohtah. Athãngwah nema chenni khe eken a, ngale chentat eken a, ereheh atema nãngkhu khohnãng hĩnhõ kohkat ehi.

³⁴Rangkhethung nãng wãngte pa Devit dângwah dangmah; Devit ma arohba ngatwah, ‘Teso ma nga Teso nãng ngaeka: Nga dekchahko tongo



³⁵Ngama nangran heh nang daphâ khenko nangda nekthinrãng mahôan hôankoh kiko ako tongo.'

³⁶"Isrial wah mihnyan heh chentôma are Jisu nema rittektet pa, Joban ma Teso ngale Misaia rãng hôaneka ngama metkep ejet en!"

³⁷Chenthu mihnyan heh ma arepa tatphumma, thinhung nãng nyahrãng keklahma Piter le moattat chhoante hehnâng ngatwah, "Pho anaa heh nima chenni rêmin a?"

³⁸Piter ma thinnâng ngatwah, "Nekhu phangtang mâmâ papmoatlem heh thinphe letma Jisu Krista mînko baptijem kepen, erohkoba nepap heh map tâchohmin; ngale erediko nema Joban wah Asâthôanju hinhô echoh en.

³⁹Chenrãngma ngako, Joban ma ate toamsem pa nekhu nãngmin, ne chhuchha hehnângmin, ngale hahtaang nãng sôngte mihnyan hehnângmin kohrãng semwah - nãng Teso Joban ma aterãng roeka mihnyan heh chentô nãng rangkoh rãng sem eka."

⁴⁰Piter ma thinnâng roatsep wah, ngale lihân jabkhabmin ajahthem thôko lahma ngatwah, "Are mihnyan chhih heh khohnâng hûera chêmchei hehwah nekhu dede pesietrii en!"

⁴¹Jahmõang mihnyan heh ma ate nginko putedâlem lahma baptijem kepwah, ngale ere jâko hahjatrem mihnyan ma baptijem keplahma thin demnâng johdângwah

⁴²Ere mihnyan heh ma thin sanpoat pa moattat chhoante heh ma hethôeka heh helahma chhoanthuk wah, ngale thin demnâng roamtong, roamphek chhah, erediko rangroamsoam relahma chhoanthuk wah.

Putedâlemte heh Roamsông Roamtông

⁴³Moattat chhoante heh junma ajahthem patritli ngale bâritli moatlem heh moatwah, ngale phangtang Joban ran cheichei dângwah.

⁴⁴Chentô putedâlemte heh roantang aroam roammajû dângwah, ngale thinthiak chentôpa phangtang aroam roamma kepwah.



⁴⁵Thinma thin pitthin jolem ngale chhahkhem heh sãng lahma ngunpa thintungko henma chentôlem eka eroh chîphenkep wah.

⁴⁶Rangwo roakweih Rangsoamhum nãng chîchohmîn wah, ngale thinhum hehnãng khuhah nãhah phhekchhah pa roamchhah chîrewah,

⁴⁷Joban nãng rô rewakwah, erediko chentô mihnyan hehma thinnãng senchoh lahma dãngwah. Ngale rangwo roakweih khopete mihnyan heh Teso ma thin demnãng chîjoh roamsiet hokwah.

Moatlem 3

Chutphek Chhahte Dakò Sên

¹Jãthenãng Piter le Jon sanhêmthah wanrem sanpoat wah rangsoam sanpoatko Rangsoamhum nãng katwah.

²Kãsek phãngsen ngaeka theko, mihnyan wathe roanjêngma dakò tonglahma dãngwah. Rangwo roakweih Rangsoamhum nãng rangsoam hokte hehwah ngun thãrãng eretheko chîpehok wah.

³Chenthu atema Piter le Jon nii wãng lahma khephumma, atema chenni komin kohha ngama thãwah.

⁴Thinma atenãng thongsû lahma Piter ma ngatwah, “Ninãng sûtanhi!”

⁵Ephumma atema thinwah chenni komin echohthem ang ngama thonghun lahma thinnãng sokwah.

⁶Phumma Piter ma atenãng ngatwah, “Nga ngenãng ngun phathemin aho, rohkomin nganãng chenni tonghanga erepa koh e: Nazarat wah Jisu Krista mîngo ngama nangnãng toanchep lohma khoam o ngama chien eki!”

⁷Erediko atema dekchah ngeko chohsiet lahma tôansietwah. Ephumma lemlienma ere mihnyan da, ngale dachî arang heh chehjà lahma sênwah;

⁸Ate atoak rewah, ngale atedede dama cheplahma tumlit phoangkhoam wah. Erediko Joban nang rôlahma phoangtoak lahma thin demnãng Rangsoamhum nãng johwãngwah.



⁹Erethe kowah mihnyan hehma Joban nâng rôlahma phoangkhoam lahma khewah,

¹⁰ngale chenthu thinma Kâsek phângsen kowah tângte chutphhek chhate mihnyan pa ngama jetphumma, atenâng chenni dangeka ngama thin nyahrâng patrit ngale bârit wah.

Piter ma Rangsoamhum nâng Nginthôkoh

¹¹Ere mihnyan pumma Solomon Kânthong ngamamîn eka theko Piter le Jon nâng lolahma khephumma, mihnyan heh barii lahma thin tânâng chhoankatwah.

¹²Chenthu Piter ma mihnyan heh khephumma, thinnâng ngatwah, “Isrial mihnyan heh, nema arepa kheletma chenrâng barii eken a, ngale ni nângmin chenrângma thongsû ehia? Nema are mihnyan pa nichaanma ba nima Joban nâng senthemthem soamdi chaan chohlihma sensiet lihma khoamthuk eki ngama thonghun ehia?

¹³Abraham Joban, Isak Joban, ngale Jakob Joban, nângte nângwa heh Joban ma ate Haa Jisu mîndongthuk eka. Rohkomin nema thôte jabte hehnâng ate ritphe thuktet, ngale Pilat ma ate laangphê hunwah akomin nema Pilat tâko nima ate hunmih ngatet.

¹⁴Atea Asâthôn ngale asen dângwah, rohkomin nema ate hunmih ngama daktet, ngale erenoma, nema Pilat nâng mihritphete peba laangphe kohhi ngatet.

¹⁵Roandông khope kohtepa nema ritphetet, rohkomin Joban ma ate ritwah ngakhinsiettah - ngale erepa nima mitma khelihma thôeki.

¹⁶Arepa atemîn chaanma are dakò wako chaan kohlahma sensiet eka. Ngale nema are mihnyan pa khe eken ngale nema ate ejet en, arepa Jisu mînko putedâlem junko sen eka; arepa nekhu chentôma tasû en, Jisu nâng putedâlem pumma jôba ate senthemthem sensiet eka.

¹⁷“Ngale, ngalemruchha heh, Ngama jet nema ngale ne khhepho phannang hehma Jisu nâng hânjôn tetpa nea aba dângjunko hânjôn wah.



¹⁸Misaia ma chêmchoh lahma ritmin ngama môngheh junma Joban ma khemama loajtjabtah; ngale erepa atema aroh toangtang dangthuk eka.

¹⁹Erohwhah hunglit letma Joban tânâng ngakhûren, erohkoba atema nepap heh map ekohhèn. Nema eroh memo enko,

²⁰Teso ngewah Juchaan choh sanpoat ehûra, ngale nerãng atema rentah Misaia, ere Jisu pa echienkatra.

²¹Joban ma khema thuma ate mông asâ heh junma loajtjabtah rãngrãng, chentôpa anyan litdâng sanpoat pa mahû hûko ate rangkhetung nâng etonga.

²²Mosa ma ngatwah, ‘Atema nga chienchhoan thang rãngrãng, Teso Joban ma netânâng mông echienkatra, ngale atea ne mihnyan wahjô dângmin. Atema nenâng chenni thôkoh ehèn a erepa nema phangtang kepmin.

²³Henma komin ere mông nginlekep dangeka ere mihnyan pa Joban mihnyan heh demwah rephe rêmin ngale rit erea.’

²⁴Chentô mông hehma, ngale Samoel memin, erediko Samoel diwah mông hehmemin, athâng hehwah chenni dangeka erengin pa thôwah.

²⁵Joban ma ate môngheh junma toamsem tah heh nerãng sêmwah, ngale Joban ma nete newa hehnâng kahkhetmîntah hehnângmin ne johroam eken. Atema Abraham nâng ngatwah, ‘Nang chhuchha heh junma ngama hahtokkhoh wah mihnyan heh phangtang nâng rang ekoh ang.’

²⁶Phumma Joban ma ate Haa pa renlahma khebengko netânâng chienkatwah, erepa nekhu anga nga kaamchhih moatwah ngaksietrãng chienkatwah.”

Moatlem 4

Piter ngale Jon nii Ngoang Awang heh Tânâng Siethok

¹Piter le Jon niima mihnyan hehnâng thôkoh thuko soam aroakte khuthe, ngale Rangsoamhum bemte adong erediko Saduki heh hokkhôam hokwah.

²Moattat chhoante wanii pumma mihnyan hehnâng Jisu ritwah ngakhintah ngama thôkoh phumma thin rinkhah wah, ngale, Jisu ritwah ngakhintah



ngama thôkoh demko mihnyan hehmin ritwah ngakhînmin ngama thôkoh wah.

³Ephumma thinma lolahma eredijâ tôko phâtek nâng sekwah, chenrângma ngako erejâpa nyahrâng sanhêmthah dangchoan dângwah.

⁴Rohkomin Piter le Jon wah ngin chohtatte heh jahmõang ma putedâlem wah; ngale putedâlemte heh hahjat bangâ râng dângwah.

⁵Eredijâko Jews heh thôte jabte heh, khhepho phannang heh, ngale Niemarang hethôte heh Jeroselem nâng khôanwah.

⁶Soam aroakte adongthôn Anas ngale Kaipas, Jon, Alexender, ngale Soam aroakte adongthôn humwah mihnyan heh demnâng thin chohmînwah.

⁷Thinma moattat chhoante heh thinmako chepthuk lahma thinnâng ngin chhienwah, “Nema arepa chenroh motet a? Nenâng chenni chaan tonghèn a ngale nema henmîn keptet a?”

⁸Piter nâng Asâthôanju mênchong danglahma thinnâng dânthâng wah, “Mihnyan nyuchha heh lemsênte ngale khhepho phannang heh:

⁹Thejâ nima dakò mihnyan rângma kaamsen moatkohdi, ngale ate chenroh sentah a ereheh junma mechhien hiko,

¹⁰nekhu phangtangma jet en, ngale Isrial wah mihnyan heh phangtangma jet en, are mihnyan pa nemako senthemthem senlahma chep ekapa Nazarat wah Jisu Krista mînchaanko sen eka - nema ate rittekwah, rohkomin Joban ma ate ngakhînsiet wah.

¹¹Joban nyapraangma ngatah pa Jisu junma ngatwah, ‘Humhôn tema achhieh ngama petphe eka longpa chentô noma alemthôn râng dangeka.’

¹²Khope pa ate junma loloba tâchohmin; Joban ma hahtokkhoh ko hennângjô nângkho tâpepâng chaan kohmah.”

¹³Ngoang awang heh ma Piter le Jon nii lechei thangma jab khelahma nyahrâng bâritwah, ngale ate niia nyapweih nyapraangte dangmah ngama



tatlahma bâritwah. Erediko ba thinma Piter le Jon nii Jisu demnâng johdângwah ngama thônghun wah.

¹⁴Rohkomin thinma chenmin jienngaho, chenrãngma ngako, dakò dângwah sentah mihnyan pa thindem ko johchep lahma dângwah.

¹⁵Ephumma thinma ngoang awang heh khôanthin hum kowah loatchhoen rãng chienwah, erediko thindede tungko thômîn wah.

¹⁶Thinma chhienwah, “Nãngma are mihnyan hehnâng chenre min a?” “Thinma are patritli moeka pa Jerosalem wah mihnyan heh chentôma lâjettah, ngale nãngmemin areko dangmah jienngamih.

¹⁷Rohkomin are nginpa mihnyan hehnâng lephoang thôtukoh rãng nãngma are waniiko chenthumin Jisu mînko mihnâng nekphoang thôtukoh en ngama jektänge.”

¹⁸Erediko thinma akhennâng ngakroowên lahma Jisu mînnâng chenthumin nekthôtukoh en ngale nekphoang hethôtu en ngama ngatwah.

¹⁹Rohkomin Piter le Jon niima dânthâng wah, “Nededema thatthong hun tan en, Joban ngenâng chenpa apun a - ne ngin kepmin ale roh akole Joban ngin kepmin a.

²⁰Chenrãngma ngako, nima chenpa khetih a ngale chenpa tattih a ereheh lethô thangma nia takih tongmih.”

²¹Ephumma ngoang awang heh ma thinnâng ajah chaan ritnga lahma laangphewah. Thinma ateni nâng tajien chêmsietmih ngama jetwah, chenrãngma ngako, thinma patritli moatlem motah junko mihnyan heh phangtang Joban nâng rôwah.

²²Dakò dângwah patritli sentah mihnyan pa roakbelii rangpâ noma ajah dângwah.

Putedâlemte heh ma Hungdôngrãng Rangsoam



²³Piter le Jon nii laangphê rienrien, thinlemru heh tânâng ngakhû lahma ateniî nâng Soam aroakte adong le khhepho phannang heh ma chenni ngatah a ereheh thôkoh wah.

²⁴Chenthu putedâlemte heh ma erengin heh tatphumma, thin phangtang roamlahma Joban nâng rangsoam wah: Thinma, “Pênte dongthôn, ngale rangkethung ngale, hahtokkhoh, erediko josi, ngale josi khenwah heh hôante!

²⁵Asâthôanju junma nangma nanghaa, nite niwa Devit nâng thôkoh wah, ngale atema ngatwah, ‘Jews ledangte heh chenrângma rinkhah eka; ngale mihnyan heh ma chenrângma ledangli heh themawa eka?’

²⁶Hahtokkhoh kowah Lowang heh loatchep eka, ngale hah pênte heh roamkhôn lahma Teso ngale ate Misaia lelatnâng dangeka.’

²⁷Linlin Hirot le Pontas Pilat nii are Jeroselem hahko Jews ledangte heh demnâng ngale Isrial mihnyan heh demnâng chohmîn lahma, nangma Misaia râng hôantoh nang Asâthôn Haa Jisu lelatnâng chepeka.

²⁸Nang chaanma ngale nang hungsima aroh chendanga ngama hôantoh heh phangtang moatrâng khônwak eka.

²⁹Ngale, Teso thinma athângheh ni chêmset râng phung ekapa nangma khe, erohwah, nang haa hehnâng nangngin pa lechei thangma phoangthô thuk o.

³⁰Nang dekma sahlokat lohma khoanchet heh mesiet katro, ngale nang Asâthôn Haa Jisu mînko patritli le bâritli hehwah mokatro.”

³¹Chenthu thin rangsoam diko, thin tongtah thepa aphông rewah. Thin phangtangma Asâthôanju chohlahma chenranjô lechei thangma Joban ngin phoangthôwah.

Putedâlemte heh ma Thin Chhahkhem heh Aroam roamma Kepwah

³²Putedâlemte heh hung arin nâng wanthe danglahma tôngwah. Henmemin ate chhahkhem pa ngathiak ngama ngatte aho dângwah, thinthiak chentô tonga, ereheh anga ngama aroam roamma kepwah.



³³Moattat chhoante hehma Teso Jisu ritwah ngakhînwâng ngingpa Joban chaan demnâng phoangthôwah, ngale Joban ma thin chentô nâng ajahthem rangkoh wah.

³⁴Thin chhangko henjô thoam athang lahma chêmte mihnyan aho dângwah. Henhen nâng pit ajo le hum ahah tongeka erehehema senglahma ngunpa chîkephok wah,

³⁵ngale erepa moattat chhoante heh deknâng chîkohhok wah; ngale ere ngunpa henma chentô lemeka erejunko chîphenkep wah.

³⁶Ngale Sipras diaknâng chhatwah Livi wathe, ate mînpa Josep dângwah, phumma moattat chhoante hehma atenâng Barnabas ngama roowah (Are ngaeka pa, “Hungdông thukte ngaeka”),

³⁷atema ate pit senglahma ngunpa moattat chhoante heh deknâng kohhokwah.

Moatlem 5

Anania ngale Safira

¹Phumma ate mînpa Anania ngama mihnyan wathe dângwah, atema ate tangnyu Safira demko roamlahma thin chhahkhem wanthe sengwah.

²Roh-komin ate dihiak enii jutthômîn lahma ngun kowah khakapa thinrâng huhtôan lahma khakapa moattat chhoante heh deknâng kohhokwah.

³Phumma Piter ma atenâng ngatwah, “Anania, joak nâng chenrângma pênrii ekoa, nangma chhahkhem sengtoh ngun kowah khaka huhtoan lohma Asâthôanju nâng chenrângma diapchhah ekoa?

⁴Nangma nang chhahkhem pa maseng poatko erepa nangrâng dângwah; phumma nangma erepa seng dikomin ere ngunpa nangthiak rângjô lethien ekoa. Nangma chenrângma aroh thonghun lohma motoh a? Nangma mihnyan nâng diapchhah dangmoh - Joban nâng diapchhah eko!”

⁵Anania ma erepatat rienrien, ate loangjâ lahma ritwah; ngale erengin tatte heh phangtang chei wah.



⁶Phumma paangmihpho heh khuthe hûlahma ate mangpa doapwah, ngale pechhoan lahma bînchhoanwah.

⁷Koantarem diko, ate dihiak pumma chenni dangtah a erepa lejet thangma humkhen nâng hokwah.

⁸Phumma Piter ma atenâng chhienwah, “Nganâng thôkoh tanhang, nang tangwa nechhema chhahkhem sengtetko ngunpa are tøjô lechohtet a?” Atema, “O,” “Are tøjôba chohtih.” Ngama dânthâng wah.

⁹Ephumma Piter ma atenâng ngatwah, “Nang tangwa nechhe punthômîn letma Teso Ju demnâng chenrãngma loam eken a? Nang tangwa mangbîn katte mihnyan heh athângheh kêsek thongko tonga, ngale thinma nangmin epekat ho!”

¹⁰Lemlienma ate dathongko kôanjâ lahma ritwah. Paangmihpho heh humkhenko wãng lahma riichoan khewângwah, ephumma thinma pechhoan lahma ate tangwa kêko bînkatwah.

¹¹Asâthem heh phangtang ngale ahan henma erengin tatte heh nyahrãng cheiwah.

Apatritli ngale Abâritli

¹²Moattat chhoante hehmi mihnyan heh tânâng melâng patritli ngale bâritli moatwah. Chentô putedâlemte heh Solomon Kânthong ngama ngaeka theko roamchohmîn wah.

¹³Mihnyan hehmi chentøjô medongthô akomin, thin demnâng ledangwah heh henjô thin demnâng chinjoh chephûho.

¹⁴Rohkomin mihnyan heh thin demnâng ajahjah johdâng wah - Teso nâng putedâlemte heh dihiak dela anga nga johrû hokwah.

¹⁵Piter dânkhôam poatko ate dâpha pumma komin sahlahma chensen a ngama, mihnyan hehmi khunte heh thin jupthinkhoh hehnâng ngale hemkhoh hehnâng pehû lahma lemông hehnâng chîjupthien hokwah.



¹⁶Ngale Jeroselem kêanâ hah hehwah mihnyan heh ma khun atamte le juchhih lupte mihnyan heh sietlahma hokwah; ngale ereheh phangtang sênwah.

Moattat Chhoante hehnâng Chêmsiet

¹⁷Ephumma Soam aroakte adongthôn le ate lemru heh, erediko Saduki heh ma moattat chhoante hehnâng nyahrâng mitchekwah; ngale thinma moattat chhoante hehnâng sekhamrâng thômîn wah.

¹⁸Thinma moattat chhoante heh lokhhek lahma phâtek nâng sekwah.

¹⁹Rohkomin erejâ rangpenko rangwah Joban ngintatte ma phâtek kêsekpa lêngphe kolahma moattat chhoante heh loatchhoan thukwah, ngale thinnâng ngatwah,

²⁰“Rangsoamhum nâng wângletma, mihnyan chentô nâng are roandông nyan nginpa thôkoh en.”

²¹Moattat chhoante heh ma erengin pa keplahma rangkrah rangkhoma Rangsoamhum nâng wâng lahma mihnyan hehnâng hethô wah. Soam aroakte adongthôn le ate lemru heh roamlahma Jews khhepho phannang heh demnâng ngoangthun dong thunrâng roowah; erediko thinma phâtekwah khhektah moattat chhoante heh nitânâng sietwênrên ngama ngin matkat wah.

²²Phumma mihnyan heh phâtek nâng katahpa moattat chhoante heh phâtek khennâng chohkheka ho, phumma ngakwâng waklahma ngoang awang hehnâng thôkoh wah,

²³“Chenthu ni phâtek nâng hokkhôamko, kêsek pemin kitkitsek lahma tonglatah ngale abemte hehmin phangtang kêsek tâko bem lahma tongla tah; phumma chenthu nima kêsekpa laang lihma sûtihpa akhennâng henjô chohkheho!”

²⁴Chenthu Soam aroakte adong le Rangsoamhum bemte adong heh ma erengin pa tatphumma, moattat chhoante hehnâng chenni dangeka ngama bârit wah.



²⁵Erediko mihnyan wathe hûlahma thinnâng thôkoh wah, “Tattan en! Nema phâtek nâng sektet mihnyan heh Rangsoamhum nâng mihnyan hehnâng hethô lahma tonga!”

²⁶Ephumma sahab pumma ate sipâhi heh sietlahma loatchhoan lahma moattat chhoante heh ngakloat katwah. Rohkomin thinma lebuw lewat thangma sietwênwah, chenrãngma ngako mihnyan hehma longma moangpet hi ngama chei rewah.

²⁷Thinma moattat chhoante heh siethû lahma ngoang awang heh tâko chepthuk lahma Soam aroakte adongthôn pumma thinnâng ngin chhienwah.

²⁸Atema ngatwah, “Nima nenâng are mihnyan mînpa kepletma mihnyan hehnâng nekphoang hethôtu en ngama jektengtah dangmahne,” “Phumma sûtan en nema chenni moeken a! Nema Jeroselem phangtang nâng lâphoang hethôtet, ngale nema are mihnyan riitahpa nikhonâng phehun ehia!”

²⁹Piter le moattat chhoante ahan wathe pumma dânthâng wah, “Nima mihnyan ngin kepnom Joban nginba kepmin.

³⁰Nema bãngphakko sema rittektet diko, Nite niwa heh Joban pumma Jisu ritwah ngakhinsiettah.

³¹Joban ma ritwah ngakhinsiet lahma, Isrial mihnyan hehnâng hunglit sanpoat kohlahma thinpap heh map kohrãng ngama ate dekchahko lemsênte ngale Pângte rãng dangthuk lahma tongthuk eka.

³²Nima areheh mitma khelihma thôeki - ngale Joban ma ate nginkepte hehnâng hínhô rãng koheka Asâthôanju memin jeteka.”

³³Chenthu ngoang awang hehma erengin heh tatphumma, thin nyahrãng rinkhah wah, ngale moattat chhoante hehmin ritphe rãng hunwah.

³⁴Farasi wathe ate mînpa Gamaliel, ngale atea Niemarang hethôte, ngale chentô mihnyan hehma atenâng nyahrãng choangpe lahma dângwah, phumma ere mihnyan pa ngoang awang heh chhangko toanchep lahma



moattat chhoante heh poatthe rãng rangsâ nãng sietchhoan en ngama chienwah,

³⁵Ngale erediko atema ngoang awang hehnâng ngatwah, “Nga lemru, Isrial mihnyan heh, jetletma mo en, nema are mihnyan hehnâng chenni rerãng ngaeken a.

³⁶Nema thonghun ekenle, melâng rangpâ manâng Thiudas pa ngamin wanthe adong ngama hongtah, phumma châbelii mihnyan rãng ate demnâng johdangtah. Phumma chenthu ate ritphe diko, ate dijunte heh phangtang phoangphan chhoan lahma ate ngin pemin mahjâtah.

³⁷Eredikomin, mihnyan heh khoroakweih sanpoatko Galili wah mihnyan wathe Juda ngama erohjô hong lahma mihnyan heh ate demko khôansiet wah; phumma ate ritphe diko ate dijunte heh phangtang phoangmah phanchhoantah.

³⁸Ngale are pemin ngama nenâng thôkoh eka, are mihnyan hehnâng chenjô nekre en. Thienroh re en! Thinma chenni moeka ereheh mihnyan hei angem junma medang ako, are pemin amah jâjô erea,

³⁹Phumma arepa Joban wah medang ako, nema chenthumin tajienmet. Erepa nea Joban demnâng mênminwah rãng rãng ba edanga!” Phumma ngoang awang hehma Gamaliel nginpa kepwah.

⁴⁰Thinma moattat chhoante heh humkhen nãng ngakroo lahma watlahma Jisu mênko chenthumin nekthe phoangthôtu en ngama ngalahma thênphêwah.

⁴¹Moattat chhoante heh ngoang awang heh tâwah khuhah nâhah chhoan wah, chenrãngma ngako, Joban ma thin a Jisu rãngma rêê tathangte rãng rêndi khuhah wah.

⁴²Ngale rangwo roakweih thinma Rangsoamhum nãngmin ngale mihnyan heh hum hehnângmin Jisu ngale Misaia Nginkongsen pa roantangma phoangthô wah.



Moatlem 6

Waengit Chohsokte

¹Khediko lele, dijunte heh jahwâng rienrien, Griik jabma jabte Jews heh Hibru jabma jabte ahan Jews heh demnâng chhihchohmîn wah. Griik jabma jabte Jews heh ma thin janthoinyu heh rangwo roakweih phhekchhah phenko chohmah ngama ngatwah.

²Ephumma echhi wanii moattat chhoante heh ma phangtang aroamma khôanroo lahma ngatwah, “Nângma Joban ngin phoangthônâng hung lekoh thangma ngun akem nâng sêm pa senmah.

³Eroh wah, lem ruchha heh, nekhuchhang wah Asâthôanju mênchong dângte ngale hungkhem rinkhem mihnyan heh wah waengit mihnyan ren en, phumma nângkhuma thinnâng areh phên asên moatlem mothuk e.

⁴Ephumma nângkhu sanpoat phangtang rangsoam ngale Joban ngin phoangthônâng koh e.”

⁵Moattat chhoante heh nginko putedâlemte heh phangtang hungsên wah, ephumma thin ma putedâlem asente ngale Asâthôanju mênchong dângte heh rên wah, erepa Stifen, Filip, Prokoras, Nikanor, Timon, Parmena, ngale khemako Judiejem rãng litdangte Antiok wah Jews ledangte Nikolas rên wah.

⁶Putedâlemte heh ma areh moattat chhoante heh nâng siethok koh wah, phumma moattat chhoante heh ma ere mihnyan heh kohko dekma sahlo lah ma rangsoam koh wah.

⁷Ngale ephumma Joban ngin pa lejektû thangma jêngjah jahphoangthô rewak wah. Erediko Jerosalem nâng putedâlemte heh min jêngjah jahhong rewah, ngale soam aroakte heh memin ajahthem ma putedâlem wah.

Stifen Loatkhek

⁸Stifen nâng Joban ma nyahrãng rangkoh wah, ngale atenâng Joban chaan mênchong dâng wah, atema mihnyan heh tâko nyahrãng patritli le bâritli moatlem heh moatwah.



⁹Rohkomin Mihhaa dângwah jeklahma Sanagog nâng johdângte mihnyan heh ma atenâng jektângwah (ereheh nâng eroh ngatwah), Areko Kren wah Jews heh ngale Alexandra wah heh dângwah. Thin demko Kilikia ngale Asia diakwah Jews ahan hehmin johroam lahma Stifen demnâng chhiakmîn wah.

¹⁰Rohkomin Stifen nâng Juma chohsû lahma atema ngin heh chhemlala hôngjabwah, phumma ere Jews heh ate demnâng tachhiakmîn tuho.

¹¹Ephumma thinma mihnyan khuthe nâng aroh jab en ngama huhngatwah, “Atema Mosa le Joban lelatnâng jablahma nima tattih!”

¹²Eroh mothô thôwak lahma thinma mihnyan heh phangtang, erediko khhepho phannang heh, ngale Niemarang hethôte heh Stifen lelatnâng chepsietwah. Ephumma thinma Stifen lolahma ngoang awang heh tânâng siethokwah.

¹³Thinma Stifen lelatnâng mothô thôrăng min mihnyan khuthe siethokwah. Thinma ngatwah, “Are mihnyan pumma roantang năng Rangsoamhum Asâthôn lelatnâng jabeka.

¹⁴Nazarat wah Jisu ma are Rangsoamhum pa erunsiet a, ngale Mosa ma hethôthi niemarang hehmin elitsiet a, ngama atema jablahma tattih!”

¹⁵Ngoang awang heh chhangwah tângte chentôma thinmitpa Stifen nâng sokwênwah, ngale thinma Stifen thenphăng pa rangkethung wah Joban ngintatte heh thenphăng răngrăng khewênwah.

Moatlem 7

Stifen ma Nginthô

¹Soam aroakte adongthôn pumma Stifen nâng chhienwah, “Arepa nginlinne?”

²Stifen ma dânthâng wah, “Pho awa heh, ngangin jetat tanha! Năngte năngwa Abraham Haran hahnâng sôngwâng mako, ate tânâng Misopotomia hahko Joban adongthônpa hôngkatwah



³Ngale atenâng ngatwah, ‘Nang humte tangkâ ngale Diak akanpa phethien lohma ngama nangnâng khesokmin hahko wãngo.’

⁴Ephumma atema ate Diak pa phethien lahma Haran nâng wãng lahma sôngwângwah. Abraham wa ritdiko, Joban ma athâng hehwah nesong eken hahko sôngkat thukwah.

⁵Joban ma Abraham nâng erehahpa aterãng ngama kohho, chhupthe tumin aterãng kohho, rohkomin Joban ma atenâng kohmin ngama toamhônwah, ngale erehahpa ate ngale ate chhuchha hehrãng ngama ngatwah. Joban ma Abraham nâng are toamhoantah poatko Abraham nâng chha aho dângwah..

⁶Joban ma atenâng aroh ngatwah: ‘Nang chhuchha heh mihhahnâng esongwak a, ngale erehahko thinnâng châbelii rangpârãng huahaa rãng hânlahma nyahrãng echêmsietwak a.

⁷Rohkomin thin huahaa rãng kepte hehnâng ngama echêmsiet ang, ngale erediko nang chhuchha heh erediak kowah loatchhoan lahma nganâng are hahko esoam etô hang.’

⁸Erediko Joban ma Abraham nâng toamhôn kahkhet mîngo khoankhen niem pa hânthukwah. Ephumma Abraham ma Isak chha lahma haptathe diko khoankhen niem hânwah; Isak memin ate chha Jakob pa hânwah, ngale Jakob memin ate chha nãngte nãngwa echhi wanii latnâng hânwah.

⁹“Jakob chha hehma thinnaa Josep nâng chhihchoh lahma Iqip nâng huahaa rãng sêngkatwah. Rohkomin Joban pa ate demnâng dângwah

¹⁰ngale atema nyahrãng chêmchoh wah, rohkomin Joban ma ate pêpângwah. Chenthu Josep Iqip lowang tânâng hokko, Joban ma atenâng Iqip lowang pumma hunli jat apat ngale buthi mongthem heh kowah, ephumma lowang pumma Josep ere diakko Govono dângthukwah, ngale lowang heh humkâ wah mihnyan hehmin atenâng pênthukwah.

¹¹Erediko Iqip diak ngale Kanan Diak phangtang nâng rêmdong remhû lahma nyahrãng chêmwah. Nãngte nãngwa hehma chenke wahjô phhekchhah choho,



¹²Ngale chenthu Jakob ma Iqip nâng chhah tonga ngama tatphumma, atema ate chha nãngte nãngwa heh enãng khebengrãng chienkatwah.

¹³Eredikomin thêngakkat poatko, Josep ma ate dedema ate pho hehnâng nga a nena ngama thôkoh wah, ngale ephumma Iqip lowang pumma Josep humte tangkâ heh jetwah.

¹⁴Ephumma Josep ma ate wa Jakob nâng tangkun tangkâ Iqip nâng songkaren ngama thôkoh rãng nginmatte chienwênwah, thin a phangtang tungko roakengit wabangâ dângwah.

¹⁵Erediko Jakob Iqip nâng katwah, ngale ate erediko ate chha heh enãng ritwah.

¹⁶Thinmang heh Shichem nâng pêwênwah, ngale Abraham ma Hamor jatwah ngonma retah mangrukko ruwênwah.

¹⁷“Chenthu Joban ma Abraham nâng toamhoantah heh toangtang dângwãng sanpoat pa hokphumma, Iqip wah mihnyan heh nyahrãng jat ajâwah.

¹⁸Athôanko Josep lejetta lowang ma Iqip Diak pa pênwah.

¹⁹Ere Lowang pumma nãngte nãngwa heh diapchhah lahma thin demnâng nyahrãng chhihhông wah, ngale thinchha heh chenriia ngama humkhen nâng lethientuk thangma, rangsâ nâng thienchhoan thukwah.

²⁰Ere sanpoatko Mosa nyahrãng naasen hôngchhat wah. Atea jengrem rãng ate nyongma humkhen nâng huhkhêmwah,

²¹Ngale chenthu thinma Mosa humwah rangsâ nâng thienchhoanko, lowang chha dihiaknya pumma khelahma ate chharãng ngama ate humnâng tôankhêm wênwah.

²²Phumma atenâng Iqip heh buthi mongthem phangtang hethô wah, ngale atea ngin ariet nãngmin erediko moatlem nãngmin nyahrãng jet ajien dângwah.

²³“Chenthu Mosa roakbelii rangpâ dângko, atema ate lemru Isrial mihnyan heh chenroh hânjôan eka ngama lêmsokwah.



²⁴Isrial mihnyan wathe nâng Igip mihnyan pumma nyahrâng hânjôn lahma lepkhewah, ephumma atema Isrial mihnyan pa pêngka lahma Igip mihnyan pa ritphewah.

²⁵(Mosa ma, ate mihnyan Isrial hehma thin a mihhu mihhaa dângwah Joban ma epesiet hi ngama ethong hunwak a ngama thônghun wah, rohkomin thinma eroh thonghûho.)

²⁶Eredijâko atema Isrial mihnyan wanii loatmîn lahma khewah, ephumma atema ere wanii mênpa pâsiet lahma mêthukrâng thônghun wah. Atema ngatwah, ‘Tattan en,’ ‘Nechhea waniinii Isrial mihnyan tuta; phumma aroh chenrângma mên eken a?’

²⁷Phumma ate lemruko watte mihnyan pumma Mosa nâng jongthin lahma ngatwah. Atema ngatwah, ‘Henma nanga ni pêntrâng dangthuk ehoa, ngale henma ni nginpatrâng hân ehoa?’

²⁸‘Mejâwah nangma Igip mihnyan ritphetoh rân-râng, ngamin ritphêhun ehanga?’

²⁹Chenthu Mosa ma erengin pa tatphumma Igip wah huhchhoan lahma Midian diaknâng sônghwângwah. Enâng atema delachha wanii chhatwah.

³⁰“Rangpâ roakbelii liendiko, Sinai Hahkong kêwah sehahko rangwah Joban ngintatte Mosa tânâng hinbuk nâng wendôrâng litlahma hôngkatwah.

³¹Mosa ma chenni khekânga ngama bâritwah, ngale hinbuk tâko hehka lahma senthemthem sokrâng katwah. Phumma atema Teso Jabkhab chohtatwah:

³²‘Nga a nangte nangwa heh Joban, Abraham Joban, Isak Joban, ngale Jakob Joban.’ Phumma Mosa acheima tiilahma chinsûho.

³³Teso ma atenâng ngatwah, ‘Nang daphâng pa putptheo, chenrângma ngako, nang chepeko thepa Asâthôn the.

³⁴Ngama nga mihnyan heh Igip nâng nyahrâng chhihmõang chêmrii lahma khe ekang. Thin sep ajông pa ngama lâtattek, ngale nga thin pepângrâng kaerâng. Athângheh wângro; Ngama nanga Igip nâng chienkat e.’



³⁵“Mosa nâng Isrial mihnyan heh ma hunmih ngatwah. Thinma chhienwah, ‘Henma nanga ni pêntrăng dangthuk ehoa, ngale henma ni nginpatrăng hân ehoa?’ Ere Mosa pa jôba Joban ma Isrial mihnyan heh pêntrăng ngale ate tânâng Joban ngintatte hinbuk nâng chohmîntah pumma chohsû lahma thin pêpâng rãng chienkatwah.

³⁶Atema patritli moatlem heh Iqip nâng, Josichek dânko, ngale sehakhô nâng rangpâ roakbelii molahma Isrial mihnyan heh Iqip wah loatsiet chhoanwah.

³⁷Mosa ma Isrial mihnyan hehnâng ngatwah, ‘Joban ma nga chienchhoan ehang rângrăng atema netânâng mông echien katra, ngale atea ne mihnyan wahjô dângmin.’

³⁸Ate sehakhô nâng Isrial mihnyan heh khân komin johkhânwah; atea nângte nângwa heh demnâng min johdângwah, ngale Sinai Hahkong khonâng rangwah Joban ngintatte ma atenâng thôkoh poatkomin dângwah; ngale atema nângnâng dienthokoh rãng Joban wah ahin nginkongpa chohthâwah.

³⁹“Rohkomin nângte nângwa heh ma ate nginlekep dângwah; thinma ate jongthin lahma Iqip nâng ngakkat hunwah.

⁴⁰Ephumma thinma Aron nâng ngatwah, ‘Nirăng joban wah hânkohhi. Are ni Iqip diakwah loatsiet chhoante mihnyan Mosa pa chenni dangeka erepa nima jetmih.’

⁴¹Erediko thinma mânpong rângrăng moangachaang wanthe hânlahma joapsoap thin heh kephû lahma soam aroak wah, ngale thinma hântah mînko kuhhoan lahma jokphhek chhah wah.

⁴²Ephumma thin tâwah Joban ngakchhoan wah, ngale thinnâng rangkho wah merit heh soamtô thuktûwah, Mông heh ma rangwah titab ko aroh rangeka: ‘Isrial mihnyan heh! roakbelii rangpâ nema sehakhô nâng wo awak soletma joapsaop tetpa nganâng joapsaop wah dangmah.

⁴³Nema joban Molak nâng soamthin tembu hum ba phoangpetet, ngale merit joban Rifan moangachaang peba phoangpetet; ereheh a nema soamtô rãng



hòantet moangachaang heh ba. Ngale eroh ngama nea Babilon liennâng echêmsiet chhoanthuk a.’

⁴⁴“Nângte nãngwa heh sehakhô nãng dângpoatko thinnâng Joban tângthin Tembu hum Asâthôan pa dângwah. Erepa Joban ma Mosa nãng chenroh thôkotah a, ngale chenroh khesoktah a ererãngrãng hânwah.

⁴⁵Erediko, nãngte nãngwa heh ma thin te awa hehwah dienchohtah tembu humpa Joban ma mih hehwah nyen lah ma thin sôngrãng kohtah hahpa keprãng Josua demnâng wãngwak tahko thin demnâng johpewên wah. Ngale ere tembu humpa Devit rôan tôkowîn dângwah.

⁴⁶Joban ma atenâng sênchôhwah ngale atema Jakob Joban tânggrãng rangsoamhum hânthukrãng Joban wah thâwah.

⁴⁷Phumma Rangsoamhum pa Solomon ma hânwah.

⁴⁸“Rohkomin achoang thânwah tângte Joban pa mihnyan dekma hânwah humnâng tongmah; mông ma ngatah rãngrãng,

⁴⁹‘Teso ma ngaeka, rangkhethung pa nga tângthin, ngale hah pa nga danekthin. Nema nganâng chenrãngrãng hum hânkohmin a? Ngale nga sônghin thepa chenke tonga?’

⁵⁰Are chentôpa ngadedema hânwah ledangne?’

⁵¹Stifen ma ngatwah, “Nea aretô hungchêne!” “Nehung nerin Joban nãngjô kohmet, ngale nenâ memin Joban ngin jetatmet! Nemin nete newa heh rãngrãng jôba: ngale nemin roantangma Asâthôanju lelatnangjû dangeken!

⁵²Mông wathemin nete newa heh ma lechêmsiet thangma thatdangtah a? Khema thunâng Joban ma, ate haa toantang katmin ngama thôkoh rãng ate nginmatte chienkettha memin thinma ritpheta. Ngale adea nema ate chensãng letma ritphe eken.

⁵³Nea Joban wah Niemarang heh chohte dângwah, erepa Joban ngintatte heh ma chohkoh katwah - rohkomin ereheh nema kepmet!”

Stifen Longma Ritpet



⁵⁴Ngoang awang hehma Stifen ngin jetat lahma, Stifen nâng thin pâchupkek lahma rinkhah wah.

⁵⁵Rohkomin Stifen ma Asâthôanju mênchong danglahma rangkhethung nâng sokwênwah, ngale atema Joban mîndong lahma khewênwah erediko Jisu Joban dekchah - ngeko cheplahma khewênwah.

⁵⁶Atema ngatwah, “Sûtan en!” “Ngama rangkhethung pa laanglahma khewên ekang, ngale Mihnyan Chhapa Joban dekchahko cheplahma khewên ekang!”

⁵⁷Phumma chaanmõang raklahma ngoang awang hehma thindekma nâ hepwakwah. Erediko rekthelem ma ate tânâng roamchhoan katwakwah,

⁵⁸erediko hahdaang wah sietpdechhoan lahma longma ritpetwah. Hâkhi hôante hehma thin khet heh paangmihpho ate mînpa Sol nâng phethien kohwah.

⁵⁹Thinma Stifen nâng longma petthuko, Stifen ma Teso nâng rakroowah, “Teso Jisu, ngaju chohsiet hang!”

⁶⁰Atema dakuhttho lahma khupjup lahma chaanmõang rakwah, “Teso! thinma are pap moeka pa thin khohnâng nekchatthuk!” Atema aroh jablahma ritwah.

Moatlem 8

¹Ngale Sol memin Stifen ritphe pa asen ngama ngatwah.

Sol ma Asâthem heh Chêmsiet

Erejâ phumma Jerosalem wah Asâthem hehma nyahrãng chêmchhih bengchohwah. Putedâlemte heh phangtang Judia ngale Samaria diaktang nâng phoangphân chhoanwah, moattat chhoante heh loloba lephanchhoan thangma tângwah.

²Joban nâng senthemthem soamte khuthema nyahrãng raksep nungma Stifen mangpa bînchhoanwah.

³Sol memin Asâthem heh chhihsiet rãng phungwah; humhumnâng phoangchhoan lahma putedâlemte dihiak dela phangtang phoangsiet chhoan lahma, ereheh phâtek nâng sekhokwah.



Samaria nângmin Joban Nginkongsen pa Thôkoh

- ⁴Putedâlemte phanchhoantah hehma chentô thenâng Joban nginkongsen pa thôchhoan wah.
- ⁵Filip Samaria nâng katwah ngale Samaria nâng kalahma enângwah mihnyan hehnâng Misaia nginkongpa thôkoh wah.
- ⁶Mihnyan heh nyahrâng namhû lahma Filip nginko jetat wah, ngale atewah ngin jettat demko atema patritli moatlem moeka hehmin khewah
- ⁷Ajahthem mihnyan wah juchhih min chaanmõang raksep lahma loatchhoan wah, ngale ajahthem kôasô khoanchette ngale dakò hehmin sênwah.
- ⁸Ephumma erehahko nyahrâng khuhah nâhah dângwah.
- ⁹Erehahko Simon ngama mihnyan wathe dângwah, phumma atema poatthe râng Samaritan mihnyan hehnâng ate ngewah jâdu pumma hânlahma bâritthuk wah. Simon ma atemin wanthe adong ngama rângthôrii lahma dângwah,
- ¹⁰ngale erehah kowah chentôma, adong arin anga ngama, ate nginko hungkoh lahma jetatwah. “Atenâng ‘Joban chaan adongthôn chaanpa,’” ngama thinma ngatwah.
- ¹¹Simon jâdu pumma melâng rangpâ thin lekbârit thuk junko mihnyan hehma ate ngin pa kepwah.
- ¹²Roh komin chenthu thinma Filip wah Joban Hahsông nginkongsen le Jisu Krista nginpa chohtat phumma, dihiak dela phangtang baptijem kepwah.
- ¹³Simon memin ere nginko putedâlem wah; ngale baptijem kepdiko, Filip kêkêko namhokwah, ngale chenthu Filip ma nyahrâng patritli le bâritli heh moat khelahma atemin bâritwah.
- ¹⁴Jeroselem wah moattat chhoante hehma Samaria wah mihnyan hehmemin Joban jabkhab pa keptah ngama chohtat phumma thinma Piter le Jon nii thin tânâng chienkatwah.



¹⁵Chenthu thin Samaria nâng hokkat phumma, enângwah putedâlemte heh ma Asâthôanju chohrăngma rangsoam kohwah.

¹⁶Chenrăngma ngako thinnâng hennâng min Asâthôanju maka dângwah; thinma Teso Jisu mîngo lolo baptijem bengkep dângwah.

¹⁷Erediko Piter le Jon niima thin khohko dekma sahloawatwah, ngale erediko thinma Asâthôanju chohwah.

¹⁸Piter le Jon niima putedâlemte heh khohko dekma sahloatko Jupa chohlahma khephumma, Simon ma ngun kohlahma Piter le Jon niinâng

¹⁹ngat-wah, “Nga nângmin are chaanpa kohha, ngamemin henhen khohnâng nga dekma sahlokoh ekanga ereheh ma Asâthôanju chenchoh a.”

²⁰Phumma Piter ma atenâng dânthâng wah, “Nangma Joban wah hînhô pa ngunma târiakli ngama thônghundi nangngun nechhe pap wendô nâng ekaen!

²¹Nangma are ni moatlemko tajoh momahhi, chenrăngma ngako nang hungpa Joban mathahko achhih.

²²Nangma are achhih themawa eko hungpa litlohma Teso nâng rangsoam o, erohkoba nangma are achhih thonghun ekopa Joban ma map ekohho.

²³Chenrăngma ngako, nanghung pa achhih akhah le mihphetwan lolo, erediko nanga papma khhekthien lahma kheki.”

²⁴Simon ma Piter le Jon niinâng ngatwah, “Are nechhema jabeken heh nganâng lechatrăng, nechhema Teso nâng rangsoam mêngkohha.”

²⁵Piter le Jon niima Samaria wah mihnyan hehnâng ateni ma Joban moatlem moatpoat wah ngin heh thôkoh, erediko Teso nginkongsen heh thôkoh diko ateni Jeroselem nâng ngakwâng wah. Thin ngakwâng lemkommin melâng Samaria hahdaang hehnâng Joban nginkongpa thôthien kohwah.

Filip ngale Ithopia wah Sahhab



²⁶Rangwah Teso ngintattema Filip nâng ngatwah, “Cheplohma dekchah nâng wãngo Jeroselem wah Gaza nâng katlemko kao.” (Thenep thejâ arelem pumma khoamtumah.)

²⁷⁻²⁸Ephumma Filip toanchep lahma chhoanwah. Eko Ithopia wah delawa wathe atea lengtênchhoan dela dângwah, ngale atea Ithopia Wangcha ngun thiente sahhab dângwah, phumma ate Jeroselem nâng rangsoam rãng kalahma ate mokgari pumma humnâng ngakwâng dângwah. Ngale mokgari ko chhang nungma atema Isaia mǒng titab kowah weihlahma dângwah.

²⁹Asâthôanju ma Filip nâng ngatwah, “Wãng lohma mokgari ko chhang wãngo, ngale ate kêko tongwãngo.”

³⁰Phumma Filip wãng lahma Isaia mǒng titab kowah weihlahma tatwah. Filip ma atenâng chhienwah, “Nangma weih ekopa jet ekole?”

³¹Ere sahhabwa pumma dânthâng wah, “Arepa nganâng henma komin lethôkoh hangko ngama chenroh ejienjet anga?” Phumma atema Filip nâng mokgari ko nga tâko chhangwãngro ngama roowah.

³²Joban nyapraang kowah atema weih tahpa arepa weihwah: “Atea ajoatrãng sietchhoan eka saak rãngrãng, ngale saakchha ma ate baan khenpoatko lesepa rãngdanga rãngrãng. Atema khabthemín loatjabmah.

³³Atenâng thãjô lembe hôanjôan wah, ngale atea toangtang medang komin erejunko ledangwah. Ngale henmejô ate liala junma lejien thômin, chenrãngma ngako, are hahtokkhoh kowah ate roangdong pa thôantah.”

³⁴Sahhabwa pumma Filip nâng chhienwah, “Arepa mǒng ma hennâng ngaeka erepa nganâng thôkohhang? Atedede junma jab ekale mihhan nâng ngaeka?”

³⁵Ephumma Filip ma atenâng thôkoh wah; Atema weihtah Joban nyapraang pumma bengthô kolahma Jisu nginkongsen heh phangtang atenâng thôkoh wah.



³⁶Atenii lemko katjenjenko, jo roanche tônglâwah, phumma sahabwa pumma ngatwah, “Are theko jo roanche tonga. Ngama baptijem keppa chennima tâtângmin a?”

³⁸Sahhabwa pumma mokgari pa chepthuk wah, ngale Filip le sahabnii joko jâkhoam kalahma atenâng Filip ma baptijem kohwah.

³⁹Chenthu thin jokowah loatwângko, Teso Juma Filip tôansiet chhoanwah. Erediko sahabwa pumma Filip thengak khetuho, rohkomin sahabwa pa khuhah nâhah ate humnâng wângwah.

⁴⁰Filip atedede Azotus hahnâng hônghokwah; phumma atea Kasaria nâng wângwah, ngale ate wânglemko chentô hah hehnâng nginkongsen pa phoangthô kohwah.

Moatlem 9

Sol Litjâ

(Moatlem 22.6-16; 26.12-18)

¹Ere sanpoatko Sol ma Teso nâng putedâlemte heh phoangritphe lahma dângwah. Ngale Soam aroakte adongthôan tânâng wângwah

²ngale atema soam aroakte adong hehnâng Damaskas wah Sanagog hehnâng nyapraang wah raangkohha ngama thâwângwah, erepa atema Teso lemko khoam lahma atenâng putedâlemte heh mechoh ako lokhhek lahma dihiak dela phangtang Jerosalem nâng ngaksiet katrăng thâwah.

³Sol Damaskas hah kêko hokkhoam rienrienko, lemlienma rangkho wah wenma ate tumlit hôngphiak katwah.

⁴Sol hahko loangjâ lahma atenâng ngalahma jabkhab tatwah, “Sol, Sol! nangma nga chenrăngma chêmsiet ehanga?”

⁵Atema, “Nanga hen a Teso?” ngama chhienwah. “Nga a Jisu, nangma chêmsiet ehanga,” ngama jabkhab pumma dânthâng wah.

⁶“Rohkomin toanchep lohma ire hahdaangko wãngo, enâng nangma chenni moatmin a erepa ngama ethôkoh e.”



⁷Sol demwah johkatah mihnyan heh chenjô lejab thangma chepwah; thinmemin jabkhab hongjab tahpa tatwah rohkomin thinma henjô chohkheho.

⁸Sol hahkowah toanchep lahma ate mitkan tahpa, chenjô lejiên khetû dângwah. Ephumma ate lemru hehma dekko sietlahma Damaskas nâng sietwênwah.

⁹Jârem atema chenjô lejiênkhe dângwah, ngale erepoatko atema chenjô lejok phhekchhah tôngwah.

¹⁰Damaskas nâng putedâlemte wathe ate mînpa Anania dângwah. Joban ma atenâng thôko lahma atema thânkewah, “Anania!” Atema, “Teso, nga ako tongang,” ngama dânthâng wah.

¹¹Teso ma atenâng ngatwah, “Cheplohma lemtinla kao, ngale Tarsus wah mihnyan wathe ate mînpa Sol ngama tonga, erepa lemsûkao. Atema rangsoam lahma tonga,

¹²ngale atema mihnyan wathe ate mînpa Anania ngama hûlahma ate khohko dekma sahloat hokkoh diko atema jienkhe lahma thânkewah.”

¹³Ananias ma dânthâng wah, “Teso, ajahthem mihnyan ma are mihnyan junma nganâng thôkoh thang, ngale atema Jeroselem wah nang mihnyan hehnâng chenroh cheili chêmshiet eka erehehmin thôkohthang.

¹⁴Ngale atema Soam aroakte adong hehwah chaan keplahma Damaskas wah nangnâng soam atôte heh phangtang loatkhek rãng kaera.”

¹⁵Teso ma atenâng ngatwah, “Kao, chenrãngma ngako, atema nganâng soamtô rãng ngama lârentek, ngale Jews ledangte jat le lowang hehnâng erediko Isrial mihnyan hehnâng ngamîn jetthuk rãng lârentek.

¹⁶Ngale atema ngarãng chêmchohmin heh ngadedema atenâng ekhesok ang.”

¹⁷Ephumma Anania kalahma Sol tongeka humko luphokwah, ngale dekma atenâng sahloatwah. Atema ngatwah, “Enaa, Sol,” “Teso ma nga chienkat ehang - erepa Jisu ate dedema chienkat ehang, nang anâng katko lemko



nangdemnâng ate chohmîntho. Nangmit pumma ngakjienkhe ngale nangma Asâthôanju chohrăng nga chienkat ehang.”

¹⁸Lemlienma ngahra răngrăng Sol mitkowah jâritwah, ngale ephumma atema ngakjienkhe wah. Ephumma ate toanchep lahma baptijem kepwah;

¹⁹ngale atema phhekchhah chhah diko, chaan ngakchohwah.

Sol ma Damaskas nâng Joban Ngin Phoangthô

Damaskas wah putedâlemte heh demnâng Sol jâthe jâni răng johtông thienwah.

²⁰Atema Sanagog nâng tintin wăng lahma Jisu pa Joban Chha dângwah ngama thôkoh wah.

²¹Ate ngintatte heh phangtang barri lahma chhienwah, “Are mihnyan pa Jeroselem wah Jisu nâng soam atôte mihnyan heh phoang ritphetepa ledangne? Ngale anâng wah putedâlemte heh lokhhek lahma Soam aroakte adong heh tânâng ngaksietwên răng katwah ledangne?”

²²Phumma Sol ma Joban nginpa nyahrăng chaan demnâng thôwah, ngale atema Jisu pa Misaia ngama thôkoh eka nginko Damaskas wah Jews heh ate demnâng henjô tachhiakmîn ho.

²³Melâng rangwo lienchhoan diko, Jews heh roam chohmîn lahma Sol ritphe răng thômîn wah,

²⁴rohkomin thinma themawa ekapa Sol ma jetwah. Rangwo rangnyek thinma erehah wah loatchhoan pankâsek thongko ate ritphe răng bemtông wakwah.

²⁵Phumma jâthe rangpen nâng Sol demwah mihnyan heh ma phânâng seklahma panpolo pumma waangphe katlahma chhoanthuk wah.

Sol Jeroselem nâng Katwah

²⁶Sol Jeroselem nâng kalahma dijunte heh demnâng johdângrăng thônghun wah. Rohkomin thinma atea dijunte edangthem a ngama puteho, ngale phangtang ate rancheiwah.



²⁷Phumma Barabas ma atenâng chohsok wah, ngale atema moattat chhoante heh tânâng siethokwah. Sol ma lemko Teso chenroh danglahma khetah a, ngale Teso ma atenâng chenroh ngatah a ereheh Barabas ma thôkoh wah. Ngale Sol ma Jisu mînko Damaskas nâng chenroh lechei thangma thôkotah a erehehmin thôkoh wah.

²⁸Ephumma Sol thin demnâng johtong lahma Jeroselem phangtang nâng lechei thangma Teso mînko phoangthôwah.

²⁹Griik jabma jabte Jews heh demnâng min Sol roantangma phoangchiakmîn wah, phumma thinma ate ritphe rãng themawa wah.

³⁰Chenthu putedâlemte hehma Sol junma jetphumma, thinma Sol thin demnâng dangthuk lahma Kasaria nâng sietkatwah, ngale enângwah Tarsus nâng chienkatwah.

³¹Ngale ere sanpoatko Judia, Galili ngale Samaria wah Asâthem heh mêmoma dângwah. Ngale Asâthôn Juma chohsû lahma thin a putedâlem nâng rongtêngtêng dângwah, ngale Joban ranchei nungma sôngtôngdi putedâlemte heh jêngjah jêngjah rewah.

Piter, Lida ngale Jopa nâng

³²Piter chentô thenâng phoangkhoam wah, phumma jâthenâng Lida wah Joban mihnyan heh demnâng chohmîn rãng katwah.

³³Enâng atema mihnyan wathe ate mînpa Ainia ngama chohmîn wah. Ere mihnyan pa kôasô junko ate jupthinko pâesat lejien toanchep dângwah.

³⁴Piter ma ngatwah, “Ainia,” “Jisu Krista ma nang lâsen siettho. Toanchep lohma nang jupthin pa toanpe lohma khoakhem o.” Lemlienma Ainia tôanchep wah.

³⁵Lida le Saron wah sôngte mihnyan hehma Ainia khelahma thinmin Joban tânâng hokwah.

³⁶Jopa nâng dihiaknyu wathe ate mînpa Tabitha ngama dângwah, ngale atemin putedâlemte dângwah. (Griik jabma ate mînpa Dorkas dângwah, are



ngaeka pa “khehhe ngaeka.”) Ate roantangma moatlemsen moatwah ngale tangchhih hehnâng chîchohsok wah.

³⁷Phumma ere sanpoatko khunlahma ate ritwah. Ate mangpa soanphe lahma atok dângwah humko thienwah.

³⁸Jopa hahpa Lida hah kowah chentô letaang dângwah, phumma chenthu Jopa wah putedâlemte hehma Piter Lida hahnâng tonga ngama tatphumma, thinma ate tânâng wani mihnyan chienwênwah. Thinma, “Sitsiak nitânâng kamêngro,” ngama roowângwah.

³⁹Ephumma Piter thin demnâng johkatwah. Chenthu ate enâng hokkhoam phumma atok dângwah humko sietwênwah, ngale eko chentô janthoinyu heh ate tumlit khôanhok wah, ngale asep nungma Dorkas ma hînpoatko tektah khet heh phangtang atenâng khesokwah.

⁴⁰Piter ma phangtang erehum kowah chhoanthuk lahma atema dakuhtu lahma rangsoam wah; erediko mang tâko wãng lahma atema ngatwah, “Tabitha, toansat o!” Ephumma ate mitkanwah, ngale chenthu atema Piter chohkhe phumma, sattôngwah.

⁴¹Piter ma ate tânâng hehka lahma chohsatsiet wah. Erediko atema putedâlemte phangtang roowah, ereko janthoinyu hehmin johdângwah. Ephumma atema thinnâng Tabitha ahin khesokwah.

⁴²Are nginpa Jopa hah phangtang nâng khemtatwah, ephumma ajahthem mihnyan ma Teso nâng putedâlem wah.

⁴³Jopa hahwah ngemkhoanwah tembu hum hôante, ate mînpa Simon, ate demnâng melâng rangwo johtông thienwah.

Moatlem 10

Piter ngale Kornilas

¹Kasaria nâng mihnyan wathe ate mînpa Kornilas dângwah, atea, “Itali Regimen,” ngaeka Roman sipâhi heh kepten dângwah.



²Atea Joban rancheite mihnyan dângwah; ngale thinhumte tangkâ phangtang Joban nâng rangsoamte dângwah. Ate memin Jews tangchhih hehnâng nyahrâng chîchohsok wah, ngale roantang Joban nâng rangsoam lahma dângwah.

³Atema jâthe sanhêmthah wanrem sanpoatko thânkhwah, atema rangkethung wah Joban ngintatte chaang paangpaang kalahma atenâng, “Kornilas!” ngama roolahma thânkhwah.

⁴Atema chei nungma ngintatte ko thongsû lahma ngatwah, “Hethôte, arepa chennia?” Ngintatte pumma dânthâng wah, “Nang rangsoam ngale nangma mihnyan hehnâng chohsû eko demko Joban rinme eka, ngale atema nang rangsoam pa edânhangho.

⁵Ngale athângheh nangma Jopa nâng mihnyan chienkat lohma Simon Piter rooka thuk o.

⁶Atea jokah nâng songlahma ngemkhoan wah tembu hum hôante Simon humko tonga.”

⁷Erediko ngintatte pa ngakchhoan wah, phumma Kornilas ma ate humwah haa wanii ngale sipâhi wathe roowah, ere sipâhi pa Joban rancheite ngale atenâng chohsokte dângwah.

⁸Atema thinnâng phangtang thôko lahma Jopa nâng chienkatwah.

⁹Eredijâko, thin Jopa hahnâng hunemnem dângko, Piter rangngih mongtangko rangsoam rãng humkho nâng koatwângwah.

¹⁰Ate rêmrii lahma chenni komin phhekchhah hunwah; phumma aterâng phhekchhah khoakhêm thuko, atema thânkhwah.

¹¹Atema rangkethung laang lahma khewênwah, ngale chenni komin khadôngmõang sukbeliiko lolahma hahtokkhoh ko waangphe katlahma khewah.

¹²Ereko rongrup ngem heh dângwah, pû anyah, ngale wunwo hehmin dângwah.



¹³Phumma jabkhab pumma atenâng ngatwah, “Piter toanchep lohma areheh ritphe lohma phhek o!”

¹⁴Phumma Piter ma ngatwah, “Teso, areheh ngama phhekmek! Ngama niemarang junko achin heh chenthumin phhekmek.”

¹⁵Jabkhab pumma wienthe ngatwah, “Chenpa Joban ma asâ ngaeka ereko nangma achin neknga.”

¹⁶Arepa lôrem khesok diko rangkhethung nâng ngaktôan wênwah.

¹⁷Piter ma arepa chenni junko thânkhe ekanga ngama bârit poatko, Kornilas ma chienkattah mihnyan hehma Simon humpa chohlem lahma Simon hum thakho wah pankâsek thongko cheplahma dângwah.

¹⁸Thinma roolahma chhienwah, “Nang humko Simon Piter ngama mihnyan wathe tonga?”

¹⁹Ere thukomin Piter ma chenni junko thânkhetek a ngama thonghun lahma dângwah, phumma Juma atenâng ngatwah, “Tattan! Warem mihnyan ma nang lemsû eho.

²⁰Toanchep lohma jâkhoama kao, ngale thin demnâng lejohwâng nekdang, chenrãngma ngako ngama chienkat erâng.”

²¹Ephumma Piter jâkhoam kalahma mihnyan hehnâng thôkoh wah, “Nema lemeken mihnyan pa nga. Ne chenrãngma katwah a?”

²²“Kepten, Kornilas ma chienkat ehi,” ngama thinma dânthâng wah. “Atea mihnyansen, ngale Joban nâng rangsoamte mihnyan, ngale chentô Jews heh ate rancheieka. Joban ngintatte ma ate humnâng nangrookat rãng thôkoh wah, ngale, erohkoba nangma atenâng chenni thôkohthin tonga ereheh atema eta chohtat a.”

²³Piter ma ere mihnyan heh humkhen nâng roowên lahma erejâ rangpen pa jemthukwah. Eredijâko thin demnâng johwângwah; ngale Jopa hahwah putedâlemte heh wahmin ate demnâng khuthe johwângwah.



²⁴Eredijâko ate Kasaria hahnâng hokkhoamwah, eko Kornilas ma ate tang amang heh, ngale lemrusen heh demnâng roamlahma Piter bemlâwah.

²⁵Piter humkhen nâng lupwângrăng ngatko, Kornilas chohka lahma ate dathongko khupjup kalahma atenâng rangsoam wah.

²⁶Phumma Piter ma chepsiet lahma ngatwah. “Chep o,” “Ngamin mihnyan jôba.”

²⁷Piter humkhen nâng lupwâng nungnungko Kornilas ma atenâng thôkoh wah, phumma humkhen nâng wãng lahma jahmõang mihnyan khôn lahma khewângwah.

²⁸Atema thinnâng ngatwah, “Nededema senthemthem jet en, Jews heh dôrem niemarang junko Jews ledangte heh demnâng leroammin. Rohkomin Joban ma nganâng hennângjô niemarang junko achin lengamin ngama khesok ehang.

²⁹Ngale erohwah chenthu nangma ngaroorăng chienkat phumma ledân thangma wãngerâng. Thôkohhang, chenrăngma rooka thanga?”

³⁰Kornilas ma ngatwah, “Aretô thang sanpoatko jârem mako nga rangsoam lekma dângwah erepa nga humko sanhêmthah wanrem sanpoatko dângwah. Phumma nga mathahko khet phiakjaja keplahma mihnyan wathe chephokwah

³¹ngale atema ngatwah, ‘Kornilas! Joban ma nang rangsoam lâchohtattho ngale nangma mihnâng chohsok moatlem moeko pemin lâkthetho.

³²Jopa nâng mihnyan chienkat lohma Simon Piter rooka thuk o. Atea jokah nâng songlahma ngemkhoan wah tembu hum hôante Simon humnâng tonga.’

³³Phumma lemlienma nangroo rãng chienkatwah, ngale nang anâng wângpa nyahrâng lâsentah. Teso ma nangnâng chenni thôkoh rãng chien eho erepa chohtatrãng nikhu areko Joban mathahko bemeki.”

Piter ma Thôkoh



³⁴Piter ma loatjabwah: “Ngama arepa toangtang ngama athângheh jet ekang, Joban ma chentô nâng manthe hôanehi.

³⁵Henhenma ate ranchei lahma toangtang moatlem moeka ereheh chenrãngrãng jatjô medang akomin atema kepeka.

³⁶Atema Isrial mihnyan hehnâng ngin matchhoantah pa nemajet en, erepa Jisu Krista junma mêmô Nginkongsen phoangthô chhoanwah, atea chentôrãng Teso.

³⁷Jon ma baptijem kep ngin phoangthô diko, Galili nâng bengthun lahma Isrial diak phangtang nâng chenni dangtah a ereheh nemajet en.

³⁸Nema Nazarat wah Jisu pa ejet en ngale Joban ma atenâng Asâthôanju ngale chaan chenroh kohtah a erepemin jet en. Atema chentô nâng phoangchhoan lahma asenli heh moatwah, ngale chentô juchhahma loeka heh sensiet rewah, chenrãngma ngako Joban pa ate demnâng dângwah.

³⁹Atema Isrial diaknâng ngale Jeroselem nâng chentô motah a ereheh nimitma khelihma thôeki. Ngale thinma bãngphakko sema teklahehma rittekwah.

⁴⁰Rohkomin Joban ma jârem diko ritwah ngakhînsiet wah, ngale ngakhinwâng dikomin chohkhe thukwah,

⁴¹erepa chentô nâng khethuk tuho, rohkomin Joban ma renchhoan heh nângba khethukwah, erepa nima khewah, ate demnâng ritwah ngakhin dikomin aroamma jokphhek chhahtih.

⁴²Ngale atema ninâng nginkongsen pa mihnyan hehnâng phoangthô chhoankoh en ngama chien ehi ngale Joban ma atenâng ahînte ngale aritte heh rênrãng thieneka ngama thôchhoan kohrãng chien ehi.

⁴³Chentô mǒng hehmemin ate junma jabwah, thinma ngatwah, Jisu mîn chaanko henhenma atenâng putedâlem eka erehehmap chohmin.”

Jews Ledangte hehma Asâthôanju Choh



⁴⁴Piter ma nginthô thuko ate ngin jetatte heh phangtang khohnâng Asâthôanju katwah.

⁴⁵Jews jat putedâlemte Jopa wah Piter demnâng johkatak hehma Jews ledangte jat hehnângmin Joban ma Asâthôanju hinhô kohpa khelahma nyahrâng bâritwah.

⁴⁶Chenrângma ngako thinma jatjat jabma jablahma Joban nâng rôlahma tatwah. Phumma Piter ma loatjabwah:

⁴⁷“Are mihnyan hehmemin nima chohtih rângrâng Asâthôanju chohwak eka. Henma thinnâng baptijem nekkepen ngama tâjek tângmin a?”

⁴⁸Ephumma atema thinnâng Jisu Krista mîngo baptijem kepen ngatwah. Erediko thinma atenâng jâthe jânii johtong thienhi ngama roatsep wah.

Moatlem 11

Piter ma Jeroselem wah Asâthem hehnâng Thôkoh

¹Moattat chhoante ngale chentô Judia diakwah putedâlemte hehma ngale Jews ledangte hehmemin Joban jabkhab pa kep eka ngama chohtatwah.

²Chenthu Piter Jeroselem nâng katko, Jews ledangte hehma khoankhen niem hôanmin jôba ngama hunte hehma ngatwah,

³“Nanga khoankhen niem lehôte Jews ledangte humnâng hûeko, ngale thin demnâng roamphhek chhah eko!”

⁴Ephumma Piter ma thinnâng khebeng thuma chenroh bengdangtah a erehehma thunlahma phangtang thôkoh wah:

⁵“Chenthu ngama Jopa hahnâng rangsoam poatko, ngama thânkewah. Ngama chenni komin khadôngmông rangkho wah sukbeliiko lolahma waangphekat lahma thânkewah, ngale erepa nga tâko tângjek katwah.

⁶Ngama namwãng lekma akhennâng sûwêntek pa, humwah pem eki ngem angah, wunwah ngem angah, pû anyah, erediko wunwah wo hehmin khewah.



- ⁷Erediko nganâng ngalahma jabkhab tatwah, ‘Piter cheplohma areheh ritphe lohma phhek o!’
- ⁸Phumma ngama ngatwah, ‘Teso, ngama areheh phhekmek! chenthumin niemarang junko achin heh nga thunnâng mathat sekwên ekang.’
- ⁹Phumma rangkho wah jabkhab wienngak jabkatwah, ‘Chenpa Joban ma asâ ngaeka ereheh nâng nangma chenni nângjô achin neknga.’
- ¹⁰Arepa lôremrãng dângwah, ngale erediko chentôpa rangkethung nâng ngaktôan wênwah.
- ¹¹Ere sanpoatko Kasaria wah mihnyan warem ngaroorãng chienkattha heh nga tongtek humko hokwah.
- ¹²Juma nganâng letûngmaang thangma thin demnâng johwângrãng ngatwah. Jopa wah putedâlemte waerok pemin nga demnâng Kasaria nâng johwângwah, ngale nikhu phangtang Kornilas humnâng wãngtih.
- ¹³Atema rangwah Joban ngintatte ate humkhenko hongchep hûlahma khetah ngin heh ninâng thôkohthi, ngale atenâng, ‘Jopa wah Simon Piter roorãng mihnyan wah chienkat o ngama ngatah hehmin thôkohthi.
- ¹⁴Atema nangnâng ngin ethôkohho, ngale erejunko ne humte tangkâ heh kho epe en.’
- ¹⁵Ngale chenthu ngama thôkoh thuko, khema nâng chenroh nângkhoh nâng kathia ererãngrãng thinkhoh nângmin Asâthôanju katwah.
- ¹⁶Erediko Teso ma chenni ngatah a erepa ngama thônghun wah: ‘Jon ma joma baptijem koheka, rohkomin nenâng Asâthôanju ma baptijem ekohhên.’
- ¹⁷Nângma Teso Jisu Krista nâng putedâlem ko chohtih rãngrãng jôba Jews ledangte hehnângmin Joban ma hînhô koheka; phumma Joban nâng jektangte nga hen a!”
- ¹⁸Chenthu thinma are nginpa tatphumma, chhiakmîn pa jeklahma Joban nâng rôwakwah, “Eroh medang ako Jews ledangte hehnângmin Joban ma hunglitthuk lahma roandông koheka!”



Antiok nâng Asâthem

¹⁹Stifen ritphe poatwah chêmsiet sanpoatko putedâlemte phoanghuh chhoantah heh Fonika, Sipras, ngale Antiok lanhûroh chhoanwah, phumma thinma Joban nginpa Jews hehnâng lolo thôkoh wah.

²⁰Rohkomin Sipras ngale Kren wah putedâlemte ahan hehma Antiok nâng kalahma Jews ledangte hehnâng thôkat kohwah ngale, thinnâng Teso Jisu nginkongsen pa thôkoh wah.

²¹Teso chaanpa thin demnâng dângwah, ngale jahmõang mihnyan hehma putedâlem lahma Teso tânâng ngakhok wah.

²²Are nginpa Jeroselem wah Asâthem heh tânâng hokphumma thinma Barnabas Antiok nâng chienkatwah.

²³Chenthu ate kalahma mihnyan hehnâng Joban ma rangkoh pa kheka lahma ate nyahrãng khuhahwah, ngale Teso nâng thinhung arin phangtang kohlahma putedâlem rãng roatsep wah.

²⁴Barnabas pa nyahrãng mihnyansen dângwah, atenâng Asâthôanju min mênchong dângwah ngale nyahrãng putedâlem sen dângwah. Ephumma jahmõang mihnyan heh Teso tânâng siethokwah.

²⁵Erediko Sol lemsokrãng Barnabas Tarsus nâng katwah.

²⁶Atema Sol chohmîn lahma Antiok nâng sietwênwah, ngale rangpâ pântangma ateni Antiok nâng tôngwah. Roantangma Asâthem heh khôanhû lahma Barnabas le Sol demnâng chohmînwah ngale ateni ma thinnâng hethô wah. Antiok wah putedâlemte hehnâng Kristan ngama bengngatwah.

²⁷Ere sanpoatko Jeroselem wah Antiok nâng mông khuthe katwah.

²⁸Mông heh chhangwah wathe ate mînpa Agabas, Joban Ju chaanma toanchep lahma hahtokkhoh phangtang nâng rêmchhih hok lâhangtah ngama thôwah. (Erepa Kladias pa Chofa dâng sanpoatko hokwah.)

²⁹Phumma dijunte hehma henma chentô taeka eretô thinlemru Judia wah putedâlemte hehnâng matkat e ngama nginpat wah.



³⁰Thinma khôanse lahma ere ngunpa Asâthem hehnâng Barnabas le Sol nii deknâng matkatwah.

Moatlem 12

Ajah Chêmsiet

¹Ere sanpoatko Hirot Lowang ma Asâthem hehnâng bengchêmsiet wah.

²Atema, Jon naa Jems, dângma ritdoakwah.

³Are junko Jews heh khuhah lahma khe phumma atema Piter min loatkhekwhah. (Arepa wichhi lesak pheban phhek lokuh sanpoatko dângwah.)

⁴Piter lokhhek lahma phâtek nâng sekwhah, ngale sipâhi wabelili roamlahma khubeli nâng bemthukwah. Hirot ma Adankhoam lokuh râdiko nok atang mathahko sekhâm rãng thônghun wah.

⁵Erohwhah Piter phâtek nâng sekwhah, rohkomin Asâthem hehma Joban nâng ate rãngma nyahrãng hungkoh lahma rangsoam wah.

Piter Phâtek wah Laangphe

⁶Hirot ma nènep nok atang mako loatsietmin ngama ngat rangpenko, Piter abemte sipâhi wani tungko juplahma dângwah. Atenâng janru wannii ma khhek lahma dângwah, ngale phâtek nâng lupwângthin kowah pankâsek thongko abemte sipâhi heh dângwah.

⁷Lemlienma Teso ngintatte ereko hongchephû lahma eretheko wenphiak hôngphiak hokwah. Ngintatte pumma Piter nâng choakkhoko lolahma satsiet lahma ngatwah, “Sitsiak dango! Toanchep o!” Phumma lemlienma Piter dekwah janru heh jâritwah.

⁸Erediko ngintatte pumma atenâng ngatwah, “Nang roamdit pa dit o, ngale nang dapheng pa phengreo.” Phumma Piter ma eroh moatwah, ngale ngintatte pumma ngatwah, “Nang khetpa toanpoh lohma nga demnâng karoo.”



⁹Ngintatte pumma moeka pa linlin dangale dangmah a ere pejô lejet thangma Piter phâtek khenwah johloat chhoanwah; atema thânkheba rethem ekang ngama thônghun wah.

¹⁰Thinma khebwah bemte heh dankhoam lahma ere diwah bemte hehmin dankhoam lahma athôn wah hahdaang nâng loatkathin jankâsek tâko hokkatwah. Phumma jankâsekpa atedede laangjâ lahma loatchhoan wah. Ngintatte le Piter nii chuthe taangkhoam diko, ngintatte pumma Piter phethien lahma chhoanwah.

¹¹Erediko Piter ma atenâng chenni dangeka erepa jetrii lahma ngatwah, “Ade phumma arepa linlin ngama lâjettek! Teso ma nga Hirot wah pepângrâng ngale Jews mihnyan hehema themawa eka hehwah pepângrâng ate ngintatte chienkat era.”

¹²Piter ma linlin loatchhoantek ngama jetrii lahma Jon Mak nyong Mariam humnâng wângwah, ereko ajahthem mihnyan khôn lahma rangsoam wah.

¹³Piter ma rangsâma kâsekko rahkôngwah, phumma janchhônnya haa wathe ate mînpa Roda kâseklaang râng katwah.

¹⁴Atema Piter kahrâpa jin lahma nyahrâng khuhah nungma kâsek lelaang thangma ngakchhoan wângwah, ngale atema Piter rangsâko cheplahma tonga ngama thôkoh wah.

¹⁵Thinma atenâng ngatwah, “Nanga apa rekoa!” Phumma atema arepa linlin ngama chaanritwah. Ephumma thinma ngatwah, “Arepa ate ngintatte tadanga.”

¹⁶Ere thukomin Piter ma kâsekko rahkong lahma dângwah. Athônko thinma kâsekpa laangka lahma Piter chohkhe wah, ephumma thin bârit rewah.

¹⁷Piter ma thinnâng nektin en ngama dekma thakkohwah, ngale Teso ma phâtek khenwah ate chhoanroh loatsiettah a ereheh thinnâng thôkoh wah. Atema thinnâng ngatwah, “Arepa Jems le putedâlemte ahan hehnâng thôkoh en,” erediko thintâwah loatchhoan lahma thehan nâng chhoanwah.



¹⁸Rangkhahko Piter nâng chenni dangeka ngama phâtek bemte heh nyahrâng mokritwah.

¹⁹Hirots ma Piter lemrâng chienwah, rohkomin thinma chohlemho. Ephumma Hirots ma abemte sipâhi heh sekhamwah, ngale erediko bemte heh ritphe thukwah. Arediko Hirots Judia wah Kasaria nâng kalahma poatthe tângkatwah.

Hirots Rit Ngin

²⁰Tair le Sidon wah mihnyan heh demnâng Hirots nyahrâng rinkhah wah, ephumma enângwah mihnyan khuthe roamlahma ate demnâng chohmînông hokwah. Khebeng khoko thinma Hirots humbemte Blastas demnâng bengjetmîn wah, ephumma Blastas ma thinnâng chohsok wah. Erediko Hirots tânông wângwak lahma nomerông roatsep wah, chenôngma ngako thinma phhekchhah pa Lowang Hirots diakwah chohwah.

²¹Jâthe rangwo khônawak lahma Hirots ma lowang khet keplahma lowang tângthinko tonglahma mihnyan hehnông thôkoh wah.

²²Phumma erekowah mihnyan hehma, “Arepa mihnyan ma jab dangmah, Joban ma jabeka!” ngama rakwah.

²³Phumma lemlienma Teso ngintatte ma Hirots loangwatwah, chenôngma ngako atema Joban mîn dongthukmah. Erediko dongma phheklahma ritwah.

²⁴Phumma ere sanpoat komin Joban jabkhab pa jêngjah jahchhoan ngale jêngdong dongwông rewah.

²⁵Barnabas le Sol niima thin moatlem heh tamo lahma Jeroselem wah Jon Mak thin demnông sietlahma ngakwông wah.

Moatlem 13

Barnabas ngale Sol Nii Renlahma Chienchhoan

¹Antiok wah Asâthem hehnông mông ngale hethôte heh roanche dângwah: Barnabas, Simon (ngale atenông mangnyekjat ngamemin roowah), Lukius (atea Kren wah), Manan (atea Govono Hirots demnông aroamma humthewah roamdông aloatwah), ngale Sol.



²Chenthu thinma lephhek lechhah thangma Teso nâng rangsoam poatko, Asâthôanju ma thinnâng ngatwah, “Barnabas ngale Sol nii, ngama moatlem moatthukrăng rootek heh moatrăng reethien en.”

³Thinma lephhek lechhah thangma rangsoam wah, ngale thindekpa ateniî khohko lolahma rangsoam kolahma chienchhoan wah.

Sipras nâng

⁴Asâthôanju ma chienchhoan lahma Barnabas le Sol nii Seliuka nâng katwah, ngale enângwah jogari ma jotung wah Sipras hahnâng katwah.

⁵Chenthu thin Salami hahnâng hokko, thinma Joban jabkhab enângwah Sanagog nâng thôkoh wah. Ateniî nâng chohsok răng Jon Mak min ateniî demko dângwah.

⁶Thinma jotung wah hahpa danlahma Pafos hahnâng katwah, enâng thinma mông ngama phoangthôrii lahma jâdu jette Jews mihnyan atemin pa Bar - Jisu chohmînwah.

⁷Atea ere jotung wah hah Govono Serges Paulas lemruçha dângwah, ngale Govono pa nyahrăng jet ajien dângwah. Phumma Govono pumma Joban ngin jettat hunlahma Barnabas le Sol nii ate tâko roowah.

⁸Rohkomin jâdu jette Ilimas ma ateniî lelatnâng danglahma jektâng wah (arepa Bar - Jisu nâng Griik jabma mîn lahma dângwah), ngale Govono ma Jisu nâng putedâlem pa atema jeksietrăng phungwah.

⁹Erediko Sol - ngale atenâng Pol ngamemin roeeka - atenâng Asâthôanju mênchong dângwah; atema jâdu jetteko thongsû lahma

¹⁰ngatwah, “Nanga joakchha! Nanga rongrup asenli heh ran. Nangnâng rongrup buthi mongthem chhih heh tongho, ngale roangtang nangma Teso toangtang nginpa mothô khoanglep răng litdângthuk hun eko!

¹¹Athângheh Teso ma nangnâng ewat ho; ngale nanga poatthe răng mitdoak lohma chenjô lekhemin ngale rangwo phiak pejô lekhe edango.” Phumma lemlienma Ilimas mitpa nyekjâwah, ngale henma komin ate dekko lolahma phoangsiette lêm tumlit phoangkhoam wah.



¹²Phumma Govono ma erepa khelahma putedâlem wah; ngale Teso ngin hethôeka heh tatlahma nyahrãng bâritwah.

Pisida wah Antiok nâng

¹³Pol le ate lemru heh Pafos wah Pamfalia diakwah Perga hahnâng jogari ma katwah, enâng Jon Mak phethien lahma Jeroselem nâng ngakkat wah.

¹⁴Thin Perga diaknâng hokwah ngale Pisida wah Antiok hahnâng hokwah, ngale Pientông jâko Sanagog nâng wãngwak lahma johtông wângwah.

¹⁵Mosa Niemarang ngale mông hehma raangwah hehwah loatweih diko, Sanagog wah Sahhabwa pumma thinnâng chhienkat thukwah: “Lemruchha heh, nememin mihnyan hehnâng chenni komin rîn akhahthin metong hênko tarîn en.”

¹⁶Phumma Pol toanchep lahma ate dekma hakkat lahma loatjabwah: “Ngapho anaa Isrial heh ngale chentô Jews ledangte arekawah Joban nâng soam atôte heh: Ngangin jetat tanha!

¹⁷Isrial mihnyan heh Joban pumma nãngte nãngwa heh Igip nâng mihdiakte danglahma sông poatko renlahma jet ajien thukwah. Joban ma ate chaanma Igip wah loatsietchhoan wah,

¹⁸ngale atema rangpâ roakbelii thin demnâng hungmôngsiet lahma dangwah sehakhô nâng.

¹⁹Atema Kanan hah wah diak engit chhihsiet lahma erediak heh ate mihnyan hehnâng kohwah.

²⁰Are chentôpa 450 rangpâ khenko dângwah. “Arediko atema thinnâng mông Samoel sanpoat tôko lândangroh hah pête kohlahma pênthukwah.

²¹Ngale chenthu thinma lowang thâ phumma, Joban ma thinnâng Benjamin jatwah Kish chha Sol rangpâ roakbelii rãng thin Lowang dângthukwah.

²²Sol Lowang wah rephe diko, Joban ma thin Lowang rãng Devit lithôan wah. Joban ma ate junma aroh jabwah: ‘Ngama Jisi chha Devit pa nga hungma



lem ekang rãngrãng mihnyan lâchohtek, ngama atenâng chenni moathuk hun ekanga ereheh phangtang atema emoa.’

²³Joban ma toamsem tah rãngrãng atema Isrial mihnyan heh Pângte rãng Devit pôali wah Jisu dangthuk eka.

²⁴Jisu ma ate moatlem moatmako, Jon ma chentô Isrial mihnyan hehnâng pap wah hungngaklit letma baptijem kepen ngama phoangthô kohwah.

²⁵Ngale Jon ma ate moatlem heh tâmoat nemnemko, atema mihnyan hehnâng ngatwah, ‘Nema nga a hen edanga ngama thonghun eha? Nga nema bemla ekenpa dangmek. Rohkomin nga nginpa jetat tanha! Atea ngadiko ekara, ngale nga ate daphâng putkührãng jômin punmek.’

²⁶“Ngapho anaa Isrial mihnyan heh, Abraham chhuchha heh, ngale chentô Jews ledangte Joban nãng soam atôte heh: Are khope nginsen pa nãngkhu nãng thôhok kohwah!

²⁷Chenrãngma ngako Jeroselem wah sôngte mihnyan, ngale thin khhepho phannang hehma atea nãng Pângte ngama jetmah, ngale Joban pientôngjâ roakweih mônggeh jabkhab weihwak eka hehmin jetmah. Rohkomin thinma Jisu ritphe lahma mônggeh jabkhab pa toangtang dangthuk eka.

²⁸Ngale thinma Jisu lânrit pheroh chennângjô thelahma lechohlo medang akomin, thinma Jisu ritphe rãng Pilat nãng chienwah.

²⁹Ngale Joban nyapraangma ate junma chentô jabtah heh thinma moatdiko, thinma bãngphak kowah jâtoan lahma mangruk nãng rukatwah.

³⁰Rohkomin Joban ma ritwah ngakhinsiettah,

³¹ngale melâng rangwo ate demko Galili wah Jeroselem nãng johwângte heh tânâng hongloattah. Ere mihnyan hehma athânggeh ate ngin pa Isrial mihnyan hehnâng phoangthôkoh eka.

³²⁻³³Ngale nima nenâng nginkongsen pa thôhû koheka: Joban ma nãngte nãngwa hehnâng chenni moatkoh rãng toamsem tah a erepa thin pôali Jisu pa ngakhinsiet lahma athânggeh atema nãngrãng mokoh ehi. Rangsoamsê



titab khedi kowah ko aroh raangeka, ‘Nanga nga Chha; thejâ nga nang Wa lâdangtek.’

³⁴Ngale ate ritwah ngakhin eka le mangruk nâng lesânjâ dangeka heh junko Joban ma aroh jabwah: ‘Ngama nangnâng alinlin asâthôan rang ekoh e, erepa ngama Devit nâng toamhôn wah.’

³⁵Atema rangsoamsê titab ahan nângmin jabeka: ‘Nangma nangnâng toangtangma putedâlemte haapa mangruk nâng lesânjâ thukmin.’

³⁶Chenrãngma ngako Devit ma Joban moatlem heh ate roandông poatko motah, ngale erediko riilahma, ate te awa heh demnâng johbîn katwah, ngale ate mangpa mangrukko sânjâwah.

³⁷Roh-komin Joban ma ngakhinsiettah Jisu pa mangrukko sanjâho.

³⁸⁻³⁹Ngapho anaa Isrial mihnyan heh nekhu phangtangma arepa senthemthem jet en, Jisu junma nenâng pap dângwah map chohngin pa thôkoh eka; ngale nema arepa jet en, henhenma atenâng putedâlem eka ereheh Mosa Niemarang ma leta pesiet dangtah heh phangtang wah pesiet eka.

⁴⁰Erohwhah jetletma tongen, mông hehma jabtah nginpa nekhoh nâng nekchenchat ehèn:

⁴¹‘Sûtan en, Joban rãngma chhihjabte heh! bârii letma erii en! Chenrãngma ngako thejâ ngama chenni moekanga erehehnâng nema lepute min, mihmejô methôkoh hèn komin nema putemet!’ ”

⁴²Phumma Pol le Barnabas nii Sanagog kowah ngakchhoan ko, mihnyan hehma ahokminwah Pientôngjâ komin ngakhû letma arerãngrãng ngin heh thôhû kohhi ngama roatsep wah.

⁴³Mihnyan heh phanchhoan diko, Pol le Barnabas nii erediko Jews heh ngale Jews ledangte Judiejem rãng litdângwah heh jahmông junkhoam wah. Moattat chhoante hehma Joban mînchenchaan pa roantang kepletma tongen ngama thôkoh wah.



⁴⁴Eredijâ kowah Pientông jâko erehah wah mihnyan heh phangtang Teso jabkhab pa jetatrăng hokwah.

⁴⁵Chenthu Jews heh ma mihnyan heh khe phumma thinma mitchekwah; ngale Pol ma thôeka ngin heh junma ate demnâng chhiakmîn lahma Pol nâng dûmmek wah.

⁴⁶Rohkomin Pol le Barnabas niima lechei thangma jêngjah jâthô thôkoh wah: “Khebeng thôanko Joban jabkhab pa nenâng bengthôkoh pa alemthôn dângwah. Rohkomin nema erepa lekep dâng phumma, ngale roantang roanjêng roandông lehun dâng phumma, nima nenâng lethôkoh thangma Jews ledangte hehnâng thôhûkoh eki.

⁴⁷Chenrăngma ngako Teso ma ninâng aroh moatrăng thôkoh ehi: ‘Ngama nanga Jews ledangte heh wenphiak rãng hôaneki, erejuko hahtokkhoh kowah heh phangtang khope min.’ ”

⁴⁸Chenthu Jews ledangte heh ma are nginpa tatphumma thinma Joban nginko rôwakwah; ngale henhenma roantang roanjêng roandông chohrăng rentah a erehah putedâlemte rãng dângwah.

⁴⁹Teso jabkhab pa erediak phangtang nâng chohtatwah.

⁵⁰Phumma erehah wah Jews heh ma khhepho phannang heh erediko jews ledangte jat dihiaknyu hahdaang niemarang juko adongjat heh Jews heh ma chepsietwah. Phumma thinma Pol le Barnabas nii nâng chêmsiet lahma erehah kowah sietphe chhoanwah.

⁵¹Moattat chhoante heh ma thin dawah bumheh enângwah mihnyan heh lelatnâng finekthien lahma Ikoniem nâng katwah.

⁵²Antiok wah putedâlemte heh nyahrăng khuhah nâhah dângwah, ngale thinnâng Asâthôanju mênchong dângwah.

Moatlem 14

Ikoniem nâng



¹Ererãngrãngjô Ikoniem nângmin dângwah: Pol le Barnabas nii Sanagog nâng hûlahma thinnâng thôko lahma Jews ngale Jews ledangte heh phangtang putedâlemte rãng litjâ wah.

²Rohkomin lepute dâlemte Jews hehma Jews ledangte heh chepsiet lahma putedâlemte heh lelatnâng dângwah.

³Enâng moattat chhoante heh melâng rangwo tângthienwah, thinma chenni ranjô lechei Teso nginpa phoangthôwah, ngale ate mînchênchaan ngin thôeka pa toangtang ngama jetthuk rãng thinnâng patritli ngale bâritli moatlem heh moatthukwah.

⁴Erehah kowah mihnyan heh phanjâ wakwah: Khakapa Jews heh demnâng dângwah, ngale khakapa moattat chhoante heh demnâng dângwah.

⁵Erediko Jews ledangte ngale Jews heh thin khhepho phannang heh demnâng roamlahma moattat chhoante hehnâng chêmthuk ngale longma ritpetrãng thômîn wah.

⁶Chenthu moattat chhoante hehma erengin pa leptat phumma erehah kowah huhchhoan lahma Likonia wah Listra le Dirbi erediko erehah kêanâ hahnâng katwakwah.

⁷Enângmin thinma Nginkongsen pa thôkoh wah.

Listra ngale Dirbi

⁸Listra nâng achhatmejû dakò chha lahma chenthumin lethat jienkhoamte mihnyan wathe dângwah.

⁹Atemin eretheko tonglahma Pol nginpa jettat lahma dângwah. Ngale Pol ma ere mihwa pumma Joban ma tasensiet hang ngama putedâlem pa khelahma, atenâng thongthong sokkatwah

¹⁰ngale chaanmõang raklahma ngatwah, “Toanchep lohma nang dapa chen o!” Ephumma mihwa pa toangchep lahma tumlit phoangkhoam wah.



¹¹Chenthu Pol ma moeka pa mihnyan hehma khe phumma, thin Ikoniem jabma, “Joban pa mihnyan rãngrãng danglahma nãng tâko kaera!” ngama rakwakwah.

¹²Thinma Barnabas nãng Zius ngama mînwah, ngale Pol nãng Hirmis ngama mînwah, chenrãngma ngako atea Nginkongsen thôte hehwah adongthôn dangwah.

¹³Zius joban rangsoamhum pa hahdaang panlienke dangwah, phumma erekowah soam aroakte pumma hahdaang pankâsek thongko mânpong ngale chongpô heh keplahma hokwah, chenrãngma ngako ate ngale mihnyan hehma moattat chhoante hehnâng soam aroak rãng hunwah.

¹⁴Chenthu Barnabas le Pol niima mihnyan hehma themawa ekapa tatphumma, ateni khet heh koakphe lahma mihnyan heh chhangko raklahma chhoankat wah,

¹⁵“Nema chenni re eken a? Nimin nerãngrãng mihnyan jôba! Nia ako nekhu nãng Nginkongsen pa thôko lahma, nekhuma ledangli moatlem moeken kowah ahîn Joban, ngale rangkethung, hahtokkhoh, josi, ngale josi khenwah chentô hôante Joban tânâng ngaklitsiet hokrãng netânâng hûeri.

¹⁶Khemako atema chentô mihnyan hehnâng mâmâ hungsiko dangthukwah.

¹⁷Rohkomin atema roantangma nga a ahin ngama moatlemsen molahma khesok eka: atema nenâng rangkho wah rangpat patthuk era ngale too achhah heh amun sanpoatko munthuk eka; atema nenâng phhekchhah kohlahma nehung nãng khuhahthuk ehèn.”

¹⁸Moattat chhoante hehma mihnyan hehnâng are ngin heh thôkoh nungnung komin mihnyan hehma ateni nãng soam aroak hokpa achaanma mamjek tângwah.

¹⁹Jews khuthe Pisida diak Antiok hah ngale Ikoniem wah hokwah; thinma mihnyan heh thin demnâng rusiet lahma Pol nãng longma petwah, ngale riitah ngama thonghun lahma thinma hahdaang wah panlien nãng sietphekat wah.



²⁰Phumma chenthu putedâlemte heh ate tumlit khôanchep hokphumma ate toangchep lahma hahdaang nâng ngakwâng wah. Eredijâko Barnabas enii Dirbi hahnâng wângwah.

Syria Diakwah Antiok hahnâng Ngakhok

²¹Pol le Barnabas niima Dirbi nâng Nginkongsen pa phoangthô kolahma melâng mihnyan heh dijunte rãng dângthukwah. Erediko thin Lastra, Ikoniem, ngale Pisida wah Antiok nâng ngakwâng wah.

²²Pol le Barnabas niima putedâlemte hehnâng toangtang dangletma rongtêngtêng putedâlem rãng rîn akhah wah. Thinma hethô wah, “Nângma ajahthem chêmchei heh dannekthien lihma Joban Hahsông thenâng wângmin.”

²³Thinma chentô Asâthem hehnâng khhepho phannang heh renthien rewah, ngale lephhek lechhah thangma rangsoam lahma ere mihnyan heh, thinma tok anaa eka Teso deknâng chohkoh wah.

²⁴Thinma Pisida diak pa dankhoam lahma Pamfalia nâng katwah.

²⁵Thinma Pirga nâng nginkongsen pa thôthien lahma Atalia nâng katwah,

²⁶ngale enângwah Antiok nâng jogari ma ngakkat wah, erethepa thinma tamo lahma Joban deknang ate mînchenchaan ma chensû chenrea ngama kohthien wah.

²⁷Chenthu thin Antiok nâng hokko, thinma Asâthem heh khôansiet lahma Joban ma thin demnâng chentô motah a erengin heh phangtang thôkoh wah, ngale Jews ledangte hehma putedâlem rãng Joban ma chenroh lemlaang kotah a erengin hehmin thôkoh wah.

²⁸Ngale enângwah putedâlemte heh demnâng thin rangwolo tôngthienwah.

Moatlem 15

Jeroselem nâng Ngoangthun



- ¹Judia wah Antiok nâng mihnyan heh khuthe hûlahma putedâlemte hehnâng, “Mosa Niemarang junko nema khoankhen niempa lehôn kenko kho lepemin,” ngama hethô wah.
- ²Pol ngale Barnabas nii are junko ereheh demnâng nyahrâng chaanchhiakmîn wah, ephumma Pol le Barnabas ngale Antiok wah mihnyan khuthe Jeroselem nâng wãng lahma moattat chhoante heh demnâng erejunko thômîn wah.
- ³Thin lemko Asâthem heh ma sênkatwah; ngale thin Fonika ngale Samaria ma danka lahma Jews ledangte chenroh Joban nâng putedâlemte rãng dangeka erengin heh thinnâng thôthien kohwah; Are ngin pa tatlahma chentô putedâlemte heh nyahrâng khuhah nâhah dângwah.
- ⁴Chenthu thin Jeroselem nâng hokphumma, Asâthem heh ma, moattat chhoante, erediko khhepho phannang heh ma khuhah nâhah tângroo wah, ngale thinjunma Joban ma chentô moatlem motah a ereheh thinnâng thôkoh wah.
- ⁵Phumma Farasi jatwah putedâlemte wathe toanchep lahma ngatwah, “Jews ledangte heh ma khoankhen niempa hânmin, ngale thinnâng Mosa Niemarang pa keprâng thôkohmin.”
- ⁶Moattat chhoante ngale khhepho phannang heh are nginpa phênthômîn rãng khônawakwah.
- ⁷Ajahthem lekchiakmîn diko Piter toanchep lahma ngatwah, “Lemruchha heh, nemajet, melâng rangpâ mako, nekhuchhang wah Joban ma nga Jews ledangte hehnâng Nginkongsen pa thôchhoan kohrâng renwah, erohwah thinma chohtat lahma putedâlem wakeka.
- ⁸Ngale anga nga hung arin lepjetta Joban pumma nãngnâng kohthi rãngrãng atema Jews ledangte hehnângmin Asâthôanju kohlahma kepeka.
- ⁹Atema thin ngale nãngkhu tungko chenjô mâmâ hânmahhi; atema thinpap heh map koheka chenrãngma ngako thinmemin putedâlem eka.



¹⁰Ephumma nema Jews ledangte putedâlemte hehnâng nãngte nãngwa hehmemin ngale nãngdede memin letahenli hênlihpa henthuk letma Joban nãng chenrãngma thatsü eken a?

¹¹Eroh dangmah! Teso Jisu mìnchenchaan ko putedâlem lihma nãng khope eki rãngrãng jôba thin khomin pe eka.”

¹²Barnabas ngale Pol niima Jews ledangte heh tânâng Joban ma patritli ngale bâritli moatlem chentô motah heh thôkoh phumma mihnyan heh phangtang kihchepchep tóngwah.

¹³Chenthu thinma thôkoh diko, Jems ma loatjabwah: “Nga lemruçha heh, nganâng jetat tanha!

¹⁴Joban ma Jews ledangte hehnâng hunlahma atenâng putedâlemte mihnyan rãng chenroh kepeka ereheh Simon ma arohroh nãngnâng lâthô kohthi.

¹⁵Mõng heh jabpa areheh demko toangtang dangeka. Joban nyapraangma aroh ngaeka,

¹⁶‘Teso ma ngaeka, Arediko, nga engak karâng, ngale Devit Hahsông pa engak khôansiet ang. Ngale chhihjá rekapa ngama ngakhôan lekma amãnmãn engak rôngsiet ang.

¹⁷Ngale chentô mihnyan jat apat heh ngatânâng ehûra, ngale Jews ledangte jat ngadede mihnyan rãng chentô rootek hehmin ehûra.

¹⁸Arepa Teso ma jabeka, ngale atema areheh khema thuma jetthukwah.’

¹⁹Jems ma thôkoh wah, “Ngama thonghun junko, Jews ledangte Joban tânâng hunglit lahma hokte hehnâng nãngma lechêm thukmin.

²⁰Erenoma, moangachang nãng kohwah phhekchhah, chenpa nãngniem junko achin ngaeki heh nekphhek chhah en ngama sitiwah raange; ngale dihiak dela tungnâng kaamchhih moatte, ngale bohkorep lahma ritphewah ngemheh lephhekrãng, erediko hei lephhekrãng sitiwah raange.



²¹Chenrãngma ngako Mosa Niemarang pa chenthu thuma Sanagog nãng Joban pientôngjã roakweih loatweihwah, ngale ate Jabkhab pa chentô hahdaang hehnãng phoangthôwah.”

Jews Ledangte hehnãng Siti raang

²²Erediko moattat choante ngale khhepho phannang heh, ngale Asãthem heh phangtang roamlahma thinkhuchhang wah Pol le Barnabas nii demnãng Antiok nãng chienkatrãng thômîn wah. Thinma putedãlemte hehmi nyahrãng senchoh mihnyan wanii rênwah, erepa Juda atenãng Barsabas ngamemin roowah, erediko Silas nii renwah,

²³ngale are sitipa raang lahma thinnãng matkatwah: “Ni, moattat choante ngale khhepho phannang heh, ngale nekhu pho anaa hehmi Antiok nãng, Syria, ngale Kilikia wah Jews ledangte hehnãng salem matkat eka.

²⁴Nima chohtat eki, nikhu tâwah mihnyan khuthe hûlahma nenãng nyahrãng hungke thuk lahma chêmthuk ehèn ngama; rohkomin nima thinnãng aroh moatrãng chienmih.

²⁵Ngale erohwah nikhu thômîn lihmi phangtang hungjut lihmi netãnãng nginmatte chienkatrãng thômîn eki. Thin a nangpho Barnabas ngale Pol nii demnãng ekawakra,

²⁶Pol le Barnabas niima thin roandôngpa Teso Jisu Krista moatlem moatrãng lâkohtah.

²⁷Ngale nima Juda ngale Silas niimin netãnãng chienkat erii, nima are sitiko raang ekipa thinmi nenãng phoangphoang hûlahma ethôkoh hèn.

²⁸Asãthôanju erediko ni jutlihmi are alemli niemarang heh leko lihân henlih nenãng lelê hènthuk turãng thonghun eki:

²⁹Moangachaang nãng kohwah phhekchhah nekchhah en; hei nekphhek en; bohko replahmi ritphewah ngem nekphhek en; dihiak dela kaamchhih nekmo en. Nema arerãngrãng heh lemo medan enko nerãngma asen edanga. Asen tuta chendangen.”



³⁰Nginmatte heh chienchhoan lahma Antiok nâng katwah, phumma thinma putedâlemte heh phangtang khôansiet lahma thinnâng sitipa chohkoh wah.

³¹Chenthu mihnyan hehema sitipa weih phumma, hungdôngli ngin heh chohweih waklahma khuhah nâhah dângwah.

³²Juda le Silas niimin mông dângwah, phumma thin demnâng nyahrâng lekjabmîn lahma rîn akhah wah.

³³Thin demnâng poatthe tôngthien diko putedâlemte hehema Juda le Silas nii khuhah nâhah sênchhoanwah, ngale atenii chienkatte heh tânâng ngakwâng wah.

³⁵Pol le Barnabas nii melâng rangwo Antiok nâng tôngthienwah ngale mihhan ajahthem heh demnâng roamlahma thinma Teso nginpa phoangthô lahma hethô wah.

Pol le Barnabas Phanmin

³⁶Jâthe jâni dinâng Pol ma Barnabas nâng ngatwah, “Chentô hahdaang hehnâng nângma Teso ngin phoangthô kotih putedâlemte heh tânâng, ngakchhoan lihma chenroh songtong eka heh phoangsû chhoan e.”

³⁷Phumma Barnabas ma thin demnâng Jon Mak johsietchhoan hunwah,

³⁸rohkomin Pol ma Jon Mak johsietchhoan pa senmah ngama thônghun wah, chenrângma ngako, khebengko Jon Mak thin demnâng lemra laangriri lejohkhoam thangma atenii Pamfalia nâng phethien lahma ngakchhoanwah.

³⁹Phumma atenii nyahrâng chaanchhiakmîn lahma phânmînwah: Barnabas ma Mak sietlahma Sipras nâng katwah,

⁴⁰Pol ma Silas sietlahma chhoanwah, phumma Antiok wah putedâlemte hehema Teso deknâng chohkoh lahma chienchhoan wah.

⁴¹Atea Siria ngale Kilikia ngenâng katwah, ngale enângwah Asâthem hehnâng chohsok katwah.

Moatlem 16

Pol le Silas Nii demnâng Timothy Johchhoan



¹Pol Dirbi le Listra ngenâng katwah, phumma ere ngenâng Kristan mihnyan wathe Timothi ngama songlahma dângwah. Ate nyong min Kristan dângwah, rohkomin atea Jews dângwah, phumma ate wapa Griik dângwah.

²Listra ngale Ikoniem wah Kristan mihnyan hehma Timothi asen ngama thôwah.

³Phumma Pol ma Timothi ate demnâng johsietchhoan rãng hunwah, erohwah atema Timothi nâng khoankhen niem hôankohwah. Chenrãngma ngako enângwah sôngte Jews phangtangma Timothi wapa Griik ngama jetphumma Pol ma Timothi nâng khoankhen niem hôankohwah.

⁴Thinma sumhah heh dânhôamko moattat chhoante le khhepho phannang hehma Jeroselem nâng pattah niemarang heh chentô Asâthem hehnâng phoang hethô wah, ngale ere niemarang heh kepletma tongen ngama phoangthô kohwah.

⁵Erohwah Asâthem heh putedâlem nâng jêngdong dongwãng ngale jêngsen senwãng dângwah ngale putedâlemte hehmin jêngjah jêngjah rewah.

Tros Hahnâng: Pol ma Thânkhe

⁶Asâthôanju ma Asia diak ngenâng Joban nginkongsen pa lethôthuk dâng phumma thin Phergia le Galatia ngenâng katwah.

⁷Chenthu thin Mysia jatrii nâng hokphumma, thinma Bithania diak ngenâng wângrãng phungwah, rohkomin Jisu Juma thin enâng wãngthuk ho.

⁸Ephumma thin dekchah ngema Mysia hah dankat lahma Tros nâng katwah.

⁹Erejâ rangpenko Mesidonia wah mihnyan toanchep lahma atenâng rosep kalahma Pol ma thânkewah, “Mesidonia nâng wãnglohma ninângmin mamchohsû wãng mêngi!”

¹⁰Pol ma erepa thânkhe rienrien ni Mesidonia nâng wângrãng cheplihma loatchhoan wah, chenrãngma ngako nima enângwah mihnyan hehnâng Joban Nginkongsen thôkohrâng Joban maroo ehi ngama jetwah.

Filipien Hahnâng: Lidia Hunglit



¹¹Tros wah jogari ma chhoan lihma Samothrace nâng tintin katwah, ngale eredijâko Niepolis nâng katwah.

¹²Erekowah ni Filipien nâng katwah, Filipien pa Mesidonia diak kowah khebeng thôn Distik ngale alemthôn hah dângwah; ngale are hah pa Roman mihnyan heh sôngthin hah dângwah. Phumma eretheko ni melâng rangwo tôngthienwah.

¹³Pientông jâko josikah nâng Jews heh khôn lahma rangsoam thinthe etongthem a ngama thonghun lihma ni josi kahnâng katwah. Phumma erethe kowah dihiaknyu khôantongtah heh demnâng johtong kalihma thin demnâng thômîn wah.

¹⁴Thinkhuchhang wah ni nginkepte pa Thiatira hahwah Lidia dângwah, atea khethek sengte dângwah. Atea Joban linlin nâng soam atôte dângwah, ngale Pol ma thêka nginpa jetatrâng ate hung Teso ma laangkohwah.

¹⁵Atema ngale ate hum wah mihnyan hehma baptijem kepdko, Lidia ma ate humnâng ni roowah, “Nema nganâng linlin Teso nâng putedâlemte ngama methonghun theko nga humnâng tongwângren.” Ngale thinhumnâng wângrâng atema ninâng roatsep wah.

Filipien Hah wah Phâtek nâng

¹⁶Jâthe ni rangsoam thinnâng katko janchhônnya wathe atea mihhaa dângwah erepa chohmînwah, phumma atema juchhih ngewah chaanchoh lahma khediko chenni dângmin a erengin heh jienthôn lahma dângwah. Atema khediko dângwângmin ngin heh phoangthôn kolahma ate tângte râng ngun akem heh jahmông chohbi kohwah.

¹⁷Ere janchhônnya pa raklahma Pol le Silas nii diko junkhômawah, “Are mihnyan niia achoang thônawah tângte Joban haa! Ate niima nekhû chenroh khope min a erengin heh thôkoh ehèn!”

¹⁸Janchhônnya pumma Pol khoan lânpunroh are nginpa melâng rangwo râng phoangjabwah, Phumma Pol nyahrâng khoanpun lahma litphong lahma ere juko ngatwah, “Jisu Krista mînko ngama nangnâng are janchhônnya kowah



loatchhoan o ngama chien eki!” Phumma ere sanpoat poatko janchhôngya kowah jupa loatchhoan wah.

¹⁹Chenthu janchhôngya tângte pumma thinma ngunbi lemkhô pa ahotu ngama jetphumma, thinma Pol le Silas nii lolahma nok atang ngale thôte jabte heh tânâng siethokwah.

²⁰Thinma Roman adong heh tânâng siethû lahma ngatwah, “Are heh a Jews, ngale thinma ni hahdaang pa jamsiet eka.

²¹Thinma nãng niemarang heh lelatnâng phoanghethô eka; Nia Roman mihnyan, ngale nima are niemarang heh jienkepmih.”

²²Ngale mihnyan phangtang Pol le Silas nii lelatnâng chepwah. Erediko Roman thôte jabte adong hehema Pol le Silas nii khet koakphe kolahma wathukwah.

²³Chhihmông buhawat diko, thinma phâtek nâng sekwah, ngale phâtek bemte hehnâng kitkit sekthien en ngama chienwah.

²⁴Are nginpa tatphumma phâtek bemte hehema thinda tungko bãnglengdong khhek lahma akhen thôanko sekwah.

²⁵Rangpen mongtangko Pol le Silas niima rangsoam nungma Joban nâng rangsoamsê selahma dângwah, ngale thindemwah khhekritte ahan hehema atenii nâng jetat lahma dângwah.

²⁶Phumma lemlienma hahtidong tiihû lahma phâtek pa hahkhenma chhihjâwah. Ngale lemlienma chentô kâsek heh laangjâ rewah, ngale khhekritte heh dekwah janru heh jânjâ rewah.

²⁷Phâtek bemte pumma kâsek heh laangjâ choan khewah, atema phâtek wah mihnyan heh huhchhoan themtah ngama thonghun lahma ate dãngpa toanlahma atedede ritpheritrâng phungwah.

²⁸Phumma Pol chaanmông raklahma ngatwah, “Nangdede nekrit pherii, nikhu phangtang ako tonge!”



²⁹Phâtek bemte pumma wenphiaktan en ngama ngatwah, erediko ate humkhen nâng chhoanwãng lahma Pol le Silas nii dathongko khupjup wângwah.

³⁰Erediko atema rangsâ nâng loatsiet katlahma ngatwah, “Hethôte, ngama khope rãng chenni moatmin a?”

³¹Thinma dânthâng wah, “Nangma Teso Jisu nâng putedâlem o, erohkoba nang khomin epeo, ngale - ne humte tangkâ heh khomin epea.”

³²Erediko thinma atenâng Teso jabkhab pa thôkoh wah, ngale ere hum wah mihnyan heh phangtang nâng thôkoh wah.

³³Erejâ rangpen ere sanpoat poatko phâtek bemte pumma sietchhoan lahma thin mâmãn heh sâsiet kohwah; ngale ate erediko ate humte tangkâ heh phangtang lemlienma baptijem kepwah.

³⁴Erediko atema Pol le Silas nii ate humnâng sietwên lahma thinnâng phhekchhah kohwah. Ate ngale ate humte tangkâ heh nyahrãng khuhah nâhah dângwah, chenrãngma ngako thinma Joban nâng putedâlem wakeka.

³⁵Eredijâ rangkhahko Roman thôte jabte adong hehema, “Are mihnyan heh chhoanthuk en,” ngama phâtek bemte nâng thôkoh rãng sipâhi heh chienkatwah.

³⁶Ephumma phâtek bemte pumma Pol nâng thôkoh wah, “Roman thôte jabte adong hehema Silas nechhe chhoanthuk rãng ngin matkat era. Nechhe ade phumma tachhoan en, ngale khuhah nâhah chhoan en.”

³⁷Phumma Pol ma sipâhi sahhabko ngatwah, “Ninâng chenmin athe lechohlo komin thinma nok atang heh mako watthi - ngale nimin Roman jat jôba! eroh komin thinma phâtek nâng sek ehi. Ade phumma thinma ahuh chhama chienchhoan rãng hun ehia? Nia eroh ahuh chhama huhchhoan mih! Roman thôte jabte adong heh thindede kalahma chenchhoan thukhi.”



³⁸Sipâhi sahhab pumma erengin pa Roman thôte jabte adong hehnâng thôkoh wah; ngale chenthu thinma Pol le Silas nii Roman jat ngama tatphumma chei rewah.

³⁹Ephumma thinma kalahma Pol le Sailas niwah map thâkatwah; erediko thinma phâtek wah loatsiet lahma thinhah kowah chhoanthuk wah.

⁴⁰Pol le Silas nii phâtek wah loatchhoan lahma Lidia humnâng katwah. Enâng thinma putedâlemte heh demnâng chohmîn lahma thinnâng hungdông ngin heh thôthien kolahma erehah kowah loatchoanwah.

Moatlem 17

Thesalonika nâng

¹Pol le Silas nii Amfipolis ngale Apolonia heh dankhoam lahma Thesalonika wah Sanagog nâng katwah.

²Jâhan wah rãngrãng Pol Sanagog nâng katwah. Ere hahko Pientông rangwo jârem johtongthien lahma mihnyan heh demnâng Joban ngin heh thômîn thienwah,

³ngale thinnâng Joban nyapraang wah thôkolahma Misaia ma chêmchohmin ngale ritwah ngakhînmin ngama khesokwah. Pol ma ngatwah, “Are ngama nenâng thôkoh eka Jisu pa,” “Misaia.”

⁴Thin khuwah khaka hehma putedâlem lahma Pol le Silas nii demnâng johdângwah; Erohjó hahdaang niemarang junko adongjat dihiak hehwah ngale Joban nâng soam atôte Griik hehwahmin jahmõang johdângwah.

⁵Rohkomin Jews hehma mithek lahma lemjêng jêngwah mihnyan chhih heh khôansiet lahma thin lelatnâng dângwah. Thinma hahdaang phangtang phoangjamsiet lahma Jason hum lônghokwah, ngale Pol le Silas nii lo lahma nok atang tânâng siethok rãng hunwah.

⁶Phumma thinma Pol le Silas nii lechoh dâng phumma Jason ngale ahan putedâlemte heh lolahma hahdaang wah thôte jabte heh tânâng siethû lahma



rakwah, “Are mihnyan heh ma chentô thenâng phoangjamsiet eka! Athângheh nãng hahnâng hûwak era,

⁷phumma Jason ma ate humnâng thienwak eka. Thinma Lowang ahan tonga, atemin pa Jisu, ngama phoangthô lahma chentô Chofa niemarang heh chhihsiet eka.”

⁸Aroh thôlahma thinma hahdaang wah mihnyan heh ngale thôte jabte heh chapsiet eka.

⁹Thôte jabte heh ma Jason ngale ate lemru hehwah ngun cheng lahma chhoanthuk wah.

Biria Hahnâng

¹⁰Rangnyek rienrien putedâlemte heh ma Pol le Silas nii Biria nãng chienkatwah. Chenthu thin Biria nãng hokphumma Sanagog nãng wângwah.

¹¹Biria wah mihnyan heh Thesalonika wah mihnyan heh nomemin hungsen rinsen jat dângwah. Thinma Joban nginkongsen ko nyahrâng hung arin kohlahma jetatwah, ngale Pol ma chenni thôkkoh eka ereheh linlin dang ale dangmah a ngama jetrâng rangwo roakweih thinma Joban nyapraang heh weih lahma dângwah.

¹²Phumma ajahthem Jews mihnyan heh ma putedâlem wah, ngale ajahthem Griik jatwah hahdaang niemarang junko adongjat dihiak, dela anga ngama putedâlem wah.

¹³Phumma chenthu Thesalonika wah Jews heh ma Pol ma Joban jabkhab pa Biria nãngmin phoangthôkoh eka ngama tatphumma, thin enâng kalahma Biria wah mihnyan heh chepsietka lahma jamsietwah.

¹⁴Phumma enângwah putedâlemte heh ma Pol lemlienma josi kahnâng chienkatwah; rohkomin Silas le Timothi nii Biria nãng tângwah.

¹⁵Pol sênkatte mihnyan heh Athens nãng lanhuroh johkatwah, ngale erediko Pol ma thinnâng Silas le Timothi nii sitsiak ngatânâng chen kara ngama thôko lahma Biria nãng ngakchien wênwah.

Athen Hahnâng



¹⁶Athen nâng Pol ma Silas le Timothi nii bemthuko atema Athen hahko ledangli joban moangachaang heh jahmõang khelahma nyahrãng hungchhihwah.

¹⁷Ephumma Pol ma Sanagog nâng kalahma Jews le Jews ledangte ma Joban nâng soamte heh demnâng thômîn katwah, ngale rangwo roakweih phîn athã sengthinthe hehnâng hokte mihnyan heh demnâng ereheh junma thômîn wah.

¹⁸Ipikurien le Stonik hethôte hehmin ate demnâng chhiakmîn wah. Atenâng chhienwah, “Are aba pumma - chenni thôthiak thôeka?” Ahan hehma dânthâng wah, “Atema mihdiak Joban ngin thôkoh ehi.” Thinma are jab ekapa, Pol ma thinnâng Jisu ngale ate ritwah ngakhînwâng ngin heh thôkoh junko jabwah.

¹⁹Ephumma thinma erehah kowah Ariopagas ngama ngaeka ngoang awang heh tânâng siethû lahma ngatwah, “Nangma are niem anyan hethô ekopa nima jet huntanki.

²⁰Are nangma thôeko ngin heh nima anyan tat eki, ngale nima areheh chenni nâng ngaeka erepa jethun eki.”

²¹(Chenrãngma ngako Athen nok atang ngale mihdiak wah hokte chentô hehma phangtang are ngin nyan hongeka junma thômîn lahma thin sanpoat pa chhoanthuk wah.)

²²Pol ma erehah kowah ngoang awang heh mako toanchep lahma ngatwah, “Ngama Athen wah mihnyan heh rongrup nâng joban nâng soam atôte rãngrãng kheka.

²³Chenrãngma ngako, ngama ne hahko phoangkhoam lekma chentô ne rangsoam thinthe hehnâng phoangsokko, nema rangsoam eken hehnângmin, ‘Lethatjet joban nâng,’ ngama raangletma kheka. Phumma nema lethatjet thangma soam eken Joban pa ngama nenâng thôkoh eka.



²⁴Are hahtokkhoh tēm atiakte ngale chentô tēm atiakte Joban pa, rangkethung le hahtokkhoh Teso, ngale atea mihnyan dekma hōanwah rangsoamhum nāng tongmah.

²⁵Ngale nāng dekma aterāng molihma atenāng chenjô kohhok hunmah, chenrāngma ngako ate dedema nāngnāng reksietthuk ehi ngale roandōng kohehi, erediko anga nganāng chentôpa atema kohehi.

²⁶Atema mihnyan wathe wah chentô mihnyan nyuchha jat apat heh phangtang hōanehi, ngale hahtokkhoh phangtang nāng phoangphan songthuk ehi. Ngale chenre sanpoatko erediko chenre hahko thin sōngmin a ereheh atema khemama them athak lahma thienwah.

²⁷Arepa Joban ma mihnyan hehema chenlem hang, ngale lemsû lahma chenchokkhe hang ngama hōanwah. Eroh komin linlinko Joban pa nangkhu tâwah hen tâwahmin taangnāng dangmah;

²⁸mihnyan wathema aroh jabwah, ‘Ate junma nāngkhu hin ajo lihma songtong eki, ngale moaka lihma nyanki.’ Nesê nāngmin aroh ngaeka, ‘Nāngkhu min ate chhuchha jôba.’

²⁹Eroh wah nānga Joban chhuchha dāng phumma, nāngma atea mihnyan makwa hehema thin dekma hōanwah ngun akem, ngale longwah hōanwah moangachaang rāngrāng lethong hunmin.

³⁰Khemako mihnyan hehema Joban lejet sanpoat wahpa Joban ma lâlien sûtah, rohkomin ade phumma chentô thewah mihnyan hehnāng thin kaamchhih hehwah hungngaklit rāng chieneka.

³¹Ade phumma atema renlahma thieneka mihnyan pumma hahtokkhoh pa toangtangma rēnrāngma rangwo kahtok lahma thieneka. Are nginpa linlin ngama chentô nāng jetthuk rāng atema ere mihnyan pa ritwah ngakhinthuk lahma khesok eka!”

³²Chenthu Pol ma ritwah ngakhînwāng nginthô lahma thinma tatphumma, khaka hehema Pol nāng jōjēm lahma dûmmek wah, rohkomin, khaka hehema ngatwah, “Nima are nginpa ngakchohtat hunki.”



³³Ngale ere phumma Pol thin tâwah loatchhoan wah.

³⁴Khaka hehma Pol nginko putedâlem lahma Pol demnâng johruwah, ere putedâlemte heh chhang wah wathepa ngoangwa ate mînpa Dionisias dângwah; ngale dihiaknyu min wathe dângwah ate mînpa Damaris dângwah, phumma ate memin putedâlem wah, ngale ahan khuthe memin putedâlem wah.

Moatlem 18

Korint Hahnâng

¹Arediko Pol Athen wah chhoan lahma Korint hahnâng katwah.

²Enâng Akuila ngama wathe Jews mihnyan chohmînwah, ere mihnyan pa Pontas hahnâng chhatwah, ngale ate dihiak Prisila enii Itali wah bengka dângwah, chenrãngma ngako Chofa Kladius ma chentô Jews jat heh Rom wah chhoan en ngama chienwah. Phumma Pol thin demnâng chohmînâng katwah,

³ngale thin demnâng johtong lahma johmoatwah, chenrãngma ngako, atenii rãngrãng Pol memin tembu hum hânlahma bíchhahwah.

⁴Pientôngjâ roakweih atema Sanagog nâng chîthômîn hokwah, ngale Jews le Griik heh phangtang Joban putedâlemte rãng dângthuk hunwah.

⁵Chenthu Silas le Timothi nii Mesidonia wah hokphumma, Pol ma ate sanpoat chentôpa Joban Nginkongsen phoangthô lahma lolo chhoanthuk wah, ngale Jews hehnâng Jisu pa Misaia ngama thôkoh wah.

⁶Chenthu Jews hehma ate nginlekep thangma atenâng nginchhih ngat phumma, Pol ma ate khet wah bum heh fidoh lahma thinnâng ngatwah, “Nekho lepe medang enko, erepa nedede junmaba lepe dangeken! Erepa ngamet dangmah. Ade phumma nga Jews ledangte heh tânâng echhoan ang.”

⁷Ephumma Pol thin tâwah chhoan lahma Joban nâng soamte Jews ledangte mînpa Titius Justus humnâng sôngkat wah; erewa humpa Sanagog kêko dângwah.



⁸Sanagog wah khhepho wathe ate mînpa Krispas ngale ate humte tangkâ hehma Teso nâng putedâlem wah; ngale Korint wah ajahthem mihnyan hehma Joban ngin tatlahma putedâlem lahma baptijem kepwah.

⁹Penthe nâng Teso ma atenâng ngalahma Pol ma thânkewah, “Nekchei, Joban nginpa mihnyan hehnâng phoangthô koroh reo, ngale ere phoangthô kohpa nekjek,

¹⁰chenrãngma ngako nga nang demko etongang. Henmemin nangnâng tawat mahho, chenrãngma ngako, are hahko nga mihnyan jahmõang tonga.”

¹¹Erohwhah erehahko mihnyan hehnâng Joban ngin heh phoanghethô lahma Pol pâthe khathe tongwah.

¹²Phumma chenthu Galio pa Akaia wah Rom hah Govono dângpoatko, enângwah Jews heh khôn lahma Pol loatwah, ngale thinma ngoangthun thinnâng siethû lahma sekhamwah.

¹³Thinma ngatwah, “Are mihnyan pumma nãng niemarang junko ledang mihnyan hehnâng Joban nâng rangsoam pa phoang hethôeka!”

¹⁴Pol ma jabrãng ngatthuko Galio ma Jews hehnâng ngatwah, “Chenni komin achhih molahma ne Jews hehma sekham dângnomako, ngama ne Jews hehma sekham eken ngin hehmin chenjetat tah.

¹⁵Phumma arepa jabkhab ngale mihnyan min ngale ne niemarang junko chhiakmîn dâng phumma nededema phenthômîn en. Ngama arerãngrãng heh phenthô komah!”

¹⁶Ngale atema ngoangthunthîn hum kowah junloatwah.

¹⁷Phumma thinma Sanagog kowah khhepho ate mînpa Sosthen lolahma ngoangthun thin hum thakhoko watwah. Rohkomin erejunko Galio roanchemin chêmatriiho.

Antiok nâng Ngakkat



¹⁸Korint wah putedâlemte heh demnâng Pol melâng rangwo johtongthien lahma Prisila le Akuila demnâng jogari ma Siria nâng katwah. Sencheria wah jogari ma chhoan mako atema toamsem tah junko ate kho lokchhunwah.

¹⁹Thin Ifisus nâng hokdiko, Pol ma Prisila le Akuila nii Ifisus nâng phethien lahma chhoanwah. Phumma ate Sanagog nâng kalahma Jews heh demnâng thômîn katwah.

²⁰Enâng wah mihnyan heh ma ademin johtong thienhi ngatwah, rohkomin Pol nyoak ho.

²¹Atema chhoan nemma thinnâng thôthien kohwah, “Joban hungsi medang ako, nga nekhu tânâng engak hûrâng.” Ngale erediko ate Ifisus wah jogari ma chhoanwah.

²²Chenthu ate Kasaria hokdiko Jerosalem nâng wãng lahma Asâthem hehnâng rânjab wângwah, ngale erediko Antiok nâng katwah.

²³Enâng poatthe tôngthien diko chhoan lahma Galatien le Phergia ngenâng kalahma enângwah putedâlemte hehnâng rîn akhah kalahma thinhung dôngsiet wah.

Apolo Ifisus ngale Korint nâng

²⁴Ere sanpoatko Alexendra nâng chhatwah Jews wathe atemin pa Apolo Ifisus nâng katwah. Atea ngin ariet jab nâng asen ngale atema Joban nyapraangmin nyahrãng jet dângwah.

²⁵Atenâng Teso nginpa senthemthem thôko lahma dângwah, ngale atema nyahrãng hung arin kohlahma Jisu nginpa mihnyan hehnâng phoangthô kohwah. Rohkomin atema Jon ma koheka baptijem pelolo jetwah.

²⁶Atema Sanagog nâng lechei thangma thôkoh wah. Phumma chenthu Prisila le Akuila niima ate ngin pa tatlahma thinhumnâng sietwên lahma atenâng Joban nginpa senthemthem thôkoh wah.

²⁷Ephumma Apolo Akaia nâng katrãngma chepwah, erohwah Ifisus wah putedâlemte heh ma Akaia wah putedâlemte nâng Apolo senthemthem tângroo en ngama sitiraang lahma atenâng kohwah. Chenthu ate Akaia nâng



hokphumma enângwah Joban mînchenchaan junko putedâlemte dangtah hehrang nyahrâng toatchoh dângwah.

²⁸Mihnyan heh chentô mako ate Jews heh demnâng nyahrâng chaanchhiakmîn lahma Jisu pa Misaia jôba ngama atema Joban nyapraang wah khesok lahma Jews heh jienchiakwah.

Moatlem 19

Pol Ifisus Hahnâng

¹Apolo Korint nâng dângthuko, Pol ma Ifisus nâng katlem wah chentô hahdaang hehnâng khoamthien lahma Ifisus nâng hokwah. Enângmin atema dijunte khuthe hôngsiet thienwah

²Ngale thinnâng chhienwah, “Ne putedâlemte dângdiko Asâthôanju mechoh enle?” Thinma, “Nima Asâthôan Jupa atajô mathat chohtat eki,” ngama dânthâng wah.

³“Eroh medang enko chenrângrâng baptijem kaptet a?.” Ngama Pol ma thôngphâ wah. Thinma, “Jon ma koheka baptijem pa kepwah,” ngama dânthâng wah.

⁴Pol ma thinnâng ngatwah, “Jon baptijem pa papi mihnyan heh thinpap moatlem wah hung lêngaklittih ngama khesokrâng kep eka; ngale atema Isrial mihnyan hehnâng ngadi kowah kaerako putedâlem en ngama thôkoh wah - erepa Jisu nâng putedâlem en ngama thôkoh eka.”

⁵Chenthu thinma erengin pa tatphumma Teso Jisu mînko baptijem kepwah.

⁶Pol ma thinkhoko ate dekma sahloatkoh phumma thin khohnâng Asâthôanju katwah; erediko thinma ajatjat jabma jienjab wah ngale Joban nginkongpa phoangthô wah.

⁷Thin phangtang tungko echhi wanii dângwah.

⁸Pol ma Sanagog nâng hûlahma mihnyan heh demnâng jengrem lechei thangma thômîn wah, ngale thin demnâng thômînko atema Joban Hahsông ngin thôkoh eka hehnâng putedâlem en ngama ngatwah.



⁹Rohkomin khuka heh hung pa longrãngrãng chehjâ lahma leputedâlem wah, ngale mihnyan heh phangtang mako thinma Teso nãng putedâlem junma nginchhih hehmin jabwah. Ephumma Pol ma putedâlemte heh ate demko sietlahma thin tâwah chhoanwah, ngale jâroakweih Tarannas ngama ngaeka nyapweih thin humko ate thin demnãng thômîn wah.

¹⁰Pol ma aroh pâni moatwah, ephumma Asia diakwah sôngte chentô Jews ngale Jews ledangte hehmin phangtang Teso jabkhab chohtat wah.

Skeva Chha heh

¹¹Pol junma Joban ma lethat kheli patritli moatlem heh moatwah.

¹²Pol ma ranglemti hutphethin khetchhup pemin khunte heh tânãng mekep hûkoh ako thin khoanchet heh asen rewah, ngale thinwah juchhih hehmin chhoanwah.

¹³Juchhih junlo lahma phoangkhoamte Jews hehmemin Teso Jisu mîn keplahma juchhih heh thatphoang junloatwah. Thinma juchhih nãng ngatwah, “Ngama Pol ma thôeka Jisu mînko chhoan o ngama chien eki.”

¹⁴Arepa Jews heh Soam aroakte adongthôn chha chhepho waengit ma moatwah.

¹⁵Rohkomin juchhih pumma thinnãng ngatwah, “Ngama Jisu jet ang, ngale Pol min jet ang; phumma nea hen a?”

¹⁶Juchhih luptah mihnyan pumma thinkhohko toakka lahma thinnãng nyahrãng buhawat lahma jienwatwah. Ngale ate humkawah buh awatmãn demnãng huhchhoanwah, erediko khet akhu heh chiensietrii lahma huhchhoanwah.

¹⁷Are nginpa Ifisus wah sôngte chentô Jews le Jews ledangte phangtangma chohtatwah; ngale thin phangtang chei lahma Teso Jisu mînpa ajah dôngthukwah.

¹⁸Ajahthem Putedâlemte hehmin nok atang heh mako thinma chenni chhihmo tah a ereheh loatthô ngale khesok rewah.



¹⁹Ngale ajahthem jâdu hôante hehma thin titab heh aroamma kephû lahma nok atang heh mako wennâng rokthhekawah. Thinma titab heh thâpa thatroakweih tahpa hahjat roak bangâ nguntha dângwah.

²⁰Teso jabkhab pa eroh chaan demnâng jêngjah jahchhoan ngale jêngdong dongwãng rewah.

Ifisus nâng Hahjâm

²¹Are ngin heh eroh dângdiko, Pol ma thonghun lahma Mesidonia le Akaia heh danlahma Jerosalem nâng katwah. Ngale atema ngatwah, “Nga enâng katdiko, Rom nângmin katmin.”

²²Ephumma atenâng chohsokte Timothy ngale Irastas nii Mesidonia nâng chienkatwah, ngale ate ajahpa Asia diaknâng tângwah.

²³Ere sanpoatko Teso nâng soamtô junko Ifisus nâng nyahrãng chêmulahma dângwah.

²⁴Jan tupte atemin pa Dimitris ngama wathe dângwah, phumma atema janwah Artemis joban rangsoamhum rângrãng hôanwah, ngale ere hôaneka kowah atema ngun nyahrãng chohbîwah.

²⁵Ephumma atema phangtang khôanroo wah ngale thinrângrãng hôante ahan hehmin khôanroo lahma thinnâng ngatwah, “Mihnyan heh nemajet nãngma arekowah chohbi chhahki.

²⁶Phumma athângheh nedede memin lâkhetet ngale lâtattet are Pol pumma chenni moeka erepa. Atema ngaeka dekma hôaneka joban pa joban dangmah, ngale atema anâng Ifisus wahmin ngale Asaia diak phangtang wah mihnyan heh ajahthem hunglâlît thuktah.

²⁷Are nãngma ngunbî moatlem moeki pemin chhihjâ lâhangtah, ngale erepa lolo ledang Artemis joban rangsoamhum ngale Artemis joban nâng lesamtu emahjâa, are joban ko Asia diaktang ngale hahtokkhoh wah phangtangma soamtô eka!”

²⁸Mihnyan hehma are nginpa tatlahma nyahrãng rinkhah lahma, “Ifisus wah joban Artemis pa jôba adong!” ngama rakwakwah.



²⁹Erepa hahdaang phangtang nâng phoangjamwah. Thinma Mesidonia wah mihnyan wanii Pol demnâng johkhôamte Gais le Aristekas nii lolahma thin demnâng ngoangthun thinnâng sietwênwah.

³⁰Pol ate dedema mihnyan hehmako wângrăng hunwah, rohkomin Joban nâng putedâlemte hehma wângthukho.

³¹Ngale erediak kowah khhepho Pol lemruçha hehma ngoangthun thinnâng nekloat khoamhûro ngama ngin matkatwah.

³²Ngale ngoangthun poatko nyahrăng jamjâ lahma dângwah: Khuthema lithejab, ngale khuthema lihân hongjab rewah, chenrăngma ngako, ajahthem mihnyan hehma chenrăngma khôanhûkia pemin lejet dângwah.

³³Khakama Alexendra ma chenjet a ngama ate khohnâng phewah, ngale Jews hehma nok atang heh mako chepwâng thukwah. Phumma Alexendra ma thinnâng kihchepchep tongen ngama dekma hakkatwah, ngale atema mihnyan hehnâng nginsenma thôkoh wah.

³⁴Phumma chenthu mihnyan hehma atea Jews jat ngama jetphumma mihnyan hehma, “Ifisus wah Joban Artimis pa jôba adong!” ngama koantanii răng rakwah.

³⁵Athôanko hahdaang kowah nyap khôanraangte pumma mihnyan heh kihtông thukwah. Atema ngatwah, “Nga lemru Ifisien wah mihnyan heh!” “Anga ngama jet Ifisus wah mihnyan hehma adongthôn Artimis rangsoamhum pa sùareki ngale rangwah jâkatha longpa khoakhem eki.

³⁶Henmemin areko dangmah tangamah. Erohwah kihmêngen ngale ledangli heh nekmo en.

³⁷Thinma nâng rangsoamhum kowah min chenjô huhmah, ngale nâng joban nângmin achhih mangaeka, eroh akomin nema are mihnyan heh anâng siethû eren.



³⁸Dimitris le ate moatlem moatte hehma hennâng komin chenni ngatthin metong akomin, nãng thôte jabte hehmin tonga, ngale jengreko ereheh taphen thômin e; are sanpoatko thinnâng tasekham e.

³⁹Rohkomin ere nomemin nema ajahthem ngatthin metong hênko, erepa jengrewah nok atang heh ngoangthun sanpoatko phenthômin e.

⁴⁰Phumma thejâwah junko medang ako, hahpa nãngma jamsiet eki ngama nãngnâng sekhamthin môangtonga. Are hahjam eka hehrãngma map lekohmin, ngale nimemin senthemthem lejiên phensietmin.”

⁴¹Atema aroh ngalahma ngoangthun pa jeksietwah.

Moatlem 20

Mesidonia ngale Akaia nãng

¹Hahjâm jekdiko, Pol ma putedâlemte heh aroamma khôanroo lahma thinnâng hungdôngrãng rîn akhah thien lahma chhoan ekangjô ngama thôthien kohwah. Erediko ate chhoan lahma Mesidonia nãng katwah.

²Atema ere jaa phangtang nãng phoangkhoam lahma mihnyan hehnâng phoang rîn akhah thienwah. Erediko ate Akaia nãng katwah,

³Ngale enâng jengrem tôngkatwah. Ate Siria nãng katrãng phûng poatko enângwah Jews heh ate lelatnâng chep eka ngama chohjetwah; ephumma atema Mesidonia ngema Siria nãng ngakwâng wah.

⁴Biria wah Sopater chha Pirhus ate demnâng johwângwah; ngale Thisalonika wah Aristekas ngale Sikundus min johwângwah; erediko Dirbi wah Gaius min johwângwah; Tikikas ngale Trofimius nii Asia diakwah johwângwah; ngale Timothi min johwângwah.

⁵Thin a khema nãng wãngla lahma Troas hahnâng ni bemlâwah.

⁶Wichhi lesak pheban phhek lokuh diko ni Filipien wah jogari ma loatchhoan wah, ngale jâbangâ diko thin demnâng Troas nãng roamhokwah, enâng ni haptathe tôngthienwah.

Troas nãng Pol Athôn rãng Hokthien



⁷Hunibat jâko rangjâ thahko ni phhekchhah roamchhahrăng khôanwah. Phumma Pol ma mihnyan hehnâng thôkoh wah ngale erepa rangpen mông lândangroh thôkoh wah, chenrăngma ngako atea nènepko chhoante dângwah.

⁸Rangkhohdâng kowah ni khôantongtih humko wentitmin jahmông dôtoak lahma dângwah.

⁹Paangmihpho wathe ate mînpa Itikus pa pôngkâ kâsek khoko tonglahma dângwah, phumma Pol ma nginthôkoh thuko Itikus nyahrăng jupmetrii lahma dângwah, phumma athôanko juplek lahma rangkhohdâng kowah dangrem pumma hahko jâkatwah. Chenthu thinma ate tôansiet katko atea riichoan tônglâwah.

¹⁰Rohkomin Pol kalahma ate khohko kunjupka lahma atenâng khitkatwah, ngale atema mihheh nâng ngatwah, “Neksekma en, atea ahînthu!”

¹¹Erediko Pol rangkhohdâng ko ngakwăng lahma atema bankên pa chhupsiet lahma phênphhek wah. Thin demnâng ngin nyahrăng lekthômîn wah, rang lânworoh thômîn lahma, Pol loatchhoan wah.

¹²Thinma paangmihpho pa humnâng ahînma ngaksiet hokwah, ephumma thinhung ngaksênwah.

Troas Hahwah Militus Hahnâng

¹³Ni jogari pumma Assos nâng katlâwah, ngale enângwah nima Pol jogari ma thehan nâng sietchhoan răng ngatwah. Atea dakhôam lemma katrăng ngama nia jogari pumma katlâ thukwah.

¹⁴Chenthu nidemnâng Assos nâng chohmîn phumma, nidemko jogari ko chhangthuk lihma Mitileni nâng sietkat wah.

¹⁵Ni ereko chhang lihma eredijâko Kois hahnâng hokwah. Jâthe diko ni Samos hahnâng hokwah, ngale eredijâko Miletus hahnâng hokwah.

¹⁶Phumma Pol ma Asia diaknâng lektôngthien lehuntû thangma Ifisus nângmin lejek tongthien thangma liangliang chhoanrăng thônghun wah.



Atema metahû angko Pentikos rangwo mako Jeroselem nâng hokrăng thônghun wah.

Pol ma Ifisus wah Khhepho Phannang hehnâng Achhoan nemma Rânjab

¹⁷Miletus wah Pol ma nginmatte Ifisus wah Asâthem khhepho phannang heh tânâng nga demnâng chenchohmîn wănghang ngama chienkatwah.

¹⁸Chenthu Ifisus wah khhepho phannang heh Pol tânâng hokphumma atema thinnâng ngatwah, “Nga Asia diakko benghok jâma nga sanpoat heh nedemnâng chenroh chhoanthuktek a erepa nemajet.

¹⁹Jews hehma nga lelatnâng cheplahma nganâng chêmthukthang poatko nga a Teso haa răngrăng danglekma chenroh mitphi honglekma numriitek a ereheh nemajet.

²⁰Nemajet ngama nok atang heh chhangnâng ngale nekhu humhum nâng hûlekma phoangthô lekma hethôtah poatko nerăngma senli heh chenjô lethôkoh thangma huhriemho.

²¹Jews le Jews ledangte hehnâng khoakthema nepap moatlem wah jekletma Joban tânâng ngakhûren ngale Teso Jisu nâng putedâlem en ngama thôkotah.

²²Adea ngama Asâthôanju ngin keplekma Jeroselem nâng kaekăng, phumma nganâng enâng chenni dăngmin a erepemin jetmek.

²³Asâthôanju ma chentô sumhah hehnâng phâtek ngale chêmchei ma Jeroselem nâng nang bemla lahma tonga ngama thôkohthang pa loloba jet ang.

²⁴Rohkomin ngama ngadede roandông pa sekho ngama thonghun ekang; Joban mînchenciaan nginkongsen pa phoangthô rănğ, Teso Jisu ma nganâng mothuk ehang moatlem pa râmoad loloba hun ekang.

²⁵“Ngama Joban Hahsông Nginkongsen pa phoangthô lekma nekhu demnâng dăngwah. Ngale ade phumma ngama jet ekang nekhu henmemin nga lechoh khetumin.



- ²⁶Erohwah thejâ ngama nenâng sansanma loatthô koheka: nekhuwah kho lepete mehong enko, erepa ngamet dangmah.
- ²⁷Chenrăngma ngako ngama Joban ngin ngale atema huneka heh nenâng phangtang thôkotah.
- ²⁸Erohwah nedede min jetletma tongen, ngale Asâthôanju ma nenâng sùare thuk ehèn hehmin senthemthem sùare letma tongen. Saaksokte răngrăng Joban nâng putedâlemte Asâthem heh sùare en, Ate ate chha hei junma aterăng hânwak eka.
- ²⁹Ngama ajet ngachhoan diko nekhu tânâng soanchhih ehûra, ngale thinma saak heh lekek thangma lebâmin.
- ³⁰Nekhuchhang kowah mothôthô lahma putedâlemte heh thindemko lemchhih nâng sietchhoan sanpoat pa ehûra.
- ³¹Erohwah jetletma dangen, ngale ngama nekhu anga nganâng pârem răng chenni thôkotah a ereheh rangwo rangnyek, mitphi hongletma thonghun letma tongen.
- ³²“Ngale ngama ade phumma nekhu Joban deknâng, ate mînchenchaan nginkong junko chendangen ngama lâkohtah, Ere pumma nekhu eta rongset hèn ngale Joban ma ate mihnyan hehrăng thienkotah rangpa ekepen.
- ³³Ngama henwahmin ngun akem ngale khet akhu hunmah.
- ³⁴Nekhu dedema ajet nga ngale nga lemru heh ma chenni lem ekia ereheh ngadede dekma molekma kepwah.
- ³⁵Ngama nekhu nâng rongrup nâng aroh chaanriimo lih ma aboan anaa hehnâng chohsokmin ngama khesoktah, Teso Jisu dedema jabtah jabkhab pa thonghontan en, ‘Mihnâng chohkoh pa mihwah chohthâ reki nomemin ajahthem khuhahli.’”
- ³⁶Chenthu Pol ma thôkoh diko thin demnâng dakuhtô lahma rangsoam wah.
- ³⁷Thinma phangtang Pol nâng khit lah ma sepwah, ngale aphânmin rănng atenâng chupjok wah.



³⁸Atema thinnâng nga nekhuma chenthumin chohkhetu mahha ngama ngatphumma ajahthem hungchhih wah. Ngale erediko thinma Pol jogari tôko johsênkatwah.

Moatlem 21

Pol Jeroselem nâng Kat

¹Nima thinnâng chhoan ekijô ngama rânjabthien lihma chhoanwah. Nima jogari pumma jo tintin danlihma Kos hahnâng hokwah; Ngale eredijâko Rodes hahnâng hokwah, ngale erehah kowah Patara hahnâng katwah.

²Eretheko nima Fonikia nâng katte jogari chohwah, ephumma eko chhangka lihma chhoanwah.

³Sipras hah khekat theko hûlihma, erethe kowah dekchah ngenâng chhangka lihma Siria hah ngenâng katwah. Ngale nia Tair jopha ko jâkka lihma, jogari pumma sêmmak heh jâlakwah.

⁴Enâng nima putedâlemte heh khuthe chohmîn lihma thin demnâng haptathe johtông thienwah. Juchaan junma thinma Pol nâng Jeroselem nâng nekka ngama thôkoh wah.

⁵Phumma thin demnâng niroamtông sanpoat pa thôn phumma thintâwah ni loatchhoan wah. Thinkhu phangtang ngale thin tangnyu heh erediko thinchha hehmin roamlahma thinhah kowah nidemnâng jopha tôko johkat wah, phumma eretheko nikhu phangtang dakuhtô lihma rangsoam wah.

⁶Erediko nima phan ejô ngama rânjabmîn lihma phânwah, ngale nia jogari ko chhangkatwah ngale thinmin humnâng ngakwâng wah.

⁷Ni Tair hahwah chhoan lihma Polimais hahnâng chhangkat wah, phumma erehah wah putedâlemte heh demnâng rânjabmîn lihma thin demnâng jâthe johtông thienwah.

⁸Eredijâko Polimais hahwah chhoan lihma Kasaria hahnâng hokwah. Phumma nia erehah kowah Ivengelist Filip humko tângwah, Filip pa



Jeroselem nâng chohsokte rãng waengit mihnyan rentah kowah wathe dângwah.

⁹Ate chha janchhô wabelii dela nâng lewãng thangma Joban ngin phoangthô lahma dângwah.

¹⁰Thin demnâng ni melâng rangwo johtôngwah, phumma erepoatko Judia wah mông ate mînpa Agabus hokwah.

¹¹Erepa nitânâng hûlahma atema Pol roamdit pa toanlahma roamdit pumma atedede dek ada heh khhekritwah, ngale atema ngatwah, “Asâthôanju ma aroh ngaeka: Are roamdit tângte pa Jews hehma Jeroselem nâng aroh khhekmin, ngale thinma Jews ledangte heh deknâng ekoh a.”

¹²Nima are nginpa tatphumma, ni ngale enângwah ahan hehmemin Pol nâng Jeroselem nâng nekka ngama roatsep wah.

¹³Rohkomin atema dânthâng wah, “Ne chenrãngma sep eken a, nema aroh sepletma ngahung chhâsiet hun eken a? Nga Jeroselem nâng khhekrit rãngmin cheimek, ngale Teso Jisu rãngma enãng ritmin tarii ang.”

¹⁴Nima ate leta jektang phumma, letangtu thangma, “Teso hung junko chendanga” ngama ngatwah.

¹⁵Enâng poatthe tôngthien diko, nima sêmmak heh khoakhem lihma Jeroselem nâng wângwah.

¹⁶Phumma Kasaria wah dijunte khuthe nidemnâng johwãng lahma ni johtôngrãng wãngeki mihwa humko sietwênwah - ere mihwa pa Sipras hahwah ate mînpa Manson dângwah, atea khema thuma putedâlemte dângwah.

Pol Jems tânâng Chohmînhok

¹⁷Chenthu ni Jeroselem nâng hokphumma, enângwah putedâlemte hehma khuhah nâhah tângroo wah.

¹⁸Eredijâko Pol nidemnâng Jems chohmînrãng katwah; ngale eko chentô Asâthem khhepho phannang heh dângwah.



¹⁹Pol ma thinnâng rânjab lahma Joban ma ate moatlem junma Jews ledangte hehnâng chenni motah a ereheh phangtang thôkoh wah.

²⁰Thinma Pol ngin chohtat diko, chentôma Joban nâng rôwah. Erediko thinma ngatwah, “Pol, nangma akhe chentô hahjat Jews hehma Joban nâng putedâlem eka, ngale thinma Mosa Niemarang hehmin nyahrãng kepeka.

²¹Jews ledangte heh diaknâng sôngte Jews hehnâng nangma Mosa Niemarang heh phe en, ngale thin chhuchha hehnâng khoenkhen niem nekhôantu en, ngale Jews niemarang heh nekkeptu en ngama phoang hethôeko ngama thinnâng thôwak koheka.

²²Thinma nanga Jeroselem nâng hûtha ngama metkep tatmin. Phumma nima chenni remin a?

²³Nangma aroh moat pa asen edanga ngama thonghun eki. Ako wabelii mihnyan toamsem lahma tonga.

²⁴Thin demnâng seksâsiet thinnâng johka lohma thin niemhôn thãpa nangma thumkoh; erediko ba thinma kho eta lokchhun a. Eroh koba thinnâng nangjun ma chentô nginchhieh thôkotah heh wanthem in linlin dangmah, ngale nanga Mosa Niemarang junko jôba song eko ngama thinma ejet a.

²⁵Phumma Jews ledangte wah putedâlemte rãng dangeka hehnâng nima moangachaang nâng kohwah phhekchhah heh nekphhek chhah en, hei nekphhek en, erediko bohkorep lahma ritphewah ngem nekphhek en ngale dihiak dela kaamchhieh nekmo en ngama nginpat hân lihma sitiraang lihma matkattih.”

²⁶Ephumma Pol ma mihnyan heh sietlahma eredijâko seksâsiet niem pa thin demnâng hânwah. Ngale erediko Rangsoamhum nâng wãng lahma chenthu seksâsiet niemhôn pienpa râeka, eko thin chentôma soam aroakthin keplokmin ngama thôkoh wah.

Pol Rangsoamhum wah Loatkhek



²⁷Phumma jâengit jâpa thônãng ngatko, Asia diakwah Jews hehma Rangsoamhum nãng Pol lepkhewah. Phumma thinma mihnyan heh phangtang chepsiet lahma Pol loatkhekwhah.

²⁸Thinma rakwah, “Isrial heh!” “Chohsûhi! Are mihnyan pumma chentô thenãng chhoan lahma Isrial mihnyan heh lelatnãng, ngale Mosa Niemarang erediko Rangsoamhum lelatnãng phoangthô eka. Ngale athãngheh atema Jews ledangte heh Rangsoamhum kêko siethû lahma arethesâ pa ngeksiet eka!”

²⁹(Thinma are ngaeka pa Ifisus wah Trofimius pa Pol demnãng Jeroselem nãng khewah, ngale atemin Pol ma Rangsoamhum nãng lâsietwên thêmtah ngama thõnghun wah.)

³⁰Jeroselem wah mihnyan heh phangtang chepwah, ngale mihnyan heh aroamma chhoanka lahma, Pol loka lahma, Rangsoamhum kowah sietphewah. Erediko lemlienma Rangsoamhum kêsekpa tangsek rewah.

³¹Erekowah mihnyan hehma Pol ritphe rãng hunwah, rohkomin Jeroselem phangtang nãng hahjam eka ngama Roman sipâhi adong nãng ngin chohmat hokwah.

³²Lemlienma sipâhi sahhabdong pumma ate lemru sahhab khuthe ngale sipâhi sietlahma mihnyan heh tânãng katwah. Chenthu mihnyan hehma sahhabdong pa ate sipâhi demnãng khe phumma Pol nãng watpa jekwah.

³³Sipâhi sahhabdong pa Pol tânãng kalahma Pol loatkhekwhah, ngale janru runiima khhek en ngama chienwah. Erediko atema, “Arepa hen a, ngale atema chenre tah a?” ngama chhienwah.

³⁴Mihnyan hehma khaka pumma lithe ngale ahan hehma lihân hõngrakwah. Phumma sipâhi sahhab pummemin chenni dangeka erepa senthemthem jienjet loho, ephumma ate sipâhi hehnãng Pol sipâhi heh tõngthin nãng sietwên en ngama chienwah.

³⁵Pol demko thin hihthodãng tôko johkatwah, phumma mihnyan heh nyahrãng cheili rinkhah junko sipâhi hehma Pol ape rewah.



³⁶Mihnyan heh phangtang Pol diko junka lahma, “Aritphe rêmin!” ngama rakwah.

Pol ma Nok atang hehnâng Nginthôkoh

³⁷Sipâhi hehma thin tângthin nâng Pol sietkat rãng ngatko, Pol ma sahhabdong ko ngatwah: “Ngama nangnâng chenkommin tathôkoh ea?” Sahhab pumma “Nangma Griik jab jienjab ole?” ngama chhienwah.

³⁸“Eroh medang oko nanga khema wah wathe Iqip mihnyan ma hahjat beli mihnyan wentho demnâng sehakhô nâng mihngoanrãng sietchhoante pa nang dangoni?” ngama chhienwah.

³⁹Pol ma dânthâng wah, “Nga Jews jat, Kilika wah Tarsus hahnâng chhatwah, ngale alemthôn hahdaangko sôngte. Nga mihnyan heh demnâng mamjabmîn thukhang.”

⁴⁰Phumma sahhabdong pumma jabmîn thukwah, ephumma Pol hihtho khoko cheplahma mihnyan hehnâng kihchepchep tongmêngen ngama dekma thak amak katwah. Chenthu mihnyan heh kihtông phumma Pol ma thinnâng Hibru jabma thôkoh wah:

Moatlem 22

¹“Ngalemru Jews heh, ngama nenâng ngajunma thôkoh ekapa jetat tanha!”

²Chenthu mihnyan hehma thinnâng Hibru jabma thôkoh tatphumma, mihnyan heh bâmbâm kihtôngwah; ngale Pol ma thinnâng thôkoh wah:

³“Nga a Jews, Kilika wah Tarsus hahnâng chhatwah, phumma are Jeroselem hah kowah Gamaliel khenko nyapweihte danglekma dông aloatwah. Ngale ngama nângte nângwa heh Niemarang heh nyahrãng chaankoh lekma hewah, erediko thejâ arekowah nekhû rângrângjô ngamin Joban nâng nyahrãng hungkoh lekma soam atôte dângwah.

⁴Arerângrãng Jisu dijunte mihnyan hehnâng ngamemin nyahrãng chêmthukwah. Ngama dihiak dela phangtang lokhhek lekma phâtek nâng sekwah.



⁵Arepa soam aroakte adongthôn ngale ngoang awang heh chentôma ajet ngama toangtang thôekãng. Thinma nganâng nãnglemru Damaskas wah Jews hehnâng nyapraang raanglahma kohthang, ephumma ngama Damaskas wah putedâlemte heh lokhhek lekma Jeroselem nâng ngaksietwên lekma chêmsiet rãng Damaskas nâng katwah.

Pol ma Ate Litjâ Ngin Thôkoh

(Moatlem 9.1-19; 26.12-18)

⁶“Nga Damaskas nâng hûka nemnemko, rangngih mongko rangkho wah wenphiakdong nga tumlitko phiakkat wah.

⁷Nga hahko kôanjâ lekma nganâng ngat jabkhab tatwah, ‘Sol, Sol! nangma nganâng chenrãngma chêmsiet ehanga?’

⁸Phumma ngama thôngphâ wah, ‘Teso, nang hen a?’ Eko atema dânthâng wah, ‘Nga Nazarat wah Jisu, nangma chêmsiet ehanga.’

⁹Nga demwah mihnyan hehma wenphiak pa khetah, phumma thinma nganâng ngathang jabkhab pa tat ho.

¹⁰Phumma ngama chhienwah, ‘Teso, ngama chenre min a?’ eko Teso ma nganâng ngatwah, ‘Toanchep lohma Damaskas nâng wãngo, enâng Joban ma nangnâng chenni moatthuk hun eho ereheh phangtang ethôkohho.’

¹¹Phumma wenphiak dong pumma phiak junko ngamit doakjâwah, erohwah nga lemru hehma dekho sietlahma Damaskas nâng sietwênwah.

¹²“Ere hahko mihnyan wathe ate mînpa Anania dângwah, atea Joban nâng hungkoh lahma soam atôte, ngale nãng Niemarang hehmin senthemthem kepte, ngale enângwah sôngte Jews hehmemin atenâng nyahrãng choangpe lahma dângwah.

¹³Ate ngatânâng katwah, ngale ngakeko chepka lahma ngatwah, ‘Sol, nangmit pumma thengak jienkheo!’ Ere sanpoat poatko ngama jienkhe lekma atenâng sokwah.



¹⁴Atema ngatwah, ‘Nãngte nãngwa heh Joban pumma atema chenni huneka erepa jetrãng ren eho, ngale Joban haa toangtang thônpa kherãng ren eho, ngale atema jabkhab rahjab pa chentat a ngama ren eho.

¹⁵Nangma chenni khetoh a ngale tattoh a heh chentô mihnyan nãng ate hãkhirãng ephoang thôkoh o.

¹⁶Phumma chenni lekbemtu ekoa? toanchep lohma baptijem kep o, ngale atenãng rangsoam lohma nang pap heh sãsiet o.’

Jews Ledangte hehnãng Joban Ngin thôkoh rãng Pol Roo

¹⁷“Nga Jerosalem nãng ngakktwah, ngale Rangsoamhum nãng rangsoam thuko, ngama thãnkhwah,

¹⁸eko Teso ma nganãng ngalahma khewah, ‘Sitsiak Jerosalem wah loatchhoan o, chenrãngma ngako, enãngwah mihnyan hehnãng nangma ngajunma ngin thôkoh eko heh thinma lekepmin.’

¹⁹Phumma ngama dânthãng wah, ‘Teso, thinma senthemthem ajet, ngama Sanagog nãng hũlekma nangnãng putedãlemte heh lokhhek ngale buh awatwah.

²⁰Ngale chenthu nang nginthôte Stifen ritphe poatko, ngadede min eretheko Stifen ritphete heh khet heh bemko lekma Stifen ritphe sũlekma dãngwah.’

²¹Phumma Teso ma nganãng ngatwah, ‘chhoan o, ngama Jews ledangte heh tânãng ataangnãng chienchhoan e,’ ”

²²Pol ma aroh loatjab mako mihnyan hehma ate nginko jetat wah; ere diphumma chaanchaanma rakwah, “Ate tânãng nek hũ en! Aritphe re en! Ate nekchen hintuka!”

²³Thin khet akhu heh petphe ngale rangkho nãng bum heh rêmwên lahma rakwah.

²⁴Phumma Roman sipãhi sahhab pumma ate sipãhi hehnãng Pol sipãhi heh tãngthin nãng sietkat rãng chienwah, ngale Jews heh ate lelatnãng aroh chenrãngma rakeka ngama jetloat rãng atenãng wat en ngama chienwah.



²⁵Rohkomin chenthu sipâhi hehma Pol nâng watrăng khhekpoatko, eretheko wah chepte sipâhi sahhabko Pol ma ngatwah, “Nema Roman mihnyan ko chennângjô lethenâng tawat en a?”

²⁶Chenthu sipâhi sahhab pumma erengin pa tatphumma, ate noma sahhabdong tâko wãng lahma ngatwah, “Nangma chenre ekoa? Ire pa Roman mihnyan!”

²⁷Ephumma sahhabdong pa Pol tânâng kalahma atenâng chhienkatwah, “Nganâng thôkoh hang, nanga Roman mihnyan ne?” “Dang ang, nga Roman mihnyan,” ngama Pol ma dânthâng wah.

²⁸Sahhabdong pumma ngatwah, “Ngamin ngun jahmông kohlekma Roman mihnyan rãng dangekang.” Phumma Pol ma dânthâng wah, “Nga achhat mejû Roman mihnyan,”

²⁹Phumma Pol nâng ngin chiente mihnyan pa lemlienma tokdinâng ngakthenwah; ngale sahhab pumma Pol pa Roman mihnyan ngale atema Roman mihnyan pa janruma khhek ekang ngama jetlahma patritwah.

Pol Jews heh Ngoang Awang heh tânâng Siethok

³⁰Sahhabdong pumma Pol nâng Jews hehma chenni junko sekham eka ngama senthemthem jethun wah; erohwah adijâko atema Pol dekwah janru pa janphe lahma Soam aroakte adong ngale ngoan awang heh phangtang khôansiet wah. Erediko atema Pol siethû lahma thinmako chepthuk wah.

Moatlem 23

¹Pol ma ngoang awang hehnâng thongsûkat lahma ngatwah, “Ngalemru Isrial mihnyan heh! Thejâ tôko ngahung sâpoangpoang danglekma Joban mathahko nyãn ekang.”

²Anania Soam aroakte adongthôn pumma Pol tâwah chepte hehnâng Pol thunko watrăng chienwah.

³Pol ma atenâng ngatwah, “Joban ma nangnâng metkep ewat ho - nanga rongpoma pôhutwah tukthen rângrâng! Nanga reko nganâng Mosa Niem



junko athe loatrãng tongeko, rohkomin nangma nganâng watrãng chien ekopa nangma Mosa Niem lelatnâng moeko!”

⁴Phumma Pol tâwah mihnyan pumma Pol nâng ngatwah, “Nangma Joban nâng Soam aroakte adongthôn thãjõ eko!”

⁵Phumma Pol ma dânthâng wah, “Ngalemru Isrial mihnyan heh, Ngama atea Soam aroakte adongthôn ngama jetmek. Joban nyapraangma ngaeka, ‘Ne pête khhepho phannang hehnâng achhih lengamin.’ ”

⁶Chenthu Pol ma ngoangthun rãng khôanhû eka heh khakapa Saduki ngale khakapa Farasi ngama jetloat phumma, atema ngoang awang hehnâng ngatwah, “Ngalemru Isrial mihnyan heh! Nga a Farasi, ngale ngawa min Farasijô dângwah. Thejâ ngama ritwah ngakhîn min ngama putedâlem junko sekham eha!”

⁷Atema arepa ngat rienrien, Farasi le Saduki heh mênmin wah, ngale mâmâ khukhu dangjâwah.

⁸(Chengrãngma ngako, Saduki hehma ritwah ngakhin mah, ngale Joban ngintatte erediko Ju min aho ngatwah; rohkomin Farasi hehma wanrem latnâng putedâlem wah.)

⁹Phumma nyahrãng chaanrakmîn lahma, Farasi hehwah Niemarang hethôte hehma tatwah ngale thinma toanchep lahma ngatwah: “Nima are mihnyan ko chenjô achhih chohkhemih! Linlinjô Juma komin ba Joban ngintatte hehma akomin atenâng lâthô kotah!”

¹⁰Nginchhiakmîn jenenwah nyahrãng chaanmênwah, phumma sipâhi sahab pa Pol khihkih nyahnyah mahôn waklah o ngama nyahrãng patritwah. Ephumma ate sipâhi hehnâng mihnyan heh chhangko kaletma thinta wah Pol sietka letma sipâhi heh tângthin nâng sietwênrên ngama chienwah.

¹¹Erejâ rangpenko Pol tâko Teso chepka lahma ngatwah, “Nekchei! Nangma nga nginpa are Jeroselem hakko lâthô kotoh, ngale nangma arerãngrãngjô Rom nângmin thôkohmin.”

Pol Ritphe Rãng Ranchap



¹²Eredijâ rangkhahko Jews heh roamchohmîn lahma Pol ritphe rãng thômîn wah. Thinma Pol marit ritphe chenmin lejok phhekchhah min ngama toamsêm wah.

¹³Arepa roakbelii noma ajah mihnyan roamkhôn lahma sêmwah.

¹⁴Erediko thinma Soam aroakte adong ngale khhepho phannang heh tânâng hûlahma ngatwah, “Nima Pol marit ritphe chenmin lejok phhekchhah min ngama toamsem eki.

¹⁵Athângheh ne ngoang awang hehma Roman sipâhi sahhabdong thôanko Pol netânâng chensiet katra ngama ngin matkat en, ngale nima Pol nginpa senthemthem jet huneki ngama diapnga letma matkat en. Phumma ate anâng hokkat mako nima lemnâng tangritphe e.”

¹⁶Phumma are themawa wak ekapa Pol hiak pumma leptatwah; ephumma atema sipâhi heh tângthin nâng kalahma Pol nâng thôkoh wah.

¹⁷Erediko Pol ma sipâhi sahhab wathe roolahma atenâng ngatwah, “Are paangmih pa sahhab dongthôn tâko sietwênkoh; atema chenni akomin thôkohthin tonga.”

¹⁸Sahhab pumma dongthôn tâko sietwên kolahma ngatwah, “Akhhek reki Pol pumma nga roolahma are paangmih pa nâng tânâng sietwênkoh ngama chien ehang, atema chenni komin nangnâng thôkohthin tonga.”

¹⁹Sahhabdong thôn pumma ate dekho lolahma ate demko sietchhoan lahma chhienwah, “Nangma nganâng chenni thôkohthin tonga?”

²⁰Paangmih pumma ngatwah, “Jews thôte jabte hehma Pol ngoang awang heh tânâng sietkatro ngama nang ngewah nênep thâwângrãng jutthômîn eka, ngoang awang hehma Pol junma senthemthem jet huneki ngama ediap jabwak a.

²¹Phumma nangma thin ngin nekkep, chenrãngma ngako roakbelii noma ajah mihnyan hehma lemko huhtong lahma etangbem a. Thinma Pol marit ritphe



chenmin lejok phhekchhah min ngama toamsem eka. Ngale athângheh thinma ritphe rãng lâcheptah, erediko nâng ngin bemwak eka.”

²²Sahhab pumma ngatwah, “Nangma are nginpa nganâng thôkotek ngama hennâng min nekthôkoh.” Ngale atema paangmih pa chien chhoanwah.

Pol Govono Filex tânâng Chienkatwah

²³Erediko sahabdong thôn pumma ate dikowah sahab wanii roolahma ngatwah, “Chânii sipâhi Kasaria nâng katrãng chep achã thuk en, thindemko Moknâng chhangte sipâhi roakengit, ngale pah semte sipâhi chânii chepthuk letma, thejâ rangpenpen wanekhu sanpoatko jâkhoam en.

²⁴Pol chhângrãngmin Mok wanthe lemkoh en, ngale Govono Filex tânâng senthemthem hûsietkat en.”

²⁵Erediko sahab pumma siti aroh raanglahma kohwah:

²⁶“Adongthôn Govono Filex, arepa Kladius Lisias ma raangki: Khebeng thôanko Salem.

²⁷Jews hehma are mihnyan pa lolahma, ritphe nemwah. Phumma ngama atea Roman mihnyan ngama lepjet lekma, nga sipâhi heh demnâng kalekma pepâng katwah.

²⁸Thinma chenni junko sekham eka erepa jethun lekma, ngama thin ngoang awang heh tânâng sietkatwah.

²⁹Ngama atea lânrit pheroh, ba phâtek nâng lânsekroh chhihmo lahma chohkhemek; atenâng sekham ekapa thindede Niemarang heh junko sekham wakeka.

³⁰Ngale chenthu mihnyan hehma ate ritphe rãng themawa pa chothôkoh phumma, ngama lemlienma nang tânâng chienkat erâng. Ngama ate sekhamte hehnâng nang tâko sekham ka en ngama lâthô kotek.”

³¹Sipâhi hehma sahabdong thôn ngin keplahma erejâ rangpenpen ko Antipatris nâng lanhuroh Pol sietkatwah.



³²Eredijâko dakhoam sipâhi katah heh thin tôngthin nâng ngakwâng wah ngale Moknâng chhang lahma katah sipâhi heh Pol demnâng johkat thukwah.

³³Thinma Pol Kasaria nâng sietkatwah, sitipa Govono nâng chohkoh wah, ngale Pol min atenâng chohkoh wah.

³⁴Govono ma sitipa weih lahma Pol nâng nanga henjaa wah a ngama thôngphâ wah. Phumma chenthu Pol a Kilikia jaa wah ngama jetphumma,

³⁵atema ngatwah, “Chenthu nang sekhamte heh mehûkhoam theko nang nginpa ejetattan e.” Erediko atema Pol abemte heh demnâng Govono humko chenbemwak a ngama chienwah.

Moatlem 24

Pol nâng Sekham

¹Jâbangâ diko Soam aroakte adongthôn Anania pa Kasaria nâng ate demko khhepho phannang heh ngale nginpatte wathe ate mînpa Tertullus sietlahma katwah. Thinma Govono Filex tâko hûlahma Pol lelatnâng jabwah.

²Ephumma Pol humkhen nâng roolahma Tertullus ma ate lelatnâng aroh loatngatwah: “Adongthôn Govono! Nangma senthemthem pen lohma ajahthem rangpâ mêmoma songeki, ngale ajahthem achhih heh litsiet lohma nãngdiak rãngma asenli mowên ero.

³Nima arepa chentô thenâng ngale roantang aroh chendanga ngama huneki, ngale nima nangnâng nyahrãng dangkoh a ngaeki.

⁴Ngale ngama nang sanpoat kowah ajahthem kep hunmek, rohkomin ngama are amãnychha nginthô ekãngko mamjetat mêngo ngama rosep eki.

⁵Nima are mihnyan pumma nyahrãng acheili hahroksiet lahma kheki; atema rangkhen wah Jews hehnâng hahjamsiet eka, ngale atea Nazaren heh khoko adong.

⁶Atema Rangsoamhum pa ngeksietrãng huneka, ephumma nima lokhhek eki.

⁸Nangma are mihnyan ko methongpha oko, nima atenâng sekham eki heh nang dedema atewah echohjet o.”



⁹Jews heh phangtang johrû wah ngale erengin pa phangtang toangtang ngama ngatwakwah.

Govono Filex Mathah ko Pol ma Ate Junma Nginthô

¹⁰Erediko Govono ma Pol nâng jab o, ngama thakkat kolahma Pol ma jabwah, “Ngama ajet nanga are diakko melâng rangpâ nginpatte lâdangtoh, erohwah ngama rinroan lekma nang mathahko ngajunma jabekang.

¹¹Nangdede mejô ejet o, nga Jeroselem nâng rangsoam rãng katekwah echhi jânii noma ajah madang eka.

¹²Jews hehma Rangsoamhum nâng hen demnâng min chhiakmîn lekma khemah thang, ngale Sanagog nângmin ba Jeroselem hahko chenre thenângjô jamsiet lekma khemahthang.

¹³Ngale thinma athângheh nang tânâng nga lelatnâng jabeka hehmin are junko sekham eki ngama takhesok mahho.

¹⁴Ngama nangnâng arepa thôkoh eki: Ngama nãngte nãngwa hehma soamtô tah Joban ko soamtô ekangpa thinma ledangli ngama ngaeka. Ngale Mosa ma raangtah Niemarang ngale mõng hehma raangtah chentô nâng putedâlem ekang.

¹⁵Ngamemin Joban nâng are mihnyan hehma putedâlem eka rãngrãngjô putedâlem ekang, achhih asen, phangtang ritwah ngakhînmin, ngama putedâlem ekang.

¹⁶Erohwhah ngama roantang chenpa Joban ngale mihnyan rãng asen a erepa moatrãng latrii ekang.

¹⁷“Phumma Jeroselem nâng ajahthem rangpâ lehû thangma tôngdiko, enângwah ngalemru hehnâng ngun katkoh erediko soam aroak rãng katwah.

¹⁸Ngama arepa moatthuko thinma Rangsoamhum ko lepkhe wakthang erepa ngama seksâsiet niem pa tâhôn diko lepkhewah. Ngale ereko mihnyan min ajah dangho erediko hahjam tijammin dangho.



¹⁹Rohkomin Asia diakwah Jews heh ba khuthe dângwah; thinma nganâng chenni komin sekham thin metong ako thindede hûlahma nema thahko sekham minwah.

²⁰Roh akole ngoang awang heh tâko chenni nâng thelekma khethanga erepa are mihnyan heh ma chenthô tan a -

²¹Ngama thinmako cheptek poatko khapthe loloba hongjabtek: ‘Ngama ritte heh ngakhînmin ngama putedâlem junkoba thejâ nema sekham eha.’ ”

²²Filex ma Jisu junma nginpa khema thuma senthemthem jetlahma dângwah, erohwah atema ngoangthun pa jeksietwah. Atema thinnâng thôkoh wah, “Chenthu sipâhi sahabdong thôn Lisias mehû theko,” “Ngama ne nginpa ephensiet ang.”

²³Phumma atema Pol bemte sipâhi sahabko Pol sipâhi hehnâng bemthuk rãng chienwah, rohkomin lekhak thangma thien en, ngale atema chenni huneka ereheh ate lemruçha heh ma kephokkoh pemin nektang en.

Pol ma Filex ngale Drusila Niinâng thôkoh

²⁴Jâthe jânii diko Filex le ate dihiak Drusila nii katwah, phumma Drusila pa Jews dângwah. Atema Pol rooka thuk lahma Pol ma Jisu Krista nâng putedâlem ngin thôkoh eka heh jettatwah.

²⁵Phumma Pol ma toangtangma song ngin, mâmâ dedema hung môngsiet ngin, erediko ahokmin Rangwo ko Joban ma hen mihnyan ma chhih asen motah a ereheh ren ngin thôkoh phumma, Filex chei lahma ngatwah, “Nang athângheh tachhoan o. Ngama chenthu sanpoatchoh ekanga eko thengakrooe.”

²⁶Ngale Pol ma ngunwah ekoh thêhang ngama thonghun lahma Filex ma Pol roowah; ngale Pol wah ngun machoh lek o ngama Filex ma Pol depdep roothuk lahma Pol demnâng ngin chithômîn wah.

²⁷Rangpâ pânii lien diko Porkius Fistus pa Filex litko Govono dângwah. Phumma Jews heh ma chensen chohang ngama Filex ma Pol phâtek nâng seklahma phethien wah.



Moatlem 25

Pol ma Chofa nâng Roatsep

¹Fistus pa Govono danglahma jârem diko, ate Kasaria wah Jeroselem nâng wângwah,

²Eko Soam aroakte adong heh ngale Jews khhepho phannang hehma Pol lelatnâng ngin kephokwah. Thinma Fistus nâng roatsep wah

³thinma Pol Jeroselem nâng chen kara ngama roatsep wah, chenrãngma ngako thinma lemko tangritphe rãng phungwah.

⁴Fistus ma dânthâng wah, “Pol Kasaria wah phâtek nâng khhekthien eki, ngale ngamin enâng sitsiak ngakwângmin.

⁵Atema chen komin mechhih motahko ne khhepho phannang heh nga demnâng Kasaria nâng johwâng lahma chensekham wãngra.”

⁶Fistus thin demnâng jâesat ba jâechhi rãng johtôngthien lahma Kasaria nâng ngakwâng wah. Eredijâko ate tôngthinko nginpatrãng tonglahma Pol thintâko siethok rãng chienwah.

⁷Pol hokphumma, Jeroselem wah hûtah Jews heh Pol tumlit cheplahma ate lelatnâng nyahrãng chaan sekham wah, rohkomin thinma are junko sekham eki ngama khesokthin thelahma aho dângwah.

⁸Phumma Pol ma atedede junma jabwah: “Ngama Jews Niemarang lelatnâng themomek, ngale Rangsoamhum lelatnâng min momek, erediko Roman Chofa lelatnâng min momek.”

⁹Phumma Fistus ma Jews hehma chensen chohang ngama, atema Pol nâng chhienwah, “Nangma Jeroselem nâng kalohma are nginpa nga demnâng phensiet hun ekole?”

¹⁰Pol ma dânthâng wah, “Nga a Chofa nginpat thinko chep ekang, areko jôba nga nginpa thômînmin. Nangdede memin senthemthem ajet, ngama Jews hehrãng chenmin chhihmomek.



¹¹Ngama niemarang chhihsiet lekma chhihmoat junko ritphe ngako, nekrit pheha ngama lerosep minwah. Phumma thinma nganâng sekham ehangpa toangtang ledang medang ako, nga henmemin thindeknâng takoh mahha. Ngama arepa Chofa nâng rosep ekang.”

¹²Erediko Fistus ma ate khenwah ngoang awang heh demnâng thômîn lahma dânthâng wah, “Nangma Chofa nâng rosep eko, erohwah nânga Chofa tânâng sietkatmin.”

Agripa ngale Bernic Nii Mathah ko Pol Siethok

¹³Melâng rangwo dinâng lowang Agripa le Bernic nii Fistus demnâng chohmîn rãng Kasaria nâng katwah.

¹⁴Enâng thin jâthe jâniî tângdiko Fistus ma Pol nginpa lowang nâng thôkoh wah: “Anâng Filex ma phâtek nâng khhek wah mihnyan wathe tonga;

¹⁵phumma nga Jeroalem nâng wãngtekko, Jews Soam aroakte adong ngale khhepho phannang heh ate lelatnâng hûlahma lâthetah ngama nginpat hân o ngama chienhûwak ehang.

¹⁶Phumma ngama thinnâng thôkotek, ni Roman jatma atenâng sekhamte heh demnâng chen junko sekham eka ererãngma atedede chohjabmîn lahma ate khope ngin lejabthuk thangma mihhan deknâng kohlihma sekhamthuk niem aho.

¹⁷Chenthu thin anâng hokphumma, ngama, rangwolo lelekthien thangma, eredijâko ngin patte tângthinko tonglekma mihnyan pa siethok rãng chienwah.

¹⁸Atenâng sekhamte heh ma toanchep lahma ngatwah, rohkomin ngama thonghuntek rãng rãng chhihmo lahma sekham wakmah.

¹⁹Thinma ate demnâng thin rangsoam niem, ngale Jisu ngama riitah, ere wathe mihnyan junma lolo chhiakmîn eka; phumma Pol ma ere mihnyan pa ahîn ngaeka.



²⁰Ngama arepa chenjuko sekham ekapa chenroh chohjet anga ngama mokritwah, erohwah ngama Pol nâng are ngingpa nangma Jeroselem nâng kalohma phenthômin kat hun ekole ngama chhienwah.

²¹Phumma Pol ma roatsep wah; sipâhi nâng bemthuk hang, ngale are ngingpa Chofa ma chenphensiet a ngama ngatwah. Erohwah atea Chofa tânâng masiet sietkat sipâhi hehnâng bemthuk rãng chienwah.”

²²Agripa ma Fistus nâng ngatwah, “Nga dedema are mihnyan kowah chohtat hun ekang.” “Nangma nènep echohtat o,” ngama Fistus ma dânthâng wah.

²³Eredijâko Agripa le Bernic niima sipâhi sahhabdong ngale erehah kowah khhepho phannang heh sietlahma nyahrãng soangraangrii lahma ngoangthun humko katwah. Erediko Fistus ma hum khennang Pol sietwênrãng ngatwah.

²⁴Fistus ma ngatwah, “Lowang Agripa ngale are nidemwah chentô heh: Nema are mihnyan ko sûtan en, Chentô Jews heh ate lelatnâng chep eka, anângwah hehmin ngale Jeroselem wah heh memin, ate lelatnâng thôhûkoh ehang. Thinma ate lehin thuktumin ngama rakwak eka.

²⁵Rohkomin ate lanritpheroh chenjô chhimo lahma chohkhemek. Ngale ate dedema Chofa nâng roatsep phumma, ngama Chofa tânâng chienkat erâng.

²⁶Rohkomin ngama ate junma Chofa nâng khehkheh raangthin aho. Erohwah ngama nekhû mako siethû erâng - khehkheh pejô Lowang Agripa nang tâko siethû erâng! - erohkoba, atenâng thôngphâ diko, ngama chenni akomin echoh raangang.

²⁷Chenrãngma ngako nga junko khhek rekapa chennâng thelahma sekham eka erepa lejet thangma chienkat pa senmah.”

Moatlem 26

Pol ma Agripa Mathahko Ate Dede Junma Jabwah

¹Agripa ma Pol nâng ngatwah, “Nangma nangdede junma jabthin metong hoko tajab o.” Phumma Pol ma ate deklaang lahma aroh jabwah:



²“Lowang Agripa! Thejâ ngama nang mathahko cheplekma Jews heh ma sekham ehang junko ngadede rãngma chohjab pa khengraangsen ngama thonghun ekang,

³Nangma senthemthem ajet Jews heh niemarang ngale thin chenjunko chhiakmîn ekapa. Erohwah, hungmông sietlohma jetat mênghang ngama rosep eki.

⁴“Leta thuma nga chenroh songtongtek a ereheh chentô Jews heh ma jethang. Khebengko nidiak nâng, erediko Jeroselem nâng nga roangdong chenroh dongtek a ereheh thinma jet.

⁵Thinma khema thuma ajet, ngale thinma thôhun medang ako tathô kohho, nga khebeng thuma nãng rangsoam niem pa senthemthem keplekma tôngwah, ngale nga Farasi dângwah.

⁶Ngale thejâ nga aretheko chepkangpa Joban ma nãngte nãngwa hehnâng toamhoantah nginko putedâlem di sekhamrãng chepekãng -

⁷arepa chohrãng jôba nãng echhi jatnii mihnyan tonga heh ma Joban nãng dâlem lahma, rangwo rangnyek soamtô eka. Ngale Lowang Agripa, ngama ereko putedâlem di jôba are Jews heh ma sekham ehang!

⁸Chenrãngma arekowah tôngte nekhuma Joban ma riichoante heh ngakhinsiet eka ngama leputedâlem reken a?

⁹“Ngadede memin Nazarat wah Jisu lelatnâng chentô tatamo angpa moatrãng thônghun wah.

¹⁰Ngale ngama Jeroselem nâng eroh motek. Ngale Soam aroakte adong heh ma chaan kohlahma ngama Joban mihnyan heh jahmông phâtek nãng sektek; ngale chenthu thin ritphe rãng nginpatko, ngamin thin lelatnâng jabtek.

¹¹Melângdep ngama Sanagog hehnângmin chêmsiet lekma thin putedâlem jeksietkrãng thatmotek. Nga thin demnâng cheili rinkhah lekma mihdiak nãngmin thin chêmsiet rãng chhoanwah.

Pol ma Ate Litjâ Nginthôkoh



(Moatlem 9.1-19; 22.6-16)

¹²“Soam aroakte adong hehma nganâng chaan kohlahma thin hôkum pa keplekma Damaskas nâng putedâlemte chêmsiet rãng katwah.

¹³Adongthôn Lowang Agripa, ngihmongko lemnâng dângpoatko, ngama san nomemin phiakdong, rangkho wah nga ngale ngademwah mihnyan heh tumlitko phiakkat lahma khewah.

¹⁴Phumma nikhu phangtang hahko kôanjâwah, ngale nganâng Hibru jabma ngalahma tatwah, ‘Sol, Sol! Nangma nganâng chenrângma chêmsiet ehanga? Mânpong pumma ate tângtewa thankahko dama ngakphinkat rângrâng, nangdede nângba ngakwatrii eko.’

¹⁵Phumma ngama chhienwah, ‘Teso, nanga hen a?’ Ngale Teso ma dânthâng wah, ‘Nga a Jisu, nangma chêmsiet ehanga.

¹⁶Rohkomin satlohma nang dama chep o. Nanga ngahaa dângthukrâng nang demnâng chohmîn eki. Nangma thejâ nga chenroh khethanga erepa thejâ ngale khedi kowah ngama nangnâng khesokmin hehmin mihnâng phoangthô kohmin.

¹⁷Ngama nanga Isrial mihnyan ngale Jews ledangte heh tânâng echienchhoan e, Ngale thinwah pepâng lihma ethien e.

¹⁸Nangma thinmit kânsiet kohmin ngale rangnyek khenwah rangwo nâng loatsietmin, ngale joak ajo khenwah Joban tânâng loatsietmin, erohkoba thinma nganâng putedâlem junko thinpap heh map chohlahma Joban mihnyan heh chhangnâng thithe echoh a.’

Pol ma Ate Moatlem heh Thôkoh

¹⁹“Ngale Lowang Agripa, Ngama rangkhethung wah thânkhetek pemin lekep jiendângmek.

²⁰Ngama khebengko Damaskas nâng, ngale Jeroselem erediko Judia diaktang wah Jews ledangte hehnâng, Ngama thinpap wah hungngaklit letma Joban tânâng ngakhû ren, ngale papwah hung littih ngama kheli moatlem mo en ngama phoangthôkoh ekang.



²¹Are rekwah nga Rangsoamhum nâng dângpoatko are Jews hehma loehang, ngale ritphe rãng hun ehang.

²²Rohkomin thejâ tôko Joban ma Nganâng chohsû ehang, ngale erohwah Ngama thejâ ako cheplekma, adong arin chentô nâng khoaktheko thôkoh eka. Ngama chenni ngaekãnga erepa Mông hehma ngale Mosa ma jabtah pa dângwâng ngin pejôba jabekang:

²³Misaia pa metkep chêmmin ngale ritwah khebeng thôn ngaksat lahma, khope wenphiak nginpa Jews ngale Jews ledangte hehnâng phoangthô kohmin.”

²⁴Pol ma atedede junma aroh thôkoh poatko, Fistus ma atenâng rakkatwah, “Pol, nanga apa reko! Nangma nyap ajah weiheko pumma apa thukre eho!”

²⁵Pol ma dânthâng wah, “Adongthôn Fistus! Nga apa dangmek, Ngama toangtang jabkãng.

²⁶Lowang Agripa! Ngama nangnâng phangtang loatthôkoh eki, chenrãngma ngako, nangma areheh ajet. Ngale Ngama thonghun ekang, nangma are chentôpa lâtattoh, chenrãngma ngako, areheh bin abe thenâng huhdâng dangwah.

²⁷Lowang Agripa, nangma Mông hehnâng putedâlem ekole? Ngama ajet nangma putedâlem eko!”

²⁸Agripa ma Pol nâng ngatwah, “Aretô sanpoat thoanchhako nangma ngamin Kristan dângthuk hun ehanga?”

²⁹Pol ma dânthâng wah, “Sanpoat thoanchha dangkolah alonyong dangkolah,” “ngama Joban nâng rangsoam pa nangmin ngale thejâ are thekawah ngangin jetatte hehmin phangtang nga rãngrãng chendangen ngama soam ekang - rohkomin, are janruko nga khhekrii ekang rãngrãng khhekrii en ngama soam dangmek!”

³⁰Ephumma Lowang, Govono, Bernic, ngale ahan hehmin phangtang tôanchepwah,



³¹Ngale erekowah loatchhoan diko thin jabmîn wah, “Are mihnyan pumma ate lanrit pheroth ba phâtek nâng lânsekroh chenjô chhihmomah.”

³²Ngale Agripa ma Fistus nâng ngatwah, “Are mihnyan pumma Chofa nâng lerosep ngako lanta laangpheroth dângwah.”

Moatlem 27

Jogarii ma Pol Rom nâng Chhangkat

¹Chenthu nia Jogarii ma Itali nâng katrăng ngatko, thinma Pol ngale ahan phâtek nâng tôngte heh Julius, “Chofa Regimen” ngamemin eka Roman regimen sahhab nâng kohwah.

²Nia Adramitiem wah jogari ko chhangwah, erepa Asia diakwah jogari chepthin thenâng katrăng cheplahma dângwah, ngale erepumma ni chhoanwah. Thisalonika wah Mesidonia mihnyan Aristakus, pa nidemko dângwah.

³Eredijâko nia Sidon hahnâng hokwah. Julius pa Pol demnâng asen dângwah ngale ate lemru heh demnâng Pol chohmînchhoan thukwah, ngale atema chenni lemeka erehehmin chohkoh thukwah.

⁴Nia Sidon hahwah loatchhoan wah, ngale pôngpa ni ngenâng metwah, pông lemetthe jotungwah Sipras hah ngenâng katwah.

⁵Nima Kilikia ngale Pamfalia wah josi heh danlihma Likia wah Mira hahnâng katwah.

⁶Eko sipâhi sahhab pumma Alexendra wah Itali nâng kate jogari chohwah, ephumma atema ni ereko chhangthukwah.

⁷Jogari pumma rere chhama melâng rangwo chhoan lihma Nidas hahnâng hokwah. Phumma nia ere ngenâng pôngma wãngthuk tuho, ephumma Salomi hah danlihma, pông lepongthe jotungwah Kret hah ngenâng katwah.

⁸Nima jokông kôngma nyahrăng chêmlihma jogari pechep thinthe ngama ngaeka theko hokwah, erethepa Lasia hahwah chentô letaangko dângwah.



⁹Eretheko nia rangwolo tângthienwah, ephumma nia jogari ma chhangchhoan pa nyahrãng acheili dângtuwah, ngale ere sanpoat pa Jews hehma lejok phhekchhah thangma rangsoam sanpoat pa lienchoan dângwah. Ephumma Pol ma thinnâng aroh thôkoh wah:

¹⁰“Mihnyan heh, ngama nãng arethe kowah loatchhoan pa nyahrãng acheili khekãng; Jogarii ngale sêmmak hehmin ajahthem eta chhihjâa, ngale nãngmin eta mahriie.”

¹¹Rohkomin sipâhi sahhab pumma jogari kepten ngale tângte nii ngin keplahma, atema Pol nginlekep dângwah.

¹²Erethepa rangpa ko jogari cheprãng lesen dângwah; erohwah chentôma jogari pa ere thekawah loatchhoan lahma Fonik hahnâng hokkat hunwah, meta dangako, rangpa pa enâng tânghun wah. Fonix pa Kret diaknâng jogari chepthinthe, erethepa dekhith wah sannyup ngale dekchah wah sannyup nângmin ama tuta ngiak lahma dângwah.

Josi Mongnâng Pôngdong Patdong

¹³Dekhit wah pông bângwut hokwah, ngale mihnyan hehma nãngma huntih pa eta danga ngama thânghun wah, ephumma thinma jogari chepbenthin janphak pa putphe waklahma Kret hah kekema repkatwah.

¹⁴Phumma lemlienma pôngchaan mông - “Dekchah ngewah pông” - ngama ngaeka pa jotungwah hah kowah pônghokwah.

¹⁵Erepông pumma jogari ko metwah, ngale jogari pa pôngthunko amanâng leta wãngtu dâng phumma, lechêm thatreptu thangma pôngma chennâng metchhoan eka eroh metchhoan thukwah.

¹⁶Nima jotungwah Kauda hah arinchha pa danlihma pông lemetthe roanche chohwah. Eretheko, nima jogari kowah khôankho pa, chaanma mampesiet wah.

¹⁷Thinma jo khôankho pa jogari ko sekwên lahma ruma jogari ko kitkit khhekwah. Thinma jogari pumma Lidia jowah senâng matunglih o ngama



cheiwakwah, ephumma jogari kowah pông pûnwutthin pa numsiet lahma pôngma chenroh metchhoan eka eroh metchhoan thukwah.

¹⁸Pôngpa lejek thangma nyahrăng cheili pôngwah, ephumma khedi jâko thinma Jogari kowah sêmmak khaka toanphewah,

¹⁹ngale eredi jâ komin thinma jogari sêmmak heh wahmin khaka patphewah.

²⁰Melâng rangwo nima sanmin, ngale meritmin chohkheho, ngale pông pemin lejek thangma nyahrăng chaanpôngwah. Nimin bâmpe tumih ngama thônghun wah.

²¹Jogari kowah mihnyan heh lephhekchhah thangma melâng rangwo dângdiko, Pol thin mathahko toanchep lahma ngawah, “Mihnyan heh nema ngangin kepletma Kret wah leloatchhoan nomako; nãngma are sêmmak hehmin lemahphe minwah ngale lechhihmin wah.

²²Rohkomin ngama nenâng rosep eka, hung nekchha en! nekhu henmin leriimin; jogari loloba echhih jâ.

²³Thepen Ngama soam ekang ngale Nga aterăng hin ekang Joban ngintatte ngatânâng kalahma

²⁴nganâng thôkoh ehang, ‘Nekchei, Pol! Nanga Chofa tâko metkep chepmin. Ngale Joban ma nangnâng mînchen lahma nangdemwah jogari kowah johchhangte hehmin epesiet a.’

²⁵Mihnyan heh! erohwah hung nekchha en, Ngama Joban nâng putedâlem ekang, Nganâng chenroh thôkoh thanga erohjô edanga.

²⁶Rohkomin nãnga jotungwah hahnâng emethûhi.”

²⁷Echhi pen belijâ rangpen ko, nia pôngdong pumma Mediteranien josiko ditmetwah. Phumma rangpen mongko jogari repte pumma jokah lâhû themtih ngama thônghun wah.

²⁸Ephumma thinma runâng athakthin khhek lahma joko chentôlu dangeka pa jetrăng chaamphe katwah. Phumma jopa roak belii mitatlu dângwah; Chuthe dikomin thatthak tahpa roakrem mitatlu dângwah.



²⁹Thin a jogari pumma longnâng matunglih o ngama chei wah, ephumma jogari tokdi nge pumma janphak wanbelii joko chaamphe katwah ngale rangwo rãng rangsoam wah.

³⁰Erediko arepte heh jogari kowah huhchhoanrãng phungwah; thinma jogari kowah khôankho pa joko jâsiet katlahma jogari khema ngema janphak heh chaamphekat e ngama diapdâng wah.

³¹Phumma Pol ma sipâhi sahhab ngale sipâhi hehnâng ngatwah, “Arapte heh jogari ko letong kako, ne leta pemin.”

³²Ephumma sipâhi hehma khôankhoko thiet eka ruheh patdoak lahma khôankho pa chhoanthuk wah.

³³Rangwo nemnemko Pol ma thinkhu anga nganâng chenni komin phhekchhah en ngama roatsep wah: “Thejâ tôko nema echhi jâbelii rangwo lâbemtet, eretô rangwo ko nema chenmin lephhekchhah ma lâdangtet.

³⁴Erohawah, ngama, nenâng tâhînřang; chenjamin phhekchhah en ngama rosep eka. Newah khochoo lathemin lemahmin.”

³⁵Pol ma aroh ngatdiko, atema bankên roanche toanlahma, thin anga nga mathahko Joban nâng dangkoh a ngat rangsoam soam lahma, atema chhupsiet, lahma phhekwah.

³⁶Thinhung dôngwah, ngale thinkhu anga ngama phhekchhah roanru chhahwah.

³⁷Nia jogari ko phangtang tungko 276 rãng chhang lihma dângwah.

³⁸Anga ngama phoatphoat phhekchhah diko, thinma jogari pa chenchãa ngama chhah heh phangtang joko phekatwah.

Jogarii pa Chhijâ

³⁹Rangwo komin arepte hehma jopha pa jetloho, rohkomin thinma jotungnâng chihthienwah jopha lepkewah, phumma meta dangako, thinma jogari pa eretheko chepthukrãng thônghun wah.



⁴⁰Ephumma thinma ruheh patdoak lahma janphak heh joko thumjâkat thukwah, ere demdemko jogari pûnchhoan thukrăng ama ngeko khhek ekaru hehmin jânwah. Erediko pôngma jogari pa ama ngenâng chenmetwên a ngama pông pûnmetthin pa ama ngeko laanglihma, jophanâng repwênwah.

⁴¹Rohkomin jogari pumma sekhohnâng tunglahma mânritwah; phumma ama ngepa chhihjá lahma lejien phongtu dângwah, ngale khedi nge pemin jowaak chaan pumma chhupchhup chhachha lândangroh chhihsiet wah.

⁴²Phumma akhhekte heh sârannâng danju lahma môang huhchhoan a ngama sipâhi heh ma phangtang ritphe răng thônghun wah.

⁴³Rohkomin Sipâhi sahhab pumma Pol pepâng hunwah, erohwah atema leritphe thuk wah. Enoma henhen jojûjet a ereheh jogari kowah jâtoakka letma sârannâng bengdân juwângen ngama chienwah;

⁴⁴khaka heh ma bângkha hehnânglo, erediko jogari wah chhupjâeka hehnâng lolahma jûnjû wângwah. Ngale eroh relihma nikhu anga nga sârannâng pehokwah.

Moatlem 28

Malta Hahnâng

¹Chenthu ni sâran nâng senthemthem pehok diko, nima jotungwah hahpa Malta hah ngama jetwah.

²Ere hahwah mihnyan heh nidemnâng nyahrăng asen dângwah. Phumma rangpat hongpat lahma rangchhông dângwah, erohwah thinma wenthhek lahma ninâng wenko tôngrăng roowah.

³Phumma Pol ma chan roapthe khôantoan lahma wenko thhek thuko akham junko chan kowah pû hongloat lahma Pol dekko depwah.

⁴Ere hahwah mihnyan heh ma Pol dekwah dep eka pûpa khelahma jabmînwah, “Are mihnyan pa mih ritphete dângmin dede, atea jowahjô mepe akomin, khengraang pumma atea lehinthuk tumin.”

⁵Rohkomin pû pumma atenâng lekek thangma Pol ma wenko jâhekwah.



⁶Thinma Pol nâng aphîn ba lemlienma hahko loangrii lahma eriaa ngama thônghun wah. Rohkomin ajahthem sanpoatsok dikomin Pol nâng chenjô ledang khe phumma thinma ngakthônghun lahma ngatwah, “Atea Joban!”

⁷Erethe kowah chentô letaanko erehah kowah adongthôn Publius pit dângwah. Atema ninâng nyahrăng khuhah nâhah tângroo lahma ate humnâng jârem tôngthienwah.

⁸Publius wa pa khun ngale heichhoan ma ate jupthinko dângwah. Pol ate jupthinko wãng lahma, ate khohko dekma sahlo lahma rangsoam kolahma mesietwah.

⁹Chenthu erepa sen phumma, jotungwah hah wah ahan khunte chentôpa hûlahma mesiet wah.

¹⁰Thinma ninâng hinhô jahmông kohthi, ngale chenthu ni enângwah jogari ma chhoanrăng chepko, nima lemko chenlem ekia ereheh thinma jogari ko sekkothi.

Malta Hahwah Rom nâng Hok

¹¹Jengrem diko Alenxendra wah, “Joban wanii,” ngamemin eka jogari pumma ni chhang chhoanwah, erepa jotungwah hahko rangpa pa tângkatwah.

¹²Ni Sirakas hahko hûlihma enâng jârem tôngthienwah.

¹³Erethe kowah wienchhoan lihma Rigium hahko hokwah. Eredijâko dekhith wah pông hôngpông hokwah, ngale jâni khenko ni Putioli hahko hokwah.

¹⁴Enâng nima putedâlemte mihnyan roanche chohmin lihma thin demnâng haptathe johtôngrăng rosepthi. Eroh relihma ni Rom nâng hokwah.

¹⁵Rom wah putedâlemte hehma ni ngin tatlahma Apius hahwah phin athã sengthe ngale Hum Dângrem ngaeka hah tôko kalahma nidemnâng chomîn katwah. Chenthu Pol ma thin khe phumma, atema Joban nâng dangkoh a ngatwah ngale nyahrăng hungdôngwah.

Rom nâng



¹⁶Chenthu ni Rom nâng hokphumma, sipâhi hehma bem lahma Pol atelolo songthukwah.

¹⁷Jârem diko Pol ma enângwah Jews khhepho phannang heh ngoangthun rãng roowah. Chenthu thin khôanhok phumma, Pol ma thinnâng ngatwah, “Ngalemru Isrial heh, ngama nãng mihnyan hehrãngmin chenjô lechhihmo ngale nãngte nãngwa heh niemarang min lechhihsiet nâng, Nga Jeroselem phâtek nâng khhek lahma Roman mihnyan heh deknâng koh ehang.

¹⁸Nganâng nginthôngpha diko, Roman hehma nga thinphe hunwah, chenrãngma ngako thinma nga lanrit pheroh chenmin chhihmo lekma chohkhe mahthang.

¹⁹Rohkomin chenthu erepa Jews hehma dan phumma, Ngama Chofa nâng roatsep wah, rohkomin arepa ngama nãng mihnyan heh lelatnâng chhihngatrãng dangmah.

²⁰Erohwhah Ngama nang demnâng chohmîn lekma jabmîn hunwah. Rohkomin linlinko, nga are janruko khhekrii ekangpa Isrial hehma putedâlem eka mihnyan rãng khhekrii ekang.”

²¹Thinma Pol nâng ngatwah, “Nima Judia wah nangrãngma chenni sitijô chohmih, ngale enângwah ni mihnyan kawak era hehmemin chenni nginjô thôkat mahra, ngale nangnângmin chenjô chhihthô mahho.

²²Rohkomin nangma chenthônghun eko erepa nima chohtat huneki, chenrãngma ngako nima ajet chentô thenâng mihnyan hehma are nang johrôam eko heh lelatnâng chhihjab eka.”

²³Ephumma thinma Pol demnâng rangwo kahtok hânwah, ngale ere rangwo jâko Pol tongeka theko jahmông mihnyan hokwah. Rangkhah khawah rangnyek kotuk Pol ma thinnâng Joban Hahsông nginkongpa thôkoh wah, ngale atema Mosa Niemarang ngale Mông hehma raangwah Joban ngin hehwah thakthô lahma mihnyan hehnâng Jisu junma thôkoh wah.

²⁴Khaka ma ate nginpa putedâlem wah, rohkomin khaka hehma putedâlem ho.



²⁵Ephumma thindede tungko nginthun lejut thangma dângwah, phumma thin phanchhoan mako, Pol ma thinnâng are jabkhab khabtheпа ngatwah: “Asâthôanju junma Mông Isaia ma nete newa hehnâng chentôsên ngatwah a!

²⁶Atema aroh ngatwah, ‘Chhoan lohma are mihnyan hehnâng thôkoh: Nema atatpa etat en, rohkomin lejet tatmin; Nema asokpa esuen, rohkomin lekhemин,

²⁷chenrãngma ngako are mihnyan heh hungpa bajâ tah, ngale thinnâpa hap rewak eka ngale thinmitpa thup rewak eka. Eroh ledang ngako, thinmitma khemin wah, ngale thinnâ memin tatmin wah, ngale thinhung memin chenjettah, ngale thin a ngatânâng ngakhû lahma, Joban ma ngaeka, ngama sênsiet minwah.’ ”

²⁸Ngale pol ma jekthôwah: “Nema arepa jet en, Joban ngewah khope nginpa Jews ledangte hehnâng matchhoan eka. Thinma ejetat a!”

³⁰Pâni rãng Pol ma thâkoh lahma erethe kowah hum wanthenâng sôngwah, ngale ere humko ate demnâng chohmîn hokte anga nganâng nyahrãng khuhah nâhah tângroo wah.

³¹Atema Joban Hahsông ngin ngale Teso Jisu Krista nginpa, lechei thangma ngale lesoang thangma phoang hethô wah.



Rom

Rom 1

- ¹Jisu Krista haa ngale Joban ma ate nginkongsen phoangthô rãng rênwah moattat chhoante, Pol ma raangeka.
- ²Nginkongsen pa Joban ma ate mông heh junma khema thuma toamhôn wah, erepa Asâthôn Joban nyapraang nâng raangeka.
- ³Arepa ate Chha, nâng Teso Jisu Krista junma hôanwah: atea phoangpa mihnyan nyuchha rãngrãng, Devit pôali wah hôngchhatwah;
- ⁴roh-komin atea Asâthônju junma, ritwah ngakhinsiet lahma Joban Chha ngama khesokwah.
- ⁵Ate junma Joban ma nga Jisu Krista moattat chhoante dangthuk ehang, erepa chentô diak akan wah mihnyan heh Jisu Krista nâng putedâlemte ngale ate ngin kepte dângthukrãng ren ehang.
- ⁶Areko ne Rom wah sôngte hehmin roam eken, Joban ma nemin Jisu Krista rãng dângrãngma roohên.
- ⁷Ngale erohwah Ngama Rom wah sôngte nekhu chentô nâng raangeka, nekhu nâng Joban ma hun ehên ngale atedede mihnyan dângrãng roohên: Nâng Wa Joban ngale nâng Teso Jisu Krista ma nenâng mînchenchaan ngale mêmô chenkohhên.

Dangkoh a Ngat Rangsoam

- ⁸Khebeng thôanko, Ngama nga Joban nâng Jisu Krista junma nekhu chentôrãng dangkoh a ngaekang, chenrãngma ngako rangkhen phangtangma ne putedâlem nginpa tateka.
- ⁹Joban ma ajet, ngama toangtang jabekang - are Joban ko Ngama ate Chha Nginkongsen pa phoangthô lekma ngahung phangtang koh lekma soamtô ekang. Joban ma ajet ngama
- ¹⁰rangsoam roakweih nekhu thônghunjû. Ngama Joban nâng rosep ekang ate hungsi medang ako athângheh nekhu demnâng chenmam chohmîn thukhang.



¹¹Ngama nekhu chohmîn nyahrãng huneka, chenrãngma ngako Joban Juma rangkoh ehi heh nekhu demnâng roam lekma nekhu rôngsiet huneka.

¹²Ngama ngaekangpa nãngkhu dede chohsûmîn e ngama ngaekang, nga putedâlem pumma nenâng chohsû, ngale ne putedâlem pumma nganâng chohsû remîn e.

¹³Ngalemruchha heh, ngama arepa jetthuk huneka, nga netânâng chohmîn hokrãng ajahthem themawa wah, rohkomin roantangma chenma komin chitâng chibengthuk ehang. Ngama Jews ledangte heh chenroh putedâlemte rãng dangthuktek a ererãngrãng nekhumîn dãngthuk huneka.

¹⁴Ngama chentô mihnyan nãng sokaremin, Griik nãngmin, Griik ledangte nãngmin, nyapjet nyapjien nãngmin, nokba nãngmin sokare min.

¹⁵Erohwhah, ngama Nginkongsen pa Rom wah sôngte nekhu nãngmin thôkoh huneka.

Joban Nginkongsen Chaan

¹⁶Ngama Nginkongsen ko nyahrãng dâlem ekang; arepa chentô putedâlemte heh pepâng thin Joban chaan, khebengko Jews heh ngale Jews ledangte hehmin.

¹⁷Joban ma mihnyan heh ate demnâng chenroh toangtang dangthuk eka erepa Nginkongsen pumma khesok eka: erepa abengma athôan kotuk putedâlem junma dãngmin. Joban nyapraangma ngaeka, “Hen Joban demnâng toangtang dangeka ereheh Putedâlem junma hînmin.”

Mihnyan Nyuchha Athe Amõang

¹⁸Joban rinkhah pa rangkhetung wah chentô mihnyan pap ngale achhih erediko mihnyan heh ma moatlem chhih moatjunko toangtang pa lejetthuk thangma dangeka heh lelatnâng kaera.

¹⁹Joban ma thinnâng chêmthuk eka, chenrãngma ngako, thinma Joban junma senthemthem jetwak a, erepa Joban ate dedema thinnâng jetthuk eka.

²⁰Joban ma hahtokkhoh bengahôn thuma ate ngewah mitma lekheli roantangrãng chaan, ngale atea linlin Joban ngama senthemthem khe eki;



Joban ma hôaneka chhahkhem heh junma thinma jeteka. Erohwah are mihnyan heh ma map lechohmin!

²¹Thinma Joban jet a, rohkomin thinma atenâng chenroh soangraang thin a eroh soangraang mah, dangkoh a min ngamah. Erenoma, thinhung phangtang bajâ tah, ngale thin kheri sekhota pemin phangtang rangnyek ma lumeka.

²²Thinma thin a jet ajien ngama ngariieka, rohkomin thin a aba;

²³Chenthumin leriite Joban nâng soam noma, thinma mahritte mihnyan, ngale juhchhu wochha, ngem angah, kupchhang phanphe moangachaang rãngrãng hôan lahma soam eka.

²⁴Ngale erohwah Joban ma ere mihnyan heh thinhung nâng achhih heh thonghun thuk lahma kaamchhih moatrãng thinphe eka, ngale thindede tungko rêsêli kaamchhih heh moeka.

²⁵Thinma Joban toangtang pa mothô rãng litdang thuk eka; ngale Têm atiakte ko soamtô noma Joban ma hôantah hehnâng soamtô eka, atenâng jôba roangtang roanjêngma rômin! Amen.

²⁶Thinma eroh moatdi, Joban ma thin hei angem hungnâng chenroh rêsêli moat huneka eroh moatrãng thinphe eka. Erohwah dihiak heh ma khô alemko ledangma dihiak rôande kaamchhih moeka.

²⁷Ererãngrãngjô dela hehmin dihiak demnâng khô alemko ledangma dela rôande kaamchhih moat hun ma hei angemko wenriieka. Dela heh ma thinrôande rêsêli kaamchhih moeka, erohwah kaamchhih moattha thindede khohko thinma chêmchei pa choh eka.

²⁸Chenrãngma ngako, ere mihnyan heh ma Joban toangtang nginpa thinhung nâng thien hunmah, atema ere mihnyan hehnâng achhihli thonghun thuk eka, erohwah thinma chenpa lemolia erepa moeka.



²⁹Thin hungnâng chentô chihli heh mênchong tongeka, mihhen, chhah nyoak, mangdâ; mihnâng phetwan, mihritphe, men ahiet, mih diapchhah, ngale pong apa. Thinma mih chihthô rewak eka

³⁰ngale thindede tungko chihthômîn; Joban nâng chinnya, ngam apoarit, ngam poapoa, rânghôrit; thinma kaamchhih moatjû thonghun wakeka; nyong awa nginmin kepmah;

³¹Thin a aba; ngale thinma toamsem eka pemin kepmah, ngale thinma mihnâng mînchen chohsok aho.

³²Joban niemarang ma aroh sôngte mihnyan heh arit rêmin ngaeka ngamemin thinma ajet. Rohkomin, thinma eroh moatlolo ledang, ererãngrãng mihma memo akomin thinma asen ngaeka.

Rom 2

Joban ma Achhih Asen Pa Eren a

¹Ngalemruchha, nema mihnâng athe ngaeken a? henjô medan enkomin, mihnâng eroh ngatte nangmin pemoh. Chenrãngma ngako mihnâng athe ngama ngaletma nememin thinrãngrãng memo enko, nedede nãngba athe ngarii eken.

²Nãngma ajet chenthu Joban ma eroh moatte hehnâng athe ngaeka pa, toangtangko ngaeka.

³Rohkomin ngalemruchha heh nema mihnâng athe ngama ngaeken moatlem heh nema moeken! Nema eroh moletma Joban wah chêm lechoh edange ngama thonghun eken a?

⁴Ba nema atewah adongthôan mînchen, atâdô, ngale hungmông heh lekep dangthem eken. Linlinko nema Joban mînchenchhan pa jetmin, chenrãngma ngako atema nehung litthuk hun ehèn.

⁵Rohkomin nehung pa nyahrãng hungchêh, erohwah nema Joban rinkhah ngale toangtangma ren Rangwo hongkat jâko nema chohmin nechêm pa jêngjah jahsiet reken.



- ⁶Chenrãngma Joban ma anga nganâng henma chenroh motah a erejunko ekoh a.
- ⁷Wawathe hehmasenli heh molahma, mîndông, choangpe, ngale leriili roandông pa lemeka; erehehnâng Joban ma roantang roanjêng lethôan roandông ekoh a.
- ⁸Khaka mihnyan hehmas moatlem chhih dijunrãng chhahnyoak dangeka ngale toangtangpa kepmah; ereheh khohnâng Joban ma ate nyahrãng rinkhah chaanpa elên a.
- ⁹Henhenma kaamchhihli moeka ereheh phangtangma chêm echoh a, khebengko Jews hehmas ngale Jews ledangte hehmas echoh a.
- ¹⁰Rohkomin henhenma asenli moeka erehehnâng Joban ma mîndông, choangpe, ngale mêmô ekoh a, khebengko Jews heh erediko Jews ledangte hehnâng ekoh a.
- ¹¹Chenrãngma ngako Joban ma anga nganâng mǎnthema ren eka.
- ¹²Jews ledangte hehnâng Mosa Niemarang pa aho; thinma pap molahma Niemarang junko ledangma mahrii eka. Rohkomin Jews hehnâng Mosa Niemarang win; thinma pap molahma Niemarang junko athe loeka.
- ¹³Chenrãngma ngako Niemarang pa atatlolo tatrãngma mihnyan pa Joban demnâng toangtang jiendangmah, Niemarang pumma chenroh ngaeka ererãngrãng moatte peba toangtang tâdângmin.
- ¹⁴Jews ledangte hehnâng Niemarang pa aho; phumma Niemarang ahojô medang akomin, thin hungsima Niemarang ma chieneka ere moatlem heh moeka pejôba thin niemarang rãng dangeka.
- ¹⁵Thin moatlem junma Niemarang ma chien ekapa thinhung nâng raanglahma khesok eka. Ngale thinhung memin erepa toangtang ngama khesok eka, chenrãngma ngako poatpoat theko thinhungma achhih moeken ngama ngaeka, ngale poatpoat theko asen ngama ngaeka.



¹⁶Ngale, Ngama thôekãng Nginkongsen junko, chenthu Jisu Krista junma Joban ma mihnyan hungkhen nâng huhthonghun eka heh rênjâ Rangwo ko eroh dângmin.

Jews heh Ngale Niemarang

¹⁷Nea chenroh dângmin a? Nedede Jews ngarii eken; Nema Niemarang ko tok anaa letma Joban nâng soamte ngama ngamrii eken;

¹⁸Joban ma chenni moatrãng hun ehèn a erepa nemajet, ngale asenli pa rênrãngma nema Niemarang kowah chohjettet;

¹⁹Nema nia mitdoak heh lemsênte, ngale rangnyek khenwah hehrãngma wenphiak ngama ngarii eken,

²⁰ngale aba hehnâng hethôte, ngale chenjô lejetete heh chhinhôte ngama ngarii eken. Ngale nema Niemarang pa phangtangma lâjettih erediko nima thôekipa toangtang ngama ngaeken.

²¹Nema mihhan nâng hethô eken - phumma nedede chenrãngma lehethôrii reken a? Nema, “Ahuh leremin,” ngama phoangthô eken - phumma nededema ahuh reken a?

²²Nema ngaeken, “Mihdihiak dela kaamchhih lemomin” - rohkomin nema chhihmo eken a? Nema moangachaang nâng chinnya eken - rohkomin nema rangsoamhum kowah huh eken a?

²³Nema ninâng Joban Niemarang win ngama rãngthô eken - rohkomin nema Joban Niemarang heh chhihsiet letma ate rêsêthuk eken a?

²⁴Joban nyapraangma ngaeka, “Jews heh nekhu junwah, Jews ledangte hehma Joban nâng chhih ngaeka.”

²⁵Nema Niemarang pa mekep enko, khoankhen niem hân ekenpa mahto ledangmin; rohkomin nema Niemarang pa lekep medang enko, nea chenthujô khoankhen niem mathat hânwah rãngrãng jôba edangen.



²⁶Phumma Jews ledangte, khoankhen niem lehôteante jat, pumma Niemarang pa mekep ako, Joban ma atenâng khoankhen niem hôanchhoante rãngrãng lekep minne?

²⁷Ngale ne Jews hehnâng Jews ledangte heh ma achhih engahèn, chenrãngma ngako, Niemarang pa nema raangthien wahjô medang enkomin, ngale nea khoankhen niem hôantejô medang enkomin, nema Niemarang pa kepmet; Rohkomin thin a phoangko khoankhen niem lehôanjô medang akomin, thinma Niemarang pa kep eka.

²⁸Eroh medang ako, alinlin khoankhen niemhôante Jews linlinpa hen a? rangkhohkhoan phoangko lolo khoankhen niem hôante pa Jews tadangmah.

²⁹Erenoma, rinken khennâng Jews dângte peba Jews linlin, ereheh ma, hungkhen nâng khoankhen niem linlinpa hôan eka, ngale erepa Joban Juma hôan eka, dekma raang wah Niemarang junko hôan dangmah. Ererãngrãng hôante heh ma mihnyan wah ledangma Joban wah rô choh eka.

Rom 3

¹Eroh medang ako, Jews heh ma Jews ledangte hehwah chenni bâmchoh letma tonga? roh akole khoankhen niemhôan ko bâmshen eken a?

²Linlin ajahthem lemkhonâng Jews heh ma bâmchoh letma tonga! Khebengthôan pejô Joban ma ate nginkongpa Jews hehnâng bengkohwah.

³Rohkomin khakama toangtangma leputedâlem rãngma chenni dângmin a? Erejunko Joban ma toamhoan tahpa toangtang ledangmin ne?

⁴Eroh chenthumin dangmah! mihnyan heh phangtangjô mothô medang akomin, Joban pa toangtang. Joban nyapraangma aroh ngaeka, “Nangma jab eko jabkhab pumma nanga toangtang ngama chenkhesok a; ngale chenthu nangnâng metlo lahma mesekham hoko, erepa nangma jien o.”

⁵Phumma nãngma kaamchhih molihma Joban ma kaamsen moeka pa senthemthem mekhesok eko chenroh dângmin a? Joban ma nãngnâng



kaamchhih moatthã mechênthuk hiko, Joban ma kaamchhih moeka ngama tanga ea? (Khaka mihnyan heh ma aroh eta thôngpha them a.)

⁶Eroh jiendangmah! Joban pa toangtang ledang kako, atema hahtokkhoh pa chenroh jienrênmin a?

⁷Phumma nga mothô khôanglep junko Joban mîn dongthuk lekma ate toangtangpa senthemthem mekhesok angko, nganâng chenrăngma papi ngama thamlek chhihngat min a?

⁸Eroh medang ako, “Asenli chenhonga ngama kaamchhih moea”? Ngama aroh jabdi, linlinjô mihnyan khuthema nganâng dûmmek thang! Joban ma thinnâng achhih eng a.

Wathejô Toangtangho

⁹Eroh medang ako, nãng Jews heh Jews ledangte heh noma asenne? Chennai nãngjô bâmsemih! Ngama nenâng Jews le Jews ledangte heh phangtang papchaan khenko khoakthe tuta ngama khesoktah.

¹⁰Joban nyapraangma aroh ngaeka: “Wathejô toangtangho,

¹¹Wathemin chhin achhiak aho ngale Joban nãng soam atôte min aho.

¹²Anga nga Joban tâwah ngakchhoan tah; ngale thin phangtang chhihjâ tah; henjô moatlemsen moatte aho, wathelolo minho.

¹³Thin jabkhab hehmin achhih tuta; ngale thin theli wahmin mothô khoanglep lolo hongeka, ngale thin thunwah pûbi răngrăng achhih heh hôngjabwên era;

¹⁴ngale thin jabkhab hehmin mihnâng têm athoak jabkhab lolo.

¹⁵Thin a sitsiak buhawat ngale ritphe phùngphùngjû;

¹⁶Thin chenjojô mechhoan akomin erethepa chhihsietthien eka.

¹⁷Thinma mêmoma sông lemkhô pa jetmah,

¹⁸ngale thinma Joban ranchei pemin jetmah.”



¹⁹Nāngma ajet, Niemarang kowah chentôpa Niemarang khenko sôngte hehrāngma raangeka, ngale Niemarang pumma mihnyan heh phangtang kihtong thuk eka ngale hahtokkhoh mihnyan phangtang Joban ma eren a.

²⁰Chenrāng-ma ngako Niemarang pumma chenni ngaeka ereheh molihma henmin Joban mitsokko toangtang tadangmih; Niemarang pumma nāngma papkaam lâmotih ngama khesok rāngba moeka.

Chenroh Joban demnāng Nāng Toangtang Dangthuk ehia

²¹Rohkomin ade phumma Joban ma mihnyan heh atedede demnāng toangtang dāngthuk lemkhô pa lâhōngtah. Are lemkhô pa Mosa Niemarang ngale Mōng heh mejô thôkoh wah medan hikomin, Niemarang pa kep junma dangmah.

²²Mihnyan heh ma Jisu Krista nāng putedâlem junko Joban ma ate demnāng toangtang dangthuk eka. Joban ma arepa henhenma Krista nāng putedâlem eka ereheh toangtang dangthuk eka, chenrāngma ngako chentô mihnyan nyuchha pa khoakthe tuta:

²³anga nga papi tuta, ngale erohwah hennāng min Joban wah khope chaanpa aho.

²⁴Rohkomin Joban ma atewah mînchenciaan pa nāng pesiette Krista Jisu junma thahoma kohlahma nāng ate demnāng phangtang toangtang dangthuk ehi.

²⁵⁻²⁶Joban ma Jisu Krista ritphe thukwah, erohwah ate hei junko ngale mihnyan heh ma atenāng putedâlem junko mihnyan heh pap map choh eka. Joban ma aroh moeka pa atea toangtang ngama khesok rāng moeka. Amako atema hungmōng sietrii lahma mihnyan hehnāng thinpap junko lechēmthuk dāngwah; phumma athāngheh sanpoat komin Joban ma ate toangtangpa jienkhesok rāngma thinpap heh mapkoh eka. Aroh Joban ma ate toangtang pa khesok eka, rohkomin henhenma Jisu nāng putedâlem eka heh loloba toangtang dangthuk eka.



²⁷Eroh medang ako nãng dedema chenni rãngthôrit thin etonga? Chenni rãngthôrit thinjô aho! Ngale erepa chenni junma dangeka? Erepa nangma Niemarang pa kep junko dangeka? Erejunko dangmah, nãngma putedâlem junko dangeka.

²⁸Chenrãngma ngako putedâlem junma lolo jôba mihnyan pa Joban demnãng toangtang dangeka, Niemarang ma chenni ngaeka erepa moatjunko dangmah.

²⁹Roh akole Joban pa Jews heh Joban lolone? Atea Jews ledangte heh Joban ledangne? Jews ledangte heh Joban min danga.

³⁰Joban pa wathe jôba, ngale Joban ma Jews heh thin putedâlem junko ate demnãng toangtang edangthuk a, ngale Jews ledangte hehmin thin putedâlem junko jôba Joban ma ate demnãng toangtang edangthuk a.

³¹Phumma nãngma putedâlem junko Niemarang heh chhihsiet lere ekia? Chenthumin nãngma chhihsietmih; erenoma, putedâlem junko nãngma Niemarang pa dongsiet eki.

Rom 4

Abraham Thakthô

¹Eroh medang ako nãngte nãngwa Abraham nãng chenroh ngaea? Atea chenroh dãngwah a?

²Atema moatlem moat akat junko Joban demnãng toangtang dãngwah medang ako, atema ere moatlem junko chenni akomin rãngthôrit minwah - roh akomin erepa Joban mathahko rãngthô ritthin dangmah.

³Joban nyapraangma ngaeka, “Abraham ma Joban nãng putedâlem wah, ngale Abraham putedâlem junko Joban ma ate demnãng Abraham toangtang dãngthukwah.”

⁴Moatlem nãng chepte mihnyanko ate dekbi thãpa kohmin, rohkomin erepa hinhô dangmah; thinma bii re eka.



⁵Rohkomin henhenma moatlem moatjunko ledang, putedâlem nâng lolo tok anaa eka, ngale athe pa letherãng lithôante Joban nâng putedâlem eka, ere putedâlem peba Joban ma ate demnâng toangtang dângthukrãng lemeka.

⁶Hen mihnyan nâng Joban ma ate moatlem junko ledangma toangtang ngama kepeka ere mihnyan khuhah junma Devit memin aroh jabwah:

⁷“Hennâng atema chhilmotah heh map koheka, ere mihnyan pa rangkepte, ngale hennâng ate pap heh map koheka erepa rangkepte!

⁸Ngale Teso ma hen mihnyan heh pappâ thin khohnâng lethien dangeka ere mihnyan heh rangkepte”

⁹Devit ma are rangkep ngin jab ekapa khoankhen niem hôante hehrãng lolo lejab eka? Erehehrãng lolo dangmah! Erepa khoankhen niem lehôante hehrãng memin danga. Chenrãngma ngako nãngma Joban nyapraangwah jeteki, “Abraham ma Joban nâng putedâlem wah, ngale ate putedâlem junko Joban ma atea toangtang ngama kepwah.”

¹⁰Arepa chenthu dângwah a? Arepa Abraham ma khoankhen niem hôanma koale hôandiko dângwah a? Arepa khediko dangmah, khemako dângwah.

¹¹Atea khedi koba khoankhen niem pa hôanwah, ngale atema khoankhen niem hôan ekapa, Abraham putedâlem junko atema khoankhen niem hôan mama Joban ma atea toangtang ngama kep ekapa khesok rãng hôanwah. Ngale erohwah, thinma khoankhen niem pa lehôan medan akomin, Joban nâng putedâlem lahma Joban ma thin a toangtang ngama kepeka mihnyan hehrãng Abraham pa Ju ngenâng thinrãngma wa.

¹²Abraham pa khoankhen niem hôante hehrãng memin wa jôba, ngale khoankhen niem mahôante danglahma nãng wa Abraham khoankhen niem hôan mako chenroh sōngtongtah a ererãngrãng sōngte hehrãng memin wa.

Joban Toamsem pa Putedâlem junko Chohmin

¹³Chenthu Joban ma Abraham ngale ate chhuchha hehnâng rangkhen pa nedek khohko ekoh a ngama toamsem tahpa, thinnâng kohtah, phumma



erepa Abraham ma Niemarang kep junko kohwah dangmah, Abraham ma putedâlem junko Joban ma atenâng toangtang ngama kepdi kohwah.

¹⁴Phumma chenpa Joban ma toamsem eka erepa Niemarang kepte hehnâng kohmin ngama medang ako, putedâlem pa sekhota ngale Joban toamsem pemin mahto dângmin.

¹⁵Niemarang pumma Joban rinkhah ba kephûera; Phumma chenke niemarang aho dangeka, ereko niemarang chhihsiet thinmin aho.

¹⁶Ngale erohwah putedâlem junko Joban wah toamsem pa choheki, ngale arepa chentô Abraham chhuchha hehma Joban wah thaho hînhô rângrâng choheki - ngale arepa Niemarang kepte hehnâng lolo ledang, Abraham ma putedâlemtah rângrâng putedâlemte hehnângmin koheka. Chenrângma ngako, chentô mihnyan rângma Abraham pa Ju ngenâng wa;

¹⁷Joban nyapraangma aroh ngaeka, “Ngama nanga ajahthem diak akan heh wa râng hôaneki.” Are toamsem ekapa Joban mathahko toangtang, ngale atenâng Abraham ma putedâlem eka - Are Joban pumma riichoante heh ngakhinthuk eka, ngale atema mathat hongpa hongthuk eka.

¹⁸Akhâtuli ledang komin Abraham ma putedâlem wah, ngale erohwah, “Ajahthem diak akan heh wa râng dangeka.” Joban nyapraangma ngaeka rângrâng, “Nangchhu nangchha heh rangkho wah merit jahtô edanga.”

¹⁹Ere sanpoatko ate châthe rangpâ dangnemnem dângwah; rohkomin ate sekko thakritko riichoan thâthâjô medang akomin, ngale linlin Sara min chhaho jatjô medang akomin ereheh thonghun lahma atewah putedâlem pa mahho.

²⁰Atema Joban nâng putedâlem pa jek ho, ngale Joban ma toamsem tah pa ledangmin ale dângmin a ngamemin tungmaangho; atewah putedâlem pumma atenâng chaan kohwah, ngale atema Joban nâng rôwah.

²¹Joban ma chenni toamsem tah a erepa Joban ma linlinjô emoa ngama Abraham ma putedâlem wah.



²²Erohwah putedâlem junko, “Joban ma Abraham pa toangtang ngama kepwah.”

²³“Atea toangtang ngama kepeka” are jabkhab pa aterâng lolo raang dângwah.

²⁴Ere jabkhab pa nângkhurâng memin raangeka, henhenma nâng Teso Jisu ritwah ngakhînsiette Joban nâng putedâlem junko Joban ma ate demnâng toangtang ngama kep ehia ereheh rângmemin raangeka.

²⁵Nângkhu pap junko Jisu ritphethuk wah, ngale nângkhu Joban demnâng toangtang jiendângthuk rângma Jisu ritwah ngakhînwah.

Rom 5

Joban Demnâng Toangtang Dâng

¹Ade phumma nâng wah putedâlem junko nânga Joban demnâng toangtang dangeki ngale Teso Jisu Krista junma Joban demnâng mêmo dangeki.

²Atema putedâlem junko nângnâng are Joban mînchenchaan pa kephukoh ehi, ngale athângheh nânga ere khohko hin eki. Ngale erohwah nima rângthôeki nângmin Joban mîndôngko ejohroam e ngama dâlem eki!

³Nângkhuma nâng chêmchei hehmin rângthôe chengrângma ngako nângma ajet chêmchei junko atâdo re eki,

⁴ngale atâdo junko Joban ma senchoh ehi, ngale atema sênchoh junko nângma dâlem eki.

⁵Are nângma dâlem ekipa chenthumin mahto nâng ledangmin, chenrângma ngako Asâthôanju junma Joban ma nâng hungkhen nâng atewah hun pa kohehi, ere Asâthôanju pa Joban ma nângnâng hînhô rângrâng kohehi.

⁶Chenrângma ngako chenthu nânga chohsokte aho dângpoatko, Joban ma sanpoatsen pa renlahma ere sanpoatsen ko mihnyan chhih hehrâng Krista riieka.

⁷Mihnyan pa toangtangjô medan akomin ate rângma ahan wathe ritpa alat. Rohkomin toangtang mihnyan rângma târittemin etonga.



⁸Rohkomin Joban ma nãngnâng chentô hun ehia erepa khesok ehi - erepa nãnga papi dângwah rohkomin Krista nãngrãngma ritwah!

⁹Ate hei pumma ade phumma nãnga Joban demnâng toangtang dangthuk ehi; erediko nãnga Joban rinkhah thunwah min Krista junma pe eki!

¹⁰Nãnga Joban demko ran dângwah, rohkomin ate Chha ritjunma ate lemruçha rãng dangthuk ehi. Ade phumma nãnga Joban lemruçha lâdangtih, erohwah Krista ma ate roandông kohjunko nãngkhu khope eki!

¹¹Phumma nãngkhu khope lanlan dangmah; khumin hah eki, chenrãngma ngako, nãng Teso Jisu Krista junma Joban ma nãng ade phumma ate lemruçha rãng dangthuk ehi.

Adam ngale Krista

¹²Hahtokkhoh ko pappamihnyan wathem junma hûera, ngale atema pap demko rit pemin kephûera. Erohwah anga ngama pap moatdi rit pa chentô mihnyan nyuchha khohnâng hûera.

¹³Niemarang pa kohmako hahtokkhoh ko pap dângwah; rohkomin niemarang aho dângnomeko, pap min aho dângmin wah.

¹⁴Rohkomin Adam sanpoat tôwah Mosa sanpoat tôkotuk arit pumma chentô mihnyan nyuchha khohko pênlahma dângwah, Adam ma Joban nginlekep thangma pap motah rãngrãng lemote heh khohkomin arit pumma pênlahma dângwah. Adam pa khedi wah khope kohrãng hokte rãngrãng dângwah.

¹⁵Rohkomin are wanii pa khoakthe dangmah, chenrãngma ngako Joban ma thãhoma khope koh ekapa Adam pap rãngrãng dangmah. Arepa toangtang ngin, wathemihnyan pap rekwah ajahthem mihnyan lâriitah. Rohkomin Joban mînchenciaan pa ere nomemin bâmbâm adong, ngale wathemihnyan erepa Jisu Krista mînchenciaan junma Joban ma atewah thãho hinhô pa ajahthem mihnyan hehnâng koheka.

¹⁶Joban wah hinhô ngale mihnyan wathema pap moeka pa khoakthe dangmah. Wanthem pap moatdiko, “Athe” ngama ngaehi; rohkomin ajahthem pap moatdiko Joban wah hinhô pa nãngnâng, “Themet!” ngama kohehi.



¹⁷Arepa toangtang ngin, ere wathe mihnyan pumma papkaam moatjunko arit pumma pêneka. Rohkomin wathe mihnyan Jisu Krista pumma moatmãn pa erenoma chentôjah bâm dong moeka! ngale Joban wah mînchenchaan chohte chentô heh erediko ate demnâng toangtang dangthuk eka heh Krista junma roandông dôngtang epên a.

¹⁸Eroh wah wathe pap junma chentô mihnyan nyuchha ma chêmchoh eki rângrâng, wathema toangtang moatdi Joban ma chentô mihnyan nyuchha heh toangtang dangthuk eka, ngale roandông koh eka.

¹⁹Ngale wathe mihnyan ma Joban nginlekep dângdi chentô mihnyan nyuchha heh papi dangthuk eka, ererângrângjô wathe mihnyan erepa Jisu Krista ma Joban ngin kepdi chentô mihnyan nyuchha heh Joban demnâng toangtang dangthuk eka.

²⁰Niemarang pa mihnyan nyuchha heh ma papkaam jahmoat rângmaba hongeka; rohkomin papkaam pa jahmoat phumma, Joban wah mînchenchaan pemin erenoma ajah bâm hong eka.

²¹Eroh wah, pap junko rit pumma nângkhoh ko pêtah rângrâng, toangtang pumma Joban mînchenchaan pa nângkhohko pên ehi, eroh wah nâng Teso Jisu Krista junma nângma roantang roanjêng ahîn roandong pa choheki.

Rom 6

Pap nâng Arit rohkomin Krista Demnâng Roam lihma Ahin

¹Eroh medang ako nângma chenni ngaea? Joban wah mînchenchaan pa ajah chenchoh e ngama papkaam molihmejû tongea?

²Eroh chenthumin dangmah! Nânga papnâng lâriitih - phumma pap khenkojû chenroh jienthâm lektongea?

³Chenrângma ngako nema senthemthem ajet, chenthu Jisu Krista demnâng roam lihma baptijem keptih a, ereko nâng ate ritko roam lihma baptijem kepeki.



⁴Nāngma baptijem kepeki pa, nāng ate ritko roamlahma ate demnāng johbin ehi, erohwah, chenroh Jisu Krista ma ate Wa mīndōngchaan keplahma ritwah ngakhintah a ererāngrāng, nāngmin roandōng nyan danglihma sōngtōngmin.

⁵Chenroh nāngmin ate ritko ate demnāng phoangthe danglihma johrii ekia, ererāngrāngjô ate ngakhîn komin ate demnāng phoangthe danglihma johngakhîn min.

⁶Ngale nāngma ajet, nāng roandōng apā pa Krista demnāng ate bāngphak ko lâjoh rittektah, erepa nānghung wah papchaan pa chhihsiet rāng johrittek eka, erohwah nānga paphaa dangtūmih.

⁷Chenrāngma ngako chenthu nāng merii tihko, nānga papchaan wah lâpetih.

⁸Nānga Krista demnāng johritdi, ate demnāngjô johngakhîn min ngama putedālem eki.

⁹Chenrāngma ngako nāngma ajet, Krista ritwah ngakhintah, ngale chenthumin letherii tumin - rit pumma chenthumin ate khohko leta pētumin.

¹⁰Ngale erohwah, ate ritdi, papchaan ate khohko ahotu; ngale athāngheh ate hin eka pemin ate roandōngpa Joban demnāng roamlahma hin eka.

¹¹Ererāngrāngjô nededema papmoatlam nāng riichoan rāngrāng thonghunrii en, rohkomin, Jisu Krista junma Joban demnāng roamletma ahînte rāngrāng dangan.

¹²Ne hei angem phoangpa papnāng nekpênthuk en, eroh medan ako nema ne hei angem hungma huneka nginpa kep eken.

¹³Ngale ne phoang kowah kaamchhih moatrāngma papnāng chhupthemmin nekkoh en. Erenoma, nedede phoangpa ritwah ngakhîn thukte Joban nāng koh en, ngale kaamsen moatrāngma ne phoang phangtang atenāng koh en.

¹⁴Papnāng ne roandōngpa nekpênthuk en; chengrāngma ngako nea niemarang khennāng dangmet, Joban mīnchenchaan khennāng songtong eken.



Toangtang Rãngma Haa Dâng

¹⁵Eroh medang ako chennire min a? Nãngma pap moea, chenrãngma ngako nãnga niemarang khennâng dangmih, Joban mìnchennaan khennâng songeki? Erohmin jienmo mih!

¹⁶Linlinjô nemajet, chenthu nemin mihnyan wathe nginkep letma ate haa rãngrãng medang tetko, linlinjô nema hen nginkep eken a erehaa lâdangtet - pap ngin mekep enko rit rêmîn, ngale Joban ngin mekep enko ate demnâng toangtang dângmin.

¹⁷Rohkomin Joban nãng dangkoh a ngama ngaekang! Chenrãngma ngako rekthe nekhu paphaa dângwahjô medang enkomin, nehung phangtang kohletma nenâng hethô ehèn toangtang nginpa kep eken.

¹⁸Nea papwah lâpesietthen ngale toangtang haa lâdangtet.

¹⁹(Ne hei angem hung pumma letajet dâng phumma ngama mihnyan nyuchha ngin rãngrãng jabekang.) Poatthe nema nedede phoangpa phangtang ngek atek, chhih akhahli, erediko kaamchhih heh moatwah. Ererãngrãngjô ade phumma nededema ne phoang phangtang Asâthôn kaam moatrãng toangtang haarãng dangthuk en.

²⁰Chenthu nea paphaa dângpoatko, nea toangtang ledang wah.

²¹Athângheh nerêsê eken moatlem heh moletma chenni chohtet a? Ere moatlem heh moletma ritba rewah!

²²Rohkomin ade phumma nea papwah lâpesietthen ngale Joban haa lâdangtet. Ngale ne roandôngpa phangtang Joban nãng lâkohtet, ngale erohwah roantang roanjêng lethôn roandông choh eken.

²³Chenrãngma ngako, pap dekbi thâpa - rit; rohkomin Joban ma thâhoma hinhô kohehi pa nãng Teso Jisu Krista demnâng roamlihma roantang roanjêng ahîn roandông choheki.

Rom 7

Janchhôsiet Nginthakthô



¹Ngalemruchha heh, ngama chenni ngatrãng ngaekãnga erepa nema linlin ejet en, chenrãngma ngako nekhu phangtangma niemarang pa ajet. Mihnyan pa chentô lekhn eka eretôko jôba niemarang pumma ate khohko etapên a.

²Chenjô komin, dela nãng wãngchoan dihiaknyu pa ate tangwa pa mariiriiko niemarang junko ate tangnyu jôba dãngmin; rohkomin ate tangwa pa rit mereako, ate tangnyu ngama khhek lahma thien eka niemarang kowah tasãa.

³Erohwah, ate tangwa pa ahîn thuko dela ahan demnãng merôamsong ako, atenãng, mihdela demnãng kaamchhih moatte dihiaknyu ngama ngatmin; rohkomin ate tangwa pa rit mereako, atea niemarang junko dihiak lân atã lâdangtah, ngale dela ahan demnãng methe ngakkepmîn ako atea mihdela demnãng kaamchhih moat dangmah.

⁴Ngalemruchha heh, eroh jôba nekhu demnãng min dãngmin. Niemarang junko methôeko, nemin lâriitet, chenrãngma ngako, nemin Krista phoang wah jôba; ngale ade phumma ritwah ngakhînte rãng jôba dãngmin, ngale erohwah nãnga Joban moatlem nãng asen dãngmin.

⁵Chenthu nãng mihnyan hei angem hung arin junko sôngtông poatko, Niemarang pumma nãnghung nãngrinko papmoatlem moatthukwah, ngale ere papmoatlem pumma nãng phoangpa pênlahma dãngwah, erohwah nãng moatlem junko rit rewah.

⁶Ade phumma, nãnga Niemarang kowah lâpe chhoantih, ngale nãng phâtek nãng khhek wah rãngrãng khhekthienthi niemarang pãko lâriitih. Ade phumma nãngma dekma raangwah niamarang apã pa lekeptûmin, Ju ngewah niemarang nyan pa keplihma ba Joban nãng soamtô min.

Niemarang ngale Pap

⁷Eroh medang ako nãngma Niemarang pa pap lengaea? Pap dangmah! Rohkomin pappã chennia erepa nganãng Niemarang pumma jetthukwah. Niemarang pumma, “Mihthiak nãng nekphetwan,” lenga nomako, Ngama aphetwan pa lejetmin wah.



⁸Rohkomin ere hôkum junko pap pumma ngahung khenwah hei angem ma rongrup chhihli thônghun heh hongsiet eka. Niemarang pa aho medang ako, papmin riichoan thãthã jôba.

⁹Ngamin Niemarang aho thangma rekthe ahîn dângwah; rohkomin chenthu hôkum pa hokphumma, pap pemin ngakhin eka,

¹⁰ngale pap junko nga rit re ekang. Ngale hôkum pa roandông kohrăng ngama dângwah, rohkomin ngarăngma dangeka ere hôkum junko rit re ekang.

¹¹Pap pumma hôkum pa keplahma nga basiet ehang, ngale ritphe re ehang.

¹²Rohkomin, Niemarang pa asâ, ngale hôkum pemin asâ, toangtang ngale asen.

¹³Phumma chenrepa asen ngaekia erepumma nãngnâng rit kephukoh ehia? Erohmin dangmah! Rohkomin chenrepa asen a erepa keplahma nganâng pap pumma rit pa kephukoh ehang, ngale erepa linlin pappã jienkherăng moeka. Ngale hôkum junko pappã nyahrăng cheili chhih ngama khesok eka.

Nãnghung Phaknii Dâng

¹⁴Nãngma ajet Niemarang pa Joban ngewah; rohkomin nga dangekang ritte mihnyan, ngale papnâng haarăng seng ehang.

¹⁵Ngama chenni moekanga erepa jetmek; chenrăngma ngako ngama chenni moatthin a erepa ngama mommek, rohkomin erenoma chenni lemoothin a erepa moekang.

¹⁶Phumma ngama chenni moekanga erepa ngama chenpa lemoothin a erepa moekang, erejunko ngama Niemarang pa toangtang ngama johru lekma khesok ekang.

¹⁷Ngale linlinko areheh moattepa nga dangmek; erepa ngasekkhen wah tongeka pap pumma moeka.



¹⁸Ngama jet ngasekkhen ko asenpa aho - erepa nga mihnyan hei angem phoang khenko aho. Chenrãngma ngako asenlipa moatrãng mehun angkomin, ngama erepa tamomek.

¹⁹Ngama chenre asenli moatlem moathun ekanga erepa momek; erenoma, ngama chenre pa lemothin chhihli moatlem a erepa moekang.

²⁰Ngama chenpa moat lehun dangekanga erepa memo angko, ere moatlem moatte pa nga dangmek; erenoma erepa nga sekkhen wah tongeka pap pumma moeka.

²¹Erohwhah ngama are niemarang pumma moatlem molahma khe ekang: Chenthu ngama asenlipa moat mehun angko, chenre pa chhih a erepa ngama chiren moekang.

²²Ngahung ngarin khennâng Joban niemarang demko khuhah ekang.

²³Rohkomin ngaphoang khenko niemhan molahma khe ekang - ere niem pumma ngahung ngarin ma asen ngama ngaeka demko mênмін re eka. Ere pap niemarang pumma nga phoangko molahma phâtek nâng khhekritte rãngrãng hân ehang.

²⁴Nga a chentô khengraangchhih mihnyan a! Are nga ritphete phoang kowah henma pepâng hanga?

²⁵Teso Jisu Krista junma are moatlem moatte Joban nâng dangkoh a ngaekang! Ngale erohwhah: Ngahung ngarin ma Joban niemarang pa kepekãng, rohkomin nga mihnyan hei angem phoang pumma pap niemarang pa kepeka.

Rom 8

Ju khennâng Roandông

¹Erohwhah, ade phumma hen Jisu Krista demnâng dangeka ereheh nâng achhih lenga tumin.



²Chenrãngma ngako Jisu Krista demnâng roamlahma nãngnâng roandông kephok kohte Ju niemarang, pumma nga pap ngale rit niemarang kowah lâpesiet thang.

³Mihnyan hei angem pumma Niemarang pa boansiet lahma Niemarang pumma letamo dâng phumma, Joban ma moeka. Joban ma ate Chhapa mihnyan hei angem phoang rãngrãng litdangthuk lahma, hahtokkhoh wah pap heh repherãng chienkat era.

⁴Joban ma are moeka pa mihnyan hei angem junko ledang Ju junko songtong lihma Niemarang junko toangtang tâdãngrãng moeka.

⁵Henhen thinhei angem pumma chenroh thôkoh eka erejunko songtong eka, ereheh thinhung arinma chenroh huneka eroh edanga. Ngale henhen chenroh Juma thôkoh eka eroh songtong eka ereheh hung arinpa Juma chenroh huneka eroh edanga.

⁶Mihnyan hei angem hung arinma mepên ako rit rêmin; rohkomin Juma mepên ako roandông ngale mêmo chohmin.

⁷Ngale chenthu mihnyan heh thin hei angem hung arinma mepên ako Joban demnâng ranrãngrãng dângmin; chenrãngma ngako thinma Joban Niemarang pa kepma, ngale linlinjô thinma ere Niemarang pa takepma.

⁸Henhenma thin hei angem hung arin ngin kep eka erehehma chenthumin Joban hung tasen thukma.

⁹Rohkomin nea ne hei angem hung arinma thôkoh ehèn junko nekdangen; erenoma, Juma chenroh thôkoh ehèn a eroh dangen - eroh medan enko Joban Ju nehung khennâng linlin etonghèn. Henhen nãng Jisu Krista Ju aho dangeka ereheh Krista rãng tadangma.

¹⁰Phumma Krista nehung khennâng metong hènko, Jupa nerãngma roandông edanga chenrãngma ngako pap junma ne phoang pejô rit mere akomin nea Joban demnâng toangtang dangthuk ehèn.



¹¹Jisu Krista ritwah ngakhînsiette Joban Jupa nehung khennâng metong hènko, ere Jisu Krista ritwah ngakhînsiette pumma ate Ju nedemnâng johtong lahma ne hei angem phoang komin roandông ekoh a.

¹²Erohawah ngalemruchha heh, nãngma moatlem moatthin tonga, rohkomin erepa nãng hei angem hung arinma chenroh huneka eroh lemomin.

¹³Ne hei angem hung arinma chenroh huneka eroh medan enko, nea rit rêmin; rohkomin Ju junma ne phoangwah pap moatlempa meritphe enko, ne ehin en.

¹⁴Ngale henhen Joban Juma seneka ereheh Joban chha.

¹⁵Chenrãngma ngako Joban ma nenâng koh ehèn Juma ne haarãng kepmahhèn ngale cheisiet mahhèn; erenoma Ju pumma nea Joban Chharãng dangthuk ehèn, ngale Ju chaanko nãngma Joban nãng, “Wa! Ewa!” ngama taroo eki.

¹⁶Joban Jupa ate dedema Ju demnâng roaplahma nãng Joban Chha ngama loatjab eka.

¹⁷Nãngma ate Chha dâng phumma, Joban ma ate Chha hehrãng thienkotah rangpa nãngma kepmin, ngale Joban ma aterãng chenni thienkotah a ereheh nãngma Krista demnâng ejohchoh e; chenrãngma ngako nãng Krista demnâng mejohchêm eko, ate mîndông komin ejohroam e.

Khedi wah Mîndông Ngin

¹⁸Ngama jet ekang, athâng hehwah nãng chêm ekipa khediwah nãngma mîndông chohtin demko tâthakmîn thin dangmah.

¹⁹Hahtokkhoh wah chentô hînjebjeb pumma Joban ma ate chha heh chenthu khesokkatmin a ngama nyahrãng ngiaklahma bemeka.

²⁰Chenrãngma ngako Joban ma chentô tem atiek tahheh chhihjà erea, rohkomin erepa ate dedema hunlahma chhihjà dangmah, Joban ma jôba eroh chendanga ngama huneka. Erohjô medan akomin dâlem pa tonga



²¹Joban ma chentô tem atiektah hehmin jâthe rangwo chhihjâli khenko haa rângrâng danglahma tongtah kowah epe chhoanwak a, ngale Joban Chha heh demnâng chenthumin lechhihjâli mîndôngko ejohroam a.

²²Chenrângma ngako nãngma ajet, athâng hehmin Joban ma chentô tem atiektah a erehehema naachhat wokkakko rângchhâ arângrâng chhâlahma bemwak eka.

²³Phumma are chêm nungma bemla ekapa Joban ma tem atiektah hehema lolo bemla dangmah; nãngkhummin Joban ma ate Jupa nãngnâng khebeng thôn hinhô râng kohehi ereheh memin nãngdede hungkhen ko chêmlihma nãngmin Joban ma ate Chharâng hôanpa bemlaeki, ngale nãngphoang phangtang pesiet pa bemeki.

²⁴Chenrângma ngako dâlem junko jôba khope eki; rohkomin nãngma chenni nâng dâlem ekia erepa nãngmitma mekhe eko, erepa dâlem linlin dangmah. Chenrângma ngako henma khelahma that dâlemtah a?

²⁵Rohkomin nãngma lekhe thangma medâlem eko, erepa nãngma hungmông sietlihma ebem e.

²⁶Ererângrâng nãngma leta thangma dângpoatko Ju kalahma nãngnâng chohsû kaehi. Chenrângma ngako nãngma chenroh rangsoam min a erepa jetmih; erohwah Juma nyahrâng chêmchoh lahma ate dedema Joban nâng nângrângma leta chhemhunli heh hongjab lahma rosep kohehi.

²⁷Ngale nânghung lienkhete Joban pumma Juma chenni thonghun eka erepemin jeteka; chenrângma ngako Ju pumma Joban nâng ate mihnyan hehrângma rosepkoh eka ngale ate hung junko rosepkoh eka.

²⁸Nãngma ajet Joban ma atenâng hunte hehrângma chentôpa asenrâng moeka, ngale ere mihnyan heh atema themawa lahma ma roeeka.

²⁹Henhen pa Joban ma renlahma thieneka ere mihnyan heh ate Chha rângrâng dângrângma araangraang reethien eka, erohwah ate Chhapa humkâdong kowah khhepho chha dangeka.



³⁰Ngale henhen pa Joban ma araangraang reethientah a, ereheh atema rooeka; ngale henhen pa atema rooeka, ereheh ate demnâng toangtang dangthuk eka, ngale erehehnâng Joban ma ate mîndôngko johroamthuk eka.

Jisu Krista Junma Joban ma Hun

³¹Ephumma areheh junma nãngma chenni ngatmin a? Joban pa nãngrãng medang ako, nãng lelatnâng hen tâdângmin a?

³²Linlin Joban ma atedede Chhapa tumin lebâ thangma nãngkhu anga ngarãng kohwah! Atema nãngnâng ate Chhapa koh ehi - lihân heh jâtanga atema nãngnâng phangtang lekoh minne?

³³Joban ma reneka mihnyan hehnâng henma tâsêkhâm min a? Joban ate dedema ere mihnyan hehnâng themah ngaeka!

³⁴Eroh medang ako ereheh nâng henma athe ngama tângatmin a? Riilahma ngakhintah Jisu Krista pumma Joban dekchahko tonglahma nãngrãngma Joban nâng rosep kohehi!

³⁵Eroh medang ako Jisu Krista hunwah henma nãng tâphansiet min a? Chêmchei ma ale, mihma chêmthuk junko ale, rêm achhongma ale, tangchhih, cheili, ba rit amah ma tâphansiet min a?

³⁶Joban nyapraangma aroh ngaeka, “Nerãngma nia roantang riimah nemnemjû tongeki; ngale nia ajoatrãng ngaeka saak rãngrãng hôanehi.”

³⁷Eroh dangmah, nãngnâng hun achette junma chentô nâng nãngma phangtang tajien eki!

³⁸Chenrãngma ngako ngama linlin ajet, Joban hun kowah nãng chenni mejô taphansiet mahhi: rit mere komin ba ahîn medang ekomin taphansiet mahhi, Joban ngintatte, ba rangkethung wah ahan pête ngale chaan kepte hehmemin, athâng hehmin ngale khedi komin leta phansietmin,

³⁹rangkho ngewah memin, ngale hahkhenwah memin - Joban ma tem atiektah hehmemin chenni mejô nãng Teso Jisu Krista junma Joban ma nãngnâng hun ehi kowah taphansiet mahhi.



Rom 9

Joban ngale Ate Mihnyan heh

¹Ngama toangtang jabekang; Nga a Krista rãng ngale ngama mothô thômek. Ngahung ngarinmin Asâthôanju ma pêneka, ngale ereheh junma nga ma mothô thômek ngama jetrii ekang

²Ngawah hungchhih pa chentô dônga, ngale ngahung khennâng leta jekli chhâ ehang

³ere chêmpa nga mihnyan ngale ngadede hei angem hehrãngma choh ekang! Thinrãng mejô mesen ako nganâng Joban memin chentem athoak hang ngale Krista tâwahmin chenphansiet hang ngama hun ekang.

⁴Thin a Joban mihnyan; ngale Joban ma ate Chharãng hân eka, erediko ate mîndông pa thinnâng khesok eka; Joban ma thin demnâng kahkhetmin lahma thinnâng Niemarang pa koheka; erediko toangtangma soam aroak thuk eka; ngale Joban ma toamsem tahpa thinma choh eka;

⁵thin a nãngte nãngwa Hibu linlin heh chhuchha; ngale mihnyan nyuchha junko Krista min thin pôali. Chentô khohko adong danglahma pête Joban mînpa roantang roanjêngma rôlihma thien e! Amen.

⁶Joban ma toamsem tahpa thetah ngat dangmek; chenrãngma ngako chentô Isrial mihnyan heh phangtang Joban mihnyan dangmah.

⁷Ngale chentô Adam chhuchha hehmin Joban Chha tuta dangmah. Joban ma Abraham nãng ngatwah, “Ngama nangnâng toamsemtih pa Isak junma nangchhu achha echoh o.”

⁸Are ngaeka pa mihnyan hei angem junma chhaeka heh Joban Chha ngat dangmah; erenoma, Joban ma toamsêm wah junko chhatah heh ba linlin Abraham chha.

⁹Chenrãngma ngako Joban toamsem pa aroh sêmwah: “Sanpoat methâng tahko nga engak hûrâng, ngale Sara ma dela Chha echha a.”



¹⁰Ngale arepa lolo dangmah. Ribika Chhamin dela wanii dângwah, phumma erenii Wa pemin nãngte nãngwa Isak dângwah.

¹¹⁻¹²Rohkomin chha wanii kowah wathêpa Joban dedema them athak lahma reneka ngama jetrãng, Joban ma Ribika nãng ngatwah, “Khhepho pumma naadi pa toak asânmin”. Joban ma arepa thinchhat mama ngatwah, ngale thinma chenjô chhihmin ngale asenmin mamoma ngatwah; erohwah Joban ma reneka pa jôba roeeka, ngale erepa thinma chenni komin moatjunko rên dangmah.

¹³Joban nyapraangma aroh ngaeka, “Ngama Jakob nãng hun ekang, rohkomin Ngama Isau nãng chhihchoh rekãng.”

¹⁴Eroh medang ako nãngma Joban nãng thensokte ngama lengaea? Eroh chenthumin jienngamih.

¹⁵Chenrãngma ngako atema Mosa nãng ngatwah, “Ngama hennãng hun ekanga ereko ehun ang; ngale ngama hennãng mînchen hun ekanga ereko emînchen ang.”

¹⁶Erohwah, chentôpa mihnyan ma chenroh huneka ngale atema chenroh moeka erejunko dangmah, Joban ma mînchen eka junkoba dângmin.

¹⁷Chenrãngma ngako Joban nyapraang ma Iyip lowang nãng ngatwah, “Ngama nanga Nga chaanpa khesok rãng ngale Ngamîn hahtokkhoh phangtang nãng jetthuk rãng lowang rãng hôanwah.”

¹⁸Erohwah, Joban ma hennãng huneka ereko mînchen eka, ngale atema henhung chehsiet huneka ere hungpa chehsiet koheka.

Joban Rinkhah ngale Mînchen

¹⁹Rohkomin nekhuwah wathema nganãng engaha, “Eroh medang ako, Joban ma nãngnãng achhih ngama chenroh jienngat min a? ngale atema hun ekapa henma tâjektâng min a?”

²⁰Rohkomin, ngalemruchha heh, nema Joban nãng aroh ngakdânthang rãng nea hen a? Hahtit pumma ate hôante ko, “Nangma nga chenrãngma aroh hôan ehanga ngama chenthumin ngamah?”



²¹Chenrãngma ngako, hahtit hôante mihnyan pumma atema chenroh hân huneka eroh ate hungsiko tahôn a, ngale boakngék kemthe kowah tit phangnii rãngmin tahôn a, phangthe pa kuhsen kansen nãng keprãng hôaneka ngale phangthe pa jengreko kaprãng hôaneka.

²²Ngale ererãngrãng jôba Joban memin moeka. Atema ate rinkhah pa khesokmin huneka, ngale ate chaan pemin jetthuk huneka. Rohkomin ate rinkhah hongeka mihnyan, ngale amahritte mihnyan heh demnãng ate hung nyahrãng mônglorii lahma tongeka.

²³Ngale Joban ma ate mîndong pa khesok huneka, ere mîndong pa Joban ma ate ngewah mînchen chohte heh khohnãng koheka. Ngale Joban ma ere mîndong pa chohrãngma nãngkhu khoakhem ehi.

²⁴Chenrãngma ngako nãnga atema roowah mihnyan, phumma arepa Jews hehwah lolo roo dangmahhi, Jews ledangte heh wahmin rooeka.

²⁵Erohwhah atema Hosia titab ko aroh ngaeka: “Ngarãng ledangte mihnyan heh Ngama ‘Nga mihnyan’ ngama eroo ang. Ngama lehun diak akan hehnãng Ngama ‘nyahrãng ahun’ diak akan ngama enga ang.

²⁶Ngale ‘Nea nga mihnyan dangmet’ ngama ngatah thekojô, thinnãng ahîn Joban Chha ngama ngatmin.”

²⁷Ngale Isaia ma Isrial hehrãngma ngatwah: “Isrial mihnyan heh josi kahwah sejahtô medang enkomin, khopete pa mãnchha dãngmin;

²⁸chenrãngma ngako Teso ma hahtokkhoh wah mihnyan heh chhih asen pa sitsiak eren a.”

²⁹Arepa Isaia ma khema ko ngatah rãngrãng, “Adongthôn Teso ma nãngrãngma nãngte nãngwa heh roanche pepãng lahma lethienkoh nomako, nãnga Sodom rãngrãng dãngmin wah, ngale Gomora rãngrãng chenriitih.”

Isrial Mihnyan heh ngale Nginkongsen

³⁰Erohwhah nima arepa ngaeki, Joban demnãng toangtang dãng lehunte Jews ledangte heh, putedâlem junma Joban demnãng toangtang dangeka;



³¹Ngale Joban mihnyan heh ma Joban demnâng toangtang chendangthuk hi ngama Niemarang lemwak eka, rohkomin thinma chohlemmah.

³²Ngale chenrãngma lechoh rewak eka? Chenrãngma ngako thinma putedâlem junko ledangma thinma chenni moeka ekololo tok anaa lahma lemwak eka. Ngale erohwah dakho thutthin longko thin “Dakho thuttrii eka”

³³ngale erejunma Joban nyapraangma ngaeka: “Sû en, Ngama Zion nâng longthien ekang, ere longko mihnyan heh dakho ethuttrii a, ngale ere longjan pumma thin kôanritthuk erea. Rohkomin henhenma atenâng putedâlem eka ereheh ma rêse lechohmin.”

Rom 10

¹Ngalemruchha heh, Ngama ngahung ngarin phangtang khenwah nga mihnyan heh kho chenmam pea ngama thonghun ekang! Ngale Ngama thinrãngma Joban nâng rangsoam koh ekang!

²Ngama nenâng linlin thôkoh eka thinma Joban nâng nyahrãng lulili huneka; rohkomin erepa toangtang lemkhô junko dangmah.

³Joban ma ate demnâng mihnyan heh chenroh toangtang jiendang thuk eka ere lemkhô pa thinma jetmah, phumma, thindede hungsima Joban demnâng toangtang dângrit hunwak eka; ngale, Joban ma mihnyan heh ate demnâng toangtang dangthuk eka lemkhô pemin thinma kephunmah.

⁴Chenrãngma ngako Krista ma Niemarang pa lâthôansiectah, erohwah henhenma atenâng putedâlem eka ereheh Joban demnâng toangtang dangthuk eka.

Khope pa Chentô Mihnyan rãng

⁵Mosa ma Niemarang pa keplihma Joban demnâng toangtang dângmin ngama raangwah: “Henhenma Niemarang hôkum pa kepeka ereheh hînmin.”

⁶Rohkomin putedâlem junko Joban demnâng toangtang dângjunma Joban nyapraangma aroh ngaeka: “Rangkhethung nâng henwângmin a, ngama nedede nekchhienrii en?” (eroh mechhienrii enko, erepa Krista jâsiet eken).



⁷“Ngale hahken khennângmin henkatmin a, ngamemin nekchhienrii en?”
(eroh mechhienrii enko, erepa Krista ritwah satsiet eken).

⁸Arepa chennâng ngaeka: “Joban nginpa nãng kêko tonga, ngale nãng thunko, erediko nãng hungko tonga” - erepa nima putedâlem ngin thôkoh eka.

⁹Nema Jisu pa Teso ngale Joban ma atea ritwah ngakhinsiettah ngama meputedâlem enko, nekhu kho etape en.

¹⁰Chenrãngma ngako, nãngma putedâlem junma Joban demnâng toangtang dangthuk ehi; ngale nãng thunma hôngjab junma khope eki.

¹¹Joban nyapraangma ngaeka, “Henhenma atenâng putedâlem eka erehehma chenthumin rêsê lechohmin.”

¹²Arepa chentô rãngma ngaeka, chenrãngma ngako, Jews ngale Jews ledangte heh phangtang mǎnthe; Joban pa anga ngarãng Teso tuta ngale henhenma atenâng rooeka ereheh phangtang nãng atema ajahthem rangkoh eka.

¹³Joban nyapraangma ngaeka, “Henhenma Teso nãng pepângrãng rakrooeka ereheh phangtang pemin.”

¹⁴Phumma thinma atenâng leputedâlem medang ako pepânghi ngama chenroh jienroomin a? Ngale thinma nginpa lechohtat medang ako atenâng chenroh jien putedâlem min a? Ngale nginpa lephoang thôkoh medang ako thinma chenroh jienchohtat min a?

¹⁵Ngale nginpa chenroh jienphoang thôkohmin a nginmatte pa lechientchhoan medang ako? Joban nyapraangma ngaeka, “Nginkongsen keplahma nãngnâng thôkoh rãng nginmatte hokpa chentôsên a!”

¹⁶Rohkomin chentôma ere Nginkongsen pa kepmah. Isaia ma ate dedema ngatwah, “Teso, nãng nginko henma pute eka?”

¹⁷Erohawah, Nginkongsen pa chohtat phumma putedâlem pa hongeka, ngale Krista junma phoangthôkoh phumma Nginkongsen pa chohtat eki.



¹⁸Rohkomin Ngama thôngpha eka: Linlinjô thinma Nginkongsen pa chohtat hone? Thinma chohtattah - chenrãngma ngako Joban nyapraangma ngaeka: “Thin jabkhab kahra pa hahtokkhoh phangtangma khêmtattah; ngale thin jabkhab pa rangkhen hahtokma khêmtattah.”

¹⁹Eredikomin ngama thôngphâ wah: Isrial mihnyan heh ma jetlo hone? Phumma Mosa pa khebeng thôn danthang eka: “Nga mihnyan heh ma chenphetwân a ngama arerãngrãng diak wanthe ekep ang; ngale are aba diak junma ngama nga mihnyan heh rin ekhahthuk ang.”

²⁰Ngale Isaia ma lechêm cheithangma hôngjabwah, “Nga a ngalêmsokte ledang heh ma chohlem ehang; ngale Ngalênte ledang mihnyan heh tânâng nga hongekang.”

²¹Rohkomin Isrial hehrãngma atema ngatwah, “Rangngih ngihliangma nga deklaang lekma ngin lekepte ngale mihnyan chhieh heh roorãng tongekang.”

Rom 11

Isrial heh Khohnâng Joban Mìnchen

¹Erediko ngama thôngphâ wah: Joban ma ate mihnyan heh phere eka? Phemah! Ngadede min Isrial mihnyan, Abraham chhuchha, ngale Benjamin jatwah.

²Joban ma ate mihnyan khebeng thuma rentah heh phemah. Nema ajet Joban nyapraang nâng Ilija ma Isrial mihnyan heh lelatnâng Joban nâng rosep lahma raang ekapa:

³“Teso, thinma nang Mông heh ritphe eka ngale nãngnâng soam aroak thin heh chhihsiet wakeka; Nga loloba leritphe thangma pe ekang, ngale thinma ngamin ritphe rãng hun ehang.”

⁴Joban ma atenâng chenni dânthangtah a? “Ngama ngarãng hahjat engit mihnyan joban mông Baal nâng lesoamte lâthientek.”

⁵Athângheh min ererãngrãngjô dangeka: Ate mìnchennaan junma Joban ma amãnhha renlahma tonga.



⁶Joban ma ate mînchennaan junkoba ren eka, thinma chenni moeka ere moatlem junko rên dangmah. Chenrãngma ngako Mihnyan ma chenni moeka erejunko Joban ma meren ako, ate mînchennaan pa alinlin mînchennaan ledangmin wah.

⁷Eroh medang ako chenroh dângmin a? Isrial mihnyan heh ma thatlem tantahpa thinma chohho. Roanchechha mihnyan Joban ma rentah heh meba erepa chohwah; khuka heh ma Joban ma rooko lejetat dangwah.

⁸Joban nyapraangma ngaeka rãngrãng, “Joban ma thinhung arin heh bathuk eka; thenep thejâ nãngtumin thinma jienkhemah ngale jientatmah.”

⁹Ngale Devit ma ngatwah, “Thin a benâng mânritwah rãngrãng jokphhek chhah nãng lumrii lahma chenmãnrîi wak a; ngale thin jârit chenrewak a, erediko chêmthuk chenrewak a!

¹⁰Thin mitmin adoak chenrewak a ngale nekchen jienkhetu wakeka; ngale roantang roanjêngma chêmchoh lahma anuhjâ chenrewak a.”

¹¹Erediko ngama thõngphâ ekang: Jews heh chenthu dakho thutriitah a? ngale lejien ngaksen tuli lânychhih jâroh chenthu jâriitah a? Erohmin dangmah! Jews heh ma pap moatjunko, thinma chenphetwân a ngama khope pa Jews ledangte heh ma choh eka.

¹²Jews heh pap dângjunko hahtokkhoh ma ajahthem rangkep eka, ngale Jews heh junâng tangchhih dângjunko Jews ledangte heh ma rangkep eka. Eroh medang ako, chenthu Jews heh ma Joban wah rangmekep tahko jâtanga chentô bâm dôngmin a!

Jews Ledangte heh Khope

¹³Ngama athângheh Jews ledangte hehnâng thõkoh ekang: Chentôko Nga Jews ledangte hehrãng Joban moattat chhoante dangekanga, eretôko, Nga moatlempa hungkoh lekma emo ang.

¹⁴Ngale ngama nga mihnyan heh ma phetwanli molekma thinwahmin roanche kho eta pesiet ang ngama thonghun ekang.



¹⁵Chenrãngma ngako chenthu Joban ma thin thînphe phumma, mihnyan ahan heh phangtang Joban demnâng ran rãngrãng dangtahpa Joban lemruçha rãng litdangtu eka. Eroh medang ako, chenthu Joban ma thin mengak keptahko chenroh dãngmin a? Eroh medang ako mihnyan heh ma rit dikomin roandông echoh a!

¹⁶Bankên phathe kowah Joban nãng chhupthe methit kotihko, bankên pa phangtang aterãng lâdangtah; ngale bãngrin pa Joban nãng mekoh tihko, bãngphak bãngra phangtang aterãng lâdangtah.

¹⁷Humnâng khiet apân eka Oliv bãngkowah bãngphak phakjâchhoan eka, phumma phakjâ chhoan re ekako wunwah Oliv bãngphak kowah choatkhek hûeka. Ne Jews ledangte heh ere wunwah Oliv bãng rãngrãng, ngale ade phumma nema Jews heh demnâng roamletma Joban wah khope pa choh eken.

¹⁸Erohwah, nema phakjâ re eka bãngphak rãngrãng heh khohko nekngamrii en. Ne chenroh jienngamritmin a? Nea bãngphak rãngrãng ba; bãngphak pumma bãngrinko chohsûmah - bãngrin pumma ba bãngphakko chohsûeka.

¹⁹Rohkomin nema enga en, “Danga, ere bãngphak phakjâeka pa ngarãng the hôankohrãng phakjâeka.”

²⁰Arepa toangtang. Thinma lepute dâlemdi phakjâeka, ngale nemin putedâlem junkoba ere bãngko choatkhek ehèn. Rohkomin ererãngma nekngamrii en; erenoma Joban ranchei letma tongen.

²¹Joban ma humnâng khietwah bãngphak rãngrãng dangeka Jews heh tumin bâmah; nejã ebâhi ngama thonghun eken a?

²²Are junko nãngma Joban pa nyahrãng mînchênte ngale nyahrãng rinkhahchaan ngama khe eki. Atea achhih nãng jâritte heh demnâng nyahrãng rinkhah lahma kheki, rohkomin nenâng mînchen ehèn - roantangma ate mînchen demkojû metong enko. Rohkomin ate mînchen demko ledang medang enko, nemin echhih jâ en.



²³Ngale Jews hehma leputedâlem dangeka pa mejek ako, thin chenre theko dângtah a eretheko ethe tongthuk a; chenrăngma ngako Joban ma ere pemin tamoa.

²⁴Ne Jews ledangte heh wunwah Oliv bãngphak phakjâwah rãngrãng, ngale humwah Oliv bãngphak phakjâ mẵko chôatkhek wah rãngrãng. Jews heh a humnâng khiet bãng rãngrãng; ngale akhiet bãngkowah phakjâ ekapa atedede bãngphoko ngakchôat khhekpa ala.

Joban ma Chentông Mìnchen

²⁵Ngalemruchha heh, Ngama nenâng Joban ngewah toangtang ngin jetthuk hunka, erepumma nedede jet ajien ngama thonghunrii eken kowah ejeksiet hèn. Arepa Isrial mihnyan heh hung arincheh ekapa roantangrãng chehdangmah, rohkomin Jews ledangte heh Joban tânâng roak lânleroh mahû tungkoba elekcheh a.

²⁶Ngale eroh jôba Isrial heh phangtang khope min. Joban nyapraangma aroh ngaeka, “Zion wah Pângte ekara ngale Jakob chhu chha hehwah chentô achhih heh phangtang erephe koh a.

²⁷Ngama thin demnâng kah ekhetmîn ang chenthu ngama thinpap heh rephe kohko.”

²⁸Chenrăngma ngako thinma Nginkongsen pa kepmah, ngale Jews ledangte hehrãng sênrãngma Jews heh Joban demnâng ran dangeka. Rohkomin Joban ma rênjunko, thin te awa heh junma thin a Joban lemruchoa dangeka.

²⁹Chenrăngma ngako Joban ma hennâng rangkoh rãng rentah a erepa atema ngakdânmah.

³⁰Ne Jews ledangte hehma khemako Joban ngin lekepwah; rohkomin athângheh nema Joban wah mìnchen lâchohtet, chenrăngma ngako Jews hehma Joban ngin kepmah.

³¹Ere-rãngrãng, nema Joban wah mìnchen chohphumma, Jews hehma athângheh Joban ngin kepmah, ngale eroh dangekapa, thinmemin athângheh Joban wah mìnchen jienchoh rãng dangeka.



³²Chenrãngma ngako, Joban ma mihnyan heh phangtang ngin lekepte dangthuk eka, erepa atema chentô nãng ate mìnchen pa jienkhesok rãng hân eka.

Joban nãng Rô

³³Joban pa chentô techhua! Ate buthi mongthem ngale jet ajien pa chentôlûa! Joban ma themawa ekapa henma tâjienthômìn a? Ngale ate lempa henma tâjetloat min a?

³⁴Joban nyapraangma ngaeka, “Teso hung arin henma tathânlep lahma tonga? Henma atenãng târîn min a?”

³⁵Henma atenãng chenni komin thatkohtah a, ere litko atema ngakkoh rãngma?”

³⁶Chenrãngma ngako chentôpa atema hânwah, ngale chentôpa ate junma hin ajoeka ngale aterãng tuta hin ajoeki. Joban mìn roantang roanjêng adong chendanga! Amen.

Rom 12

Roandôngko Joban Moatlem Moat

¹Erohwah, ngalemruchha heh, Joban ma nãngkhu nãng mìnchendonng tôngjunko Ngama nenãng rosep eka: Ne roandôngpa nededema Joban moatlem nãng ahîn jebjebma koh en, ate moatlem moatrãng lolo chendanga ngale ate rilmeli chendanga. Eroh kohletma soam roak eken pejôba toangtangma soam roak eken.

²Nededema are hahtokkhoh kowah mihnyan heh rãngrãng nekdangen, rohkomìn Joban ma nehung nerin phangtang khenwah chenlitsiet hèn. Erediko ba Joban ma hun ekapa nema eta jetlo en - chenrepa asen a ngale chenre pumma Joban rinme thukeka ngale chenrepa apunlia erepa etajetlo en.

³Ngale Joban ma nganãng mìnchenchaan kohjunko ngama nekhu anga nganãng thôkoh eka: Ne chentô thenga erekowah nededema ajah nekbâm



dong thonghunrii en. Erenoma, sâpoangpoang thonghun en, ngale Joban ma nenâng putedâlem pa chentô koh ehèn a erejunko nedede thonghunrii en.

⁴Nâng phoang wantheke mâmâ jatjat sek asa tonghi, ngale are chentô pumma mâmâ moatlem moeka.

⁵Ererãngrãng, nãngmin ajahjô medan ekomin, Krista junko nãnga phoangthe, ngale phoang wantheke mâmâ jatjat sek asa roam eka rãngrãng nãngmin wathema watheke roam eki.

⁶Eroh wah nãngma Joban wah mâmâ jatjat hinhô choheki heh chenroh Joban ma nãngnâng ate mînchenchaan pa kohehia erejunko kepmin. Nãngnâng Joban ma ate Nginkongsen pa phoangthô rãng mekoh hiko, erepa nãngma putedâlem junko phoangthômin;

⁷ngale nãngnâng khoakhêm rãng mekohhiko, nãngma eroh khoakhêm min; ngale hethô rãng mekohhiko, eroh hethômin;

⁸mihhung dongsiet rãng mekoh hiko, nãngma mihhung dongsietmin. Ngale hen akomin mihnâng kohthin medan ako chhahme dângmin; Hen akomin thôajabte khhepho medan ako, hungkoh lihma chaanmoatmin; hen akomin mihnâng mînchenrãng mekoh ako, hungsi rinme ma moatmin.

⁹Ahun pa linlin hungwah hunmînmin. Chenrepa chhah a ereko chinnya rêmin, ngale chenrepa asen a ereko senthemthem loatmin.

¹⁰Kristan rãngrãng wathema wathe nãng senthemthem hunmînmin, ngale wathema wathe nãng ranheimîn letma khesokmîn en.

¹¹Moatlem pa nyahrãng chaanrii letma mo en, ngale ajô nekdangen. Nehung nerin phangtang kohletma Teso nãng soamtô en.

¹²Nema dâlem eken pumma khuhah nâhah chendangthuk hèn, chêmpoat komin hungmôngsiet letma tongen, ngale sanpoat roakweih rangsoam letma tongen.

¹³Ne chhahkhem hehmin ne lemru Kristan tangchhah heh demnâng aroam roamma kepen, ngale mihwun hehnângmin ne humpa laangkohjû dangen.



¹⁴Ne chêmchei thukte hehrãngma Joban wah rangroo koh en - têm athoak nekre en, Joban ma rang chenkoh a ngama rosepkoh en.

¹⁵Khuhahte demnâng khu johhah en, ngale asepte demnâng sep re en.

¹⁶Anga nga demnâng asen tuta dangen. Ngam poapoa nekdangen, noapnene dangen. Ngale nedede jet ajien ngama nekthong hunrii en.

¹⁷Henma komin nerãngma mechhih mokoh hênko, aterãng nekngak chhihmokoh en. Anga ngama asen ngama ngatli moatlem tuta mo en.

¹⁸Nema anga nga demnâng mêmoma tuta sôngtông rãngma mo en.

¹⁹Ngalemruchha heh, mihnâng puh neklit en, erepa Joban ma ate rinkhah poatko moatrãng liet en. Chenrãngma ngako, Joban nyapraang nãng Teso ma aroh ngaeka, “Puh pa ngama elit ang, Ngama engakkoh ang.”

²⁰Erenoma, Joban nyapraangma ngaeka: “Neran heh rêm meriako, thinnâng chhahthuk en; thin jolân meriako, thinnâng jo jokthuk en; chenrãngma ngako nema aroh memo enko thin rêsê lahma wenma khâmwah rãngrãng edangwak a.”

²¹Achhih nãng nekjienrii en; erenoma, chhih pa asenma jien en.

Rom 13

Nok Atang Thôte Jabte heh Nginkep

¹Anga ngama nok atang thôte jabte heh ngin kepmin, chenrãngma ngako Joban ma ledangthuk medan ako henmin thôte jabterãng leta dãngmin, ngale athâng hehwah thôte jabte dangeka hehmin Joban ma jôba dangthuk eka.

²Henhen athâng hehwah thôte jabte heh lelatnâng dangeka, ereheh Joban moatlem lelatnâng dangeka; ngale henma akomin eroh memo ako ereheh thindedema chêmsietrii eka.

³Chenrãngma ngako henhenma kaamsen moeka ereheh thôte jabte heh ran cheithin aho, rohkomin henhenma kaamchhih moeka erehehba cheimin.



Nemin thôte jabte heh ran lechei danghun eken a? Eroh medang enko chenpa asenli a ereheh mo en, ngale erohkoba thinma erôhèn,

⁴chenrăngma ngako thinmin Joban haa ngale nerăng sênrăngma moeka. Rohkomin nema kaamchhih memo enko, thinran chei ere en, chenrăngma ngako thinnâng nenâng chêmthuk rãng linlin chaantonga. Thin a Joban haa ngale kaamchhih moatte hehnâng Joban junko chêmthukmin.

⁵Erohwhah, nema metkeptô thôte jabte heh nginkepkep dângmin - nginkepkep ledang kiko Joban ngewah chêm môangchoh e ngama ledang, erepa cheithin khôko cheieki.

⁶Erohwhah jôba nema thăkho koh eken, chenrăngma ngako thôte jabte hehma thin moatlem moatpoat ko Joban rãng moeka.

⁷Erohwhah, nema thinnâng kohthinpa koh en; nedede thămin, ngale chhahkhem thămin koh en, ngale thin chentô ran cheiletma khesok en.

Wanthea Wathenâng Hunmîn en

⁸Henwahjô thăpê nekpê en - ahunmîn pa lolo jôba wathema wathe nâng thăpê pêmînwah rângrâng dangen. Henhenma aroh moeka ereheh meba Niemarang pa kep eka.

⁹Niemarang pumma aroh ngaeka, “Dihiak dela kaamchhih nekmo en; mih nekritphe en; ahuh nekre en; mihthiak nâng nekphetwân en” - areheh phangtang, ngale ereheh leko ahan hehmin, chentôpa niem wanthe khenko tongeka, ere niem pa, “Nangtok nangkhung wah mihnyan hehnâng, nangdede ko hunrieko rângrâng hun o.”

¹⁰Nema mihhan nâng hun mere enko, chenthumin thinrãng achhih mokomet; erohwhah, nema hun mere tetko, Niemarang pa phangtang lâkeptet.

¹¹Nema arepa metkeptô moatmin, chenrăngma ngako nemajet nea jupwah sat sanpoat pa hûera. Chenrăngma ngako, ne khope sanpoat pa nema khebeng chohtattet nomemin anam lâhûtha.



¹²Rangnyek pa lâlien eka, ngale rangwopa lânam hûtha. Erohwah rangnyek nâng moatthin moatlem moatpa jekre e, ngale rangwo nâng loatmînko kepthin ranlông chhahkhem heh kep e.

¹³Rangwo sanphiak nâng sôngte mihnyan heh rângrâng senthemthem dange - kuhhôn lihma bôang aloam, khemjok lihma mok alek, dihiak dela kaamchhih mo, achhihli heh, mên ahiet, ngale chhahnyoak, ngale phetwanmîn heh jekre e.

¹⁴Rohkomin Teso Jisu Krista ranlông chhahkhem heh kep e, ngale ne hei angem rinme thukrâng nehung pumma kaamchhih moat huneka hehwah jekre en.

Rom 14

Mihnâng Athe Neklo

¹Henhen putedâlem nâng ane dangeka ere mihnyan hehmin asenma roo en, ngale thin demnâng thinma chenni thonghun eka erejunko nekchhiakmîn en.

²Wawathe mihnyan hehnâng thin putedâlem junko chentôpa phhekchhah eka, rohkomin henhen pa putedâlem nâng ane a erehehma pharu wahra lolo phhek eka.

³Rongrup tâphhek tâchhahte mihnyan heh ma chenjô lephhek lechhahte komin achhih lengamin; ngale pharu wahra lolo phhekchhahte pummemin rongrup phhekchhate komin athe lengamin; chenrângma ngako Joban ma ere mihnyan pemin kepeka.

⁴Mihhaa hehnâng athe loatte nea hen a? Thinma tawak ekale tawakmah a ere sokte pa thin Tângtewa etonga. Ngale thinma etawak a, chenrângma ngako Teso ma thinnâng chohsû lahma etathukwak a.

⁵Wawathe mihnyan ma wanwanthe rangwopa jahanwah jengre rangwo noma alemli rangwosen ngama ethonghun them a, ngale khuka heh ma chentô rangwopa mânthe ngama ethonghun them a. Nângkhu anga ngama nânhung nângrin nâng senthemthemjô mamthônghun min.



⁶Henhenma wowothe rangwopa nyahrãng rangwo dong ngama thonghun eka ereheh memin Teso rãngma jôba moeka; ngale henhenma chentôpa phhekchhah eka ereheh memin Teso rãngma jôba moeka, chenrãngma ngako thinma ere phhekchhah rãngma Joban nãng dangkoh a ngaeka. Ngale henhenma chentôpa lephhek lechhah dangeka ereheh memin Teso rãngma jôba moeka, ngale thinmemin Joban nãng dangkoh a ngaeka.

⁷Nãnga nãngdede rãnglolo hîn dangmih, ngale rit komin nãngdede rãnglolo rit dangmih.

⁸Nãng ahîn medang eko, erepa Teso rãng hineki, ngale rit mere ekomin, nãnga Teso rãng riieki. Erohwah, nãnga ahîn medang ekomin, ngale rit medang ekomin, Teso rãng jôba.

⁹Chenrãngma ngako Krista riilahma ngakhin ekapa, atea ahînte ngale aritte heh Teso dângrãngma ngakhin eka.

¹⁰Erohwah nemin, henhen pharu lolo phhek eken a erehehma - mihhan heh khohnâng chenrãngma athe ngaeken a? Ngale rongrup phhekchhahte heh memin - ne lemru putedâlemte ahan hehnâng achhih ngama chenrãngma ngaeken a? Nangkhu anga ngajô Joban mathahko atema rênrãng chepmin.

¹¹Chenrãngma ngako Joban nyapraangma ngaeka, “Teso ma ngaeka, nga a linlin ahîn Joban, anga ngama nga mathahko dakuh ethohûra, ngale anga ngama nga a Teso ngama enga hang.”

¹²Erediko nãngkhu anga ngama henma moatlem chenroh motih a ereheh Joban nãng ekhesok e.

Mihheh Pap nãng Nekjãrii Thuk en

¹³Erohwah, wathema wathe nãng athe loatmîn pa ajekre e. Erenoma, mih dakhothutli moatlem ngale mihheh papnãng jãritli moatlem heh chenthumin lemorãng thonghun en.

¹⁴Ngama Teso Jisu demnãng roamlekma jet ekang, chenni phhekchhahjô niemarang junko atedede angek aho; rohkomin nema wanwanthe



phhekchhah pa niemarang junko angek methonghun enko, erepa nerãngma angek dângmin.

¹⁵Nema chenni phhekchhah eken a ere phhekchhah junma mihrãng chhih medang ako, erepa nema mihnâng hun achet junma moat dangmet. Nema phhekchhah eken junma mih nekchhihsiet en, chenrãngma ngako Krista thinrãng memin ritwah!

¹⁶Nema chenke asen ngama ngaeken a ereko mihma achhih nekchen ngaeka.

¹⁷Chenrãngma ngako Joban Hahsông pa jokphhek chhah rãnglolo dangmah, rohkomin, toangtang, mêmô, ngale khuhah nâhah loloba, ngale erepa Asâthôanju ma koheka.

¹⁸Ngale chenthu nema arerãngrãng dangletma Krista nâng mesoam enko, nema Joban rinmin methuk eken, ngale mihhan heh memin asen ngama engahèn.

¹⁹Erohawah, roantangma nãngkhu mongthem pa chenrohma mêmô jiendângmin a ngama thônghunmin ngale eroh mêmô danglihma jôba wathema wathe târongsiet mînmin.

²⁰Joban ma chenni hôantah a erepa phhekchhah junma nekchhihsiet en. Chentô phhekchhah pa tâphhek tâchhahmin, rohkomin rongruppa phhekchhah junma mih wathe papnâng jâritkatli medang ako lephhek lechhah ba asen.

²¹Apunthôn pa ngem lephhek, khem lejok, ngale Joban nâng putedâlemte mihnyan heh chhih nâng jâritli moatlem heh chenjô lemo medang eko asenthôn dângmin.

²²Arekowah nema chennipa pute eken a erepa Joban nechhe tungko lolo jetletma thien en. Chenthu thinma asen ngama jetlahma moeka moatlem junko thinmîn lechhih medang ako, erehehma rang ekep a!

²³Rohkomin thinma phhekchhahli dangmah ngama jetlahma mephhek mechhah ako, erepa phhekchhahdi Joban ma thinnâng achhih ngatmin,



chenrãngma ngako, thinma chenroh putedâlem eka ere junko moat dangmah. Ngale chenni akomin putedâlem junma ledang medang ako erepa pap.

Rom 15

Nedede Ledang Mihrin Methuk en

¹Nãngkhuwah henpa putedâlem nãng rongtêngtêng dangekia, erehehema putedâlem nãng anete hehwah hênlih pa chohhênmin. Nãngma nãngdede lolo rinme lethonghun min.

²Erenoma, thinrãng sênrãngma putedâlemte ahan heh rinba methukmin, erohkoba putedâlem nãng thinmin asen edanga.

³Chenrãngma ngako Krista memin atedede rinme thukriiho. Erenoma, Joban nyapraangma ngaeka, “Mihnyan hehema nenâng dummek then pa ngakhoh nãng chat ehang.”

⁴Joban nyapraang nãng chentô raangthien ekapa nãngnãng hethhê rãng raangthien eka, erohwah Joban nyapraang pumma nãnghung môngsiet junko ngale nãnghung dôngsiet junko nãngma thonghun ekipa etachoh e.

⁵Ngale nãnghung môngsiette erediko nãnghung dôngsiette Joban pumma nekhu dede tungnângmin Jisu Krista dijun letma hungthe rinthe ngale jutjut jaangjaang chendangthuk hèn,

⁶erohkoba nekhu phangtang aroamma thunthe dangletma nãngkhu Teso Jisu Krista Wa Joban nãng etarô en.

Jews Ledangte hehrãng Nginkongsen

⁷Jisu Krista ma nenâng chenroh hun ehèn a ererãngrãng, nekhummin Joban mîndông rãngma, wathema wathe nãng hun achhâmin en.

⁸Chenrãngma ngako, ngama nenâng thôkoh eka, Krista ma ate roandôngpa haa rãngrãng danglahma Jews heh khoakhêm rãng katwah, erepa Joban ma thin te awa heh demnâng toamsem tah pa linlin lâdang katha ngama khesokrãng moatwah,



⁹Ngale Jews ledangte hehmemin Joban nâng ate mînchen junko chenrôa ngama moatwah. Joban nyapraangma ngaeka, “Ngale ngama Jews ledangte heh chhangko nangnâng erôe; Ngama nangnâng rôsê ese ang.”

¹⁰Ngale eredikomin aroh ngatwah, “Jews ledangte heh, Joban mihnyan heh demnâng rin johroan en!”

¹¹Ngale eredikomin ngatwah, “Chentô Jews ledangte heh ma Teso nâng rô en; ngale chentô mihnyan heh ma atenâng rô en!”

¹²Ngale Isaia memin wîenngatwah, “Jesi chhuchha wah ehonga; atema Jews ledangte heh pênrăng ekara, ngale thinma atenâng edâlem a.”

¹³Dâlem kohte Joban pumma khuhah nâhah chendangthuk hen ngale nema atenâng putedâlem junko mêmô chendangthuk hèn, erohkoba nema thonghun letma dâlem ekenpa Asâthôanju chaanma jêngdong dongwăng erea.

Pol ma Lechei Thangma Raangwah

¹⁴Ngalemruchha heh: Nga dedema nekhua asen tuta jôba edangthem en ngama thonghun ekang, chenrăngma ngako, nekhuma chentôpa ajet, ngale nekhu dedemin wathema wathe nâng tajien hethômin en.

¹⁵Rohkomin are sitiko ngama lechei thangma chenni ngin akomin raang lekma nekhu nâng ngakthông thôkoh huneka. Arepa Joban ma Nganâng ate mînchenchaan pa kohjunko nenâng lechei thangma thôkohrăng ngaekang

¹⁶erepa Jews ledangte heh demnâng moatrăng nga a Jisu Krista haarăng dangthuk ehang. Ngale ngama soam aroakte răngrăng danglekma Joban wah Nginkongsen pa phoangthô ekang, erepa Jews ledangte hehmin Joban rinmeli joapsoap wah răngrăng chendanga, ngale Asâthôanju junma Joban moatlem nâng lolo chenkepwak a ngama moekang.

¹⁷Erohawah, Jisu Krista demnâng roam lekma, Ngama Joban moatlem moekang pa rânghô ekang.



¹⁸Nga junma Jisu Krista ma Jews ledangte hehma Joban ngin jienkeprãng chenni motah a ereheh lolo lechei thangma ethô ang. Arepa atema Jabkhab ngale moatlem junma moatwah,

¹⁹patritli ngale bâritli, erediko Joban Juchaan junma moatwah. Ngale Jeroselem wah Ilirikum nãng lanhuroh khoamka lekma Krista Nginkongsen pa senthemthem phoangthôtek.

²⁰Ngama chenriangko Krista Nginkongsen pa mathat chohtat a, eretheko thôhok kohrãng roantang thonghun lekma tongekang, erepa mihma humhônãng cheptah dekchôangko ngama hân hunmek.

²¹Joban nyapraangma ngaeka, “Ate ngin mathat chothô kohwah mihnyan hehma ekhea, ngale mathat chohtat wah mihnyan hehma ejetloa.”

Pol ma Rom Nãng Katrãng Themawa

²²Ngale Nga a netãnãng chohmãn katrãng ngatwah melãngdep lâjektek.

²³Rohkomin athãngheh arethe kowah nga moatlem heh lâta motek, ngale ajahthem rangpã mama nga netãnãng kalekma nedemnãng chohmãnãng hunwah,

²⁴Erepa ngama athãngheh chohmãn katrãng thonghun ekang. Nga Spein diaknãng katpoatko echohmãn hûa, ngale nga nekhû demnãng khuhah nãhah poatthe chohmãn lekma tãngdiko, nekhuma chohsû letma nga Spein nãng ewãngthuk ha ngama thonghun ekang.

²⁵Athãngheh nga Jeroselem wah Joban mihnyan hehnãng chohsokrãng wãngekang.

²⁶Chenrãngma ngako Misidonia ngale Akaia wah Asãthem hehma Jeroselem wah Joban mihnyan hehwah tangchhih hehnãng thin hungsima chohsokrãng thonghun eka.

²⁷Erepa thindedema thõnghun wah; rohkomin, linlinjõ thinma metkep chohsokmin jõba. Chenrãngma ngako, Jews hehma choththin ju khope pa Jews ledangte hehmemin choh eka, erohwah, Jews ledangte hehmemin



thinma Joban wah chhahkhem wanlem ngenâng rangkep eka hehwah Jews hehnângmin chohsokmin.

²⁸Chenthu ngama are moatlempa mera motekko, ngale thinrãng khôansetah ngunheh thinnâng mechohkoh tekko, Nga Spein nâng katmin ngale enâng katlemko netânâng elien chohmîn thienrãng.

²⁹Ngama ajet, chenthu Nga netânâng hokko, Ngama Krista wah ajahthem rangkep lekma ehûrâng.

³⁰Ngalemruchha heh, nãng Teso Jisu Krista ngale Juma kohehi ahun junko, Ngama nenâng rosep eka: Nãngkhu roamlihma ngarãngma Joban nâng chaanhôan lihma rangroamsoam e.

³¹Judia wah Joban nâng lepute dâlemte hehwah chenpe ang ngama soamkohha, ngale ngama Jeroselem wah Joban nâng putedâlemte hehnâng chohsokrãng kephû ekang heh junko thinhung chensen a ngama soamkohha.

³²Ngale Joban hungsi medan ako, eredikoba nga netânâng khuhah nâhah danglekma ehûrâng, ngale nekhu chohmin lekma khuhah nâhah edangang.

³³Nãngnâng mêmo kohte Joban pa nekhu phangtang demnâng chentonghèn. Amen.

Rom 16

Pol Ngewah Salem

¹Kenkria wah Asâthem hehnâng chohsok moatlem moatte nãngkhu nya Fobi pa ngama nenâng jetthuk eka.

²Joban nâng putedâlemte mihnyan rãngrãng dangletma, Teso mîngo nema ate asenma tângroo en, ngale atema ne ngewah chenjô mehun akomin atenâng chohsû en; chenrãngma ngako atea chentô mihnyan heh demnâng lemruçha sen, ngale ngademnâng min lemruçha sen jôba.

³Nga demnâng Jisu Krista moatlem johmoatte Prisila ngale Akuila nii nângmin ngama salem matkat erâng;



⁴thinma ngarãng memin roandông kohlahma moeka. Ngama thinnâng dangkoh a ngaekang - ngale ngama lolo ngat dangmek, rohkomin Jews ledangte Asâthem hehmemin ngaeka.

⁵Thin hum kowah khôante Asâthem hehnângmin salem matkat erâng. Ngalemruchha Ipanitus nângmin salem matkat erâng, atea Asia diakko Jisu Krista nâng khebeng thôn putedâlemte.

⁶Nekhu rãngma nyahrãng latrii lahma chaanrit moatte Mariam nângmin matkat erang.

⁷Andronika ngale Junia nii nângmin matkat erang, ngale ngademko phâtek nâng johtongte ngalemru Jews hehnângmin matkat erang; thin a moattat chhoante hehmasenthemthem jet a, ngale thin a nganoma Kristan khema kepwah.

⁸Teso nâng soamtô ko nga demnâng johdângte ngalemruchha Ampliata nângmin salem matkat erang.

⁹Nãng demnâng Krista moatlem johmoatte Urbanas nângmin salem matkat erang, ngale ngalemruchha Steka nângmin matkat erang.

¹⁰Apele nângmin salem matkat erang, ngale atema Krista nginkepkep danglahma senthemthem soamtô ekapa jeteka. Ngale Aristobulu hehtang humte heh phangtang nângmin matkat erang.

¹¹Ngalemru Jews Hirodion nângmin salem matkat erang, ngale Narsisus heh hum wah Kristan hehnângmin salem matkat erang.

¹²Teso moatlem moatte Trifenna ngale Trifosa nii nângmin salem matkat erang, ngale Teso rãngma ajahthem moatlem moatte ngama nyahrãng ahun lemrucho Parsis nângmin matkat erang.

¹³Teso rãngma nyahrãng kaamsen moatte Rufus nângmin ngama salem matkat erang, ngale nganângmin ate chha rãngrãng hunte Rufus nyong nângmin salem matkat erang.



¹⁴Ngale ngama Asinkritus, Phegon, Hermes, Patroba, Hermas, ngale thin demwah Kristan mihnyan heh phangtang nâng salem matkat erang.

¹⁵Filologus ngale Julia, Nereus ngale ate nya, erediko Olimpas ngale chentô thin demwah Joban nâng putedâlemte hehnângmin salem matkat erâng.

¹⁶Wathema wathe nâng dek chohpekmîn letma salem hânmin en. Krista nâng Putedâlemte Asâthem heh chentôma nenâng salem matkat ehèn.

Athôan rãng Rîn akhah

¹⁷Ngalemruchha heh, ngama nenâng rosep eka: Mihnyan heh phansiette ngale nema niwah chohtattet ngin heh lelatnâng danglahma mihnyan heh putedâlem chhihsiette mihnyan hehwah jetletma dangen. Ngale thin tâwah ataang re en!

¹⁸Chenrãngma ngako arerãngrãng moatte hehma nãng Teso Krista nâng soamtô dangmah, thinwok phoatrãng loloba moeka. Thinma jabkhabsen jab le thuntu pumma nokba toangtang heh diapchhah eka.

¹⁹Anga ngama nema nginkongsen pa senthemthem kep eken ngama lâttattah, ngale erejunko nga nekhu demnâng nyahrãng khuhah ekang. Ngale, nema asenli pa senthemthem chenmam jet en, erediko achhihli kowah ataang chenmam re en, ngama thonghun ekang.

²⁰Ngale nãngnâng mêmemo kohte Joban pumma joak ajo pa ne daphâ khenko sitsiak ekhihnek a. Nãng Teso Jisu mînchenciaan pa nekhu demnâng chentonghèn.

²¹Nga demnâng moatlem johmoatte Timothy memin ate salem matkat ehèn; ngale ngalemru Jews Lukius, Jason, ngale Sosipater hehmemin thin salem matkat ehèn.

²²Are siti raangte pa nga Tertius memin nekhu nâng Kristan salem matkat eka.

²³Nga humjek Gaius, ngale ate humko Asâthem heh rãngkhôan e, ate memin salem matkat ehèn; ngale ere hahdaang kowah ngun thiente Irastas erediko nãngpho Kuartas memin nenâng thin salem matkat ehèn.



Athôn rãng Joban nãng Rô Rangsoam

²⁵Joban mìn dongthuk e! Ngama nenâng Jisu Krista junma Nginkongsen thôkotah junko, ngale ama thuma ajahthem rangpâ rãng toangtang ngin huhriem tahpa loatkhesok junko, atema ne putedâlem pa rongtêngtêng eta dangthuk hèn.

²⁶Athângheh ere toangtang pa mông hehma raangwah junko loat eka; ngale roantang roanjêng Joban ma chien junko chentô diak akan hehnâng jetthuk eka, erohwah anga ngama putedâlem eka.

²⁷Wanthe lolo Joban, ngale atelolo jôba chentôpa tajette Joban pa Jisu Krista junma roantang roanjêng rãng mîndong thuk e! Amen.



1 Korint

1 Korint 1

¹Joban hungsi danglahma Jisu Krista moattat chhoante rãng roowah Pol, ngale nãngpho Sosthen ma raangeka-

²Korint hahwah Joban nãng putedâlemte Asâthem heh, ngale Chentô Joban nãng Asâma putedâlem rãng roeeka heh, erediko Jisu Krista demnâng roamlahma Joban rãng dangeka heh, ngale therupwah mihnyan nãng Teso Jisu Krista nãng soam atôte hehnâng raangeka. Jisu Krista pa thinrãng memin ngale nãngrãng memin Teso:

³Nãng Wa Joban ngale Teso Jisu Krista ma nenâng mînchenchaan ngale mêmô chenkohhèn.

Krista Junma Rangkep

⁴Ngama roantangma Nga Joban nãng nekhurãngma dangkoh a ngaekang, chenrãngma ngako Jisu Krista junma atema nekhurãng mînchenchaan pa koh ehèn.

⁵Chenrãngma ngako Krista demnâng roamletma chentô nãng techhu lâdangtet, jab ajâ nãngmin, ngale jet ajien nãngmin techhu lâdangtet.

⁶Krista nginkongpa nehung khennâng nyahrãng rongtêngtêng lâtongthen

⁷Nema nãng Teso Jisu Krista loathông katpa bempoatko, wanthem in rang lekep thangma lienphemet.

⁸Atema athôanjâ tôkotuk rongtêngtêng edangthuk hèn, ere junkowah, nãng Teso Jisu Krista loathôngkat Rangwo jâko chenni nãngjô lethe edangen.

⁹Joban nãng putedâlem min, ere Joban pumma ate Chha nãng Teso Jisu Krista demnâng aroamma dângrãng roehèn.

Asâthem heh Tungnâng Mâmâ Dângjâ

¹⁰Ngalemruchha heh, nãng Teso Jisu Krista chaanjunko ngama nekhurãng chentô nãng rosep eka, nema chenni jabeken a ereko hungjut letma mamkepen, eroh medang enkoba nekhurãng tungnâng mâmâ ledang edangen. Senthemthem jut



ajaang letma tongen, hungthe rinthe, ngale moatlem katlem nângmin wanthe dangletma tongen.

¹¹Ngalemruchha heh, chenrãngma ngako, Kloe humte tangkâ heh ma nekhu tungnâng mênâmîn reletma tonga, ngama nganâng chentôpa senthemthem lathôkoh thang.

¹²Ngama thôkohtan a: Nekhu anga ngama mâmâ ngingin thôeken. Wathema, “Ngama Pol dijun ekang”; ahan wathema, “Ngama Apolo dijun ekang”; ngale ahan wathema, “Ngama Piter dijun ekang”; ngale ahan wathe memîn, “Ngama Krista dijun ekang” ngaeken.

¹³Krista pa phaksiet re eken! Nekhurãngma bãngphak khoko rittepa Pol dângwahne? roh akole nea Pol dijunte dângrãng baptijem kepwahne?

¹⁴Ngama Joban nâng dangkoh a ngaekang, chenrãngma ngako, ngama nekhu wathe nângjô baptijem kohho, Krispas ngale Gaius nâng loloba kohtek.

¹⁵Eroh wah, nekhu henmemîn ngadijunte dângrãng baptijem kohwah ngama tjabmet.

¹⁶(Edanga, Ngama Stifena ngale ate humte tangkâ hehnângmin baptijem kohtek; rohkomin ngama ahan nâng baptijem kohtek ale kohhoa erepa chothong hunmek.)

¹⁷Krista ma baptijem kohrãng chienkatwah dangmah hang. Atema nenâng Nginkongsen pa thôkoh rãngba chienkatwah, ngale ere Nginkongsen pa mihnyan nyuchha jet ajien jabkhab heh junma thôkohrãng dangmah. Mihnyan nyuchha jet ajien jabkhab heh jablekma methôkoh ako Krista bãngphak khoko riitah chaanpa ngama anyenwah rãngrãng dângmin.

Krista pa Joban Chaan ngale Joban Buthi Mongthem

¹⁸Chenrãngma ngako henhen mahritte a ereheh rãngma Krista bãngphak khoko riitah nginkongpa aba ata ngin rãngrãng; rohkomin nãngkhu henhen khopete a ereheh rãngma arepa Joban chaan.



¹⁹Joban nyapraangma ngaeka, “Ngama jet ajien buthi mongthem heh chhihsiet ere ang ngale nyapweih nyapraang dong dângte heh ma jet ajien eka heh emah sietkoh ang.”

²⁰Eroh medang ako, jet ajien heh chenkoa? ngale nyapweih nyapraang adong dângte heh chenkoa? ngale hahtokkhoh wah nginjet ngin jienthôn heh chenkoa? Joban ma are hahtokkhoh wah jet ajien eki heh aba ngama khesok eka!

²¹Chenrãngma ngako, mihnyan heh thin buthi mongthem junma ate leta jetlorãng Joban ma hôaneka. Erenoma, are nima phoangthô eki nginko thinma “aba” ngaeka ko henhenma putedâlem eka ere mihnyan heh kho chenpe a ngama Joban ma ate buthi mongthem junko hôaneka.

²²Jews heh ma putedâlem rãngma patritli moatlem khehun eka, ngale Griik heh ma buthi mongthem lemeka.

²³Nirãngma dangeka, rittek wah Krista nginpa phoangthô eki, phumma erengin pa Jews hehrãngma achhih dangeka, ngale Jews ledangte heh ma aba ata ngin rãngrãng tateka;

²⁴rohkomin henhen Joban ma rooeka, Jews dangkollah ngale Jews ledangte heh dangkollah, arepa Krista nginkong, ngale atea Joban chaan ngale Joban buthi mongthem.

²⁵Chenrãngma ngako, chenpa Joban nãng aba rãngrãng khekia, erepa mihnyan buthi mongthem nomemin asen, ngale chenpa Joban nãng boan anaa rãngrãng khekia, erepa mihnyan noma achaan.

²⁶Ngalemruchha heh, chenthu Joban ma ne roopokatko chenroh dângwah a erepa thonghontan en. Mihnyan belem junko medang enko nekhuwah mãnchha ba jet ajien dângwah, chaanwin, ngale hahdaangko dongjat dângwah.

²⁷Joban ma hahtokkhoh wah mihnyan heh ma chenpa aba ngama huneka ereheh, hahtokkhoh wah jet ajien hehnãng rêê thukrãng jetlahma ren eka,



ngale hahtokkhoh wah mihnyan heh ma boan anaa ngama huneka heh ahang lochaan heh rêsê thukrăng ren eka.

²⁸Ngale hahtokkhoh mihnyan heh ma lemlithôan ngama thonghun eka heh chhihsiet răng atema chenpa hahtokkhoh mihnyan heh ma thājō lembe jôannam eka, ngale hennâng sekhota ngama thonghun eka, ere mihnyan heh atema ren eka.

²⁹Eroh wah, henmin Joban mathahko tarângthôrii mah.

³⁰Rohkomin Joban ma Jisu Krista demnâng lâroamsiet huthen, ngale Joban ma Krista pa năng buthi mongthem răng hōaneka. Krista junma jōba nănga Joban demnâng toangtang dangeki; ngale nănga Joban năng putedâlemte mihnyan Asâ lâdangtih ngale lâpepângthi.

³¹Eroh wah, Joban nyapraangma ngaeka, “Henma komin rângthôrit mehun ako, Teso ma chenni moeka erepa chenrângthōa.”

1 Korint 2

Băngphak Khoko Rittek wah Krista Nginkong

¹Ngalemruchha heh, chenthu nga netânâng Joban toangtang nginpa thôkohrăng hokko, Ngama jabkhab dong ngale ngama jet ajien ekang heh chenjet hang ngama khesok lekma thôkohho.

²Chenrăngma ngako nga nekhu demnâng dângpoatko, Ngama chentōpa lekphe lekma Jisu Krista băngphak khoko ritpa, ngale ajahthem pejō ate rittek băngphak pelolo ngahung kojū thonghun lekma tōngrăng thōnghun wah.

³Eroh wah, chenthu Nga netânâng kathangko, Nga a pachhih ngale nyahrăng tiichei lekma dângwah,

⁴ngale Ngama hethôtah le thôkotah nginkong heh mihnyan nyuchha buthi mongthem junma hethô wah dangmah, rohkomin, Joban Ju chaanma erepa ngama nenâng thôkoh wah.



⁵Erohwah, ne putedâlem pa mihnyan nyuchha buthi mongthem junko dangmah, Joban chaan koba putedâlem eki.

Joban Buthi Mongthem

⁶Rohkomin Junâng hungchit phannang hehnâng ngama buthi mongthem ngin heh thôkoh ekang. Rohkomin erepa are hahtokkhoh buthi mongthem pa dangmah, ngale are hahtokkhoh pên eka chaan pemin dangmah - ere chaanpa mahjâli chaan.

⁷Ngama phoangthô ekang buthi mongthem pa Joban buthi mongthem, erepa mihnyan nyuchha ma lejet dângwah, rohkomin are hahtokkhoh hân mama Joban ma erepa nângkhu mîndông thukrâng rênwah.

⁸Are hahtokkhoh pête heh henmemin ere buthi mongthem pa jetmah. Thinma erepa jetnomako, nâng Teso adongthôn pa lerittek minwah.

⁹Rohkomin, Joban nyapraangma ngaeka, “Chenpa henmemin mathat chohkhe ngale chohtat a, ngale chenpa henmemin mathat thonghunli pa edanga, erepa Joban ma atenâng hunte hehrângma khoakhem eka.”

¹⁰Rohkomin erepa nângnâng Joban ma ate Ju junma ate hungkhen wah heh loatjetthuk ehi. Juma chentôpa lemsû eka, Joban hungkhen nâng huhthong huneka moatlem heh tumin jeteka.

¹¹Nâng hungkhen wah ju pumma loloba nângdede hungkhen wah chentôpa jeteka; ererângrâng, Joban Ju pumma lolo jôba chentô Joban ngin heh jeteka.

¹²Nângma are hahtokkhoh ju pa choh dangmih; erenoma, nângma Joban ma chienkatwah Jupa choheki, erohwah, Joban ma nângnâng chentô kohehi a ereheh phangtang jeteka.

¹³Erohwah, nima mihnyan buthi mongthêmma hethô wah jabkhab junko jab dangmih, rohkomin Juma hethô wah jabkhab junko jabeki, ngale henhen nâng Joban Ju tongeka erehehnâng nima Ju ngale toangtang nginpa hethôeki.

¹⁴Henhen nâng Ju ahoa, erehehema Joban Ju ngewah kaera hînhô pa leta chohmin. Ererângrâng mihnyan hehema areheh leta jetmin, ngale thinrângma



sekhota ngin rãngrãng ethonghun a, chenrãngma ngako, ere Ju chohte hehma lolo jôba tâjetmin.

¹⁵Henhen nãng Ju tongeka, erehehma jôba chentô chhih asen pa etajet a, rohkomin mihhân henmemin atenãng chhih asen pa leta renmin.

¹⁶Joban nyapraangma ngaeka, “Teso hung arinpa henma tajetlo lahma tonga? Henma atenãng târîn tâkhah min a?” Rohkomin nãngkhu nãng Krista hung etonghi.

1 Korint 3

Joban Haaheh

¹Ngalemruchha heh, linlinko, Ngama Joban Ju chohte mihnyan heh demnãng jabmîn ekang rãngrãng nekhu demnãng jienjabmîn mahrãng; Nga nedemnãng jabmîn poatko, ngama nea are hahtokkhoh wah hei angem mihnyan heh rãngrãng, erediko Kristan putedâlem nãng letachha rãngrãng thonghun lahma jabmîn eka.

²Ngama nenãng phhekchhah cheh ledangma nyuhpoti kungeka, chenrãngma ngako nema cheh pa tachhahmet. Ngale athãng hehmin nema arepa jienchhahmet.

³Chenrãng-ma ngako, nea athãng hehmin are hahtokkhoh wah mihnyan heh rãngrãng tong eken. Chenthu nekhu tungko phetwãnmîn, mere enko, ngale wathema wathe tungko mênmîn mere enko, erejunko nea are hahtokkhoh wah hei angem mihnyan ngale hahtokkhoh hung arin junko songtong eken ngama khesok eka.

⁴Chenthu nekhuwah wathema, “Ngama Pol dijun ekang,” ngale ahan wathema, “Ngama Apolo dijun ekang” ngama menga enko erepa nea hahtokkhoh mihnyan rãngrãng ledangne?

⁵Linlin medang ako, Apolo pa hen a? ngale Pol min hen a? Nikhua Joban haa ba, ngale nekhu Joban nãng putedâlem thukte. Nikhuma Teso ma hennãng chenni mothuk ehia ere peba moeki:



- ⁶Ngama bãngpa khiet ekang, phumma Apolo ma ere bãngko jo koheka, rohkomin ere bãngpa Joban ma hintuk eka.
- ⁷Bãngkhiette ngale bãngko jo kohtenii chenjô dangmah. Joban ba adongthôn, chenrãngma ngako, atema bãngpa hin thukeka.
- ⁸Bãngkhiette ngale bãngko jo kohte nii mǎnthe; Joban ma henma chenroh motah a eroh waniinii nǎng ekoh ehi.
- ⁹Chengrãngma ngako nima Joban rǎng roammoeki, ngale nekhua Joban khethah. Ngale nekhua Joban hummin edangen.
- ¹⁰Joban ma nganǎng humhôn thakwa dǎngthuk junko, nga a thakwa rǎngrǎng danglekma humhôn bǎngchep ekang, ngale ere mǎnko mihhanma hōaneka. Rohkomin nekhua chentōma erepa chenroh hōanmin a ngama senthemthem thonghun letma hōanmin.
- ¹¹Chenrãngma ngako, Joban ma Jisu Krista pa lolo jōba chentō rǎngma wanthe humhōanthin the rǎngrǎng hōaneka, ngale ere leko humhōanthin the ahan ahotu.
- ¹²Khaka hehma kem, ba thǎchaanjat jan aman, thǎchaanjat longchek longhin heh keplahma humpa ebǎnghōan a; khaka hehma pen awah, ngale lengchha erediko chhahko heh keplahma min ehoan a.
- ¹³Ngale moatlempa henma chenroh moeka erepa chenthu Krista ma loatkhesokjǎ rangwo pa mehū theko ekhe e. Chenrãngma ngako, erejǎ rangwo ko anga nga moatlempa wenma thatkham lahma eloatsiet katra; phumma erewen pumma thatkhām junko alinlin ale amōanga erepa ekhesok a.
- ¹⁴Humhōanrǎng khoakhemtah theko hōaneka humpa wenma thatkhāmko lechhihkhām medang ako, humhōante pumma thǎ echoh a.
- ¹⁵Roh-komin atema hōanwah humpa wenma jemkhām mereako, nema thǎ lechohmin; rohkomin atedede lolo wenkhām wah pechhoanwah rǎngrǎng epea.



¹⁶Linlin nemajet, nea Joban rangsoamhum ngale Joban Jupa nekhen nâng tongeka!

¹⁷Henhenma Joban hum chhihsiet eka, ereheh Joban ma echhihsiet a. Chenrângma ngako, Joban rangsoam humpa Asâ, ngale nedede min Joban rangsoamhum.

¹⁸Nema nedede nekbasetrii en. Nekhuwah henma komin atea are hahtokkhoh junko jet ajien ngama methong hunrii ako, atea are hahtokkhoh ko aba rângrâng dângmêngmin, erohkoba linlin jet ajien eta danga.

¹⁹Chenrângma ngako, are hahtokkhoh pumma chenpa buthi mongthem ngama thonghun eka erepa Joban rângma aba ata rângrâng dangeka. Joban nyapraangma ngaeka, “Joban ma jet ajien heh thin buthi mongthem junko benâng mânritwah rângrâng manrii thuk eka”;

²⁰ngale Joban nyapraang han nângmin ngaeka, “Teso ma jet ajien hehma thonghun ekapa sekhota ngama jeteka.”

²¹Erohwhah mihnyan nyuchha ma chenni tamoekia erepa henmemin lerânghômin. Linlinjô chentôpa ne thiak:

²²Pol, Apolo, ngale Piter; are hahtokkhoh pa, rit ahin, athângheh ngale khedi wah hehmin - are chentôpa phangtang nerâng tuta,

²³ngale nekhuwa Krista râng, ngale Krista pa Joban râng.

1 Korint 4

Krista Moattat Chhoante heh

¹Nema ninâng Krista haa, ngale Joban toangtang moatlempa molihma ate ngin heh phoangthô kohterâng thieneka ngama thonghunhi.

²Ererângrâng haa hehma wanthe lem ekapa dangeka, atea, ate tângte pumma putedâlemlî dângmin.

³Athângheh, nga a, nema komin, ba mihhan mekomin, nganâng athe menga hangkomin sekmahmek; Ngama ngadede athe ngariimek.



⁴Ngahung ngarin pa sâpoangpoang, rohkomin erejunko nga a linlinjô chenni nângjô themek tangamek. Teso meba nganâng athe ngama tanga hang.

⁵Erohwhah nekhu memin sanpoat pa mahûhûko hennâng min athe neknga en. Alinlin athe ngama loatrâng Teso katpa bemlâ mêngmin; rangnyek khennâng huhthientah heh khohko atema wenphiak pumma ephiakthuk a, ngale mihnyan heh hung khennâng huhthem awa tahheh atema eloatsiet a. Ngale erediko anga ngama Joban wah chenroh rô choththin a erepa echohwak a.

⁶Ngalemruchha heh, nekhu rãngma asen dângrãngma, are chentôpa ngama Apolo cheniimîn thakthô lekma ngaekang, erohkoba ngama arepa chenni junma jab ekanga erepa nema eta jetlo en, “Niemarang pa senthemthem kepen.” Ngale nekhuma wathepa rângthô ngale ahan wathepa chhihthô nekre en.

⁷Henma mihhân noma adong dangthuk ehèn a? Nema chentô cheiken heh Joban ma kohwah ledangne? Sen a, eroh medang ako, nema cheiken heh, hinhô ledang rãnggrãng chenroh jienrângthô eken a?

⁸Nema chentô lemeken heh phangtang lâchohtetne? Nea techhu lâdangtet ne? Nijô lelem thangma Lowang rãng dangeken a? Sen a, Ngama nea linlinjô Lowang danglet mele ngama thonghun ekang, erohkoba nimin nekhu demnâng Lowang eta roamdange.

⁹Chenrãngma ngako ngama thonghun ekang, Joban ma nia moattat chhoante hehnâng khedithôan thepa kohehi, ngale rangkhetung wah Joban ngintatte heh erediko hahtokkhoh wah mihnyan nyuchha heh chentô mitsokko ritphe rãng thienwah mihnyan rãnggrãng hôanehi.

¹⁰Chenrãngma ngako Krista rãng sênrãngma nia aba rãnggrãng dangeki; rohkomin nekhu Krista demnâng roamletma jet ajien dangeken! Nia loboan dangeki, rohkomin nekhu lochaan! Nia thâjõ lembe hôanehi, rohkomin nea dôngsiet re ehèn!



¹¹Are sanpoat tôkomin nia rêmrit, ngale jolân ritma tongeki; Nia khetchien khunaang demnâng tongeki; buh awat re ehi, ngale thethe kowah thethe nâng hum ahah aho thangma phoangkhoam eki;

¹²Ngale Nidede dekma latrii lihma moatchhahwah. Chenthu ninâng têm athoakko, nima thinnâng rangkoh eki; Chenthu ninâng chêmsietko, nima chêmpa tathaeki;

¹³Chenthu ninâng jôjêm dûmmek poatko, nima jabkhab senma ngakdanjab eki. Nia are hahtokkhoh wah nyapsoak ngek atek petphe eka rângrâng hôanehi; ngale are sanpoat tôko nia hahtokkhoh wah setru kaja rângrâng dangeki!

¹⁴Ngama arepa nekhu rêsêthuk hun lekma raang dangmek, rohkomin ngachha rângrâng thonghun lahma nekhu nâng rîn akhah ngale hethô hun lekma raangeka.

¹⁵Chenrângma ngako nekhu nâng Kristan roandôngko hahjat echhi mihnyan hethôtejô metong hèn komin, nerângma Wa pa wathelolo jôba etonghèn. Chenrângma ngako nekhu roandôngpa Jisu Krista demnâng roamletma ngama nekhu nâng Nginkongsen pa kephû kolahma nga nekhu Wa rângrâng lâdangtek.

¹⁶Erohwhah, Ngama nekhu nâng Ngadi junha ngama rosep eka.

¹⁷Erohwhah, ngama nekhu tânâng Kristan roandôngko ngachha linlin rângrâng hôan lekma nyahrâng putedâlem ekang Timothi chienkat erang. Ngama Jisu Krista demnâng roam lekma nga roandông anyan dang lekma chenroh moekanga, ngale chentô thewah Asâthem hehnâng phoang hethô ekang niemarang heh atema nenâng ethôkohhèn.

¹⁸Nga nekhu demnâng bâmchohmîn hutumah hiba edangthem a ngama thonghun letma nekhuwah melâng mihnyan nyahrâng ngamritte lâhongtet.

¹⁹Teso hungsi medan ako, chenroh mekomin, nga netânâng sitsiak ehûrâng, ngale erediko, thinma chenni ngaeka ereheh lolo ledang, thinma ngamrit râng chenwah chaan choh eka erepa ngadedema elemte ang.



²⁰Chenrãngma ngako Joban Hahsông pa jabkhab junko lolo dangmah Joban chaan junma ba dangeka.

²¹Nema chenroh hun eken a? Nga netânâng hokko thankah demnâng hûrâng ale, nenâng hun achet Ju demnâng numnene danglekma hûrâng?

1 Korint 5

Asâthem Chhangnâng Dihiak Dela Kaamchhih Moat

¹Athângheh, nekhû chhangnâng dihiak dela kaamchhih molahma tonga ngama chohtat ekang, arepa nyahrãng cheili, ngale arerãngrãng pa Joban lejette hehma tumin chhihmomah. Ngama chohtat junko mihwa pa ate nyongpien demnâng roamjup eka ngamatat ekang!

²Eroh medan enko chenroh jienngamrii eken a? Erenoma hungchhih ngale rêsê thinba metongen a, ngale arerãngrãng moatte mihwa pa nekhû demwah junloat rêmin.

³⁻⁴Ngale nga phoangko nekhû tâwah ataangnângjô medan angkomin, Junâng nga netânâng nedemnâng jôba; ngale nga nekhû demnâng phoangphoangma johtôngwah rãngrãng danglekma, ngama Teso Jisu mînkô ere nyahrãng cheili kaamchhih moatte mihwa ko achhih ngaekang. Nekhû aroamma chohmîn poatko, Teso Jisu chaan nãngkhu demnâng tôngjunko ngajumin nekhû demnâng roamchohmîn ehèn,

⁵Ate phoangpa chhihsiet rãng are mihwa pa nema joaknâng koh en, erohkoba Teso katjâ rangwo ko ate jupa etapea.

⁶Nekhû ngamrit nekre en! Nema are nginthakthô pa jet en, “Wichhi phathe pumma pheban phangtang rângbietjâ thuk a.”

⁷Wichhi apã patphewah rãngrãng newah pap pemin rephe re en, erohkoba phangtang asâ edangen. Erediko nemin wichhi aho pheban nyan rãngrãng edangen, linlinjô nea chenrãngrãng erepa ngama lâjettah. Chenrãngma ngako, nãng Adankhoam lokuh pa lâhangtah, athângheh Adankhoam lokuh ko joatthin saakchha rãngrãng, Krista pa lâritphetah.



⁸Nāngkhuma Adankhoam lokuh pa wichhi pāma sakwah bankên demnâng ledang wichhi aho bankên nyan demnâng kuh e, wichhi pāpa nāngpap ngale chentô achhih heh, rohkomin asâ ngale toangtang danglihma wichhi lesak bankên rāngrāng dange.

⁹Ngama nenâng raangtah sitiko kaamchhih molahma môangte mihnyan heh demnâng nekroam en ngama thôkotah.

¹⁰Rohkomin, ngama Joban nâng lesoam letôte mihnyan heh ma chhihmo ekale, chhahnyoak, ahuh, ngale moangachaang nâng soam atôte hehwah taangen ngat dangmek. Thin tâwah taangrāng menga eko are hahtokkhoh wah metaangchhoan ekoba tâdāngmin.

¹¹Ngama nenâng thôkoh ekapa henma atemin Joban nâng putedâlemte ngalahma dihiak dela kaamchhih moeka heh, chhahnyoak, ngale moangachaang nâng soamtô eka, ngale mih sethôte, khemmok chempa dāngte, ngale ahuhthe heh demnâng nekjohroam en ngamaba thôkoh eka. Ererāngrāng mihnyan heh demnâng phhekchhah roamchhah rāng tumin nekjoh tongen.

¹²⁻¹³Chenrāngma ngako, ngama Joban lejette mihnyan hehnâng achhih ngatthin chenni etonga. Joban meba thinnâng achhih enga a. Rohkomin nekhuma nekhu dede demwah hehnâng achhih lenga minne? Joban nyapraangma ngaeka, “Nekhu demwah mihnyan chhihpa arephe re en.”

1 Korint 6

Kristan Dede Tungnâng Sêkhammîn

¹Nekhu chhangwah hen akomin Kristan dede tungko mênmin mere enko, Joban nâng putedâlemte mihnyan hehnâng lephenthôthuk thangma, Joban lejette ngoang awang heh tânâng erengin heh phenthômîn rāng chenroh jienhokmin a?

²Nema jetmetne Joban nâng putedâlemte mihnyan heh ma are hahtokkhoh wah achhih asen pa rênmin ngama? Eroh medan ako, nema are hahtokkhoh



ko achhih asen ngama metaren enko, are arinchha nginpa chenrãngma leta phensiet dangeken a?

³Nãngma Joban ngintatte hehnãngmin athe loatmin ngama jetmetne? Eroh medang ako hahtokkhoh roandông kowah athe pejã chenrãngma letalomin a!

⁴Arerãngrãng ngin ariet mehong ako, nema Asãthem heh demnãng lejoh dangte hehnãng phênthôthuk minne?

⁵Rêsê metne! Linlin nekhu chhangko Kristan dede tungwah ngin ariet heh tâphensiette jet ajien mihnyan wathe komin etonga.

⁶Eroh ledang thangma, Kristan wathepa ahan Kristan wathe lelatnãng chenmîn letma Joban nãng lepute dâlemte mihnyan hehnãng phenthôthuk eken!

⁷Nekhu dede tungko bengmênmin junko nea linlinjô achhih nãng lâjien riitet ngama khesok eka. Eroh chênmin chhoan noma nanga atherãng dângpeba asen ledangne? Ngale nang chhahkhem heh nyenkeprit peba asen ledangne?

⁸Erenoma, nekhu dederãng chhihmo mînkoh eken, ngale diepchhahmîn eken, ngale nelemru putedâlemte hehnãngmin eroh hân eken!

⁹Linlin nemajet, Mihnyan chhih heh ma chenthumin Joban Hahsông pa leta chohmin. Nedede nekbasetrii en; lapien, moangachaang nãng soam, mihdihiak dela kaamchhih moatte, ngale dela dede kaamchhih moatte

¹⁰ngale ahuhthe, chhahnyoak, khemmok chempa, mihphoang chhihthô, ahuh heh - arerãngrãng mihnyan heh ma henmemin Joban Hahsông pa leta chohmin.

¹¹Nekhumin ereheh rãngrãng dângwah. Rohkomin nea ererãngrãng pap kowah lâsâsietthen; nea Joban rãnglolo lâdangtet; Nãng Teso Jisu Krista ngale Joban Ju junma nea Joban demnãng toangtang lâdang thukthen.

Ne Phoang pa Joban Mîndông Thukrãng kepen



¹²Khakama enga a, “Ngama rongruppa tamo ang.” Edangthem a; rohkomin rongruppa nerãng asenli tuta dangmah. Ngama rongruppa tamo ang, ngama tajab ang, rohkomin nga a chenni nãngmin ate haarãng lekeprijimin.

¹³Ahan hehmemin, “Phhekchhah pa wokrãng, ngale wokpa phhekchhah rãng” ngama engathem a. Edangthem a; rohkomin Joban ma wanniinii ethôansiet a. Nãng phoangpa mihdihiak dela kaamchhih moatrãng dangmah, Teso nãng soamtô hân rãngba; ngale phoang komin Teso ma chohkohmin.

¹⁴Joban ma Teso ritwah ngakhînsiet wah, ngale ate chaan pumma nãngmin ritwah engakhinsiet hi.

¹⁵Nema ajet ne phoang pemin Krista phoang demko jôba johroap eka. Phumma ngama Krista phoangpa dihiaknyu phoang sengte phoang demko ejoh roapsiet anga? Eroh chenthumin leta roapsietmin!

¹⁶Ngale nema lejet dangthem eken, delawa henma ate phoangpa dihiaknyu phoang sengte demko roap eka erewa phoangpa dihiaknyu demko phoangthe lâdangtah ngama? Joban nyapraangma senthemthem ngaeka, “Wanii pa phoangtherãng dângmin.”

¹⁷Phumma henhen Teso demnãng johroap eka, erepa ju nãngmin Teso demnãng phoangthe lâdangtah.

¹⁸Mihdihiak dela kaamchhih nekmo en. Lihân papkaam mihnyan ma memo ako erpumma ate phoangpa chhihsietmah; rohkomin henma mihdihiak dela kaamchhih molahma pap dangeka erpumma atedede phoangrãngma chhihmo eka.

¹⁹Nema ne phoangpa Asâthôanju rangsoamhum ngama jetmetne, ere Asâthôanju pa nesekkhen ko tongeka, ngale erepa Joban ma nenãng kohwah? Ne phoangpa nedede rãng dangmah, erepa Joban rãng;

²⁰atema nea thãma riakwah. Erohwah ne phoangpa Joban mîndôngrãng kepen.

1 Korint 7



Janchhō Paangmih Kepmîn rāngma Chhien

¹Ade, nema nganâng siti nâng raangletma thôngphâtha nginpa dangeka. Dela ma dihiak lekep medang ako asen.

²Rohkomin dihiak dela tungko ajahthem mihnyan hehma kaamchhieh moat junko, chentô dela hehma māmâ tangnyu keppa asen, ngale chentô dihiaknyu hehnângmin māmâ tangwa chentonga.

³Dela pumma ate tangnyu rāngma tangwa danglahma chenroh moatthin a erepa moatmin, ngale dihiak pummemin ate tangwa rāngma tangnyu danglahma chenroh moatthin a erepa moatkohmin, ngale wannii latma wathema wathe rinmê thukmînmin.

⁴Tangnyu pa atedede phoang khohko tângte dangmah, ngale ate tangwa peba ate tangnyu phoang khohko tângte; ererāngrāng tangwa pemin atedede phoang khoko tângte dangmah, ate tangnyu peba ate tangwa phoang khohko tângte.

⁵Nechhe dedema rangsoam sanpoat keprāng sanpoatthe leroamjup thangma taangru tongmênge ngama punthômîn letma ledang kenko, wathema wathe nâng nechhe phoangpa nekkhehmîn en; rohkomin erediko jengrewah tangnyu tangwa roamjup roamtông rāngrāngjô ngakroam jup atong en. Eroh medang enkoba nema hun poatko joaknâng leta jâsietrii etadangen.

⁶Arepa ngama nenâng metkep dangen ngat dangmah, rohkomin aroh medang enko asen edanga ngama thôkoh eka.

⁷Linlinko ngama hun pa nekhū phangtang nga rāngrāng tuta danglet mele ngama huneka; rohkomin chentô nâng Joban ma māmâ jatjat hînhô kohlahma tonga, wathe nâng jatthe ngale ahan watheko jatthe kohlahma tonga.

⁸Ade dangeka ngama tang masongte ngale janthoinyu hehnâng thôkoh eka, nga rāngrāng nemin nelolojô metong enko asen edanga.

⁹Rohkomin nema hei angem ma hun ekapa leta jeksiet medang enko, kepmin re en - hei angem ma hun junko wênrit noma tangsông pa jôba asen.



¹⁰Tangsong choante hehrãngma ngama thôkohthin tonga, phumma arepa ngadede wah thôkoh dangmah, Teso ngewah thôkoh eka: Tangnyu pumma ate tangwa pa chenthumin lethînphehin;

¹¹atema eroh methînphe ako, atea tangwa ahannâng lethe ngakwãng thangma tângmin, ba ate tangwa demkojô chenthe ngaksenmîn a; ngale tangwa pumma ate tangnyu pa lechiakpheimin.

¹²Ahan hehnângmin ngama thôkoh ekang (Teso ngewah ledang ngadede wah thôkoh eka): Kristan delawa tangnyu pa Joban nâng putedâlemte ledang danglahma ate tangwa demko aroam mejô sông mehun ako, tangwa pumma chenthumin lechiakpheimin.

¹³Ngale Kristan dihiaknyu pa Joban nâng lepute dâlemte delawa nâng wãng lahma ate tangwa pa ate demnângjô aroamma roamsông mehun ako, tangnyu pumma ate tangwa pa lechiakpheimin.

¹⁴Chenrãngma ngako Joban nâng lepute dâlemte delawa pa ate tangnyu demko aroamma dângdi Joban ma kepeka, ngale Joban nâng lepute dâlemte tangnyu pa ate tangwa Kristan demko aroamma dângdi Joban ma kepeka. Aroh lekep medang ako, thin chhuchha pa Joban lejetete heh chhuchha rãngrãng dângmin; rohkomin, thin a Joban ma kepeka.

¹⁵Ngale, Joban nâng lepute dâlemte pumma Kristan pa chiakphe mehun ako, chenchiaphe mîn a. Are nginko, dihiak memin ngale dela memin Kristan pumma ate hungsi junko tamoa. Chenrãngma ngako Joban ma nea mêmoma sôngtôngrãng roehèn.

¹⁶Kristan tangyu, nangma nang tangwa kho tapesietmek ngama chenroh jienjet eko? Ngale Kristan tangwa, nangmemin nang tangnyu kho tapesietmek ngama chenroh jienjet eko?

Joban ma Roo ehèn Rãngrãng Songtongen

¹⁷Nekhu anga nga Joban ma hennâng chenroh songtongthuk ehèn a eroh songtongen, ngale Joban ma chenroh sôngtôngrãng roothen a erohjô



songtongen. Are niemarang pa ngama chentô Asâthem hehnâng phoangthôkoh ekang.

¹⁸Khoankhen niem hôanchoante mihnyan pumma Joban ma roeeka junko mekep ako, ate phoangwah khoankhen niem hôantah mǎnpa nekchen mahsiet eka; ngale khoankhen niem mahôan mihnyan pumma Joban ma roeeka pa mekep ako, ate memin khoankhen niempa lehôn tumin.

¹⁹Chenrǎngma ngako, mihnyan pumma khoankhen niem lehôn medang akomin ba mehôn akomin erepa chenjô dangmah; Joban nginkep peba adongthôn.

²⁰Nekhu anga ngama Joban ma roopokatko chenroh dangletma keptet a, erohjô mamdangen.

²¹Nea Joban ma roopokatko haa dǎngwahne? Haa dǎngwahjô medang enkomin, chenijô dangmah; rohkomin haa dǎngwah jekthin lemkhô metong ako, jek en.

²²Chenrǎngma ngako Teso ma mihhaa dǎngwah roeeka erepa Teso rǎngma haa dangmah; ererǎngrǎng haa ledangte hehmin Krista ma roeeka heh Krista haa.

²³Joban ma nea thǎma riakwah; erohwah mihnyan haarǎng nekdangen.

²⁴Ngalemruchha heh, nekhu anga ngajô Joban ma nekhu roothen poatko chenroh dangtet a ererǎngrǎngjô Joban demnâng roamletma tongen.

Dela nǎng lewǎngte ngale Janthoinyu hehrǎngma Chhien

²⁵Ade dangeka nekhuma dela nǎng lewǎngte hehrǎngma raangletma thôngpha thepa dangeka: Ngama Teso mǐnko chenjô ngatthin aho, rohkomin, Teso mǐnchen junko nganâng putedǎlemlī danglekma ngadede ngewah thôkoh eka.

²⁶Athǎngwah chēmchohko methak eko, dela pa athǎngwah rǎngrǎng metong ako asen ngama thonghun ekang.



²⁷Nanga dihiak keptohne? Eroh medang oko nang tangnyu demwah thînpheîn rãng nekthonghun. Nanga dihiak makepne? Eroh medang oko nangrãngma tangnyu nekchêblem.

²⁸Rohkomin nangma dihiak mekep oko, erepa papmoat dangmoh; ngale janchhôngya pa dela nâng mewãng ako, ate memin papmoat dangmah. Rohkomin Ngama nenâng thôkohpa tangsông choante mihnyan hehma rangwo roakweih chêmchoh eka heh nekchenchoh eken ngameba ngaekang.

²⁹Ngalemruchha heh, ngama ngaekang pa are junmeba ngaekang: Sanpoat pa ajah ahotu, ngale ade phumma tangsông sângte mihnyan hehmin, tang masongte mihnyan heh rãngrãng edanga;

³⁰ngale asepte hehmin, hung lechhihma sepwah rãngrãng edanga; ngale angitte hehmin, khu lehahma ngitwah rãngrãng edanga; ngale chhahkhem riak achâte hehmin, thinma riitah chhahkhem pa thinthiak rãng riakwah rãngrãng ledangma edanga;

³¹ngale chhahkhem wanlem riiacha lahma kepte hehmin, lekepwah rãngrãng edanga. Chenrãngma ngako, athâng hehwah hahtokkhoh pa, ajah leta lektong tumin.

³²Ngama nekhu sekmah patrit hehwah taang chenre en ngama huneka. Tangsông lesongte mihnyan pumma Teso moatlem nânglolo hung ekoh a, chenrãngma ngako atema Teso rin methuk huneka.

³³Rohkomin dihiak kepchoante mihnyan pumma hahtokkhoh moatlem nâng ajah sekmah eka, chenrãngma ngako, atema ate tangnyu rin methuk huneka;

³⁴ngale atea lemkhô khôniima esiet a. Tangsông lesongte dihiak ba janchhôngya hehma Teso moatlem nânglolo hung kolahma emoa, chenrãngma ngako atema ate phoang ngale Ju wannii Joban rãnglolo moat huneka; rohkomin, tangsông sângte dihiaknyu pumma are hahtokkhoh wah moatlem hehrãng sekmah patriieka, chenrãngma ngako, atema ate tangwa rin methuk huneka.



³⁵Ngama are jabekang pa nenâng chohsok hunlekma jabekang. Ngama nekhoh nâng aroh jôba dângmin ngama metkeploat dangmek. Erenoma, ngama chenpa asen a ngale apun a erepa jôba moathun ekang, ngale nekhu sanpoat pa lihân moatlem chenni nângjô lephema nekhu dede Teso nâng kohletma Teso moatlem chenmo en ngama huneka.

³⁶Janchhô paangmih kepmîn râng kahkhetmîn lahma kepmîn lehuntu medan ako: Phumma paangmihpho pumma janchhôngya mitsokko senthemthem dangmek lele mejetrii ako, ngale ate hei angem ko nyahrâng wenrii lahma kepmîn jôba asen ngama methonghun ako, thinma huneka rângrâng, kepmîn chenrea. Eroh medan ako ereko pap aho.

³⁷Rohkomin delawa ko atenâng metkep aroh jôba dângmin ngama lehôn nâng, ate dedema tangsông songmek ngama methonghun ako, ngale ate dedema hunlahma medan ako, erediko ate hung arinma chenni moathun eka erepa themawa choan medan ako - atema janchhôngya pa lekepma tôngpa asen moeka.

³⁸Eroh wah tangsông sângte delawa pa asen lâmotah, rohkomin tangsông lesongte pa ere nomemin asen moeka.

³⁹Tangsông sângte dihiaknyu pa chenthu tôko ate tangwa pa ahîn dangeka eretôko atea ate hungsiko jiendangmah; rohkomin ate tangwa pa rit mere akoba, atema hennâng huneka ere delawa ko eta ngakwãnga, rohkomin ere delawa pa Kristan medan akoba tâwâng min.

⁴⁰Rohkomin, atea tangwa nâng lengakwãng metong ako, atea ajahthôn khuhah edanga. Arepa ngama thonghun lekma thôkoh eka, ngale nga ngewah lolo ledangma Joban Ju ngademko danglahma thôkoh eka.

1 Korint 8

Moang nâng Phhekchhah kohrângma Chhien

¹Ade dangeka nema moangachaang nâng phhekchhah kohrângma chhienthapa. Thinma ngatah rângrâng, arepa nginlinlin jôba, “Nângkhu



chentôma ajet.” Rohkomin arerãngrãng jet ajien eka pumma mihnyan pa ngamritthuk reka; rohkomin hun achetmîn pumma nãngkhu rongsiet ehi.

²Henma komin ngama jôba jet ekang ngama thonghun eka erepumma chentô jetthin a erepa takhem jetmah.

³Rohkomin henma Joban nãng huneka, atenãng Joban ma jeteka.

⁴Erohwhah, moangachaang nãng kohwah phhekchhah chhahjunko dangeka: Nãngma ajet linlinko moangachaang pa ahînte dangmah; Nãngma ajet Joban pa wathe lanlan jôba tonga.

⁵Rangkhethung nãng dangkolah ba are hahtokkhoh ko dangkolah “joban” ngama jahmõangjô metong akomin, ngale ererãngrãng “joban” ba “teso” ngamajô metong akomin,

⁶Joban pa wathelolo jôba, erepa nãngkhu Wa, atea chentôpa têm atiakte, ngale ate junma nãngkhu hin joeki; ngale Teso min wathelolo jôba tonga, erepa Jisu Krista, ate junma jôba chentôpa têm atiekwah, ngale ate junma jôba nãngkhu hin joeki.

⁷Rohkomin chentôma are toangtang nginpa khêmjetmah. Khaka mihnyan heh ma moangachaang nãng nyahrãng soamtô eka, thenep thejâ tumin thinma chhah eka phhekchhah pa moangachaang nãng kohwah phhekchhah ngama thonghun eka; Arepa thinhung arinma letajet dâng phumma, thinma phhekchhah pumma ngeksiet ehi ngama thonghunwak eka.

⁸Phumma phhekchhah junma nãnga Joban tânãng tasiet hûmahhi; ngale nãngma lephhek lechhah kikomin nãngwah chenjô mahchhoan mahhi, ngale mephhek mechhah ekomin nãngma chenmin bâmchohmih.

⁹Erohwhah, henjô medan enkomin, jetletma dangen, nekhuma nekhu hungsiko phoangmoat akat junma putedâlem nãng arinte heh papnãng nekchen jâriieka.

¹⁰Chenjô akomin, nangma “Jetlohma” moangachaang nãng soamthin rangsoam humko phhekchhah lohma putedâlem nãng arinte mihnyan pumma



lâkhetho; phumma erejunko hungdong lahma atema moangachaang nâng kohwah phhekchhah pa lechhah minne?

¹¹Ngale nangpho anaa putedâlem nâng arinte rãngma Krista ritwah, phumma ere wapa nangma “Jet eko!” junma chhihjâ erea.

¹²Ngale erejunko nangma Krista rãngma pap moeko, ngale Kristan mihnyan ahan hehrãngmin pap moeko, erediko putedâlem nâng arinte heh hung arin chêmsiet eko.

¹³Erohwhah, phhekchhah pumma putedâlemte pa pap medangthuk ako, ere putedâlemte pa pap ledang thukrãng, ngama chenthumin ngem phhektumek.

1 Korint 9

Moattat Chhoante hehma Moatthin Moatlem

¹Nga a hen haajô dangmek! Nga a moattat chhoante ledangne? Ngama nâng Teso Jisu lekhe wahne? Ngale ngama Teso rãng moatjunko nekhu hong eken ledangne?

²Ahan heh mejô nganâng moattat chhoante ngama lekep hangkomin nekhuma moattat chhoante ngama kepha! Chenrãngma ngako nekhu roandôngpa Teso demnâng aroamma dangletma khe junko linlinjô nga moattat chhoante ngama jet ekang.

³Chenthu mihnyan hehma nganâng chhihthôko, ngama aroh rãngdanthang ang:

⁴Ngama moatlem moattha nganâng phhekchhah lekohminne?

⁵Ngamin moattat chhoante ahan heh rãngrãng leta dângminne, ngale Teso naa heh erediko Piter rãngrãng, ngamin ngademko Kristan tangnyu johsiet lekma leta phoangkhoam minne?

⁶Roh akole Barnabas chenii lolone chenii dede rãngma phhekchhah lêmbi tepa?



⁷Hen sipâhi ma atedede sipâhi dângdi thã thatthum riilaha tonga? Ngale hen pitmoatte ma thindede Angurbãng kowah Anguri lechhah rângdanga? Ngale hen saaksokte ma ate saak hehwah nyuhpoti lejok rângdanga?

⁸Ngama arepa jengrewah sôngtông ngin heh demnâng thakmîn dangmek, chenrãngma ngako, Niemarang memin eroh jôba ngaeka.

⁹Nãngma Mosa ma raangwah Niemarang ko lâthat chohweihtih, “Chenthu nema mânpongko chhahnekthuk poatko, ate thunpa nekkhek en.” Phumma erepa Joban ma mânpong rãnglolo lejab eka?

¹⁰Chenthu Joban ma aroh ngaeka pa nãngkhurãng sekma kolahma ngat ledangne? Linlinjô erepa nãngkhurãng raangeka. Pitmoatte ngale chhahkhente mihnyan waniiniima chhah kowah chohchhahmin ngama dâlem lahma jôba moeka.

¹¹Nima nekhu chhangko Ju chhah wên eki. Phumma nima newah ngun akem ngale chhahkhem ngema thaeka pa nema khupliet ngama thonghun eken a?

¹²Mihhan metumin newah metha hênko, nima jâtanga ereheh noma ajah lethamine? Rohkomin nima nekhuwah thamah. Erenoma, nima newah thajunko Krista Nginkongsen nãng nema putedâlem pa tengbeng thuknoma roangrup pa nidedema tadô lihma tongeki.

¹³Nema linlin jet en, Rangsoamhum nãng moatte mihnyan hehma thin phhekchhah pa Rangsoamhum wah choh eka, ngale henma soam aroak re eka hehma thinma soam aroak eka kowah chohmin.

¹⁴Ererãngrãngjô, Teso ma ngaeka, henhenma Nginkongsen pa phoangthô eka erehehma thin phhekchhah pa erekowah chohmin.

¹⁵Rohkomin ngama aroh henwahmin mathattha eka, ngale athâng hehmin ngama nenâng ereheh thârãng raang dangmah. Ngama eroh thânomma ritba ereang! ngale ngama toangtangko jabekang jabkhab pa henmemin sekhota jabkhab rãngrãng nekchen kepeka!



¹⁶Ngama Nginkongsen pa phoangthô rãngma tarângriimek. Chenrãngma ngako, eregin pa ngama metkep thômin jôba. Ngale ngama nginkongsen pa lephoangthô kangko ngarãngma chentô chhih dãngmin a!

¹⁷Ngama nga moatlempa ngadede mejô renlekma memo angko, ngama erethã chohmin ngama edâlemthem ang; rohkomin ngama erepa metkaptô moatthin moatlem ngama moekang, chenrãngma ngako, ere moatlempa Joban ma nganâng mothuk ehang.

¹⁸Eroh medang ako, ngama chenthã chohmin a? Nginkongsen pa thãletha thangma phoangthôkoh, ngale ngama ere nginkongsen pa phoangthôkoh poatko henwahmin chenjô letha thangma phoangthôkoh pejôba nga moatlem.

¹⁹Nga hen haajô dangmek; rohkomin mihnyan heh ajah tâsiethok rãngma ngadedema anga nga haarãng dangrii ekang.

²⁰Nga Jews heh demnâng moatpoatko, Jews heh jiensiethok rãngma, nga Jews heh rãngrãng danglekma songtong ekang; ngale nga Mosa Niemarang khenko tongtejô ledang kangkomin, Mosa Niemarang khenko tângte heh demnâng moatpoatko thin tâsiethok rãngma thinrãngrãng Mosa Niemarang kheko danglekma songtong ekang.

²¹Ererãngrãng, Jews ledangte heh demnâng moatpoatko, ngamin Jews heh Niemarang khenko ledang thangma, Jews ledangte heh tâsiethok rãngma Jews ledangte heh rãngrãngjô songtong ekang. Are junko ngama Joban Niemarang pa kepmeke ngama dangmah; Nga linlin Krista Niemarang khenko songtong ekang.

²²Putedâlem nãng arinte heh demnâng moatpoatko, thin tâsiethok rãngma ngamin thin rãngrãngjô johdang ekang. Erohwah, ngama chenni lemkhô mekomin thinkho tâpesiet rãng ngama nga chentô mihnyan heh demnâng thinrãngrãng tutajô johdang ekang.

²³Are chentôpa ngama nginkongsen rãngma moekang, ngale ere nginkongsen demko rang chenjoh kep ang ngama moekang.



²⁴Linlinjô nemajet, toatchhoan mînte heh jahmõang rângtoat chhoanmîn a, rohkomin khekthoan thãpa wathelolo meba rângchoh a. Erohwah, khekthoan thãpa tâchoh rãng chhoan en.

²⁵Chentô khien akho lôamte heh ma chhihjâli khophok pa tâchoh rãng khienloam niemarang pa senthemthem rângkep a; rohkomin nãnga roantang roanjêngma lechhihjâli khophok pa tâchoh rãng moeki.

²⁶Erohwah nga lejek thangma athôanko mahû hûchhoan tintin chhoanwãng ekang; erohwah ngadekma tepmîn khienloam ko hotanâng letep phete rãngrãng loamekang.

²⁷Ngale mihheh toatloam mîn rãng roolekma nga leta toatloam mîntu nekchen dangekang ngama ngaphoangpa tungbuhrii lekma chehsiet ekang.

1 Korint 10

Moangachaang nãng Soam Jektâng

¹Ngalemruchha heh, Mosa dijunte nãngte nãngwa hehnâng chenni dangtah a erepa nekhuma thonghun letmele ngama huneka. Thin chentôpa phoambuk khen pumma Josi Chek pa senthemthem pêdankhoam wah.

²Phoam-buk ngale Josi ko thin chentôpa Mosa dijunte rãng ngama baptijem kepwah.

³Chentôma Ju phhekchhah pa mãnthe chhahwah

⁴ngale manthe Ju jo jokwah. Thinma thin demko johwãngtah Ju longjan kowah jokwah; ngale ere longjan pa Krista dãngwah.

⁵Erohjô medang komin thinkhuwah ajathem heh demnâng Joban hung lesen wah, ngale erohwah thinmang heh hahrankho jêngjêng nãng mahritwah.

⁶Are chentôpa nãngkhuma jetrãng khesok ehi, ngale thinma huntah rãngrãng achhihpa lehunrãng ngaehi,

⁷ngale thinwah khaka heh ma soamtah rãngrãng moangachaang nãng lesoamrãng ngaehi. Joban nyapraangma ngaeka, “Mihnyan heh ma kuhhôn



lahma jokphhek chhah ekapa mokjok phhekchhah lahma dihiak dela kaamchhih moat kuhhôn rãngrãng litjâtueka.”

⁸Thinwah khaka hehma motah rãngrãng nãngkhuma dihiak dela tungko kaamchhih lemomin-ngale eroh molahma jãtheko roaknii hahjatrem mihnyan mahriitah.

⁹Nãngma Teso hung lethak toanmin, wanwanthe mihnyan hehma thaktoantah rãngrãng - ngale eroh tôandi thin a pûma ritkektah.

¹⁰Thinkhu joangalintah rãngrãng nãngkhu lejoangmin - eroh jôangte heh rangkhetung wah Joban Ngintatte hehma ritphetah.

¹¹Are chentô thinseknâng dangtah heh ahan hehma jetrãng dãngwah, ngale ereheh nãngnâng jetthukrãng raangthienwah. Chenrãngma ngako nãnga athôn sanpoat pa hokthângko nyan eki.

¹²Nema nia rongtêngtêng chep eki ngama methonghun enko, lejâiriãng senthemthem jetletma rongchepen.

¹³Nehung toan ehèn pemin mihhan heh hung chenroh toan eka ererãngrãng jôba toan ehèn. Rohkomin Joban ma toamsem eka, ngale nema leta dôli toanthuk mahhèn; nehung tôanpoatko, nema tâdôrãng atema chaan ekohhèn, ngale erekowah loatchhoanthin lemkhômin ekhesok hèn.

¹⁴Erohawah, ngalemruchha heh, moangachaang nãng soamwah ataang re en.

¹⁵Ngama nenâng hungchit rinchhem mihnyan ngama thonghun lahma thôkoh eka; ngama chenni ngin thôekanga erepa nededema jetlo en.

¹⁶Nãngma Teso phhekchhah Niemko rãngkep e bâti, ngale ere bâti rãngma nãngma Joban nãng dangkoh a rãngngae: Chenthu nãngma ere bâti kowah jokko, nãnga Krista heiko johroam eki. Ngale nãngma bankên chhupsiet ekipa: Chenthu nãngma ere bankên kowah phhekko, nãngmin Krista phoang demko johroam eki.



¹⁷Chenrãngma ngako bankên pa wanthe dangeka rãngrãng, nãngkhumin ajahjô medang ekomin, phoangtherãng lâdangtih, chenrãngma ngako nãngkhu anga ngama bankên wanthe kowah roamphhek eki.

¹⁸Isrial mihnyan hehnâng thatthonghun tan en; henhenma soam aroak reka kowah phhek eka, erehehma soam aroak thekowah Joban nãng soam aroak ekako johroam eka.

¹⁹Ngama moangachaang ba moangachaang nãng koheka phhekchhah pa chenni komin asen lenga ekanga?

²⁰Eroh ngamek! Ngama ngaekang pa dangeka, joban ledang nãng soam roak ekapa joaknãng soam roak eka, erepa Joban nãng soam aroak dangmah ngaekang. Ngale ngama nea joak demnâng johroam thukpa hunmah.

²¹Nema Teso bâti ngale joak bâti wanniinii wah taroam jokmet; ngale nema Teso demnâng erediko joak demnâng min taroam phhekchhahmet.

²²Roh akole nãngma Teso rinkhahtuk hunekia? Roh akole, nãnga ate noma achaan thonghunrii ekia?

²³Erohwhah thinma ngaeka, “Nima chentôpa tamoe.” Erepa linlin jôba, rohkomin chentôpa asen dangmah. “Nãngma chentôpa tamoe” - rohkomin chentôpa nãng toatchohte dangmah.

²⁴Nekhu henmemin mâmâ dede rãnglolo asen pa lethonghun min, rohkomin mihhan rãngmemin asenli pa thõnghunte dângmin.

²⁵Nehung nãng lechêm thõngphâ thangma, ngem sengthin thenâng sengeka ngem chentôpa taphhek en.

²⁶Chenrãng-ma ngako Joban nyapraangma ngaeka, “Hahtokkhoh ngale chentô hahtokkhoh wah pa Teso thiak.”

²⁷Joban nãng putedâlemte ledangte ma phhekchhah chhahrãng roolahma nang ahok mehun oko, nang mako chenni thienkoh eho erepa nanghun nãng letûngmaang thangma phhekchhah o.



²⁸Rohkomin nangnâng, “Arepa moangachaang nâng kohwah phhekchhah,” ngama wathema methôkoh hoko, nangnâng thôkohte rãng sênrãngma erediko nanghung sênrãngma, ere phhekchhah pa nangma nekchhah-

²⁹erepa nangma thonghun junko dangmah, rohkomin mihhan pumma thonghun eka junko nekchhah. Eroh medang ako, khakama tachhien thêma a, “Ngama thonghun ekangpa mihhan junma chenroh jiendângmin a?”

³⁰Ngama nga phhekchhah rãngma Joban nâng dangkoh a menga angko, mihhan ma nganâng ere phhekchhah junma chenrãngma chhihngat thin etonga?”

³¹Sen a, nema chenni akomin memo enko, ngale chenni akomin mejok phhekchhah enko, ere chentôpa Joban mîndôngrãng mo en.

³²Jews hehnângmin, Jews ledangte hehnângmin, erediko Joban nâng putedâlemte Asâthem hehnângmin hennângjô lechênthuk thangma songtongen.

³³Ngama chenroh moekanga eroh mo en; Ngama chentô moatlem moatroakweih anga nga hungsênthuk rãngma rângmo ang, ngale ngama ngadede rãngma sênrãngma rângthong hunmek, anga nga rãngma chensen a ngama rângthonghun ang, eroh medang akoba thin khomin eta pewak a.

1 Korint 11

¹Ngama Krista ngin hekanng rângrãng nememin ngangin heha.

Rangsoam Poatko Khobuk

²Ngama nenâng rôeka, chenrãngma ngako nema nga roantangma thonghun eha, ngale ngama nenâng hethô tahpa senthemthem kepdi rôeka.

³Rohkomin ngama nenâng arepa jetthuk huneka, dela pa ate dihiak khoko adong dangeka rângrãng, Krista pa chentô mihnyan nyuchha khoko adong, ngale Joban pa Krista khoko adong.



⁴Erohwah delawa ma nok atang heh chhangnâng ate kho buklahma rangmesoam ako, ngale nok atang rangsoam thintheko Joban ngin khobuk lahma methôako, atema Krista rêsêthuk eka.

⁵Ngale dihiaknyu henma komin, ate kho lebukma nok atang chhangko rangmesoam ako ngale nok atang chhang rangsoam thintheko kho lebukma Joban ngin methôako atema ate tangwa nâng rêsêthuk eka; ererângrâng kho lebukte dihiaknyu ngale kho lokchhunte dihiaknyu nii mănthe.

⁶Dihiaknyu pumma ate kho lebuk medang ako, ate khopa khenphe chenrea. Ngale dihiaknyu rângma ate kho lokchhun, ba khenphe pa rêsêli dâng phumma, atema khobuk chenrea.

⁷Delawa ma ate kho lebukmin, chenrângma ngako, atea Joban rângrâng hôaneka ngale Joban mîndongthuk eka. Rohkomin, dihiak pumma tangwamîn dongthuk eka;

⁸chenrângma ngako dela pa dihiak wah hôanwah dangmah, rohkomin dihiak pa dela wah hôanwah.

⁹Ngale dela pa dihiak râng hôanwah dangmah, rohkomin, dihiak peba dela rângma hôanwah.

¹⁰Rangwah Joban ngintatte heh junko dangeka, dihiak pumma atea ate dela khenko songtong eka ngama khesok rângma atema khobuk lahma tôngmin.

¹¹Nâng roandôngko Teso jetlihma sôngtôngko, dihiak pemin dela rângma alem, ngale dela pemin dihiak rângma alem.

¹²Chenrângma ngako dihiak pa dela wah hôanwah, ererângrângjô dela pa dihiak wah chhaeka; ngale Joban ma jôba chentôpa hin ajo thukeka.

¹³Nedede rângma thatthong hun tan en, dihiaknyu pa nok atang rangsoam thinko ate khoko chenjô lebukma rangsoam pa sen ale senmah a.

¹⁴Chengrângma ngako, belem junkomin nângma jet dela ma kholo pânpa ate rângma rêsêli,



¹⁵rohkomin dihiak rãngma kholo pãnpa ate phangsên thukli. Dihiak nãng kholo koheka pa ate khobuk rãngma koheka.

¹⁶Rohkomin are ngin khohko henma komin chhiakmîn mehun enko, ngama thôkoh eka, ninãngmin ngale Joban nãng putedâlemte Asãthem hehnãngmin are lêko lihân rangsoam niemarang ahotu.

Teso Phhekchhah

(Mathiu 26.26-29; Mak 14.22-25; Luk 22.14-20)

¹⁷Ngama nenãng are jabkhab rîn akhah eka junko nenãng rômah, chenrãngma ngako, nekhu rangsoam rãng chohmîn ko asenli lemo thangma ajahthem ba chhihmo eken.

¹⁸Abengthôanko ngama tattek nekhu rangsoam rãng chohmîn ko nekhuchhang nãng hung lejut dangeken; ngale arepa nginlinlin ngama pute ekang.

¹⁹(Nekhu tungnãng hung lejut dangeken pemin chenjô dangmah, eroh medang enkoba, henhen pa roantangma toangtang dangeka erepa senthemthem ekhe e.)

²⁰Chenthu nekhu aroamma khôanpoatko phhekchhah ekenpa Teso phhekchhah chhah dangmet.

²¹Nekhu phhekchhah roamchhah poatko, khukama mihhãneh lebem thangma mãmã dede thiakpa sitsiak chhah eka, erohwah khukapa rêmritma tong ngale khukapa lanmokroh jokphhek chhah eken.

²²Nekhuma jokphhek chhahrãng mãmã dede hum ahone? Roh akole, nema Joban nãng putedâlemte Asãthem hehnãng chhihchoh ken ale, roh akole tangchhih hehnãng rêsêthuk hun eken a? Are ngin junko ngama nenãng chenni nga a? Ngama nekhu nãng rôrea? rômah!

²³Chenrãngma ngako ngama nenãng hethô tahpa Ngama Teso wah chohtatwah: Teso Jisu ate chênsãng rangpen ko, atema bankên chhupthe toansemwah,



²⁴Ngale atema Joban nâng dangkoh a ngalahma bankên pa chhupsietwah, erediko atema ngatwah, “Are nga phoangpa nekhurãng. Arepa nganâng thonghun rãng nekhuma mo en.”

²⁵Ererãngrãngjô, thinma rangjâ phhekchhah tâchhah diko, atema bâti toansem lahma ngatwah, “Are bâti kowah hei demko Joban ma toamnyan sem eka. Chenthu nema arepa jokko, nganâng thonghun letma jok en.”

²⁶Are ngaeka pa nema are bankên pa phhek roakweih ngale are bâti kowah jokroakweih Teso mangak ngakka nema Teso rit nginpa phoangthômin.

²⁷Erediko henma komin Teso bankên kowah phhek ngale Teso bâti kowah joklahma Teso mîn mechhihsiet ako, atema Teso phoang ngale Teso hei lelatnâng pap moeka.

²⁸Erohawah, abengthôanko mâmâ dede bengjetrii mêngen, eredikoba bankên kowah phhek en ngale bâti kowah jok en.

²⁹Chenrãngma ngako chenthu nema bankên kowah phhek, ngale bâti kowah jok reletma, nema Teso phoang junko chenjô lejet medan enko, nema nedede nâng achhih ngarii letma phhek eken ngale jok eken.

³⁰Erohawah nekhuwah ajahthem heh khun atam reken ngale boan anaa dangjâ eken, ngale melâng ritmin riitah.

³¹Nãngkhu dedema abengko mebeng jetriimeng eko, nãngnâng Joban ma chhih ngatthin aho dângmin.

³²Rohkomin Teso ma nãngnâng rensû lahma phhekkhên nâkhên hôanehi, erohwah nãnga are hahtokkhoh wah mihnyan chhih heh demnâng lejohroam mahriimin.

³³Erohawah ngalemruchha heh, Chenthu nekhuma Teso phhekchhah pa phhekrãng meroamkhôan enko, anga nga bemmîn re en.

³⁴Ngale hen akomin rêmrit medan enko, humnâng chenchhah a, erohkoba nekhua aroamma khôanpoatko Joban ma nenâng achhih lenga edanghèn. Ngin ahan heh dangeka chenthu Nga netânâng hokko ephenthômîn e.



1 Korint 12

Asâthôanju wah Hînhô

¹Ade dangeka, Asâthôanju wah Hînhô choh junma siti nâng raangletma nganâng thôngphatha pa. Ngalemruchha heh, ere Hînhô junma nenâng toangtang pa jetthuk huneka.

²Nema ajet chenthu nema Joban lejet dangtet poatko, nema roandông ahote moangachaang hehnâng soamtô letma Joban tâwah lemke nâng taangchhoan letma dângwah.

³Ngama nenâng arepa jetthuk huneka, henpa Joban Juma senlahma tongeka erehehma chenthumin “Jisu nâng têm athoak mah!” ngale chenthu Asâthôanju ma lechohsû kako henmemin “Jisu pa Teso,” ngama leta loatjabmin.

⁴Ju wah Hînhô pa mâmâ jatjat chohlahma tonga, rohkomin mănthe Juma jôba koheka.

⁵Ngale mâmâ jatjat khô alemma soamtô lahma tonga, rohkomin mănthe Teso pa jôba khoakhem lahma soamtô eka.

⁶Ngale mâmâ jatjat chaan ahang junko soamtô lihma tonga, rohkomin mănthe Joban ma tuta jôba chentô nâng kohlahma khoakhem soamtô eka.

⁷Anga nga mihnyan nâng Jupa chenni ngema komin johtong lahma kheki, erepa chentô mihnyan rãng asenrãng johtong eka.

⁸Juma wathe mihnyanko Joban nginpa buthi moangthêm kohlahma thôthuk eka, ngale ahan wathe mihnyanko ere mănthe Ju pummajô Joban nginpa nyapjet nyapjien dangthuk lahma thôthuk eka

⁹Wanthe ngale ere mănthe Ju pumma jôba ahan wathe mihnyanko putedâlem sen dangthuk eka, ngale ahan watheko atema khoanchet sênsiet chaan koheka.

¹⁰Ju pumma ahan watheko patritli moatlem moat chaan koheka; ahan watheko, Joban ngin phoangthô hînhô koheka; ngale han wathe komin,



chenre hînhô pa Joban ngewah kaera, ngale chenrepa Joban ngewah dangmah a erepa jetloatchaan koheka. Ngale han watheko patritli jabkhab nyan jienjab chaan koheka, ngale han watheko erepa chenni nâng ngaeka erepa jienlit thôkoh chaan koheka.

¹¹Rohkomin are chentô moatte pa wanthe ngale mănthe Juma tuta jôba moeka; atema chenroh huneka, eroh atema anga nganâng mâmâ jatjat hînhô koheka.

Phoang Wanthe Ko Mâmâ Jatjat Moatlem

¹²Krista pa phoang wanthe ko mâmâ jatjat mit adek, phhek anâ tongeka răngrăng; phoang wanthe ko mâmâ jatjat mit adek, phhek anâjô, medang akomin phoangpa wathe jôba.

¹³Ererăngrăng, năngkhu anga ngamin, Jews dangkolih, Jews ledangte heh dangkolih, mihhu mihhaa dangkolah, ngale mihhu mihhaa ledangte dangkolah, mănthe Ju pumma wanthe phoang mînko baptijem kohehi, ngale năngkhu anga nganâng Ju wanthejo kowah jokthuk ehi.

¹⁴Chenrăngma ngako phoangpa jathewah lolo hân dangmah, phoang wanthe khenko mâmâ jatjat roaplahma hânanka.

¹⁵Dama, “Nga dek dangmek, erohwah ngaphoang demko roapmek,” ngamejô menga komin atea phoang demko leroap tadangmah.

¹⁶Ngale nâma, “Nga mit dangmek, erohwah, ngaphoang demko roapmek,” ngamejô menga akomin atea phoang demko leroap tadangmah.

¹⁷Phumma phoang phangtangma mit lolo medang ako, atema chenroh jientatmin a? Ngale nâ lolo medang akomin, atema tûm anêm pa chenroh jientatmin a?

¹⁸Erohwah, Joban ma phoangko atema chenroh huneka eroh mâmâ jatjat hânanka.

¹⁹Chentôpa jatthe lolo dăngno mako phoang pejô aho dăngmin wah!



²⁰Ererãngrãng, phoang wanthe ko māmâ jatjat mit adek phhek anâ pa hōaneka.

²¹Eroh wah mit pumma dekho, “Ngama nang lemmih!” tanga mah, roh akole khoma dako, “Sen a, Ngama nang lemmih!” ngama eta nga a.

²²Eroh wah, nãngphoang kowah chenrepa aboanthōan dangeka erepa aho thangma nãngma chenmin tamomih;

²³ngale nãngphoang kowah chenrepa nãngma alemli dangmah ngaekia erepa nãngma ajahthōan chhuh achat lihma thien eki; ngale nãngphoang kowah chenrepa lesenkhe dangekia erepa nãngma ajahthōan chiem achei lihma thien eki,

²⁴Ngale nãngphoang wah chenre pa phãngsenthōan a ere pumma min araangrang chhuh achat lemmah. Rohkomin Joban ma nãngphoang wah mit adek phhek anâ chentōpa aroh jienroam hōaneka chenni pa alemli lechhang danga eremin alemli thōan rãng hōaneka.

²⁵Ngale eroh wah phoang wanthe khenko māmâ khukhu dangmah, rohkomin phoang kowah chentōpa wanthe pumma wantherãng sekmahmîn wakeka.

²⁶Phoang kowah wanthe mechēm ako, ahan hehmin phangtang ate demnãng johchēm eka; ngale phoang kowah wanthe merãngthō ako, ahan hehmin phangtang ate demnãng khu johhah eka.

²⁷Nekhu phangtang Krista phoangtuta, ngale anga nga ere Krista phoangko johroap eken.

²⁸Joban ma Asãthem hehnãngmin māmâ moatlem mothuk eka: Abengthōanko moattat chhoante, erediko mōngama, erediko hethōte; erediko patritli moatlem moatte, erediko khoanchet mesietchaan chohte, mihnãng chohsokte, moatlem jienmoatte, ngale patritli jabma jienjabte.

²⁹Thin chentōpa moattat chhoante dangmah, ba mōng amamin dangmah, hethōtemin dangmah. Ngale chentō nãng patritli moatlem moatchaan aho



³⁰ngale khoanchet mesietchaan, patritli jabma jienjab, ngale ere jabpa jienlitthô chaan pemin chentô nâng aho.

³¹Erohwhah, chenpa alemli thôn hinhôa, ereko nehungkoh en. Rohkomin, ere chentô kowah asenthôan pa ngama ekhesok a.

1 Korint 13

Hun achetmîn

¹Ngama chentô mihnyan nyuchha jabkhab heh mejienjab angkomin, ngale rangkethung wah Joban ngintatte jabkhabjô mejienjab angkomin, nganâng hun achet pa aho medang hangko, nga jabkhab pa tamtin rahwat wah rãngrãng, ba chaangsi rahdohwah rãngrãng dângmin.

²Ngama Joban nginpa mihhung lanlitroh mejienthô angkomin; ngale roangrup metajet angkomin, erediko Joban junma chentô mejet angkomin; ngale hahkong pa lanta moatsietroh putedâlem metong hangkomin - nganâng hun achet pa aho medang hangko, nga a chenni rãngjô senmek.

³Ngama nga ngewah chhahkhem heh phangtang mihnâng metakoh angkomin, ngale ngaphoangmin wennâng meta rokthhekthuk angkomin - nganâng hun achet aho medang hangko, erepemin ngarãngma sekhota.

⁴Hun achet pa hungmông rinmông ngale mînchênwin; mihnâng phetwânmah, ngale atedede rãngthôrii mah, erediko ngamrii mah;

⁵Hun achet pa mihpoakliak dangmah, chhahnyoak min dangmah, erediko rinkhahla min dangmah; erediko hun achet pumma chhahli heh hungnâng lekthienmah;

⁶Hun achet pa chhahli heh demnâng khuhah mah, toangtang demnâng ba khuhah eka.

⁷Hun achet pumma chenthujô lekphemah; ngale ate ngewah putedâlem, dâlem, ngale hungmông rinmông dangeka pa chenthumin jekmah.

⁸Hun achet pa roantang roanjêng rãngma dângmin. Joban nginpa mihhung lânlitjâroh ethôthem a, rohkomin erepa amahjâ erea; ajatjat jabma patritli



jienjab lahma tonga, rohkomin erehehmin thôn area; ngale jet ajien tadangthem a, rohkomin erepemin thôn area.

⁹Chenrāngma ngako nāngma jet ekile Joban ngin jienthō ekiheh lengkaba jeteki;

¹⁰rohkomin chenthu phengtangma mejet tihko, mǎnchha jettih heh mahjâ area.

¹¹Chenthu nga letachha thuko, ngajabkhab, hung arin, ngale ngama thonghun ekang heh phangtang letachha rāngrāng dāngwah; ade phumma nga phannang lâdangtek, ngale letachha rāngrāng dangjeng tumek.

¹²Athāngheh nāngma chenni khekia erepa dāpha sokminnāng minmōangraang kheritwah rāngrāng; khediko nāngma thenphāng linlin echokhe e. Athāngheh ngama chenni jetkanga erepa mǎnchhaba jet ekang; khediko ngama phangtang elaangjet ang - chenroh Joban ma nga senthemthem thōanlep ehanga ererāngrāng ethōanjet ang.

¹³Rohkomin are wanrem kowah: Putedālem, akhâ, ngale hun achet; phumma are wanrem kowah adongthōanpa hun achetmîn pa.

1 Korint 14

Asāthōanju ngewah Hînhô

¹Erohwha Hun achetmîn rāngma nekhu anga ngama moatmin. Ngale nehungma Juwah Hînhô chohrāngma thonghun en, ajahthōan pa Joban ngin phoangthō Hînhô chohrāng thonghun en.

²Henhenma ajatjat jabma jienjab eka erepumma mihrāng jab dangmah, Joban demnāng ba jabmîn eka, chenrāngma ngako, erepa mihma henmemin jetmah. Erepa thinma Juchaan junma Joban toangtang nginpa thōeka.

³Rohkomin henma Joban ngin phoangthō eka erehehma mihnyan hehnāng thōkoh eka ngale thinnāng chohsû eka, hung arin dongthuk eka ngale hung arinpa senthuk re eka.



⁴Henhenma ajatjat jabma patritli jienjab eka erehehma thindede chohsû re eka, rohkomin henhenma Joban nginpa phoangthô eka erehehma Asâthem heh phangtang nâng chohsû eka.

⁵Ngama nekhû phangtang ajatjat jabma jienjab letmele ngama thonghun eka; rohkomin ere nomemin nekhuma Joban ngin phoangthô Hînhô chohlet mele ngamaba thonghun ekang. Chenrãngma ngako, Joban ngin jienphoang thôte mihnyan pa ajatjat jabma jienjab eka nomemin ajahthem alemli, chenrãngma ngako ajatjat jab jianjabte pumma chenni jabeka erepa jienlitthôte metong akoba ere jabkhab pumma Asâthem phangtang asen edanga.

⁶Erohwhah ngalemruchha heh, chenthu nga netânâng hokko, ngama ajatjat jabkhab jablekma mehû rângko nema chenni echoh ena? Nganâng Joban ma khesokwah ngin, jet ajien ngin, erediko nehung litli Joban ngin, ba nenâng chenni akomin hethô lere kako, nema asenli chhupthem in chohmet.

⁷Ahîntejat ledang sêsêko temthin nong, pupe, ngale bõngbe hehnâng thatsu tan en - thin a sêroat junko ledang phoangrah temroh mereako erepa henma jienjetmin a?

⁸Ngale rancheprãng pupe rahmette mihnyan pumma phenjaangjaang lerahmet medang ako, ranloatmîn rãng hen jienhông chepmin a?

⁹Ererãngrãng, nema ajatjat jabkhab jabletma Joban ngin thôkoh ekenpa phenjaangjaang ledang kako erepa henma jienjetmin a? ne jabkhab pa pongwutnâng emahjâ!

¹⁰Rangkhenko ajahthem mâmâ jatjat jabkhab tonga, eroh akomin chenre jabkhab pejô sekho nâng phoagro phoangwa mah.

¹¹Rohkomin thinma jabeka jabkhab pa ngama lejet medang angko, henhenma ere jabkhab jabeka erepa ngarãngma mihdiak mihnyan, ngale ngamin thinrãngma mihdiak mihnyan.

¹²Phumma nema Ju wah Hînhô chohhun dâng phumma, nema abengthôanko chenre pumma Asâthem hehrãng ajahthôn asen dângmin a erepa chohrãngma mo en.



¹³Eroh wah, henma ajatjat jabma jabeka erepumma atema chenrãngma jabeka erepa tâjien litthô rãng Hînhô chohrãng rangsoam min.

¹⁴Chenrãngma ngako ngama ererãngrãng jabma rangmesoam angko, ngaju memin rangsoam eka, rohkomin ngahung ngarin pumma ere jabkhab pa jetmah.

¹⁵Eroh medang ako ngama chennire anga? Ngama ngaju demkomin rangjohsoam ang, erediko ngahung ngarin demkomin rang johsoam ang; Ngaju demkomin sêwah johse ang, ngale ngahung ngarin demkomin ejohse ang.

¹⁶Chenthu nema Joban nãng Juma lanlan rangmesoam enko, nekhu demwah jujabkhab lejette johkhôan hûera hehma nema Joban nãng dangkoh a ngat rangsoam soam ko “Amen” ngama chenroh jienjoh ngatmin a? Chenrãngma ngako nema chenni jabeken a erepa thinma jetmah.

¹⁷Nema Joban nãng dangkoh a ngaeken rangsoam pa nyahrãng asenjô medang akomin, epa mihhan hehrãngma chenjô asen dangmah.

¹⁸Ngama Joban nãng dangkoh a ngaekang, chenrãngma ngako, Ngama nekhu noma ajatjat jabma ajah jienjab ekang.

¹⁹Rohkomin ere ajatjat jabkhab heh hahjat jatma jabnoma Asâthem heh rangsoam sanpoatko thinnãng hethhê rãng thinma jetli jabkhab khab bangâ tôba ejab ang.

²⁰Ngalemruchha heh, nema letachha heh hung arin rãngrãng nekphoang thonghun en; chihli nãngba letachha heh rãngrãng dangen, rohkomin mihlin phannang heh hung arin rãngrãng dangen.

²¹Joban nyapraang nãng aroh raangeka, “Teso ma ngaeka, Ajatjat jabma jabte mihnyan heh junma ngama nganãng putedâlemte mihnyan heh demnãng ejabmîn ang, Ngama mihdiak wah mihnyan heh thunkhab junma ejabmîn ang, erohjô medang akomin nga mihnyan hehma nganãng lejetat edang hang.”



²²Erohwah, ajatjat jabma jabpa lepute dâlemte mihnyan heh ma linlin ngama jetrãng jabeka, erepa putedâlemte mihnyan hehrãng jab dangmah, phumma Joban ngin phôngthô Hînhô pa putedâlemte mihnyan hehrãng, lepute dâlemte mihnyan hehrãng dangmah.

²³Erohwah, Asâthem heh phangtang roamkhôan letma chentôma ajatjat jab matuta mehongjab enko-ngale ereko ajatjat jabpa leжете mihnyan ba lepute dâlemte mihnyan heh mejoh khôanhû rako, thinma nekhu phangtang apâ reken ngama lenga minne?

²⁴Rohkomin Joban nãng lepute dâlemte mihnyan ba Joban ngin lejienthôte mihnyan heh johkhôan poatko chentôma Joban nginpa methô enko, ere mihnyan heh ma ne nginpa tatlahma thinma papkaam moeka hehrãngma sekma erea. Ngale thinma tateka junko thindede nãng achhih engariia,

²⁵thinma huhthonghun eka hehmin eloatthôa, ngale thinma Joban nãng, “Linlinjô Joban pa areko nãngmongko tonga!” ngama ngalahma, thinpap hehrãngma map thalahma khupjup nungma Joban nãng esoamwak a.

Asâthem heh Rangsoam Niem

²⁶Ngalemruchha heh, Ngama are junma jabekang. Chenthu nekhu rangsoam rãng khôanko, wathema rangsoamsê pese, ahan wathema hethô, ngale ahan wathe pumma Joban ma khesokwah nginpa thôkoh, ngale ahan ma ajatjat jabma jab, ngale ahan wathema erejabpa litthô. Chentô pejô Asâthem hehrãngma asenli tuta chendanga.

²⁷Henma akomin ajatjat jabma mejab ako, ajahthôan pa wanii ba warem tôma chenjab a, ngale thinma chenni jabeka erepa ahan wathema chenlitthôa.

²⁸Rohkomin ere jabkhab pa henmemin letajien litthô medang ako, ere mihnyan pumma nok chhangko jabpa jeklahma Joban ngale ateni tungko lanlan chenjabmîn a.

²⁹Wanii ba warem tôma Joban nginpa chenthôa, ngale ahan heh ma thinma chenni thôeka erepa chenjetat a.



³⁰Rohkomin nekhu khôan eken chhangko henma akomin Joban wah ngin mechohtat ako, nginthôte pa jek chenre mênga.

³¹Nekhu phangtangma Joban nginpa tâthô en, rohkomin wathe diko wathema thô en, eroh medang akoba chentôma jienhemin ngale hung arin dôngmin.

³²Joban ngin jienthôte pumma ate dedema them athak lahma jekmin,

³³chenrăngma ngako Joban ma hahjâm pa hunmahhi, jutjut jaangjaang ngale mêmoma dângba hun ehi. Erepa chentô Joban mihnyan Asâthem heh tungko chendanga nganma huneka,

³⁴erekowah dihiaknyu heh kihchepchep tôngmin. Thinnâng lejabthuk min; Jews heh Niemarang nâng ngaeka, thin a thôte jabte heh ngin khennâng chentonga.

³⁵Dihiak heh chenni komin jethun medang ako, thinma thin tangwa ko humnâng chenthongpha a. Dihiaknyu heh Asâthem heh chhangnâng nginthôpa thinrăngma rêsêli.

³⁶Roh akole Joban jabkhab pa newah lehong eka? roh akole ere Joban jabkhab pa nekhu nâng lanlan kaera?

³⁷Henma komin atea Joban ngintat chhoante, ba atenâng Ju wah chaanchohte ngama methonghun ako, ngama nenâng chenni raangeka erepa Teso ma chienlahma raangeka ngama atema chenjet a.

³⁸Rohkomin atema are raang ekangpa lekep medang ako, ate nginmin nekkepen.

³⁹Eroh wah ngalemruchha heh, nehung nerin pa Joban ngin phoangthô rãng koh en, rohkomin ajatjat jabma hongjab pemin nekjek tânggen.

⁴⁰Chentô pejô senthemthem ngale punriri moat akatmin.

1 Korint 15

Krista Arit wah Ngaksat



¹Ngalemruchha heh, ade dangeka, ngama nenâng Nginkongsen thôko tahpa nema kepletma ere khohko ne putedâlem pa rongtêngtêng dangeken junma chhêmthôkoh huneka.

²Ere ngama nenâng thôkotah nginpa Joban Nginkongsen pa thôkoh wah. Nema Joban Nginkongsen ko rongtêngtêng loletma metong enko erejunma nekho epe en - eroh ledang kenko nema putedâlem eken pemin mahto nâng dângmin.

³Ngama nyahrãng alemli thôn ngin chohtat tekpa nenâng dienthôkoh eka: Joban nyapraang nâng raangeka rãngrãng, Krista nãngkhu paprãngma ritwah;

⁴Joban nyapraang nâng raangeka rãngrãng, atea mangrukko binkat lahma jârem diko ngaksat rewah;

⁵ngale atea Piter demnâng min chohmîntah, erediko moattat chhoante echhi waniilat demnâng min chohmînwah.

⁶Erediko rekthelem ma ate dijunte châbangâ nomemin ajah demnâng chohmînwah, phumma ere hehwah khakajô merii akomin khakapa athângheh ahînthu tonga.

⁷Erediko atea Jems demnâng chohmînwah ngale erediko moattat chhoante heh phangtang demnâng chohmînwah

⁸Khedithôanko nga demnâng min chohmînthag - nga a rangkuh ledangnâng chhatwah rãngrãngjô medang angkomin.

⁹Chenrãngma ngako moattat chhoante khukowah nga a khedithôn - Nganâng moattat chhoante ngama tangat tøjô dangmek, chenrãngma ngako ngama Joban nâng putedâlemte Asâthem heh chêmsietwah.

¹⁰Rohkomin nga a athângheh chenroh dangekanga erepa Joban mînchenchaan junma tadang ekang, ngale atema nganâng mînchenchaan kohthagpa mahto nâng dangmah. Erohwah, ngama moattat chhoante ahanheh noma ajah bâmchaan moekang, rohkomin erepa ngadede chaanma



lolomoat dangmek, Joban mînchenchaan pa nganâng tonglahma johmo ehang.

¹¹Erohwah, ngamejô methôkoh akomin, ba thinmejô methôkoh hèn komin, nikhuma mǎnthe pa phoangthôkoh eki, ngale nema areko putedâlem eken.

Nāng Arit wah Ngaksat

¹²Ade dangeka, nima Krista pa ritwah ngakhintah ngama phoangthô eki, phumma nekhuwah khaka heh ma riichoante heh ngakhin tumah ngama chenroh jienna eken a?

¹³Ere nema ngaeken pa toangtang medan ako, Kristajô ritwah ngakhin mahra dangmahne;

¹⁴ngale Krista pa ritwah lengakhin dāngnomeko, nima phoangthô thinmin aho dāngmin wah ngale nema putedâlem thinmin aho dāngmin wah.

¹⁵Ere nomemin adongpa, nima Joban pa mothô ngama khesokwah rāngrāng edanga, chenrāngma ngako nima Krista ritwah ngaksattah ngama thôeki - rohkomin linlinjô riichoante heh lengakhin medan ako, atema Krista min ngakhinsiet mah.

¹⁶Chenrāngma ngako riichoante heh lengakhin medan ako, Krista min ngakhinho.

¹⁷Ngale Krista lengakhin wah medan ako, nememin mahto nāng putedâlem eken, ngale ne athāng hehmin pap demkojô johmahrii letma tongeken.

¹⁸Ngale arohmin dangeka, Krista nāng putedâlem lahma riitah hehmin mahto nāng riieka.

¹⁹Nāngma Krista nāng dâlem ekipa are roandōng rāngma sēnrāngma lolo thonghun lihma putedâlem medan eko, nānga are hahtokkhoh kowah chentô mihnyan heh noma khangraang chihthōan.

²⁰Rohkomin Krista ritwah ngaksatwāng nginpa linlin, ngale ererāngrāngjô ahan henhen riieka erehehmin ngakhînmin.



- ²¹Chenroh mihnyan wathe junma ritpa hûera rãngrãng, ritwah ngakhîn pemin wathe mihnyan junma jôba hûera.
- ²²Chenroh Adam demnâng johroamdi chentô mihnyan pa riieki rãngrãng, Krista demnâng johroamdi chentô mihnyan hehmin ngakhînmin.
- ²³Rohkomin chentôpa mâmâ khô alemko ngakhînmin: Chentô noma khebeng thôn ko Krista ngakhînmin; erediko ate ngakkat sanpoatko henhen aterãng dangeka ereheh ngakhînmin.
- ²⁴Ere diphumma ba athôn sanpoat pa ehûra; Krista ma chentô junâng pête heh, thôte jabte heh, chaan ahang heh ejien a, ngale atema Hahsông pa Joban Wa dekkoh nãng ekoh a.
- ²⁵Chenrãngma ngako, Joban ma ran heh phangtang tajien lahma Krista dakhenko mathien thienkoh Krista ma epên a.
- ²⁶Khedithôn wah jienmin ran pa ritpa dãngmin.
- ²⁷Chenrãngma ngako Joban nyapraangma ngaeka, “Joban ma chentôpa ate daphâ khenko thieneka.” Rohkomin arepa nãngma jetmin Joban ma “chentôpa” ngama jabeka jabkhab ko chentôpa Krista khenko thienkohte Joban atedede johngarii mah.
- ²⁸Rohkomin chenthu chentôpa Krista khennâng methien kotahko, erediko Krista ate dedema, Chhama, chentôpa ate khennâng thienkohte Joban khenko ethienriia; ngale Joban ma chentô khohko epen a.
- ²⁹Ade dangeka, riichoante hehrãngma baptijem kepkohte mihnyan heh chenroh dãngmin a? Thinma riichoante hehrãngma chenni tamokoh e ngama dâlem eka? Arepa linlin medang ako, Khuka heh ma ngaeka rãngrãng, riichoante heh lengakhin min medang ako, ere mihnyan heh ma chenrãngma riichoante hehrãng baptijem kepkohte eka?
- ³⁰Ngale nãngkhumin - sanpoat roakweih cheili nãng tuta chenrãngma edangea?



³¹Ngalemruchha heh, nga rangwo roakweih riilekma tongekang! Năng roandôngpa năng Teso Jisu Krista demnâng roamlihma dângjunko nga nekhu khohnâng khuhah lekma arepa loatjab ekang.

³²Mihnyan nyuchha hung arin junma lolo ngama Ifisus wah “Wunngem” demnâng meloatmîn angko, ngama chenni chohmin a? Rohkomin ritte heh lengakhin medang ako, are nginthakthô pumma ngaeka răngrăng, “Jokphhek chhah e, chenrăngma ngako nènep năng rit retumin.”

³³Nekba en. “Lemruchha chhih pumma năng jat apatsen heh chhihsiet eka.”

³⁴Hungpun rinpun ngakdang en ngale papmoat pa jek en. Ngama nekhu chenrêsê en ngama nekhuwah khaka hehma Joban jetmet ngama loatjab ekang.

Arit wah Ngakhîn Phoang

³⁵Henma komin echhien a, “Riichoan mihnyan pa chenroh jienngak hinmin a? Thin phoangpa chenrăngrăng dângmin a?”

³⁶Nea aba jôba! Chenthu nema hahko bângken khiet ko, akhiet reken bângken pa lebeng riimêng kako bângken pa lehong phoakmin.

³⁷Ngale nema chenpa khiet eken a erepa aken loloba khiet eken, erepa chhahmin tadanga ngale lihân riichit phanthoi kenmin tadanga, khedinâng bângdongrăng hôngdâng wângthin bângphopa khiet dangmet.

³⁸Joban ma ere bângkenko atema chenrăngrăng bângpho hôngdângthuk huneka eroh koheka; ngale Joban ma chentô bângken nâng mâmâ răngrăngjô bângpho koheka.

³⁹Ngale ahînte jat heh ngem pemin chentôpa jatthe ngem tuta dangmah; mihnyan nyuchha ngem ajatjat, ahan ngem angah heh ngem pa ajatjat, wo heh ngem pa ajatjat, ngale ngah ajatjat.

⁴⁰Ngale rangkethung phoangmin ajatjat tonga, erediko hahtokkhoh phoangmin ajatjat tonga; rangkethung wah phoang phengsên pa are hahtokkhoh wah phoang phengsên nomemin ajatjat.



⁴¹San phengsên ajatjat, Dâ phengsên ajatjat, ngale merit heh phengsên ajatjat; ngale merit hehnângmin mâmâ jatjat senlahma tonga.

⁴²Phumma chenthu ritte heh mengakhin tahko aroh dângmin. Chenthu phoangpa hahkenko binkat ekia, ere phoangpa amah sânjâ phoang binkat eki; phumma chenthu mengakhin tahko ere phoangpa lemah chhihâ tuli phoang ngakhin eka.

⁴³Chenthu hahnâng bînko, erepa phangchhih ngale aboan bineki; phumma chenthu mengak sattahko, erepa phangsen ngale chaanwin ngaksat eka.

⁴⁴Chenthu bînkat rekia, erepa hei angem phoang peba binkat eki; phumma chenthu mengakhin tahko, erepa Ju phoangrãng litlahma ngakhin eka. Chenroh hei angem phoang tongeka, ererãngrãngjô Ju phoangmin tonga.

⁴⁵Chenrãngma ngako Joban nyapraangma ngaeka, “Khebengthôan mihnyan, Adam, pa ahînte mihnyan rãng hânwah”; rohkomin khediwah Adam pa roandông kohte Jurãng hâneka.

⁴⁶Khebeng-thôan wah kathapa Ju katwah dangmah, rohkomin erepa hei angem phoang dângwah, eredikoba Jupa katwah.

⁴⁷Khe-bengwah Adam pa hah kowah bum aboak wah hânwah; rohkomin khediwah Adam pa rangkethung wah katwah.

⁴⁸Henhen hahrãng dângtea ereheh hah wah hântah mihnyan rãngrãng; ngale henhen pa rangkethung rãng dângtea, ereheh rangkethung wah katte mihnyan rãngrãng.

⁴⁹Ngale chenroh nangkhua hah wah hânwah mihnyan lele hoangchha ehia, ererãngrãng jôba nãngmin rangkethung wah mihnyan rãngrãng dangeki.

⁵⁰Ngalemruchha heh, ngama ngaekang pa dangeka, hei angem junma Joban Hahsông pa leta chohmin, ngale amahritthin phoang pumma lemah riithin phoangpa tachohmah.

⁵¹⁻⁵²Are patritli toangtang nginpa jetat tan en: Nãngkhu phangtang leriimin, rohkomin chenthu athôn kowah poakpopo pa merah mettahko, mitthupjep



tungko nãngkhu phangtang lemlienma elitjâe. Chenrãngma ngako chenthu poakpopo pa merahmet tahko, riichoante heh chenthumin lengakrii turãng engakhin a, ngale nãngkhumin phangtang litjâ ere e.

⁵³Chenrãngma ngako chenni pa chhihjâli phoang dangtah a erepa lechhihjâli phoangrãng elitjâa; ngale chenpa ritli phoang dangtah a erepa letariili phoangrãng elitjâa.

⁵⁴Erohwhah chenthu eroh medang tahko, ngale ritli phoangpa letariili phoangrãng melitjâ tahko, Joban nyapraangpa toangtang edangkara: “Aritpa lâta chhihsiettah; ngale roantang roangjêng rãng lâjientah!”

⁵⁵“Arit, nangma chenni pa tajien eko? Arit, nangbii pa chenkoa?”

⁵⁶Arit pumma mihnyan ritphe chaanpa papwah choh eka, ngale pap pumma ate chaanpa Niemarang wah choh eka.

⁵⁷Rohkomin nãng Teso Jisu Krista junma nãngnãng ajienciaan kohte Joban nãng dangkoh a ngama ngae!

⁵⁸Erohwhah, ngalemruchha heh, rongtêngtêng dangen, ngale nehung pa chenni mejô nekchen phongsiet ehèn. Roantangma Teso moatlem nãng hungkoh letma mo en, chenrãngma ngako nemajet, nema Teso moatlem moeken pa chenthumin mahto nãng dangmah.

1 Korint 16

Putedâlemte Lemruchha hehrãngma Chohsê

¹Ade dangeka, Judia wah Joban nãng putedâlemte hehrãngma ngunse junma siti nãng raangletma thôngphâ pa dangeka. Ngama Galatien wah Asâthem hehnãng chenroh thôkotek a ererãngrãng nememin metkep mo en.

²Nema chentô chohbii eken a erejunko dobatjâ roakweih ngunwah roanruse en, ngale erepa khôanthien en, eroh koba chenthu nga netânãng hokko lesetu edangen.

³Nga netânãng hokdiko, nema ren eken mihnyan hehnãng siti wah raangko lekma, nema khôansetet ngunheh katkohrãng Jeroselem nãng echienkat e.



⁴Ngamin enâng katpa asen medang ako, thin a nga demnâng min eta johka ra.

Pol Mongthêm

⁵Nga Mesidonia ngenâng katdiko nekhu tânâng ehûrâng - chenrãngma ngako nga a Mesidonia ngenâng katmêngmin.

⁶Nga chenroh mekomin nekhu demnâng sanpoat poatthe ejoh tongka a, ba rangpâ pátang memin eta johtongka a, ngale erediko nga chenngê nâng chhoanrãng ngaekanga enâng chhoanko nema tachohsuha.

⁷Nga nekhu demnâng adankhoam nungma chohmînthien pa hunmek; Teso hungsi medang ako, Nga nekhu demnâng rangwolo johtông hun ekang.

⁸Pentikos rangwojâ tôko landangroh nga a anâng Ifisus nâng tôngmin.

⁹Nga lelatnâng mihnyan heh ajahjô medang akomin, linlin danglekma ngama Joban moatlempa anâng nyahrãng adong ngale asen moatrãngma sanpoatsen choh ekang.

¹⁰Timothi netânâng mehûrako, nedemko senthemthem tângroo en, chenrãngma ngako ate memin nga rãngrãngjô Teso rãngma moeka.

¹¹Henmemin atethã nekjô en, erenoma ate ngakchhoan ko nema chohsû letma senthemthem mêmoma chienchhoan en, erohkoba atea ngatânâng engak hûra; chenrãngma ngako atema putedâlemte heh sietlahma ngatânâng ngakhok pa bemla ekang.

¹²Ade dangeka, nãngpho Apolo rãngma dangeka. Ngama roantangma atenâng putedâlemte heh sietlahma netânâng hokrãngma rãngthôkoh ang, rohkomin are sanpoatko atema netânâng hokrãng senthemthem mehun eka. Rohkomin chenthu atema sanpoat pa mechoh tahko nekhu tânâng ehûra.

Athôn Jabkhab

¹³Jetletma dangen, putedâlem nâng rongtêngtêng, hungdongdong, ngale lechei thangma dangen.

¹⁴Ne moatlem chentôpa hunmin letma mo en.



¹⁵Nema Stifen ngale ate humte tangkâ heh jet en; thin a Akaia wah khebeng thôn Kristan rãng litdangte, ngale thin dedema Joban nãng putedâlemte mihnyan hehnãng sũare lahma tongeka. Ngalemruchha heh, ngama nenãng rosep eka,

¹⁶ererãngrãng mihnyan heh dijun en, ngale thin demnãng roamlahma moat akatte mihnyan heh rãngrãng dangen.

¹⁷Nga a Stifena, Fortunatas, ngale Akhaikas heh ngatãnãng hokphumma khuhah ekang; nea nga demnãng ahojô medan enkomin nelitko thin lâhũtha

¹⁸ngale thinma nekhu hung senthukthen rãngrãng ngahung lâsen thukthang. Arerãngrãng mihnyan hehnãng dangkoh a ngatmin.

¹⁹Asia diakwah Asãthem hehma nenãng thin salem matkat ehèn; Akuila ngale Prisila, ngale thinhum wah khõante Asãthem hehmemin ahun Kristan salem nenãng matkat ehèn.

²⁰Anãngwah chentõ putedâlemte hehmemin salem koh ehèn. Joban mĩnko deksit pekmĩn letma salem kohmĩn en.

²¹Are sitipa ngadede dekma raang ekang: Pol ma salem koheka.

²²Henhenma Teso nãng hunmah a - ereheh khoãnãng achhih ehũa! Maranatha -Teso karoo!

²³Teso Jisu mĩnchennaan pa nekhu demnãng chentonghèn.

²⁴Jisu Krista mĩnko ngawah hun achet nekhu anga nga demnãng chentonghèn.



2 Korint

2 Korint 1

¹Joban hungsi junko Jisu Krista moattat chhoante Pol, ngale nãngnaa Timothi ma ngewah- Joban nãng putedâlemte Korint wah Asâthem, ngale Akaia diakwah chentô Joban nãng putedâlemte mihnyan hehnâng raangeka:

²Nãng Wa Joban ngale nãng Teso Jisu Krista ma nekhu nãng mînchenchaan ngale mêmô chenkohhèn.

Pol ma Joban Nãng Dangkoh a Ngat

³Nãng Teso Jisu Krista Wa Joban nãng dangkoh a ngae, nãngnâng nyahrãng mînchênte Wa, ngale nãngnâng chentô nãng chohsokte Joban nãng dangkoh a ngae!

⁴Atema nãng chentô chêmchei nãngmin chohsûehi, erohwah, nãngnâng Joban ma chenroh chohsûthia, ererãngrãnjô nãngmemin rongrup nãng chêmcheite mihnyan hehnâng chohsokmin.

⁵Chenroh nãngma Krista chêmchei ko johchêm ekia ererãngrãnjô, Krista junko Joban ma nãngnâng echohsûkat hi.

⁶Nima chêmchei mechoh eko, erepa nenâng chohsokrãng chêm eki, ngale nekhu khope rãngma chêm eki; phumma nia lechêm medang eko, nemin lechêm thangmejô edangen, ngale nima tadôti chêmchei pa jôba nememin mamtâdô rãng chaankoh ehèn.

⁷Erohwhah nima nenâng nyahrãng dâlem eka; ngale nima ajet nekhu nidemnâng chenroh johchêm ehia ererãngrãng, nikhu lechêm thangma tôngko nekhummin ejohtonghi.

⁸Lemruchha heh, nima Asia diaknâng chêmthih heh nenâng jetthuk huneka. Nima chêmchohtih pa atôdong ngale atôlih dângwah nia ahînma edangtue ngamejô lekhatu wah.



⁹Nia ritphe eretu thêmi ngama thonghun lihma dângwah. Rohkomin arepa nidede nâng dâlemrii lihma dângrăng ledang, riichoante mihnyan heh tângak hînsiette Joban nâng lolo tok anaa lihma tôngrăngma dângwah.

¹⁰Arerăngrăng cheili ritthin kowah atema pepâng ehi, ngale epepânghi; ngale ademin atema jôba epepânghi ngama nima atenâng khalihma tok anaa eki,

¹¹chenroh nekuh memin rangsoam junma ninâng chohsûthi răngrăng. Erohjó, melâng mihnyan heh ma nirăngma rangsoam kohehi pa Joban ma edânthanga, ngale Joban ma ninâng rang ekohkat hi; ngale melâng mihnyan heh ma nirăngma atenâng dangkoh a ngama eng a.

Pol ma Ate Mongthêm pa litsiet

¹²Nima are nginpa rânghôeki, are hahtokkhoh ko nihung nirin pa sâpoangpoang tongeki, ngale ajahthem pejô Joban ma chohsok junko nekuh demnâng kuhah nâhah ngale hungsâ rinsâ danglihma tongeki, erepa mihnyan nyuchha buthi mongthem junko ledang Joban mînchenchaan junko tongeki.

¹³⁻¹⁴Nema chenni pa weih letma tâjetthin a erepa jôba nima nenâng raangkat eka. Rohkomin athângheh nekhuma nijunma chhupthechha lolo mejet hikomin, lele nema phangtang ejet hi ngama thonghun ekang, erohkoba nângkhu Teso Jisu ngakkatjâ rangwo ko nekhuma ni erânghôhi, ngale nimemin nekuh erânghôa.

¹⁵Nekhuma rang raknii chenkep en ngama thonghun lekma khebengko nekuh tânâng chohmîn hûrâng ngama nyahrăng themawa wah.

¹⁶Nga Mesidonia nâng katpoat ko nekuh demnâng echohmîn thien a, ngale enângwah ngakwângpoat komin echohmîn a ngama themawa ekang, erepa nga Judia nâng katko nema chohsû letma chensen wênha ngama thonghun ekang.

¹⁷Ngama aroh themawa ekangpa senthemthem lethonghun thangma lemo ekanga? Chenthu ngama aroh themawa ko, nga chhahnyoak hungma lemo



ekanga, sanpoat theko “danga, danga” ngale “dangmah, dangmah” ngama tuta lenga ekanga?

¹⁸Joban ma toangtang jabeka rãngrãng, ngama nedemnâng toamsem eka pemin “Danga” le “Dangmah a” ngama dangmah.

¹⁹Chenrãngma ngako Silas, Timothi, ngale ngadedema nenâng thôkohtah Jisu Krista Joban Chhapa “Danga” ngale “Dangmah” ngama ngatte dangmah. Erenoma atea, “Danga” ngama ngatte Joban;

²⁰Chenrãngma Joban ma chentô toamsem eka ereheh nâng atema “Danga” ngama tuta ngaeka. Erohwah Jisu Krista junma Joban mîndôngrãng nãngma “Amen” ngaeki.

²¹Ngale Joban ma nãngkhu roandôngpa Jisu Krista demnâng roamsiet lahma rongtêngtêng dangthuk ehi; ngale Joban dedema nãngkhu nâng renlahma rangkoh ehi,

²²Ngale nãngkhua aterãng ngama jetrãngma nãngkhu nâng atemãn hôanlahma thien ehi, ngale ate thiak chentôpa nãngrãng thienkoh ehi ngama jetrãng atema nãngnâng Asâthôanju kohehi.

²³Nga hâkhi pa Joban tonga, atema ngahung ngarin pa ajet! ngale ngama nenâng ritngat pa lehun dângjun koba Korint nâng leka dângwah.

²⁴Nima nenâng metkepkep putedâlem min jôba ngama khetlomah; Nima ajet nea putedâlem nâng rongtêngtêng dangletma tongeken. Rohkomin nekhu dede khuhah nâhah dângrãngma jôba nekhu demnâng johroam moeka.

2 Korint 2

¹Erohwah nekhu hungchhih thukrãng nga netânâng thedep hutu mahrâng ngama thonghun ekang.

²Chenrãngma ngako ngama nehung mechhihthuk ako, henma nga khuhah thuktumin a? Ngama hungchhih thuktek mihnyan heh mejôba ngahung esen thukhang.



³Erohwah jôba ngama ere sitipa nenâng raang wah - Ngahung sênthukte mihnyan heh ma ngahung nekchen chhihthuk ehang ngama hunlekma netânâng leka thangma tongekang. Chenrângma ngako, ngama ajet chenthu nga khu mehah angko, nemin khuhah eken.

⁴Ngama are sitipa nyahrâng hungchhih chêmchoh nungma, erediko nyahrâng mitphî jâlekma raang ekang; ngama arepa nehung chhihthuk hunlekma raang dangmek, rohkomin ngama nekhu phangtang nâng chentô huneka erepa jetthuk rângba raangeka.

Kaamchhih Moatte hehnâng Mapkoh

⁵Ade dangeka, henma komin mihhung mechhihthuk tetko, erepa atema ngahung chhihthuk dangmah hang, nekhu phangtang hungba chhihthuk ehèn - chhupthe komin nehung chhihthuk ehèn. (Ngama are jabekang pa atenâng achhihlin ngat lehun junko jabekang.)

⁶Are kaamchhih moatte mihnyanko nekhuma roanche phhekkhên nâkhên mehôantet kojô lâthengtah.

⁷Rohkomin ade phumma nekhuma atenâng mapkoh en, ngale ate hung dongsiet en, chenrângma ngako hung pa lulu chhihlahma roantangrâng môangchhihjâa.

⁸Ngale ngama nenâng rosep eka, nema atenâng linlin hun ekenpa chenjet a ngama atenâng khesok en.

⁹Ngama nenâng are sitiraang ekapa, ngama nenâng hethôeka heh kep ekenle kepmet a ngama thatjettân râng raangeka.

¹⁰Chenthu nema kaamchhih moatte hehnâng map mekoh tetko, ngamemin thinnâng map koh ekang. Phumma chenthu ngama map mekoh tâkko - linlinjô, ngama chentô map kohthin heh phangtang koh ekang - Ngama arepa Krista mathahko nekhu rângma moekang.

¹¹Ngama are moekang pa joakma nângkhu asenli heh nekchen tajien ehi ngama moekang; chenrângma ngako nângma ate mongthem pa ajet.

Tros nâng Pol Hungchhih Sanpoat



¹²Chenthu nga Tros nâng Krista Nginkongsen pa thôkohrăng hokko, Nganâng Teso ma enâng moatrăng lemlaang kolahma khewah.

¹³Rohkomin ngama nângnaa Titas lechokhe dâng phumma nyahrăng sekma lekma dângwah. Erohwah ngama enângwah mihnyan hehnâng chhoan ekangjô ngama thôthien kolekma Mesidonia nâng katwah.

Krista junma Jien

¹⁴Rohkomin Joban nâng dangkoh a ngaekang! chenrăngma ngako, Krista demnâng roamlisma Krista mînko phâtek nâng tôngte răngrăng danglihma Krista ma jien ekako Joban ma roantangma senwên ehi. Joban ma Krista nginpa tientumli tùm răngrăng chentô thenâng phôngjet thukrăng kep ehi.

¹⁵Chenrăngma ngako nângkhua Krista ma Joban nâng tum amêngli koheka tûmpa khopete ngale kho lepete mihnyan chentôma tateka răngrăng jôba, erohwah nâng memin Krista tûmpa khopete ngale kho lepete chentô nâng tatthukmin.

¹⁶Phumma henhen kho lepete mihnyan a ereheh răngma ere tum ekapa thin ritli nem eka; rohkomin henhen khopete mihnyan a ereheh răngma, ere tum ekapa roandông chohli tum eka. Eroh medang ako arerăngrăng moatlempa henma jienmoatmin a?

¹⁷Nia mihhan heh răngrăng Joban nginpa ni tongsek răngma thâniên nâng phoangseng chhahte dangmih; rohkomin nia Joban ma chienchhoan ehi, erohwah nia Krista haarăng danglihma Joban mathahko toantangma thôeki.

2 Korint 3

Toamsem Nyan Haa

¹Ademin nidedejô rânghô ritwah răngrăng dangekia? Roh akole, mihhan heh răngrăng, nimemin nenâng siti raangkoh lemeken a, ba newahmin nima sitiraang lemekia?

²Anga ngama weihrăngma ne dedejô nima nihung khennâng raangwah siti răngrăng lâdangtet.



³Are sitipa Krista dedema raangwah ngale erepa nijunma matchhoan eki. Are sitipa sehima raangwah dangmah, ahîn Joban Juma raangeka, ngale erepa longkhanâng raangmin dangmah, mihnyan nyuchha hungkhen nâng raangeka.

⁴Nima arepa Krista junma Joban nâng dâlem lihma jabeki.

⁵Are moatlempa nidedema tamoeki ngama ngatrâng ninâng chenni chaanjô aho. Nima ere moatlem tamoeki pa Joban chaan meba tamoeki;

⁶Atema jôba dekma raangwah ledang, Juma raangwah toamsem nyan haa tâdângrâng ninâng chaankoh ehi. Dekma raangwah niemarang pumma arit kephûera, rohkomin Juma roandông kohehi.

⁷Niemarang pa longkhanâng raangwah, ngale chenthu erepa chohkoh poatko Joban wenphiak demnâng chohkoh wah. Ngale Mosa thhenphâng ko Isrial mihnyan hehma leta chinthongsû lândang rohjô mephiak akomin Mosa thhenphâng kowah ere wenphiak pa amahjâ rewah. Phumma ere arit kephûera Niemarang pemin sanpoat theko atôchaan dângwah medan ako,

⁸Juma moeka moatlem anyan pumma phiak eka pejã tanga chentôjah bâm dông eka!

⁹Nâng chhihsietrâng kephûera niemarang pa atôdong dângwah medan ako; nângkhope sietrâng kephûera pejã tanga chentôjah bâm dôngmin a!

¹⁰Chenrângma ngako, toamnyan sem ekapa ajahthem bâm dôngphiak phumma, amawah nyahrâng phiak lahma dangtah pa ade phumma mahjâtah.

¹¹Chenrângma ngako, mahjâ rekapa poattherâng aphiak dângwah medan ako, chenthumin lemahjâ thangma roantang roangjêng râng tângte pejã tanga chentôjah bâm dông phiakmin a!

¹²Chenrângma ngako, nângnâng aroh putedâlem pa tâng phumma lechei thangma dangeki.



¹³Ngale nãnga Mosa rãngrãng dangmih, Mosa ma ate thhenphang wah phiak ekapa chhihjá lahma mahjá ekapa Isrial mihnyan hehma nekchen khe ehang ngama ate thhenphãng ko tanghep wah.

¹⁴Linlinjô thinhung pemin tanghep eka; ngale thenep thejâmin thinma Niempã titab pa meweih ako, amawah thinhung tangheptah mãnãm pummejô athâng hehmin tanghep eka. Chenthu mihnyan pa Krista demnâng meroam akoba ere tânghep thinpa rephe eka.

¹⁵Thenep thejâmin thinma Mosa Niemarang pa meweih ako, thinhung pa athâng hehmin tanghep eka.

¹⁶Rohkomin Joban nyapraangma ngaeka rãngrãng ere tânghep thinpa tare phea: “Chenthu atea Teso tânâng ngakhok phumma ba ate thhenphang kowah tanghep ekapa laangwah.”

¹⁷“Teso” pa Ju; ngale chenke Teso Ju tongeka, ereko Ju junma Joban nãng soamtô eki.

¹⁸Erohwhah nãngkhu chentôma thhenphang pa letanghep thangma Teso rãngrãng dange; ngale Teso wah phiak eka Ju pumma nãngkhumina ate rãngrãng litsiet lahma jêngdong dongphiak chenphiakthuk hi.

2 Korint 4

Hahtit nãng Ju Sekthien

¹Joban ma mìnchen junko nãngnâng are moatlempa mothuk ehi, ngale erohwhah nãngma hungchha arinchha ledang thangma moe.

²Nima chentô moatlem chhih ngale rêê thângli moatlem heh achhih ngama lâphetih; nima mothô khoanglep danglihima momih, ngale nima Joban jabkhab pemin mothôrãng litsiet lihima thômih. Joban demnâng ate wenphiakko toangtangma songtong lihima anga nga hung arin junko asen tuta chenta dange ngama thonghun lihima moeki.

³Chenrãngma ngako nima phoangthôeki Nginkongsen pa chenni mekomin metangbîn ako, erepa ju kho lepete mihnyan hehnâng ba tangbîn eka.



⁴Thinma chenrãngma leputedâlem rewak eka ngako, thinhung arinpa are hahtokkhoh kowah joban chhih pumma rangnyek nãng thien junko leputedâlem rewak eka. Ngale thin a joban chhih pumma linlin Joban rãngrãng dãngte Krista mĩndông Nginkongsen wen kowah thinkhoh nãng phiakkat ekapa khethuk mah.

⁵Chenrãngma ngako arepa nidede ngin phoangthô dangmih; Nima Jisu Krista pa nãng Teso ngama phoangthôeki, ngale nikhua Krista mĩnko nekhua haa ngama phoangthôeki.

⁶Joban ma, “Rangnyek khenwah wenphiak ehong phiakkatra!” ngama ngatwah, phumma ere Joban kowah phiak pa jôba Krista thhenphãng ko phiak eka ngama nãngnãng jetthukrãng ate wenphiak pa nãnghung khenko phiakkat thuk era.

⁷Rohkomin chentô noma adongthôn chaanpa nãngnãng dangmahhi, erepa Joban ngenãng ngama khesokrãng, nãngma Jupa hahtit nãng sekwah rãngrãng thien eki.

⁸Nia roantang chêmcheijû, rohkomin chhihjãmih; poatpoat theko chenroh moat akatmin a ngama rãngtũng maange, rohkomin hung mahphemih;

⁹nãng ranmin ajahthem tonga, rohkomin lemruçha aho dangmih; ngale poatpoatthe ko nyahrãng rãngboanjãe, rohkomin mahjãmih.

¹⁰Sanpoat roakweih nima ni hei angem phoangko Jisu hènlihma tongeki, eroh junko jôba Jisu roandông pemin ni phoangko ekhehi.

¹¹Ni roandông dôngtang Jisu mĩnko riinemnemjû tongeki, eroh junkoba ni hei angem roandông komin ate roandông pa ekhehi.

¹²Are junko rit pa nikhohnãng hũera, rohkomin, roandôngpa nekhuma choh eken.

¹³Joban nyapraangma ngaeka, “Ngama putedâlem lekma jabekang.” Nima min ererãngrãng jôba putedâlem lihma jab eki.



¹⁴Nima ajet Teso Jisu Krista ritwah ngakhînsiette Joban ma, nimin Jisu demnâng ritwah johhinsiet lahma nekhû demnâng aroamma ate tânâng esietwêhni.

¹⁵Are chentôpa nekhurãng sênrãngma dangeka; ngale Joban mînchennaan pa mihnyan jahmõang nâng koheka, erohwah thinma Joban nâng ate mîndôngrãng dangkoh a ngat rangsoam pa ajah esoamwak a.

Putedâlem junma Sôngtông

¹⁶Erohwah nihung chenthumin chhamih. Ni hei angem phoangpa arere mejô methôan sanjâ hikomin, Jupa rangwo roakweih anyan dangeka.

¹⁷Ngale nãngma athâng wah amãnhha sanpoat rãng chemchoh eki pumma, athâng wah chemchoh ko tâthakli ledangdông roantang roanjang rãng khuhah ekep hûkohhi.

¹⁸Chenrãngma ngako nangma mitma khelinâng ledang mitma lekhenâng hung kohlihma tongeki. Chenpa mitma khe ekia erepa sanpoatthe rãngba khe eki, rohkomin chenpa mitma lekhe a erepa roantang roangjêng rãng.

2 Korint 5

¹Chenrãngma ngako nãngma jet are nãng song eki hum - are nãng phoangpa - mechhihjá akomin, nãng sôngrãng rangkhethung nâng Joban ngenâng hum tonga, ere humpa ate dedema hânwah, ngale erepa chenthumin lechhihjá min.

²Ngale athângheh, ere rangkhethung wah kaera humpa nãngkhoh nâng pohkat kolahmele ngama nyahrãng huneki;

³ere rangkhethung wah kaera humpa nãngkhoh nâng mepohkoh thiko nânga bôangloangma ledangtumin.

⁴Nãng are hahtokkhoh wah humko sông poatko, nãngma chêmchei chohjunko joang alin reki; rohkomin nima erepa are hei angem phoangpa chianga ngat dangmih, rohkomin rangkhethung wah humpa nikhohko



chenpoh kohhi ngama huneki, erohkoba are aritte phoangpa leriite roandông pumma elitsiet a.

⁵Joban ma nãnga aroh litjârãng hôanehi, ngale ate thiak chentôpa nãngrãng khôanthienkoh ehi ngama jetrãng ate Ju nãngnâng kohehi.

⁶Erohwha nia roantangma lechi thangma tongeki. Nima ajet chenthu nia are hei angem phoang demko dangekia, ere tôko nia Teso tâwah ataangnâng tongeki.

⁷Chenrãngma ngako, nãng roandôngpa putedâlem junma hin ajoeki, mitma kheki junma dangmah.

⁸Nia hungdong rindong dangeki, ngale are hei angem phoangpa thînphe lihma Teso demnâng tôngba huneki.

⁹Are hahtokkhoh ko sôngpoatko medan akomin ba rangkethung nãng ate demnâng songlihmejô medan akomin nãngma ate hungsênthuk ba huneki.

¹⁰Chenrãngma ngako nãngkhu phangtang Krista mathahko atema rênrãngma chepmin. Nãng hei angem roandông poatko henma chenroh motih a erejunko chohmin, asen medan akomin, achhih medan akomin, erejunko anga ngama chohmin.

Krista junma Joban demnâng Lemruchha

¹¹Teso ran chenrãngma chei ekia erepa nima jet e, erohwha nima mihhan hehnângmin Teso tânâng hokrãngma rosep eki. Ngale Joban ma nia senthemthem jet hi, ngale nehung memin nga ejetthêmha ngama thonghun ekang.

¹²Nima nidede nenâng chenjet hi ngama rãngthôrit dangmih; rohkomin, nijunma nenâng nginlinlin thôkoh eka, erohkoba hungwah ledang thangma khoankhoh phoang aroang junko rãngthôritte hehnâng nema nimîn rãngthô letma eta danthangen.

¹³Nia linlin apa lele dangekia? Erohjô medan ekomin Joban rãngba. Roh akole nia apa dangmihne? Erohjô medan ekomin erepa nekhurãng.



¹⁴Nia Krista wah hun achet pumma pêh ehi, chenrăngma ngako, nima athângheh jeteki mihnyan wathêpa chentô mihnyan hehrăngma ritwah, ere junkowah anga nga ate ritko johroam riiki.

¹⁵Atea anga nga răngma ritwah, erohwah ahînte hehmin henjô mâmâ dede răngma lehinmin, rohkomin thinrăngma hen riilahma ngakhintah a ere răng loloba hînmin.

¹⁶Erohwah, nima hahtokkhoh wah mihnyan nyuchha hehma thonghun eka răngrăng hennâng min thonghun tumih.

¹⁷Hen akomin Krista demnâng dangeka atea anyan lâdangtah; apã pa chhoantah, anyan pa lâhûtha.

¹⁸Are chentôpa Joban ma moeka, năngkhua ate ran dangtihpa Krista junma ate lemruçha răng lâlitsietthi, ngale mihhan hehmin ate lemruçha răng hân răng moatlem pa năngnâng kohehi.

¹⁹Nima thôki nginkongpa dangeka, Joban ma chentô mihnyan nyuchha heh Krista junma ate lemruçha răng hânêhi. Joban ma mihnyan hehnâng thin paphã sekham tumah, ngale atema thin a ate lemruçha răng chenroh hânêhia ere nginkong peba thôkoh ehi.

²⁰Erohwah nima Krista răngma jabeki, ngale Joban ma ate dedema roatsep wah răngrăng nikhu junma rosep ehên. Nima Krista mînko rosep eki: Joban ma ate ran dangtet pa ate lemruçha răng chenlitsiet hên!

²¹Krista năng pap aho dăngwah, rohkomin Joban ma atea năng pap demko johroam thukeka, erepa năngmin ate demnâng johroam lihma Joban toangtang pa tachoh eki.

2 Korint 6

¹Nima Joban demnâng aroamma molihma nenângmin henhenma Joban mînchenchaan pa chohtet a ereheh năng Joban mînchenchaan pa mahto năng nekdangthuk en ngama rosepeka.



²Joban ma chenni ngaeka erepa tattan en: “Chenthu ngama nenâng chohsok sanpoat pa mehû theko; Ngama nenâng ejetat a; Chenthu ngama nekhu pepâng rangwo pa mehû theko, Ngama nenâng echohsûa.” Tattan en! Are sanpoat pa nema Joban wah chohsokchoh sanpoat; ngale thejâ jôba khope rangwopa!

³Nima moeki moatlempa hennâng min achhih ngatrit hunmih, erohwah, nima hen lemkhô nângjô tengbengthin thienkomih.

⁴Erohwah, nima chenjô memo ekomin, rongrup lemma nia Joban haa ngama khesokrâng chêmchei, patrit sekma, ngale boanrit nâchhâ komin hungmong sietrii lihma thaeki.

⁵Ninâng awatmin watthi, phâtek nângmin sekthi, ngale loangkhu memin koamwatthi; nima ajupmin lejup, ngale phhekchhah lechhah thang memin lâthat chaanmotih.

⁶Rohkomin, nia sâpoangpoang, Joban buthi mongthem, hungmông, ngale mihnâng mînchen junma, nia Joban haa ngama khesok eki - ngale Asâthôanju, erediko niwah linlin hun achet junmemin khesok eki,

⁷ngale nima toangtang ngin thôeki junko, ngale Joban chaan junma khesok eki. Ninâng toangtang pa ranloat chhahkhem rângrâng tonghi, erepa nima ranlông rângmin, ngale nidede khope rângmin kepeki.

⁸Nia achoangpemin rethi, ngale rêsêmin thang ehi; ninâng dûmmek min, ngale rômin re ehi. Ninâng mothô ngamemin ngaehi, rohkomin nima toangtang thôeki;

⁹ngale nia henmejô lejetwah rângrâng medang ekomin, nia anga ngama jet ehi; ngale nia riichoan rângrângjô medang ekomin, nemejô akhe, nia ahîn jôba. Ngale ninâng chêmsietjô merehi komin, ritphe mahhi.

¹⁰Ngale nia chentô hung mechhih ekomin, roantangma khuhah nâhah tongeki; ngale nia tangchhih medang ekomin, nima jahmông mihnyan techhurâng hân eki; ninâng chenjô aho rângrâng medang ekomin, nima linlin rongruppa cheiki.



¹¹Korint wah lemruçha heh! Nima nihung nâng chenmin lehuçsek thangma nenâng laangthô koheka; nihung phangtang nenâng têmlem koheka.

¹²Nihung nenâng lelaangkoh dangmah; nemeba ninâng nehung laangko mahhi.

¹³Ngama athângheh nea nga chhuchha tôko thonghun lekma jabekang: Nima nenâng chenroh thonghun eka ererãngrãng nememin ninâng thonghun letma khesok hi. Nehung phangtang têmlem kohhi!

Joban nâng Lepute dâlemte heh Nginkep junko Ritngat

¹⁴Joban nâng lepute dâlemte heh demnâng manthe dangletma nekroam mo en, chenrãngma ngako eroh chenthumin lejien dangmin. Achhih le asen chenroh jienroam min a? Ngale rangwo le rangnyek chenroh jienroam min a?

¹⁵Krista le joaknii chenroh jienroam min a? Ngale Joban nâng putedâlemte le Joban nang lepute dâlemte nii chenroh jienroam min a?

¹⁶Joban Rangsoamhum pa moangachaang heh demnâng chenroh jienroammin a? Chenrãngma ngako nãnga ahîn Joban Rangsoamhum! Joban ma ate dedema ngatwah, “Nga a nganâng putedâlemte mihnyan heh demnâng eroamsong ang ngale thindemko khoam achi lekma etongang; Nga a thin Joban rãng edangang, ngale thinmin nganâng putedâlemte mihnyan rãng edanga.”

¹⁷Ngale Teso ma aroh ngaeka, “Nea ere mihnyan heh tâwah loatchhoan en ngale thindemwah taangchhoan re en. Ngale chenpa achin angek a ereheh nâng neksahlo en, ngale erohkoba ngama ne ekep a.

¹⁸Nga a ne Wa rãng edangang, ngale nea echha delachha ngale dihiak chha edangen, arepa adongthôn Teso ma jabeka.”

2 Korint 7

¹Ngalemruçha heh, are chentô toamsem ekapa nãngkhu demnâng sem ehi. Erohwah, nãngphoang ngale nãng Ju ngeksietthin chentô hehwah



sâpoangpoang danglihma tonge, ngale Joban ran chei lihma sâpoangpoang danglihma songe.

Pol Khuhah

²Nehung nâng nirãng thewah hôankohhi. Nima henrãng memin machhih mokoh eki; ngale nima henmin machhihsiet eki, erediko hennãng min mathat diapchhah eki.

³Ngama arepa nenãng chhihthô lekma jab dangmek; ngama amako ngatek rãngrãng, nima nenãng nyahrãng huneka, ahîn medang ekomin, ba ritjô mere ekomin nãngkhua roantangma aroam.

⁴Ngama nenãng nyahrãng dâlem eka; Ngale Ngama nekhu nyahrãng rãngthôeka! Ni chentôjô mechêm ekomin Nga hung dongdong danglekma tongekang; ngale Nga nyahrãng khuhah nãhah dangekang.

⁵Nia Mesidonia nãng hokdikomin bôantông sanpoat lechoh dãngwah. Ngale chentô thenãng chêmchei, mihdemnãng mênmin lolo dãngwah, ngale nihungnãng cheipa dang rewah.

⁶Rohkomin acheite mihnyan heh hung dôngsiette Joban pumma nitãnãng Titas chienkat lahma nihung dôngsietwah.

⁷Nia ate hok junma lolo khuhah ledang, nekhumã ate hung dôngsiettet ngin heh atema thôkoh phumma khuhahwah. Nema nga chentô khehun eha, ngale nema chhihmotet hehrãngma chentô ngakchhih thonghun eken a, ngale ngarãngma chentô sekma patrii eken a, erengin hehmin atema nganãng thôkoh thang; ngale erohwah nga ade phumma ajahthem khuhah nãhah lâdangtek.

⁸Ngama raangtah siti pumma nehung mekethuk hèn komin, Ngama ere sitipa raangdi chhihthong hunmek. Chenthu are siti pumma nehung poattherãng kethuk lahma khepoat koba nga hungmin echhih ang.

⁹Rohkomin athãngheh Nga khuhah ekang - ngale Ngama nekhu hungkê thuk junko dangmah, rohkomin nehung chhih junko asen ngenãng hunglitthuk



ehèn, erohwah nga khuhah ekang. Nehung pa Joban ma huneka junko chhih eken, ngale erohwah nima nenâng chêmsiet dangmah.

¹⁰Chenrãng-ma ngako Joban ma huneka junko hung mechhih eko nãnhung pa asen ngenâng engaklitsiet hi, ngale eroh hunglit junko jôba khope eki - ngale ererãngma hungkê thin dangmah! Rohkomin mihnyan nyuchha hei angem hung arin junko hung mechhih eko rit rêmin.

¹¹Sûtan en, Joban ma huneka junko nehung chhihdi Joban ma chenni moeka: ere junko ne nyahrãng sâthâng huneken, ngale papwah nyahrãng sârit huneken! rinmin khah eken, acheimin re eken, nyahrãng hungkoh letma moathun eken, ngale kaamchhih moatte hehnâng phheksiet nâsiet hânmin huneken! nema are chento moeken pa achhihmoat dangmih ngama jetthuk ehèn.

¹²Erohwah, Ngama ere sitipa nenâng raangwahjô medang angkomin, kaamchhih moatte wathe junko raang dangmek, ba henrãng chhihmo kotah a ere watherãng raangmin dangmek. Rohkomin, Joban junko nema ninâng linlin dangletma chentô hungkoh ehia erepa chenlepjet en ngama raangwah.

¹³Ere junko jôba nihung dongeki. Ni hungdông lolo dangmah; Nekhu anga ngama Titas nâng chohsok junko ate rinroan pa khelihma nimin ajahthem khuhah nâhah dangeki!

¹⁴Ngama Titas nâng nekhu nyahrãng rângthôtah, ngale erengin pa linlin jôba ngama nekhuma atenâng khesok eken. Nima nenâng roantang toantang ngin thôkoh eka, ngale ererângrãngjô nima Titas nâng nekhu rângthô tahpa toantang jôba ngama khesok eken.

¹⁵Ngale atema nekhu nâng rîn akhah thenheh nema khuhah nâhah keptet pa thonghun lahma, erediko nema atenâng hun ngale chei nungma tãngrootet heh thonghun lahma Titas ma nenâng hun achet pa nyahrãng dongeka.

¹⁶Nga nyahrãng khuhah nâhah dangekang chenrãngma ngako Ngama nekhu nâng nyahrãng ladâlem tah!

2 Korint 8



Kristan hehma Koh amien

¹Ni lemruçha heh, Joban ma ate mînçenchaan pa Mesidonia wah Asâthem hehnâng chenroh kohtah a erengin pa nima nenâng jetthuk huneka.

²Thin khohnâng nyahrâng chêmchhih hûlahma thinhung thattôan wah. Rohkomin thin a nyahrâng tangchhihjó medang akomin, thin a nyahrâng khuhah nâhah dângwah, ngale thin a nyahrâng chhahme dângwah.

³Ngama nenâng nginlinlin thôkoh eka, thinma chentô takoh eka eretô kohwah, ngale thinma chentô taeka ere nomemin ajah kohwah. Ere pemin thindede hungsima kohwah

⁴thinma Judia wah Joban nâng putedâlemte mihnyan hehnâng nimemin chohsûe ngama ninâng depdep roatsep wah.

⁵Erepa nima thonghutih nomemin adong dângwah! Khebengko Teso nâng thindede roandôngpa bengkohrit wah; ngale erediko Joban hung junko thin roandôngpa thin dedema ninângmin kohwah.

⁶Ephumma are ahun moatlempa nenâng beng hethôte Titas nâng nima mata tamo atema nenâng chenchohsû hèn ngama chien eki.

⁷Nea chentô nâng asen: Putedâlem nângmin asen, jab ajâ nângmin asen, jet ajien nângmin asen, ngale mihnâng chohsokhun nângmin asen, erediko ninâng hun pemin asen. Ngale nema are mihnâng chohsok moatlem moat komin chhahme dangen ngama huneka.

⁸Ngama moatmin jôba ngama khetlomah. Rohkomin ahan hehma mihnâng chohsok atô huneka ngamaba khesok lahma, ne hun achet pemin chenroh a ngama jetrâng khesok eka.

⁹Nema nâng Teso Jisu Krista mînçenchaan pa jet en; atea nyahrâng techhu dângwah, rohkomin ate dedema tangchhih râng hânritwah, erepa ate tangchhih dângjunko nea techhu dângthuk râng ngama atea tangchhih râng litdângwah.

¹⁰Ngama hunjunko, nema menpa rangpâwah bengmotet moatlempa athângheh merâmo enko asen edanga ngama thonghun ekang. Nea



abengkohte lolo dangmet, rohkomin nema hungrinma hunletma bengkoh eken.

¹¹Erohwah nema bengmotet moatlempa arâmoat re en! Nema chenroh thonghun letma moatrâng cheptet a ererângrângjô râmoatrâng memin thonghun en, ngale athângheh nenâng chenni tonghèn a erehehma mo en.

¹²Nema hung arin senma mekoh enko, nema chenni cheiletma kohken a erejunko Joban ma echohtha hèn, chenni pa nenâng ahoa erejunko sûmah.

¹³⁻¹⁴Ngama ne chêmsiet lahma mihnâng chohsokhun dangmek; rohkomin athângheh sanpoatko nenâng ajah tonghèn, erohwah nema chenjô ahote tangchhih hehnâng chohsokpa asen ngama hun ekang. Eroh koba chenthu nenâng chenjô aho dângpoatko, thinnâng ajah metong ako thinmemin nenâng eta chohsû hèn. Eroh medan ekoba anga nga khoaktheko edange.

¹⁵Joban nyapraangma ngaeka, “Henma ajah khôanjôan eka ate nângmin ajah aho, ngale henma amânychha khôanjôan eka, ate nângmin amânychha dangmah.”

Titas Ngale Ate Lemru heh

¹⁶Nima nenâng chenroh chohsok huneka ererângrâng Joban ma Titas nângmin hun thukdi Joban nâng dangkoh a ngaeki!

¹⁷Nima atenâng roatsepko lolo nyoak ledang; atedede hung arinma hunlahma netânâng katrâng chepwah.

¹⁸Nima ate demko nângnaa wathe johchienkat erii, atema chentô Asâthem hehnâng nginkongsen phoangthôkoh junko chentô Asâthem hehma atenâng nyahrâng huneka.

¹⁹Ngale ere lekojô, atea Asâthem hehma nidemnâng chohsê pa johhên chhoan kohrâng rênwah, ere chohsê pa Teso mîndông sietrâng, ngale nima hung arinma hunlihma chohsok huneki ngama khesok rângma moatwah.

²⁰Nima hung arinma hunlihma chohsok moatlem moeki pa mihma nekchen chhihthô ehi ngama nyahrâng jôjetma moeki.



²¹Nima chenpa asen a erepa lolo jôba moeki, erepa Joban mitsokko lolo asen ledang mihnyan heh mitsok komin asenli pa moeki.

²²Erohwhah nima thin demnâng nãngnaa johchienkat eri; Nima ate hung pa depdep lâthatsû tantih, eko asen ngale roantangma nenâng chohsok hunjû kheki. Ngale athângheh atema nenâng nyahrãng dâlem ehèn, erohwhah atema nenâng chohsokpa nyahrãng hun ehèn.

²³Titas dangeka, nga demnâng aroamma danglahma nenâng chohsok moatlem johmoatte lemru; ngale ate demwah johka era nãngnaa heh dangeka Asâthem heh mîngo kaera, ngale thinma Krista mîndongsiet eka.

²⁴Nema thinnâng hun letma khesok en, erohkoba thinnâng nima nekhu rângthô tahpa linlin ngama ejetwak a.

2 Korint 9

Nãng lemru - Kristan hehnâng Chohsok

¹Judia wah Joban nãng putedâlemte tangchhih hehnâng chohsokrãng ngama nenâng chêmraangthin dangmah.

²Ngama ajet nenâng achohsok hungpa etonghèn, ngale ngama nea Mesidonia wah mihnyan hehnâng nyahrãng rângthôtah. Ngale, “Akaia wah putedâlemte hehma menpa mejû chohsokhun lahma dângwah,” ngama thôkotek. Phumma nehung arinwah chohsok hun ekenpa khelahma thinmin melâng mihnyan hehma chohsokrãng chepwah.

³Athângheh Ngama are putedâlemte mihnyan heh netânâng chienkat erâng, erohwhah nima nekhu mihnâng chohsok junko rângthôtah pa sekhota ngin rãngrãng nekchen dangeka. Rohkomin ngama ngatek rãngrãng, nema chohsê heh khôansiet letma tongla en.

⁴Chenrãngma ngako, Mesidonia wah mihnyan heh nga demnâng johhû lahma nema chohsê heh lekhôanse tongla letma mekhehû hènko, nia chentô rêseli dângmin a, nerêsê pejã chêmthôli dangmah - chenrãngma ngako ngama nenâng nyahrãng dâlem lahma rângthôwah!



⁵Erohwah nga netânâng hokmako are putedâlemte heh chienwên lâpa alem ngama thonghun ekang, erohkoba nema chohsokrãng toamsemtet heh khoakhem letma etongla en. Eroh koba chenthu nga hokko khôanse chhoan etongla en, ngale erohkoba nema metkep kohmin jôba ngama koh ledang, hung arinma kohhun letma koh eken ngama ekhesok en.

⁶Thonghunan en, henma chhah pa anechha wên eka, erepumma anechhahjô echohhèn a; ngale henma jahmõang wên eka erepumma ajahjô echohhèn a.

⁷Erohwah nekhu anga ngama hung arin nâng chenroh kohrãng hun eken a erohkoh en, hungkeke dangletma ngale metkep kohmin jôba ngama nekkoh en; chenrãngma ngako, Joban ma hung arin sênma hunlahma kohte nâng huneka.

⁸Ngale nema chentô lemeken a ere nomemin ajah Joban ma takohhèn, erohwah nema chenni lemeken a ereheh roantangma echoh en, ngale asenli nâng keprãngma ere nomemin ajah eta choh en.

⁹Joban nyapraangma ngaeka, “Atema tangchhih hehnâng chhahme danglahma koheka; ngale ate mînchen pa roantang roangjêng rãng tongeka.”

¹⁰Ngale pitmoatte nâng chhahli chohkohte, erediko phhek achhahte nâng bankên chohkohte Joban ma nema chentô chhahli lemeken a ereheh echoh kohhèn, ngale nea chhahme dângdi Joban ma chhah heh dongphoak thuklahma chhahkosen dangthuk lahma ajah echohhèn en.

¹¹Nea roantangma chhahme dângrãngma Joban ma techhu edangthuk hèn, erohkoba ni ngewah nekhu chohsê pa choh lahma melâng mihnyan ma Joban nâng dangkoh a enga a.

¹²Chenrãngma ngako, nema are achohsok moatlem moeken pumma Joban nâng putedâlemte tangchhih hehnâng lolo toatchoh ledang, Joban nângmin ajahthem dangkoh a ngawak eka.

¹³Ngale nema are achohsok moatlem moeken junko, erediko nema Krista nginkongsen pa senthemthem kepletma thôeken junko, ngale nea chhahme



dangletma thin demnâng ngale anga nga demnâng phenphen sensen kep eken juko ajahthem mihnyan heh ma Joban nâng dangkoh a engawak a.

¹⁴Ngale Joban mînchennaan pa nenâng nyahrâng adong kohdi, thinhung linlin wah nenâng hunlahma Joban nâng rangesoam kohhèn.

¹⁵Erohawah Joban ma nãngnâng thahoma hínhô kohdi dangkoh a ngae.

2 Korint 10

Pol ma Ate Moatlem jun ma Jabwah

¹Nga Pol, ngadede ngewah nenâng rosep eka-chenthu nga nedemnâng dângpoatko numnene, rohkomin chenthu nga netawah metaang choantekko lãngmõang dangeka ngama ngaeha. Krista mînko numnene ngale amînchen demnâng danglekma

²Ngama nenâng rosep eka, chenthu nga netânâng hokko nedemnâng nekpa thuk ha; chenrãngma ngako, are hahtokkhoh hei angem hung arin junko moat akatte heh demnâng nga metkep epa ang.

³Arepa linlin ngin, nãnga hahtokkhoh ko songtong eki, rohkomin nia hahtokkhoh hei angem hung arin junko mên ahiet mînte heh rãngrãng dangmih.

⁴Nima ranloatmînko kepki chhahkhempa hahtokkhoh wah ranlông chhahkhempa dangmah, erepa Joban ngewah ranlông chhahkhem achanthôn pa kepki, erpumma ran huhtôngthin thechethôn pa chhihsiet rãng kepeki. Ngale nima ledangli nâng chhiakmîn heh chhihsiet eki;

⁵Ngale Joban nekchenjet eka ngama ate lelatnâng chentô tengbengthin hongeka heh nima chhihsiet eki; ngale nima chentô mihnyan hungrin heh khôanlo lihma Krista ngin kepthuk eki.

⁶Ngale abengko nima nekhua nginkepkep dângthuk hunmêng eka, erediko ngin lekepte hehnâng nima phhekkhen nâkhen ehôn e.

⁷Nekhuma rongrup nãngjô tokkhohnâng lolo sũeken. Nekhuwah hen akomin atea Krista rãng ngama tâchâritte mihnyan tongen a? Sen a, rohkomin ade



rekthe thindede chenthe ngakthong hunrii tan a, chenrãngma ngako, thin chenroh Krista rãng dangeka eroh jôba nimin Krista rãng dangeki.

⁸Chenrãngma ngako, Teso ma nãngnâng kohthi chaan rãngma ngama ajahmanjô merâng thôtek komin, nga rêsêmak - ere chaanpa nganâng nekhu sênsietrãng kohwah, nekhu chhihsietrãng kohwah dangmah.

⁹Ngama nenâng are sitiraang ekapa nekhu nãng cheithôrãng raang dangmek.

¹⁰Wawathe ma, “Pol sitipa cheili ngale nyahrãng alat ngama rãngnga a, ngale chenthu atea nãng tâko phoangpa mehû theko atea pachhih, ngale ate jabkhab heh sekhota!” ngama engathem en.

¹¹Ererãngrãng mihnyan heh ma arepa mamjet en, chenthu nia netawah ataangnâng danglihma sitinâng chenni raangeka ngale chenthu nia nedamko danglihma chenni moatmin a ereheh mãnthe jôba dãngmin.

¹²Ngale henma thin dedema nyahrãng adong ngama thonghun riieka ere mihnyan heh demnâng nidedema tathakmîn mih. Thin a chentô bâa! Thinma thindede dongsietrii lahma, Thin dede nãng thakrii eka!

¹³Rohkomin nikhu dangeki, khupliet nãng rãngthô riimih; Joban ma moatlempa ninâng chentô mothuk ehia ereto jôba rãngthôeki, ngale ere moatlem demko nikhu nedemnâng moeki moatlem pemin weih eki.

¹⁴Ngale nima chentô motih a ere tøjôba rãngthôeki, khupliet nãng rãngthô riimih, ngale Krista Nginkongsen pa nima netânâng kephûthi poatkomin khupliet nãng dangmahtih.

¹⁵Eroh wah Joban ma ninâng chentô mothuk ehia ere lientnâng mihhan heh ma moeka heh nima moatwah lele rãngthô riimih. Erenoma, nekhu putedâlem pa adong chendangen ngamaba nima thonghun eki, erohkoba nima nekhu tânâng moatlemdong eta moe, ngale roantangma Joban ma chentôko mothuk ehia eretôko emoe.



¹⁶Eroh koba ne lienwah mihdiak hehnângmin Nginkongsen pa nima eta phoangthô chhoankoh e, ngale mihhan ma mochhoan thenâng mihmãnko molihma rângthô riimih.

¹⁷Rohkomin Joban nyapraangma ngaeka, “Henma akomin rângthô mehun ako, Teso ma chenni motah a erepa chenrângthôa.”

¹⁸Chenrãngma ngako, chenthu Teso ma asen ngama menga hiko jôba nãnga linlin asen edange, nãng dedema asen ngatrit rãng dangmah.

2 Korint 11

Pol ngale Moattat Chhoante Amõang heh

¹Chenthu nga roanche aba rãngrãng dãngpoat komin nema eliet ha ngama hun ekang. Mamliet ha!

²Joban ma nenâng chenroh phetwân ehèn a, ererãngrãng ngamemin nenâng phetwân eka; Nea paangmih demnâng kaamchhih mathah mote janchhôsâ rãngrãng, ngama ne dela wathelolo demnâng kepmin thukrãng kahkhetmin koheka, ere delawapa Krista.

³Nga chei rekang, chenroh pûma buthi chhih hânlahma Eve diapchhahtah rãngrãng, nehungmin achhih nãng kesietrii letma Krista nãng atô senthemthem hung kohletma putedâlem tetpa machhihjà let o ngama.

⁴Chenrãngma ngako, nima nenâng Jisu nginkong thôkoh eka rãngrãng ledang Jisu nginkong ahan nenâng thôhok kohte heh nginmin nema khuhah nãhah kep eken; ngale nema niwah choh eken Ju ngale nginkongsen noma ajatjat ju ngale nginkongsen pa kep eken!

⁵Nga a nema “moattat chhoante adong” ngaeken heh nomemin chhupthejô arin thonghunrii mek!

⁶Nga jab ajâ nãng senthemthem lehewah edangthem ang, rohkomin nga jet ajien jôba; erepa nima nenâng sanpoat roakweih ngale rongrup ngema senthemthem jetthuktah.



⁷Chenthu ngama nenâng Joban Nginkongsen pa thôko tahko ne ngewah chenjô letha thangma thôkotah; Nekhu dôngthuk rãngma Ngadede numsietrii lekmeba thôkotah. Erepa ngama achhih lemotek a?

⁸Chenthu Nga nekhu demnâng moatpoatko ahan Asâthem hehma thã kohlahma moatwah. Lemthema methôeko, Ngama thinwah thã thalekma nekhu nâng chohsok moatlemba moatwah.

⁹Ngale Nga netânâng dângpoatko chenthu ngama ngun akem lempoat komin nekhu sekma thuk ho; Ngama chenni lem ekanga ereheh phangtang Mesidonia wah putedâlemte katha heh meba kephû kohthang. Khema wah rãngrãngjô, khedi nângmin: Ngama nekhu nâng chenthumin sekma thukmah!

¹⁰Krista toangtangpa nganâng tông junko toamsem ekang, ngama arepa Akaia diak phangtang nâng lekihtong thangma ephoang rãngthô ang.

¹¹Ngama are jabekang pa nenâng lehun danglekma lejab ekanga? Joban memin ajet ngama nenâng huneka!

¹²Ngama athâng hehwah chenroh moekanga ererãngrãngjô emo ang, erohkoba, ahan “moattat chhoante” heh rãngthôrit pa ejek a, ngale thinmemin nima chenroh moekia ererãngrãngjô moeki ngama rãngthôpa ejek a.

¹³Ere mihnyan heh moattat chhoante linlin dangmah - thin a moattat chhoante amõang, ngale erehehma khoanglep kaam moeka, erediko Krista moattat chhoante linlin heh rãngrãng diapdang wakeka.

¹⁴Chêmmokrit thin dangmah! Joak ajo hehmin wenphiak wah Joban ngintatte heh rãngrãng talit danga!

¹⁵Erohwhah, joak ajo ngintatte hehmin toangtang kaam moatte haaheh rãngrãngjô melitjâ komin chêmmokrit thin dangmah. Athôanko thinma chenroh motah a ere junkojô echohwak a.

Pol ma Moattat Chhoante Dâng junko Chêmmoh



¹⁶Ngama ademin thethô koheka: henmemin nganâng aba ngama nekthong hunha. Nema aba ngamejô methonghun hakomin, aba dangkoh a ngama kep ha, erohkoba ngama roanche eta rânghô ang.

¹⁷Rohkomin athâng heh ngama chenni jab ekanga erepa Teso ma nganâng jabthuk hun ehang heh dangmah; ngadede aroh rânghôrii ekangpa linlinjô aba rângrâng rânghôrii ekang.

¹⁸Rohkomin ajahthem mihnyan heh ma mihnyan nyuchha hei angem moatlempa rânghôeka, erohwah ngamin rânghôrii ekang.

¹⁹Nea nyahrâng buthi mongthemwin, erohwah hungsen rinmema aba heh demnâng nehung mongsiet letma dang eken!

²⁰Nea haa rângrâng keplahma moatthukte mihnyan heh, nenâng joannamte heh, be nâng manrit thukte heh, nenâng dûmmek jôjênte heh, ngale ne thhenko watte mihnyan heh, nema hungsi rinme dangletma taliet eken.

²¹Ngama rêsêli ngin jabekang, ererângrâng moatlem heh nima chinmomih! Rohkomin henma akomin lechei thangma merânghô ako Ngama abajab arângrâng jabekang - Ngamemin lechei thangma tarânghô ang.

²²Thin a Hibru jat ne? Ngamin Hibru jat jôba. Thin a Isrial jat ne? Ngamin Isrial jat jôba. Thin a Abraham chhuchha ne? Ngamin Abraham chhuchha jôba.

²³Thin a Krista haa ne? Ngama aba ma jab arângrâng jab ekang - Nga thin noma haasen! Ngama nyahrâng chaanmotek, Nga phâtek nângmin melângdep thattongtek, Nganâng awatmin jahmông watthang, ngale riinemnem wahmin ajahthem lâpetek.

²⁴Jews heh ma nganâng roakrem dit ekhukhuma lobângâ watthang;

²⁵Roman heh ma lôremwat rethang; ngale longma rekthepet rethang. Ngale jogari chhihjà lahma lôrempe retek, erediko roaknii koanta belii jo nângmin lâthat tongtek.



²⁶Nga phoangkhoam roakweih melâng phoangchêmték, jodông thunwahmin petek, ngale ahuh aliek dekwahmin petek, Jews hehmemin lâthat chêmsiet thang, erediko Jews ledangte hehmemin lâthat chêmthukthang; Hahdaang khennângmin lâthat chêmriitek, wunkhen nângmin lâthat chêmriitek, josidong nângmin lâthat chêmriitek, ngale lemruçha mông hehmemin lâthat chêmsiet thang.

²⁷Ngama moatlem katlem hehmin nyahrâng laâhat chêmrii motek; ngale ajupjô lechohjup memin melâng lâthat dangtek; Rêmritma, ngale jolanrit memin lâthat chêmtek, hum aho thangmemin lâchêmtek, erediko khet akhu aho memin lâthat chêmriitek.

²⁸Ngale ahan heh lechêmtô thangma, rangwo roakweih Nga chentô Asâthem heh rângmaba sekmah ekang.

²⁹Chenthu hen akomin meboanrii ako, Ngamin boanrit jôba rekang; ngale henma akomin pap medangthuk ako, nga nyahrâng hungke ekang.

³⁰Ngama arângthô mere angko, nga chentô pachhih dangekanga erepa erângthô ang.

³¹Joban ngale nâng Teso Jisu Wa - ate mînpa roantang roanjêng rângma rângthôe! - Joban ma ajet ngama mothôthô dangmek.

³²Chenthu Nga Damaskas nâng dângpoatko, Lowang Aritas khenwah Govono pumma nga loatkhek râng hahdaangko lupwângthin pankâsek hehnâng abemte sipâhi thienwah.

³³Rohkomin nga phânâng seklahma pan polo pumma waangphekat lahma atewah pêchhoanwah.

2 Korint 12

Pol ma Thânkhe ngale Atenâng Loatkhesok

¹Ngarângma chenjô asenli lehong eka komin, ngama metkep erânthô ang. Rohkomin, ngama thânkhetek le Joban ma nganâng loatkhesok thang heh jôba erângthô ang.



²Ngama Kristan mihnyan wathe echhi pabelii mako rangkethung choangthôn ko toansietwên lahma jet ang (Arepa atema athânkhe retah ale linlinjô dangtah a erepa ngama jetmek - Joban ma loloba ejeta).

³⁻⁴Ngama ademin thethô koheka, ngama jet ang ere mihnyan pa mihnyansen heh ritdiko thinju heh tongeka thesenko hûsietwên tah (ademin thethô koheka, ngama arepa athânkhe retek ale linlinjô dangtah a erepa ngama jetmek - Joban ma loloba jet a), ngale eretheko atema mihnyan nyuchha ma leta thakthôli ngin heh chohtahwah, ngale mihnyan nyuchha thunkhab wah leta hongjabli jabkhab heh tatwah.

⁵Erohawah ngama are mihnyan junma rânghô ang - roh akomin ngama ngadede junma rânghômek, nga a chentô aboan anaa ngale pachhih a ere peba erânghô ang.

⁶Ngama arânghô mehun angkomin, Nga aba dangmek, chenrângma ngako ngama toangtang thôekang. Rohkomin ngama rânghômek, chenrângma ngako nema nga moatlempa khe eha, ngale tat eken noma nganâng adong bâmthong hunpa hunmek.

⁷Rohkomin ngama chentô athakthôli chohhkhetek a ereheh junko nga lengamrii thangma dângrângma, ngaphoang nâng nyahrâng chet akhup achhih hokwah, erepa joak ngintatte hehma nganâng watwah, ngale erejunko lerânghôrii dânghwah.

⁸Ere chet akhup hehrângma ngama Teso nâng ngaphoang kowah rephe kohhang ditrem soamtek.

⁹Rohkomin atema nganâng aroh dânthâng wah: “Ngawah mînchenchaan pejô nangrângma elea, chenrângma ngako, chenthu nânga aboan anaa ngale pachhihjô medan okomin Ngawah chaanpa adong.” Erohawah, nga chet akhup junkomin nyahrâng khuhah nâhah dangekang, erohkoba, nga khohko Krista chaanpa tonglahma pepâng ehang ngama ejetrii ang.



¹⁰Erohwah, chenthu nga boanrit, dûmmek jôjêm, chêmchei, mihma chêmsiet, patrit sekma, komin Krista mînko khuhah nâhah dangekang. Chenrăngma ngako, chenthu nga abôn mere angko jôba, nga achaaan re ekang.

Pol Korint wah Mihnyan hehrăng sekma

¹¹Nga aba răngrăng dang ekang - roh akomin erepa ne junma dangekang. Nekhuma jôba ngarăngma nginsen jabletma khesokmin, chenrăngma ngako, nga chenjô ledang kangkomin, nema “moattat chhoante adong” ngaeken heh noma arin dangmek.

¹²Ajahthem patritli ngale bâritli moatlem heh ngama netânâng motek hehma nga moattat chhoante ngama khesok eka, ereheh ngama nyahrăng hungmông rinmông danglekma moatwah.

¹³Ngama nenâng ahan Asâthem heh noma achhih lehoan lejoantah a, ngama nenâng ngun akem lethah thangma loloba methientah a? Erepa chhihmoatthã nganâng map mamkohha!

¹⁴Ade rekma nga a nedemnâng chohmîn hokrăngma lôremrăng phung ekang - ngale ngama newah chenjô thamah. Ngama ne ngun ko hunmek, nekhuba huneka. Chenroh chha hehma nyong awa nâng lechohkohhû thangma chha hehnâng nyong awa hehma chohkoh hûeka răngrăng jôba ngama nenâng huneka.

¹⁵Ngama nganâng chentô tonghang heh, erediko ngadede min nekhû nâng chohsokrăng khuhah nâhah kohhun ekang. Erohwah ngama nekhû nâng ajah hundi, nekhuma nganâng mănchha huneha?

¹⁶Nemamin senthemthem ajet, ngama ne sekmahtuk ho. Rohkomin wawathema ngama buthi mongthem chhih ngale mothô thôlekma nekhû diapchhah ehèn ngama engathem a.

¹⁷Chenroh jienthông eken a? Ngama netânâng nginmatte chienhû lekma nekhû diapchhah lahma lethatah a?

¹⁸Ngama Titas nâng netânâng katrăngma roseptek, ngale ahan Kristan pho anaa hehmin ate demnâng johchienkat thang. Phumma Titas ma newah



diapchhah lahma thaehi ngama lenga eken a? Titas cheniima mǎntheko thonghun lihma mǎntheko moat ledangne?

¹⁹Nema eta thonghunthem en sanpoat roakweih nia ne mathahko nidede lolo senthōrii eki ngama. Eroh dangmah! Nia Krista ma chenroh jabthuk hun ehia ererǎngrǎng jōba Joban mathahko jabeki, ngale lemruçha heh, nima chentō moeki pa nekhu nāng chohsokrǎng moeki.

²⁰Nga chei rekang, chenthu nga netānāng hokko ngama chenroh thonghun eka ererǎngrǎng lekhehū marelah o, erediko nekhu memin nganāng chenroh thonghun eha ererǎngrǎng lekhe mareho ngama. Ngale, mēn ahietmīn, phatwānmīn, rinkhahchaan, chhahnyoak, mihnāng dūmmek, mihchhihthō, ngam apoa, ngale pong apa dangletma machoh khehūlah o ngama cheiba rekang.

²¹Nga netānāng thengak hokko Joban ma ne mathahko numnene madangthuk hango ngama chei rekang, ngale ama kowah chentōma pap molahma thin kaamchhih hehwah hung lengaklit thangma tōngte hehrǎngma esep ang - thinma athāng hehmin kaamchhih ngale dihiak dela tungko kaamchhih heh molahma tongeka.

2 Korint 13

Athōan Rīn akhah ngale Salem

¹Are pumma nga netānāng depremrǎng chohmīn kaerāng. “Phumma chenni akomin lepchiak mīnthin metong hēnko, erepa wanii ba warem hākhi demnāng lepchiak mīnmin” - erepa Joban nyapraangma ngaeka.

²Ngama ama wah henhenma pap motah a ereheh nāng thōkoh ekang, ngale ahan hehnāngmin phangtang nāng thōkoh eka; Arepa ngama amako netānāng depniirǎng chohmīn katah komin thōkotah, rohkomin nga netāwah ataangnāng dāng phumma ademin thengak thōkoh eka: Chenthu nga netānāng thengak katko henjō phhekkhēn nākhēn lehōan thangma lepemin.



³Nga junma Krista ma jabeka ngama nemajet hun ekenpa phangtang echohjet en. Chenthu atea nedemnâng dângko, atea pachhih dangmah; erenoma, ate chaan ba nekhu nâng khesok ehèn.

⁴Linlinjô atea aboan dângjunko bângphak khoko rittek rewah, rohkomin, Joban chaanjunko atea athângheh ahin. Erohwah ate demnâng johroam lihma nângkhumín boan jôba; rohkomin nimin nekhu demnâng johroam lihma nângkhu memin ate roandông kohwah Joban chaanko ejohroam e.

⁵Nedede thaksûrii tan en, ngale thatjetrii tan en, ngale nea putedâlem junko songtong eken le songtong met a ngamemin thatsûrii tan en. Nema linlinjô Krista pa nikhen nâng tonghi ngama jetrii ekenle? phumma linlinjô Krista nekhen nâng aho medan hènko nea mahto lâdangtet.

⁶Rohkomin ngama dâlem ekang nema ninâng Krista tonghi ngama jetrii eken.

⁷Nema chenni kaamchihjô nekchen moeken ngama nima Joban nâng rangsoam koh eka - rohkomin erepa nânghung thattôanko nângma tajien eki ngama khesokrâng dangmah, rohkomin nima letajô medan ekomin, nema chenpa toangtanga erepa moletma chenkesok en ngama huneka.

⁸Chenrângma ngako nângma toangtang lelatnâng chenjô tamomih, toangtang rângma asenli pa loloba moatmin.

⁹Nekhujô achaan medan tetko, nia boan anaajô medan ekomin khuhah nâhah dangeki. Ngale nea senthemthemjô chendangen ngama rangsoam koheka.

¹⁰Erohwah ngama arepa nekhu tâwah ataangnâng dângpoatko raangeka; erohkoba, chenthu nga netânâng mehû thangko Teso ma nganâng kohthang chaanpa keplekma nekhu nâng phhekkhên nâkhen lehôn edangang - nganâng nekhu sênsiet rângmaba chaankoh ehang, nekhu chhihsiet râng chaankoh dangmah hang.

¹¹Ngale ngalemruchha heh, ade dangeka, atô kojô jekmêng ekang! senthemthemjô dângrângma latrii en; Ngama rosep eka komin mamjetat ha; wathema wathe demko jutjut jaangjaang dangletma tongen; mêmoma



songtongen. Eroh koba Ahunte ngale mêmo Joban pa nekhu demnâng etonghèn.

¹²Mêmoma wathema wathe nâng deksit pekmîn letma salem kohmîn en. Chentô Joban nâng putedâlemte mihnyan hehma nenâng salem matkat ehèn.

¹³Nâng Teso Jisu Krista mînchennaan, Joban wah ahun, ngale Asâthôanju nekhu chentô demnâng chenjoh tonghèn.



Galatien

Galatien 1

¹Arepa moattat chhoante Pol ngewah raangeka, Nga moattat chhoante rãng mihnyan nyuchha ma roowah dangmah, ngale mihnyan nyuchha hung junmemin dangmah, erepa Jisu Krista ngale Joban Wa, Jisu Krista ritwah ngakhînsiette pumma roowah.

²Anângwah chentô putedâlemte hehmemin nga demnâng roamlahma Galatien wah Asâthem hehnâng salem matkat ehèn:

³Nãng Wa Joban ngale Teso Jisu Krista ma nenâng mînchenchaan ngale mêmemo chenkohhèn.

⁴Are nãng songeki hahtokkhoh chhih kowah nãngkhu pêpâng rãng, Krista ma nãng Joban ngale nãng Wa ngin keplahma atedede roandôngpa nãngkhu pap rãngma kohwah.

⁵Joban mînpa roantang roangjêng rãng adong chendanga! Amen.

Wanthe Nginkongsen

⁶Nga nekhu demnâng patritba re ekang! chenrãngma ngako, chuthe tungko Krista mînchenchaan junko neroote pa thînthethien eken, ngale nema ahan nginkongsen kep eken.

⁷Linlinko, “nginkongsen ahan,” aho, rohkomin are ngama ngaekang pa wanwanthe mihnyan hehema Krista Nginkongsen pa litsiet lahma nehung kesiet ehèn, erejunko ba jabekang.

⁸Rohkomin nimejô medang ekomin, ba rangkethung wah Joban ngintatte heh mejô medang akomin, nima nenâng thôkotah Nginkongsen noma ahan methôhû kohhènko, ereheh chenthumin lemutthin pap wendô nãng chenkhamrii kawak a!

⁹Arepa amakomin nima thôkotah, ngale ademin thengak depthô koheka: nema ni ngewah chohtat letma keptet Nginkongsen noma ahan nginkongsen



methôhu kohhênko, ereheh chenthumin lemutthin pap wendô nâng chenkhamrii kawak a!

¹⁰Arepa nganâng mihnyan heh ma dangkoh a ngalahma chensen chohhang ngama jablele ne? Linlin eroh hun dangmek! Ngama Joban ma dangkoh a ngalahma senchoh peba hun ekang! Nga mihnyan heh chentôma chenkhem jet hang ngama lehun ekanga? Athâng hehmin ngama eroh thonghunthu medan angko, Nga Krista haa ledangmin wah.

Pol Moattat Chhoante rãng Chenroh Dangwah a

¹¹Ngalemruchha heh, Ngama nenâng are Nginkongsen thôkoh ekapa mihnyan nyuchha ma hôanwah dangmah.

¹²Ngama arepa mihnyan nyuchha wah chothâ wah dangmah, erediko arepa nganâng henmemin hethôho. Arepa Jisu Krista ate dedema nganâng khesokwah.

¹³Ngama Jews heh dôrem keplekma tângpoatko chenroh hungkoh lekma dangtek a, ngale Joban nâng putedâlemte Asâthem hehnâng lemînchen thangma chenroh chêmsették a, ngale ngama tata angpa chhihsietrãng moatwah, erengin heh nenâng phangtang thôkotah.

¹⁴Jews dôrem hepoatko ngatôthã ahan Jews heh khuchhang wah nga ajetthôn dangwah, ngale te awa heh belem niemarang ko nyahrãng hungkoh lekma kepte dangwah.

¹⁵Rohkomin Joban ma ate mînchenchaan pumma ngachhat mama rênwah, ngale atenâng soamtô rãng rooehang. Ngale ngama

¹⁶Jews ledangte hehnâng ate Nginkongsen pa phoangthô chhoankoh rãngma ate Chha khesok thangko, Ngama hennângjô thongchhien chhoanho,

¹⁷erediko Jerosalem wah nganoma khemama moattat chhoante dangtah heh tânângmin chohmîn chhoanho. Erenoma, Nga lemlienma Arabia nângba katek, ngale enângwah, Damaskas nâng danwãngtek.

¹⁸Rangpâ pârem dikoba Piter wah ngin chohtat rãng Jerosalem nâng katek, ngale ate demnâng heptanii johtong thientek.



¹⁹Ngama enâng moattat chhoante ahan henjô chohkheho, Teso naa Jems loloba chohmîntek.

²⁰Ngama chenni raang ekanga erepa toangtang. Joban memin ajet, ngama mothô thômek!

²¹Erediko Nga Siria ngale Kilika nâng melâng thenâng chhoantek.

²²Ere sanpoatko Judia wah Asâthem hehma Nga senthemthem majet dângwah.

²³Thinma nga nginpa aroh loloba chohtatwah: “Nâng chêmsiette mihnyan pumma, ade phumma atema poattheko chhihsiet phêrăng ngatah putedâlem nginpa phoangthô eka ngama!”

²⁴Ngale ngajunma thinma Joban nâng rôwah.

Galatien 2

Pol ngale Moattat Chhoante Ahan heh

¹Echhi pâbelii diko, ngademko Titas sietlekma, Barnabas demnâng Jeroselem nâng ngakkatwah.

²Nganâng Joban ma katmin jôba ngama khesok phumma katwah. Khhepho phannang heh demnâng araangraang chohmîn poatko ngama Jews ledangte hehnâng thôkotek nginkongsen nginpa thinnângmin thôkotek. Ngama ngamoatlem pa lientahwah sanpoat komin, ba athâng hehmin mahto nâng dângthuk hunmek.

³Ngalemru Titas pa Griik medang akomin, atenâng khoankhen niem hânmin jôba ngama metkepkep chienmek,

⁴rohkomin khaka hehma hânmin jôba ngama ngaeka. Are mihnyan heh putedâlemte rângrăng diapdang lahma, nikhu Jisu Krista demnâng roamlihma chenroh hungsiko dangekia, ereheh jêjetrăng huhlup hûera. Ngale thinma nia haarăng hânhun wah,

⁵rohkomin, nginkongsen pa nekhu rângma toangtangma chentong kohhèn ngama, nima thinnâng sanpoat chhupthejô kohho.



⁶Rohkomin khhepho phannang hehnângmin-ngama are jabekang pa thinnângmin khhepho phannang ngama hôan lekma Joban nginkongpa araangraang thôkomek; chenrãngma ngako, Joban ma thenphãng sùlahma renmah - ere khhepho phannang hehmemin, are ngama jabekang junko, nganâng ngin anyan chenjô thôkohho.

⁷Erenoma, Joban ma Piter nâng Jews hehnâng nginkongsen pa phoangthôkoh rãng chientah rãng, nganângmin Jews ledangte hehnâng nginkongsen pa phoangthôkoh rãng Joban ma chieneka ngama chohkhetah.

⁸Chenroh Piter Jews hehrãngma moattat chhoante rãng hôantah a, ererãng rãng ngamin Joban chaanma Jews ledangte hehrãngma moattat choante rãng hôan ehang.

⁹Khhepho phannang ngaeka, Jems, Piter, ngale Jon, hehmemin Joban ma nganâng are moatlemdong koh ehangpa jeteka; erohwah thinma Barnabas chenii nâng nãngkhu phangtang lemru tuta ngama jetmîn rãng thinma dek sitpekmîn thi. Barnabas chenii a Jews ledangte heh demnâng moatmin, erediko thin a Jews heh demnâng moatmin ngama nikhu pûnthô mînwah.

¹⁰Thinma ninâng roatsep pa thin khuchhang wah tangchhih hehnâng thônghunrãng roatsep wah, phumma ere moatlem pejôba ngama nyahrãng moathun ekang.

Antiok nâng Pol ma Piter Ritngat

¹¹Rohkomin chenthu Piter Antiok wah katko, ngama nok atang mathahko atenâng ritngatwah, chenrãngma ngako atea nyahrãng athe dângwah.

¹²Enâng Jems ma chienkatwah mihnyan heh hokkhoam mako, Jews ledangte heh demnâng Piter aroamma jokphhek chhah lahma dângwah. Rohkomin ere mihnyan heh hokkhoam diphumma, atema Jews ledangte heh demnâng roam jokphhek chhah tuho, chenrãngma ngako, atea khoankhen niem pa hôanmin jôba ngama hunte heh rancheiwah.

¹³Piter demko Jews jatwah putedâlemte rãng litdangtah hehmin johcheiwah; ngale thinchei junko Barnabas tumin thin demnâng johchei sietwah.



¹⁴Ngama chenthu thin a toangtang nginkongsen junko tintin lekhoam khe phumma, Ngama thin phangtang mathahko Piter nâng ngatwah, “Nanga Jews jat, rohkomin nanga Jews rãngrãng ledang, Jews ledangte heh rãngrãng dangeko. Eroh medang ako, nangma Jews ledangte hehnâng Jews heh rãngrãng dangen ngama chenroh jienchien min a?”

Jews ngale Jews Ledangte heh Putedâlem junma Khope min

¹⁵Linlinjô, nia achhat mejû Jews jat, thinma ngaeka rãngrãng, “Jews ledangte papi jat dangmih.”

¹⁶Nãngma ajet mihnyan pa Jisu Krista nâng putedâlem junko lolo jôba Joban demnâng toangtang tadang eki, Niemarang ma chenni huneka erepa moatjunma toangtang tadangmih. Nimemin Jisu Krista junma Joban demnâng toangtang tâdãngrãng Jisu Krista nâng putedâlem eki, ngale Niemarang ma chenni huneka erejunma toangtang dâng dangmih. Chenrãngma ngako Niemarang ma chenni huneka erepa molahma henmin Joban demnâng toangtang tadangmah.

¹⁷Nãngmin Jisu Krista demnâng roamlihma Joban demnâng toangtang medang eko, nãngmin Jews ledangte hehnâng papi ngaeki rãngrãng papi jôba - eroh medang ako nãngmin Krista ma pap ledangthuk ehia? Erohmin dangthuk mahhi!

¹⁸Ngama chhihsiettek Niemarang pa ngamejô methe ngaksensiet angko, nga a athe ngama khesok ekang.

¹⁹Niemarang nâng methakthô eko, nga riichoanthã - Niemarang pummejô ritphe ehang - erohwah nga ade phumma Joban rãngma hintu ekang. Nga Krista demnâng bãngphak khoko lâjoh ritphethang,

²⁰erohwah athâng hehwah hin ekangpa Nga hîn dangtumek, rohkomin, arepa Krista nganâng tong ehang. Athâng hehwah, are nga roandông dong ekangpa, Ngama nganâng hunte, ngale ngarãng ate roandông kohte Joban Chha nâng putedâlem lekma tongekang.



²¹Ngama Joban mînchenchaan pa choh lehun dangmek. Rohkomin Niemarang junma mihnyan pa Joban demnâng toangtang meta dangako, Krista ritpa mahto nâng mahriieka!

Galatien 3

Niemarang ngale Putedâlem a

¹Aba Galatien heh! Nea henma moksiet ehèn a? Nedede mitma Jisu Krista bãngphak khoko rittek pa senthemthem khetet!

²Nganâng are khapthe nginpa thôkoh tanha: Nema Joban Jupa Niemarang junko moletma chohtet ale, Nginkongsen pa chohtat letma ereko putedâlem phumma chohtet a?

³Ne chenrohma aretô jienba eken a! Nema Joban Juchaan ma bengmotet moatlempa; ade phumma nedede chaanma râmoe ngama lethonghun eken a?

⁴Nginkongsen rãngma nema atô chêmchoh tetpa mahto nâng lechêm eken a? Mahtonâng chinchin chêm dangmah!

⁵Nema Niemarang ma chenni huneka erepa moatdi Joban ma ate Jupa lekohthen a, ngale patritli moatlempa nekhu tânâng lemo kohthen a, roh akole, nema Nginkongsen pa chohtat letma putedâlemdi kohthen a?

⁶Abraham nâng thatthong hun tan en; Joban nyapraangma ngaeka, “Atema Joban nâng putedâlem wah, ngale atema Joban nâng putedâlemdi, Joban ma ate demnâng toangtang thôn ngama tâdâng thukwah.”

⁷Eroh wah, nema arepa jet en, putedâlem win mihnyan heh ba Abraham chhuchha linlinpa.

⁸Joban ma Jews ledangte heh ate demnâng putedâlem junko toangtang dângthukmin ngama Joban nyapraangma amathuma thôwah. Ngale Joban nyapraang pumma Abraham nâng Nginkongsen pa thôkoh wah: “Nang junma Joban ma chentô mihnyan nyuchha hehnâng rangkohmin ngama ngatwah.”

⁹Abraham ma Joban nâng putedâlemdi Joban ma atenâng rangkoh wah; eroh wah, putedâlemte chentôma Abraham ma rangkeptah rãngrãng kepmin.



¹⁰Henhenma Niemarang pa keplahma Niemarang ko dâlem eka erehehma Joban wah tēm athoak chohmin. Chenrãngma ngako, Joban nyapraangma ngaeka, “Henhenma Niemarang titab kowah chentô raangthien eka heh roantangma lekep medang ako erehehma Joban wah tēm athoak chohmin!”

¹¹Ade phumma senthemthem lajettih henmin Niemarang junma Joban demnâng toantang tadangmah, chenrãngma ngako, Joban nyapraangma ngaeka, “Henhen pa putedâlem junma Joban demnâng toantang dangeka ereheh ba hînmin.”

¹²Rohkomin Niemarang pa putedâlem demko chenni roamthinjô aho. Erenoma, Joban nyapraangma ngaeka, “Henhenma Niemarang ma chenni huneka erepa moeka ereheh ba hînmin.”

¹³Rohkomin, Niemarang pumma tēm athoak kephû erako, Krista ma nãngkhu litko tem athoakrii lahma nãngkhu pesiet ehi; Chenrãngma ngako Joban nyapraangma ngaeka, “Hen akomin bãngphak khoko rittek eka, erepumma Joban wah tēm athoak choh eka.”

¹⁴Krista ma are moeka pa, Joban ma Abraham nãng rangkohrãng toamsem tahpa Jisu Krista ritjunma Jews ledangte hehnâng kohrãng moatwah, erohwah, putedâlem junma nãngma Joban ma Ju kohrãng toamsem tahpa choheki.

Niemarang ngale Toamsêm

¹⁵Ngalemruchha heh, Ngama jengre wah nginthakthô demnâng thôkoh a: Chenthu mihnyan wanii nginthunjut lahma chenni rãng akomin sũhi mehônako, erepa henmemin leta jeksietmin, ngale ereko henmemin leta lêboatmin.

¹⁶Joban ma Abraham ngale ate chhuchha hehnâng toamsêm wah. Joban nyapraangma “chhuchha heh” ngama ajahnâng ngamah, rohkomin, wathe nãng lolo “Chhuchha” ngama ngatwah, erepa Krista nãng ngatwah.

¹⁷Ngama ngaekang pa dangeka, Joban ma Abraham demnâng kahkhet mînwah ngale erepa chenthumin leta litjâmin ngama toamsêm wah. Niemarang pa châbelii roakrem rangpâ dinângba kohwah, phumma



erepumma Joban ma kahkhet tahpa chenthumin tajeksietmah, ngale Joban ma toamsem tahpa talitsietmah.

¹⁸Joban ma toamsem tahpa Niemarang junko kohmin ngama medang ako, atema toamsem ekako khalihma dâlemthin aho, atema toamsem eka junma choh dangmih. Phumma chenrohjô medang akomin, Joban ma ate toamsem junma jôba Abraham nâng thâhoma rangkoh wah.

¹⁹Eroh medang ako Niemarang pa chenrângma kohwah a? Erepa mihnyan hehma kaamchhih moeka pa khesokrâng kohwah, ngale erepa Joban ma Abraham chhuchha rângma toamsem tahpa kat sanpoat tôkorâng kohwah. Ere Niemarang pa rangkethung wah Joban ngintatte hehma mihnyan nyuchha le Joban tungko ngin mêthôte mihnyan wathe keplahma chohkoh wah.

²⁰Roh-komin chenthu wathelolo nâng medang ako atung kowah ngin mêthôte pa lemmah; phumma Joban pa wathelolo jôba.

Niemarang pa Chenrâng Lem ekia

²¹Are junko medang ako Niemarang pa Joban ma toamsem eka lelatnâng dangeka? Erohmin chenthujô dangmah! Chenrângma ngako, mihnyan nyuchha ma chohtah niemarang pumma roandông mekephûra ko, ere niemarang pa kep junma chentôpa Joban demnâng toangtang tâdângmin.

²²Rohkomin Joban nyapraangma ngaeka, hahtokkhoh phangtang pap khennâng thieneka; ngale erohwah, Jisu Krista nâng putedâlem junma kohrâng Joban ma toamsem tahpa, henhenma Jisu Krista nâng putedâlem eka ereheh nâng koheka.

²³Rohkomin putedâlem sanpoat pa hokmako, Niemarang pumma putedâlem loatkhesok sanpoat pa mahûhûko nângkhu phangtang phâtek nâng sekwah rângrâng tengsek thienwah.

²⁴Ngale erohwah Krista katmako Niemarang pa nângkhu Krista tânâng hoksênte dângwah, ere junkowah putedâlem junma nângkhu Joban demnâng toangtang dangthuk ehi.



²⁵Ade phumma putedâlem sanpoat pa lâhûtha, năngkhua Niemarang khennâng dangtumih.

²⁶Putedâlem junma Krista demnâng roamletma nekhu phangtang Joban Chharăng dangeken.

²⁷Nea Krista demnâng roamletma baptijem kep eken, ngale ade phumma Krista roandông pumma nekhu năng khet kepwah răngrăng lâdangthen.

²⁸Erohwha Jews le Jews ledangte hehnâng mămâ jatjat ahotu, haa le haa ledangte heh tungnângmin mămâ jatjat ahotu, dihiak dela tungnângmin ahotu; nekhu phangtang Jisu Krista demnâng roamletma wathe lâdangtet.

²⁹Nekhua Krista rănđ medang enkoba, Abraham chhuchha edangen, ngale erohkoba Joban ma chenni toamsem tah a erepa echoh en.

Galatien 4

¹Ngama nenâng arepa thôkohhun eka - hen akomin ate wa thin amăn chohtea, erepemin letachha thuko chentô ate wa thin amăn heh chohtejô medang akomin, atea haa răngrăng jôba thieneka.

²Ate wama atenâng kohrăng sanpoat pa mahûhûko, ngale atea leta thuko, mihhan ma ate sũare lahma thieneka, ngale ate thiak aman hehmin sũare koheka.

³Ererănđrăngjô, năngmin Joban Ju choh ngenâng phannang rănđrăng dăngmako, are hahtokkhoh pête ju haa danglihma tôngwah.

⁴Rohkomin chenthu sanpoatsen pa hokphumma Joban ma ate Chha chienkat era. Atea dihiaknyu ma chha lahma Jews heh Niemarang khenko sôngtông katwah,

⁵chenrăngma ngako, năngkhua Joban Chha jiendănđrăng ngama atea Niemarang khenwah mihnyan heh pepăng răngma katwah.

⁶Ngale nekhu ate Chha ngama khesokrăng ma chienkatwah, Joban ma ate Chha Jupa nănghung khennâng chienkat era, ere Ju pumma, “Wa, Ewa,” ngama raksep eka.



⁷Erohwah nekhua haa dangtumet, Chha lâdangtet. Ngale nekhua ate Chha dâng phumma, Joban ma ate chhuchha hehrăng chentô thienko tahheh phangtang nekhu nâng ekohhèn.

Pol Galatien wah Mihnyan hehrăngma Sekmah.

⁸Amako nema Joban lejet dângwah, ngale chenpa Joban ledanga ere haarăng dangletma tôngwah.

⁹Rohkomin ade phumma nema Joban lâjettet - ba, Joban memin ne lâjettthen - phumma aboan ngale sekhota hahtokkhoh pên-teju tâko ngakhokrăng chenroh jienhun eken a? Chennai răngma thinhaa thêngak dâng-hok hun eken a?

¹⁰Nema rangwo dâjeng, rangkuh sanha, ngale rangkuh rangpâ hehnâng soamtô letma tôngwah.

¹¹Nga nekhu răngma patrit sekma re ekang! Ngama nekhu răngma chentô moekang heh mahto nâng lemo ekanga?

¹²Ngalemruchha heh, Ngama nenâng nga răngrăng dangen ngama rosep eka. Chenrăngma ngako ngamin nekhu răngrăng jôba. Nekhuma ngarăngma chenjô chhihmomet.

¹³Ngama nekhu nâng nginkongsen pa chenrăngma khebengrăng thôhûkoh eka erepa thonghontan en; arepa nga khun dângwah dângjunko.

¹⁴Nga phoangnâng khun junko nekhu nâng mechêmsiettah komin, nekhuma nga phemahtha, ngale chinnya mahtha. Erenoma, nema Joban ngintatte heh tângroo răngrăng tângrootha, ngale nema Jisu krista tângroo eken răngrăng tângrootha.

¹⁵Ne nyahrăng khuhah letma dângwah! phumma athângheh ere khuhah pa chenkoa? Ngama linlin ajeta, tâdângli ngako nema ne mitken pa loatletma nganâng chenkohtha.

¹⁶Rohkomin, ade phumma ngama nenâng toangtang nginpa thôko lahma neranrăng ledang ekanga?



¹⁷Mihnyan ahan heh ma nyahrãng hun achet khesok lahma nekhu nyoamrãng hun ehèn, rohkomin thinhung khennâng mongthem pa achhih them eka. Thinma nekhu ngademwah phansietrãng lolo huneka, erohkoba, thinma nenâng chenroh hun achhâ ehèn a ererãngrãng nememin thinnâng ehun en.

¹⁸Phumma asenrãng medang ako eroh hungkoh pa asen - arepa roantang toantang ngin, nga nekhu demnâng dângpoat kololo dangmah, nekhu tâwah ataangnâng dângpoat komin toantang.

¹⁹Echhu echha heh! Nyong nâng naachhat poatko rângchhâ arãngrãng, Krista hung arin jat apat pa nekhu nâng mahong honghènko, nganângmin nekhu rãngma ademin rekthe chhâ ehang.

²⁰Nga athângheh nekhu demnâng danglek mele ngama nyahrãng hun ekang, erohkoba ngama nekhu demnâng athâng hehwah rãngrãng ledang thangma chenjab mîntah. Nga nekhu rãngma nyahrãng sekmah patrii ekang!

Hagar ngale Sara Nginthakthô

²¹Henhen Niemarang khennâng tônghun eken a ereheh nâng ngama thatthôngpha tan a: Niemarang ma chenni ngaeka erepa nema mãthattat ekenne?

²²Niemarang pumma Abraham nâng chha wanii dângwah ngaeka, wathapa haanyu ma chhatwah, ngale wathapa haa ledangte pumma chhatwah.

²³Haanyu ma chhatah ate chhapa hei angem junma chhatwah, rohkomin haa ledangte ma chhatah ate chhapa Joban ma toamsem tah junma chhatwah.

²⁴Are thakmîn eka hehnâng sùlihma tajet e: Dihiaknyu wanii pa toamsem kahkhet wanii pa. Hagar ma chhatah heh haachhu haachha, ngale atea Sinai hahho khawah toamsêm kahkhet hôantahpa.

²⁵Arab wah Sinai hahkong pa Hagar ngale erepa athâng hehwah Jeroselem hah pa, ngale atea ate mihnyan chentô heh demnâng haarãng dangeka.

²⁶Rohkomin rangkethung wah Jeroselem pa henkhen nângmin haa dangmah, ngale atea nãng nyong.



²⁷Chenrãngma ngako Joban nyapraangma ngaeka, “Chhuho chhaho dihiaknyu heh khuhah nãhah dangen! Naachhat poatwah chet lethat jette dihiaknyu heh, khuhah nungma raksep en! Chenrãngma ngako, dela aho dihiaknyu heh dela ma chenthumin lethat pãphete dihiaknyu heh nomemin chhujah chhajah edanga.”

²⁸Ngalemruchha heh, ade phumma nea Joban ma toamsem junko Isak dangtah rãngrãng Joban chha lâdangtet.

²⁹Ere sanpoatko mihnyan hei angem junma chhatah pumma Joban Ju junma chhatah ko chêmthuk rewah; ngale athâng hehmin ere sanpoat wah rãngrãng dangeka.

³⁰Rohkomin Joban nyapraangma chenni ngaeka, “Haanyu le ate chhanii chienchhoan re en; chenrãngma ngako haanyu ma chhatah chha pumma haa ledangte dihiaknyu ma chhatah chha demko ate Wa thin amãn, hehwah lejoh chohmin.”

³¹Ngalemruchha heh, erohwah, nãnga haanyu chhuchha dangmih, nãnga haa ledangte dihiaknyu chhuchha.

Galatien 5

Mihhaa Dângwah Krista ma Loatsiet

¹Nãnga mihhaa dãngwah jek ekipa - Krista ma loatsiet ehi! Erohwah, mihhu mihaa ledangte rãngrãng dangen, ngale nededema mihhaa rãng nekhôanrii en.

²Tattan en! Nga Pol, Ngama nenâng thôkoh eka, nededema niemarang junko khoankhen niem mehôanthuk enko, Krista pa nerãngma sekhota thã.

³Ademin ngama chentô nãng thôkoh eka, henhenma atedede khoankhen niem hôanthuk eka, atema Niemarang pa phangtang metkep kepmin.

⁴Nekhuwah henhenma Niemarang pa kepletma Joban demnâng toangtang tâdâng hun eken a, ereheh Krista demwah taangmin eka. Ngale nekhua Joban mînchenchaan khennâng dangmet.



⁵Nāngkhuma, Joban ma ate demnâng toangtang edangthuk hi ngama khaeki; ngale nāngkhu putedâlem junma Joban Juchaan ma moat pa bemeki.

⁶Chenrāngma ngako chenthu nānga Jisu Krista demnâng meroam tihko, khoankhen niem mehôn ekomin, ba lehônjô medang ekomin erepa chenjô māmâ dangmah; hun achet demko putedâlem peba lemeka.

⁷Nema sênmōang moatwah! Henma toangtango putedâlem ekenpa jeksiet ehèn a? Atema chenroh jiennyoam ehèn a?

⁸Erepa neroote Joban ma moat dangmah.

⁹Thinma ngaeka rāngrāng, “Pheban pa phangtang bietjârāng wichhi amānchha ba lemeka.”

¹⁰Rohkomin ngama nenâng athâng hehmin dâlem eka. Nāngkhu roandôngpa Teso demnâng roamlihma dāngjunko ngama dâlem ekang, mihhan mejô nenâng lihân ngin methôhû kohhèn komin nema thin nginko putedâlem met, ngale henjô medang akomin nekhu moksiette heh Joban ma echêmthuk a.

¹¹Ngalemruchha heh, Ngarāng ma dangeka, Ngama khoankhen niem pa hōanmin jōba ngama mephoangthô angko, Nganâng athâng hehmin chenrāngma thamchêmsiet eha? Ere nginpa toangtang medang ako, Ngama Krista bāngphak junma phoangthô ekang ngin pumma chenjô chêmsiet mahhi.

¹²Ngama thonghun ekang nemoksiette mihnyan heh khoankhen niemhōan lolo ledang lengmin chentên riiwak a!

¹³Ngalemruchha heh, nekhu rāngma dangeka, nekhua Joban ma hungsiko tongrāng roehèn. Rohkomin, nehungsiko dangeken junma, ne hei angem phoangma chenni huneka erejunko nekdangen. Erenoma, hun achhâmin letma wathema wathe nāng chohsûmîn en.

¹⁴Chenrāngma ngako Niemarang pa phangtang wanthe hōkum khenko tongeka: “Nang kêanâ wah mihnyan hehnâng nangdede hunriieko rāngrāng hun o.”



¹⁵Phumma nea wunwah ngem rãngrãng dangletma, wathema wathe nãng mithek chhihchohmîn, erediko buh awatmin reletma medang enko, thatsûtan en, wanwanthe ma phangtang etathôn ritphemîn en.

Ju ngale Mihnyan Nyuchha Hei angem Jat apat

¹⁶Ngama jabekang pa dangeka: Ne roandôngpa Ju junko dongen, ngale erohkoba nema mihnyan nyuchha hei angem ma hun ekapa lemo etadangen.

¹⁷Chenrãngma ngako nãng mihnyan nyuchha hei angem jat apat pumma chenni huneka erepa, Juma hunmah, ngale chenpa Juma huneka erepa, nãng mihnyan nyuchha hei angem jat apat pumma hunmah. Are wannii pa ran, ngale erejunko nema chenni hun eken a erepa nehungsima tamomet.

¹⁸Phumma nea Juma mesen hènko, Niemarang khennâng dangmet.

¹⁹Mihnyan hei angem ma chenni moeka erepa anga ngama ajet. Erepa dihiak dela kaamchhih moat, moatlem chin, ngale lapien.

²⁰Ngale moangachaang nãng soam, erediko môngama chhihrãng phoangdang lahma ekhe e. Mihnyan heh ranrãng danglahma loatmîn; phetwânâmîn, rinkhah, ngale mâmâ dede rãnglolo hun edanga. Thin dedema mâmâ khukhu phoang phakjâ rewak eka;

²¹chhahnyoak, khemmok chempa, kuhhoan lahma jokphhek chhah, ngale arerãngrãng lihân hehmin ephoang mowak a. Amawah rãngrãng ngama nenâng athâng hehmin thôkoh eka: henhenma arerãngrãng moatlem heh moeka erehehma Joban Hahsông pa leta chohmin.

²²Rohkomin Joban Juma hun achetmîn, khuhah nâhah, mêmô, hungmôngma tadô, mînchen, asenli, ngale putedâlem,

²³numnene, mâmâ dede hung tâmôngsiet peba koheka. Arerãngrãng heh lelatnâng chenni Niemrangjô aho.

²⁴Ngale henhen Jisu Krista demnâng johdang eka erehehma mihnyan nyuchha hei angem jat apat, ngale atema huneka chentô heh ritphe rêmin.



²⁵Ju pumma nāngnāng roandông kohehi; erohwah atema jôba nāng roangdông pa pênmin.

²⁶Nānga ngam poapoa ledangmin, ngale wathema wathe rin lekhahsiet mînmin, erediko wathema wathe nāng lephatwân mînmin.

Galatien 6

Wathema Wathe Chêmchei ko Chohsûmîn en

¹Ngalemruchha heh, hen akomin nema kaamchhih molahma mechokhe enko, nekhuwah henhenma Joban senthemthem jette tongen a ereheh ma kaamchhih moatte pa punsiet en; rohkomin erepa nema hungnoap rinnoap dangletma mo en. Ngale nedede min jetletma dangen, erohkoba nemin achhih ma hung letoan edanghèn.

²Wathema wathe chêmchei ko chohsûmîn en, ngale erohko jôba nema Krista niemarang pa kep eken.

³Henma komin atea sekhota mihnyan danglahma, ngamin wathe alemli mihnyan jôba ngama thonghunrii eka, erepumma ate dedeba diapchhahrii eka.

⁴Anga ngama māmâ dede moatlem pa bengsokrit mêngmin. Asen medang ako, nema chenni motet a erepa tarângthô en, rohkomin erepa mihhan heh ma chenroh moeka ereheh nāng lethakmîn min.

⁵Chenrāngma ngako nekhu anga ngama māmâ dede hên peba hênmin.

⁶Nenāng Kristan nginkongpa mehethô hènko, nema chenni asenli chei eken a ereheh nenāng hethôte demko aroamma kepen.

⁷Nedede nekdiap chhahrii en; henmemin Joban tadiap chhahmah. Nema chenni bāng khiet eken a ere bāngri pejôba echohpun en.

⁸Nema hei angem hung arinma huneka junko memo enko, erekowah nema roantang roangjêng rāng arit echoh en; rohkomin nema Joban Juma huneka junko memo enko, nema roantang roanjêng ahîn roandông echoh en.



⁹Erohwah kaamsen moatnâng nekboan eki; chenrãngma ngako nãngma lejek thangma memo eko, erethã roantang roanjêng khope choh sanpoat pa ehûra.

¹⁰Erohwah, nãngma sanpoat chohroakweih, anga ngarãng asenli moatlem moatmin, ajahthem pa nãngkhu demwah putedâlemte hehrãng asenlipa moatmin.

Athôan Rîn akhah ngale Salem

¹¹Sûtan en, athâng hehwah ngadede dekma nenâng raangeka sitipa chentô dong raangeka!

¹²Nenâng khoankhen Niem pa hânmin jôba ngama metkep khetloatte mihnyan hehma rangkhohkhoan moatlem heh lolo khesok lahma rângthô riiwak eka. Thinma eroh moeka pa, Krista bãngphak junma nekchen chêmthuk ehi ngama moeka.

¹³Ere khoankhen niem hôante mihnyan hehmemin Niemarang pa kepmah; thinma nenâng khetlo ehênpa nememin phoangnâng khoankhen niem pa hân eken jôba ngama thinma jienrângthô rãngba chien ehèn.

¹⁴Rohkomin, Nga dangekang, Ngama Jisu Krista bãngphak pa lolo jôba erângthô ang; chenrãngma ngako, ate bãngphak junma are hahtokkhoh pa ngarãngma riichoan rãngrãng dangeka, ngale Ngamin hahtokkhoh rãngma riichoan rãngrãng dangekang.

¹⁵Khoankhen niem pa mehân ekomin ba lehân kikomin erepa chenjô dangmah; rohkomin Joban jetlihma mihnyan nyanrãng litdâng peba huneka.

¹⁶Henhenma thin roandôngko are niemarang heh junko songeka, ereheh demnâng mêmô ngale Joban mînchen chentonga - thin demnâng min ngale chentô Joban putedâlemte heh demnâng min chentonga!

¹⁷Athôanko dangeka: henmemin nganâng nekchen chêmthuk tuwak ehang, chenrãngma ngako, ngaphoang wah chentô buhawat man hehma nga a Jisu haa ngama khesok eka.

¹⁸Ngalemruchha heh, nãng Teso Jisu Krista mînchennaan pa nekhu phangtang demnâng chentonghèn. Amen.



Ifisien

Ifisien 1

¹Joban hungsi junko Jisu Krista moattat choante Pol ngewah- Ifisus wah Joban nâng putedâlemte, ngale Jisu Krista demnâng aroamma danglahma thin roandôngko toangtangma dângte hehnâng raangeka:

²Nâng Wa Joban ngale nâng Teso Jisu Krista ma nenâng mînchenchaan ngale mêmô chenkohhèn.

Krista ma Rangkoh

³Joban ngale nâng Teso Jisu Krista Wa nâng dangkoh a ngae! Chenrângma ngako Krista junma rangkethung nâng atema nângnâng rang kohehi.

⁴Are hahtokkhoh hân mama, Joban ma nânga Krista demnâng aroamma danglihma aterâng dângrâng rênwah, erohwah nânga ate mathahko Sâpoangpoang ngale chenjô achhih aho danglihma tôngmin. Atema hun achet junko

⁵Joban ma nânga Jisu Krista junma ate Chha dângthukrâng ama thuma thônghun wah - erepa ate hungma hunlahma moatwah.

⁶Erohwah Joban ma nângnâng nyahrâng mînchendonk kohdi Joban nâng rôe, chenrângma ngako atema nyahrâng ahun ate Chha demko nângnâng hínhô pa thâhoma kohehi!

⁷Chenrângma ngako Krista hei junma nângpap khenwah loatsiet ehi, ngale nângpap heh mapkoh ehi. Joban mînchenchaan pa chentô dônga,

⁸Joban ma tâthakli ledang dông kohehi! Erepa Joban ma ate hung khenwah buthi mongthem heh kohehi

⁹Joban ma chenni themawa eka erepa moeka, ngale erepa Jisu Krista junma tamo lahma nângnâng loatjetthuk ehi.



¹⁰Ere themawa ekapa Joban ma sanpoat methang tahko emoa, erepa rangkethung ngale hahtokkhoh wah atema tem atiak tahheh Krista khhepho khenko phangtang aroamma eroapsiet hûa.

¹¹Chentôpa Joban hung arin ngale ate mongthem junma dangeka; ngale nãngmin Krista demko aroamma ate Chha dângrãngma ren ehi, chenrãngma ngako, erepa atema rangbeng habbeng thuma chenroh themawa tah a erejunko jôba moeka.

¹²Erohwhah, henhenma Krista nãng khebeng thôn putedâlem tih a, erehehma Joban nãng rô en!

¹³Ngale chenthu nema khope kephok kohte linlin Nginkongsen pa chohtet a, ere phumma nemin Joban mihnyan lâdangtet. Nema Krista nãng putedâlem eken, ngale Joban pa ne Tãngte ngama jetrãng atema toamsem tah Asãthôanju pa nenãng kohlahma mãnhôan ehèn.

¹⁴Ju junma Joban ma atenãng putedâlemte mihnyan hehnãng kohrãng toamsem tahpa nãng memin echoh e, ngale erejunko Joban ma ate mihnyan heh linlinjô epesiet a ngama jeteka. Erohwhah, nãngma atenãng rôlihma mîndong thuk e!

Pol Rangsoam

¹⁵Are junko, chenthuma nema Teso Jisu nãng putedâlem letma, ngale chentô Joban nãng putedâlemte mihnyan hehnãng hun achhã letma chohtat tekwhah,

¹⁶ngama nekhurãng Joban nãng dangkoh a ngatpa jekmek. Ngama rangsoam roakweih nekhuh thônghunjû

¹⁷ngale nãng Teso Jisu Krista Wa adongthôn Joban ma nenãng ate Ju chenkohhèn ngama rosep ekang, Juma nekhuh jet ajien edangthuk hèn, ngale nenãng Joban ekhesok hèn, erohkoba nema ate ejet en.

¹⁸Nema Joban wenphiak pa jienchoh kherãng nekhuh hungrin chenlaang kohhèn ngama Joban nãng rosep ekang, erohkoba nema chenni nãng dâlemrãng atema roohèn a erepa nema etajet en. Joban ma atenãng



putedâlemte mihnyan hehnâng rangkohmin ngama toamsem tahpa chentô chhu a ngale chentôsên a,

¹⁹ngale atenâng putedâlemte heh khenwah ate chaanma moeka pa chentô dônga. Nãng khenwah moeka chaanpa achaanthôn chaan pejôba

²⁰ere chaanpa Joban ma Krista ritwah ngaksatsiet lahma rangkhethung nâng ate dekchah ngeko tôngwâng thukrãng keptah chaanpa jôba.

²¹Enâng Krista ma rangkhethung wah pête, chaan kepte, chaan ahang heh, ngale teso chentô heh noma adong danglahma pêneka; ngale are hahtokkhoh wahmin erediko adiwah hokmin hahtokkhoh kowah chentô adong heh nomemin Krista jôba adongthôn.

²²Joban ma chentôpa Krista dakhen ko thieneka, ngale Asâthem hehrãng atea chentô khohko adongthôn Teso dangthuk eka.

²³Asâthem heh dangeka Krista phoang, ngale thinnâng Krista Ju tongeka, ngale atema jôba rongrup ngema chentô thenâng tongthuk eka.

Ifisien 2

Arit wah Ahin

¹Amako nema nginlekep dâng junma ngale pap junko nea Ju nâng riiletma dângwah.

²Ere sanpoatko nema are hahtokkhoh kowah achhih heh lemkhôko junkhoam letma dângwah; ngale nema hahtokkhoh pête ju ngin kepletma dângwah, ereju pumma athângheh Joban ngin lekepte mihnyan heh pêneka.

³Linlinko nângkhumin phangtang thin rãngrãngjô nãng mihnyan nyuchha hei angem hung arinma chenni huneka erejunko songtong lihma dângwah, nãngphoang ngale hung arinma chenni huneka erejunko molihma dângwah. Nãngmin, hei angem junko aphoak mejô mihhan heh rãngrãng Joban rinkhah khenko chêmchohte dângwah.

⁴Rohkomin Joban mînchen pa ajah, ngale ate hun achet pa adong,



⁵nāngma nginlekep dāngjunma junāng riilihma dāngthuko, atema Krista demko nāngnāng roandōng kephû kohehi. Erepa Joban mīnchenchaan junma nekhu khope eken.

⁶Nānga Jisu Krista demnāng aroamma dāngjunko Joban ma Krista demnāng rangkethung nāng aroamma pēnrāng johngak hinsiet ehi.

⁷Atema are moeka pa, ahokmin sanpoat roakweih Jisu Krista junma atema nāngnāng ate mīnchenchaan ngale hun achet pa atāthakli ledang dōng tonga, ngama khesokrāng moeka.

⁸⁻⁹Chenrāngma ngako, Joban mīnchenchaan ngale nema putedālem junma ne khope eken. Erepa nedede chaanma moatjunma dangmah, Joban ma hīnhô koh ehèn, erohwah ererāngma henmin tarāngthôrii met.

¹⁰Nāng chenroh dangekia erepa Joban ma hōanehi, ngale atema nāngmin Jisu Krista demko moatlemsen heh moatrāng hōanehi, ere moatlem heh nāngma moatrāng atema lâkhoakhem kohthi.

Krista Khenko Wantherāng dangeki

¹¹Nea nyong chhachhat mejû Jews ledangte-ngale Jews hehma “khoankhen niem lehōante jat” ngama ngaehèn, phumma thindede nāng khoankhen niem hōante jat ngama ngariieka (erepa mihnyan hehma thinfoang ko niemhōan ekako ngaeka) - thatthong hun tan en, amako nea chenroh dāngwah a.

¹²Ere sanpoatko nea Krista demnāng ledangwah. Nea mihdiak mihnyan rāngrāng dāngwah, ngale Joban ma ren eka mihnyan heh demnāng ledang dāngwah. Joban ma ate mihnyan hehnāng toamsem lahma kahkhetmin tahko nea lejohroam dāngwah, ngale nea are hahtokkhoh ko dālem thinmin aho ngale Joban min aho songtong letma dāngwah.

¹³Rohkomin, ade phumma, Jisu Krista demnāng aroamma dangletma amako Joban demwah ataangnāng dangtet pa, ade phumma Krista hei junma Joban tâko lânamsiet hūthen.

¹⁴Chenrāngma ngako, Krista dedema Jews le Jews ledangte heh mihnyan watherāng hōanlahma nāngkhu nāng mēmo kephû kohehi. Thin phansiet



lahma ranrãng dangthuktah tukthhen pa Krista phoang pumma chhihsiet phekoh eka.

¹⁵Mihnyan jatnii kowah ate demko mihnyan anyan watherãng hânãng atema Jews heh Niemarang ngale hôkum heh rephe koheka, atema eroh molahma mêmô dangthuk eka.

¹⁶Krista ma bãngphak khoko ritjunma thintungko ran dangtah heh rephe koheka; Atema bãngphak junma mihnyan jatnii dangtah heh phoangtherãng roapsiet lahma Joban tânãng ngaksiet hûeka.

¹⁷Erohwha Krista kalahma mêmô Nginkongsen pa chentô mihnyan nãng phoangthô kakoh era - Jews ledangte jat ngale Joban tâwah ataangnãng dãngwah hehnãngmin thôkoh ehèn, ngale Joban tâko tângte Jews hehnãngmin thôkoh ehèn.

¹⁸Arepa Krista junma lolo jôba Jews ngale Jews ledangte jat heh Ju wanthe danglihma Wa tânãng tawãng eki.

¹⁹Erohwha, ne Jews ledangte hehmin ade phumma mihdiak mihnyan ngale mihwun dangtumet; nemin ade phumma Joban mihnyan heh demnãng lâdangtet, ngale Joban humkãwah mihnyan tuta lâdangtet.

²⁰Nemin moattat chhoante ngale mông hehma hânãrang phungtah humthinko hânãwah hum rãngrãng lâdangtet, ngale Jisu Krista pa ere humthin kowah alemthôan long.

²¹Ngale Krista ma jôba ere Hum pa aroamma rônglo lahma thieneka, ngale atema ere humpa Teso rãngma Rangsoamhum Asã dangthuk eka.

²²Nemin ate demnãng roamletma mihhan heh demnãng ate Ju junma Joban sôngthin therãng hân ehèn.

Ifisien 3

Pol ma Jews Ledangte hehrãng Moat

¹Nga Pol, Jews ledangte heh nekhurãng Jisu Krista mîngo phâtek nãng khhekritte rãngrãng danglekma Joban nãng rangsoam ekang.



- ²Joban ma ate mînchenchaan junma are moatlempa nekhurãng sênrãngma nganâng mothuk ehang, ngama nekhuma linlin lâchoh tattet.
- ³Joban ma ate hungkhen wah huhtham awa ekapa nganâng khesok lahma jetthuk ehang. (Ere junkowah ngama amãnchha raang ekang,
- ⁴ngale ngama chenni raang ekanga erepa nema meweih enko, ngama Krista junma chenni jet ekanga erepa nema ejet en.)
- ⁵Amako are patritli nginpa mihnyan nyuchha hehnâng lethôkoh thangma thienwah, rohkomin erengin pa ade phumma Joban Ju junma ate moattat chhoante Asâ ngale mông Asâ hehnâng khesok eka.
- ⁶Apatritli nginpa dangeka, nginkongsen junma Jews ledangte hehmin Jews heh demnâng roamlahma Joban wah rang johkepmin; thinmin phoangthe kowah tuta jôba, ngale Jisu Krista junma Joban ma toamsem tahko thinmin johroam eka.
- ⁷Joban ma nganâng nyahrãng mînchen junko nga a nginkongsen haarãng Joban ma hôanwah, erepa Joban ma ate chaan junma kohwah.
- ⁸Chentô Joban mihnyan khuchhang wah rinthôan nomemin nga jôba rinthôan; rohkomin Jews ledangte hehnâng leta thônli Krista Nginkongsen pa thôchhoan kohrãng nganâng koh ehang,
- ⁹ngale Joban ma patritli themawa ekapa chenroh dângmin a ngama chentô mihnyan nyuchha hehnâng khesokrãng mothuk ehang. Chentô têm atiate Joban pumma atema patritli themawa ekapa amawah lienchhoantah roan hehnâng lekhesok thangma huhthienwah,
- ¹⁰Joban ma thonghun ekapa rangkethung wah chentô pête ngale chaan ahang kepte hehma athâng hehwah Asâthem heh junma ate ngewah jatrup buthi mongthem pa chenhea ngama thonghun eka.
- ¹¹Joban ma arepa ate buthi mongthem junko roantang roanjêng rãng themawa lahma moeka, ngale erepa nãng Teso Jisu Krista junma tamoeaka.



¹²Krista demnâng roamlhma, ngale nãngma atenâng putedâlem junko Joban tânâng lechei thangma ngale hungdongdong danglihma eta wãnge.

¹³Erohwhah ngama nenâng rosep eka, nekpatrii en, chenrãngma ngako, nga nekhurãng chêmrii ekang; arepa nekhurãng lolo asenli dângrãngma chêmrii ekang.

Krista ma Hun achet

¹⁴Are rãngma Ngama Wa mathahko nga dakuhttho lekma kunjup ekang,

¹⁵ate ngewah jôba rangkethung wah ngale hahtokkhoh wah chentô humkâ hehma toangtang mînpa choh eka.

¹⁶Ngama Joban ngewah thaekang, ate ngewah leta thônli mîndong eka Juchaan junma ne Ju nãngmin chaan chenkohhèn,

¹⁷ngale putedâlem junma nehung khennâng Krista chentonghèn ngama rangsoam ekang. Erediko ne roandôngko hun achet mînpa rongtêngtêng chenhun chenchhâmîn en ngama soam ekang,

¹⁸erohkoba, Joban nâng putedâlemte mihnyan heh phangtang demnâng roamletma, nememin Krista ma hun achet pa chentô dônga, ngale chentô loat a, erediko chentô choanga, ngale chentô lûa, erepa tâjetrãng chaan echoh en.

¹⁹Linlinjô, nema Krista ma hun achet pa phangtangjô leta thônjet kenkomin - nema Krista ma hun achet pa etajet en - ngale erohkoba ne roandông komin Joban rãngrãng etadangen.

²⁰Joban chaanpa nãngnâng moatjunko, nãngma thaeki, ba thonghun eki nomemin bâmbâm jah moeka:

²¹Asâthem ngale Jisu Krista junma Joban mîn sanpoat roakweih ngale roantang roangjêng rãng adong chendanga! Amen.

Ifisien 4

Phoang Jut ajaang



- ¹Erohwah, Ngama nenâng rosep eka - Ngama Teso nâng soam atôdi Nga phâtek nâng khhekthien ehang: Joban ma nea chenroh sôngtôngrăng roehên a eroh songtongen.
- ²Roantangma num nene, noapnene, ngale hungmông rinmôngma tadôen. Wathema wathe nâng lietmîn letma nekhu hun achet mînpa khesokmîn en.
- ³Ju junma nekhu mêmô pumma roamkhhek ehên răngrăng, roantangma jutjut jaangjaang dangletma tongen.
- ⁴Phoangmin wanthe ngale Jumin wanthe dangeka răngrăng, Joban ma nekhumîn dâlem wanthe ko lolo jôba roehên.
- ⁵Teso min wanthe, putedâlem min wanthe, ngale baptijem min wanthe jôba;
- ⁶ngale Joban min wathe jôba, atea chentô mihnyan nyuchha rângma Wa, ngale atea chentô rângma Teso, erediko chentôpa ate junma moeka, ngale atea chentô nâng tongeka.
- ⁷Năngkhu chentôma hinhô choheki, erepa Krista ma them athak lahma hennâng chenroh kohhun eka eroh koheka.
- ⁸Joban nyapraangma ngaeka, “Chenthu atea achoangthôn wah theko wăngtahko, atema ate demko khhekritte heh johsietwên wah; ngale atema mihnyan nyuchha hehnâng hinhô koheka.”
- ⁹“Atea achoangthôn wah theko wăngtah” ngama ngaeka pa chenni nâng ngaeka? Ere ngaeka pa atea khebengko hahkenlu thôannâng bengkaera.
- ¹⁰Erohwah hahkenlu thôanko henpa katha ere pejôba choangthôn theko wăngeka, ngale rangkhen phangtang nâng ate jientôngrăng rangkho liennâng wăngeka.
- ¹¹Ngale “mihnyan nyuchha hehnâng hinhô pa atema koheka”; atema wawathe pa moattat chhoante dangthuk eka, wawathe pa mông dangthuk eka, wawathe pa Ivangilist dangthuk eka, ngale wawathe pa Pastor erediko ahethôte rănđ dangthuk eka.



¹²Atema are moeka pa Joban nâng putedâlemte mihnyan chentô heh ma Kristan moatlem molahma Krista phoangpa rôngsietrăng mothuk eka.

¹³Ngale nângkhu phangtang putedâlem nâng wanthe tuta danglihma Joban Chhapa roamjet e; Nângkhu hungchit phannang răngrăng danglihma, chenroh Krista hung asâ dangeka ererăngrăng nângmin hungsâ dange.

¹⁴Ere diphumma ba nângmin letachha heh răngrăng ledangtu edange, ngale jowaak ma phophe katwah răngrăng, erediko pông ma phoangmet phewah răngrăng nângmin mihphông diapchhahte mihnyan hehnâng lephoang diapchhahrii edange, ere mihnyan heh ma thinhungnâng buthi chhih heh keplahma mihnyan han heh lemke nâng senchhoan eka.

¹⁵Erenoma, hun achetmîn nungma toangtang thôlihma, rongrup ngema nângmin Krista răngrăng dange, Krista pa năngrăngma nâng khophang răngrăng.

¹⁶Ate khenko nângphoang kowah chentô jat pa roapeka, ngale chentô rokchi râchî chohmîn eka junko nângphoang phangtang roapsiet eka. Erohwah chenthu nângphoang wah heh ma mâmâ moatlempa memoako, nâng phoangpa phangtang edonga, ngale erepa hun achetmîn junma edonga.

Krista junma Roandông Nyan

¹⁷Erohwah Ngama Teso mînko nekhu nâng rîn akhah eka: Joban nâng lepute dâlemte mihnyan heh răngrăng nekdangen, thinma ledangli heh thonghun eka

¹⁸thinhung pemin rangnyek khennâng. Joban ma koheka roandôngko thin johroam mah, chenrăngma ngako thin a aba ngale hungcheh rincheh.

¹⁹Thinnâng rêsê ahotu; ngale thindede hei angem rinmeli chentô kaamchhih pa ajek lehôn moeka.

²⁰Rohkomin ereheh nema Krista ngewah hewah dangmet!

²¹Linlin nema ate ngin chohtattet, ngale ate dijunte dângjunko nenâng Jisu ngewah toangtang nginpa hethô tah.



²²Erohwah ne amako chenroh dangtet a ererãngrãng nekdangtu en, amako nang chenroh sôngtông hun eko eroh songtong lohma dângwah - amakowah apãpa hunggek rinngék pumma lâchhihsiet tah.

²³Nehung nerin heh phangtang anyan ngaklit en,

²⁴Ngale nea roandông nyan dangen, Joban rãngrãng toangtang, chenni nângmin achhih aho, erediko Asâthôan roandông hôantah pa nema kepen.

²⁵Erediko mothô nekthôtu en! Nekhu chentôma putedâlemte mihnyan ahan hehnâng toangtang thôkoh en, chenrãngma ngako, nãngkhu phangtang Krista phoangko tuta roap eki.

²⁶Nerin mekhah enkomin, rinkhah pumma pap nekchen dangthuk hèn, ngale ngihjang rinkhah letma nektongen.

²⁷Juchhih nâng ne chhihsietrãng sanpoat nekkoh en.

²⁸Nema ahuh chîrewah medan enko, ahuh nekretu en, moaka letma toangtangko biphekchhah letma toangtangma songtongen, ngale tangchhih hehnângmin chohsû en.

²⁹Jabkhabchhih heh nekjaben, mihrãngma senli jabkhab heh lolo jaben. Ne jabkhab junma mihrãngma asenli chendanga, erohkoba nema jabeken jabkhab pa henma tateka ereheh rãngma asen edanga.

³⁰Ngale Joban Asâthôanju hung nekke thuk en; chenrãngma ngako Joban Jupa ne Tângte ngama jetrãng nenâng koh ehèn, ngale sanpoat pa methang tahko Joban ma nekhu pêsietmin ngama khesokrãng ere Jupa koh ehèn.

³¹Jatrup chhih akhah hehwah, hei angem junma chhihmoat hehwah, ngale rinkhah hehwah ajekre en. Ngale phoangrak akak, phoang dûmmek, mihnâng phoang mitchek, ngale jatrup achhih hehwah ajekre en.

³²Erenoma, Krista junma Joban ma nenâng map kohthen rãngrãng wathema wathe nâng mînchenmîn, hunmîn, ngale map kohmîn en.

Ifisien 5

Wenphiak nâng Sôngtông



- ¹Nekhunâng Joban ma ate chha rãngrãng nyahrãng hun ehèn, erohwah nekhumin ate rãngrãng dangen.
- ²Ne roandôngko hun achhâmin letma songtongen, chenroh Krista ma nãngnâng hunlahma ate roandôngpa Joban rinheli tum amengli heh rãngkoh arãngrãng ate roandong pa nãngrãngma kohwah, ererãngrãng nekhumin hun achhâmin en.
- ³Nekhua Joban mihnyan, erohwah, nekhu chhangnâng dihiak dela kaamchhih moat, lihân achhihli heh moaka, chhahnyoak, ererãngrãng heh ledangmin. Ererãngrãng pa Joban mihnyan hehmoatli dangmah.
- ⁴Ngale nekhuma jabchhih jabkhab, mihnâng dûmmek jabkhab, ngale ledangli nginchhih heh lephoang jabmin, ererãngrãng jabkhab heh Joban mihnyan hehmoatli jabmin. Erenoma nema Joban nãngba dangkoh a ngatmin.
- ⁵Nema senthemthem jet en, dihiak dela kaamchhih moatte, lihân achhihli moatte, chhahnyoak (chhahnyoak pa moangachaang hehnâng soamtô nãng ngaeka) hehmoatli Krista ngale Joban Hahsông thepa lechohmin.
- ⁶Hennângjô ledangli ngin hehnâng nekdiap chhahrii en; chengrãngma ngako, ererãngrãng heh junko Joban rinkhah pa ate ngin lekepte heh khohnâng hûera.
- ⁷Erohwah arerãngrãng mihnyan heh demnâng chenjô nekjoh mo en.
- ⁸Nekhu dedemin rangnyek khenâng dãngwah, rohkomin nekhu Teso mihnyan rãng dãng phumma, nea wenphiak nãng lâdang tutet. Erohwah nekhumin wenphiak nãng sôngtôngte mihnyan rãngrãng dangletma songtongen,
- ⁹chenrãngma ngako wenphiak pumma jatrup asenli heh kephûera, toangtangma sôngtông ngale apun alemli heh kephûera.
- ¹⁰Chenni ma Teso rin jienme thukmin a erepa jet en.



¹¹Rangnyek khenwah tângte mihnyan heh ma moeka moatlempa nema nekmo en. Ereheh molihma chenmin asenli chohmih. Erenoma thinmin wenphiak nâng loatsiet katwak en.

¹²(Ngin linlinjô, thinma huhmo eka moatlem heh athôrângjô nyahrâng rêsêli.)

¹³Ngale chenthu areheh phangtang wenphiak nâng meloat sietkat thakoba, thin linlin jat apat pa senthemthem ekhe e;

¹⁴chenrângma ngako chenpa senthemthem khe ekia erepa wenphiak nâng khe eki. Erohwah Joban nyapraang nâng aroh ngaeka, “Juplekte heh sat en, ngale ritwah ngaksat en, ngale Krista wenphiak pumma nekhoh nâng ephiak kat hèn.”

¹⁵Erohwah jetletma songtongen. Aba rângrâng nekdangen, chhin achhiak heh rângrâng dangen.

¹⁶Sanpoat roakweih asenli moletma tongen, chenrângma ngako, rângrâng hûera.

¹⁷Erediko aba rângrâng nekdangen, erenoma Teso ma nenâng chenni moatthuk hun ehèn a erepa jet en.

¹⁸Khemjok letma nekmok en, erepumma ne chhihsiet ba ere hèn; erenoma Joban Ju mênchong dangletma tongen.

¹⁹Wathema wathe nâng Joban rangsoamsê, nginsensê, ngale Jobansê hehwah seletma rânjabmîn en; nehung nâng nginsensê ngale Joban rangsoamsê hehwah seletma Teso nâng rô en.

²⁰Teso Jisu Krista mînko chentô rângma Wa Joban nâng roantangma dangkoh a nga en.

Tangnyu Tangwa heh

²¹Krista ranchei letma wathema wathe ngin kepmîn en.

²²Tangnyu heh, Teso ranchei eken rângrâng ne tangwa nginkepkep dangen.



²³Chenrãngma ngako Asâthem heh khohko Krista nãng chaantong eka rãngrãng, tangwa hehnângmin tangnyu heh khohko chaantong eka; ngale Krista pa ate phoang Asâthem heh pângte.

²⁴Erohwah Asâthem heh Krista nginkepkep dangeka rãngrãng, tangnyu hehmin mômâ dede tangwa heh nginkepkep dângmin.

²⁵Krista ma Asâthem hehnâng hunlahma ate roandôngpa Asâthem hehrãngma koheka rãngrãng, tangwa hehmemin ne tangnyu hehnâng hun en.

²⁶Krista ma Asâthem heh ate jabkhab pumma sâsiet ngale erediko joma sâsoan lahma Joban nãng koh eka,

²⁷Atema are moeka pa Asâthem heh atedede nãng phangsên jebjeb - sâpoangpoang ngale achhih aho, ngek atek, ngale lihân chenjô achhih aho thangma kohritrãng moeka.

²⁸Dela hehma mômâ dede phoang nãng hunrieki rãngrãng mômâ dede tangnyu nãng hunmin. Hen delama ate tangnyu nãng huneka erepa atedede nãng hunrieka.

²⁹(Henmejô mômâ dede phoangko chhihchoh riimah. Erenoma, Krista ma Asâthem heh khoakhem eka rãngrãng, nãngma mômâ dede phoangpa phhekchhah heh kohlihma sũare lihma khoakhem eki;

³⁰chenrãngma ngako nãngmin ate phoangko roam eki.)

³¹Joban nyapraangma ngaeka, “Are junko dela pumma ate nyong awa phethien lahma ate tangnyu demko roamsong eka, ngale wanii pa watherãng dângmin.”

³²Joban nyapraang nãng patritli toangtang ngin tonga, erepa ngama Krista le Asâthem nãng thakthô ekang.

³³Rohkomin erepa nenângmin thakthôeka: chentô tangwa hehma mômâ tangnyu hehnâng mômâ dede nãng hunrieki rãngrãng tuta hunmin, ngale chentô tangnyu hehmemin mômâ dede tangwa heh nginkepkep dângmin.

Ifisien 6



Chha heh ngale Nyong Awa heh

¹Chha heh ne nyong ne wa nginkepkep dângpa ne Kristan heh moatlem, chenrăngma ngako, aroh moatpa moatlem pun.

²“Ne nyong ne wa heh nginkepkep dângpa” chenrăngma ngako, arepa Joban ma toamsem lahma khebeng thôn hokum koh ehèn:

³“eroh medang enkoba nedemnâng chentôpa asen tuta edanga, ngale nemin are hahtokkhoh ko roandônglo ehin en.”

⁴Nyong awa heh nememin nechhu nechha heh rin nekkhah thuk en. Erenoma, Kristan niemarang junko rîn akhah nungma hethô letma khêmwak en.

Haa ngale Tângte heh

⁵Haaheh ne tângtewa ran tiichei letma ate nginkepkep dângpa; ngale erepa nema Krista nâng soamtô eki ngama thonghun letma hungsâ rinsâma mo en.

⁶Erepa thinma chensen chohhi ngama thonghun letma, thinma nenâng sokpoatko lolo nekmo en; phumma, Krista haa răngrăn dangletma nehung nerin phangtang kohletma Joban ma chenroh huneka eroh mo en.

⁷Mihnyan nyuchha nâng khoakhem dangmih, Teso nângba khoakhem eki ngama thonghun letma, ne moatlempa haa răngrăn dangletma khuhah nâhah mo en.

⁸Thonghun en, haa medang ekomin, ba haa ledang kikomin, nângma moatlemsen moatthã Teso ma chentô nâng ekohhi.

⁹Tângtewa hehmemin ne haa hehnâng erohjô khoakhem en ngale thin nekchêmsiet en. Thonghun en, nemin ngale ne haa hehmin rangkhethung nâng Tângtewa wathe khennâng tuta, ngale ere Tângtewa pumma chentô nâng khoaktheko thieneka.

Joban Ranloatmîn Chhakhem

¹⁰Athôanko, Teso demnâng roamletma ate ngewah achanthôn chaan junma ne chaan hehmin dongsiet en.



¹¹Joban ma koh ehèn ranloat chhahkhem heh phangtang nesekko kepen, eroh kepletma medang enkoba juchhih ma buthi chhih themawa eka heh lelatnâng etachepen.

¹²Chenrãngma ngako nãnga mihnyan nyuchha demnâng loatmîn dangmih, rohkomin, are rangnyek hahtokkhoh kowah pête, thôte jabte, hang achaaan heh, erediko rangkethung wah juchhih heh demnâng loatmîn eki.

¹³Eroh wah athângheh Joban ngewah ranloatmîn chhahkhem heh phangtang nesekko kepen! Eroh medang enkoba chenthu rangwo chhih mehû theko, ngale ran heh ma lônghok poatko nema eta loatmîn en; ngale athôn kotuk loatmîn dikomin nea rongtêngtêng eta dangen.

¹⁴Eroh wah chep achã letma tongen, toangtang pa ne roamko roamdit rãngrãng dit en, ngale ne thenkhuhko jankha rãngrãng khiapen,

¹⁵Ngale nema dapheng pheng eken rãngrãng mêmô Nginkongsen heh phengen.

¹⁶Sanpoat roakweih putedâlem pa lakkha rãngrãng kepen; chenrãngma ngako, erepumma ba juchhih heh ma nenâng wendô rãngrãng latchhân ma hap ehènpa tâtâng watphemin.

¹⁷Ngale Khope pa jankhophok rãngrãng phok en, ngale Juma koh ehèn Joban Jabkhab pa deng rãngrãng kepen.

¹⁸Are chentôpa rangsoam nungma mo en, ngale Joban wah chohsokrãng tha en. Juma chenroh chien ehèn a eroh sanpoat roakweih rangsoam en. Erejunko jetlet mejû dangen ngale rangsoam letmejû tongen; roantangma chentô Joban nãng putedâlemte mihnyan hehrãng rangsoam koh en.

¹⁹Ngama nginthôrãng chepko Joban ma Nganâng chenchoh thôkat kohhang ma ngarãngmin rangsoam kohha, erohkoba Ngama lechei thangma nginkongsen kowah patritli nginpa eta jetthukwak ang.



²⁰Athângheh Nga phâtek khennângjô medang angkomin, Nga a nginkongsen phoangthô chhoan moatlem moatte. Erohwah Ngama nginkongsen pa lechei thangma chenta thôchhoan ang ngama rangsoam kohha.

Athôan Salem

²¹Nãngma nyahrãng huneki nãngnaa ngale Teso moatlem nãng nyahrãng hungkoh lahma haa rãngrãng danglahma moatte Tikikas ma ngangin heh phangtang nenâng ethôkoh hèn, erohkoba ngama chenni moaka ekanga ereheh nema ejet en.

²²Erohwah Ngama netânâng ate chienkat erâng-nikhuma chenni moekia ereheh atema nenâng thôko lahma nekhu hung chendongsiet hen ngama chienkat erâng.

²³Nãng Wa Joban ngale Teso Jisu Krista ma chentô Kristan hehnâng mêmo, hun achetmîn, ngale putedâlem chaan chenkohhèn.

²⁴Joban wah mînchenchaan pa henhenma nãng Teso Jisu Krista nãng leta mahli hunma huneka ereheh nãng chentonga.



Filipien

Filipien 1

¹Pol ngale Timothi Jisu Krista haa ngewah — Filipien wah Jisu Krista demnâng roamlahma chentô Joban nâng putedâlemte mihnyan heh, ngale Asâthem heh khhepho phannang erediko Asâthem hehnâng chohsokte hehnâng raangeka:

²Nâng Wa Joban ngale nâng Teso Jisu Krista ma nenâng mînchenchaan ngale mêmô chenkohhèn.

Pol ma Ate Siti Weihte hehrâng Rangsoam

³Ngama nekhuh thônghun roakweih Nga Joban nâng dangkoh a rângnga ang;

⁴ngale Ngama nekhurâng rangsoam koh roakweih, khuhah nâhah danglekma soamkoh eka

⁵chenrângma ngako, nekhuma khebeng rangwo jâma chohsutha wah athâng hehmin ngama nginkongsen pa phoangthô kohko nema chohsû eha.

⁶Ngale Joban ma are moatlemsen nekhuh demnâng bengmo ekapa Jisu Krista ngakkatjâ rangwo tôkotuk emothuk hèn ngama putedâlem ekang.

⁷Ngama roantangma nekhuh ngahung nâng thônghunjû! ngale Ngama nekhuh aroh thonghun ekapa thônghunli lemnâng jôba thonghun eka. Chenrângma ngako nga athângheh phâtek khennâng tângpoat komin, ngale nginkongsen pa rôngsietrâng phoangthô poat komin Joban ma nganâng kohthang mînchenchaan ko nekhuh johroam eha.

⁸Ngarâng hâkhi Joban tonga, ngale Ngama toantang thôekang, Ngama nekhuh khe nyahrâng huneka, ngale Jisu Krista ma hun rângrâng jôba Ngama nekhuh nâng huneka.

⁹Nga rangsoam pa nekhuh hun achet mînpa ajahjah chendangen, ngale ere hunmîn nginpa linlin jetletma rongtêngtêng chenhunmîn en ngama soam ekang.



¹⁰Eroh koba nekhuma chenpa asen a erepa ejienren en. Eroh koba chentô angek atek hehwah sâletma Krista ngakkat jâko chhih ngatthin aho edangen.

¹¹Ngale nekhu roandôngko Jisu Krista ngewah asenli moatlem heh echoh en, ngale nema eroh moletma Joban mînpa sensit letma edongthuk en.

Ahîn pa Krista rãngma Hînmin

¹²Ngalemruchha heh, Ngama nekhu nâng jetthuk huneka, nganâng chenni dangthanga erepumma linlinjô nginkongsen pa jahsiet eka.

¹³Ere junkowah, humbemte sipâhi heh phangtang ngale ahan hehmemin chentôma Nga a Krista haa dângjunko phâtek nâng khhekthien ehang ngama lâjettah.

¹⁴Ngale Nga phâtek nâng tongekang junko ajâhthem putedâlemte mihnyan heh ma Teso nâng senthemthem lâputedâlem waktah, ererohwah sanpoat roakweih thinhung dongsiet lahma Joban nginkongpa lechei thangma phoangthô wakeka.

¹⁵Khaka heh ma thin a mihphet mihwan danglahma Krista nginkongpa phoangthô tadangthem a, rohkomin khaka heh ma linlin hungsen rinsen ma phoangthô eka.

¹⁶Ere mihnyan heh ma thinma hunlahma phoangthô eka, chenrãngma ngako, Joban ma Nganâng nginkongsen pepâng moatlem mothuk ehang ngama thinma ajet.

¹⁷Khaka heh ma Krista nginkongsen ko senthemthem hungkoh lahma phoangthô dangmah, thinmînsên pa lolo thonghun lahma phoangthô eka; thinma Nga phâtek nâng tângpoatko ajah chêmthuk e ngama thonghun eka.

¹⁸Eroh akomin chenjô dangmah! Ere rãngmemin Nga khuhah ekang - achhih ngema dangkolah asen ngema dangkolah rongrup ngema Krista nginpa phoangthô peba hun ekang. Ngale Nga roantangma khuhah nâhahjû edangang,

¹⁹chenrãngma ngako, Ngama jet ekang, nekhu rangsoam junma, erediko Jisu Krista Juma chohsok junko Nga eta pechhoan ang.



²⁰Ngama hungkhen wah thonghun lekma putedâlem ekang, ngama chenthumin Krista nginpa lephoangthô ledangmin, sanpoat roakweih, ngale ajahthem pejô athângheh sanpoatko, Nga chenni ranjô lechei edangang, erohkoba Nga ahînma medang angkomin ba ritjô mere angkomin Nga roandông dôngtangko Krista mîn edongsiet ang.

²¹Roandông pa chennia? Ngarãngma dangeka, ahîn medang angko Krista rãng hinekang, ngale rit mere angkomin erenoma ajah asen.

²²Rohkomin ahîn medang angko Ngama Krista rãng ajah kaamsen etamo ang, phumma ngama are wannii kowah chenpa ren anga erepa jetmek.

²³Nga ronghu rongkama tesiet ehang. Ngama are roandôngpa phethien lekma Krista demnâng johtong wângpa nyahrãng hun ekang, ere pejôba ajahthem asenthôan;

²⁴rohkomin nekhu rãngma Nga ahînma tôngpa nyahrãng alemthôan dangeka.

²⁵Ngama ajet nekhumma nga nyahrãng lemeha, ngale Ngama ajet nga ahînma elektong ang. Ngama nekhu putedâlem pa dongsiet lahma khuhah nâhah dângthukrãng nekhu chentô demnâng ejohtonga,

²⁶erohwah chenthu Nga netânâng mengak hûthangko, Nga junma nekhu Jisu Krista demnâng nyahrãng khuhah nâhah edangen.

²⁷Ngale ade dangeka, chentô noma alemli thôn pa, nekhu roandôngpa Krista nginkongsen ma chenroh huneka ererãngrãng dangen, erohkoba Nga nekhu tânâng lehûrâng komin, ba mehûrâng komin, ngama nekhu hung jutletma mǎntheko rongtêngtêng putedâlem eken, erediko aroamma nginkongsen rãngma roamlatrii eken ngama etat ang.

²⁸Neran hehran nekchei en; roantangma hungdong rindong dangen, erohkoba thin a nenâng jienrii lahma ekhe e, chenrãngma ngako, nenâng Joban ma jienthuk ehèn.

²⁹Chenrãngma ngako, nekhu nâng Krista nâng soamtô thuk ehènpa, Krista nâng putedâlem lolo dangmah, ate rãngma chêmchei min chohmin.



³⁰Athângheh nekhumin Nga demnâng ran tajohchep ha. Arepa khemako nema Nga ranloatmîn lekma khetha rãngrãng jôba, ngale athâng hehmin Nga ranloatmîn ekangpa nema tat eken.

Filipien 2

Krista Hungnoap Rinnoap ngale Adongdâng

¹Ne roandôngpa Krista demnâng dângjunko nekhu rong eken, ngale atema hun achet pumma nekhu asen dangeken. Nekhua Joban Ju demnâng roam eken, ngale nekhu wathema wathe nâng mînchen hunmîn eken.

²Erohwhah Ngama nekhu nâng rosep eka, nekhumã mãnthethin ko tuta thonghun en, ngale mãnthe dangletma hunmîn, ngale hungthe rinthe tuta dangletma Ngakhu hahthuk ha.

³Chenni min mâmâ dede mînsênrãng ngama thonghun letma nekmo en, wathema wathe demnâng numnene dangen, ngale roantangma nedede noma mihhan ba asen ngama thonghun en.

⁴Ngale nedede rãng lolo ledang, wathema watherãng sekmah mînkoh en.

⁵Ngale ne jat apat pa Jisu Krista jat apat rãngrãng dangen:

⁶Atea roantangma Joban rãngrãng dângwah, rohkomin atema metkep Joban demnâng tôde jôba dângmin ngama thonghunho.

⁷Erenoma, atedede hungsima ate ngewah chentôpa kohwah, ngale atea haa rãngrãng dângwah. Atea mihnyan nyuchha rãngrãng dângwah ngale mihnyan khoakhoak dângwah.

⁸Atea numnene danglahma rit kotuk nginkepkep ritwah-atea bãngphak khoko rittekwah.

⁹Erohwhah Joban ma ngakhinsiet lahma rangkho choangthôanko tongwãng thukka, ngale atenâng mînhân heh noma mîndongthôan koheka.

¹⁰Ngale erohwhah Jisu mînkô rangkethung wah chentôma, ngale hahtokkhoh wahmin chentôma, erediko hahkhen wah chentôma thin dakuh tholahma soamtômin,



¹¹ngale chentôma Jisu Krista pa Teso ngama eloatjab a, eko Joban Wa mînpa dongsiet erewak a.

Hahtokkhoh ko Wenphiak Rângrâng Phiak

¹²Lemruchha heh, erohwah, Nga nekhuh demnâng dângpoatko roantangma nema Nga nginkepkep dangeken rângrâng, Nga nekhuh demwah ataangnâng dângpoat komin nema Nga nginkepkep dângpa alemli thôn. Ne khope moatlempa Joban ran tiichei letma mo en,

¹³chenrângma ngako, nekhennâng Joban ma roantangma mo ehèn, ngale ate nginkepkep dangletma ate rimmeli moatlem chenmo en ngama Joban ma chohsû ehèn.

¹⁴Chentô moatlem pa lesileni ngale lechhiakmîn ma mo en,

¹⁵eroh medang enkoba nea Joban chhuchha rângrâng chenni achhihjô aho sâpoangpoang edangen, chenrângma ngako nea hahtokkhoh chhih kowah papi mihnyan heh demnâng songtong eken. Rangkhopa merit ma chhumphiak rângrâng thinkhu chhangko nema phiak en,

¹⁶nema thinnâng roandông khope choh nginkongpa chohkoh eken. Nema eroh memo enko, nejunma Krista ngakkatjâ rangwo ko Nga eta rânghôrii ang, chenrângma ngako, erepumma Ngama latrii lekma motek heh mahto nâng dangmah ngama ekhesok a.

¹⁷Ne putedâlem junko ne roandôngpa Joban nâng koh eken demko, Nga roandông hei pemin joapsoap râng rangtêmmin kohwah rângrâng nedemnâng ejoh danga. Eroh medang ako, Nga rin eroan ang ngale erepa nekhuh anga nga demnâng ejohroan a.

¹⁸Ererângrângjô, nekhummin rinroan en, ngale Nga demnâng johroanha.

Timothi ngale Ipafoditus

¹⁹Arepa Teso hungsi medang ako, Ngama netânâng Timothi sitsiak eta chiekkatrâng ngama thonghun ekang, erohkoba nekhuh nginkong heh chohtat lekma Ngahung edongang.



- ²⁰Ngama hun ekang rãngrãng thonghun lahma nerãng sekma patritte
Timothi rãngrãng ahan henjô aho.
- ²¹Ahan hehma mâmâ dede rãng sekma patrii eka, Jisu Krista moatlem
rãngma henjô sekma mah.
- ²²Rohkomin Timothi pa chen rãngrãng mihnyan a erepa nededema
senthemthem jet en, ngale nginkongsen phoangthôko Timothi chenii wa
achha rãngrãng danglihma aroam roamma moeki.
- ²³Nga khohnâng chenni hokmin a erepa Ngama mejet tekko sitsiak netânâng
ate echienkatrâng.
- ²⁴Ngale Ngama Teso nãng putedâlem ekang, Ngadede min netânâng sitsiak
ekarâng ngama.
- ²⁵Nãngnaa Ipafoditus pa netânâng ngakchienkat pa alemli ngama thonghun
ekang, atea Nga demnãng johmoatte dãngwah, ngale Nga demko sipâhi
rãngrãng danglahma johmoatwah. Nema atea Nganãng chohsok rãngma
chienwênwah.
- ²⁶Atema nekhua nga nga khe nyahrãng hun ehèn, ngale nekhuma atea akhun
ngama tatphumma atea nyahrãng hungchhih eka.
- ²⁷Linlinjô atea akhun rewah, ngale riinemwah peka. Rohkomin Joban ma
atenãng nyahrãng mìnchen eka, ngale atenãng lolo ledang Nganãngmin
mìnchen ehang, ngale nyahrãng hungchhih thin adong kowah pesiet ehang.
- ²⁸Erohawah Ngama ate netânâng chienkat pa nyahrãng hun ekang, erohkoba
nema ate chohkhe letma kuhah nãhah engak dangan, ngale Ngadede
hungchhih hehmin ejek a.
- ²⁹Erohawah, Teso nãng putedâlemte rãngrãng ate kuhah nãhah tãngroo en.
Ngale ate rãngrãng mihnyan heh chentô nãng eroh hun achhâ en,
- ³⁰chenrãngma ngako, Krista moatlem rãngma ate roandông kohlahma
moatwah, ngale riinem wahmin lâpetah. Erepa nekhuma Nganãng leta
chohsuli pa atema chohsû thang.



Filipien 3

Alinlin Toangtang

¹Ngalemruchha heh, athôanko, Teso demnâng roamletma khuhah nâhah dangen. Ngama khemako nenâng raangtah ngin heh ademin nekhu nâng wîenthe depraangrăng nga jôriimek, chenrăngma ngako Ngama eroh methe depraang ako erepa nekhu răngma asen edanga.

²Kaamchhih moatte mihnyan hehwah jetletma tongen, thin a hu răngrăng, thinma phoangnâng khen niem pa hânmin jôba ngama ngawak eka.

³Linlin khoankhen niem hôante pa thin dangmah, nimaba hâneki, chenrăngma ngako, nima Joban nâng ate Ju junma soamtô eki, ngale Jisu Krista demnâng roamlihma niroandôngko khuhah nâhah danglihma tongeki. Nima rangkhoh khoannâng khenlihma niemhân ko putedâlem mih.

⁴Ererăngrăng ko Ngama ba tâputedâlem min dangwah. Phumma nekhuwah henma akomin ererăngrăng rangkhoh khoankhen niemhân nâng meputedâlem enko, Ngama jâtanga nenoma ajah tâputedâlem thin tonga.

⁵Nga jâeset jâko khoankhen niem pa hânwah. Ngale Nga achhat mejû Isrial mihnyan, Benjamin jatwah chhatwah, ngale Hîbru hei linlin wah chhatwah. Jews heh Niemarang jun komin Nga Farasi,

⁶ngale Ngama asâthem hehnâng nyahrăng nyoak chêmthuk wah. Niemarang kep junma mihnyan pa Joban demnâng toangtang jiendângli dângnomeko, Nganâng chenjô achhih aho dângwah.

⁷Rohkomin areheh poattheko Ngarăng nyahrăng alemli thôn ngama thonghuntek heh, ade phumma Ngama Krista mînko achhih ngama phe ekang.

⁸Ereheh lolo ledang; chentô noma adongthôn Nga Teso Jisu Krista jetrăngma chentôpa achhih ngama phe ekang. Erediko ate junma Ngama chentôpa phe ekang; ngale Ngama Krista tâchohrăng chentôpa setru kaja tôko thonghun ekang



⁹ngale ate demnâng senthemthem johroam ekang. Ngale Ngama Niemarang kep junko Nga toangtang dangmek. Ngama athângheh Jisu Krista nâng putedâlem junko toangtang dangekang, erepa Joban ma putedâlem junko koheka.

¹⁰Ngama Jisu Krista ngale ate ritwah ngakhinwâng chaanpa loloba chohjet hun ekang, erediko ate chêmteh rângrâng chêm lekma ate rângrâng rithun ekang,

¹¹eroh medang angkoba Ngamin ritwah engakhin ang ngama dâlem ekang.

Nângma them eki Theko wâng

¹²Ngama thonghun ekang theko lâhû wângtek, ba Joban ma huneka rângrâng lâdangtek ngama thonghunmek. Rohkomin eretheko hokwângrâng latrîi ekang, chenrângma ngako, Nga Krista ma aterâng lâkephang.

¹³Ngalemruchha heh, linlinko ngama lâchohtek ngama thonghunmek; rohkomin Ngama wanthe moatlem moekangpa, Nga tokdi kowah heh lekphe lekma, Ngama wah heh leloat rângrâba thonghun ekang.

¹⁴Erohwhah Ngama thonghun ekang thepa chohrâng tintin chhoanwâng ekang, erepa Jisu Krista junma Joban ma rangkho wah roandông chohrâng rooehang.

¹⁵Nângkhu anga nga Junâng hungchit phannang rângrâng dângte hehma aroh mântheke tuta mamthông hunmin. Rohkomin nekhuwah henma akomin mâmâ methong hun enko, erepa Joban ma epunsiet hèn.

¹⁶Erepa chenrohjô medang akomin, nângkhu anga nga athuwah rângrâng mânthe tuta mamdang lihma amanâng wânge.

¹⁷Ngalemruchha heh, Ngangin heletma Nga rângrâng tuta dâng. Nima nenâng khesoktah rângrâng songtongte mihnyan heh rângrâng dâng.

¹⁸Ngama are nginpa nenâng amakomin ajahtem thôkotah, ngale athâng hehmin Ngama mitphi jâlekma thengak thôkoh eka: Chenrângma ngako, melâng mihnyan hehma thin roandôngko Jisu Krista bângphak khoko ritpa thinran rângrâng hôan eka.



¹⁹Thin a chenthumin lemutte pap wendô nâng ekhamrii kawak a, chenrângma ngako, thinrângma joban pejô thin hei angem ma hun ekapa kepeka. Thinrângma chenre pa rêsêlia erepa rânghôeka, ngale are hahtokkhoh wah sêmmak heh rângholo thonghun lahma tongwak eka.

²⁰Rohkomin nângkhua rangkethung nâng tângte mihnyan, ngale nângma nâng Teso ngale nâng Pângte Jisu Krista rangkethung wah katpa nyahrâng bemlaeki.

²¹Atema nâng mihnyan hei angem phoangpa atedede phoang rângrâng elitsiet a, ngale ere chaanpa keplahma atema chentôpa epên a.

Filipien 4

Rîn Akhah

¹Ngalemruchha heh, erohwah, Ngama nenâng chentô huneka, ngale Ngama nekhu chentô khehun eka! Nekhuma Nga nyahrâng khuhah thuk eha, ngale nekhu junma Nga nyahrâng thhensân ekang! Ngama nyahrâng hun lemrucho heh, arohjô ne roandôngko Teso demnâng roamletma rongtêngtêng mamdangen.

²Iuodia ngale Sentiki, Ngama nechhe nâng Teso mînko nya anaa rângrâng thonghunmîn letma mamsenmîn en ngama rosep eka.

³Ngale Nga demnâng toangtangma roammoatte, nangnâng min are dihiaknyu hehnâng mamchohsûo ngama rosep eki; chenrângma ngako, thinmemin Ngademko nginkongsen pa johphoangthô thang, thin demko Klement min dângwah, ngale Ngademko roammoatte ahan hehmin dangwah, thinmîn hehmin ahîn titabko raanglahma tonga.

⁴Teso demnâng aroamma dangletma roantangma khuhah nâhahjû dangen. Ngama erepa ademin thethôkoh eka: khuhah nâhah dangen!

⁵Anga nganâng numnene dangletma khesok en. Teso sitsiak lêngakka era.



⁶Chenni rãngmejô neksekma en, nema chenni lemeken a erepa Joban wah rangsoam letma tha en, roantangma atenâng nehung khenwah dangkoh a ngaletma tha en.

⁷Ngale mihnyan nyuchha ma lelep thonghunli Joban wah mêmo pumma nehung nerin ngale ne kheri heh Jisu Krista demnâng asen ethienhèn.

⁸Ngalemruchha heh, athôanko, nehung nerin ko asenli ngale arôli heh thien en: ereheh dangeka, toantang, asâli, apunli, ahunli, ngale kep aloatli heh.

⁹Nema Nga jabkhab ngale Nga moatlem kowah chenni chohhetha ererãngrãng mo en. Ngale erohkoba nãngnâng mêmo kohte Joban pa nekhu demnâng etonghèn.

Hînhô Rãngma Dangkoh a Ngat

¹⁰Ajahthem rangwo diko nema Nganâng thonghun letma ademin rekthe Ngarãng sekma patrii letma khesokdi nga roandôngko Teso demnâng roam lekma nyahrãng khuhah nâhah dangekang. Arepa nema Nganâng chohsokpa jek eken ngat dangmek - nema Nganâng chohsokrãng sanpoat jôba lechoh dângwah.

¹¹Ngale nema nganâng lechohsû thangma thien junko ngat dangmek, chenrãngma ngako, Ngama chenni chei ekanga ere demko chenroh rinnêmê jientôngmin a erepa Ngama lâhetek.

¹²Chenthu Nganâng chenjô aho dângpoatko chenroh tôngmin a, ngale Nganâng ajah dângpoatko chenroh tôngmin a erepemin Ngama lâhetek. Ngama arepa jet junko chenriang nângmin, ba chenre sanpoat komin, Nga rêmrit komin, ba wokphoat komin, ba Nganâng ajah metong hangkomin ngale amãnhhajô metong hangkomin, Nga rinneme ejien tongang.

¹³Jisu Krista ma Nganâng chaankoh junko chentô sanpoat roakweih Ngama asenli tamo ang.

¹⁴Rohkomin Ngama chêmchoh poatko nema Nganâng chohsû thepa asen dangeka.



¹⁵Filipien diakwah mihnyan heh nekhuma senthemthem jet en, amanâng Ngama Nginkongsen phoangthôkoh rãng Mesidonia diakwah loatchhoantek diko nekhu lolo jôba Nganâng chohsokte asâthem dângwah; ngale nekhuma lolo jôba Nganâng chohsokdi rangkep eken.

¹⁶Chenthu Nga Thisalonika nâng dângpoatko Ngama chenni lemekanga ereheh nekhuma depdep matkat letma chohsûtha.

¹⁷Erepa Ngama nekhuwah hînhô chohhun junko dangmek; rohkomin nekhuma koh amien junko rang chenkep en ngama huneka.

¹⁸Nema Nganâng rongrup kohtha heh Ngama phangtang lâchohtek - ngale Ngama lemekang nomemin ajah choh ekang! Ne ngewah hînhô heh Ipafođitus ma Nganâng katkohthang, erohwah Ngama chentô lemtek a ere chentôpa lâchohtek. Newah hînhô heh Joban nâng tummêngmêng soam aroakwah rãngrãng. Ererãngrãng soam aroakpa Joban ma kepeka ngale ererãngrãng heh demnâng Joban rinme eka.

¹⁹Ngale Jisu Krista junma atea techhu danglahma Nga Joban ma nekhu nâng nema chentô lemeken a ereheh phangtang ekohhèn.

²⁰Nãng Joban ngale nãng Wa mînpa roantang roangjêng rãng adong chendanga! Amen

Athôan Rin Akhah

²¹Krista mînko Joban nâng putedâlemte mihnyan anga nganâng salem koheka. Nga damwah putedâlemte mihnyan hehmemin thin salem nenâng matkat ehèn.

²²Joban nâng putedâlemte mihnyan anângwah chentôma salem matkat ehèn, ajahthem pejô Chofa hum kowah tângte hehma matkat ehèn.

²³Teso Jisu Krista mînchennaan nekhu chentô demnâng chentonghèn.



Kolosien

Kolosien 1

¹Joban hungsi junko Jisu Krista moattat chhoante Pol, ngale nãngnaa Timothi ngewah-

²Kolosien hahwah Joban nãng putedâlemte mihnyan, ngale Krista mînko toangtang lemruçha hehnãng raangeka: Nãng Wa Joban ma nekhu nãng ate mînchennaan ngale mêmò chenkhèn.

Dangkoh a Ngat Rangsoam

³Chenthu nima atenãng rangsoamko, roantangma nãng Teso Jisu Krista Wa Joban nãng dangkoh a rãngngae.

⁴Chenrãngma ngako, nema Teso Jisu Krista nãng putedâlem eken le, nema chentô Joban nãng putedâlemte mihnyan hehnãng hun achhâ eken heh nima chohtattih.

⁵Chenthu toangtang nginkong, Nginkongsen pa netãnãng khebengrãng benghûtha poatko, ere Nginkongsen pumma koheka dâlem nginpa nema chohtattet. Erohwah, nema erengin khohko dâlem eken, ngale hun achhâmîn eken, erepa nekhrãng rangkhethung nãng senthemthem thienkoh ehèn.

⁶Nginkongsen junko hahtokkhoh ma rangkep eka, ngale phangtangma khêmstat eka, ererãngrãng nekhu demnãng min dangeka, nema Joban mînchennaan nginpa khebengrãng bengchohtattet jâma erepa linlin ngama jet eken.

⁷Nema Joban mînchennaan pa nãngma nyahrãng ahun nãng lemru Krista haa, ngale nãngrãngma nyahrãng hungkoh lahma Krista moatlem moatte Ipafras ngewah chohhe eken.

⁸Joban Juma nenãng hun ehèn nginpa atema ninãng thôkohthi.

⁹Erohwah chenthu nima ne ngin chohtat tihwah roantangma rangsoam koheka. Ngale Joban ma ate hungkhen wah huneka heh nenãng chenjet



thukhèn ngama rosep eki, erediko ate Juma nenâng chentô buthi mongthem heh chenkohhèn.

¹⁰Erediko ba Teso ma chenroh huneka eroh eta songtongen, ngale ate rimmeli etamo en. Ngale ne roandôngko rongrup moatlemsen heh etamo en, ngale nema Joban jetletma ejien songtongen.

¹¹⁻¹²Ate ngewah chaan pumma nemin chenchaaan thukhèn, erohkoba nema rongruppa hungmông rinmông dangletma etadô en. Ngale khuhah nâhah dangletma dangkoh a ngama Wa Joban nâng ngatmin, Joban ma atenâng putedâlemte mihnyan hehrângma ate wenphiak Hahsông theko thienkoh eka heh nenângmin tachohthuk ehèn.

¹³Atema rangnyek chaan kowah pepâng lahma atema nyahrâng ahun ate Chha Hahsông theko senthemthem sietwên ehi,

¹⁴ngale atema nângkhu pesiet ehi, ngale ate junma nângpap heh map choheki.

Krista Moatlem

¹⁵Krista pa mitma lekhe Joban phoangrãngrãng. Ngale atea Joban khhepho Chha, chentô tem atiek tahheh wah atea adongthôn.

¹⁶Chenrãngma ngako ate junma Joban ma rangkhethung ngale hahtokkhoh wah chentôpa tēm atiek wah, mitma lekheli ngale mitma kheli, erediko ju ngenâng chaan kepte, teso, pēnte, ngale thôte jabte hehmin atema tēm atiek wah. Joban ma hahtokkhoh phangtang ate junma ngale aterãng tēm atiak wah.

¹⁷Krista pa chentô noma amama dângwah, ngale ate demnâng roamlahma jôba chentôpa māmâ thethe chohwak eka.

¹⁸Atea Asâthem hehrãngma atedede phoang kowah khophang rãngrãng; phoangpa ate junma hin eka. Atea Joban khhepho Chha, ngale ritwah ngaksat eka, erohwah atelolo jôba chentô noma adongthôn.

¹⁹Chenrãngma ngako, Joban ma atedede hungsi ma ate Chha sekkhen nâng Joban chaanpa phangtang chentonga ngama hunwah.



²⁰Erohwah, Chha junma Joban ma hahtokkhoh phangtang ate tânâng ngaksiet hokrăng thonghun eka. Joban ma ate Chha hei junma nome thukeka ngale hahtokkhoh wah hehmin erediko rangkhethung wah hehmin chentôpa ate tânâng ngaksiet hûeka.

²¹Nema achhihli heh thonghun letma kaamchhih moatjunko sanpoat poatthe Joban demwah ataangnâng dângwah, ngale ate ran dangletma dângwah.

²²Rohkomin ade phumma, ate Chhama roandông kohlahma ritjunma, Joban ma nekhumin ate tânâng Sâpoangpoang, khinbaangbaang, ngale chenjô lethe thangma siethokrăng nea ate lemruçhha rãng hân ehèn.

²³Erohwah, nekhuma rongtêngtêng senthemthem putedâlem en. Ngale chenthu nema Nginkongsen chohtat letma dâlemtet a erekowah nekphôngtu en. Are Nginkongsen rãngma Nga Pol min haa rãngrãng dangekang - are Nginkongsen pa hahtokkhoh ko chentô nâng phoangthô koheka.

Pol ma Asâthem heh Haa Rãngrãng danglahma Moat

²⁴Ngale Nga nekhurãng chêmrit ko khuhah ekang, chenrãngma ngako Nga phoang nâng chêmrit junko Krista ma ate phoang Asâthem hehrãngma lelaang chêmrii bâthientah heh Ngama laangchêm ekang.

²⁵Ngale Joban ma Nga Asâthem heh haarãng dangthuk ehang, ngale atema are moatlempa nekhurãng chensen a ngama mothuk ehang. Are moatlempa ate nginkongsen pa lolo phoangthô moatlem.

²⁶Are patritli nginpa tewa rôanpa wah mihnyan hehnâng phangtang nâng lejetthuk thangma huhthienwah, rohkomin ade phumma erepa atenâng putedâlemte mihnyan hehnâng jetthuk eka.

²⁷Joban ma thonghun ekapa atenâng putedâlemte chentô mihnyan hehrãng atema thien kotah are nyahrãng patritli nginsen pa ate mihnyan hehnâng jetthukrãng huneka. Ngale ere nyahrãng patritli nginsen pa dangeka, ne sekkhen nâng Krista tongka ehèn, erohwah nekhumin Joban mîndôngko ejohroam en.



²⁸Erohwah nima Krista pa anga nganâng phoangthôkoh eki. Ngale nima chentô buthi mongthemsen heh keplihma chentô mihnyan hehnâng phoanghethô eki, erediko nima chentô mihnyan heh Krista demnâng aroamma Joban tânâng Junâng hungchit phannang rãngrãng siethokrãng moeki.

²⁹Are moatlempa tâmoatrãng, Krista ma chohkoh ehang achaanthôn chaanpa ngasek khenko moatjunko ngama ere chaanpa keplekma latrii moekang.

Kolosien 2

¹Ngama nekhurãng erediko Laodika wah mihnyan hehrãng ngale ahan Nganâng senthemthem lejetta hehrãngma chentô chaanmo tek a ereheh nenâng thôkoh a.

²Ngama arepa thin hungdong rindong danglahma hun achetmîn chenrewak a ngama moekang, erohkoba thinma toangtangma jetlahma senthemthem eta putedâlem wak a. Eroh koba thinma Joban wah patritli nginpa eta jet a, ere patritli nginpa Krista ngin.

³Atea Joban hungkhen wah chentô buthi mongthem huhriem eka heh laangthin sâbi rãngrãng.

⁴Erohwah Ngama nenâng thôkoh eka, thinma chentôjô mesenthô akomin thinnâng nekmoksietrii en.

⁵Chenrãngma ngako, Nga nedemnâng phoangphoangma ahojô medan ang akomin, Nga Jupa ne demnângjû, ngale nekhu aroamma Krista nãng rongtêngtêng putedâlem letma khe phumma Nga rinroan ekang.

Krista Demnâng Roandôngsen

⁶Nekhuma Jisu Krista pa nekhu Teso ngama lâkeptet, eroh ate demnâng roamletma songtongen.

⁷Bãngrin luwakwak sut arãngrãng nema atenâng rongtêngtêng tok anaa letma tongen, ngale ne roandôngpa ate khohko hân en, ngale nenâng hethôtah



rãngrãng ne putedâlem nâng rongtêngtêng dangen. Ngale roantangma dangkoh a nga en.

⁸Erediko, jetletma dangen, ngale mihnyan nyuchha hung arinwah sekhota buthi mongthem heh junma henmemin haa rãngrãng nekchenkep ehèn, ereheh dangeka, mihnyan nyuchha ma hethô wah ngin, ngale are hahtokkhoh pêteju ngewah, ereheh Krista ngewah dangmah.

⁹Chenrãngma ngako, ate numnene dângjunko chentô Joban jat apat heh phangtang Krista sekkhenko tongka eka,

¹⁰ngale Krista demnâng aroamma dângjunko ne roandông komin chentôpa koh ehèn. Atea chentô Ju ngenâng pête ngale thôjabte hehwah adongthôn.

¹¹Krista demnâng aroamma nemin khoankhen niem lâhôantet, erepa mihnyan nyuchha dekma hôaneka khoankhen niem pa dangmah, erepa Krista ma hôaneka khoankhen niem, erejunko sekkowah papmoat chaan wah pesiet ehèn.

¹²Chenrãngma ngako chenthu nema baptijem kepko, nea Krista demnâng johrit re eken, ngale baptijem kepko Krista ritwah ngaksatsiette Joban chaanko nema putedâlemdi nemin Krista demnâng johngaksat eken.

¹³Nemin sanpoat poattheko Junâng riiletma dângwah, chenrãngma ngako, erepa nepap ngale nea Joban Niemarang aho thangma Jews ledangte jat dângwah. Rohkomin, ade phumma Krista junma Joban ma roandông lâkephû kohthen. Joban ma nãngpap chentô heh map lâkohthi;

¹⁴ngale nãngma Joban ngin lekep thangma kaamchhih moatthã nãng lelatnâng chentô thãpê raangthien tahheh, erediko niemarang heh atema lâmahsiettah, ngale erepa atema bãngphak khoko sema lânamtektah.

¹⁵Ngale ere bãngphak khoko Krista ate dedema hahtokkhoh pête ngale chaan ahang kepteju hehwah pesietrii eka; ngale atema jienlahma thin a hahtokkhoh phangtang nâng khhekritte rãngrãng hân lahma khesok eka.



¹⁶Erohwah, nema jokphhek chhah eken junma, ba lihân pientông rangwo, ba Dânyan Lokuh Chhahwa erediko Pientông rangwo rãngma henmemin niemarang pa nekchen hôankoh ehèn.

¹⁷Are chentôpa khediko chenni dângwâng min a ere dâpha peba khesok eka; Krista ba alinlin pa.

¹⁸Athânkhe junko adong ngama thônghunritte, ngale ahôanma diapnumritte, erediko Joban ngintatte hehnâng soamtô rãng chiente hehnâng nekmokwânrii en. Chenrãngma ngako, ererãngrãng mihnyan heh thin hei angem hung arin junma thonghun lahma chhihsietrii eka

¹⁹ngale thinma Krista nâng putedâlem pa jek eka, Krista pa mihnyan phoang rãngma khophang rãngrãng, phumma thin phoangpa thin khophang ko lechoat thangma tongwak eka. Krista khenko jôba phoangpa asen ma tongeka, ngale chentô rokchî rächî hehmin rongtêngtêng chohmîn eka, ngale Joban ma chenroh huneka eroh dongwãng eka.

Krista Demnâng Roamrit ngale Roamhîn

²⁰Nea Krista demnâng lâjohriitet, ngale are hahtokkhoh pêteju hehwah lâpetet. Eroh medang enko, chenrãngma nea are hahtokkhoh mihnyan heh rãngrãng dangeken a? Nema arerãngrãng niemarang heh chenrãngma kep eken a

²¹“Areko neksem,” “Arepa nekphhek chhah,” “Areko neksahlo”?

²²Are chentô ngaeka pa rekthe mekep tihko chhihjâ thin sêmmak hehnâng ngaeka; ere niemarang heh mihnyan nyuchha ma hôanlahma hethôeka.

²³Are niemarang heh mihnyan nyuchha buthi mongthem junko hôanlahma Joban ngintatte hehnâng soamtô thukeka, ngale ahôanma numnene diapdâng wakeka, erediko thindede phoangko chêmsietrii rewak eka; rohkomin thinma phoangpa kaamchhih moatwah jeksiet wakmah.

Kolosien 3



¹Nea Krista demnâng ritwah lêngaksattet, erohwah nehung hehmin rangkethung wah hehnâng koh en, enâng Krista ate Lowang têngthinko Joban dekchahko tongeka.

²Nehung nerin pa are hahtokkhoh wah sêmmak hehnâng ledang rangkethung wah sêmmak hehnâng koh en.

³Chenrângma ngako, nea lâriitet, ngale ne roandôngpa Krista junma Joban demnâng tongeka.

⁴Krista pa ne roandông linlin, ngale chenthu ate mehong tahko, nemin ate demnâng johhong letma ate mîndôngko ejohroam en!

Roandông Pã ngale Roandông Nyan

⁵Erohwah nema nehung khenwah chentô achhih heh ritphe en, dihiak dela kaamchhih moat, lihân kaamchhih heh, dihiak nâng phetwân, hungnâng achhih thônghun, ngale chhahnyoak (Chhahnyoak pa moangachaang nâng soamtô nâng ngaeka).

⁶Chenrângma ngako, areheh junko henma Joban nginlekep dangeka ereheh khohnâng Joban rinkhah pa elen a.

⁷Rekthe ne roandôngpa arerângrâng heh ma lumpet lahma nekhung arin hehnângmin arerângrâng thonghun letma dângwah.

⁸Rohkomin ade phumma nekhumin arerângrâng hehwah ajekre en: rinkhah, ngale hungkhen nâng achhih thônghun, ngale mihnâng chhihchoh hehwah ajekre en. Ne thunkhab wah mihnâng dûmmek, ngale jabkhab chhih heh nekhongjab en.

⁹Wathema wathe nâng mothô nekthômîn en, chenrângma ngako, nema newah pap roandông apã pa ne jatchhih patkhah heh demnâng lâjoh petphetet

¹⁰ngale nea roandông nyan lâdangtet. Are roandông nyan pa Joban ma ate rângrâng hôaneka, ngale nema ate senthemthem jienjet rângma ate rângrâng hôan ehèn.



¹¹Erohwah, Jews ngale Jews ledangte heh tungko chenjô mâmâ aho, ngale khoankhen niem hôante le lehôte heh tungkomin chenjô mâmâ aho, jet ajien le nokba tungkomin, haa le haa ledangte tungkomin chenjô mâmâ aho, rohkomin Krista jôba anga nga rãng, ngale ate jôba chentôpa.

¹²Nea Joban mihnyan; atema nenâng hun ehèn ngale ate dedema ate mihnyan dângrãng ren ehèn. Erohwah, khetkep rãngrãng, mînchenmîn, hun achetmîn, numnene, noapnene, ngale hungmông rinmông dangletma tongen.

¹³Wathema wathe nâng lietmîn re en, ngale hentung nângjô mechhihmîn en komin map kohmîn en. Chenroh Teso ma nenâng mapkoh ehèn a ererãngrãng wathema wathe nâng map kohmîn en.

¹⁴Ngale areheh demko hun achetmîn min chentonga, hun achetmîn pumma jôba nekhu chentôpa jutjut jaangjaang senthemthem roamkhhek ehèn.

¹⁵Nehung nerin khenwah thonghun eken pemin Krista ma koheka mêmô junko chendanga; chenrãngma ngako, are mêmô junko Joban ma nekhu phoangthe ko dângrãngma rooehèn. Ngale roantangma Joban nâng dangkoh a nga en.

¹⁶Krista nginkongsen pa nehung nâng mênchong tongthuk en. Ere nginkongsen buthi mongthem junko wathema wathe nâng rîn akhahmîn letma hethômîn en. Rangsoamsê heh se en, Jobansê hehmin se en, ngale lihân rangsoamsê hehmin se en; nehung ma Joban nâng dangkoh a ngat nungma se en.

¹⁷Erohwah, nema chentô moeken a ngale jab aja eken a ereheh Joban nâng Jisu Krista mînko dangkoh a ngat nungma mo en.

Roandông nyan danglihma sôngtông

¹⁸Tangnyu heh, ne tangwa ngin kepletma thinran cheichei dangen, chenrãngma ngako, Kristan dangletma nema eroh moatmin.

¹⁹Tangwa heh, ne tangnyu hehnâng hun en ngale thin demnâng rinkhah punpun nekdangen.



²⁰Chha heh, nea Kristan dangletma roantangma māmâ nyong awa nginkepkep dângpa ne moatlem, chenrăngma ngako, erohko Joban rinme eka.

²¹Nyong awa heh, ne chha heh hung nekke thuk en, eroh medang ako, thin ajah môang chhihjâa.

²²Haaheh, rongrup nâng ne tângtewa nginkepkep dangen, thinma nenâng sokpoatko lolo chensenchohhi ngama nekdangen; rohkomin Teso ranchei letma nehung nerin phangtang kohletma chentôpa mo en.

²³Nema chenjô memo enkomin, nehung nerin phangtang kohletma Teso răngma mokoh eki, mihnyan rãng moatkoh dangmah ngama thonghun letma mo en.

²⁴Thonghun en Teso ma ate mihnyan hehrãng thienkohtah heh nenâng ekohhèn. Chenrăngma ngako, alinlin Tângte Krista pa nema khoakhem eken.

²⁵Ngale chentô kaamchhih moatte hehnâng thinma chenni kaamchhih motah a ere thâpa engakkoh a, chenrăngma ngako, Joban ma anga nganâng khoakthema ren eka.

Kolosien 4

¹Tângte heh ne haaheh demnâng asen ngale toangtang dangen, nekhôn nekjôn waken. Thonghun en nerãng rangkethung nâng ne Tângte min tonga.

Rîn Akhah

²Roantang rangsoam letma tongen, ngale rangsoam poatko jetletma soam en, ngale Joban nâng dangkoh a nga en.

³Ngale nirãngmin rangsoam kohhi, erohkoba Joban ma ninâng ate nginkongsen ngale Krista patritli nginkongpa phoangthô kohrãng sanpoat senpa ekohhi. Ngale ere rãng jôba Ngama athângheh phâtek nâng tongekang.

⁴Erohawah, Ngama chenroh thôthin a erepa senthemthem chenjen thôkoh angma rangsoam kohha, erohkoba mihnyan hehma senthemthem ejien jet a.



⁵Joban nâng lepute dâlemte mihnyan heh mitsokko jetletma dangen, ngale sanpoat roakweih thinnâng Joban nginpa senthemthem thôkoh en.

⁶Roantangma ne jabkhab hehmin tiemtete ngale nyoaktatli chendanga, ngale nema anga nganâng chenroh asen ma dânthâng min a erepa jet en.

Athôan Salam

⁷Nãngma nyahrãng ahun nãng lemru Tikikas, atea Teso moatlem nâng nyahrãng hungkoh lahma moatte ngale nãng rãngrãngjô atemin Teso haa, atema nekhu nâng Ngangin heh ethôkoh hèn.

⁸Erohwhah atema nekhu nâng nia anâng chenroh tongekia erengin heh thôko lahma nekhu anga nga khu chenhah thukhèn ngama netânâng chienkat erâng.

⁹Ate demko Onisimas min johchienkat erâng, Onisimas pa nirãngma nyahrãng ahun lemruhasen ngale nyahrãng hungkoh lahma putedâlemte, ngale atea nekhu demwah jôba. Thinma anâng chenni dangeka ereheh phangtang ethôkoh hèn.

¹⁰Ngademko phâtek nâng tângte Aristekas memin nenâng salem matkat ehèn, ngale Barnabas pho anaa Mak memin salem matkat ehèn. (Mak netânâng mewãng rako ate senthemthem tângroo en ngama nenâng thôkotah.)

¹¹Josua, ngale atenâng Justus ngamemin rângroo a, ate memin salem matkat ehèn. Are warem pejôba Jews jatwah putedâlemte danglahma Nga demnâng Joban Hahsông rãngma johmowak ehang, ngale thinma nganâng nyahrãng chohsûwak ehang.

¹²Jisu Krista haa ngale nekhu lemrujô Ipafras memin nenâng salem matkat ehèn. Atema roantangma nekhurãng nyahrãng rangsoam kohjû, ngale Joban ma nekhu rongtengtengjû, erediko hungchit phannang Kristansen, ngale Joban hungsi junkojû chendangen ngama soamkoh ehèn.

¹³Ngadedema ajet, atema nekhurãng, ngale Laodika wah mihnyan hehrãng, erediko Hirapolis wah mihnyan hehrãngma nyahrãng chaanrii lahma mokoh ehèn.



- ¹⁴Nãngma nyahrãng ahun doktor, ngale Dimas memin salem matkat ehèn.
- ¹⁵Laodika wah putedâlemte mihnyan hehnâng, ngale Nymfa erediko ate hum wah khôanhokte Asâthem hehnângmin ni ngewah salem thôkoh en.
- ¹⁶Nema are sitipa weih diko, Laodika wah Asâthem hehnângmin metkep loatweih koh en. Erediko Laodika wah putedâlemte hehmanenângh matwênthen siti memin weihkoh en.
- ¹⁷Ngale Arkipas nâng, “Teso moatlem mothuk thopa senthemthem lãngmo onga, ngama thôkoh en.”
- ¹⁸Ngadede dekma are sitipa raang ekang: Pol ngewah salem Nga a phâtek nâng janru nâng khhekrii ekangpa neklek pheha! Joban mînchenchaan nekhudemnângh chentonghèn.



1 Thisalonika

1 Thisalonika 1

¹Pol, Silas, ngale Timothi ngewah- Thisalonika wah Joban Wa ngale nãng Teso Jisu Krista nãng putedâlemte mihnyan ngale Asâthem hehnãng raangeka: Joban mînchenchaan ngale mêmô nekhû demnãng chentonghèn.

Thisalonika wah Mihnyan heh Roandông ngale thin Putedâlem

²Nima roantangma Joban nãng nekhû anga ngarãngma dangkoh a ngaeki, ngale nima rangsoam roakweih nekhû rãngchhem hun a.

³Chenrãngma ngako nima nãng Wa Joban nãng rangsoamko, nekhuma putedâlem junko moeken heh, ngale nema hun achetmîn junko chaanrii letma moeken heh, ngale nema nãng Teso Jisu Krista nãng putedâlem letma tok anaa eken heh rãngchhemhun e.

⁴Lemruchha heh, nima ajet Joban ma nekhû nãng hun ehèn, ngale atenãng putedâlemte mihnyan dângrãng ren ehèn.

⁵Chenrãngma ngako nima nenãng Nginkongsen pa jabkhab melolo ledang, ere toangtang nginpa senthemthem lepjet lihma Joban chaan ngale Asâthôanju demnãng kephû koheka. Ni nedemnãng dângpoatko chenroh dangtih a erepa nemajet; erepa nekhurãng sênrãngma moatwah.

⁶Nekhuma niwah ngale Teso wah he eken; ngale nekhû nyahrãngjô mechêm enkomin, nema nginkongsen pa Asâthôanju ngewah chaanchoh letma khuhah nãhah kep eken.

⁷Erohwhah, nekhua Misidonia ngale Akaia wah chentô putedâlemte hehma newah heli dangeken.

⁸Chenrãngma ngako, Teso nginkongsen pa newah Misidonia ngale Akaia phangtang nãng lolo phoangchohtat chhoanthuk ledang, nema Joban nãng putedâlem ngin pemin chentô thenãng chohtat eka. Erohwhah ere lêko nima chenjô ngatthin ahotu.



⁹Enâng wah mihnyan heh phangtangma ni netânâng hûthiko nema chenroh tângroo thia erengin heh thôwak eka, ngale nema moangachaang nâng soamtô letma dangtet pa Joban tânâng hûletma chenroh ahîn Joban nâng soamtô eken a ereheh thôlahma tongwak eka

¹⁰ngale nema ate Chha rangkethung wah ngakkat bemla eken heh thô rewak eka - ate Chhapa Jisu, Joban ma ritwah ngakhînsiet wah, ngale Jisu ma nângkhu ahokmin Joban rinkhah kowah pesiet ehi.

1 Thisalonika 2

Thisalonika nâng Pol ma Joban Moatlem Moat

¹Lemruchha heh, nedede memin ajet ni netânâng chohmîn hûeri pa mahto nâng dangmah.

²Nema ajet nia netânâng Thisalonika nâng hokmako Filipien nâng hânjôn lahma rêse râhangthi. Ngale ni lelatnâng mihnyan heh ajahjô mehong akomin, Joban ma nihung dongsiet lahma ate ngewah Nginkongsen pa nenâng thôkoh eka.

³Nihung nâng mōang atoang ba hungngek rinngkek danglihma nenâng roatsep dangmah, ngale nima henjô diapchhahmih.

⁴Erenoma, roantangma ninâng Joban ma chenroh jabthuk hun ehia eroh rângjab e, chenrângma ngako, nima Nginkongsen pa taphoangthôa ngama atema punkhe lahma ninâng thôthuk ehi. Nima mihnyan rinmethuk hunmih, nihung nirin thatsokte, Joban rinmethuk loloba huneki.

⁵Nema senthemthem ajet, nia netânâng hokko nginmōang heh thôlihma hûho, ngale ninâng chenchoh sûhi ngama diapthôrii lihmain hûho - Arepa Joban memin ajet!

⁶Nima henwahjô rô hunmih, newahmin hunmih, ngale henwahjô hunmih,

⁷Jisu Krista moattat chhoante dângjunko, nima newah chenta thatah. Rohkomin, chenthu nia netânâng dângpoatko nedemnâng numnene



danglihma tôngwah, nyong ma ate chha heh rãngkhoakhem arãngrãng numnene danglihma tôngwah.

⁸Nima nekhu nãng nyahrãng huneka! erohwah nima nekhu nãng Joban Nginkongsen pelolo thôhokkoh ledang niroandông pemin nerãng kohhunwah.

⁹Lemruchha heh, nima chenroh chêmrii lihma motih a ereheh linlinjô nema thonghun thêm en, nima nenâng Joban Nginkongsen pa thôhok kohko nenâng chenni ngemajô nekchen chêmsiet eka ngama thonghun lihma rangwo rangnyek moatwah.

¹⁰Arepa toangtang ngama nememin ajet, ngale Joban memin ajet, Joban nãng putedâlemte nekhu tânâng dãngko nia sâpoangpoang, toangtang, ngale chenni nãngjô lechhih thangma tongwah.

¹¹Nema ajet, nyong awa heh ma thin chhuchha hehnâng chenroh dangeka rãngrãng jôba nimin nekhu demnâng dangeki.

¹²Nima nehung dongsiet eka, ngale senthuk eka, ngale neroandôngko Joban rirmeli dangletma songtongen ngama rosep eka, chenrãngma ngako, Joban ma ate Hahsông theko ate mîndôngko johroamrãng nekhu nãng rooehèn.

¹³Ngale lihân junmemin nima Joban nãng roantangma dangkoh a ngaeki. Erepa chenthu nima nenâng Joban nginpa kephok kohko, nema erepa tatletma mihnyan nyuchha ngin ngama ledang alinlin Joban nginkong ngama kep eken. Chenrãngma ngako Joban nãng putedâlemte hehnâng Joban Juma moeka.

¹⁴Lemruchha heh, Judia wah Jisu Krista nãng putedâlemte ngale Joban nãng putedâlemte Asâthem hehnâng dangtah rãngrãngjô nenângmin dang ehèn. Thinma thin Jews mihnyan hehwah chêmchohtah rãngrãng, nemin nedede mihnyan hehwah chêmchoh eken,

¹⁵Thinma Teso Jisu Krista ngale mông hehmin ritphe wah, ngale nãngmin chêmthuk ehi. Thin demnâng Joban hungsenmah! ngale thin a chentô mihnyan heh lelatnâng achhih dangeka!



¹⁶Thinma ninâng Jews ledangte hehnâng thin khope chohtin nginkongsen phoangthôkoh pa jektang ehi. Eroh thinma thinpap khohko pap dêchong moeka. Ngale ade phumma Joban rinkhah pa thin khohnâng kaera!

Pol Thin demnâng Ngakchoh Mînhok Hunwah

¹⁷Lemruchha heh, chenthu nikhu nedemwah poattherâng taangmîn tihko - erepa hung arinwah taangmîn dangmih, phoangwah loloba taangmînwah - nima nekhu nâng nyahrâng thônghunjû, ngale nedemnâng nyahrâng ngakchohmîn huneka!

¹⁸Nia netânâng ngakhok hunwah. Ngadedejô netânâng depdep ngakhokrâng phungwah, rohkomin joakma lemlaang komahhang.

¹⁹Chenrohjô medan akomin, chenthu nâng Teso Jisu Krista katjâko nima khuhah nâhah dâlem lihma rângthô thinpa nekhu jôba dângmin - erepa mihhan henjô ledangmin.

²⁰Linlinjô, nekhu junkoba ni thhensansan dangeki, ngale khuhah nâhah dangeki!

1 Thisalonika 3

¹Athôanko, nima letadôtu dângwah. Eroh wah, ni lolo Athen hahnâng tângkatwah

²ngale nidemnâng Joban rângma Jisu Krista Nginkongsen pa phoangthô moatlem johmoatte nângnaa Timothi netânâng chienwênwah. Atema nekhu nâng chaan johkoh lahma nekhu putedâlem chendong siethèn ngama chienwên erii,

³erohkoba are chêmchei chohtuk junko nekhu henmin Joban tâwah lengakchhoan edangen. Nekhu dede memin ajet arerângrâng chêmchei chohtuk ehi pemin nângma Joban hunsi junko choheki.

⁴Chenrângma ngako chenthu ni netânâng dângpoatko nângnâng aroh echêmthuk hi ngama thôkotah; ngale nema senthemthem ajet, nima chenroh thôkotah a ererângrâng jôba dangeka.



⁵Erohwah Ngama Timothi chienwên erâng. Ngama leta bemtu thangma, ne putedâlem pa chenroh dangeken a ngama jetrăng netânâng chienwên erâng. Juchhijma nekhu nâng chêmshiet junko nima motih moatlem heh mahto nâng madanglah o ngama patrii lekma chienwên erâng!

⁶Phumma Timothi athângheh lêngak katha, ngale atema nekhu putedâlemsen ngale hun achhâmîn letma tongeken ngin heh lâthô kohthi. Ngale nema ninâng roantang asen ngema thonghun ehi ngin heh, erediko chenroh nima nekhu khehun eka ererăngrăng nekhu memin nikhe hunehi ngama thôkohthi.

⁷Lemruchha heh, nima chêmchoh roakweih min nekhu nâng thonghun lahma hung rângdonge. Nekhu putedâlem pumma nihung dongshiet ehi,

⁸chenrăngma ngako, Teso demnâng roamletma ne putedâlem nâng rongtêngtêng dângjunko ni ahînma dangeki.

⁹Ade phumma nima nejunma năng Joban nâng dangkoh a tangae. Nekhu junma nia ate tâko khuhah nâhah tâchoh dângdi atenâng dangkoh a ngaeki.

¹⁰Nihung nirin phangtang kohlijma rangwo rangnyek nekhu demnâng chenta chohmîn a, ngale ne putedâlem dôngshiet răng lemeken heh chenmam tachohkoh a ngama rosep eki.

¹¹Năng Wa Joban ngale năng Teso Jisu Krista ma nekhu tânâng tâchohmîn hokrăng lem chenmam laangkohhi!

¹²Teso ma nekhu dede chenhunmîn thukhên, ngale nima nenâng chentô huneka ererăngrăng chentô mihnyan heh hun achetmîn pemin chendonga.

¹³Atema nehung aroh chendongshiet hên, ngale chenthu năng Teso Jisu Krista atenâng putedâlemte heh demnâng ngakkat jâko, nemin năng Wa Joban tâko senthemthem ngale Sâpoangpoang chendangen.

1 Thisalonika 4

Joban Rinhung Sênli Roandông

¹Lemruchha heh, Chenrohma Joban rinhung sênli roandông jkendôngmin a erepa nema niwah lâhethi. Adângte nea erohjô songtong letma dângwah.



Ngale athâng hehmin nima nãng Teso Jisu Krista mîngo nenâng erohjô ajahjah Joban rinhun sênli songtongen ngama rosep eka.

²Chenrãngma ngako, Teso Jisu Krista chaanjunko nima nenâng rîn akhah tahheh nemajet.

³Joban ma nea Sâpoangpoang chendanga, ngale dihiak dela tungko kaamchhih lemo thangma chentonga ngama hun ehèn.

⁴Nekhu anga ngama mâmâ tangnyu demnâng chenroh asâ ngale asen ma sôngtôngmin a erepa jet en,

⁵Joban lejette papi mihnyan heh rãngrãng nekphoang phetwân en.

⁶Erediko, nelemru Kristan ahan hehrãng memin nekchhih mokoh en, ngale nekdiapchhah en. Are nginpa nima amakomin thôkotah, ngale ademin thethô koheka, henhenma ererãngrãng kaamchhih moeka ereheh nãng Joban ma metkep chêmsetmin.

⁷Joban ma dihiak dela kaamchhih molihma sôngrãng roo dangmahhi, sâpoangpoang sôngrãng rooehi.

⁸Erohwhah, henhenma are hethôeka nginpa dan eka erepa mihnyan ngindân dangmah, nenâng ate Asâthôanju kohte Joban ngin dan eka.

⁹Wathema wathe nãng hun achhâmîn en ngama nenâng chêmraang thin dangmah. Nekhuma wathema wathe nãng chenroh hun achetmîn min a erepa Joban ma hethôthen.

¹⁰Ngale linlinjô nekhua Misidonia wah chentô Joban nãng putedâlemte mihnyan heh demnâng erohjô hun achhâmîn letmatong eken. Lemruchha heh erohwhah, nima nenâng ere nomemin ajahjah hun achhâmîn en ngama rosep eka.

¹¹Ngale nima amako nenâng chenroh thôkotah a ererãngrãng, mêmô dangletma mâmâ moat akat, ngale mâmâ wok apuk biphhek chhah reletma songtongen.



¹²Eroh dangletma mesong metong enkoba Joban nâng lepute dâlemte mihnyan heh ma nenâng edâlem hèn ngale neran echeiwak a, ngale nema chenni lemeken a ereheh rãngmemin mihnâng ledâlem etadangen.

Teso Ngakkat Ngin

¹³Lemruchha heh, riichoante mihnyan heh junma toangtang nginpa nenâng jetthuk huneka, erohkoba Joban nâng putedâlem ahote mihnyan heh sekma patrii eka rãngrãng nea lesekmah patrii edangen.

¹⁴Nãngma Jisu Krista riilahma ngakhintah ngama putedâlem eki, ngale henhen Jisu Krista nâng putedâlem lahma riieka ere mihnyan heh Joban ma Jisu demnâng engakhinsiet a ngama putedâlem eki.

¹⁵Nima athângheh nenâng chenni hethôeka erepa Teso ma hethô wah ngin: Nãngkhuwah henhen Teso ngakkat jâko ahînma tongla ekia ereheh riichoante heh noma khema ledangmin.

¹⁶Joban ngintatte adongthôn pumma ehongrak a, ngale Joban ngewah poakpopo pa rahmet erea, ngale rangkhethung wah Teso atedede ekara. Henhenma Krista nâng putedâlem lahma riitah a ereheh khebeng engakhin a;

¹⁷erediko ere sanpoatko ahînma tãnglãte nãngkhu Teso demnâng pongwutnâng chohmînãng thin demnâng phoamkhoh nãng ekhãnsiet hi. Ngale nãngkhu roantang roanjẽngma Teso demnâng tãngtumin.

¹⁸Eroh wah, are jabkhab pumma wathema wathe hung dongsietmîn letma tongen.

1 Thisalonika 5

Teso Ngakkat rãngma Khoakhem letma tongla en

¹Lemruchha heh, areheh chenre sanpoatko ngale chenre rangkuh sanha nãng dãngmin a erepa nekhu nãng chẽmraangthin dangmah.

²Chenrãngma ngako nedede memin senthemthem jet en, Teso ngakkat pa rangpen nãng ahuhete hokwah rãngrãng dãngmin.



³Chenthu mihnyan hehma, “Chentô pejô mêmo ngale kho lâpetih,” ngama thonghun lahma dângko, lemlienma thinnâng chêmchei ehûa! Erepa lemlienma dihiaknyu naachhat rãng wok hôngchetwah rãng rãng ehong hûa, ngale mihnyan hehmin lepemin.

⁴Rohkomin lemruçha heh, nekhua rangnyek khennâng dangmet, ngale erejâ Rangwo pumma ahuhte hokwah rãng rãng hûlahma nekchen patrii thuk ehèn.

⁵Nekhu anga nga sanphiak nâng sôngtôngte mihnyan, ngale rangwo nâng tôngte mihnyan. Nãnga rangpen ba rangnyek nâng sôngtôngte mihnyan dangmih.

⁶Erohwha, nãnga mihnyan ahan heh rãng rãng lejuplek min; nãngkhua lejuplek thangma met hin dângmin.

⁷Ajuplekte mihnyan heh rangpen nângba juplek eka; ngale rangpen nângba khemma mokjok eka.

⁸Rohkomin nãnga rangwonãng tôngte mihnyan, ngale nãnga met hin dângmin. Nãngma putedâlem le hun achetmîn pa lakkha rãng rãng keplihma tôngmin, ngale khope pa nãng khoko jankhophok rãng rãng phokmin.

⁹Joban ma nãnga ate rinkhah thunko chêmritrãng rên dangmahhi, rohkomin nãng Teso Jisu Krista junma khope chohrãng ren ehi,

¹⁰Chenthu ate ngakkat jâko nãnga riichoan metongla ekomin ba ahînthu metongla ekomin, nãng ate demnâng jienroam songrãngma atea nãngrãng riikoh ehi.

¹¹Ngale erohwha athâng hehwha nema moeken rãng rãng, wathema wathe hung dongsietmîn en ngale chohsûmin en.

Athôn Rîn Akhah ngale Salam

¹²Lemruçha heh, nima nenâng rosep eka, nekhua Kristan roandôngpa asen dângrângma ne lemsênte ngale nenâng rîn akhah lahma nedemnâng moatte mihnyan hehnâng thonghun letma hun achhâ en.



¹³Thinma are moatlemsen heh nekhū chhangnâng moatjūnko thinnâng nyahrâng hun achet nungma khoakhem waken. Ngale nekhū dede tungnângmin mêmoma tongen.

¹⁴Lemruchha heh, nima nekhū nâng rosep eka, ajō hehnâng ritngat re en, chephoat heh hung dongsiet en, aboan anaa hehnâng chohsū en, ngale chentō demnâng hungmông sietletma tongen.

¹⁵Henmin achhih demko achhih ngema nektoatmîn en, rohkomin chentō sanpoat roakweih wathema watherâng ngale chentō mihnyan rângma asenli tuta moatrâng thonghun en.

¹⁶Roantang khuhah nâhah dangen,

¹⁷Sanpoat roakweih rangsoam en,

¹⁸Chentō rangkuh sanha roakweih Joban nâng dangkoh a nga en. Ngale ne roandôngpa Jisu Krista demnâng roamletma areheh Joban ma ne roandôngko moat huneka.

¹⁹Asâthôanju ma moatlem moatpa nekjek tangen;

²⁰Profisi hôan ekapa lekep nekhdangen.

²¹Rohkomin athaksok re en: Phumma asen senpa kepen

²²ngale achhihli chentôpa aphe re en.

²³Nângnâng mêmō kohte Joban pumma nekhumîn chentō nâng sâpoangpoang chendang thukhèn, ngale nâng Teso Jisu Krista ngakkat jâko nekhū - Ju amoang, hung arin, ngale phoang aroang heh phangtang - chennijô ngek atek ngale theabe aho chendang thukhèn.

²⁴Ne roote pumma areheh emo kohhèn, chenrângma ngako atea putedâlemli.

²⁵Lemruchha heh, nirângmin rangsoam kohhi.

²⁶Chentō putedâlemte heh mêmoma deksit pekmîn letma salem kohmîn en.

²⁷Ngama Teso chaanjūnko are sitipa chentō putedâlemte mihnyan hehnâng weihkoh en ngama rosep eka.



²⁸Teso Jisu Krista mînchenciaan nekhû demnâng chentonghèn.



2 Thisalonika

2 Thisalonika 1

¹Pol, Silas, ngale Timothi ngewah - Thisalonika wah Joban Wa ngale nãng Teso Jisu Krista nãng putedâlemte mihnyan ngale Asâthem hehnãng raangeka:

²Nãng Wa Joban ngale Teso Jisu Krista ma mìnchenchaan ngale mêmochenkohhèn.

Krista Ngakkat Jâko Khope Rên

³Lemruchha heh, nekhurãng nima Joban nãng sanpoat roakweih dangkoh a ngaeki. Nima are dangkoh a ngaeki pa angkat khônãng ngaeki, chenrãngma ngako, ne putedâlem pa nyahrãng dongeka, ngale nekhuma wathema wathe nãng hun achetmîn pemin nyahrãng dongeka.

⁴Eroh wah nededema Joban nãng putedâlemte Asâthem hehnãng nekhurãngthôeka. Nekhuma ato chêmchoh komin lejek thangma tadô letma putedâlem eken heh rãngthôeka.

⁵Are chentô heh junko Joban ma toangtangko ren eka ngama jetloeki, ngale ereheh junko nema Joban Hahsông pa tâchohmin. Ere Joban Hahsông pa tâchoh rãng jôba nekhurãng chêmrii eken.

⁶Joban ma chenpa toangtanga ere pejôba moeka: henhenma nekhurãng chêmthuk ehèn a ereheh nãng atema echêmthuk a,

⁷ngale henhenma chêmchoh eken a ereheh nãng atema chohsû lahma lechêmthu edangen, ngale nimin eroh edange. Atema arepa chenthu Teso Jisu rangkethung wah ate ngintatte heh demnãng hôngkat jâko emoa,

⁸Joban lekepte, ngale nãng Teso Jisu Krista Nginkongsen ngin lekepte mihnyan hehnãng chêmthukrãng atea wendô demnãng ekara.

⁹Thin a Teso ngale ate achanthôn chaan kowah rephe lahma roantang roangjêngrãng echêmwak a,



¹⁰Chenthu ate mihnyan Asâ ngale atenâng putedâlemte mihnyan hehwah rô ngale atenâng toak asân chohrăng katjâ Rangwo ko. Nekhumin ere mihnyan heh demnâng edangen, chenrăngma ngako, nima nenâng thôkohtah ngin heh nema kep eken.

¹¹Erohwhah nima nerăng roantangma rangsoam koheka. Ngale Joban ma chenroh sôngrăng rothen a, eroh chenmam jiensong thukhèn ngama rosep eki. Ngale ne putedâlem junma moatlemsen moathun ekenpa ate chaanma chenmam tamo thukhèn.

¹²Eroh moat junko jôba năng Teso Jisu Krista mînpa nekhu junma edonga, ngale nemînmin năng Joban ngale năng Teso Jisu Krista mînchennaan junma edongen.

2 Thisalonika 2

Wanthe Achhihthôn pa

¹Lemruchha heh, Ngama nenâng rosep eka, Năng Teso Jisu Krista ngakkat ngin ngale năngkhu ate tânâng roamkhôanhok ngin hehrăngma,

²nekhu năng ere Rangwo pa rākatha ngamejô mathôhû kohhèn komin nehung nerin năng sitsiak nekmokrii en ngale hung nekke en. Eroh nima profisi hôanpoatko, ba Joban nginkongsen thôkoh poatko lâthôtih dangthem a, ngale siti năngmin lâraangtih dangthem a.

³Hennângjô chenni ngemejô nekmok wânrii en. Chenrăngma ngako, ere Rangwo pa Joban ngin Lekepte pa mahong hongkako lehû mêngmin, ngale pap wendô dongnâng khâmritte Mihnyan Chhih pa mahong hongko lehû mêngmin.

⁴Atema chentô joban ngale soamtô rewak eka heh lelatnâng danglahma atedede thin khohko dongrii lahma etonga. Atea Joban Rangsoamhum khennângmin tonghu lahma Joban ngama engariia.

⁵Nema thonghun metne? Are heh Nga nekhu demnâng tōngpoat komin thôkotah.



⁶Rohkomin arepa athângheh chenni mekomin ledangthuk thangma tengbeng thukeka, ngale erepa chenni ma tengsietka erepa nemajet en. Phumma sanpoat pa methang tahko Mihnyan Chhihthôn wathepa ehonga.

⁷Nyahrâng Apatritli Mihnyan Chhihthôn pumma athâng hehmin hahtokkhoh ko moatlem molahma tongeka, rohkomin ere Mihnyan Chhih chaanpa wathema tenglo lahma thieneka, ngale erepa ate lem kowah lemtângte pa mare rephe tenglo lahma ethien a.

⁸Erediko Mihnyan Chhihthôn pa ehonga, rohkomin, chenthu Teso Jisu Krista meka theko ate thunkâ wah rekpumma eritphea, ngale atewah wenphiakdong pumma echhihsiet a.

⁹Mihnyan Chhihthôn Wathepa joak ajo chaan keplahma hûlahma chentô patritli moatlem mông heh ngale bâritli moatlem heh emoa,

¹⁰ngale atema chentô buthi mongthem chhih heh keplahma Ju mahritte mihnyan heh ediapchhah a. Thinma thin Ju khope thin hun achet le toangtang heh lekep di emah chhihjâa.

¹¹Ngale Joban ma kaamchhih moat chaanpa thin khohnâng echienkat a, erohwah thinma amông hehnâng putedâlem eka.

¹²Henhenma toangtangko leputedâlem thangma pap moatlem nâng khuhah eka ereheh pap wennâng ritkhâm ritkatmin.

Nea Ju Khope rângma Ren ehèn

¹³Lemruchha heh, nima sanpoat roakweih nekhû rângma Joban nâng dangkoh a ngaeki, nekhû nâng Teso ma hun ehèn. Chenrângma ngako Joban ma nekhû khekthôn ren ehèn ate Ju chaanma khope chohrâng, ngale nekhuma toangtangko putedâlem junma atenâng putedâlemte mihnyan asâthôn râng hân ehèn.

¹⁴Joban ma nekhû roehèn pa nima nenâng Nginkongsen thôkoh eka junma roehèn; atema nekhû roehèn pa nâng Teso Jisu Krista demnâng mîn johdongrâng roehèn.



¹⁵Lemruchha heh, erohwah, nima nenâng toangtang ngin hethôtah hehnâng rongtêngtêng putedâlem letma tongen. Ere toangtang nginpa nima Joban ngin thôkohpoat komin hethôtah ngale siti nâng raanglihma min hethôtah.

¹⁶Nâng Teso Jisu Krista ate dedema, ngale nângnâng hun achete, ngale mînchenciaan kohte, erediko nânghung dongsiet lahma chenthumin leta chhihjá thin putedâlem kohte nâng Wa Joban ma,

¹⁷roantangma hung arin le putedâlem dongsiet lahma asenli tuta moat akat ngale jab ajâ chaan chenkohhèn.

2 Thisalonika 3

Nirângma Rangsoam kohhi

¹Lemruchha heh, athôanko dangeka, Teso nginkongsen pa nima sitsiaksiak tâphoang thôkhrâng, ngale nema keptet rângrâng mihnyan heh ma khuhah nâhah chenkep a ngama rangsoam kohhi.

²Ngale Joban ma mihnyan chhih heh dekwahmin chenpe siethi ngama rangsoam kohhi; chenrângma ngako, anga ngama Joban nginkongsen ko putedâlem mah.

³Rohkomin Teso pa dâlemli, ngale atema nekhu nâng chaankoh lahma Juchhih dekwahmin epe pânghèn.

⁴Ngale nima nenâng chenroh hethôtah a erohjô moeken ngama Teso mînko dâlem eka, ngale erohjô emo en ngama nenâng dâlem eka.

⁵Joban ma hun achet nginpa Teso ma nenâng senthemthem chenmam jetthuk hèn, ngale Krista ma tadôeka rângrâng nenângmin chenmam tadô thukhèn.

Nângma Moatthin Moatlem

⁶Lemruchha heh, Teso Jisu Krista mînko nima nenâng thôkoh eka, putedâlemte danglahma ajõ, ngale nima thinnâng rîn akhah tihheh junko ledangte heh demwah ataang re en.

⁷Nededema senthemthem ajet, nima chenroh moekia ererângrâng nememin moatmin. Nima nekhu demnâng dângpoatko lejõrii thangma moatwah.



⁸Nima thã lekoh thangma henwahmin thaphhek chhahho. Erenoma, nidedema chêmrii lihma motih; Nima nekhu hennângjô niphhek chhah rãngma lechêm sekmah thukrãng rangwo rangnyek motih.

⁹Nima are moeki pa nekhu ngewah thâphhek chhah niem aho ngama moat dangmih; nema nimoat akat pa kheletma niwah chenhehi ngamaba moatwah.

¹⁰Chenthu nia netânâng dângpoatko, nima aroh thôkotah, “Henhenma moat akat lehun dangeka ereheh nâng phhekchhah min nekphhek chhahthuk en,”

¹¹Nima arepa nekhu chhangnâng moatlem lemo thangma jôajang mihnyan heh tonga, ngale thinma mihhan heh moatlem nâng lolo phoangjamsiet lahma tongeka ngama chohtat phumma thôkoh wah.

¹²Nima Teso Jisu Krista mînko arerãngrãng mihnyan hehnâng senthemthem songtong lahma thindede wok chenlem biphek chhah a ngama chien eki.

¹³Rohkomin Lemruchha heh, nekhua moatlemsen moatnâng nekboanrii en.

¹⁴Nima nenâng are sitiko matkat eka ngin heh lekepte min khuka etongthem a. Eroh metong ako, ere mihnyan heh jetletma thien en ngale thin demnâng chenjô nekmo nekka en, erohkoba thin arêsê erewak a.

¹⁵Rohkomin thinnâng ran angem rãngrãng nekhôan en; erenoma, putedâlemte rãngrãng thonghun letma rîn akhah en.

Athôan Jabkhab

¹⁶Nãngkhunâng mêmô kohte Teso ate dedema nekhu nâng chentô lemkhôma sanpoat roakweih mêmô chenkohhèn. Nekhu chentô demnâng Teso chenjoh tonghèn.

¹⁷Ngadede dekma are sitipa raang ekang: Pol ngewah salem ngale chentô siti nâng Ngama arohjô sùhi rânghôan ang; Ngale Ngama aroh raang ekang.

¹⁸Nãng Teso Jisu Krista mînchenchaan nekhu chentô demnâng chenjoh tonghèn.



1 Timothi

1 Timothi 1

¹Năng Pângte Joban ngale nãngma dâlem eki Jisu Krista ma chien junko, Jisu Krista moattat chhoante Pol ngewah-

²Timothi, nanga putedâlem junko Ngachha linlin rãngrãng keplihma raangeki: Nãng Wa Joban ngale nãng Teso Jisu Krista ma nãngnâng ate mìnchennaan, hun achet, ngale mêmo chenkohho.

Amõang Hethô junma Ritngat

³Chenthu Nga Misidonia katlem nãng dãngpoatko roseptih rãngrãng, Ngama nanga Ifisus nãng mamtong mêngo ngama rosep eki. Enâng mihnyan khuthema ledangli ngin phoanghethô eka, ngale nangma ereheh jeksiet o.

⁴Thinnâng tewa nginchha ngale te awi heh nginkong heh thômîn pa jek chenrewak a ngama thôkoh, ereheh metham thômîn eko chhiakmîn loloba ere e; ereheh ma Joban moatlem nãng chohsû mahhi, Joban moatlem pa putedâlem junma loloba tâmoatmin.

⁵Are chien ekangpa hungsâma hun achetmîn, hungpun rinpun, ngale linlin putedâlem pa thinnâng chenhonga ngama chien ekang.

⁶Khuka pa are hehwah ngakchhoan lahma thin lemkhô pa aba rãngrãng sekhota ngin heh phoangjab lahma lemkhô mahphe wakeka.

⁷Thin a Joban niemarang hethôte rãng dãnghun wakeka, rohkomin, thindede jabkhab pa thinma jetmah, ngale thinma chenni jetlahma jab eka erepemin jetmah.

⁸Nangma ajet, Niemarang pa khôalem junko mekep eko asen.

⁹Rohkomin arepa thõnghunmin, Niemarang pa mihnyansen hehrãng hõan dangmah, Niemarang junko ledangte mihnyan, ngoan aliak, Joban lejetete, ngale papi mihnyan, Joban Niemarang junko ledangte, Joban Ju ahote, mâmâ nyong awa ritphete, ngale mihphoang ritphete,



¹⁰ngale dihiak dela kaamchhih moatte, dela rôande kaamchhih moatte, mihphoang huhloatte, mothô khoanglep thôte, ngale Joban Niemarang sen lelatnâng moatte heh rãngmeba hânêka.

¹¹Are hethôehi nginpa Joban ma Nganâng thôthukthang nginkongsen kowah choheki, are adongthôn Nginkongsen pa rangkohte Joban ma kohehi.

Joban ma Mînchen junko Dangkoh a ngat

¹²Ngama nãng Teso Jisu krista nãng dangkoh a ngaekang, chenrãngma ngako atema nganâng are moatlem heh moatrãng chaankoh ehang. Atema Nganâng asen ngama renlahma atenâng soam atôte dângthukdi dangkoh ngaekang,

¹³khema nãngjô Ngama aterãng mechhih jabtek komin, ba atenâng chêmshiet lekma mejôjêm tek komin. Rohkomin Joban ma nganâng nyahrãng mînchen ehang, chenrãngma ngako, Ngama leputedâlem poatko Ngama chenni moekanga erepa lejet thangma moatwah.

¹⁴Ngale nãng Teso ma ate ngewah ajahthem mînchenchaan pa Nga khohnâng kohkat ehang, ngale Jisu Krista ngewah nãngkhu putedâlem ngale hun achet pemin kohkat ehang.

¹⁵Arepa toantang ngale senthemthem putedâlem lihma kepthin ngin: Jisu Krista hahtokkhoh ko papi mihnyan heh pepângrãng kaera. Phumma ere khukowah Nga a papi thôn,

¹⁶Rohkomin Joban ma Nganâng nyahrãng mînchen ehang, erepa Nga a papi thônjô medanng angkomin Krista ma ate hung pa nyahrãng môngshiet lahma Nganâng mînchen pa khesok ehang, erepa khedi wah atenâng putedâlem lahma roantang roanjêng roandông chohte mihnyan hehma jetrãngma khesok eka.

¹⁷Roantang roanjêng Lowang, chenthumin leriite ngale mitma lekheli wathelolo Joban - atemîn lolo jôba roantang roanjêng rãngma dongshiet lihma toak asân e! Amen.

¹⁸Ngachha Timothy, Ngama are nginpa nangnâng thôkoh eki, ngale nang rãngma are nginpa khema thuma profesi thunnâng hôngjab katwah.



Putedâlem rãngma senthemthem ran tâcheprãng are jabkhab heh ranloatmin chhahkhem heh rãngrãng kep o,

¹⁹ngale nang putedâlem senthemthem dango ngale hung arin sâpoangpoang dango. Khuka heh ma thinhung arin sâpoangpoang ledang thangma molahma thin putedâlem heh chhihsiet eka.

²⁰Thinkhuchhang kowah heh dangeka, Himinaus ngale Alexender, phumma Ngama thin a joak ajo deknâng kohlekma chêmsietwak ekang; erejunko thinma Joban thāsê pa ejek a.

1 Timothi 2

Asâthem heh Rangsoam

¹Khebeng thôanko, chentô mihnyan nyuchha rãng Joban nãng rangsoam, roatsep, ngale dangkoh a ngama ngatrãng rosep eki;

²erepa Lowang hehrãng, erediko chentô thôte jabte hehrãng soam kohmin, erohkoba nãngkhu kihrumrum ngale mêmoma chohsông lihma Joban ranchei nungma atenâng senthemthem eta soamtôe.

³Aroh pa asen ngale erohkoba nãng Pângte Joban rinme eka,

⁴Atema anga nga kho chenpea ngama huneka, ngale anga nganâng toangtang pa jetthuk huneka.

⁵Chenrãngma ngako Joban pa wanthe, ngale Joban le mihnyan nyuchha roamsiette pa wathe ba etonga, ere mihnyan pa Jisu Krista,

⁶ate dedema ate roandôngpa chentô mihnyan nyuchha heh pap thâpê thumkohrãng koheka. Erepa Joban ma chentô mihnyan nyuchha heh khopesiet hunlahma sanpoat pa thâng phumma chienkat era,

⁷ngale erohwah Nga a Joban moattatte rãng renlahma Jews ledangte hehnâng Joban nãng putedâlem le toangtang ngin heh hethôrãng chienchhoan wah. Ngama arepa mothôthô dangmek; Ngama toangtang ngin thôekang!



⁸Asâthem heh rangsoam roakweih dela heh ma chensoam wak a, thin roandông pa Joban nâng kohte dela heh ma rinkhah ba chhiakmîn lere thangma thindek laang lahma tasoam a.

⁹Ngale dihiaknyu heh ma khetpa senthemthem ngale tiembengbeng chenkep a ngama hun ekang; kho heh ajatjat phoanghônrii, kem, ngale lit awen, ngale thâchaanjat khet heh nekchen menchhang kepwak eka ngama hun ekang,

¹⁰rohkomin, moatlemsen molahma, Joban nâng soam atôte dihiaknyu rângrâng chendangwak a.

¹¹Dihiaknyu heh kihchepchep ngale numnene tonglahma chenhea.

¹²Ngama thinnâng dela nâng hethô ngale dela toknâng lengrii thukmek; thin a kihchepchep chentonga.

¹³Chen-rângma ngako Adam pa khebeng bênghônwah, ngale erediko ba Eva hônwah.

¹⁴Ngale diapchhah ritte pemin Adam dangho; dihiaknyu peba diapchhahrii lahma Joban Niemarang pa chhihsiet wah.

¹⁵Rohkomin dihiak heh ma naachhat junma khope chohmin, ngale dihiak pumma melatrii moako putedâlem, hun achet, sâpoangpoang, ngale senthemthem mesong metong ako khope chohmin.

1 Timothy 3

Asâthem heh Khhepho Phannang

¹Arepa toangtang jabkhab: Henma komin atea Asâthem heh khhepho phannang dâng mehun ako atema moatlem senthôn moatrâng huneka.

²Asâthem heh khhepho pa chenni nângjô chhih aho dângmin; ate tangnyu min wathelolo dângmin, hungnoap rinnoap, atedede hung tâmông loatte, ngale khô alemko moatte dângmin; ngale ate humnâng mihwun heh tângroo lahma jekthuk hunte dângmin; ngale atema mihnâng jien hethôte dângmin;

³atea khemmok chempa ngale pong apa ledangmin, rohkomin numnene ngale mêmo mihnyan dângmin; ngale atea ngun nâng nyahrâng hunte ledangmin;



⁴Ngale atea humte tangkâ heh senthemthem jienkhêmte dângmin, ngale ate chhu achha hehmin ate nginkepkep jienrînte dângmin.

⁵Chenrângma ngako atema humte tangkâ heh senthemthem lejienkhêm medang ako, atema Joban nâng putedâlemte Asâthem heh jâtanga meroh jienkhoakhêm min a?

⁶Ngale atea arohroh Joban Niemarang pa kepnyante min ledangmin, eroh medang ako atemin ngam apoarii lahma juchhih chhihjâtah rângrâng echhihjâa.

⁷Atenâng Asâthem heh chhangwah ledangte mihnyan hehmemin nginkepkep chendanga, erohkoba atema rêsê lechohmin ngale juchhih benâng leta mânrii edanga.

Asâthem heh Moatlem Moatte

⁸Asâthem heh moatlem moatte heh jatsen patsen ngale nyahrâng hungkoh lahma moatte dângmin; thin a nyahrâng khemjokte ngale ngun nâng nyahrâng chhahnyoak ledangmin;

⁹thinma hungsâ danglahma Joban ma thinnâng loatjet thuktah toangtangma putedâlem nginpa senthemthem kepte dângmin.

¹⁰Khebengko thinnâng thaksok rêmin, phumma thaksokko asen medang akoba, thinma chenmoa.

¹¹Thin tangnyu heh min jatsen dângmin ngale mihmin lechhihthôte dângmin; ngale thin a chentô nâng hungnoap rinnoap ngale toangtangma moatte dângmin.

¹²Asâthem heh moatlem moatte tangnyu wathelolo jôba dângmin, ngale ate chhuchha erediko humte tangkâ heh senthemthem jienkhêmte dângmin.

¹³Henhenma thin moatlem heh senthemthem moeka erehehma thinmîn sensiet eka, ngale chenni ranjô lechei thangma thinma Jisu Krista nâng putedâlem eka ngin heh thôwak eka.

Adongthôn Ngîn



¹⁴Ngama are sitipa nangnâng raangeki, Nga nang tânâng sitsiak echohmin kae ngama thonghun ekang.

¹⁵Phumma Nga meлектong angkomin, are siti pumma nãng Joban humkâ nãng chenroh molihma tângmin a ereheh ejetthukho, ereheh dangeka ahîn Joban nãng putedâlemte Asâthem heh, ere Asâthem heh dangeka toangtang pa rôngsiet rãngma thõng rãngrãng.

¹⁶Nãng rangsoam niem junko nãng roandôngko Joban nãng putedâlem lihma songtong ekipa adongthôn: Atea mihnyan nyuchha rãngrãng danglahma hôngwah, ngale Joban Juma atea toangtang ngama khesokwah, ngale erepa rangkethung wah Joban ngintatte hehmemin khewah. Ate nginpa chentô diak akan nãng phoangthô kohwah, ngale hahtokkhoh phangtangma ate nginko pute wah, ngale atea rangkethung nãng tôansiet wênwah.

1 Timothi 4

Amõang Hethôte

¹Asâthônju ma sâpoangpoang hongjab eka, athôn sanpoatko khuka hehma Joban nãng putedâlem pa jek erea; thinma mothô khoanglepju ngin ekep a, ngale joak ajo ma chenni hethôeka nginpa ekepwak a.

²Arerãngrãng ngin heh mihdiap phhekchhahte mihnyan hehma hethôeka, ngale thinhung pa jankham ma ritsoatwah rãngrãng riitah.

³Arerãngrãng mihnyan hehma dihiak kep pemin achhih ngale wanwanthe phhekchhah pemin lephhek lechhah thin tonga ngama nginmõang heh phoangthôeka. Rohkomin ere phhekchhah heh Joban nãng putedâlem lahma toangtang jette mihnyan hehma Joban nãng dangkoh a ngatdiko phhekchhah rãng Joban ma hâneka.

⁴Joban ma chentô hântah a ereheh phangtang asen tuta; chenjô phethin aho, rohkomin chentôpa Joban nãng dangkoh a ngat rangsoam nungma kepmin,

⁵chenrãngma ngako, Joban jabkhab ngale Joban nãng dangkoh a ngat rangsoam junko chentôpa sâsiet eka.



Jisu Krista Rāngma Haasen

⁶Nangma are ngin heh putedâlemte mihnyan hehnâng merîn mekhah oko, nanga Jisu Krista rāngma haasen edango, ngale erohkoba nangmin putedâlem jabkhab pa keplohma Ju nâng asen edango, ngale nangnâng hethô eho toangtang jabkhab pa nangma kepeko ngama ekhesok o.

⁷Rohkomin Joban nginkong ledang tewa nginchha heh nekthômîn, ereheh thômîn pa sekho. Erenoma nangdede chenroh Joban jette roandông jiendôngmin a ngama latriio.

⁸Phoang nâng trening keppa phoang rāngma asen, phumma Junâng trening mekep eko erepa chentô rāngma asen, chenrāngma ngako, Junâng trening keppa athângwah roandông komin ngale khediwah roandông komin nāngma rangkepmin.

⁹Arepa toangtang jabkhab, erohwah nangma senthemthem putedâlem lohma kep o.

¹⁰Nima latrii lihma chaanrii moeki, chenrāngma ngako, nāngma ahin Joban nâng tok anaa eki, ate jôba chentô Pângte, ngale ajahthem pejô henhenma atenâng putedâlem eka ereheh Pângte.

¹¹Thinnâng are ngin heh rîn akhah lohma hethô.

¹²Henmejô nangnâng leputedâlem nekchen dangeho, chenrāngma ngako nanga paangmihthu, rohkomin putedâlemte mihnyan hehnâng nangma, jab ajâ, jat apat, hun achet, putedâlem, ngale sâpoangpoang danglohma khesok o.

¹³Nga makaka, nang sanpoat le chaan amân heh nok atang hehnâng Joban nyapraang heh weihko lohma tongo, ngale Joban ngin heh thôkoh, ngale hethô lohma tongo.

¹⁴Nangma Ju chaanchoh eko pemin kep o, ere Ju chaanpa nangma chohmako Mōng heh ma thôwah ngale khhepho phannang heh ma nang khohko thin dekma sahlo lahma rangsoam koh poatko kohwah.



¹⁵Ere moatlem heh nangma hungkoh lohma mo o, erohkoba anga ngama nangma moatlemsen moeko pa ekhea.

¹⁶Nang-dede jetlohma tongo, ngale nangma hethôeko hehmin jetlohma hethôo. Are moatlem heh lejek thangma mo o, chenrãngma ngako, nangma aroh memo oko, nangdede khomin epeo, ngale nang ngin tatte hehmin kho epea.

1 Timothi 5

Putedâlemte hehma Jetthin Niemarang

¹Phannang hehnâng nekritnga, rohkomin nangwa rãngrãng thonghun lohma rosep o. Nang noma leta hehnângmin nangnaa rãngrãng thonghun lohma thien o,

²Dihiak phannang hehnâng nyong rãngrãng, ngale leta hehnâng hungsâ ma nangnaa rãngrãng thonghun o.

³Linlinjô atelolo dângte janthoinyu hehnângmin mînchen o.

⁴Rohkomin janthoinyu pa chhu achhawin medang ako, khebengko thin chhuchha hehma thinnâng senthemthem chenbeng khoakhem a, chenrãngma ngako eroh thinma thinnyong pa mekhoakhem akoba thinma thinnyong awa nâng thin khoakhêm thã ngakkohwah rãngrãng edanga, ngale erohkoba Joban rinme eka.

⁵Atenâng sok arête henjô aho atelolo dângte janthoinyu, pumma Joban nâng lolo tok anaa lahma rangwo rangnyek Joban ma atenâng chohsokrãng rosep lahma tongeka.

⁶Rohkomin hen janthoinyu ma ate roandôngko khuhah nâhah ngit aloam nânglolo huneka, ere janthoinyu pa ahînthu mejô lâriitah.

⁷Thinnâng are ngin heh rîn akhah o, erohkoba henmemin thinnâng achhih lenga edanga.

⁸Rohkomin thinma thintang amang heh lekhoakhem medang ako, ajahthem pejô thinhumte tangkâ heh lesû lere medang ako, thinma Joban nâng



putedâlem mah, ngale thin a Joban nâng lepute dâlemte heh nomemin achhih.

⁹Janthoinyu henjô rangpâ roak erok noma ajah ledang kako, atea ahan janthoinyu heh demnâng khorok nekjohweih. Ere lekojô, atea ditthe loloba dela nâng wângte dângmin

¹⁰ngale atea moatlemsen moatte dihiaknyu ngama mînwînte dângmin: ate chhuchha heh senthemthem dôngkhêmte, ngale ate humnâng mihwun heh tângroo lahma jekthuk hunte, Kristan hehrângma numnene danglahma chohsokte, chêmcheite mihnyan hehnâng chohsokte, ngale atea roantangma moatlemsen moatte dângmin.

¹¹Rohkomin roandongthu janthoinyu heh khorok nekjohweih; chenrângma ngako, chenthu thinhung thinrinma dela nâng ngakwâng mehun tahko, thin a Krista tâwah ngakchhoan erewak a,

¹²ngale thinma khemako Krista nâng toamsem tah heh lemo thangma jeklahma achhihrâng elitjâwak a.

¹³Ngale thinma thin sanpoat pa humthe kowah humthe nâng phoang dânkhoam lahma elien thukwak a; ere nomemin achhih thônpa dangeka, mihmîn heh chhihthô, ngale mihmoatlem hehnâng phoang nyenmîn, ngale thinma lethôli ngin heh phoangthô erewak a.

¹⁴Eroh wah Ngama roandongthu janthoinyu heh dela nâng ngakwâng lahma chhuchha heh chha, ngale thinhumte tangkâ heh khoakhem relahma metong ako asen ngama thonghun ekang, thin eroh medang akoba thinran hehma thinnâng chhihthô thin chenjô aho edanga.

¹⁵Chenrângma ngako wanwanthe roandongthu janthoinyu hehma joak ajo dijunrâng ngakchhoan eka.

¹⁶Rohkomin Kristan dihiaknyu humkâ nâng janthoinyu metong ako, thinma Asâthem hehma chenchohsûa ngama Asâthem hehnâng lephe thangma thindedema chenchohsûa, erohkoba Asâthem hehma atelolo dângte janthoinyu heh khoakhem lahma eta sùarea.



¹⁷Khhepho phannang danglahma henma Asâthem hehrâng moatlemsen moeka ereheh nâng nyahrâng soangraangmin, ajahtem pejô henhenma nyahrâng latrii lahma Joban nginkong heh phoangthô lahma hethôeka ereheh nâng soangraangmin.

¹⁸Chenrângma ngako, Joban nyapraangma ngaeka, “Chenthu nangma mânpong nâng chhah menekthuk oko ate thunpa nekkhhek” ngale “Kaammoatte hehnâng thin dekbi thâpa kohmin jôba.”

¹⁹Wanii ba erenoma ajahma hâkhi lehôan kako, khhepho phannang lelatnâng kaamchhih moeka ngama menga ako erengin pa nekkep.

²⁰Papkaam moatte hehnâng nok atang mako ritngao, erohkoba ahan hehmin echeia.

²¹Joban ngale Jisu Krista erediko rangkethung wah Joban ngintatte Asâthôan heh mathahko Ngama nangnâng thôkoh eki, are rîn akhah eki nginpa nangma keplohma nangma chenjô memo okomin hennângjô thhensok lehôan thangma mo o.

²²Hennângjô lemlienma thinkhoko dekma sahlo lohma Teso moatlem moatte nekdangthuk. Mihhan heh papnâng nekjoh ngekrii; nangdede sâpoangpoang tongo.

²³Nanga roantangma achetjû dâng phumma Jololo nekjok, nangwok sênrângma angurti wahmin roanchhe jok o.

²⁴Khaka mihnyan heh pappa mitma akhe, ngale thinnâng achhih ngama ngatmama lemlienma loatjâ eka; rohkomin khaka mihnyan heh pappa khedinâng hong lahma ekhe e.

²⁵Ererângrângjô kaamsen pemin senthemthem khe eki, ngale chenchen pa senthemthem lechohkhe dangeka erehehmin tahuh tongmah.

1 Timothi 6



¹Haa dângte hehmin māmâ tângtewa nginkepkep ngale thinran cheichei dângmin, erohkoba henmemin năng Joban mîn ngale năngma hethôeki ngin heh lelatnâng lechhihjab edanga.

²Kristan tângtewa haa dângte heh māmâ tângtewa nginlekep ledangmin, chenrăngma ngako thinmin thinpho anaa jôba. Erenoma, thinnâng ajahba sênkhoakhêm min, chenrăngma ngako, thinma mokoh eka hehmin putedâlemte ngale thinma hun achhâ wakeka.

Amông Hethô ngale Toangtang nâng Techhu thôn

Are ngin heh nema metkep hethô en ngale phoangthôkoh en.

³Henhenma năng Teso Jisu Krista ngin ngale năng rangsoam niem pumma hethôeka ngin heh lekep thangma lihân niemarang amông heh hethôeka

⁴erehehema chenmin lejet thangma ngam apoarit loloba rewak eka. Ngale atea Joban jabkhab junma chhiakmîn lahma mênmîn loloba thonghun lahma tongwak eka, ngale erejunko mihnâng mitcek, chhiakmîn, mihnâng dômmeke, ngale achhih ngenâng phoangkhâ,

⁵ngale kheri chhih erediko thinnâng toangtang pa aho dâng phumma roantangma achhiakmînli heh lolo hongsiet wakeka. Thinma rangsoam niem keppa techhu dângli ngama thonghun eka.

⁶Phumma năng ngenâng chenni tongehia ere demko năng rinme wokme medang eko, rangsoam niem pumma năng linlin nyahrăng techhu edangthuk hi.

⁷Năngma are hahtokkhoh ko chenni kephûtih a? Chenni min kephû mahtih! Ngale năngma are hahtokkhoh kowah chenni tâkep chhoanmin a? Chenni min leta kepchhoan min!

⁸Erohwah, năngnâng phhekchhah le khet akhu metong thiko, erepa năngrăng lâletah.

⁹Rohkomin henhen techhu dânghun eka, ereheh achhih ngenâng jâriieka, ngale benâng mânritwah răngrăng hung arin nâng rongrup achhihli heh thonghun eka pumma jâsiet lahma chhihsiet eka.



¹⁰Chenrãngma ngako, ngun nãng hun junko rongrup achhih heh hongeka. Khaka hehma ngun nãng nyahrãng hunlahma Joban nãngmin putedâlem tumah, ngale thinhung arin hehmin rongrup achhihli heh thonghun lahma chhihjâ eka.

Pol ma Timothi nãng Rîn Akhah

¹¹Rohkomin nanga Joban mihnyan, arerãngrãng chentô hehwah ataangnãng tongo. Toangtang, Joban rinmeli, putedâlem sen, hun achet, chentôpa mamtadô, ngale numnene dângrãngba latriio.

¹²Putedâlem ngenãng toatchhoan mînwah rãngrãng senthemthem dango, ngale nangdede rãngma roantang roanjêng roandông khope pa choh o; chenrãngma ngako nangma ajahthem mihnyan heh mathahko nang putedâlem pa rongtêngtêng putedâlem lohma khesokdi Joban ma are roantang roanjêng roandông khope pa chohrãngma roeoho.

¹³Ngama arepa chentô nãng roandông kohte Joban mathahko, ngale Pontas Pilat mathahko ate putedâlem pa rongtêngtêng khesokthukte Jisu Krista mathahko nangnâng chien eki

¹⁴nãng Teso Jisu Krista ngakkatjâ Rangwo pa mahong hongko Ngama nangnâng are ngin chien eki heh senthemthem keplohma tongo.

¹⁵Sanpoat pa methâng tahko Joban ma ate ngakkatjâ rangwopa ewothuk a. Joban lolo jôba rangkohte Joban, atelolo jôba Pângte Joban, Lowang kowahmin Lowangdong thôn, ngale Teso kowahmin Teso dongthôn.

¹⁶Ate lolo jôba chenthumin leriite; atea henmin letahû thin wenphiak tâko songeka. Henmemin ate mathat kheka; henmemin ate khemah. Ate lolo nãng jôba roantang roanjêngma toak asânmin ngale atenâng lolo jôba roantang roanjêng lechhihjâ chaantong eka! Amen.

¹⁷Are hahtokkhoh roandông kowah ngun akem ngale chhahkhem ngenãng techhu dângte hehnâng lengamrîi rãng thôkoh, ngale thin ngun akem le chhû alû hehnâng nekchen dâlem wakeka, rohkomin nyahrãng chhahme



danglahma nãngnâng khuhah nâhah tongrãng chentôpa chohkohte Joban nãnglolo chen dâlem wak a.

¹⁸Moatlem sen moatrãngma thôkoh, moatlemsen ngenâng techhu rãngrãng chendangwak a, erediko chhahme ngale mihhan heh demnâng phenphen sensen chenkep wak a.

¹⁹Eroh memo akoba thinma khediwah thin roandông rãng lesekmah tuli eta khôanthien wak a. Ngale erohkoba thinma alinlin toangtang roandôngpa eta choh a.

²⁰Timothi, nangnâng Joban ma chenni sokare rãng chienthô erepa senthemthem sũareo. Sek ho ngale aba ata ngin heh nekphoang chhiakmîn, ererãngrãng ngin heh phoangchiak mînko khaka hehma “Jet ajien” reki ngama thonghun eka.

²¹Chenrãngma ngako, khaka hehma lâjet lâjientih ngama thonghun lahma thinma Joban nãng putedâlem pa mahjâ eka. Joban mînchenchaan nekhu chentô demnâng chentonghèn.



2 Timothi

2 Timothi 1

¹Joban hungsi junko Jisu Krista moattat chhoante rãng, ngale Joban ma toamsem tah roandôngpa Jisu Krista demnâng roamlihma chohmin ngama phoangthôkoh rãngma chienchhoan wah Pol ngewah raangeki-

²Ngama nyahrãng ahun chha Timothi nãng raangeki: Nãng Wa Joban ngale nãng Teso Jisu Krista ma nangnâng mînchenchaan, ahun, ngale mêmô chenkohho.

Dangkoh a ngat ngale Hungdôngsiet

³Ngate Ngawa hehma soamtôtah Joban ko Ngamemin hungsâ rinsâma soamtô lekma dangkoh a ngaekang. Ngama nanga rangwo rangnyek Nga rangsoam roakweih thonghun lihma Joban nãng dangkoh a ngaekang.

⁴Ngama nang mitphi jâtohpa thonghun ekang, ngale Ngama nang nyahrãng chohkhe huneki, erohkoba Nga khuhah nãhah edangang.

⁵Ngama nang putedâlem sen pa thonghun ekang, nangwi Lois ngale nang nyong Inuic nimemin erohjô senthemthem putedâlem wah. Nang memin erohjô putedâlem eko ngama thonghun ekang.

⁶Erohwha Ngama nang khoko dekma sahlo lihma rangsoam kohko Joban ma nangnâng Ju ngenâng hinhô kohthôpa senthemthem thien o ngama ngakthông thôkoh eki.

⁷Chenrãngma ngako, Joban ma nãngnâng kohehi Ju pumma nãng chephoat dangthuk mahhi; Erenoma, ate Ju pumma nãngnâng chaankoh ehi, ngale hun achet, erediko mãmâ dede tâdôrit chaankoh ehi.

⁸Erohwha, nãng Teso hãkhi dângrãng nekrêsê; ngale Krista rãngma phâtek nãng khhekritte Nganâng min nekrêsê hang. Erenoma, Nginkongsen rãngma chêmriroh reo, eroh tâchêmrit rãng Joban ma nangnâng chaankoh eho.

⁹Atema nãngkhu pepâng lahma atedede mihnyan dângrãng rooehi, erepa nangma moatlemsen moatjunma dangmah, ate dedema hunlahma ate



mînchenciaan junko pepâng ehi. Rangle Hahtokkhoh hân mama are mînchenciaan pa atema Jisu Krista junma nãngnâng kohehi.

¹⁰Rohkomin are mînchenciaan pa nãng Pângte Jisu Krista kalahma khesok ehi. Atema arit chaanpa mahsiet eka ngale nginkongsen junma chenthumin leriitu roandông loatkhesok ehi.

¹¹Joban ma are Nginkongsen pa phoanghethô rãng ngale phoang thôkoh rãng moattat chhoante dangthuk ehang,

¹²ngale erejun kowah Ngama are chêmchei heh choh ekang. Rohkomin Nga athâng hehmin hung dongdong tongekang, chenrãngma ngako, Ngama hennâng tok anaa ekanga erepa Ngama jet ang, ngale atema Nganâng chenni sũare thuk ehanga erepa atema ere Rangwojâ pa mahûhûko senthemthem eta thien a ngama putedâlem ekang.

¹³Ngama toangtang jabkhab nangnâng hethôti hehnâng rongtêngtêng lolohma tongo, ngale erejunko dango, erediko Jisu Krista demwah nãngkhu putedâlem le hun achet junko tongo.

¹⁴Nãngkhu khenwah sôngte Asâthôanju chaan junma nangnâng sũare thuktho asenli heh senthemthem thien o.

¹⁵Nangma ajet Asia diakwah chentô mihnyan hehma, ngale Phigelus ngale Hirmogenes hehma Nga thînphe ehang.

¹⁶Teso ma Onisiforus heh tangkâ nãng chenmînchen a, chenrãngma ngako, atema Nganâng melângdep chohsû thang. Ngale Nga phâtek nãng tôngpoat komin atea Nganâng rêsê mahthang.

¹⁷Rohkomin ate Rom nãng hokkhoam rienrien lemlienma Nga machoh chohkhe lemsûthang.

¹⁸Teso ma ate ngakkatjâ Rangwo ko Onisiforus nãng chenmînchen a! Ngale atema Ngarãng Ifisus nãng chentô mokoh thanga ereheh nangmemin senthemthem jet o.

2 Timothi 2



Jisu Krista Nginkepkep Dângte Sipâhi Sen

- ¹Timothi, nanga Ju ngenâng Ngachha rãngrãng, erohwah Jisu Krista junma nãngma choheki mìnchennaan ko rongtêngtêng dango.
- ²Ngama Ajahthem mihnyan heh mathah nãng hethô lekma nangma tatthang ngin heh kep o, ngale erengin heh dâlemlî mihnyan hehnãng thinma mihhan nãng chenthôkoh a ngama hethôo.
- ³Jisu Krista nginkepkep sipâhi sen rãngrãng danglohma nangmin chêmriio.
- ⁴Sipâhi pumma ate sahhabwa hungsênthuk rãnghun a, erohwah atea sipâhi ledangte mihnyan heh demnãng thin rãngrãng sisem johdangmah.
- ⁵Ngale toatchhoanmînte pumma toatchhoanmîn niemarang junko lechhoan kako atema thã lechohmin.
- ⁶Nyahrãng chaanrii lahma pitmoatte pumma atema hongmoeka kowah khebeng thôn bengchhah min.
- ⁷Ngama chenni jabekanga erepa thonghun o, chenrãngma ngako, erepa nangnãng Teso ma phangtang ejetthukho.
- ⁸Aritwah ngakhînte Jisu Krista nãng thonghun o, atea Devit chha dãngwah, ngale are nginpa Ngama Phoangthôkoh ekang Nginkongsen ko hethô ekang.
- ⁹Ngama Nginkongsen pa phoangthô junko, Ngama chêmchoh ekang, ngale mihngoan rãngrãng janruma khhekthien ehang. Rohkomin Joban Jabkhab pa janruma takhhek thienmah,
- ¹⁰ngale are chentô chêmchei pa Ngama Joban ma ren eka mihnyan hehrãng chêm ekang, ngale erepa thin memin Jisu Krista junma koheka khope pa chenmam choh a ngama chêmrii ekang, ngale roantang roanjêng khuhah nãhah edangwak a.
- ¹¹Arepa toangtang jabkhab: “Nãng ate demnãng mejohrii eko, ate demnãngjô ejohhin e.



¹²Nāngma chêmchei pa arohjô mamtadô lihma metong eko, Nāngmin ate demnâng ejohpên e. Nāngma ate lehun medang eko, ate memin nāngnâng lehun edanghi.

¹³Nāngma lepute dâlemjô medang ekomin, atea putedâlemlî, chenrāngma ngako, atema atedede nāng jiendiap chhahriimah.”

Kaamsen Moatte

¹⁴Are nginpa nāng mihnyan hehnâng thōngthô koh, ngale Joban mathahko thinnâng are jabkhab hehrāngma lemênmin rāng thôkoh. Eroh memênmin eko chenjô asen hongdangwāng mahra, atatte mihnyan heh ba echhihsiet a.

¹⁵Joban mitsokko nangma chentô tasen moeko eretô senmo o, māmā moatlem junko rêsê lethangte mihnyan rāngrāng chendango, ngale Joban toangtang nginkongsen pa punriri hethôo.

¹⁶Joban ngin ledang sekhota ngin phoangthô mînte hehwah taango, ererāngrāng ngin thômînko mihnyan pa Joban tâwah ataangsiet ba reka.

¹⁷Arerāngrāng hethô ekapa sek phangtang nāng chimâ mālagma sekpa thōanchhih phhekwhah rāngrāng dangeka. Arerāngrāng hethôte mihnyan wanii pa Himinaus ngale Filitus nii dāngwah.

¹⁸Thinma toangtang lemkhô wah kechhoan lahma mihhan hehnâng nāngkhu ritwah ngaksat rangwopa lientah ngama phoangthô kolagma mihhan putedâlem heh chhihsiet eka.

¹⁹Rohkomin Joban ma longjan khohko rongtêngtêng khiet eka longpa leta dokjâmin; ngale ere khohko are jabkhab heh raangeka: “Teso ma ate mihnyan heh ajet” ngale “Henhenma thin a Teso nāng putedâlem eki ngama ngaeka ereheh kaamchhih moatwah ataang rêmin.”

²⁰Humdong nāng rongrupjat tit alek ngale bâti khoakti heh tonga: Wanwanthe pa kem ngale jan wah hōan eka, khaka pa bāngwah hōaneka, ngale khaka pa hahwah hōaneka; wanwanthe pa kuh awā nāng keprāng hōaneka, ngale khaka pa jengreko keprāng hōaneka.



²¹Henhenma thindede moatlem chhih hehwah sâriri danglahma tongeka, ereheh kaamsen nâng ekep a, chenrăngma ngako, thin a asâ, ngale thin Tângte rãng alemthoan, ngale chentô kaamsen katsen hehnâng ekep a.

²²Janchhô paangmih hehma moat huneka kaamchhih hehwah ataangreo, ngale henhenma hungsâ rinsâ danglahma Teso nâng chohsokrăng rosep eka ere mihnyan heh demnâng toangtang, putedâlem sen, hun achet, mêmoma tôngrăng latriio.

²³Rohkomin aba rãngrăng nginmõang phoang chhiakmîn hehwah ataangreo; nangma ajet athoanko amênmin jôba erewak a.

²⁴Teso haaheh lephoang mênmin. Atea chentô demnâng asen tuta dângmin, ngale hungmông rinmông danglahma hethôte asen dangmin,

²⁵ngale ate lelatnâng dângte heh numnene danglahma pûnsiette dângmin, chenrăngma ngako, thinmin Joban ma hunglitthuk lahma toangtangko engakhu wak ra.

²⁶Ngale joakma lolahma ate hungsiko mothuk lahma thien eka kowah, thinhung nâng moatlem chhihba memo ekia ngama ngakchoh thonghun lahma juchhih bewah epechhoan wak a.

2 Timothy 3

Rangkuh sanha thôn Sanpoat

¹Thonghun en rangkuh sanha thôn sanpoatko nyahrăng chêmchei sanpoat ehûra.

²Mihnyan heh chhahnyoak, chhahkkeh, ngam apoarit, ngale mâmâ dede rãnglolo thonghun lahma edanga; thin a mihdûmmek, nyong awa nginlekep, dangkoh a ngat lejet, ngale Joban ran lechei edanga;

³thinma mihnâng lemînchen, map lekoh, mihchhihthô, mênkhe, ngale nyahrăng cheili edanga; ngale thinma asenli nâng chhihchoh erea;



⁴thinma mihheh phoang chensãng, hen roakmin leweih, ngale ngam apoarit erewak a; thinma Joban nãng hun noma khuhah nãhah dãngko lolo ehunwak a;

⁵Thinma rangsoam niem pa mĩnrãng lolo keplahma, alinlin rangsoam niem chaanpa thinma lekep edanga. Arerãngrãng mihnyan heh demwah ataangreo.

⁶Arerãngrãng mihnyan hehwah wanwanthe pa mihhan heh humnãng chhoan lahma dihiaknyu thinpap hênlih pa hèn lahma tãngte, ngale chentô achhihli hehnãng phetwãn lahma tãngte dihiaknyupe heh ephoang chhihsiet wak a,

⁷ere dihiaknyu hehma roantangma toantang pa jet hun eka, rohkomin chenthujô thinma toantang pa chohjetmah.

⁸Janis le Jambris nii Mosa lelatnãng dangtah rãngrãng, are mihnyan hehmin toantang lelatnãng dangwak eka - are mihnyan heh kheri ma senthemthem momah, ngale thin a putedãlem nãngmin achhih.

⁹Rohkomin thinma eroh ajah talek momah, chenrãngma ngako, anga ngama thinma aba kaam moeka pa ekhea. Eroh jôba Janis le Jambris niimin dãngwah.

Athôan Rĩn akhah

¹⁰Rohkomin Ngama hethôeki nginpa, ngajat apat, ngale nga roandôngko mongthem heh nangma kepeko; nangma nga putedãlem, nga hungmông rinmông, hun achet, erediko ngama tadô ekang hehmin lâkhe thang,

¹¹Nganãng chêmchei thukthang heh, ngale Ngama chêmchei chohtek hehmin nangma ajet. Ngale Ngama Antiok, Ikoniem, ngale Listra nãng nyahrãng cheili chêmchei hũlahma tadôtek hehmin nangma phangtang jet! Rohkomin ere chentô hehwah Teso ma pesietthang.

¹²Jisu Krista demnãng roamlahma henhenma Joban ma huneka rãngrãng roandông dônghun eka erehehma chêmchei chohmin;

¹³ngale mihnyan chhih le mihphoang diapchhahte mihnyan heh jêngjah jahchhih echhihjáa, thinma mihheh phoang diapchhah demko thin dedemin ediap chhahriia.



¹⁴Rohkomin nangnâng hethôti hethôti rãngrãng nanga rongtêngtêng putedâlem lohma roantangma toantang dango. Nangnâng hethôte heh henhen a erepa nangma jet o,

¹⁵ngale nangma thonghontan nang letachha thuma, nangma Asâthôn Joban nyapraangpa ajet, erpumma nangnâng Jisu Krista nâng putedâlem junma khope chohtin buthi mongthemsen heh ekohho.

¹⁶Chentô Joban nyapraangpa Joban hung junko raangeka ngale erepa nyahrãng alemli thôn toantang pa hethô rãngmemin alemli, kaamchhih moatte hehnâng ritngatrãng, athe heh pûnsietrãng, ngale toantangma jiensông rãngma rîn akhah rãngmemin nyahrãng alemli thôn,

¹⁷erohwah, henma Joban nâng soamtô eka ereheh chentô asenli moatlem heh tâjien moat akatte dângmin.

2 Timothi 4

¹Ahînte mihnyan ngale riichoante heh rête Joban ngale Jisu Krista mathahko Ngama nangnâng chien eki, chenrãngma ngako atema Lowang danglahma pênrãng kaera

²Joban nginkongpa phoangthôkoh, ngale lejak thangma phoangthôkoh (Sanpoat achhih medang komin, ba asen medang komin), chhînthô, ritngat, hungdongsiet rewak o, ngale erepa nanghung mongsietrii lohma hethôwak o.

³Mihnyan heh chentô nginkongsen kowah toantang ngin hethô ekako lenyoak jetat sanpoat ehûra, thin dede hung junko edangwak a, ngale thin nâma chenni jetat huneka erengin heh thinnâng hethôte lolo ajahjah ekhôngansiet wak a.

⁴Thinma toantang nginko lenyoak jetattu thangma tewa nginchha thakthômîn heh lolo enyoak jetatwak a.

⁵Rohkomin nanga chentô sanpoat roakweih jetrii lohma tongo; chêmchei hehmin tadô, ngale Nginkongsen phoangthô moatlem mo o, ngale nang moatlem chentô nâng Joban haa rãngrãng danglohma mo o.



⁶Nga dangekang, Nga roandông koh sanpoat pa lâhûtha; are Nga hahtokkhoh roandôngpa phethien sanpoat pa lâthângtah.

⁷Ngama atoat chhoanmîn ko senthemthem lâta toatchhoan mîntek, Ngama lemra laangriri lâta chhoantek, ngale Ngama senthemthem putedâlem ekang.

⁸Ngale ade phumma Ngarãngma ajienthã khaphok pa thienko lahma tonga, erepa Nga a Joban demnâng toangtang dângdi echoh ang, ngale erepa Teso ma mihnyan heh toangtangma rênjâ rangwo ko Nganâng ekohhang - ngale Nganâng lolo ledang, ate ngakkat pa nyahrãng hunlahma bemlâte chentô nângmin ekoh a.

Pol Hungkhen wah Jabkhab

⁹Nanga Ngatânâng sitsiak katrãng thonghun o.

¹⁰Dimas ma are hahtokkhoh roandông kowah hehnâng nyahrãng hunlahma Nga thînthien lahma Thisalonika nâng kaeka. Krisen a Galatien nâng lâkatak, ngale Titas dangeka Dalmatia nâng lâkatak.

¹¹Luk loloba Nga demko tonga. Mak nangdemko sietlohma karo, chenrãngma ngako atema Nga moatlem hehnâng eta chohsû hang.

¹²Ngama Tikikas a Ifisus nâng chienkattek.

¹³Chenthu nang anâng katko Ngama Nga kut Karpus tâko phethientek pemin toankat kohhang; titab hehmin katkohhang, ngale ngemkhoan wah hânwah nyapraang hehmin toankatro.

¹⁴Jan tupte Alexender pumma nyahrãng chêmsiet thang; Atema chenroh moeka erejuko Teso ma ate nângmin chenngakkoh a.

¹⁵Nangmin atema nekchen chêmsiet ehoma atewah jetlohma dango, chenrãngma ngako atea nângma thôeki nginkong heh lelatnâng nyahrãng cheili dangeka.

¹⁶Khebengko Ngaru henjô rumahthang, Nga dedeba pesietritwah; chentôma Nga phethien lahma chhoanwah. Joban ma erejuko thin khoanâng nekchen chhichoh eka!



¹⁷Rohkomin Teso Nga damnâng johtong lahma Nganâng chaan kohwah, erohwah Jews ledangte hehma chohtatrăng Ngama nginkongsen pa senthemthem taphoang thôték; ngale Nga ritphe nemwahmin pesietthang.

¹⁸Ngale Teso ma Nga chentô achhih hehwah pesiet lahma ate Hahsông rangkethung wah nâng senthemthem esietwên hang. Atemîn roantang roangjêng rãng chendonga! Amen.

Athôn Salem

¹⁹Ngama Prisila ngale Akuila erediko Onesiforus hehtang hum tangkâ hehnâng salem matkat erâng.

²⁰Irastas a Korint nâng tongeka, ngale Ngama Trofimus a Miletus nâng phethien ekang, chenrăngma ngako, atea achet rewah.

²¹Nanga rangpa dângmako anâng hokkatrăng thonghun o. Ilubulus, Pudens, Linus, ngale Klaudia hehmemin thin salem matkat eho, ngale ahan Kristan hehmemin matkat eho.

²²Nangju demnâng Teso chenjoh tongho. Joban mînchenchaan nekhu chentô demnâng chentonghèn.



Titas

Titas 1

¹Joban haa ngale Jisu Krista moattat chhoante Pol ngewah raangeki. Nga Joban mihnyan heh putedâlem pa rôngsiet erediko năng rangsoam niem pumma Joban toangtang ngin hethôeka heh thinnăng hethô răng renlahma chienchhoan ehang,

²erepa roantang roanjêng roandông chohrăngma putedâlem eki. Are roantang roanjêng roandôngpa Joban ma rangbeng habbeng thuma năngnăng kohrăng toamsêm wah, ngale Joban ma mothô thômah,

³ngale sanpoat thangko arepa Joban ma ate nginkong demko loatsietkat era. Arepa phoangthô răng Nganăng chienwah, ngale Ngama erepa năng Păngte Joban ma chien junko phoangthô ekang.

⁴Titas, Ngama nangnăng raangeki, nanga Ngarăngma năngkhuma aroamma putedâlem eki junko Ngachha linlin răngrăng kepeki. Năng Wa Joban ngale năng Păngte Jisu Krista ma nangnăng mînchenchaan ngale mêmô chenkohho.

Titas ma Kret năng Joban Moatlem Moat

⁵Ngama nanga Kret năng phethien eki, erohkoba nangma malaangmo moatlem heh eta laangmothien o, ngale chentô hahdaang hehnăng Asăthem heh khhepho phannang heh renthien o. Ngama nangnăng hethôti heh thonghun o:

⁶khhepho phannang heh mihma chhihthôli nekchen dangeka; atea tangnyu wathelolo kepte dăngmin, ngale ate chhuchha hehmin putedâlemte dăngmin ngale ngem ngah răngrăng ngin lekepte ledangmin.

⁷Chenrăngma ngako Asăthem heh khhepho phannang heh Joban moatlem moatte, erohwah, atea mihma chhihthôli chenmin aho dăngmin. Atea ngam poapoa, erediko rinkhahla, khemmok chempa, ngun akem năng nyahrăng chhahnyoakte min ledangmin.



⁸Atea mihnâng chohsok hunte, erediko chenrepa senlia ereko hunte dângmin. Atedede hung tâmông sietritte, toangtang, Asâ, ngale apun alemko dângte dângmin.

⁹Atenâng hethôeka nginkongsen kowah jabkhab heh senthemthem kepte dângmin. Eroh medang akoba ate memin mihhan hehnâng toangtangma hethô lahma thinhung eta dongsiet a, ngale toangtang lelatnâng dângte mihnyan hehnângmin thin a athe ngama eta khesok a.

¹⁰Chenrãngma ngako jahmông mihnyan, Judiejem wah litdangtah heh Joban jabkhab lelatnâng danglahma, hota ngin thôlahma mihheh diapchhah eka.

¹¹Ere thinma ledangli nginmông phoangthô eka heh jeksiet remin, chenrãngma ngako, thinma ledangli nginmông heh hethô lahma chentô humte tangkâ heh hungke thukwak eka, ngale erepa rêsêli thôn, thinma ngunbi rãnglolo moeka.

¹²⁻¹³Arepa thindede Kret jat mihnyan mông wathema toangtang jabwah, “Kret wah mihnyan heh roantangma mothô khoanglep, thin a wunnagem chhih rãngrãng, ajô ngale chenjô lemo thangma jokphhek chhah lolo jetwak eka.” Erohwah nangma thinnâng nyahrãng ritnga wak o, erohkoba thin putedâlem pa asen edanga

¹⁴ngale thinma Jews heh tewa nginchha hehmin lekeptu edanga, ngale toangtang jabkhab lelatnâng dângte mihnyan heh ma chieneka moatlem heh lemotu ejekwak a.

¹⁵Hen mâmâ dede sâpoangpoang dangeka ereheh demnâng chentôpa asâ tuta; rohkomin henhen ngeksietrit reka, ngale lepute dâlemte a ereheh rãngma chenjô asâ aho, chenrãngma ngako, thinma thin kheri ngale hung arin heh ngeksiet eka.

¹⁶Ere heh ma thin a Joban jette mihnyan ngama ngarii wakeka, rohkomin thin moatlem junko thinma Joban ngin kep mah. Thin a nyahrãng chinnyali ngale ngin lekepte, chenni moatlemsen moat akat rãngjô senmah.



Titas 2

Niemarang Sen

- ¹Rohkomin niemarang sen junko chenpa pun eka erepa nangma hethôo.
- ²Phannang hehnâng numnene, hungchit rinchem, ngale mâmâ dede hung tâmông sietritrăng rîn akhah o; ngale putedâlem, hun achetmîn nângmin asen chendangwak a, erediko atâdômin chenrewak a.
- ³Ererãngrãngjô wiku phannang dihiaknyu hehnângmin thin roandôngko sâpoangpoang sôngtông rãng rîn akhah o. Thinma mih nekchen chhihthô eka, ngale khemjok kânia nekchen dangwak eka. Thinma chenpa asenli a erepa chenphoang hethôwak a,
- ⁴ngale thinma roandông poat dihiaknyu hehnâng mâmâ tangwa ngale chhuchha hehnâng hun rãngma chen hethô wak a,
- ⁵mâmâ dede hung tâmông sietrit, sâpoangpoang, erediko mâmâ tangwa nginkepkep dângte dihiak sen dângrãng chen hethô wak a, erohkoba henmemin Joban ngewah choheki nginkongsen lelatnâng lechhihthô edanga.
- ⁶Ererãngrãngjô dela warôngpoat hehnângmin mâmâ dede hung tâmông sietritrăng hethôo.
- ⁷Nang dedema chentô nâng jatsen patsen danglohma khesok o. Ngale nangma nyahrãng hung arin kohlohma senthemthem hethôo.
- ⁸Mihma lechhih thôli jabkhab heh jab o, erohkoba nangran hehma nang lelatnâng chenjô lejien chhihjab erêsêriia.
- ⁹Haaheh memin thin tângtewa nginkepkep danglahma chentô nâng thin tângtewa rin chenme thukwak a. Thinma thin tângtewa ngin nekchen danwak eka
- ¹⁰ngale thin tângtewa ngewah chenjô nekchen huhwak eka. Erenoma, thinma roantangma putedâlemli danglahma asen chenkhesok wak a, erohkoba thin moatlem moat junko nãng Pângte Joban ngin hethô ekipa asen ngama ekhesok a.



¹¹Chenrãngma ngako Joban ma ate mînchenciaan pa chentô mihnyan nyuchha heh khope rãng loatsiet eka.

¹²Ere mînchenciaan pumma Joban lejet thangma sôngtông ngale hei ngem hung arin heh pherãng hethôehi, ngale mâmâ dede hungmông sietrii, toantang, ngale hahtokkhoh ko Joban jetlihma sôngtôngrãng hethôehi,

¹³eroh danglihma nãngma dâlemki rangwosen pa bemiae, ere jãko nãng Joban dongthôn ngale nãng Pãngte Jisu Krista rãnghong mîndông demnãng ehongkara.

¹⁴Nãngkhu rongrup achhih ngewah pepãngrãng ate roandôngpa ate dedema kohwah, ngale ate rãngma nãngkhu mihnyansâ dangthuk ehi, ngale roantangma moatlemsen moathunte mihnyan rãng hônehi.

¹⁵Are ngin heh hethôwak o, ngale nang nginko jetatte hehnãng nangma hungdông sietrãng ngale ritnga lohma rîn akhahrãng chaankoh eki. Ngale henmejô nangnãng thãjõ lembe nekchen thonghun eho.

Titas 3

Kristan heh Jat Apat

¹Mihnyan hehnãng thôkoh o, thin pête le thôte jabte heh nginkekep chendangwak a, ngale rongrup ngema asenli tuta chenmowak a.

²Ngale hen lelat nãngjô nginchhih heh lephoang jab ajarãng thôkoh, rohkomin anga nga demnãng mêmoma lemruchoa rãngrãng tuta chendangwak a, ngale roantangma anga nganãng numnene danglahma chenkhesokwak a.

³Chenrãngma ngako nãngkhumín poattheko aba, nginlekep, ngale athe dãngwah. Ngale nãng hungma rongrup achhih ngale hei angem nãng rinmehun pumma haarãng kepwah. Nãngkhu roandôngpa mihnãng mitchek phetwân lihma dãngwah; mihma nãngnãng chhihchoh ngale nãngma thinnãng chhihchoh relihma dãngwah.



⁴Phumma chenthu Joban nãng Pângte ma mînchen ngale hun achet pa hôngdiko,

⁵atema nãngkhu pêpângwah. Rohkomin erepa nãngkhu dedema chenni akomin kaamsenmoat junko dangmah, erepa atedede ngewah mînchenciaan junma pepâng ehi, ngale Asâthôanju junma nãngkhu sâsiet lahma anyan rãng ngakchhathuk lahma roandông nyan kohehi.

⁶Nãng Pângte Jisu Krista junma Joban ma nãngkhu khohnâng Asâthôanju mênchoang kohkat ehi,

⁷erohwah ate mînchenciaan junma nãngkhu Joban demnâng toangtang dangeki, ngale nãngma dâlemtih roantang roanjêng roandôngpa choheki.

⁸Arepa toangtang ngin. Nekhuma are nginpa senthemthem chenjet en ngama hun ekang, erohkoba henhenma Joban nãng putedâlem eken a erehehema ne roandôngko moatlemsen moletma etongen, ngale erepa anga ngarãngma asenli ngale alemli.

⁹Rohko-min aba ata rãngrãng phoang chhiakmîn, te awi heh roandông ngin thômîn, mên ahietmîn ngin, ngale Niemarang hehrãngma mênmîn hehwah ajekre en. Are chentôpa sekhota ngin.

¹⁰Mihphoang phansiette mihnyan hehnâng depniitô ritnga letma thien en, eredikomin erohjô memowak ako thin demnâng chenjô nekroam en.

¹¹Nangma ajet arerãngrãng mihnyan heh mihnyan chhih, ngale thinpap pumma thin a achhih ngama khesok eka.

Athôan Rîn akhah

¹²Chenthu Ngama nangtânâng Artimas le Tikikas mechien katthangko, nanga Ngatânâng Nikopolis nãng chohmîn kahang, chenrãngma ngako, Nga rangpâ pátangma enâng tôngrãng thonghun ekang.

¹³Zinas atea okil, ngale Apolo niinângmin thin loatchhoan poatko chohsû en, ngale thinma chenni lemeka ereheh phangtang chohkoh en.



¹⁴Nǎng mihnyan heh ma sanpoat roakweih moatlemsen molihma tōngmin, erohkoba nǎngma chenni lem ekia ere chentōpa etachohkep e; thinma chenjō lemo thangma nekchen tongeka.

¹⁵Ngademwah heh chentōma salem matkat eho. Putedâlem nâng wanthe dângte nǎng lemruçha hehnâng ni ngewah salem thōkoh. Joban wah mînchenchaan nekhu chentō demnâng chentonghèn.



Filimon

Filimon 1

- ¹Jisu Krista rãng phâtek nãng tôngte Pol ngale nãngnaa Timothi ngewah-Nilemruchha ngale nidemnâng aroamma moatte Filimon,
- ²ngale nang humwah khôante Asâthem hehnâng, ngale nang nya Afia, ngale nangdemko sipâhi rãngrãng johdângte Arkipus nãng raangeka:
- ³Nãng Wa Joban ngale nãng Teso Jisu Krista ma nenâng mìnchenchaan chenkohhèn.

Filimon Hun Achet Putedâlem

- ⁴Nganaa Filimon, Ngama rangsoam roakweih nangmin lepcheh lekma Nga Joban nãng dangkoh a rãngnga ang.
- ⁵Chenrãngma ngako nangma chentô Joban mihnyan hehnâng hun achhâ eko le nangma Teso Jisu Krista nãng putedâlem eko heh Ngama chohtat ekang.
- ⁶Nga rangsoam pa nãngkhu aroamma putedâlemte danglihma nãng roandôngko Krista demnâng roamlihma chentô rangkep ekia ereheh lulitlit chenmam jet o ngama soam ekang.
- ⁷Ngama nyahrãng ahun naa, nang ngewah hun achet pumma Nganâng nyahrãng hungsenthuk ehang, ngale nyahrãng hungdongsiet ehang! Ngale nangma chentô Joban mihnyan hehmin hung lâsen thuktoh.

Onisimus rãng Roatsep

- ⁸Krista mìnko Nga nangpho danglekma, Ngama nangnâng chenni moatrãng chien ekia erepa lesolang thangma moatrãng chien eki.
- ⁹Rohkomin Ngama nangnâng hun achet junko, roatsep ba reki. Are rosep ekipa Nga Pol Jisu Krista rãng moattat chhoante ma rosep eki, ngale athâng hehmin ate rãngma Nga phâtek nãng khhekrii ekang.
- ¹⁰Erohwhah Ngama nangnâng Onisimus rãng rosep eki, atea Ngarãngma Jisu Krista mìnko echha linlin rãngrãng lâdangtah; chenrãngma ngako Nga phâtek khennâng tôngpoatko Ju ngenâng ate rãngma nga a wa rãngrãng lâdangtek.



¹¹Poattheko atea nangrãngma akepli ledangtu dãngwah, rohkomin ade phumma atea akepli lâdangtah nangrãng memin, ngale Ngarãng memin akepli lâdangtah.

¹²Ngama athângheh Ngahung pa ate demko danglekma nangtânâng ngakchien kat erâng.

¹³Nga nginkongsen rãngma phâtek nãng tôngpoatko, nang litko atema Nganâng chenchohsû hangma Ngademko thienhun dãngwah.

¹⁴Rohkomin, Ngama nangnâng metkepkep chohsû hang ngama chienmih; erenoma, Nangdede hungsima chenchohsû hang ngama thonghun ekang. Erohwah nang hungsi ledang koko Ngama chenjô momek.

¹⁵Nang tâwah Onisimus poattherãng taangchhoan tahpa, nangma ate roantang roangjêng rãng jienngakkep rãngma taangchhoan wahmin tadanga.

¹⁶Ngale ade phumma atea haa lolo dangtumah, haa nomemin asen lâdangtah: ngale atea Krista mênko naa rãng lâdangtah. Ngama atenâng chentô hun ekanga! Ngale nangmemin atenâng erenoma ajah ehun o, nangma atenâng haa rãngrãngmin ehun o, ngale Teso mênko naa rãngrãngmin hun o!

¹⁷Erohwah, nangma Nganâng nang lemru ngama methonghun hangko, nangma Nganâng tãngroowah rãngrãng atemin tãngroo o.

¹⁸Atema nangrãng chenni akomin mechhih motahko, ba chenni akomin thâpê mepê thoko, ereheh Ngawah thahang.

¹⁹Arepa Ngadede dekma raang ekang: arepa, Nga Pol ma, engakthum e (Are rãngma Ngama nangnâng chêmthôkoh thin dangmah, nangdede roandông pa nangma Nganâng thâpê pêwah rãngrãng dangeka.)

²⁰Eroh-wah, Nganaa, Teso mênko nangma Ngarãng arepa mammo mêngkohhang; Krista mênko nangpho rãngrãng thonghun lohma, Nga khuhahthuk mênghang!



²¹Ngama putedâlem ekang, Ngama are sitipa nangnâng raang junko, Ngama chenrângma rosep ekia erepa emo o - ngale Ngama ajet linlin Ngama chenrângma rosep ekia ere nomemin nangma ajah emo o.

²²Ere demdemko, Ngarâng thewah thienla kohhang, chenrângma ngako, Joban ma nekhu phangtang rangsoam pa tatlahma Ngamin nekhu tânâng engak huthukhang ngama putedâlem ekang.

Athôn Salem

²³Jisu Krista rângma Ngademnâng phâtek nâng johkhhek ritte Ipafras memin nangnâng salem matkat eho,

²⁴ngale Nga demnâng roammoatte Mak, Aristekas, Dimas, ngale Luk memin matkat eho.

²⁵Teso Jisu Krista mînchennaan nekhu anga nga demnâng chenjoh tonghèn.



Hibru

Hibru 1

Joban Jabkhab pa Ate Chha junma Jab eka

¹Amako Joban ma nãngte nãngwa hehnâng mông heh junma melengdep ngale meleng lemkhô ngema chohjabwah,

²rohkomin athôan sanpoatko atema nãngkhu nãng ate Chha junma chohjab ehi. Ate junma Joban ma rangkhen pa hânwah, ngale atema athôanko chentôpa chohrãng Joban ma ren eka.

³Joban mîndong lahma phiak ekapa atenâng chohkhe eki, ngale atea alinlin Joban rãngrãng, ngale ate jabkhab chaan pumma rangkhen pa roiëka. Chentô mihnyan nyuchha heh pap rãngma map thâkoh diko, chentô noma achaanthôan Joban dekchah ngeko rangkethung nãng tongwãng eka.

Joban Chhapa Adongthôan

⁴Rangkethung wah Joban ngintatte chentô nomemin Joban ma ate Chhapa adong dangthuk eka, ngale Joban ma atenâng koheka mîn pemin thin noma adong koheka.

⁵Chenrãngma ngako Joban ma ate ngintatte hehnâng hennângjô aroh ngamah, “Nanga Nga Chha; thejâ phumma Nga nang Wa lâdangtek.” Roh akole Joban ma rangwah Joban ngintatte hennâng thatngatah a, “Nga ate Wa edangang, ngale atea Nga Chha dângmin.”

⁶Rohkomin chenthu Joban ma ate Chha khhepho pa hahtokkhoh nãng chienkat rãng ngatko, atema ngatwah, “Chentô rangwah Joban ngintatte hehma atenâng soamtô min.”

⁷Rohkomin ngintatte hehrãng Joban ma ngatwah, “Joban ma ate ngintatte heh pông rãngrãng hânëka, ngale ate haaheh wendô rãngrãng hânëka.”

⁸Rohkomin Joban ma Chha rãngma aroh ngatwah: “O Joban, nang Hahsông pa roantang roanjêng rãngma etonga! Nangma nang mihnyan heh khoko toangtangma pên eko.



⁹Nangma chenpa toangtanga ereko hun eko, ngale chenpa achhih a ereko chinnya eko. Erohwah Joban, nang Joban ma ren eho ngale dongsiet lahma khuhahthuk ehopa nang demkowah hehnâng koheka nomemin abâmbâm dong koh eho.”

¹⁰Atema arohmin ngatwah, “Teso, nangma khebeng khoko hahtokkhoh pa bengahwanwah, ngale nangdede dekma rangkethung pemin hânwah.

¹¹Ereheh amahjâ eria, rohkomin nanga lemahjâ min; ereheh phangtang khet akhu chhihjâ rângrâng ethôan chhihjâa.

¹²Nangma ereheh kut nuhthien wah rângrâng enuhthien o, ngale khet akhu litwah rângrâng elit o. Rohkomin nanga roantangma mânthejû dângmin, ngale nang roandôngpa chenthumin lethôanmin.”

¹³Joban ma rangwah ate ngintatte wathe nângjô aroh ngaho: “Are Nga dekchah ngeko tongo Ngama nangran heh nang daphâ khenko danek thinrâng mahôan hôankoh kiko.”

¹⁴Eroh medang ako, ngintatte heh chennia? Thin a Joban nâng soam atôteju, ngale Joban ma khope chohte mihnyan hehnâng chohsokrâng chienkat era.

Hibru 2

Khope Dongthôan

¹Erohwah nângma chohtat eki toangtang nginpa rongtêngtêng keplihma tôngmin, eroh medang ekoba lekesietrii edange.

²Nângte nângwa hehnâng rangwah Joban ngintatte heh ma thôkotah ngin heh toangtang dângwah, ngale henhen erengin junko ledang ngale erengin pa lekep dangtah a ereheh ma chêmchoh tah.

³Eroh medang ako, nângma areto khope dongthôanpa lekep medang eko chenroh jienpemin a? Khebengko are khope pa Teso ma ate dedema bengloatthô kohwah, ngale henhenma ate ngin chohtattah a ereheh memin nângnâng arepa toangtang ngama khesok ehi.



⁴Ere demdemko Joban ma thinnâng rongrup patritli ngale bâritli moatlem heh moko lahma ate hung junko thinnâng Asâthôanju hinhô heh kohlahma erepa toangtang ngama khesok eka.

Jisu ma năngkhu Khope Lemnâng Sen ehi

⁵Joban ma rangwah ate ngintatte hehnâng ahokmin hahtokkhoh nyan pa pênthukmah - năngma ere hahtokkhoh nyan junma thômîn eki.

⁶Erenoma, Joban nyapraang năng aroh raanglahma tonga: “O Joban, nangma atô lânthonghun roh mihnyan nyuchha heh chennia; mihnyan nyuchha hehnâng, nangma aretô thonghun ekoa?”

⁷Nangma thin a rangwah Joban ngintatte heh nomemin poatthe chharăng arin hōan eko; rohkomin nangma thinmîn dongsiet lohma khoakhem ekopa khophok răngrăng phokthuk wakeko,

⁸ngale thinnâng chentôpa pênthuk eko.” Joban ma thinnâng chentôpa “Pênthuk eka” ngama ngaeka; erohwah thin khennâng ledangma chenjô aho. Eroh akomin, mihnyan nyuchha ma athângheh chentô khoko pênlahma năngma khemih.

⁹Rohkomin năngma Jisu a poatthe chharăng rangwah Joban ngintatte heh noma arin hōan lahma kheki, erohwah, Joban mînchenciaan junko atea anga ngarăng riieka. Ngale ate chêmrii lahma ritdi năngma athângheh ate khoko ate choangpe ngale rănghong mînpoan pa khophok răngrăng phokko lahma kheki.

¹⁰Chentô hōante Joban ngale Joban ma chentôpa aterăng jôba hōanwah. Ngale ere Joban pumma ajahthem mihnyan hehnâng ate mîndông demko johroamthuk răngma, atema Jisu năng chêmchohthuk lahma thinkho tâpêsiette rănghōanwah, ngale ere moatlem moat chaanpa Joban năng jôba tongeka. Chenrăngma ngako, thin khope lemkhôko Jisu ma senwên eka.

¹¹Atema chentô mihnyan nyuchha heh thinpap wah sâsiet eka, ngale ate erediko henhen atema sâsiettah a ere chentô hehrăng Wa pa mănthe. Erohwah Jisu ma thinnâng Ngapho anaa ngama roorăng rêsêmah.



¹²Atema Joban nâng ngaeka, “Nangma chenni motoh a ereheh Ngama Nga mihnyan hehnâng thôkoh ang; Ngama nangnâng thinkhu mathahko erôe.”

¹³Atema ngaeka, “Ngama Joban nâng tok anaa ekang.” Ngale atema arohmin ngaeka, “Nga areko Joban ma kohthang chhuchha heh demko tongekang.”

¹⁴Phumma ate chhuchha ngama roeeka heh mihnyan nyuchha hei angem dâng phumma, Jisu min thin rângrâng mihnyan nyuchha hei angem rângrâng dângwah. Atema eroh moeka pa ate ritjunma mihnyan nâng pap mothuk lahma ritphete juchhih chaanpa chhihsiet râng moatwah,

¹⁵ngale atema eroh molahma thin roandông dôngtangko arit rancheima haa rângrâng dangtah heh wah pesiet wakeka.

¹⁶Chenrângma ngako arepa nângma senthemthem ajet atema rangwah Joban ngintatte hehnâng chohsok dangmah. Erenoma, atema Abraham chhuchha hehnâng ba chohsû eka.

¹⁷Eroh wah, Joban nâng soamtô lemkhôko thinma nyahrâng putedâlemlî ngale thinnâng nyahrâng mînchênte Soam aroakte dongthôn dângrângma rongrup ngenâng atea ate mihnyan heh rângrâng dangeka, ngale ere junko mihnyan nyuchha heh pappâ mapkoh eka.

¹⁸Ngale ade phumma hungtôn ritte hehnâng atema tachohsûa, chenrângma ngako, ate nângmin hungtôn wah ngale ate memin chêmchôh wah.

Hibru 3

Jisu pa Mosa nomemin Adong

¹Ngalemruchha Kristan mihnyan heh, Joban ma roe hên heh! Nângma thôeki putedâlem khohko Soam aroakte adongthôn dângrâng Joban ma chienkat era Jisu nâng thatthong hun tan en.

²Chenroh Mosa ma Joban humnâng senthemthem putedâlem lahma motah a, ererângrâng atemin atenâng are moatlempa moatrâng rênthe Joban nâng senthemthem putedâlem wah.



³Hum noma hum hôante mihnyan mînpa ajah rânghôeka. Ererãngrãng, Mosa noma Jisu mînpa ba ajah rânghômin.

⁴Chentô humpa henma komin hôan eka - rohkomin chentô hôante pa Joban.

⁵Joban humnâng Mosa haa rãngrãng danglahma putedâlem nâng asen danglahma moatwah, ngale Joban ma khediko jabthin ngin heh atema thôwah.

⁶Rohkomin Joban humko Krista ma Chha danglahma senthemthem putedâlem lahma moeka. Erohwah, nãngma chenni nâng khalihma putedâlem ekia ererãngma nãnhung dongdong, ngale senthemthem putedâlem lihma metong eko nãnga ate hum.

Joban Mihnyan hehrãngma Boanjekchoh

⁷Erohwah Asâthôanju ma ngaeka, “Thejâ nangma Joban roat metat oko,

⁸nãngte nãngwa heh dangtah rãngrãng nanghung nekchehsiet, thinma Joban lelatnâng danglahma thinhung eroh chehsietwah, ere jâko thinma hahran khonâng Joban hungtôan wah.

⁹Joban ma ngaeka, Enâng thinma Ngahung toan lahma thatsû thang, erepa Ngama rangpâ roakbelii ko chenni motek a erepa khelahma jômin thinma ngahung toanthang.

¹⁰Ngale erohwah Nga ere mihnyan heh demnâng rinkhah lekma ngatwah, ‘Thin a roantangma mothô khoanglepjû ngale Nga nginmin kepмах hang.’

¹¹Erohwah Nga ere mihnyan heh demnâng rinkhah lekma toamsêm wah: ‘Ngama thinnâng boanjek tãngrãng koh ekang theko thin chenthumin leta hûmin!’”

¹²Ngalemruchha heh, jetletma dangen, ahîn Joban tâwah lânngak chhoanroh hen hungmin nekchhih en ngale eretô leputedâlem nekdangen.

¹³Erenoma, nekhuwah henmemin papkaam moletma nehung nekchen chehjâ ekenma, rangwo roakweih wathema wathe nâng chohsûmîn en, chenrãngma ngako, Joban nyapraangma “Thejâ” ngaeka pa nãngma moatrãng ngaehi.



¹⁴Chenrãngma ngako, nãngma khebengwah putedâlemtih rãngrãng athôan kotuk rongtêngtêng medang eko, nãngkhu anga nga Krista demnâng aroamma etadange.

¹⁵Joban nyapraangma aroh ngaeka: “Nangma thejâ Joban roat metat oko, nãngte nãngwa heh dangtah rãngrãng nanghung nekchehsiet thinma Joban lelatnâng danglahma thinhung pa eroh chehsietwah.”

¹⁶Joban roatpa tat lahma Joban lelatnâng dângte mihnyan heh hen dângwah a? Ere mihnyan heh Mosa ma Igip wah loatsiettah mihnyan heh dângwah.

¹⁷Hendemnâng Joban rangpâ roakbelii rinkhah wah a? papkaam molahma hahran khonâng lepriitah mihnyan heh demnâng khahwah.

¹⁸Chenthu Joban ma, “Ngama thinnâng boanjek tôngrãng koh ekang hahko thin chenthumin leta hunmin” - ngama jablahma toamsem tahpa, atema henrãng jabwah a? erepa ate lelatnâng dângte mihnyan hehrãng sêmwah.

¹⁹Erohawah thin erehahko leta hûwãng thangma nãngma khe eki, chenrãngma ngako thinma putedâlem ho.

Hibru 4

¹Joban ma jabtah boanjek tôngthin pa nãngma chohrãng athângheh Joban ma nãngnâng toamsem ehi. Erohwah, nãngkhummin jetlihma dange, atema boanjek kohrãng toamsem tahpa henmejô lechoh nekchen dangeken.

²Chenrãngma ngako, thinma chohtattah rãngrãng jôba nãngmemin Nginkongsen pa chohtat eki. Rohkomin thinma nginkongsen pa mechohtat akomin, erepa thinrãng sekhota dângwah, chenrãngma ngako, chenthu thinma erengin pa chohtatko, erepa thinma putedâlem nungma kepmah.

³Rohkomin nãngkhuwah henhenma ereko putedâlem ekia, ereheh Joban ma boanjek kohrãng toamsem tahpa choheki. Erepa atema chenroh jabtah a ererãngrãng jôba, “Ngama rinkhah lekma toamsêm wah: ‘Ngama thinnâng boanjek tôngrãng koh ekang hahko thin chenthumin leta hûmin!’ ” Atema



moatlem pa rang ahah hân thuma tamo chhoan medang akomin atema arepa jabwah.

⁴Chenrângma ngako, Joban nyapraang nâng atema jâengit jârângma jabwah: “Ate moatlem chentô hehwah Joban a Jâengit jâko boantong rewah.”

⁵Are mǎnthethin nginpa thengak jabeka: “Ngama thinnâng boanjek tôngrǎng koh ekang hahko thin chenthumin leta hûmin.”

⁶Henhenma Nginkongsen pa khebeng thôn chohtattah a ere mihnyan hehma boanjek pa chohmah, chenrângma ngako, thinma putedâlem mah. Rohkomin, ere boanjek pa ahan hehnâng chothuk eka.

⁷Arepa Joban ma rangwo han thien lahma khesok ehi, ere rangwopa “Thejâ.” Ajahthem rangpâ diko atema Devit nâng jabthuk lahma Joban nyapraang nâng raangeka: “Nangma thejâ Joban roat metat oko, nanghung pa nekchehsiet.”

⁸Joban ma toamsem tah boanjek pa Josua ma mihnyan hehnâng kohchhoan dângnomako, Joban ma adiko rangwo ahan rângma lethe jabtumin wah.

⁹Erohwhah, Joban jâengit jâko boanjek tongtah rǎngrǎng Joban mihnyan hehrǎng boanjek tâng rangwopa tonga.

¹⁰Chenrângma ngako, Joban ma toamsem tah boanjek pa henhenma choh eka ereheh Joban ate moatlem kowah boantongtah rǎngrǎng thinmin thin moatlem wah eboantong wak a.

¹¹Erohwhah, nǎngkhumin ere boanjek pa chohtôngrǎng latriie, erohkoba nǎngte nǎngwa hehma leputedâlem junko boanjek lechoh dangtah rǎngrǎng nǎngkhu wathejô nekchen dangeki.

¹²Joban jabkhab pa ahîn ngale achaaan, ronghû rongka anah dǎng nomemin anah. Ere pumma chentôpa thahdoak eka, Jule moang niimin taphandoak eka, ngale rokchî rǎchîmin taphandoak eka. Ngale erepumma mihnyan hung khenwah thonghun eka hehmin lienjet eka.



¹³Joban nâng lejetthuk thangma chenjô tahuhriemmih; atema chentô hôantah heh ate mitkheko phangtang loatloat tuta. Ngale nângkhuma chenni motih a ereheh phangtang nângkhu dedema atenâng metkep khesokmin.

Jisu pa Soam aroakte Adongthôn

¹⁴Erohwhah, nângkhuma thôeki putedâlem ko rongtêngtêng lolihma putedâlem e. Chenrângma ngako, Joban tâko tongwãng lahma nângkhurãng Soam aroakte adongthônpa tonga erepa Joban Chha Jisu.

¹⁵Nângkhu Soam aroakte adongthônpa nângkhu bôn anâko lemînchente dangmah. Rohkomin, nângkhu Soam aroakte adongthônjô medang komin nâng rângrãng rongrup ngema ate hungmin thattônwah, rohkomin atema pap moho.

¹⁶Erohwhah, nânghung arin dongsiet lihma mînchennaan chohtin Joban tôngthin tâko tonghûe. Enâng nângma map echoh e, ngale nângma lêmpoatko nângnâng chohsokrãng ate mînchennaan pa echoh e.

Hibru 5

¹Chentô soam aroakte adongthôn pa mihnyan heh ma thinlemru hehwah ren eka, ngale thin mînko Joban nâng soamtô, ngale joapsoap, erediko paprãngma joapsoap thuk eka.

²Phumma atedede ajahthem ngenâng achhih dâng phumma, henhen pa aba ngale kaamchhih moatte a ereheh demnâng loloba noapnene tadang eka.

³Ngale atedede min achhih dâng phumma, atema mihnyan nyuchha heh pap rângrâng lejoap lesoap kohmin, atedede pap rângrângmemin joapsoap min.

⁴Henmemin atedede hungsima soam aroakte adongthônpa nga dangang ngama hunlahma tadangmah. Erepa Aron rootah rângrâng - Joban ma roolahma jôba mihnyan pa soam aroakte adongthôn tâdangmin.

⁵Ererângrâng Krista memin atedede Soam aroakte adongthôn rângrâng dangwah dangmah. Erenoma Joban ma atenâng ngatwah, “Nanga Nga Chha; thejâ phumma Nga nang Wa lâdangtek.”



⁶Atema thehan nângmin ngatwah, “Nanga roantang roanjêng rãng soam aroakte dângmin, erepa soam aroakte adongthôn Melkizidik ma ngatwah.”

⁷Jisu ma ate roandôngpa are hahtokkhoh ko dângpoatko ate ritwah tâpesiette Joban nâng mitphi demnâng nyahrãng raksep lahma rangsoam nungma roatsep wah. Chenrãngma ngako atea numnene ngale nyahrãng hung kohlahma soamdi Joban ma ate rangsoam pa tatwah.

⁸Phumma atea Joban Chhajô medang akomin, atema chêm junko Joban nginkepkep dângpa hewah.

⁹Chenthu atea chentô noma asenthôn dângthuk phumma, ate ngin kepte chentô mihnyan hehnâng atema roantang roanjêng khope pa koheka,

¹⁰ngale Melkizidik soam aroakte ma ngatah rãngrãng Joban ma atea soam aroakte adongthôn ngaeka.

Putedâlem wah Jekte hehnâng Ritngat

¹¹Are heh junma nima ajahthem thôkohthin tonga, rohkomin erepa nenâng thôkohrãng nyahrãng alat, chenrãngma ngako ereheh nema tajetlomet.

¹²Nea athângheh phumma ahethôte lândangroh dângmin wah - rohkomin nema athâng hehmin khebeng thôn Joban nginkongpa nenâng hethôte lemeken. Nema phhekchhah cheh akâng heh phhekchhah thiek pa athângheh min nyuhpoti lekjok eken.

¹³Henma akomin nyuhpoti jok eka erepa naajeng chhathu, chenpa chhih a ngale chenpa asen a erepemin jetmah.

¹⁴Phumma phhekchhah cheh akâng heh dangeka phannang hehma phhekchhah eka, ngale erehehma chenpa chhih a ngale chenpa asen a erepemin jienjetlo wakeka.

Hibru 6

¹Erohwah, nângma khebeng thuwah Kristan nginkong chohtattih ngin heh thâmthômîn pa jeklihma Jisu Krista ngin asenli heh ajahjah jetrãng thonghun e. Ngale nângma kaamchhih moatwah jeklihma Joban nâng putedâlem min;



²Baptijem kep ngin heh ngale dekma sahloat nungma rangsoam koh ngin; ngale ritte heh ngakhîn ngin erediko roantang roangjêng rãng rên ngin heh thômînpa ajekre e.

³Erenoma nãngkhuma jet ajien ba toatmîn e! Ngale areheh dangeka, Joban ma memothuk hiko nãngma emoe.

⁴Chenrãngma ngako, henma thin putedâlem pa thinphe eka, ere mihnyan heh hung chenroh jienngak litthukmin a? Thin a poattheko Joban wenphiak nãng dãngwah; ngale thinma rangkhethung wah hînhô pemin lâthat jettah, erediko Asâthôan Jumin lâchohtah;

⁵Thinma Joban jabkhab pa asen ngamemin lâjettah, ngale thinma ahokmin sanpoat kowah Joban chaan pemin jet eka.

⁶Ngale eroh komin thinma thin putedâlem pa thinphe eka! Erohwah ere mihnyan heh hung ngaklitthuk lihma ngaksiethok pa chenthumin tadang tumah, chenrãngma ngako, thinma Joban Chha ngakrittek eka, ngale nok atang methahko rêsêthuk eka.

⁷Roantang hahtokkhoh ko rangpat ma sânkak junko hah pumma rangpatti jokeka, ngale erehahpa henhenma khoakhem lahma khiet ali khiet eka ereheh khohko Joban ma rangkoh lahma khiet ali senthuk eka, ngale ere khiet ali pa khiet alite mihnyan rãngma asen dangeka.

⁸Rohkomin ereko suhche chatroak ngale hin mehong phoak ako, erepa sekhotã thã; ngale erehahko Joban ma tem athoak eka, ngale erepa wenma eroak phea.

⁹Lemruchha heh, nima erohjô mejab ekomin, nima nenâng nyahrãng putedâlem eka. Ngale nima ajet nema kaamsen jôba emo en ngale kaamsen moat junko nekhomin pe eken.

¹⁰Joban pa mothô khoanglep dangmah. Nema motet moatlem heh atema lekphemah, ngale nema atenâng hun achet junko atenâng putedâlemte hehnâng chohsûtet hehmin lekphemah, ngale athâng hehwah chohsû eken hehmin atema lekphemah.



¹¹Nima ajahthem huneki pa nekhuma athôan kotuk Joban moatlempa rokhun rahhun dangletma chenmo en ngama huneka, erohkoba nekhuma dâlem letma bemla ekenpa linlin echoh en.

¹²Nima nekhua ajõ dâng hunmah, rohkomin putedâlem lahma hung tâmôngloatte dangen ngama huneka, ngale eroh moletma Joban ma toamsem tahpa choh en.

Joban Toamsem pa Linlin

¹³Chenthu Joban ma Abraham demnâng toamsem tahko, atema chenni toamsem ekapa metkep moatrângma châwah. Ate noma adong chenjô aho dâng phumma, atema atedede mîn keplahma toamsêm wah.

¹⁴Atema ngatwah, “Ngama nangnâng rangkoh lihma chhuchha jahmông edangthuk e, ngama toamsem ekang.”

¹⁵Abraham ma hungmongsiet lahma bemwah, erohwah Joban ma chenni toamsem tah a epa atema chohwah.

¹⁶Chenthu nãngma toamsem ko, nãngnoma chenni komin adongmîn keplihma rângsem e, ngale erepumma ba chentô chhiakmîn eka heh phensiet eka.

¹⁷Joban ma toamsem ekapa henhenma chohmin a ereheh nãng Joban ma atema toamsem ekapa chenthumin litjâmah ngama senthemthem jetthuk huneka; erohwah atema toamsem lahma châwah.

¹⁸Erohwha leta litjâthin jatnii tonga, ngale ere wannii rãngma Joban memin mothô thômah. Erohwah nãngkhu henhen ate demnâng khope choh ekia, erehehma hung dongdong danglihma nãng makowah thien kohehi dâlem ko rongtêngtêng lolihma tângmin.

¹⁹Nãng roandôngko ere dâlem pa tângbenthin phak rãngrãng kepeki. Ere putedâlem junma nãngkhu khope eki, ngale erepumma rangkethung wah rangsoamhum kowah khet tângtin eka lienwah rangsoam thin asâthôn theko tãngbenwên eka.



²⁰Melkizidik soam aroakte ma ngatah rãngrãng Jisu nãngrãngma nãngmako roantang roanjêng soam aroakte adongthôn dângrãng wãnglaeka.

Hibru 7

Soam aroakte Melkizidik

¹Are Melkizidik pa Salim diak Lowang dângwah, ngale Achoang thônawah Joban nãng soam aroakte min dângwah. Abraham ma Lowang wabelii jienlahma ranwah ngakwãngko, Melkizidik ma lemko chohmîn lahma atenâng rangkoh wah,

²ngale Abraham ma ran heh jienlahma chentô toantah hehwah atenâng thiak echhi kowah thiakthe kohwah. (Melkizidik khebeng mînpa “Toantang Lowang” ngama dângwah; ngale atea Salim diak Lowang dâng phumma ate mînpa “Mêmo Lowang” ngamemîn wah.)

³Melkizidik nyong awa, ngale ate te awi heh nginkong chenmin aho; ate chhat ngale rit nginkong hehmin aho. Atea Joban Chha rãngrãng; ngale atea roantang roangjêng rãng soam aroakte.

⁴Erohawah nema sûtan en, atea chentô dông dângwah a. Abraham nãngte nãngwa adongthôn pummemin ran heh jienlahma chentô toantah hehwah atenâng thiakthe kohwah.

⁵Ngale soam aroakte jat Livi chhuchha hehnâng Niemarang ma thin Isrial mihnyan hehwah thiakthe thârãng chienwah, erepa thindede mihnyan hehwah Abraham chhu achhajô medang akomin thiakthe pa thâthukwah.

⁶Phumma Melkizidik pa Livi heh chhuchha dangmah, rohkomin atema Abraham wah thiak echhi kowah thiakthe thâwah, ngale Joban ma toamsem tahpa chohte mihnyan ko atema rangkoh wah.

⁷Arepa chentôma jet, rangkohte pa jôba rangkepte noma adong.

⁸Soam aroakte mihnyan hehma thiak echhi kowah thiakthe choh eka, eroh komin thinmin rit rewak eka; rohkomin Joban nyapraangma ngaeka,



Melkizidik dangeka roantang roanjêng ahîn tôngte danglahma thiak echhi kowah thiakthe pa thaeka.

⁹Ngale, chenthu Abraham ma Melkizidik nâng thiak echhi kowah thiakthe kohtahko, Livi jat (Thăkho chhahte chhuchha hehmemin thiak echhi kowah thiakthe) pa Melkizidik nâng koheka.

¹⁰Chenrăngma ngako Livi pa ere thuko machha dângwah, rohkomin chenthu ate demnâng Melkizidik chohmîntah poatko ate te awa Abraham sekkhen nâng dângwah.

¹¹Isrial mihnyan hehnâng Niemarang pa Livi jat heh soam aroakte dangthuk lahma kohwah. Phumma, Livi jat soam aroakte danglahma moeka moatlempa asen dângnomako, Melkizidik răngrăng soam aroakte ahan lelem tumin dângwah, erepa Aron răngrăng dangmah.

¹²Chenrăngma ngako chenthu soam aroakte pa melit ako, Niemarang hehmin alitre eka.

¹³Ngale are ngin heh dangeka năng Teso răng jabeka, phumma atea jathan wah dângwah, ngale ate jatwah chenthumin soam aroakte mathat dangeka.

¹⁴Arepa chentôma senthemthem jet, atea Juda jatwah hôngchhatwah; ngale chenthu Mosa ma soam aroakte dângrăngma jabhako atema are jatkowah dângrăngma lepchhehho.

Melkizidik răngrăng Ahan Soam aroakte

¹⁵Ngale nima jabeki nginpa phenjaangjaang dangeka; Melkizidik răngrăng soam aroate ahan hongeka.

¹⁶Atea mihnyan nyuchha niemarang junko soam aroakte răng dângthuk dangmah, rohkomin lethôanthin roandông chaan pumma dangthuk eka.

¹⁷Chenrăngma ngako Joban nyapraangma ngaeka, “Nanga soam aroakte Melkizidik răngrăng roantang roanjêng răng soam aroakte dângmin.”

¹⁸Erohawah niempă heh phetah, chenrăngma ngako ereheh achhih ngale sakhota.



- ¹⁹Chenrãngma ngako Mosa Niemarang pumma chenjô senmomah. Ngale ade phumma dâlemthin asen kohehi, erejunko nãng Joban tânâng namhueki.
- ²⁰Ereleko, Joban memin toamsem eka. Chenthu ahan heh soam aroakte dangthuk tahko, ererãngrãng toamsêm pa aho dãngwah.
- ²¹Rohkomin Joban ma atenâng toamsem lahma ngat junko Jisu soam aroakte rãng dangeka, “Teso ma toamsem eka ngale erepa chenthumin litjâmah: ‘Nanga roantang roangjêng rãng soam aroakte dãngmin.’ ”
- ²²Erohwhah, Jisu junma Joban ma toamsêm pa linlin asen dangeki.
- ²³Ahânmin ajatjat wientonga: Soam aroakte ahânmin dãngwah, rohkomin riilahma thin moatlempa talaang momah.
- ²⁴Rohkomin Jisu a roantang roangjêng rãng ahîn, ngale atema soam aroakte moatlem moeka pa mihhân nãng dienmo thukmah.
- ²⁵Ngale erohwhah henhen ate junma Joban tânâng hûeka ereheh atema athâng hehmin ngale roantangma eta pesiet a, chenrãngma ngako atema Joban nãng thinrãngma roatsep kohrãng roantang roangjêng rãng hin eka.
- ²⁶Erohwhah Jisu a nãngma lem eki heh chohkohrãng Soam Aroakte Adongthôan. Atea Asâthôan; atenâng chenni achhihmin aho, ngale atenâng papmin aho; atea papi mihnyan heh demwah araangraang dangthuk eka ngale rangkho liennâng tongwãngthuk eka.
- ²⁷Atea ahân soam aroakte adong heh rãngrãng dangmah; atema rangwo roakweih khebengko atedede paprãng bengjoap dikoba mihheh rãngma joapsoapkoh dangmah. Atea chenthu atedede roandông kohlahma rekthe joapsoaptah, ere rekthe joapsoap tahpa roantang roangjêng rãng joapsoap eka.
- ²⁸Mosa Niemarang pumma mihnyan chhih hehmin soam aroakte adongrãng tâdâng thukwah; rohkomin Mosa Niemarang diko Joban ma ate Chhapa Soam Aroakte adong dangthuk lahma mihnyan heh demnâng toamsêm pa



hônawah, ngale ate jôba roantang roangjêng rãng nyahrãng asen dangthuk eka.

Hibru 8

Jisu pa nangrãngma Soam Aroakte Adongthôn

¹Nima chentô jabeki nginpa dangeka, nãngrãngma soam aroakte adongthônpa rangkethung wah Joban tângthin dekchah ngeko tongeka.

²Atea chentô noma Asâthôn Theko soam aroakte adongthôn danglahma tongeka, erepa mihnyan nyuchha ma hônawah ledang Joban ma hônawah thelinlin ko tongeka.

³Chentô soam aroakte adong heh Joban nãng chhahkoh ngale ngem ngah ma joapsoap thuheka, ngale erohwah nãngrãngma soam aroakte adongthôn pummemin chenni akomin kohmin.

⁴Atea are hahtokkhoh nãng dâng ngako soam aroakte ledang minwah, chenrãngma ngako Jews heh Niemarang junko Joban nãng hinhô kohlahma soam aroakte jat heh tonga.

⁵Thinma soam aroakte moatlem moeka pa rangkethung nãng chenni moeka ere moatlem heh dâpha loloba moeka. Arepa Mosa demnãng chenroh dangtah a ererãngrãng jôba dangeka. Chenthu atema rangsoam thin The hônrãng phûngko, Joban ma atenãng thôkoh wah, “Chentôpa nangnãng hahkongkho ko chenroh hônrãng khesoktih a ererãngrãng hôn o.”

⁶Rohkomin ade phumma, chenroh atema Joban le atenãng putedâlemte ate mihnyan heh tungko toamsêm pa asen hôneka ererãngrãng, Jisu nãng thin noma adong soam aroakte moatlempa koheka, chenrãngma ngako, erepa asen dângrãng toamsem eka.

⁷Khema wah toamsem tahko chenjô achhih aho dângngako, khediko toam ngaksêmthin ahotu dângmin wah.



⁸Rohkomin Joban ma ate mihnyan heh achhih khelahma thinnâng ngaeka, “Teso ma ngaeka, sanpoat pa lâhûera, Ngama Isrial mihnyan ngale Juda wah mihnyan heh demnâng toamnyan esem ang.

⁹Erepa Ngama thin te awi heh demnâng Igip wah loatsiet chhoantek jâkowah thin demnâng toamsemtek rãngrãng ledangmin. Ngama thin demnâng toamsem tekko thinma senthemthem putedâlem ho, ngale erohwah Ngama thinnâng ngiaksû mek.

¹⁰Ade phumma, Ngama are toampa Isrial mihnyan heh demnâng ahokmin sanpoatko esem ang, arepa Teso ma ngaeka: Nga Niem heh Ngama thin kheri nâng ethienkoh ang ngale thinhung khennâng eraangkoh ang. Nga a thin Joban rãng edangang, ngale thin a Nganâng putedâlemte Nga mihnyan rãng edangwak a.

¹¹Thinma thinlemru hehnâng Teso jet en ngama hennâng min lehethômin ngale thin tok akhung wah hehnângmin lethôkoh min, ‘Teso jet en’ ngama. Chenrãngma ngako, arinthôn pumma thun lahma adongthôn kokiet, chentôma Nga ejet hang.

¹²Ngama thinpap heh map ekoh ang ngale thinma kaamchhih motah heh Ngama thamlek thonghun tûmek.”

¹³Toamnyan sêm junma jablahma, Joban ma khebengwah pa apã rãng hânaka; ngale chenni akomin mepãjâ tahko ba mechienjâ tahko lemlienma emahjâa.

Hibru 9

Hahtokkhoh ngale Rangkhethung Rangsoam

¹Amawah toamsem tahko rangsoam rãngmemin niemarang dângwah ngale mihnyan nyuchha ma hânawah rangsoam thinthemin dângwah.

²Rangsoam the hânawah, phumma khebeng thôn wah theko Asâthôn The ngatwah. Eretheko wentit pa toak rewah ngale erekowah khoangko Joban nâng phhekchhah pa taamkoh rewah.



³Eredi dângthe wah khetma tângtin eka liênkawah rangsoam Thepa Nyahrang Asâthôn The dângwah.

⁴Ere khenko kemwah hânwah chaam dângwah, ere chaam ko wenthhek lahma atûmli heh tumthhekkoh rewah, ngale Toamsem Bâkoat pa phangtang kemma doaplahma dângwah, ngale ere khenko kemwah hânlahma loak dângwah, ngale ere loak khenko mana sek lahma dângwah, erediko Aron menthun pa bãngchhong heh chhong relahma dângwah, ngale longkha khaniiko Joban wah Hôkum heh raang relahma dângwah.

⁵Joban tonga ngama khesokrãng Bâkoat khohko Chirubim moangachaang heh raangapaang demnâng dang rewah, ngale chirubim heh ma thin rangpa pap map kohthinthe khoko têmlahma dângwah. Rohkomin, athângheh chentôpa thiepthiep thôkoh sanpoat dangmah.

⁶Ereheh aroh khoakhêm thienwah. Rangwo roakweih soam aroakte heh khebeng thôn wah theko hûlahma soam aroakte moatlempa chîmoat hokwah,

⁷rohkomin soam aroakte adongthôn pa lolo akhenwah theko wãngeka, ngale atemin rangpâ ko ditthe loloba wãngeka. Soam aroakte pumma atedede rãng ngale mihnyan heh ma lejet thangma pap moeka hehrãngma Joban nãng kohrãng hei kepwên eka.

⁸Are heh aroh khoakhem eka junko Asâthônju ma senthemthem thôkoh ehi, chenthu tôko khebeng thôn the kawah rangsoam Thepa tongeka, nãng Nyahrang Asâthôn Theko wângthin lempa malaang kohehi.

⁹Are pumma thenep thejâwah sanpoat hehnâng thakthô eka. Are ngaeka pa soam aroak ngale ngem angh ma Joban nãng joapsoap junma rangsoamte mihnyan hung arin heh sensietmah,

¹⁰chenrãngma ngako thinma, jokphhek chhah ngale lirup seksâsoan niemarang heh loloba moeka. Are niemarang heh phoanrãng loloba, ngale ereheh a Joban ma niemarang anyan hôngsiet mako lolo rãngba moatwah.



¹¹Rohkomin Krista pa athâng hehwah nãngwah asenli hehrãng soam aroakte adongthôn danglahma lâkatha. Atema soam aroak eka rangsoam thepa adong ngale abâmbâm asen; erepa mihnyan dekma hânwah rangsoam the dangmah, ngale erepa are hahtokkhoh rãngmin dangmah.

¹²Chenthu Krista ma rangsoam thepa dãnkhoam lahma Nyahrang Asâthôn Theko roantang roanjêng rãng rekthe lolo wãngtahko, atema soam aroak rãng kien ngale mân hei keplahma wãngho; erenoma, atedede hei keplahma nãngkhurãng roantang roanjêng khope pa tâchohwah.

¹³Kien ngale mân hei erediko kienchha mânchha heh wennâng jênthhekawah lâbu heh niemarang junko mihnyan chin heh khohnâng phuhkohwah, ngale erepumma thin a niemarang junko achin dangtah heh sâsietwah.

¹⁴Phumma arepa toantang medang ako, Krista hei pummajã chentôjah bâm sâsiet eka! Roantang roanjêng Ju junma atedede roandôngpa Joban nãng sâpoangpoang kohrieka. Ate hei pumma nãnghung arin heh ledangli niemarang hehwah esâsiet hi, erohkoba nãngma ahîn Joban nãng eta soamtôe.

¹⁵Ere junkowah Krista ma toamsêm nyan pa hongsiet eka, erohwah henhen Joban ma roeka, ereheh ma Joban ma toamsem tah roantang roanjêng rangpa ekepwak a. Arepa aroh tadanga, chenrãngma ngako, amawah toamsem tah junko mihnyan heh ma kaamchhih molahma pap dangtah kowah Krista riilahma pesiet eka.

¹⁶Henma komin ate ritdiko ate chhahkhem heh keprãng mihdemnâng kah mekhetmîn ako, ere chhahkhem kepte pumma atenâng kahkhetta pa riitah ngama jetmêngmin,

¹⁷chenrãngma ngako, atenâng kohte mihnyan pa ahînthu medang ako atema kahkhetmîn ekapa sekhota; ate ritdiko koba ere kahkhetmîn tahpa tâkepmin.

¹⁸Erohawah khebwah kahkhet mîntah pemin hei junma lolo jôba tâdangwah.



¹⁹Khebengko, Mosa ma mihnyan hehnâng Niemarang kowah chentô Hôkum raangtah heh thôkoh wah. Erediko atema mân le kien hei heh jodemnâng sak lahma, Niemarang titab ngale mihnyan chentô nâng hisop bângchhong ngale khetruchek keplahma hekwah.

²⁰Atema ngatwah, “Are hei demko Joban ma toam anyan sem eka, ngale erepa nema keprâng Joban ma hôkum koh ehèn.”

²¹Ererãngrãng Mosa memin rangsaom The Asâ ko ngale rangsoam ko kepthin chentô sêmmak hehnâng heima hekwah.

²²Linlinjô, Niemarang junko chentôpa heima jôba sâsietwah, ngale hei hôngsiet junma jôba pap hehmin map chohwah.

Krista Ritjunma Pap heh Sâsiet eka

²³Ere chentôpa rangkhethung wah alinlin heh rãngrãng jôba, ngale eroh jôba sâsietmin. Rohkomin rangkhethung wah heh erenoma abâmbâm asen ma sâsiet eka.

²⁴Chenrãngma ngako Krista a mihnyan nyuchha dekma hânwah Asâthôn The nâng wâng dangmah, ere Asâthôn The pa rangkhethung wah alinlin The peba hehôn eka. Atea rangkhethung linlin nâng wãngeka, ngale enâng athângheh atea nãngrãngma Joban tâko tongeka.

²⁵Jews heh soam aroakte adongthôn heh rangpâ roakweih Asâthôn Theko ngem agah hei keplahma wãngeka. Rohkomin Krista ma ate roandôngpa kohrãng rangkhethung nâng depdep wãngmah,

²⁶eroh dângngako, atemin rang ahah hânthu mejô butbut chêmrii lahma dângmin wah. Phumma, chentô rangkuh sanha hehrangma athôn sanpoat pa namhok phumma, atema roantang roangjêng rãng rekthe lolo kalahma, atedede roandôngpa kohlahma pap heh sâsiet kakoh ehi.

²⁷Anga nga metkep rekru rit rêmin, ngale erediko Joban ma achhih asen pa erenhi.

²⁸Ererãngrãng ajahthem mihnyan heh pap sâsiet kohrãng Krista ma atedede roandôngpa kohlahma ritwah. Phumma ate ademin rekthe engak kara,



rohkomin erepa pap sâsietrăng dangmah, rohkomin ate bemlâte mihnyan heh papwah pêsietrăng engak kara.

Hibru 10

¹Jews heh Niemarang pa alinlin pa dangmah; erepa khedi kowah hokmin alinlin asen ere moangba. Phumma Niemarang junko mănthethin pa roantang roanjêngma rangpâ roakweih joapsoap wakeka. Eroh medang ako, aroh joapsoap junko Niemarang pumma Joban tânâng hokte mihnyan heh chenroh jiensên sietmin a?

²Phumma Niemarang junma Joban nâng soam atôte mihnyan heh thinpapwah linlin sâsietchoan danglahma ko, thinnâng pap ahotu dangminwah, ngale chentô joapsoap pemin jek retu minwah.

³Erohwah, rangpâ roakweih depdep joapsoap junko mihnyan hehnâng thinpap pa tonga jôba ngama jetthuk eka.

⁴Chenrăngma ngako, mân le kien heima chenthumin pap tasâsiet mah.

⁵Erohwah, chenthu Krista are hahtokkhoh ko katrăng ngatko, atema Joban nâng ngatwah: “Nangma soam aroak le joapsoap pa hunmoh, rohkomin nangma Ngarăng phoangpa khoakhemkoh ehang.

⁶Ngale nanga ngem anghah heh ritphe lahma chaam khohko wennâng thek lahma soamtô komin rinmemoh ngale pap sâsietrăng ngem anghah ritphe lahma joapsoap komin rinmemoh.

⁷Ephumma Ngama ngatwah, ‘O joban nanghung junko moatrăngma, Nga etongang, Eroh jôba Nga junma Niemarang titab nâng raangeka.’ ”

⁸Khebengko atema ngatwah, “Nanga Niemarang junma soam aroak le joapsoap pemin hunmoh, ngale erehehnâng rinmemoh, erediko ngem anghah ritphe lahma pap sâsietrăng chaam khohko wennâng thek lahma soamtô pemin hunmoh.” Are chentô soam aroak le joapsoap pa Niemarang junkojô mehôn akomin atema arepa jabwah.



⁹Erediko atema ngatwah, “O Joban, nanghung junko moatrãng Nga etongang.” Ere junma Joban ma Niemarang apã junko soam aroak le joapsoap heh phe lahma, ere litko Krista litkepwah.

¹⁰Chenrãngma ngako, Joban ma chenni huneka erepa Jisu Krista ma moeka, ngale Jisu Krista ma ate phoangpa roantang roanjêng rãngma rekthe kohdi nãngwah chentô pap heh phangtang sâsiet ehi.

¹¹Chentô Jews soam aroakte hehma rangwo roakweih soam aroak eka, ngale thinma mãnthethin pa butbut joapsoap eka; rohkomin are joapsoap eka pumma chenthumin pap tasâsiet mah.

¹²Phumma Krista ma paprãng ditthe lolo ate roandông kohtahpa roantang roanjêng rãng lâletah, ngale erediko atea Joban dekchahko tongwãng eka.

¹³Ngale Joban ma ate ran heh ate daphâ khenko danek thinrãng mahôan hôankoh enâng bemeka.

¹⁴Ate roandôngpa ditthe kohlahma Krista ma papwah sâsiettah mihnyan heh roantang roanjêng rãng sâsiet eka.

¹⁵Ngale Asâthôanju memin nãngnâng thôkoh ehi. Khebengko atema ngaeka,

¹⁶“Ngama thin demnâng are toampa esam ang Teso ma ngaeka, ahokmin sanpoatko: Ngama Nga niemarang heh thinhung nãng ethienkoh ang ngale thin kheri nãng eraangkoh ang.”

¹⁷Ngale erediko atema ngaeka, “Ngama thinpap heh ngale thinma kaamchhih motah heh thonghun tumek.”

¹⁸Erohwha chenthu ere pap heh map mekoh tahko, pap sâsietrãng ngem ngah ritphe lahma joapsoap pa lemtumah.

Joban tânâng Namhue

¹⁹Ngalemruchha heh, erohwha, Jisu ritjunma nãngmin Nyahrang Asâthôan Theko lesolang thangma tawãnge.



²⁰Atema nãngrãng lemnyan laangkoh ehi, erepa khet tãngtin eka lïenko wãngthin ahîn lemkhô laangkoh ehi - erepa ate phoang koh lahma laangkoh ehi.

²¹Erohwhah nãngrãngma Soam Aroakte adongthoan pumma Joban humpa pêneka.

²²Erohwhah nãnghung ma achhih thonghunki hehwah sâsietrii ngale nãng phoangpa josâma sâsoan wah rãngrãng danglihma hungsâ ngale senthemthem putedâlem lihma Joban tânâng namhûe.

²³Ngale nãngma thôeki dâlem ko rongtêngtêng putedâlem e, chenrãngma ngako, Joban toamsêm pa Joban ma emoa ngama putedâlem eki.

²⁴Erohwhah wathema wathe nãng thonghunmîn e, ngale wathema wathe nãng chohsûmîn re e, erediko hun achet khesokmîn lihma asenli moe.

²⁵Wanwanthe mihhan heh jek eka rãngrãng nãngkhu chohmîn nekjek eki. Erenoma, wathema wathe nãng ajah jahba hungdong sietmîn e, chenrãngma ngako, nemajet, Teso ngakkat Rangwo pa lânam hûtha.

²⁶Chenrãngma ngako, nãngnãng toangtang pa jetthuk diko nãngma jetnung nungma pap metham moeko nãngma pap moeki pa chenrãngrãng soam aroak memin tasâsiet tumah.

²⁷Eroh junko, thinrãngma nyahrãng cheili khope rênjâ rangwopa loloba etongtua, ngale nyahrãng cheili wen pumma Joban lelatnãng dãngte mihnyan heh ejemkham a!

²⁸Henma komin Mosa Niemarang pa lekep medan ako, wani ba warem mihnyan hãkhi demnãng athe menga tahko lemînchen thangma ritphe rewah.

²⁹Eroh medan ako, Joban Chha lekepte mihnyan heh jãtanga chenroh dãngmin a? ngale Joban ma thinpap heh sâsietrãng hei hongsiet ekapa thãjõ rãng kepte heh chenroh dãngmin a? Ngale thinnãng mînchenchaan kohte Ju thãsete heh chenroh dãngmin a? Thatthong hun tan en, thinma chentô chhih chêmchohmin a!



³⁰Nãngma ajet arepa henma ngatah a erepa, “Phuh pa Ngama elit ang, Ngama engakthum ang” ngale atema arohmin ngatwah, “Teso ma ate mihnyan heh achhih asen pa eren a.”

³¹Ahîn Joban deknâng chathok pa chentô cheili thôn dângmin a!

³²Thonghontan en, amako nedemnâng chenroh dangtah a. Ere sanpoatko, Joban wenpa nekhoh nâng phiakkat diko, nema ajahthem chêmchei chohtet, rohkomin, nea ere chêmchei pumma tajienho.

³³Nea poattheko nok atang heh mathahko thãjõ lembe hânjôn then, ngale ahan sanpoat nâng nemin nerãngrãng chêmte mihnyan heh demnâng johchêmrãng huntet.

³⁴Nema phâtek nâng khhekritte mihnyan hehnângmin mînchen letma chohsûtet, ngale chenthu ne chhahkhem heh nyenthenko, hung leke dangtet, chenrãngma ngako, nema roantang roangjêng rãng lechhihli, ngale newah nyenthen chhahkhem noma abâmbâm asenli chenni komin choheki ngama jet eken.

³⁵Erohwhah nehung nekchha en, chenrãngma ngako, erepumma nenâng nyahrãng thãchaan khope pa ekephukoh hèn.

³⁶Joban hung junko jienmoatrãng ngale Joban ma toamsem tahpa tâchohrãng nea hungmôngmông dangletma tângmin.

³⁷Chenrãngma ngako, Joban nyapraangma ngaeka, “Chuthe diko, hen katte a erepa ekara; ngale atea lelektong thangma ekara.

³⁸Rohkomin, Nga demnâng toangtang danglahma tângte mihnyan heh, putedâlem nungma ehin ejowak a; phumma hen komin Nga tâwah mengak chhoan ako, Nga thin demnâng hung lesenmin.”

³⁹Nãnga Joban tâwah ngakchhoan lahma mahritte mihnyan heh dangmih. Erenoma, nãnga Joban nâng putedâlem lihma khopete mihnyan.

Hibru 11

Putedâlem



¹Putedâlem pa nãngma metkep chohmin ngama dâlem ekiko ngaeki, ngale ere putedâlem pa nãng mitma lekheko metkep echoh e ngama dâlem ekiko ngaeka.

²Tewa rôanpã wah mihnyan hehnâng thinwah putedâlem junko Joban ma sênchohwah.

³Nãngma Putedâlem junko are hahtokkhoh pa Joban Jabkhab ma hânwah ngama jeteka, erohwah nãng mitma chenni khe ekia ere chhahkhem heh mitma lejien khethinwah hânwah.

⁴Putedâlem junma Joban nãng Abel ma Ken noma asen joapsoap wah. Ngale ate putedâlem junma Joban ma atenâng toangtang ngatwah, chenrãngma ngako, atema Joban nãng hinhô kohtah pa Joban ma asen ngatwah. Atea riichoan medang akomin, ate putedâlem junma Abel ma athâng hehmin jabeka.

⁵Putedâlem junma Inok lerii thangma dângwah. Ngale atea Joban tânâng tôansietwên lahma henmemin ate chohkheho, chenrãngma ngako, atea Joban ma rangkethung nãng tôansietwên wah. Joban nyapraangma ngaeka, Inok rangkethung nãng tôansietwên mako, atema Joban rinmê thukwah.

⁶Henmemin putedâlem aho thangma Joban rin leta methukmin, chenrãngma ngako, henhen Joban tânâng hûeka erehehma Joban pa tonga, ngale ate lênte hehnâng Joban ma thã kohmin ngama putedâlem min.

⁷Putedâlem junma Noa ma atenâng Joban ma khedi wah dângwâng ngin thôkotah heh ate mitma lekhejô medang akomin Noa ma putedâlem wah. Atema Joban ngin keplahma Noa ma khôankho hânwah, ere khôankhoko ate ngale ate humte tangkâ heh pewah. Phumma hahtokkhoh pa chhihsiet rewah, rohkomin, putedâlem junma Noa nãng Joban ma toangtang thôn ngatwah.

⁸Putedâlem junma Abraham ma Joban ngin keplahma Joban ma atenâng kohrãng toamsem tah Diak ko wãngrãng Joban ma rooko Abraham



chhoanwah. Ate ma chenngê nâng chhoan ekanga ere pejô lejetthangma ate Diak pa phethien lahma chhoanwah.

⁹Joban ma atenâng kohrâng toamsem tah Diak ko putedâlem junma mihwun rângrâng danglahma sôngtôngwah. Ngale Isak le Jakob nii rângrâng atemin tembu humnâng songwah, ngale Joban ma mânthe toampa sêmwah.

¹⁰Chenrângma ngako Joban ma thak amak lahma hôantah hahdaang pa Abraham ma bemwah, ngale ere hahdaang pa chenthumin leta chhihjá thin hahdaang.

¹¹Abraham nyahrâng teka dangchoanjô medan akomin ngale Sara min chhaho jatjô medan akomin putedâlem junma Abraham a wa râng tâdângwah. Ate ma Joban toamsem pa chenthujô themah ngama putedâlem demnâng dângwah.

¹²Abraham nyahrâng teka dângjunko riichoan thãthãjô medan akomin, are wathe mihnyan junma ate chhuchha heh rangkho wah merit jahtô, ngale jophawah leta roakweihli phihchha jahtô jat apat eka.

¹³Are mihnyan hehmarii riiko putedâlem lahma tângwah. Thinma Joban ma toamsem tahpa chohho, rohkomin thinma ataangma khelahma khuhah nâhah dângwah, ngale nima are hahtokkhoh ko mihwun ngale hum ahah hote ngama thindedema loatjabwah.

¹⁴Ere mihnyan hehmaroh loatjab junko thindede rângma diak han lemeka ngama jeteka.

¹⁵Thinma phethien retah diakko thamngak thonghun tuho; thinma erepa thâmngak thonghun ngako, ngakkat chenre waktah.

¹⁶Rohkomin, thinma erenoma bâmbâm sen hahdaang pa lêmwah, erepa rangkethung wah hahdaang pa lemwak eka. Ngale erohwah, Joban ma atea thin Joban ngama ngatrâng rêsêmah, chenrângma ngako atema thinrâng hahdaang pa khoakhemkoh eka.



¹⁷Chenthu Joban ma Abraham putedâlem pa jetrăng Abraham nâng nangchha Isak pa ritphe lohma Nganâng soam aroak hang ngatahko, Abraham ma putedâlem junko ate chha Isak pa ritpherăng phungwah. Abraham demnâng Joban ma toamsêm wah, rohkomin, Abraham ma ate chha wathelolo pemin ritphe lahma Joban nâng soam aroak rãng chepwah.

¹⁸Joban ma atenâng ngatwah, “Ngama nangnâng chhuchha kohrăng toamsemtih heh Isak junma echoh o.”

¹⁹Joban ma mihnyan heh ritwah tangakhinsiet a ngama Abraham ma putedâlem wah - ngale, linlinjô, Abraham ma Isak leritphe dangeka pa, Isak ritwah ngakhînsiet wah rãngrăng dangeka.

²⁰Putedâlem junma Isak ma Jakob le Isau nii roandôngko rangkohrăng toamsêm wah.

²¹Ngale putedâlem junma Jakob ma ate ritmako Josep chha hehnâng rangkoh wah. Ngale Jakob ma ate menthun rako naajup lahma atema Joban nâng rangsoam wah.

²²Putedâlem junma Josep ma ate ritthângko Isrial mihnyan heh Iyip wah loatchhoan wah ngin heh thôko lahma, ate ritdiko ate phoangpa chenroh rêmin a erepemin thôthien kohwah.

²³Putedâlem junma Mosa chhat diko ate nyong awa hehma jengrem huhriem lahma thienwah. Thinma atea nyahrăng naasen khewah, ngale thinma Lowang ngin dânran lechei dângwah.

²⁴Putedâlem junma Mosa ma ate hôngdông diko Nga a Wangcha chha ngama ngat lehun dângwah.

²⁵Atema sanpoat poatthe chharăng pap demnâng khuhah nâhah tôngnoma atema Joban mihnyan heh demnâng johchêm peba hunwah.

²⁶Atema Iyip wah chentô chhahkhem le ngun akem heh noma Misaia rãng chêmchoh peba asen ngama hunwah, chenrăngma ngako, atema khedi wah rangkep pa adong thônghun wah.



²⁷Putedâlem junma Lowang rinkhahran lechei thangma Mosa Igip wah loatchhoan wah. Atema mitma lekhe Joban pa khe eka lele danglahma Igip nâng ngakwâng rãng lenyoak dângwah.

²⁸Putedâlem junko atema Adankhoam lokuh pa kuhwah ngale hei pa kâsekko hutrãng chienwah, erohkoba rangkhethung wah mihritphêrãng Joban ngintatte heh ma Isrial mihnyan heh humkâwah khhepho chha heh leritphe dângwah.

²⁹Putedâlem junma Isrial mihnyan heh ma Josi Chek pa hahran khohma dânkhoam wah rângrãng dânkhoam wah; phumma chenthu Igip mihnyan heh ma eroh dânkhoam rãng ngatko Josi pumma phangtang phophewah.

³⁰Putedâlem junko Isrial mihnyan heh ma Jeriko pantumlit jâengit tûmkhoam diko runjâwah.

³¹Putedâlem junko dihiaknyu phoangseng chhahte Rahab pa Joban ngin lekepte heh demnâng lejoh ritphewah, chenrãngma ngako, atema Isrial mihnyan huh jelette chienwêntah heh ate humko tângthukwah.

³²Ngama ademin ahan thakthôkoh a? Rohkomin nenâng Gidion, Barak, Samson, Jephthat, Devit, Samoel, ngale môngheh ngin thôkohrãng sanpoat aho.

³³Putedâlem junma thinma diaktang demnâng ranloatmîn lahma jienwah. Thinma chenpa toangtanga erepa molahma Joban ma toamsem tahpa chohwah. Thinma Sahdong hinhoo thunkâmin tâtâng hepwah,

³⁴nyahrãng cheili wendô hehmin tâmutsiet wah, ngale dengma ritdoak rãng ngatwah min pêwak wah. Thin a lonien dângwah, rohkomin lochaan hôngdâng wah; ngale thin a ranloatmîn poatko lochaan hongdang lahma mihdiak sipâhi heh jienwah.

³⁵Dihiaknyu heh Putedâlem junma thinhumte tangkâ heh riichoanwah ngakhîn wah. Khuka heh ma dangeka, asenma thînphea ngat komin hunmah, chenrãngma ngako thinma chêmchei demnâng riilahma khediko roandôngsen danglahma ngakhîn peba hunwah.



³⁶Khuka hehnâng dummek lahma buh awat wah, ngale khuka heh janruma khhek lahma phâtek nâng sekwah.

³⁷Thin a longma ritpet rewah, ngale khani korâng khadoak rewah, thin a dângma ritdoak rewah. Thinma saakkhoan le kienkhoan heh khetrâng keplahma dângwah - tangchhih dângwah, ngale thinnâng chêmsietmin rewah, ngale hânjôn rewah.

³⁸Hahtokkhoh pa thinrângma lesen dângwah! Thin a hum ahah ahote rângrâng seah ngale hahkong hahla jêngjêng nâng phôngkhôm wah, ngale longken le hahkenken hehnâng phôngsông wah.

³⁹Are chentô mihnyan heh thin putedâlem junko jet eki! rohkomin Joban ma chenni toamsem tah a erepa thinma chohmah,

⁴⁰chenrângma ngako, Joban ma nângrângma nyahrâng asen themawa koh ehi. Atema themawa ekapa thinmin nângdemnâng aroam lahma meba tâsâmin.

Hibru 12

Joban pa nâng Wa

¹Nângkhu rângma putedâlem ngenâng nâng tumlitko hâkhi hôante mihnyan jahmông tonga. Erohwah, nânglem kowah tengbeng thukthin chentôpa rephe e, ngale nâng lephongthuk thangma tângsiette pap hehmin rephe e, ngale nângma wah nângrâng thienkoh ehi toatchhoan mîn pa nyahrâng hung arin kohlihma toatchhoan mîn e.

²Nâng mitma Jisu nâng thongthong sùlihma tonge, chenrângma ngako khebengma danglahma athôn kotuk atema jôba nâng putedâlem pa senthemthem dangthuk ehi. Atea bângphak khohko rittekrit ran cheiho! Erenoma, Joban ma ate mawah khuhah nâhah thienkoh ekapa thonghun lahma bângphak khohko rêsê rephe rittekrit pa chenjô dangmah ngama thonghun wah, ngale erohwah atea athângheh Joban tôngthin dekchah ngeko tongeka.



³Thatthong hun tan en atema chentô chêmchoh tahpa; papi mihnyan hehma atenâng chentô mitchektah a! Erohwah nedede min hungchha rinchha nekdangen ngale ne putedâlem pa nekjek en.

⁴Chenrãngma ngako, nea papwah pechhoanrãng pap demko ranloatmîn wah rãngrãng loatmîn eken, eroh akomin nea ritlinlin marii eken.

⁵Joban ma ate chhuchha rãngrãng thonghun lahma ate jabkhab junma nenâng rîn akhah then heh lekphetet ne? “Echha heh, chenthu Teso ma nenâng phheksiet nâsiet mehôn hênko atatre en, ngale chenthu atema nenâng ritngat mere hênko nehung nekke en.

⁶Chenrãngma ngako, Teso ma hennâng huneka ehehnâng phheksiet nâsiet hânaka, ngale atema henpa ate chharãng kepeka ehehnâng phheksiet nâsiet hânaka.”

⁷Nema chenni chêmchei choh eken a ereko Wama phheksiet nâsiet hân ehang ngama thonghun letma tha en; nema chêmchoh junko Joban ma nea ate chha rãngrãng kep ehên ngama jeteka. Henchhu henchha komin ate Wama phheksiet nâsiet lehôn thienlahma tonga?

⁸Nemin ate chha ahan heh hânaka rãngrãng phheksiet nâsiet lehôn medang hênko, nea ate chha linlin dangmet, nea pâmchha.

⁹Nãng mihnyan nyuchha hei angem wa memin nãngnâng phheksiet nâsiet hân ehi, ngale nãngma thin ngin kepeki. Eroh medang ako, nãngju rãngma Wa ranjã chentô bâmcheimin a!

¹⁰Nãng mihnyan nyuchha nyong awa hehma sanpoat chuthe rãngchha ba phheksiet nâsiet hân ehi, ngale erepa thinma asen ngama thonghun lahma hân ehi; rohkomin Joban ma nãngdede rãng sênrãngma hân ehi, erepa ate ngewah Asâthôn demko johrũrãng hân ehi.

¹¹Chenthu nãngnâng phheksiet nâsiet mehôn hiko, ere sanpoat pa nãngrãngma khuhahthin ledang hungkeli dangeka. Eroh komin khediko, henhennâng phheksiet nâsiet hân lahma punsiet eka erehehma mêmô ngale toangtang roandôngpa choh eka.



Rîn akhah ngale Ritngat

¹²Erohwah, nedek joakjâre ekepa laangen, ngale ne dakuh tiiekapa rôngsiet en!

¹³Lemtin pummejû khoam en, erohkoba dachhihte heh dapa chhihjà lere thangma asên erea.

¹⁴Chentô demnâng mêmô dângrăng thonghun en, ngale roandôngko Asâma dângrăng thonghun en, chenrăngma ngako, eroh ledang kako henmemin Teso leta chohkhemîn.

¹⁵Jetletma dangen, henjô Joban mînchennaan lechoh nekchen dangeken. Ngale bãngkhah hongphoak lahma ate bii pumma bãnghan heh rângchêmsiet arãngrăng newah mihnyan chhih nekhong en.

¹⁶Ngale Isau rãngrăng dihiak dela kaamchhih moatte erediko Joban nãng lepute dâlemte nekchen hongeken, atema phhekchhah hatthe nãng atea khhepho chha dengpa sengchhahwah.

¹⁷Nema ajet khediko atema ate wa ngewah rangkeprăng hunwah; rohkomin atema erepa chohho, chenrăngma ngako, atema chenni motah a erepa ngaklitsiet rãng chenni lemkhôjô ahotu dãngwah, atema mitphi demnângjô methat latrii akomin talitjâ tuho.

¹⁸Nea Isrial mihnyan heh wãngtah rãngrăng dekma jiensahloatli Sinai hahho kowah wendô dong, phoambuk nyektungtung, ngale pôngdong patdong thenâng wâng dangmet,

¹⁹ngale poakpo rahmette, erediko jabkhab tatthin thenâng wâng dangmet. Chenthu mihnyan heh ma jabkhab tattahko, thinma ererãngrăng ahan nekchen tattueki ngama roatsep wah,

²⁰chenrăngma ngako, “Ngem angh mejômin are hahkongko mesahtiet ako erepa longma ritpetmin” ngama ngaeka jabkhab pa thinma chintat ho.

²¹Erethepa nyahrăng cheili dãngwah, ngale Mosa memin ngatwah, “Nga a nyahrăng tiichei ekang!”



²²Phumma nea Zion Hahkong nâng wãngeren, ngale ahîn Joban sôngthin Hahnâng wãngeren, rangkethung wah Jeroselem nâng wãngeren, ere Theko ate ngintatte heh hahjat jatma tonga.

²³Nea Joban rãngma khhephochha heh khuhah nâhah khôantôngthin thenâng wãngeren, ere mihnyan hehmîpa rangkethung nâng raangthien lahma tonga. Nea chentô mihnyan nyuchha heh achhih asen rête Joban tânâng hûeren, ngale mihnyansen heh Ju sênsiette Joban tânâng hûeren.

²⁴Nea Joban le mihnyan tungko toamsem anyan hôante Jisu tânâng hûeren, ngale Abel hei pumma hongjabtah noma atewah hongeka hei pumma bâmbâm asen hôngjabte tânâng hûeren.

²⁵Erohwah jetletma dangen, ngale ere hôngjabte ngin letat nekdangen. Henhenma rangkethung wah Joban ngin are hahtokkhoh ko thôkohte heh nginlekep dangeka ere mihnyan heh henmin leta pemin. Eroh medang ako, nãngma rangkethung ma hahtokkhoh ko jabkate ngin lekep medang eko chenroh jienpemin a!

²⁶Ere sanpoatko ate jabkhab roat pumma hahtokkhoh pa ephongsiet a, rohkomin, athângheh atema toamsem eka, “Ngama ade rektheko hahtokkhoh pelolo ledang rangkethung min ejoh phongsiet ang.”

²⁷“Ade rekthe” ngaeka jabkhab junko chentô hôantah heh phangtang phongsiet lahma echhihsiet a, erohkoba leta phongsietthin heh ba lechhihsiet etonga.

²⁸Erohwah nãngma dangkoh a ngae, chenrãngma ngako, nãngma leta phongsietthin Hahsông choheki. Ngale nãngma Joban ngin keplihma ate ranchei nungma nãnghung nâng khuhah nâhah danglihma Joban nâng soamtô min;

²⁹chenrãngma ngako, nãng Joban pa linlinjô ajemkhâm wen.

Hibru 13

Joban Rin chenroh Methukmin a



- ¹Kristan pho anaa rãngrãng wathema wathe nãng hun achhâmîn letma tongen.
- ²Nehum nãng mihwun heh lejekthuk nekdangen. Chenrãngma ngako mihnyan hehma eroh jekthukwah rangkhethung wah Joban ngintatte min lâjek thuktah.
- ³Nema phâtek nãng khhekritte mihnyan hehnãngmin thin demnãng johkhhekrit wah rãngrãng thonghun en. Ngale chêmchete hehnãng nemin thin demnãng johchêmwah rãngrãng thonghun en.
- ⁴Anga ngama nemnyansiet pa sãpoangpoang danglihma sietmin, ngale tangnyu tangwanii wathema wathe nãng toangtang tuta dãngmin. Janchhõ paangmih poatko kaamchhih moatte le mihdihiak dela tungnãng kaamchhih moatte hehnãng Joban ma achhih ngatmin.
- ⁵Ne roandõngko ngun akem nãng hangbalin nek hun en, ngale nenãng chenni tonghèn a ere demko rinme letma tongen. Chenrãngma ngako Joban ma ngaeka, “Ngama chenthumin thinphemah; ngale Ngama chenthumin lekphemah.”
- ⁶Erohwah, nãngkhuma hungdongdong danglihma jab e, “Teso pa Nganãng chohsokte, erohwah Nga cheitumek. Ngale Nganãng henma chenni taretu hanga?”
- ⁷Amawah nenãng Joban nginkong thõkohte khhepho phannang heh thonghontan en. Thin chenroh songtong lahma riitah a ereheh ngakthonghontan en, ngale thin putedâlem rãngrãng dangen.
- ⁸Jisu Krista pa mejâ, thejâ, ngale roantang roangjêng rãng mãnthè.
- ⁹Jatrup ledangli ngin ariet heh tatletma toangtang lemkhõ kowah nekke khoam en. Jokphhek chhah niemarang heh keplihma tõngnoma Joban ngewah mìnchenciaan chohlihma tõngpeba asen; henhenma phhekchhah niemarang heh keplahma tongeka ereheh nãngmin ere niemarang pumma chenjõ chohsûmah.



- ¹⁰Jews heh rangsoam thin kowah moatte soam aroakte heh ma chaamkhoh kowah joapsoap eka heh chenjô leta phhekchhah min.
- ¹¹Jews heh soam aroakte adongthôn heh ma nyahrâng Asâthôn Theko ngem angah hei keplahma paprâng joapsoap hokwah; rohkomin thin ma ngemsekpa hahdaang wah panthong liennâng rokthhek wah.
- ¹²Eroh wah mihnyan nyuchha heh pappâ ate heima sâsietrâng Jisu min hahdaang wah panthong liennâng ritwah.
- ¹³Eroh wah, nângmin hahdaang wah panthong liennâng chhoanlihma atema rêsêchoh ekako johdange.
- ¹⁴Chenrâng ma ngako are hahtokkhoh ko nângrâng roantang roanjêng sôngthin hahdaang aho; nâng ma khedi kowah ahokmin hahdaang peba bemlaeki.
- ¹⁵Eroh wah, Jisu jun ma Joban nâng nâng ma roantang arô ngema joapsoap e, ngale nâng ma atenâng soam aroak kohhokwah rângrâng nâng thun ma atea Teso ngama loatjab eki.
- ¹⁶Kaamsen moatrâng neklekphe en ngale wathema wathe nâng chohsokmîn min neklekphe en, chenrâng ma ngako, ereheh jôba Joban rinmeli joapsoap.
- ¹⁷Ne khhepho phannang heh nginkep en ngale thin ma chien ehèn junko dangan. Thin ma leboantong thang ma ne Ju amoang heh sùare ehèn, chenrâng ma ngako, thin memin thin moatlem thâpa Joban nâng khesokmin. Nema thin ngin mekep enko, thin ma thin moatlem pa khuhah nâhah emowak a; eroh ledang kako, thin ma hungkeke emoa, ngale nenângmin chenthujô leta chohsûmin.
- ¹⁸Nirâng roantang rangsoam kohhi. Nihung nirin linlin danglihma asâ, chenrâng ma ngako, nima sanpoat roakweih kaamsen moat tuta huneki.
- ¹⁹Ngale Nga nekhu tânâng Joban ma sitsiak chenmam ngakchienkat hang ngama rangwah mamsoam kohha ngama rosep eka.

Ajek Rangsoam



20-21 Joban ma nãng Teso Jisu Krista ritwah ngakhinsiettah, ngale ate hei junma atea Saaksokte Adongthôan dangeka, ngale erejunma roantang roangjêng rãng toamsem eka. Ate hung junko moatrãng mêmô kohte Joban ma chentô asenli heh chenchoh kohhi, ngale Jisu Krista junma atema nãngnãngmin ate hungsênli moatlem moatrãng chenmam hôanhi. Erediko Krista mîn roantang roangjêng rãng chendonga! Amen.

Athôan Jabkhab

22 Ngalemruchha heh, Ngama nehung dôngthukrãng rîn akhah ngin thôkoh ekako nehung môngsiet letma mamjettat en ngama rosep eka; chenrãngma ngako Ngama nenâng are sitiraang ekapa nyahrãng alo nyong dangmah.

23 Ngama nenâng nãngnaa Timothi phâtek wah lâlaangtah ngama thôkoh huneka. Ngale ate sitsiak meka rako, Nga nedemnâng chohmîn katko atemin Nga demnâng ejohsiet katrãng.

24 Niwah salem pa ne lemsênte khhepho phannang, ngale chentô Joban mihnyan hehnãngmin thôkoh en. Itali diakwah Joban nãng putedâlemte hehma thin salem matkat ehèn.

25 Joban mînchennaan nekhua nga demnâng chentonghèn.



Jems

Jems 1

¹Joban ngale Teso Jisu Krista haa Jems ma raangeka: Hahtokkhoh wah Joban mihnyan chentô thenâng phôngphan chhoante hehnâng salem koheka.

Putedâlem ngale Buthi Mongthem

²Ngalemruchha heh, chenthu nekhoh nâng chentô chêmchei heh mehûrako nea khuhah nâhah dangen,

³chenrãng-ma ngako, nemajet, nema chêmchei choh eken junko atadôre eken.

⁴Ngale rongrup nâng lethe thangma athôn kotuk rongtêngtêng mamtadô en, eroh koba nea chenni nângjô lechhih thangma rongrup nâng asen ngale apun tuta edangen.

⁵Phumma nekhuwah hen komin buthi mongthem aho medan enko, nema Joban nâng rangsoam en, eko Joban ma nenâng ekohhên; chenrãngma ngako, Joban ma anga nganâng mînchen lahma chhahme ma koheka.

⁶Rohkomin chenthu nema rangsoam ko, nehung nâng amãnhhajô letûngmaang thangma putedâlem letma soam en. Henhenma hungnâng tungmaang lahma rangsoam eka ereheh rangsoam pa josiwah pôngma jowaak rãngditwaak a rãngrãngba.

⁷⁻⁸Nemin eroh nema chenni moeken a erepa nehung nerin nâng leta phensiet metungmaang enko, nema Teso wah chenni thaeken a ereheh echoh e ngama nekthonghun en.

Tangchhih thôn ngale Techhu thôn

⁹Tangchhih Kristan mihnyan heh chenthu Joban ma metoansiet tahko khuhah nâhah edanga,

¹⁰ngale ererãngrãng Kristan mihnyan techhu hehmin chenthu Joban ma menumsiet akomin khuhah nâhahjô edanga. Chenrãngma ngako, techhu dângpa wunwah chongpô chhihjá rãngrãng mahjâmin.



¹¹San pa nyahräng chaanhong lahma bãngko ekhamsah a; phumma chongpô pa jârit erea, ngale ate phangsên pa chhihjâ erea. Ererängrängjô techhu hehmin thin ngun akem phoanglêmbii poatko eroh echhihjâwak a.

Athaksok ngale Hungtôan

¹²Henpa chêmchei chohpoat komin putedâlem nâng asen danglahma tongeka ereheh a rangkepte mihnyan, chenrângma ngako, chenthu thinma chêmchoh ekapa metadô tahko, Joban ma atenâng hun achette mihnyan hehnâng kohräng toamsem tah roandôngpa thinma echoh a.

¹³Nângnâng arerängräng chêmchei junma hung methattoan hiko, nângma, “Are chêmchoh ekangpa Joban wah chohkang” ngama lengamin. Chenrângma ngako, Joban ma achhih ngema chenthumin nânghung toanmahhi, ngale atema achhih ngema hen hungmin mathattoan eka.

¹⁴Rohkomin chenthu nânghung khenwah achhih hongeka pumma kêsietchhoan junko achhih pumma nânghung toanehi.

¹⁵Erediko thinhung khenwah achhih huneka pumma pap hongchhaeka; ngale ere pappa nyahräng mehongdong tahko, ere pumma arit pa hongchhaeka.

¹⁶Ngapho nganya heh, nekdiap chhahrii en!

¹⁷Chentô asenli ngale apunli hinhô heh rangkethung wah kaera; erepa rangkethung wah wenphiak Hôante Joban tâwah kaera, atea chenthumin litjâmah, ngale chenthumin rangnyek râng litjâmah.

¹⁸Ate hung junma ngale ate toangtang jabkhab junma nângkhu nâng roandông kohehi, erohwah atema chentô tem atiektah hehwah nângma khebeng thôn thepa choheki.

Atat ngale Amoat

¹⁹Ngama nyahräng ahun lemruçha heh! arepa thonghun en, Atat pa anga ngama senthemthem tat en, rohkomin jab pa ane jab en, ngale rin lemlienma nekkhah en.

²⁰Mihnyan nyuchha rinkhah junko chenthumin Joban ma huneka rângräng toangtang tadangmih.



²¹Eroh-wah chentô jatchhih patkhah ngale chentô kaamchhih hehwah ajekre en. Ngale numnene dangletma nehung nâng Joban ma ate jabkhab khietkoh ehênpa kepen, ere jabkhab pumma nekho eta pesiet hên.

²²Joban nginpa atatlolo nekjetat en; erenoma Joban jabkhab pumma chenroh ngaeka eroh mo en.

²³Nema ate jabkhab ko jetatlolo jetat letma, jabkhab pumma chenroh ngaehên a eroh lemo medang enko, nea dâpha sokmin nâng sùlahma atedede thhenpheng kheritte mihnyan rângrâng.

²⁴Thin a dâpha sokmin nâng thindede senthemthem kherii lahmemin khôamchhoan diko thin chenroh kheriitah a erepa lemlienma rânglekphea.

²⁵Rohkomin nema mihnyan papwah pesiette Joban Niemarang Asenko namnam sùletma, atatlolo ledang, ere Niemarang pumma chenroh ngaeka ererângrâng memo enko - nema chenjô memo enkomin ere kohko Joban ma rang ekohhên.

²⁶Nekhuwah henma komin rangsoam niem kepte ngama thonghun eken a? Rangsoam niem kepte ngama ngaletma nedede thelipa lekit lorii medang enko, ne rangsoam niem pa sek ho, ngale ne dedeba diapchhahrii eken.

²⁷Joban Wama Asâ ngale Alinlin Joban nâng soam atôte pa are hehnângba ngaeka: janthoichha hehnâng sok arête ngale janthoinyu heh chêmcheiko chohsokte, ngale are hahtokkhoh wah achhih hehnâng lechhihsietrii tângte hehnângba ngaeka.

Jems 2

Thhensok Junko Ritngat

¹Ngalemruchha heh, Nâng Teso Jisu Krista mîndongthôn chohte nâng putedâlemte dangletma, nema chenthumin mihnâng rangkhoh thhenphâng sùletma achhih asen pa lengamin.



²Chenjô komin nekhu chhangko techhuwa pa kem dekkhep pa pheng ngale khetsen pa kep relahma ehûra, ngale tangchhihwa pa khetchhih keplahma min ehûra.

³Phum-ma nema khetsen keplahma hokteko ajah khoakhem letma atenâng, “Are tângthin senko tongwãngro,” ngama rooletma, tangchhih wako, “Ire riangko chep o, ba Ngada thongko walemko tongo,” menga enko.

⁴Nema nedede tungko mihnyan nâng achhih asen ngama rênphên junko the eken, chenrãngma ngako erepa nema achhih ngema renpen eken.

⁵Ngalemruchha heh, tattan en! Joban ma are hahtokkhoh wah tangchhih heh putedâlem ngenâng techhu dângrãng reneka, ngale henhenma atenâng hun achhâeka ereheh nâng kohrãng toamsem tah thepa thinnâng kohrãng reneka.

⁶Rohkomin nema tangchhih hehnâng thãjõ eken! Phumma ne namnek lahma chêmsiette erediko ne sekhamrãng nginpatte heh tânâng nesiethokte heh hen a? Ereheh a techhu heh ledangne!

⁷Ere heh ma jôba nenâng mînsenthôan koh ehèn mînpa chhihthôeka.

⁸Joban nyapraang wah choheki Joban Hahsông Niemarang pa mekep enko nema kaampunli moeken, ereko aroh raangeka, “Ne humtok humkhung wah mihnyan hehnâng nedede hunrii eken rãngrãng hun en.”

⁹Rohkomin nema mihnyan hehnâng thenphãng sûletma mekhoakhem enko, nema pap lâmotet, ngale Niemarang pumma nea niemarang chhihsiette ngaehèn.

¹⁰Henma komin Niemarang kowah wanthe lekep medang ako atema phangtang chhihsiet eka.

¹¹Chenrãngma ngako, “Dihiak dela kaamchhih nekmo en,” ngama thôkohte pumma jôba, “Mih nekritphe en,” ngamemin thôkoh ehi. Erohwah nema dihiak dela tungnâng kaamchhih lemoken komin, nema mih meritphe enko, nea niemarang chhihsiette lâdangtet.



¹²Chentô jab ajâ ngale moat akat nâng nãng pesiette niemarang pumma jôba achhih engahi ngama thonghun letma mo en.

¹³Chenrãngma ngako, mihnâng lemînchente hehnâng Joban ma thinnâng achhih asen renjâko lemînchen min; rohkomin mînchen metong hiko achhih asen rênpa nãngma tajien e.

Putedâlem ngale Moat akat

¹⁴Ngalemruchha heh, nema putedâlem eki ngaletma nemoatlem pa putedâlem junko ledang medang enko ereko chenni asen etonga? Ererãngrãng putedâlem pumma nekho tapesiet hèn a?

¹⁵Chenjô komin nãngpho anaa hehnâng thok apohrãng khet aho, erediko jokphhek chhah thinmin aho lâdangtah.

¹⁶Phumma nema thinnâng, “Joban ma rang ekohhèn! ngale lembubu tongen erediko senthemthem jokphhek chhah en!” ngama lolo ngaletma thin roandông kowah chenni lemeka ereheh lekoh medang enko - thinrãng chenni ehongsen a?

¹⁷Erohwhah koh amien pemin putedâlem demko aroamma dângmin: Putedâlem lolo danglahma moatlem aho medang ako, ere pemin aritthã jôba.

¹⁸Phumma wanwanthe ma enga a, “Wathenâng putedâlem, ngale ahan wathe nâng moatlem tonga.” Phumma Ngama atenâng edanthang ang, “Nganâng khesok tanhang, moat akat aho thangma putedâlem pa hennâng tongeka. Ngama nenâng Nga putedâlem ngale Nga moatlem pa khesok a.”

¹⁹Nema Joban pa wathelolo ngama putedâlem ekenle? Sen a! eroh pete joak ajo memin putedâlem eka - ngale nyahrãng tiilahma cheieka.

²⁰Nea aba! Nenâng moatlem aho thangma putedâlem pa sekhota ngama khesok hun eken a?

²¹Nãngte nãngwa Abraham pa Joban demnâng chenroh toangtang jiendângwah a? Erepa moatlem junma dângwah, atema ate chha Isak pa Joban nâng joapsoap rãng ritpherãng ngatwah.



²²Nema erepa khemetne? Ate putedâlem le ate moatlem nii aroamma dângwah; moatlem junko ate putedâlem pa sênsietwah.

²³Ngale Joban nyapraangma aroh ngatah pa toangtang dângwah, “Abraham ma Joban nâng putedâlem wah, ngale ate putedâlem junko Joban ma atea toangtang ngatwah.” Ngale erohwah Joban ma Abraham nâng lemruçha ngatwah.

²⁴Erohwah nema sûtan en, ne putedâlem junma lolo dangmah, moatlem junma nea Joban demnâng toangtang dangeken.

²⁵Ate phoang sengchhahte dihiaknyu Rahab demnâng min mânthejô dângwah. Ate min Joban demnâng ate moatlem junma toangtang dângwah, atema Isrial mihnyan hehma jejetta mihnyan huhchienwên tah hehnâng chohsû lahma lemhan ngema pêchhoan thukwah.

²⁶Erohwah, phoangko Ju aho medang ako phoangpa aritre eka rângrâng, moatlem aho thangma putedâlem lolo pemin riichoanthã jôba.

Jems 3

Theli

¹Ngalemruçha heh, nekhuwah ahethôte ajah nekdangen. Nema ajeta, ni ahethôte dangeki hehnâng achhih asenpa mihhan heh noma abâm erenhi.

²Nângkhu anga ngama roantang mejô rângmông themoe. Rohkomin henma ate jab ajâ nâng chenthujô lethe dangeka, ere mihnyan pa asen, ngale atema ate phoang phangtang kitlo lahma thieneka.

³Nângma Mokthunko ngin chenkephi ngama ruma rângkhhek e, ngale nângma chenka dângthuk hunekia ere ngeko rângchhoan thuk e.

⁴Ngale jogari hehnâng thatthong hun tan en: Jogarii pa atô chêmdongroh ngale nyahrâng pôngdongma metlahmejô mechhoan akomin, erepa jogari thunwah jankha chhupchha khhek eka pumma punchhoanthuk eka, ngale arepte pumma chenngê nâng repchhoan huneka ere ngeko repchhoan eka.



⁵Phumma theli pemin eroh jôba: Atô arinchhajô medang akomin, erepumma dôngmông tarângthôa. Thatthong hun tan en, lindong lakdong pa mitchhuptô wenpôma tarokphea!

⁶Ngale theli pemin wen răngrăng jôba. Chentô hahtokkhoh kowah achhih heh theli nâng tongeka, ngale atema năng phoangko tonglahma năngphoang phangtang chhihsiet eka. Theli pumma năngphoang phangtang wennâng thek eka, ngale theli pumma ere wenpa papwen wah choh eka.

⁷Mihnyan nyuchha ma chentô ngem angah heh tapem e, ngale apêmin pemwak eka - wunngem, wunwo, pû anyah hehmin pemwak eka.

⁸Rohkomin henmemin mâmâ dede theli mathat takitloeka. Theli pa achhih ngale tâkitloatli dangmah, ngale theli mihnyan ritphethin bii angen min ajahthem tonga.

⁹Năngma theli pumma năng Teso ngale năng Wa Joban nâng dangkoh a min ngaeki, ngale erepumma Joban răngrăng hânwah mihnyan hehnângmin tem athoak eki.

¹⁰Dangkoh a ngat jabkhab le mihnâng tēm athoak jabkhab pa mănthethin thunkowah loatkaera. Ngalemruchha heh, phumma aroh pa nekchen dangeka!

¹¹Jomit mitthe kowah jotu ngale jokhah jienroam loatjenmah.

¹²Ngale Ngalemruchha heh, Fugbăng kowah Olivri jienhong rimah; ngale Angurbăng kowah Fugri jienhong rimah, ngale sumjo kowah jotu jienhong jenmah.

Rangkhethung wah Buthi Mongthem

¹³Nekhu chhangnâng hen akomin jet ajien ngale hungchit rinchem tongen a? Eroh metong enko nema ne roandôngko moatlemsen moletma, numnene dangletma, erediko buthi mongthemsen dangletma khesok en.

¹⁴Rohkomin nehung nâng mihphetwân, hunggek, ngale chhahnyoak, medang enko, nema ne buthi mongthem pa rângthô letma toangtang lelatnâng dangletma pap nekmo en.



¹⁵Arerãngrãng buthi mongthem pa rangkethung wah kat dangmahra; erepa hahtokkhoh wah buthi mongthem ba, ngale erepa Joban Ju wah ledangma juchhah ngewah choh eka.

¹⁶Chenko mihphetwân ngale chhahnyoak tongeka, eretheko hahjâm tijâm ngale rongrup achhah hehmin tongeka.

¹⁷Rohkomin rangkethung wah buthi mongthem pa khebeng thôanko hungsâ; erediko mêmô, numnene, ngale chentô demnâng lemru lemchha tuta; ngale mihnâng nyahrãng mînchen, moatlemsen tuta moeka; ereko thhensok le khoanglep aho.

¹⁸Ngale mêmô dângrãngma moatte hehma mêmoma moeka junko asenli ngale mêmô echohwak a.

Jems 4

Hahtokkhoh wah Moatlem demnâng Lemruchha dâng

¹Nekhu chhangnâng ran angem ngale mên ahiet pa chenwah hongeka? Ereheh nekhu hung arin khennâng roantangma khuhah nâhah chohrãng loatmîn eka junko hongeka.

²Nema chenni hunken a erepa tachohmet, erohwah nema mihritphe eken; nema chenni komin nyahrãng hunken, ere pemin nema tachohmet, erohwah nea mên ahietmîn re eken. Nema chenni hun eken a erepa nema tachohmet, chenrãngma ngako, nema erepa Joban wah thamet.

³Ngale nema metha enkomin, erepa nema chohmet, chenrãngma ngako, ne mongthem achhah demnâng thaeken; ngale nema ere sêmamak thaeken pa nedede rinmerãng keprãng thaeken.

⁴Joban nâng lepute dâlemte mihnyan heh! Nema jetmetne, hahtokkhoh demnâng lemru chha dangkenpa Joban demnâng ran dangeki ngama? Nema hahtokkhoh demnâng lemru chha dâng mehun enko, nema nedede a Joban ranrãng hôanrii eken.



⁵Nekthonghun en Joban nyapraangma ngaeka pa toangtang dangmah ngama, Joban nyapraangma aroh ngaeka, “Joban ma nãng khennâng thienkoh ehi Ju pumma nãngnâng nyahrãng hun ehi.”

⁶Rohkomin Joban ma nãngnâng ate mînchenciaan koh ehipa ere nomemin achaan. Joban nyapraangma ngaeka, “Joban ma ngam apoate mihnyan hehnâng hunmah, rohkomin numnene dângte mihnyan hehnâng ate mînchenciaan koheka.”

⁷Erohwah, Joban khenko tongletma ate nginkepkep dangen. Juchhih pa junloat re en, ngale erohkoba juchhih pa newah etaangchhoan hèn.

⁸Joban tânâng hûren, ngale erohkoba netânâng Joban enamra. Papi mihnyan heh nedek pa sâsoan en! ngale ahuh khoanglep heh, nehung pa sâsietre en!

⁹Hungchhih rekma demnâng sep ajôangre en; Ne angitre eken litpa asepre en, ngale khuhah nâhah dangeken litpa hungchhihma tongen!

¹⁰Teso mathahko numnene dangletma tongen, ngale erohkoba atema ne echoangpe hèn.

Wathema Wathenâng Athe Loatmîn junma Ritngat

¹¹Ngalemruchha heh, wathema wathe nãng nekchhih thômîn en. Nema nelemru Kristan ahan heh chhihthô, ngale thinnâng athe melo enko, nema Joban Niemarang ko achhih ngale athe ngaeken. Ngale nema Joban Niemarang nãng athe menga enko, nea Joban Niemarang kepte dangmet, rohkomin ere Niemarang ko athe loatteba.

¹²Joban loloba Niemarang kohte ngale athe loatte. Ate lolo jôba tâpesiette, ngale tâchhihsiette. Mihhan nãng athe loatrãng, nang hen ngama thonghunrii eko?

Ngam apoa junma Ritngat

¹³Ade dangeka, aroh jabte hehma Ngangin jetat tanha, “Thejâba nènep nãngma wanthe hahdaang nãng chhoan lihma, eretheko nãng rangpâ pãtherãng tongchhoan e, ngale kaam molihma ngunwah jahmõang bie.”



¹⁴Nema nènep ne roandôngpa chenroh dângmin a erepa tumin jetmet! Nea wenkhuh chuthe chharãng hong lahma mahjâte wenkhuh rãngrãngba.

¹⁵Nema arohba tajab en: “Teso hungsi medang ako, nãng ehin e, ngale are moatlem heh emoe.”

¹⁶Rohkomin athângheh nea ngam apoarit reken, ngale rãngthôrit re eken; Are chentô rãngthôrii eken heh phangtang athe.

¹⁷Erohwhah, nãngma moatlemsen ngama jetlihma ere moatlempa lemo medang eko, erepa nãngrãngma pap.

Jems 5

Techhu hehnâng Ritngat

¹Ngale ade dangeka, techhu hehma Ngangin ko jetat tanha! Nekhu khohnâng hokmin chêmchei hehrãngma sep ajôangre en!

²Ne ngun akem heh sãnjâtah, ngale nekhet akhu hehmin thup adôngma lâphhektah.

³Ne ngun akem hehmin chhinma lâphhek kohthen, ngale are chhin pumma chhihphhek eka junma nea achhih ngama jeteka, ngale ere chhin pumma nephoang hehmin wenma jêmkhâm rãngrãng ephhek hèn. Nema ngun akem heh are rãngkuh sanha thôanthâng sanpoatko khônbi eken.

⁴Nema nepit wah dekbi biite hehnângmin dekbi thã kohmet. Thinma ne lelatnâng jabeka nginpa jetattan en! Ne chhah khôankhen kohte mihnyan heh sepjôngpa Chentô noma achaanthôn Teso Joban nânâng lâhûtah.

⁵Are hahtokkhoh kowah ne roandôngko ngun akem lolo chenni nãngjô lesekmah thangma khuhah nãhah tongeken. Nededema ne ritphejâ rangwo korãng tetjoakrii eken.

⁶Nema chenni nãngjô lethete mihnyansen hehnâng achhih ngaletma ritphe eken, ngale thinma nenâng jektãng mahhèn.

Hungmông Rinmông ngale Rangsoam



⁷Ngalemruchha heh, Teso mangak ngaka hung arin môngmông tongen. Thatsû tan en, pitmoatte heh ma thinpit wah chhah heh mamun munwãng chenroh rângbem a. Thinma rangcho chobengwah rangpat ngale chojekwah rangpat heh thin pitwah chhah hehrãngma hung arin môngmông danglahma rângbemla a.

⁸Ererãngrang nemin hung arin môngmông tongen. Ne dâlem pa senthemthem dangen, chenrãngma ngako Teso ngakkat rangwopa lânamtha.

⁹Ngalemruchha heh, wathema wathemîn nekchhih thômîn en, eroh medang enkoba Joban ma nenâng achhih ngama lenga edanghèn. Aren rangwopa lânam hutha, ngale lâhong eka.

¹⁰Ngalemruchha heh, Teso mînko jabte mông hehnâng thatthong hun tan en. Thin chenroh hung arin môngmông dangtah a, ngale chêmchei heh chenroh tadô tah a, ereheh nâng thatsû letma nemin thin rãngrang dangen.

¹¹Thinma chêmchei heh tâdôdi nãngma thinnâng rangkepte ngama roeki. Job ma chenroh tadôtah a erepa nema lâchohtattet, ngale nemajet athôanko Teso ma atenâng chentô chohkohtah a. Chenrãngma ngako Teso nâng mînchen ngale hun achet pa jahmông tonga.

¹²Ngalemruchha heh, chentô noma alemthôan pa, chenthu nema toamsêm poatko, rang ahah mîn kepletma min neksem en, erediko chennimîn keplet mejô neksem en. Nema meta enko, “Tamo ang” ngaen, ba letamoli medang ako, “Tamomek” ngaen, eroh medang enkoba nekho h nâng Joban ma achhih lenga edanghèn.

¹³Hen akomin nekhuwah chêmcheite tongen a? Eroh metong enko rangsoam en. Ngale hen akomin nekhuwah khuhahte tongen a? Eroh metong enko nema Joban nâng rôsê se en.

¹⁴Nekhuwah hen akomin khunte tongen a? nema Asâthem khhepho heh roochhoanthuk en, ngale thinma Teso mînko khunte hehnâng Oliv tienma hutko lahma rang chensoamkoh a.



¹⁵Putedâlem lahma thinrãng rangsoam koheka junko khunte pa ame erea; Teso ma thinphoang pa engaksensiet a, ngale thinma pap motah hehmin map echoh a.

¹⁶Erohwhah, nepap heh wathema wathe nãng thômîn koletma map thamîn en, ngale wathema watherãng rangsoammîn koh en, erohkoba ne khoanchet heh esen en. Joban nãng putedâlemte mihnyansen heh rangsoam pa nyahrãng chaanwin.

¹⁷Ilija min nãngkhu rãngrãng mihnyan jôba dãngwah. Atema nyahrãng hung kohlahma rang nekchenpat eka ngama rangsoam wah, phumma pârem khathe hahtokkhoh ko rang lepat dãngwah.

¹⁸Eredikomin depthe atema rang chenpat a ngama rangsoam wah, phumma rangkho wah rangpat patka lahma hahko too achhah sênwah.

¹⁹Ngalemruchha heh, nekhuwah hen komin toangtang kowah kechhoan letma mihhan wathema methe ngaksiet hû hênko,

²⁰are nginpa thonghun en: Henma akomin papi mihnyan pa lemkhôchhih wah mengak siethû ako atema papi mihnyan Jupa ritwah pesiet eka ngale ajahthem pap hehmin map chothuk eka.



1 Piter

1 Piter 1

¹Jisu Krista moattat chhoante Piter ngewah- Joban ma arên mihnyan heh Pontas diak ngale Galatien, Kapadokia, Asia, ngale Bithinia, diak hehnâng phoangphan chhoan lahma hum ahah ahote heh rângrăng phoangsông chhoante hehnâng raangeka.

²Nea Joban Wa mongthem junko ren ehèn ngale Jisu Krista ngin kepte dângrăng ngale ate hei pumma sâsietrăng Joban ma ate Juma mihnyan Asârăng hân ehèn. Nekhu khohnâng Joban mînchenchaan ngale mêmô ajahthem chentonghèn.

Ahîn Dâlem

³Năng Wa Joban ngale năng Teso Jisu Krista nâng dangkoh a ngae! Chenrăngma ngako, atema năngkhu nâng nyahrăng mînchen junko atema Jisu Krista ritwah ngakhinsiet lahma năngkhu nâng roandông nyan kohehi. Ere pumma năngkhu hungnâng ahîn dâlem kohehi,

⁴ngale erohwah Joban ma ate mihnyan hehnâng kohrăng rangkethung nâng thientah heh năngma chohrăng thonghun eki, ereheh rangkethung nâng asânmin lesănjamin, ngale chhihmin lechhihmin, erediko chenthujô lejen rājâli thenâng thienkoh ehèn.

⁵Ereheh nekhurăng, nekhu putedâlem junko athôn sanpoatko khope chohrăng Joban chaanma pepâng lahma thien ehèn.

⁶Erohwah rinroan letma tongen. Phumma athângheh sanpoatko nema rongrup ngema ajahthem chêmchei chohjunko hungchih rekma medangen komin.

⁷Nema chêmchoh eken junkoba ne putedâlem pa linlin dangale dangmah a erepa jienjetmin. Achhihjâli kem pemin chih ale asen a ngama jetrăng wennâng rângratsôa; erohwah kem nomemin abâmbâm adong ne putedâlem pemin linlin dang ale dangmah a ngama metkep thatsokmin, erohko ne



putedâlem pumma chenmam tadôa. Erediko chenthu Jisu Krista hongkat Rangwo ko nema rô, ngale mîndông choangpe echoh en.

⁸Nema ate lekhejô medang enkomin atenâng hun achhâ eken, ngale nema athângheh ate lekhejô medang enkomin atenâng putedâlem eken. Erohwah, nea thunma tâthôli ledang khuhah nâhah dangeken,

⁹chenrăngma ngako nema atenâng putedâlem thã nejunâng khope choh eken.

¹⁰Are khope junma mông hehma senthemthem lâthat lemtetah, ngale Joban ma nenâng koh ehèn hînhô hehrăng memin thinma profesi chihôantah.

¹¹Thinma erepa chenre sanpoatko dângmin a ngale erepa chenroh hokmin a ngama thatlemte wah. Ere sanpoatko thin khenwah Krista Ju tongeka pumma thinnâng Krista ma chêmchoh lahma atema ere chêmpa tadô lahma erediko atema mîndông rângthô choh eka heh jetthuk lahma loatthô thukwah.

¹²Joban ma ere mông hehnâng thin moatlem pa thindede wokphoatrăng dangmah ngama loatjetthuk eka, rohkomin thinma nekhurăng moatwah, ngale rangkhethung wah chienkat era Asâthôanju chaan junma Nginkongsen phoangthôte mihnyan hehwah nema athângheh chohtat eken ngin heh thinma nekhurăng jabeka. Are heh rangkhethung wah Joban ngintatte hehmemin jet huneka.

Asâthôan danglihma Sôngtông râng Roo

¹³Erohwah, nehung nerin ma moatrăng chepen. Ngale jetletma tongen, erediko Jisu Krista hôngkat jâko nema Joban mînchenchaan chohminko senthemthem dâlem letma tongen.

¹⁴Joban nginkepkep dangen, ngale nea aba dângpoatko ne hungma chenroh huntet a ereko ne roandông pa nekdang thuktu en.

¹⁵Erenoma, neroote Joban pa Sâpoangpoang dangeka rângrăng, nememin chenjô memo enkomin Sâpoangpoang dangletma mo en.

¹⁶Joban nyapraangma ngaeka, “Asâthôan dangen, chenrăngma ngako, Nga a Asâthôan.”



¹⁷Chenthu nema Joban nâng rangsoam ko nema atenâng Wa ngama rooeken, atema chentô mihnyan nâng mǎntheko thieneka, ngale anga nganâng henma chenroh moeka erejunko atema achhih ba asen pa ren eka; erohwah, are hahtokkhoh ko ne roandôngko Joban ranchei letma songtongen.

¹⁸Chen-rǎngma ngako, nete newa hehema nenâng roandông ko chhih akhahli moatlam thienla kohthen kowah nekhu pesietrǎng chennithǎ thumtah a erepa nema jet. Erepa ngun akem rǎngrǎng chhihjâ lima thumwah dangmah;

¹⁹erepa nyahrǎng thǎchaan Krista roandông hei kohwah, atea mǎmǎn, erediko nyek alekmin aho saakchha rǎngrǎng dǎngwah.

²⁰Atea Joban ma rang ahah hōan mama rēnwah, ngale are athōan sanpoatko nekhurǎng sēnrǎngma hongeka.

²¹Ate junma nekhuma ate ritwah ngakhinsiet lahma atenâng mǐndongthōan kohte nâng putedâlem eken; ngale erohwah nema Joban nâng putedâlem ngale tok anâ re eken.

²²Ade phumma nema toangtang nginkepkep dangletma nedede lâsâ sietriitet ngale putedâlemte mihnyan ahan hehnângmin nyahrǎng hung arin kohletma lâhuntet, nekhu hung arin phangtang khenwah wathema wathe nâng hun achhâmîn en.

²³Chenrǎng-ma ngako, roantang roanjêng ahîn Joban Jabkhab junma ne chenthujô leriite nyong awa chha rǎngrǎng lâthe ngakchhathen, aritte nyong awa rǎngrǎng heh chha rǎngrǎng dangtumet.

²⁴Joban nyapraangma ngaeka rǎngrǎng, “Chentô mihnyan nyuchha heh hin rǎngrǎng, ngale chentô thin mǐndong eka hehmin wunwah chongpô rǎngrǎng. Hin heh choakjâ reka, ngale chongpô hehmin jârit reka,

²⁵rohkomin Teso jabkhab pa roantang roanjêng lechhihmin.” Are jabkhab pa nenâng thōkohthen Nginkongsen pa.

1 Piter 2

Ahîn Long ngale Asâthōan Mihnyan Nyuchha



- ¹Erohwah, nededema chentô achhih hehwah taangen; mothô khoanglep, mihphetwân, erediko mihnâng dûmmek jabkhab heh nekjabtu en.
- ²Naajengchha heh ma roantangma nyong nyuhpoti linlin pa chhahhun rângdang arãngrãng, nememin neju rãngma Ju nyuhpoti linlin pa chhah en, ngale nema eroh mejok en koba dongletma kho epe en.
- ³Joban nyapraangma ngaeka, “Nema Teso pa linlinjô chentôsên a erepa lâjettet.”
- ⁴Teso tânâng hûren, atea ahîn long, mihnyan nyuchha heh ma achhih ngama petphe eka, rohkomin Teso ma alemli ngama ren eka.
- ⁵Ahîn long heh rãngrãng dangletma hunren, ngale nea Joban rangsoamhum hôanthin longrãng chenkep hèn, ngale ere humko soam aroakte Asâthôn dangletma nema Jisu Krista junma Joban nãng atema nyoakkepli joapsoap en.
- ⁶Chenrãngma ngako Joban nyapraangma ngaeka, “Ngama alemli longpa ren ekang, Erepa Ngama Zion nãng alemli thôn longrãng thien ekang; ngale henhenma atenâng putedâlem eka ereheh chenthujô mahto nãng ledangmin.”
- ⁷Henhenma putedâlem eken a ere hehrãngma ere longpa nyahrãng alemli thôn; rohkomin lepute dâlemte hehrãngma: “Humhôte mihnyan heh ma achhih ngama petphe eka longpa chentô noma alemli thôn longrãng litdangeka.”
- ⁸Ngale Joban nyapraang thehân nãngmin aroh ngaeka, “Are long pumma mihnyan heh dakho ethutthuk a, ngale are longjan pumma ekônriithuk wak a.” Thinma jabkhab ko lepute dâlemdi dakho thutwak eka; erepa Joban ma ate hung junko thin khohnâng eroh chendanga ngama moeka.
- ⁹Rohkomin nekhua arênwah mihnyan nyuchha, ngale Lowang rãngrãng soam aroakte, Asâthôn mihnyan nyuchha, Joban mihnyan linlin, ngale Joban ma patritli moeka heh phoangthô kohrãng ren ehèn, ngale atema rangnyek khenwah atedede patritli wenphiak ko loatsietkat ehèn.



¹⁰Poattheko nea Joban mihnyan ledangwah, rohkomin ade phumma nea Joban mihnyan lâdangtet; poattheko nema Joban mînchen pa lejetwah, rohkomin ade phumma nema Joban mînchen lâchohtet.

Joban Haa

¹¹Ngalemruchha heh, Nga a are hahtokkhoh ko mihwun ngale hum ahah ahote rãngrãng danglekma nenâng rosep eka! Hei angem phoangma huneka junko nek dangen, ereheh roantangma nangju demnâng ran rãngrãng danglahma loatmîn eka.

¹²Joban lejette heh mathahko ne jat apat heh sên mōang dangen, erohkoba chenthu thinma nenâng kaamchhih moeken ngama mesekham hênko, nema kaamsen moeken heh thinma chenkhe hên, ngale erohkoba thinma Joban ngakkatjâ Rangwo ko atenâng erôa.

¹³Teso rãng sên rãngma chentô mihnyan nyuchha thôte jabte heh khenko thin nginkepkep dangen: Anga nga noma adongthôn Chofa khenko ate nginkepkep dangen.

¹⁴Ngale govono heh, thin a chentô kaamchhih moatte hehnâng phheksiet nâsiet hân rãng, ngale kaamsen moatte hehnâng rô rãng thien eka.

¹⁵Chen rãngma ngako nema kaamsen moletma mihnyan chhih heh ma aba rãngrãng phoangjab eka heh kihsiet rãng hun ehèn.

¹⁶Ne hungsiko songtongen, rohkomin ne hungsiko songtong letma kaamchhih nekmo en, Joban haa rãngrãng dangletma songtongen.

¹⁷Anga nga demnâng asen tuta dangen, putedâlemte ahan hehnângmin hun achhâ en, Joban dongthuk en, ngale Chofa rancheichei dangen.

Krista Chêmchei Thakthô

¹⁸Haa heh ma mâmâ dede tângtewa nginkepkep dângmin ngale thinran nyahrãng cheiletma khesok en, erepa nenâng hun achette ngale mînchênte hehnâng lolo ledang, nedemnâng achhih dângte heh demnâng min erohjô dangen.



¹⁹Nema ledangli nâng chêmchoh ekenpa metadô enko, Joban ma nenâng rang ekohhèn, chenrãngma ngako nema Joban nâng thonghun eken.

²⁰Chenrãngma ngako nema kaamchhih moatthã mewat hènko nema chenni echoh ena? Roh akomin nema kaamsen moattha chêmchei chohletma metadô enko, Joban ma erethã nenâng rang ekohhèn.

²¹Eroh moatrãng jôba Joban ma ne roehèn, chenrãngma ngako Krista atedede min nekhurãngma chêmchoh wah ngale atema nekhurãngmo en ngama khesok ehèn, erohkoba nemin ate damãnko nekletma ate rãngrãng etadangen.

²²Atema pap moho, ngale henmemin ate thunkhap wah mothô loatjab lahma chohtat ho.

²³Chenthu mihnyan heh ma atenâng dummek poatko, atema thinnâng jabkhab chhih ma ngakdân jabho; Chenthu atema chêmchoh poatko, atema ran ngakchâho, rohkomin atema toangtangma rênte Joban nâng lolo dâlem wah.

²⁴Krista ma atedede phoangko nãngpap heh bãngphak khohko hènphetah, erohwah nãngma pap moatpa jeklihma toangtang danglihma sôngtôngmin. Ngale ate phoang wah mãmãn junko nekhurãngma khoanchet sen eken.

²⁵Nea lem môangphete saak heh rãngrãng dãngwah, rohkomin ade phumma saaksokte ngale ne Ju heh bemte dijun rãng lãngak sietthen.

1 Piter 3

Tangnyu Tangwa heh

¹Ererãngrãng tangnyu hehmin ne tangwa nginngin ko dangen, erohkoba henma akomin Joban jabkhab ko leputedâlem medan ako, ne jatsen patsen pa khelahma eputedâlem a. Nema jabkhab mejô chêmngatthin dangmah.

²Chenrãngma ngako thinma nejat apat sen pa ekhea.

³Nema phangsen chendange ngama rangkhoh nâng lolo khopa junkhit, kempa lit, ngale khet akhu sensen pa kepletma neksôa en.



⁴Erenoma, nehung khennâng phangsen chendangen, ngale hung khennâng sôala wah rãngrãng numnene erediko kihrinrin dangeken peba chenthumin leta chhihjá min, ngale ere peba Joban ngenâng nyahrãng alemli thôn.

⁵Chenrãngma ngako, ama thuwah dihiaknyu hehman thin tangwa nginngin ko danglahma thinma Joban nãng putedâlem lahma thindede phang sênsietrit wah.

⁶Sara eroh dãngwah; Ateama Abraham nginkepkep danglahma atenâng teso ngama roowah. Eroh wah chenni ranjô lechei kaamsen moletmejû medan enko, nemin Sara chha jôba.

⁷Ererãngrãng tangwa hehmin ne tangnyu heh demnâng senthemthem dangletma hungthe rinthe ko songtongen, chenrãngma ngako thin a nehang achaantô dangmah. Thinnâng senthemthem khoakhem en, chenrãngma ngako thinmemin Joban ngewah roandôngpa hinhô rãngrãng nekhuh demnâng aroamma choh eka. Nema eroh memo enkoba ne rangsoam ko chenni mejô tengbeng mah.

Toangtang Moatlem Moatrãngma Chêmchoh

⁸Athôanko dangeka: Nekhu anga nga hungthe rinthe ngale mãnthê tuta thonghun en; wathema wathe nãng hun achhâmin en, mînchenmîn re en, ngale wathema wathe demnâng numnene dangen.

⁹Nerãngma kaamchhih moatkohte hehrãng nema kaamchhih nekngak mokoh en, ngale nenâng têm athoakte hehnâng nekngak tem athoak en; erenoma, Joban ma thinnâng chenchohsûa ngama rangsoam koh en, chenrãngma ngako, Joban ma nenâng rangkoh a ngama toamsem lahma nekhuh roowah.

¹⁰Joban nyapraangma ngaeka, “Nema roandôngko khuhah nãhah dãng mehun enko ngale roandôngsen dônghun medan enko, nema jabchhih jabkhah jabpa ajekre en ngale mothô thôpa jek rêmin.

¹¹Nema kaamchhih moatpa ajekre en ngale kaamsen mo en; nehung nerin phangtang kohletma mêmô dângrãng latrîi en.



¹²Chenrãngma ngako Teso ma toangtang hehnâng bemsûeka ngale ereheh rangsoam ko jetat eka; rohkomin kaamchhih moatte hehnâng atema chhihchoh re eka.”

¹³Nema kaamsen memo enko henma nenâng ewat hèn a?

¹⁴Rohkomin nema kaamsen moattha chêm mere enko, nema rang ekepen! hen ranjô nekchei en, ngale nekpatrii en.

¹⁵Rohkomin nehung nerin nâng Krista jôba Teso ngama thienletma atenâng toak asân en. Ngale ne hungkhen wah nema dâlem eken junma henma akomin nenâng methongpha hènko ereheh nâng danthângrãng sanpoat roakweih bemkep tongen,

¹⁶rohkomin ere thôngphâte hehnâng numnene ngale senthemthem danthangen. Ngale nehung nerin sâpoangpoang thien en, erohkoba nea Krista dijunte dângdi ne jatsen patsen pa thinma mechhihthô hènko, thinma chenni jab ajaeka erethã rêsê erewak a.

¹⁷Chenrãngma ngako Joban hung junko medan ako kaamchhih moatthã chêmchoh noma kaamsen moatthã chêmchoh pa asen.

¹⁸Chenrãngma ngako nepap rãngma Krista rekthe riitah pa chentô rãngma riieka, ngale nekhu Joban tânâng sietwên rãngma papi mihnyan hehrãngma mihnyansen pa riieka. Atea phoangpa loloba ritphewah, rohkomin Ju nâng ngakhîn rewah,

¹⁹ngale ate Ju ngakhîn retah pumma phâtek nâng khhekritte ju hehnâng Joban ngin thôhok kohwah.

²⁰Are Ju heh dangeka, Noa ma khôankho tâhôn pa Joban ma hungmôngmông danglahma bêmpoatko Joban nginlekep dangtah ju heh. Khôankho ko mihnyan amãnhha - chentô tungko waeset lolo dângwah - ereheh ba jodôngma lûmko leritphe bâwah,

²¹Erepa dangeka, athâng hehwah ne pesietrãng baptijem kep eken thiakpa dângwah. Ngale erepa phoangwah ngek atek heh sâsôn dangmah, rohkomin



hungsen rinsen danglihma Joban demnâng toamsem eki. Erepa Jisu Krista ritwah ngakhîn junma nekhu pepâng ehèn,

²²Atea rangkethung nâng wãngtah, ngale Joban dekchah ngeko tonglahma chentô rangkethung wah Joban ngintatte heh pêneka, ngale rangkethung wah thôte jabte, erediko chaan ahang demnâng tângte heh pêneka.

1 Piter 4

Hunglitchoan Roandông

¹Krista ma phoangnâng chêmchoh wah, erohwah nememin Krista ma chenroh chêmchohtah a eroh chêmrãng thonghun letma nehung dongsiet en; chenrãngma ngako henhen phoangnâng chêmriieka erehehma papkaam momah.

²Erohwah ade phumma, are hahtokkhoh wah ne roandôngko mihnyan nyuchha hung arin junko ledang Joban hung junko songtongtu en.

³Nema amako ajahthem sanpoat Joban lejette mihnyan hehma chenroh moeka eroh moletma lâlienthuktet. Ne roandôngko pong apa rãngrãng dangletma, dihiak nâng phetwân, khemmok, kuhhôn, jokphhek chhah, ngale ahônawah moangachaang hehnâng soamtô letma dângwah.

⁴Ngale ade phumma Joban lejette heh demnâng nekhuwa ama wah rãngrãng lejoh dangtu dâng phumma bârit rewak eka, ngale erohwah thinma nenâng mitchek ehèn.

⁵Rohkomin ahînthu mihnyan ngale riichoante mihnyan heh rênthe Joban nâng thinmemin thindede moatlem chenroh motah a erepa ekhesok a.

⁶Erohwah Nginkongsen pa riichoante hehnângmin thôkoh wah, chenrãngma ngako thinma ahîn poatko chenroh motah a erejunko rên dikoba, thin Jupa Joban junko ehinwak a.

Joban Hînhô pa Senthemthem kepte

⁷Chentô pejô athôn sanpoat pa lâhûtha. Erohwah nedede min hungmông rinmông, ngale jetletma dangen, eroh metong enkoba nema rang ejiensoam en.



⁸Chentô nomemin adongpa, wathema wathe nâng nyahrâng hun achhâmin en, chenrângma ngako hun achetmîn pumma jahmõang pap heh mumsiet eka.

⁹Ne hum heh wathema wathe nâng lesi lenii thangma khuhah nâhah laangmînkoh en.

¹⁰Anga ngama, Joban ma mâmâ jatjat hînhô koh ehèn heh senthemthem jienkepte rângrâng dangletma, nema Joban ngewah chohtet hînhô heh mihhan hehrâng asen dângrângma kepmin.

¹¹Henhenma ngin phoangthô eka ereheh memin Joban nginkongsen pa chenphoang thôa; ngale mihnâng chohsokte hehmemin Joban ma kohthen chaan junma chohsû en, eroh medan enkoba Jisu Krista junma chentô ngema Joban mîn edonga, chenrângma ngako, ate jôba mîndông chohte ngale roantang roangjêng râng chaan ahang demnâng tongeka. Amen.

Kristan dângjunko Chêmchoh

¹²Ngama nyahrâng ahun Ngalemruchha heh, nema nyahrâng chhâwawa chêmchohko, arerângrâng chêmte mathatchoh ekang ngama nekpatrii en.

¹³Erenoma nema Krista demnâng atema chêmchoh tahko johchêm ekang ngama thonghun letma rinroan en, erohkoba chenthu Krista mîndong lahma hôngkat jâko nemin nyahrâng khuhah nâhah edangen.

¹⁴Nea Krista dijunte dângdi mihhehma mechhihchoh hènko nema rang ekepen; ngale Joban Ju, mîndongthôn Jupa nekhoh nâng tongka ehèn.

¹⁵Ngale nema mihritphedi, ba ahuhdi, kaamchhih moatthã, ngale mih chhahkhem nâng phoang nyenmîndi nekchenchêm eken.

¹⁶Rohkomin nea Kristan dângdi chêm mechoh enko, nekrêsê en, Joban nâng dangkoh a ngaen, chenrângma ngako, nema Krista mîn kep eken.

¹⁷Achhih le asen rên sanpoat pa lâhûtha, ngale Joban mihnyan hehnâng khebeng thôanko bengrênmin. Phumma nângrâng mebengren hiko, Joban ngewah Nginkongsen ko lepute dâlemte mihnyan hehja chenroh dângmin a?



¹⁸Joban nyapraangma ngaeka, “Mihnyansen hehmemin khope chohrãng alat medang ako; Joban lejette papi mihnyan hehja chenroh jienpe min a?”

¹⁹Erohwhah, Joban hung junko thinma chêmchei mechoh ako, thin têm atiaakte Joban nãng senthemthem chendâlem wak a, ngale thinma kaamsen chenmo wak a, chenrãngma ngako, thin têm atiaakte Joban ma thinnãng rangko hrãng toamsem tahpa chenthujô themah.

1 Piter 5

Joban Mihnyan heh

¹Ngadede min Asâthem heh khhepho phannang danglekma nekhuchhang wah Asâthem heh khhepho phannang hehnãng rosep eka. Ngama Krista ma chêmchoh tahpa khetek, ngale chenthu ate mîndong lahma nãngnãng khesok jãko Ngamin ereko ejohroam ang. Ngama nenãng rosep eka

²Joban ma nenãng sokare rãng kohthen ate mihnyan heh saaksokte rãngrãng dangletma hungkoh letma Joban ma hun ehèn rãngrãng khoakhem en, erepa hung lekoh thangma metkepkep nekmo en. Ne moatlempa ngun mechoh tihko lâdangtah ngama thonghun letma nekmo en, linlin hung arinma moat hun letma mo en.

³Nema sokare rãng kohthen mihnyan heh khoko pênletma nekngam poarii en, rohkomin ere mihnyan hehnãng nema asen khesok en.

⁴Ngale chenthu Saaksokte adongthônpa mehong tahko, nema aphiakthôn khophok echoh en, ngale ere khophok kowah phiak ekapa chenthumin leta mahmin.

⁵Ererãngrãng leta lechhih hehmin ne khhepho phannang heh khenko thin nginkepkep dangan. Ngale wathema wathe nãng jienchohsok mîn rãng nekhu anga nga numnene tuta dangan; chenrãngma ngako Joban nyapraangma ngaeka, “Joban ma ngam apoate mihnyan hehnãng hunmah, rohkomin numnene dangte mihnyan hehnãngba senchoh eka.”

⁶Erohwhah, Joban achanthôn dekkhen ko nedede numnene dangletma tongen, erohkoba Joban ma sanpoatsen pa mehû theko ne echoangpe hèn.



⁷Ne sekmah patrit heh phangtang atenâng koh en, chenrãngma ngako, nerãngma ate sekmahkoh ehèn.

⁸Jetletma tongen, ngale sùletma tongen! Neran, juchhih pa sahdong hinhoo rãngrãng huklahma, hen akomin chohphhek angle ngama lemsû lahma phoangkhoam eka.

⁹Ne putedâlem nâng rongtêngtêng tongletma ate junlo en, chenrãngma ngako, nemajet hahtokkhoh wah putedâlemte ahan hehmemin arerãngrãng mǎnthe chêmchoh eka.

¹⁰Rohkomin nema poatthe chharãng chêmchoh diko, chentô mînchenchaan kohte Joban, ngale Jisu Krista demko roamletma ate mîndongko johroam thukrãng neroote Joban pumma ate dedema nekhû sâsiet lahma rongtêngtêng edangthuk hèn, ngale chaankoh lahma putedâlem senthemthem edangthuk hèn.

¹¹Atenâng jôba roantang roangjêng rãng chaantong eka! Amen.

Athôn Salem

¹²Ngama nenâng are siti athoanchha raang ekapa Silas ma chohsû lahma raangkat eka, Ngama jet Silas pa Kristansen. Ngama nekhû hung dôngsiet huneka, ngale Ngama nenâng arepa Joban mînchenchaan linlin ngama thôkoh huneka. Ere mînchenchaan junko Joban nâng rongtêngtêng putedâlem letma tongen.

¹³Ne nya anaa dihiaknya Babilon wah Asâthem, ngale Joban ma rênwah hehma, nenâng thin salem matkat ehèn, ngale echha Mak memîn salem matkat ehèn.

¹⁴Wathema wathe nâng Kristan hun achetmîn junko dek sitpekmîn letma rânjabmîn en. Krista demko dângte nekhû chentô nâng mêmô chentonghèn.



2 Piter

2 Piter 1

¹Jisu Krista moattat chhoante ngale ate haa Simon Piter ngewah- Nãng Joban toangtang junma ngale nãng Pângte Jisu Krista junma ni rãngrãng putedâlem sen chohte hehnâng raangeka:

²Nema Joban ngale nãng Teso Jisu jet junma Joban mînchenchaan ngale mêmô pa mênchong chentonghèn.

Joban ma Roo ngale Arên

³Nãngma nãng roote pa jetjunko, Joban ma nãngnâng roandôngko Joban jetlihma toangtangma jien sôngtông rãng chenni lemkia ereheh phangtang kohehi, atema nãng rooehi pa atedede mîndong ngale asenli hehnâng roamlihma tôngrãng rooehi.

⁴Eroh jôba atema toamsem tah junko nãngnâng nyahrãng adong ngale asen hînhô pa kohehi, erohwah are hînhô heh junma hahtokkhoh hung arinma achhihli thonghun lihma chhihjâ wahmin etape en, ngale Joban rãngrãng etadangen.

⁵Erohwah, ne putedâlem leko nea asen dângrãngma latrii en; ngale ne asen dangkenpa Joban ma chenni huneka erepa jetletma asen dangen;

⁶ngale nema Joban ma hun ekepa jet eken leko nehung nerin môngmông tongen; ngale nehung nerin môngmông tôngleko atadô min rii en; ngale atadô riikenpa Joban jetletma tadô en;

⁷nema Joban jetleko Kristan rãngrãng mînchenmîn en; ngale Kristan rãngrãng mînchenmîn leko hun achetmîn re en.

⁸Are chentô jat apat heh nema lemeken, ngale ereheh nenâng ajah metong hènko, ereheh junma nema Teso Jisu Krista jet ekenpa asen edanga.

⁹Rohkomin nenâng ereheh aho medan hènko nea mitdoak rãngrãng, nema ataang wah khemet, ngale nema amako moatwah pap heh sâsiet kohthen pa lekphe eken.



¹⁰Ngalemruchha heh, erohwah, Joban ma nekhu rooehèn le ren ehènpa roantang roanjêng rãng chendanga ngama nyahrãng latrii en; nema eroh melatrii enko, chenthumin ne putedâlem heh tamah phemet.

¹¹Eroh koba nenâng nãng Teso ngale Pângte jisu Krista roantang roanjêng Hahsông thenâng tâwâng rãng chaan ekohhèn.

¹²Ngale nema toangtang pa senthemthem jetletma rongtêngtêng mekep enkomin, Ngama nenâng erepa roantangma ethôkoh a.

¹³Ngama thonghun ekang Nga ahînma tôngpoat poatko Ngama nenâng are ngin heh roantangma thôkoh pa alemli.

¹⁴Ngama ajet are Nga hei angem roandôngpa sitsiak erii ang, ngale erepa nãng Teso Jisu Krista ma Nganâng sâpoangpoang thôkoh thang.

¹⁵Erohwah, Ngaritdi komin ne sanpoat roakweih are ngin heh chenthonghun en ngama nenâng thôthien koh a.

Krista Mîndông pa Mitma Lepkhete

¹⁶Nima nenâng nãng Teso Jisu Krista chaan demnâng ngakkat nginkong thôko tahheh mihnyan nyuchha ma hânwah ngin thôkoh dangmah. Nidede mitma Jisu Krista mîndông pa khelihma thôkoh eka.

¹⁷Chenthu Wa Joban ma ate mîndong thuktah poatko nimin eretheko dângwah. Chentô noma mîndongthôn chohte pumma atenâng aroh ngatwah, “Arepa Echha linlin Ngama atenâng nyahrãng hun ekang, ngale Nga ate demnâng nyahrãng rinme ekang!”

¹⁸Chenthu ni ate demnâng Asâthôn Hahkong khoko dângpoatko nidedema are jabkhab pa rangkethung wah jabkat lahma tatwah.

¹⁹Erohwah mông hehma thôtah nginkong hehnâng nima linlin ngama nyahrãng putedâlem eki. Nema min ere nginko hungkoh letma mejetat enko asen edanga, chenrãngma ngako erepa wentit pumma Rangwoma maleplep rangnyek ko phiaktoak rãngrãng, ngale nehung nãng rangkhah wah merit ma phiakkat wah rãngrãng edangen.



²⁰Nema nyahrāng alemli thōan ngin jethhin pa arepa, Joban nyapraang kowah profesi hōaneka mihnyan heh hungsi junko thō dangmah.

²¹Chenrāngma ngako, henmemin profesi pa mihnyan nyuchha hungsima hongjabmah, rohkomin mihnyan pumma Asāthōanju chaan junma Joban ngewah kaera jabkhab pa hongjab eka.

2 Piter 2

Amōang Hethôte

¹Ama nāng Isrial mihnyan heh chhangnāng mōngmōang heh hōngwah, ngale erohjō nekhuchhang nāngmin nginmōang hethôte heh ehonga. Thinma amōang ngale mihnyan chhihsiet thin niemarang heh ephoang hethōa, ngale thinma thin pēpāngte Teso min lekeptu ephewak a, ngale thinma eroh molahma thindede lemlienma echhihsietrii wak a.

²Erohjō medang akomin thinma kaamchhih moekadi ajaithem mihnyan hehma ejun a; ngale thinma eroh moatjunko, ahan hehmemin toangtang Lemkhôko achhih enga a.

³Ne ngewah ngun akem heh jienkeprāng nenāng thin dedema hōanwah nginmōang heh thōkoh ehèn. Rohkomin Joban ma thinnāng chenthu thuma achhih ngama ngalahma thieneka, ngale thin Chhihsiette pa ajupmin lejut tongeka!

⁴Joban ma rangkethung wah ate ngintatte danglahma papkaam moatte hehnāng lemînchen thangma pap wendô nāng phekat eka, ngale ere rangnyek theko janruma khhek lahma thien eka, eko thinnāng Joban ma achhih ngama rên Rangwojâ pa bemwak eka.

⁵Ngale Joban ma rôanpa wah mihnyan hehnāngmin mînchenho, ere poat wah Joban lejet thangma sōngtōngte mihnyan heh jodōngma lumthuk lahma ritphewah; rohkomin Joban ma toangtang ngin phoangthôte Noa demko ahan waengit mihnyan heh loloba pēsietwah.



⁶Joban ma Sodom le Gomora hahdaang heh wenma rokphe lahma chhihsiet wah, ngale Joban ma erepa ate lejet thangma sôngtôngte mihnyan heh eroh dângmin ngama khesok eka.

⁷Rohkomin Joban ma Lot pêsiet wah. Lot pa mihnyansen dângwah, ngale atea jatchhah patkhah mihnyan chhih heh junko nyahrâng chêm lahma dângwah.

⁸Ere mihnyansen pa mihnyan chhih heh chhangko songtong lahma rangwo roakweih atema mihnyan chhih heh jab ajâ pa tat ngale moat akat pa khelahma ate hung arin nâng nyahrâng chêmchoh wah.

⁹Ngale mihnyansen heh chêmchoh eka kowah chenroh pesietmin a ere pemin Joban ma ajet, ngale mihnyan chhih heh thin Rên Rangwojâ bêmlâ poatko chenroh chêmthukmin a ere pemin ajet,

¹⁰ajahthôn pa Joban nginlekep thangma thin hei angem phoang pumma phetwân lahma huneka rângrâng moatte heh echêmthuk a. Are nginmõang hethôte heh hungdong rindong ngale nyahrâng angam, ngale thinma rangkethung wah hehnângmin achhih ngatrâng cheimah; erenoma thinma rangkethung wah hehnâng jōjêm re eka.

¹¹Rangkethung wah Joban ngintatte heh nginmõang phoang hethôte heh noma bâmbâm hang achaaan, rohkomin thinma Teso mathahko nginmõang phoang hethôte hehnâng achhih ngamah.

¹²Are nginmõang phoang hethôte mihnyan heh wunnagem lolihma rângritphe e rângrâng, thin hungnâng chenjô lechhem hun thangma thinma lejet dangeka lelatnâng chhih jabwak eka; thin a wunwah ngem heh lolihma rângritphe e rângrâng ritphemin,

¹³ngale thinma ajahthem mihnyan hehnâng chêmthuk tah thâpa thin memin chêm echoh a. Thinma rangwo mongtangko thin hei angem wokphoatli moatlem moeka ko hungsen wakeka; thinma moatlem chhih heh khuhah nâhah moatdiko, nekhu demnâng phhekchhah roamchhah ehênpa nerângma rêsêli dangeka!



¹⁴Thinma dihiak dela kaamchhih moatrăng loloba phoanglem eka; thinma papkaam moatpa chenthumin jekmah. Ngale thinma diapphhek chhahla mihnyan heh diapphhek chhah lahma lemke nâng senphe eka. Ngale thin chhahnyoak lolo hethôeka. Erohwah thinma Joban wah chêm echohwak a!

¹⁵Are nginmõang phoang hethôte hehma lemtin pa phe lahma lemke nâng khoamwak eka; thinma ngun nâng hunlahma kaamchhih moatte Bior chha Balam damanko junkhoam wakeka

¹⁶ngale atema papkaam moat phumma ate Gado pumma mihnyan jabma hongjab lahma mông pumma aba ata moatlem răngrăng motah pa jeksietwah.

¹⁷Are mihnyan heh rupjâchoan jomit răngrăng, ngale pôngdong patdongma rângmetphea phoam răngrăng; Joban ma thinrăngma rangnyek khenwah kenlu thôn thepa thienkoh eka.

¹⁸Thinma sekhota ngin heh jablahma ngam apoarii wakeka, ngale kaamchhih molahma sôngtôngte mihnyan heh chhangwah pechhoanrăng phungte mihnyan heh thin hei angem phoang pumma kaamchhih moeka hehnâng mănriithuk eka.

¹⁹Are nginmõang phoang hethôte mihnyan hehma thin dedejô kaamchhih haa danglahma mihhan hehnâng khope ekoh a ngama toamsem wakeka - chenrăngma ngako nâng chenni moatlem ma jien ehia ere moatlem răngma nânga haa lâdangtih.

²⁰Nâng Teso ngale Pângte Jisu Krista jetlahma henkomin are hahtokkhoh chhih kowah pechhoan lahma, eredikomin achhih hehnâng amănman methe ngekriiako, ererăngrăng mihnyan pa khebwah nomemin athôanko achhihthôn edanga.

²¹Ere mihnyan hehrăngma toangtang lemkhôpa jetdiko thinnâng hethôtah toangtang nginpa lekep thangma mengak chhoan ako, thinma ere toangtang lemkhôpa lechêmjet peba asen chendangtah.



²²Ere mihnyan heh ma chenni moeka erepa alinlinjô nginthakthô nâng thakthôeka rãngrãng moeka: “Hu pa atema phatphe eka phat tâkojô rãngngak hûa” ngale “Wak pa themngekko woatrii lahma chhoan dikomin ere themngek kojô rãngthe ngakwoat hûa.”

2 Piter 3

Teso Ngakkat rãngma Toamsêm Ngin

¹Ngalemruchha heh, Ngama are sitipa nenâng depnii rãng thedep raangeka. Siti wanniinii latnâng Ngama are ngin heh thethôkoh ekapa nehung nerin ma asenli heh chenchoh thonghun en ngama thôkohrãng raangeka.

²Chenthu thuma Asâthôn mông heh ma jabtah ngin heh nema chenthonghun en ngama huneka, ngale nãng Teso ngale Pângte ma nãngnâng chienthi ngin ate moattat chhoante ma nenâng thôkohthen heh thonghun en ngama huneka.

³Khebeng thôanko nema arepa jet en, athôn rangkuh sanhako mihnyan heh ma thindede hung arinma chenni huneka ereheh lolo emowak a. Ngale thinma nenângmin dûmmek jôjêm erehèn

⁴ngale thinma nenâng engahèn, “Atema nenâng Nga ngakkat rêmin ngama toamsem then a? Eroh medang ako atea chenkoa? Nãngte nãngwa hehmin riitah, rohkomin chentôpa rang ahah hôanthuko chenroh dangtah a athâng hehmin phangtang ererãngrãng tuta jôba!”

⁵Chenthu thunâng Joban jabkhab junma rangkethung le hahtokkhoh hôantah ngin heh thinma jetlahma lekep dangeka. Ngale Joban ma hahtokkhoh pa jo junma jowah hôanwah,

⁶ngale khemawah hahtokkhoh pemin jodôngma lumlahma jomejô chhihsiet wah.

⁷Phumma athâng heh wah rangkethung le hahtokkhoh pemin ere mãnthe jabkhab pumma jôba wennâng rokpherãng thieneka. Ngale rangkethung le hahtokkhoh nii chenthu Joban lejette mihnyan heh Joban ma chhihngatjâ rangwo ko chhihsietrãng thieneka.



⁸Ngalemruchha heh, rohkomin nema are nginpa neklepthe en! Joban rãngma jãthe rangwo le hahjatthe rangwo nii mãnthē; Joban rãngma are wannii pa mãnthē.

⁹Wanwanthe ma thonghun eka rãngrãng, atema moatrãng toamsem tah pa Teso ma lemoma lekthien dangmah. Erenoma, ate hungpa nedemnãng môngsiet lahma tongeka, chenrãngma ngako atema henjô chhihsiet hunmah, anga nga papwah hunglit lahma chenngak hûra ngama huneka.

¹⁰Rohkomin Teso ngakkatjã Rangwo pa ahuhte hokwah rãngrãng ehûra. Erejã Rangwo ko rangkho pemin nyahrãng linlahma emahjãa, ngale rangkho wah chentô heh wenma etthôan jemkham a, ngale hahtokkhoh demko hah khohwah chentô hehmin echhihjãa

¹¹Phumma are chentô heh aroh mechhihsiet ako, nea chenrãngrãng mihnyan dãngmin a? Ne roandôngpa Asãthôan dãngmin, ngale Joban nãng koh en,

¹²nema Joban ngakkatjã Rangwo bêmpoatko ere Rangwo pa sitsiak chenhûra ngama thonghun letma bem en - erejã Rangwo ko rangkho pa wenma jemkham lahma echhihjãa, ngale rangkho wah chentô heh wenkhâm junko ajûmjã area.

¹³Rohkomin nãngma Joban ma toamsem tahpa bemlaeki: toangtang mihnyan heh sôngthin the rangkethung nyan ngale hahtokkhoh nyan pa bemlaeki.

¹⁴Ngale Ngalemruchha heh, nema ere Rangwo pa bemlã poatko, Joban demnãng sãpoangpoang ngale chenni nãngjô lechhih thangma tongen, ngale ate demnãng mêmô dangletma tongen.

¹⁵Arepa nehung nãng thien en, nãng Teso ma ate hung môngsiet lahma tongeka pa nãngkhu kho chenmam pe e ngama môngtong eka. Are nginpa nãngma nyahrãng ahun nãng lemruchoa Pol nãng Joban ma buthi mongthemsen heh kohjunko atema nenãng siti nãng raangthen.

¹⁶Are heh junma ate siti chentô nãng Pol ma aroh raangwah. Pol siti nãng jetloatlat wanwanthe tonga, ereheh nokba ngale putedãlem nãng rongtêngtêng ledangte hehma ledangli ngenãng phoangke hethôeka, ngale



thinma Joban nyapraang ahan hehmin eroh ledangli ngenângjô phoangke hethô lahma etonga. Eroh molahma thindede chhihsiet riiwak eka.

¹⁷Ngalemruchha heh, rohkomin, nema are nginpa lâjettet. Erohwah jetletma tongen, erohkoba niemarang junko ledangte mihnyan chhih hehnâng lechhihsietrii etadangen, ngale ne khope chohthin the kowah lejârii edangen.

¹⁸Ngale nãng Teso ngale Pângte Jisu Krista mînchenchaan pa senthemthem jetletma ne putedâlem pa jêngdong dongwãng chendangen. Ate mînpa jôba athâng hehmin, ngale roantang roangjêng rãng chendonga! Amen.



1 Jon

1 Jon 1

Roandông Jabkhab

¹Nima nenâng rangbeng habbeng thuwah roandông Jabkhab junma thôkoh rãng raangeka. Nãngma ere Jabkhab junma chohtattih, ngale nãngma erepa nãngdede mitma chohkhetih; nãngma erepa khetih, ngale nãngdek memin ereko sahlotih.

²Chenthu erepa mitma jienkheli rãng litjâ phumma, nãngma kheki; erohwah nima erejunma thôkoh eka, ngale nãng Wa demwah roantang roanjêng roandông nãngnâng jetthukthi junma thôkoh eka.

³Nima chenni khetih a, ngale tattih a ereheh nenâng thôkoh eka, erohkoba nemin nidemnâng Wa Joban ngale ate Chha Jisu Krista demko aroamma ejoh danghi.

⁴Nima are raangeki pa nãngkhu nyahrãng khuhah nâhah chendange ngama raangeka.

Joban pa Wenphiak

⁵Nima are nginpa ate Chha ngewah chohtat lihma nenâng thôkoh eka: Joban pa wenphiak, ngale atenâng rangnyek amãnychajô aho.

⁶Phumma nãngma ate demnâng aroamma tongeki ngama ngalihma, nãnga rangnyek khennâng metong eko, nãngma jabkhab ngale moatlem nãngmin mothô dangeki.

⁷Phumma ate chenroh wenphiak nãng tongeka-ererãngrãng nãngmin wenphiak nãng eroh metong eko wathema wathe demnâng aroamma tongeki, ngale ate Chha Jisu hei pumma nãngpap chentô hehwah lâsâsietthi.

⁸Nãngma nãngnâng pap aho menga eko, nãngma nãng dedeba diapchhah riieki, ngale nãngnâng toangtang pa aho.



⁹Rohkomin nãngma nãngpap heh Joban wah map methaeko, atema toamsem tah junko atema toangtang emoa: atema nãngpap heh map ekohhi, ngale nãngma chentô kaamchhih motihheh phangtang esâsiet hi.

¹⁰Phumma nãngma papkaam momih mengaeko, nãngma Joban ba mothô rãng hôan eki, ngale ate Jabkhab pa nãngnâng aho.

1 Jon 2

Krista pa nãng Chohsokte

¹Ngachhu Ngachha heh, Ngama nenâng are sitipa raangeka, erohkoba nema papkaam lemo edangen; phumma henma komin papkaam memo enko, nãngrãngma Wa Joban ngewah rosep lahma mapthâkohte wathe tonga, erepa Jisu Krista, atea toangtang thôn.

²Ngale Krista junma jôba nãngpap heh mapkoh ehi, ngale nãngkhu pap heh lolo mapkoh dangmah, chentô mihnyan heh pap mapkoh eka.

³Nãngma Joban ngin mekep eko, linlinjô nãngma ate lâjettih.

⁴Phumma nãngma ate jet e ngalihma, ate nginlekep medang eko, nãnga mothô ngale nãngnâng toangtang pa aho.

⁵Phumma nãngma ate ngin mekep eko, nãngma atenâng linlin huneki. Eroh koba nãnga Joban demnâng linlinjô aroamma dangeki ngama ejet e:

⁶ngale nãngma nãnga Joban demnâng aroam mejôba dangeki mengaeko, nãngmin Jisu Krista ma chenroh motah a ererãngrãng sôngtôngmin.

Hôkum Anyan

⁷Ngalemruchha heh, Ngama nenâng are ngin raangkoh ekapa hôkum nyan raangkoh dangmah; arepa hôkum apã pejôba, are hôkum pa nema rangbeng habbeng thuma chohtet. Hôkum apã nginkongpa nema râchohtattet.

⁸Rohkomin, athâng hehwah Ngama nenâng raang ekapa hôkum nyan, chenrãngma ngako, ere hôkum kowah toangtang pa Krista nãngmin kheki ngale nekhu dede nãngmin kheka. Chenrãngma ngako rangnyek pa lienchhoantah, ngale wenphiak linlin pa lâhongphiaktah.



⁹Phumma nãngma nia wenphiak nãng tongeki ngalihma, nãngpho anaa hehnãng mechhihchoh eko, nãnga athãng hehmin rangnyek khennãng jôba tongeki.

¹⁰Nãngma nãngpho anaa hehnãng mehun eko, nãnga wenphiak nãng tongeki, ngale nãngnãng mihhan heh pap dãngthukthin chenjô aho.

¹¹Phumma nãngma nãngpho anaa nãng mechhihchoh eko, nãnga rangnyek nãng tongeki; nãnga rangnyek nãng khoam eki ngale chennãng dangekia ere pemin jetmih, chenrãngma ngako rangnyek pumma nãngmit doaksiet ehi.

¹²Ngachhu Ngachha heh, Ngama nenãng raangeka, chenrãngma ngako, Krista junma nepap heh map lâchohtet.

¹³Wa heh Ngama nenãng raangeka, chenrãngma ngako henpa rangbeng habbeng thuma dangtah a erepa nemajet. Roandông pho anya heh Ngama nenãng raangeka, chenrãngma ngako nema Achhih pa tajien eken.

¹⁴Ngachhu Ngachha heh, Ngama nenãng raangeka, chenrãngma ngako nema Wa Joban pa ajet. Wa heh Ngama nenãng raangeka, chenrãngma ngako rangbeng habbeng thuma henpa dangtah a erepa nemajet. Roandông pho nya heh Ngama nenãng raangeka, chenrãngma ngako nea lochaan poat; ngale Joban Jabkhab pa nekhen nãng tongehèn, ngale nema Achhih pa tajien eken.

¹⁵Hahtokkhoh ko nekphetwân en, ngale hahtokkhoh kowah chhahkhem chenni nãngjô nekphetwân en. Nema hahtokkhoh nãng mephetwân enko, nema Wa Joban nãng hunmet.

¹⁶Hahtokkhoh thiakpa dangeka are heh - papi mihnyan nyuchha hung arinma huneka heh, mihnyan hehma chenni pa khelahma huneka ereheh, ngale chenni junma are hahtokkhoh wah mihnyan heh ngam apoarii eka ere chhahkhem heh - are heh wanthemmin Joban Wa ngewah dangmah; are chentôpa phangtang hahtokkhoh ngewah hongeka.

¹⁷Hahtokkhoh ngale hahtokkhoh wah mihnyan nyuchha ma huneka chentô chhahkhem heh amahjâ rêmin; rohkomin henhenma Joban junko moeka ere mihnyan heh roantang roangiêng rãng hînmin.



Krista Ran

¹⁸Ngachhu Ngachha heh, athôan sanpoat pa lânâm hûtha! Nenâng Krista Ran ehûra ngama thôkotah; ngale athângheh mejô Krista ran ajahthem lâhongtah, ngale erohwah nãngma athôan sanpoat pa lânâmtha ngama jeteka.

¹⁹Are mihnyan heh linlin nãng demnâng johroamte dangmah, ngale erohwah thinma nãngkhu thinphethien ehi; thin a nãngkhu demnâng aroam dângnomako, nãng demnâng chenjoh tongthi. Rohkomin thin a nãng tâwah chhoantah, erejunko thin a wathemin nãng demnâng dangmah ngama senthemthem jeteka.

²⁰Rohkomin nekhû khohnâng Krista ma Asâthôanju kohkat ehèn, ngale erohwah nekhû anga ngama toangtang pa jet eken.

²¹Phumma Ngama nenâng raang ekepa nema toangtang pa jetmet ngama thonghun lekma raang dangmek; rohkomin, nema toangtang pa ajet, ngale nema toangtang pumma chenthujô mothô thômah ngamemin ajet.

²²Eroh medang ako mothôpa hen a? Jisu pa Misaia dangmah ngatte peba mothô. Arerãngrãng mihnyan heh Krista Ran - thinma Joban Wa ngale ate Chha wanii niinâng putedâlem mah.

²³Chenrãngma ngako henhenma Chhako leputedâlem dangeka erehehma Wa nãngmin putedâlem mah; ngale henhenma Chha nãng putedâlem eka erehehma Wa nãngmin putedâlem eka.

²⁴Erohwah, nema nehung nãng khebwah chenni chohtattet a ere nginkongpa senthemthem thien en. Nema ere nginkongpa senthemthem methien enko, nea roantangma Wa Achhanii demnâng aroamma edangen.

²⁵Ngale erepa Krista ate dedema nãngnâng kohrãng toamsêm wah - erepa roantang roanjêng roandông kohrãng toamsêm wah.

²⁶Ngama nenâng are raang ekapa nenâng diapchhah lahma lemkenâng sênchhoanrãng phungte heh junma raangeka.

²⁷Phumma nenâng Krista ma ate Ju nekhoh nãng kohkat ehèn. Chenthu ate Jupa nekhoh nãng tonggehèn a eretôko nema nenâng hethôte henjô lemtumet.



Chenrãngma ngako ate Ju pumma nekhu nãng rongrup heh hethô ehèn, ngale atema chenni hethô ehèn a ereheh amõang dangmah, phangtang toangtang. Juma hethô ehèn rãngrãng dangen, erediko Krista demnãng aroam mejû dangletma tongen.

²⁸Ngachhu Ngachha heh, linlinjô ate demnãng aroamma dangletma tongen, erohkoba chenthu ate meka theko, nãnhung dongdong edange, ngale ate katjâ Rangwo ko atenãng rêse lihma lehuhtong edange.

²⁹Nema Krista pa toangtang ngama ajet; ngale nema are pemin jet en, henma akomin kaamsen moeka atea Joban chha.

1 Jon 3

Joban Chhuchha

¹Sûtan en, nãng Wa Joban ma nãngnãng chentô hun ehia! Atema nãngnãng hunpa atôdong, nãngnãng Joban chha ngama ngaehi - ngale erohwah, linlinjô nãnga Joban chha lâdangtih. Erohwah are hahtokkhoh ma nãng jetmahhi: chenrãngma ngako thinma Joban jetmah.

²Ngalemruchha heh, ade phumma nãnga Joban chha lâdangtih, rohkomin chenrãngrãng dângmin a erepa senthemthem majeteki. Rohkomin nãngma ajet chenthu Krista mengak kathako, nãngmin ate rãngrãng edange, chenrãngma ngako nãngma Krista linlinpa meroh a eroh echokhe e.

³Henhenma Krista nãng aroh dâlem eka, erehehma thin dedemin Krista asâ dangeka rãngrãng asâ danglahma tongeka.

⁴Ngale henhenma papkaam moeka erehehma Joban niemarang pa chhihsiet eka, chenrãngma ngako pap pumma Joban niemarang pa chhihsiet eka.

⁵Nema ajet Krista pa pap heh sâsietkoh rãng hongwah, ngale ate nãng pap aho dângwah.

⁶Ere junma henhen Krista demnãng roamlahma songtong eka erehehma papkaam lemotumin; rohkomin henhenma papkaam pa molahma tongeka erehehma Krista mathatkheka ngale mathatjeteka.



⁷Ngachhu Ngachha heh, nekhu hennângjô nekdiap chhahrii en! Henhenma kaamsen moeka ereheh Krista rãngrãng thinmin toangtang mihnyan.

⁸Ngale henhenma papkaam molahma tongeka ereheh Juchhih thiakrãng lâdangtah, chenrãngma ngako rangbeng habbeng thuma Juchhih ma papkaam moeka. Phumma Joban Chhapa Juchhih ma chenni motah a ere moatlem heh chhihsietrãng hongeka.

⁹Phumma Joban chha hehma papkaam thammo tumah, chenrãngma ngako, Joban ma koheka roandông nyan pa thinnâng tongeka; ngale Joban pa thin Wa dâng phumma, thinma papkaam thammo tumah.

¹⁰Are junko nãngma henpa Joban chha a, ngale henpa Joakchha a erepa sâpoangpoang jienta jetloeki: henhen pa kaamsen lemote a ngale mihnyan hannâng lehuntea ereheh Joban Chha dangmah.

Wathema wathe nãng Hun Achhâmîn en

¹¹Nema khebeng thuma chohtattet nginpa arepa: Nãngma wathema wathe nãng hun achetmîn min.

¹²Nãnga Kain rãngrãng ledangmin; atea Juchhih thiakrãng danglahma atedede pho Abel pa ritphewah. Kain ma ate pho pa chenrãngma ritphewah a? Chenrãngma ngako, atema atedede moatlempa achhih moatwah, ngale ate phoma motah moatlempa moatlemsen dângwah.

¹³Ngalemruchha heh, are hahtokkhoh wah mihnyan heh mejô mechhihchoh hèn komin nekpatrii en.

¹⁴Nãngma ajet nãnga ritthin kowah ahin thinnâng lâdangtih; erepa nãngma mihhan hehnâng hun achet junko jeteki. Phumma henhenma mihnâng lehuntea ereheh athâng hehmin ritthin chaan khenkho tângthu jôba.

¹⁵Mihhan nãng chinnyate mihnyan heh mihritphete, ngale nemajet mihritphete mihnyan hehnâng roantang roanjêng roandông aho.

¹⁶Are junko hun achet mînpa chennia erepa nãngma jeteki: Krista ma ate roandôngpa nãngkhurãng kohwah. Erohwah, nãngkhu memin, nãng roandôngpa mihrãngma kohmin!



¹⁷Techhu hehma ate pho anya heh chennijô aho chêmchei pa khelahme min thinnâng chohsokrăng hung lelaangte hehma Joban nâng huneki tanga mah.

¹⁸Ngachhu ngachha heh, nâng hun achetmîn pa thunkhab lolo ledangmin; nâng hun achetmîn pa hung arinma toangtangma hun achhâmîn lihma moatlem junma khesokmîn min.

Joban mathahko Hungdong Rindong dâng

¹⁹Eroh medang ekoba nânga toangtang thiakrăng lâdangtih ngama ejetriie; ngale eroh kojôba Joban mathahko dâlembe hungsensen edange.

²⁰Phumma nânghungma nângnâng achhih menga hiko, nângma ajet Joban pa nânghung nomemin abâmbâm adong, chentôpa ajet.

²¹Ngale Ngalemruchha heh, nânghungma nângdede nâng achhih lenga medang hiko, Joban mathahko nânghung dongdong edange.

²²Nângma atewah chenni thaekia ereheh choheki, chenrăngma ngako, nângma ate hôkum pa kepeki ngale ate rirmeli moatlem moeki.

²³Atema chien ehipa, nângma ate Chha Jisu Krista nâng putedâlem, ngale wathema wathe nâng hun achetmîn răng chien ehi, ngale Krista memin eroh jôba chien ehi.

²⁴Henhenma Joban ngin kepeka ereheh Joban demnâng aroamma tongeka, ngale Joban min thin demnâng aroamma tongeka. Ngale Joban ma nângnâng kohehi Ju junma nângma Joban nâng demnâng aroamma tongehi ngama jeteka.

1 Jon 4

Toangtang Ju ngale Ju mông

¹Ngalemruchha heh, ninâng Ju tonghi ngatte chentô nâng nekputedâlem en, rohkomin thin ngewah Jupa Joban wah dangale dangmah a ngama thaksokre en. Chenrăngma ngako môngmông heh chentô thenâng jahmông lâphan chhoantah.



²Are junko nema arepa Joban Ju dangale dangmah a erepa tajetlo en: henhenma Jisu Krista pa mihnyan nyuchha rãngrãng danglahma katwah ngaeka ere Jupa Joban ngewah choh eka.

³Rohkomin henhenma Jisu Krista eroh kaho ngaeka ereheh nãng Joban Ju aho. Ere mihnyan heh ngewah ju pa Jisu Krista Ran ngewah ju; nema eroh ehûra ngama tattet pa athângheh are hahtokkhoh ko lâhongtah.

⁴Ngachhu Ngachha heh, rohkomin nea Joban thiakrãng lâdangtet, ngale mõngmõang heh nema lâtajientet, chenrãngma ngako, ne ngewah Jupa are hahtokkhoh thiakrãng dãngte heh ju noma bâmbâm Juchaan.

⁵Ere mõngmõang hehma are hahtokkhoh junma ba ngin thôeka, ngale hahtokkhoh ma thin ngin kepeka, chenrãngma ngako thin a are hahtokkhoh thiak.

⁶Rohkomin nãnga Joban thiakrãng lâdangtih. Ngale henhen Joban jeteka erehehma nãngngin ekephi; ngale henhen Joban thiakrãng ledangtea erehehma nãngngin kepmahhi. Erohwah are junko nãngma chenpa toangtang Jua, ngale chenpa jumõanga erepa tajetloe.

Joban pa Ahun

⁷Lemruchha heh, wathema wathe nãng hun achhâmin e, chenrãngma ngako, ahun pa Joban ngewah kaera. Henhenma mihnãng hun achhâeka ereheh a Joban chha ngale thinma Joban lâjettah.

⁸Henhen nãng hun achet ahoa erehehma Joban jetmah, chenrãngma ngako Joban pa ahun.

⁹Ngale Joban ma nãngnãng ate hun pa are hahtokkhoh ko ate Chha wathelolo pa chienkat lahma khesok ehi, erohwah ate junma nãngkhuma roandông choheki.

¹⁰Ahun pa arerãngrãng: nãngma Joban nãng hun dangmih, rohkomin Joban ma nãngnãng hunlahma nãngpap heh mapkohrãng ate Chha chienkat era.

¹¹Lemruchha heh, Joban ma nãngnãng aroh mehun hiko, nãngmemin wathema wathe nãng hun achetmîn min.



¹²Henmejô Joban mathatkhe eka, rohkomin nãngma wathema wathe nãng mehunmîn eko, Joban nãng demnâng aroamma tongehi, ngale atewah hun pemin nãngnâng senthemthem tongehi.

¹³Nãngma linlin jeteki nãnga Joban demnâng aroamma songtong eki, ngale Joban min nãng demnâng aroamma tongehi, chenrãngma ngako atema nãngnâng ate Ju kohehi.

¹⁴Ngale Joban Wama ate Chha are hahtokkhoh Pângte rãng chienkat erapa nima lâkhetih ngama mihhan nãng phoangthôkoh eki.

¹⁵Nãngma Jisu Krista pa Joban Chha ngama menga eko, nãnga Joban demnâng aroamma tongeki, ngale Joban min nãng demnâng aroamma tongehi.

¹⁶Ngale Joban ma nãngnâng hun ehi ngama nãng dedema ajet ngale putedâlem eki. Joban pa ahun, ngale henhen hun achetmîn nungma songtong eka ereheh Joban demnâng aroamma tongeka, ngale Joban min thin demnâng aroamma tongeka.

¹⁷Ahun pa nãngnâng senthemthem tângdi nãnga Arenjâ Rangwo ko hungdongdong danglihma etonge; ngale hungdongdong edange, chenrãngma ngako, are hahtokkhoh ko nãng roandôngpa Krista rãngrãng dangeki.

¹⁸Ahun nãng acheithin aho; senthemthem hun achet ma chentô achei heh junloeka. Erohwah, chephoat hehnâng hun achet pa senthemthem aho, chenrãngma ngako nãng achei mere eko nãngma kaamchhih moatthã chêmchohmin ngama jetlihma cheieki.

¹⁹Joban ma nãngnâng benghundi nãngmin hun achhâmin eki.

²⁰Nãngma Joban nãng huneki ngalihma, nãngpho anaa hehnâng memitchek eko, nãnga mothô. Chenrãngma ngako, nãngma mitma khe mihnyan hehnâng lehun medang eko, mitma lekhe Joban nãngjã chenthujô jienhunmih.

²¹Krista ma nãngnâng arepa chien ehi: Henhenma Joban nãng huneka erehehma mâmâ pho anaa nãngmin hunmin.



1 Jon 5

Nāngma Hahtokkhoh pa Jien eki

¹Henhenma Jisu pa Misaia ngama putedâlem eka ereheh a Joban Chha; ngale henhenma Joban Wa nâng huneka erehehma ate Chha nângmin huneka.

²Are junko nāngma Joban chhuchha hehnâng huneki ngama jeteka: erepa nāngma Joban nâng hun achet ngale ate nginkep junko jeteka.

³Chenrāngma ngako, nāngma Joban hunpa, ate hôkum kep ekipa. Ngale atema chien ehi pa nāngrāngma nyahrāng alat dangmah,

⁴chenrāngma ngako chentô Joban chha hehma rangkhen pa tâjienmin. Ngale nāng putedâlem junma nāngma hahtokkhoh pa tajieneki.

⁵Henma are hahtokkhoh pa tâjienmin a? Henhenma Jisu pa Joban Chha ngama putedâlem eka erehehma loloba tâjienmin.

Jisu krista Hâkhi

⁶Jo ngale hei demnâng katte pa Jisu Krista. Atea jololo demnâng katwah dangmah, jo ngale ate rit kowah hongtah hei wanniiini demnâng katwah. Ngale Juma erepa toangtang ngin ngama ngaeka, chenrāngma ngako Jupa toangtang.

⁷Arepa nāngnâng wanrem ma hâkhi kohehi.

⁸Erepa Ju, Jo, ngale hei; ngale are wanrem pumma mânthe thôkoh ehi.

⁹Nāngma mihnyan hehma thôkoh nginko putedâlem eki; rohkomin, Joban ma thôkoh ehipa ere nomemin achaan, ngale Joban ma erepa ate Chha junma thôkoh ehi.

¹⁰Erohawah henhenma Joban Chha nâng putedâlem eka, ereheh hungnâng are nginpa thien eka; rohkomin henhenma Joban nâng putedâlem mah a, erehehma Joban pa mothôrāng hōan eka, chenrāngma ngako Joban ma thinnâng ate Chha junma chenni thôkotah a ereko thinma putedâlem mah.



¹¹Atema thôkohthi nginpa arepa: Joban ma nãngnâng roantang roanjêng roandông kohehi, ngale are roantang roanjêng roandôngpa ate Chha ngewah choheki.

¹²Henhen nâng Chha tongeka ereheh nâng are roandông pa tonga; ngale henhen nâng Joban Chha ahoa ereheh nâng roandôngpa aho.

Roantang roanjêng Roandông

¹³Ngama nenâng are raang ekapa nema ninâng roantang roanjêng roandôngpa tonghi ngama jetrãng raangeka - nema Joban Chhako putedâlem en.

¹⁴Nãnga Joban mathahko hungdongdong dangeki, chenrãngma ngako nãngma chenni akomin ate hung junko ate ngewah methaeko atema metkep echohtat hi.

¹⁵Ngale nãngma chenthu komin ate ngewah methaeko, atema nãng nginpa etat hi ngama mejet eko; nãngma ate ngewah chenni thaekia erepa atema nãngnâng kohehi ngamemin jeteki.

¹⁶Chenjô komin nepho anaa ma pap molahma lâkhetet, phumma atema pap moeka pa ate ritli ledang medang ako, nema Joban nâng rangsoam koh en, eko Joban ma ere mihnyanko roandông ekoh a. Arepa thinma moeka pappa rittô ledang moatte hehrãng ngaeka. Rohkomin ritli papmin tonga, phumma Ngama ere lânriroh papkaam moatte hehrãng Joban nâng rangsoam koh en ngat dangmah.

¹⁷Chentô kaamchhih moat pa pap, rohkomin rittô ledang papmin tonga.

¹⁸Nãngma ajet Joban chha hehma henmemin papkaam thammomah, chenrãngma ngako thin a Joban Chha ma pesiet lahma thieneka, ngale Juchhih ma thinnâng chenjô taremah.

¹⁹Nãngma ajet rangkhen pa phangtang Juchhih ma pênlahma ate khennângjô methien akomin nãnga Joban chha.

²⁰Nãngma ajet Joban Chhapa katha ngale nãngnâng toangtang pa jetthuk ehi, erohwah nãngma linlin toangtang Joban pa jeteki. Ngale nãnga linlin Joban



demnâng aroamma tongeki - ngale ate Chha Jisu Krista demnâng aroamma tongeki. Arepa linlin toangtang Joban, ngale are pejôba roantang roanjêng roandông.

²¹Ngachhu Ngachha heh, joban mông atoang hehwah jetletma tongen!



2 Jon

2 Jon 1

¹Asâthem khhepho phannang hehwah- Nima nyahrãng ahun dihiaknyu ngale ate chhuchha heh, Ngama linlin nyahrãng hun ekang hehnâng raangeka. Ngale Nga loloma hun achet dangmah, rohkomin toangtang jette chentôma hun ehèn,

²chenrãngma ngako toangtang pa nãngnâng tongehi ngale erepa roantang roangjêng rãng tongehi.

³Wa Joban ngale ate Chha Jisu Krista ma, nãngnâng mînchenchaan, ahun, ngale mêmô chenkohhi; ereheh nãngkhu toangtangma hun achetmîn junko nãngrãng chendanga.

Toangtang ngale Ahun

⁴Wama nãngkhu nâng thôkohthi rãngrãng nekhû chhuchha heh toangtangma sôngtông pa khelekma Nga nyahrãng khuhah ekang.

⁵Ngale nyahrãng ahun dihiaknyu, Ngama nãngnâng chhien eki: nãngkhu anga nga wathema wathe nâng hun achhâmin e. Arepa Ngama nangnâng hôkum nyan hôngraangkoh dangmih; arepa nãngkhuma khemama chohtih hôkum pejôba raangeki.

⁶Ngama are hun achetmîn ngin jabekang pa nãngkhu Joban hôkum junko senthemthem sôngtôngrãng jabekang. Are hôkum pa nema khema thumejô lâchohtattet, erepa nekhû hun achhâmin letma sôngtôngrãng ngaeka.

⁷Mih diapphhek chhahte hahtokkhoh ko jahmõang phoangmen chhoantah, ereheh a Jisu Krista pa mihnyan nyuchha phoang rãngrãng danglahma katwah ngama lejette mihnyan heh. Arerãngrãng mihnyan heh mih diapchhahte ngale thin a Krista rãngma Ran.

⁸Eroh wah jetletma dangen, erohkoba nema chenrãngma motet a ereheh lemahphe edangen, ngale eroh medan enkoba nema Joban wah thã echoh en.



⁹Henhen komin Jisu Krista nginlekep thangma, alîenlîen nâng dangeka, ereheh nâng Joban aho. Rohkomin henhenma Jisu Krista ngin kepeka ereheh nâng Wa ngale Chha waniinii tonga.

¹⁰Erohwhah, hen akomin netânâng are ngin heh lekep thangma mehûreko, ere mihnyan heh ne humnâng nekhûthuk en; ngale, “arânjô nekrânjab en.”

¹¹Chenrãngma ngako henhenma thinnâng rânjab eka erehehmin thin demnâng kaamchhih nâng lâjoh rutah.

Athôan Jabkhab

¹²Ngama nenâng jahmõang thôkohthin ngin tonga, rohkomin erepa Ngama nenâng kakoat le sehi ma raangmah; erenoma, Ngadede netânâng kalekma jabmîn katrãng thonghun ekang, erohkoba nãngkhu nyahrãng khuhah nâhah edange.

¹³Nekhuma nyahrãng ahun nekhu nya chhuchha hehmemin nenâng salem matkat ehèn.



3 Jon

3 Jon 1

¹Asâthem khhepho phannang wah- Ngama linlin nyahrăng ahun Gaius nâng raangki.

²Ngama nyahrăng ahun lemruçha, Ngama rangsoam ekang nang demnâng chentô pejô asen tuta chendangho, ngale nangphoang nângmin asenjô chenmam dangho - ngale Ngama ajet nanga Ju ngenâng min asen jôba dangeko.

³Chenthu Kristan mihnyan heh khuthe hûlahma Nganâng nanga toangtangko nyahrăng senthemthem putedâlem lohma tongeko ngama thôhokkoh phumma Nga nyahrăng khuhah nâhah dangekang - ngale roantang komin nanga toangtangjû danglohma songtong eko.

⁴Ngachhu Ngachha heh toangtang danglahma songtong eka ngama chohtatko khuhahtô Nga chenni nângjô khuhahmek.

Gaius nâng Rô

⁵Ngama nyahrăng ahun lemruçha, nangma lethatjette Kristan mihnyan ahan hehnângmin nyahrăng hungkoh lohma chohsûeko pa nyahrăng kaamsen moeko.

⁶Nangma thinnâng hun nginpa thinma anângwah Asâthem hehnâng thôkotah. Thin chhoan demkomin arohjô mamchohsûo, erepumma Joban hung esensiet a.

⁷Chenrăngma ngako thinma Krista moatlem moatrăng chhoan ekako Joban lejette henwahjô chenjô lethâ thangma chhoanwak eka.

⁸Erohwha, nâng Kristan mihnyan hehma are mihnyan hehnâng metkep chohsokmin, erohkoba thinma toangtang râng moekako nângmin ejohroam e.

⁹Ngama Asâthem hehnâng siti athoanchha raangtek; rohkomin thin lemsênte khhepho phannang dânghunte Diotrefes ma Nga nginko nâletha edanga.



¹⁰Erohwah, chenthu Nga meka thangko, atema chentô motah heh nenâng eloatthôkoh a: atema ni lelatnâng chentô acheili ngin phoangthôtah hehmin ethôkoh a, ngale atema mothô phoangthôtah ngin hehmin ethôkoh a! Ngale atema ereheh lolomoat dangmah; chenthu Kristan mihnyan heh mehûra komin atema tângroomah, ngale hen Kristan mihnyan ma tângroo huneka ere mihnyan hehnângmin atema jektangeka, ngale atema ere mihnyan heh Asâthem heh demwahmin junloatrâng huneka!

¹¹Ngama nyahrâng ahun lemruçha heh, achhih ngin nek he en, chenpa asen a erengin he en. Henhenma kaamsen moeka ereheh a Joban chha; ngale henhen kaamchhih moeka erehehma Joban khemah.

¹²Anga ngama Demetrius senthêka; ngale toangtang pummemin ate senthêka. Ngale nimemin atea asen ngaeki, ngale nemajet nima chenni thêkia erepa toangtang.

Athôan Salem

¹³Ngama nenâng ajahthem ngin thôkohthin tonga, rohkomin erepa Ngama kôlem le sehima raang lekma thôkoh hunmek.

¹⁴Nga nedemnâng sitsiak echohmin hûa, ngale eko nângkhu dedema echoh jabmîn e.

¹⁵Mêmo pa nedemnâng chentonghèn Ne lemruçha chentôma salem matkat ehèn. Nângkhu lemruçha hehnângmin thindede phoangphoang nâng salem thôkoh en.



Jud

Jud 1

¹Jisu Krista haa, ngale Jems pho Jud ngewah- Joban ma roeeka mihnyan, ngale Joban Wama hun achhâ lahma songtong eka mihnyan, erediko Jisu Krista ma pepâng lahma thieneka mihnyan hehnâng raangeka:

²Joban ngewah mînchenciaan, mêmô, ngale hun achet pa nekhû khohnâng mênchong chentonghèn.

Nginmõang Hethôte

³Ngama nyahrãng ahun lemruçha heh, nãngkhu anga ngama mãnthema choheki khope junma nekhû nãng raang huneka, ngama nekhû nãng raanghun pa Joban ma roantang roangjêng rãng ate mihnyan hehnâng kohtah putedâlem ko hungkoh letma latrii mo en ngama nekhû hungdông sietrãng raang huneka.

⁴Chenrãngma ngako nãngma lejet tungko nãngkhu mongnâng Joban lejette mihnyan huhluphû lahma tonga, ere mihnyan hehma Joban ngewah mînchenciaan pa thintungko dihiak dela kaamchhih moatrãng chhihsiet eka, ngale thinma nãngnâng Hethôte ngale Teso wathe lolo Jisu Krista nginmin dakwak eka. Chenthu thuma Joban nyapraangma are mihnyan chhih heh mahrit nginpa thôwah.

⁵Chenrãngma ngako, nekhuma areheh phangtang mejô mejet enkomin, Ngama nekhû nãng ngakthôkoh huneka, Teso ma rekthe Isrial mihnyan heh Igip khenwah pêsietwah, rohkomin adiko henhenma leputedâlem dangtah a ere mihnyan heh phangtang ritphe rewah.

⁶Thonghontan en Joban ngintatte heh thinnâng chaan kohtah junko ledang, thin tângthin phethien lahma chhoante heh: thin a roantang roangjêng rãng janruma khhek lahma rangnyek khennâng thien eka, erepa Joban ma ate Rangwo dong jâko thinnâng achhih ngalahma ritpherãng thien eka.

⁷Sodom le Gomora, ngale ere kêanâ wah hahdaang heh thonghontan en, Joban ngintatte hehma chhihmotah rãngrãng enângwah mihnyan hehma



dihyak dela tungko kaamchhih moeka ngale rongrup achhihli hehmin moeka: thin a roantang roanjêng lemutthin papwendô ko khamrii ekapa kaamchhih moatte chentôpa eroh khâmritmin ngama khesok ehi.

⁸Ererãngrãngjô, are mihnyan chhih hehma thindede phoangrãng pap dêngli moeka; thinma Joban hôkum min kepma, ngale rangkhethung wah achoangthôn wah Joban ngintatte hehnângmin jôjêm eka.

⁹Arerãngrãng rangkhethung wah Joban ngintatte hehwah adongthôn Mikel metômin momah. Chenthu Mikel Juchhih heh demnâng Mosa phoang henma chohmin a ngama nyenmîn tahko, Mikel ma Juchhih nâng thãjô jabkhab ma ngaho, atema “Teso ma chenjet hèn!” ngama loloba ngatwah.

¹⁰Phumma are mihnyan hehma chenpa lejet dangeka ereko jôjêm wakeka; ngale thinma wunnem hehma nêm atek junko rãngjet arãngrãng thinma chenni jeteka ereheh mejôba thinchhihsiet eka.

¹¹Thinrãng chentô chhih dângmin a! Thinma Kain damãnko juntoan eka. Chenrãngma ngako, ngun junma thin dedema Balam ma chenroh kaamchhih motah a ererãngrãng kaamchhih moeka. Ngale Kora dangtah rãngrãng thinmin Joban lelatnâng dangeka, ngale thinmin Kora rãngrãng chhihsiet eka.

¹²Thin a rêse thenkhoan hothangma nekhun aroamma hun achhâmin letma jokphhek chhah ekenpa ngeksiet ehèn. Thinma thindede rãnglolo ba thonghunrii lahma sekma wakeka. Ngale thin a rangpat aho phoam pôngma rãngmetphea rãngrãng. Ngale thin a penrii rangkuh komin penri lerite bãng rãngrãng, ngale bãngthongrin ma phuphe lahma choakjâ lahma ritte bãng rãngrãng.

¹³Ngale thin a josi wah cheili jowaak rãngwaak arãngrãng, ngale thinma rêseli moatlem chhih moeka pa thoakwoak rãnghonga rãngrãng loathongeka. Ngale thin a phoangkômamte merit rãngrãng, ngale thinrãng Joban ma rangnyek kenluthôn thepa thienkoh eka.



¹⁴Inok pa Adam chhuchha kowah roan engit ko dôngte pa dângwah, phumma atema ajahthem rangpâ mama thinjunma profesi hôanwah: “Teso ma ate ngintatte rangkethung wah hahjat bijat sietlahma ekara

¹⁵ngale anga nga khohnâng achhih le asen a erepa eren kara, ngale kaamchhih moatte, ngale pap mihnyan heh Joban lelatnâng chentô chhihjab tah a ereheh junko eritphea!”

¹⁶Are mihnyan heh roantang mejû joang alîn ngale mihhan heh phoang chhihthôte; ngale thinma thindede hung arinwah achhih heh junko moeka; ngale thinma thindede rângthôrii eka, erediko thinma chenni huneka erepa jienchohrâng thinma mihan hehnâng phoang johchhah eka.

Aritngat ngale Arîn Akhah

¹⁷Ngalemruchha heh, rohkomin, amako nenâng nãng Teso Jisu Krista moattat chhoante heh chenni thôkohthen a ereheh thonghontan en.

¹⁸Thinma nenâng ngatwah, “Chenthu athôan sanpoat pa mehû theko, nenâng dûmmek jôjênte mihnyan heh ehonga, ngale ere mihnyan heh Joban lejet thangma thinhung sisiko edanga.”

¹⁹Are mihnyan heh nemin ephoang phansiet hèn, ngale thin a thin hei angem hung arinma huneka junko edanga, ngale thinnâng Jumin aho edanga.

²⁰Rohkomin ngalemruchha heh nema ne putedâlem khohko ne roandôngpa rongtêngtêng hôan en. Ngale Asâthôanju chaan kepletma rangsoam en,

²¹ngale nãng Teso Jisu Krista ma ate mînchenna junko nãngnâng roantang roanjêng roandông kohrâng bemlaeki poatko, nededema Joban ngewah hun achet khenko dangletma tongen.

²²Henhenma lechhang putedâlem dangeka ereheh nãng mînchen re en;

²³ngale mihheh wenwah chaanma pêngletma pesiet en; ngale mînchen demko cheimin johkhesok en. Rohkomin thinpap ma ngeksiet wah khetngek hehnâng ba chinnya en.

Rangsoam ngale Rô



²⁴Nekhu papnâng jâritwah tâpesiette, ngale ate tânâng sâpoangpoang tâsiet wênte, erediko ate aphiakhôn mathahko nekhu lethe thangma khuhah nâhah tâdângthukte Joban nâng-

²⁵ngale nâng Teso Jisu Krista junma wathelolo nâng Pângte Joban pejôba mîndong, erediko adongthôn, achaanthôn, ngale chaan ahang kepte, ama komin, athuheh min, ngale roantang roanjêngma dângmin! Amen.



Loatkhesok

Loatkhesok 1

¹Are titab ko Jisu Krista ma loatkhesok wah heh raangthien eka. Joban ma atenâng are loatkhesok ekapa atema ate haa hehnâng sitsiak chenni dângmin a ereheh khesokrâng loatkhesok wah. Krista ma areheh rangkethung wah ate ngintatte wathe Jon tânâng chienkat lahma Jon nâng loatkhesok wah,

²ngale Jon ma chentô khetah heh phangtang thôkoh eka. Are heh Joban ma atenâng thôkohtah ngin heh ngale Jisu Krista ma atenâng toangtang loatkhesok tahheh thôeka.

³Are titab weihte hehma rangkepmin, ngale henhenma are profisi jabkhab pa tatlahma are titab kowah raangeka nginpa kepte hehma rangkepmin! Chenrângma ngako areheh phangtang hôngdâng wângrâng sanpoat pa lânam hûtha.

Asâthem Khuengit nâng Salem koh

⁴Asia diakwah Asâthem khuengit hehnâng Jon ngewah raangeka: Henpa athuhehmin Joban, khema komin Joban, ngale ahokmin sanpoat komin Joban, ngale ate Tôngthin mathah kowah waengit Jusen pumma mînchenchaan ngale mêmemo chenkohhên

⁵ngale Jisu Krista, putedâlemlî thôn hâkhi hôante, ritwah khebeng thôn ngaksatte, ngale hahtokkhoh wah lowang heh khoko pên-te. Atema nângnâng hun ehi, ngale atema roandông kohlahma pap khenwah pepâng ehi

⁶ngale atema nângkhu ate Wa Joban nâng soamtô râng soam aroakte râng hôanehi. Jisu Krista mîn pejôba roantang roangjêng râng adong ngale chaanwin chendanga! Amen.

⁷Sûtan en, atea phoamkhoh nâng kaera! Anga ngama ate ekhe e, atenâng pahma suhtah hehmemin ekhea. Hahtokkhoh wah mihnyan nyuchha heh phangtang ate junma asepeh erewak a. Linlinjô eroh pa edanga!



⁸“Nga a khekthoan pa ngale khedithoan,” ngama Teso Joban achanthoan ma jabeka, Henpa athuhehmin, khema komin, ngale ahokmin sanpoat komin Joban.

Krista Thânkhe

⁹Nga a nepho Jon, ngale Jisu diunte dangjuko ngale ate Hahsong rang dangte hehnang chemchei hueka heh neku demnang aroamma hung arin mongsiet lekma tadokang. Ngama Joban Jabkhab ngale Jisu ma loatkhesokthi toangtang nginpa phangthokoh juko jotungwah Patmos hahko thienwen wah.

¹⁰Teso Rangwo jâko Nga demnang Ju dangwah, ngale Ngama chaanmang raklahma tatwah, erepa poakpopo roatwah rangrang Nga tokdiko jablahma tatwah.

¹¹Ere pumma aroh ngatwah, “Nangma chenni khe eko erepa raangthien o, ngale titab pa hahdaang wanengit wah Asathem khuengit hehnang matchhoan o: Ifisus, Samma, Pergamum, Thitira, Sardis, Filadelfia, ngale Laodika.”

¹²Nga litphong lekma henma ranjab ehanga ngama ngiaksu tekpa, kemwah hoanwah wentit toakthin wanengit chokhe wah,

¹³ngale ereheh mongko mihnyan nyuchha rangrang ate datok nang lanleproh khetlo pohlahma dangwah, ngale ate thenkhuko kemwah hoanlahma khetchhem pa chhem lahma dangwah.

¹⁴Ate khochoo pa khetrupo, ngale mienpo rangrang potutu dangwah, ngale ate mitpa wen rangrang phiak lahma dangwah;

¹⁵ngale ate dapa wennang thekchhoan janlin chhumhutwah rangrang dangwah, ngale ate roatpa longchhak wah jo jâjen katko rahwah rangrang dangwah.

¹⁶Ate dekchahko merit wanengit dangwah, ngale ate thunka wah ronghu rongka dangnah loatkatwah. Ngale ate thenphang pa rangngih mongwah san chaanphiak rangrang dangwah.



¹⁷Chenthu Ngama ate kheko, Nga riichoan rãngrãng danglekma ate dathongko kôanjâwah. Phumma atema ate dekchah pumma Nganâng sahlo lahma ngatwah, “Nekchei! Nga a khekthoân ngale khedithoân.

¹⁸Nga a ahînte pa! Nga a ritrewah, rohkomin Nga ade phumma roantang roangjêng rãng hinekang. Ngale Nganâng arit ngale hahtokkhoh wah arit amahthin heh khohnâng chaan tonghang.

¹⁹Erohwhah nangma chenni kheko ereheh raangthien o, athâng hehwah nangma kheko hehmin raangthien o, ngale khedi wah dângwângthien hehmin raangthien o.

²⁰Nangma Nga dekchah kowah merit wanengit khekole kemwah hôanwah wentit toakthin wanengit khekopa areheh: Merit wanengit pa dangeka Asâthem khuengit hehrãng rangkethung wah Joban ngintatte heh, ngale wentit toakthin wanengit pa dangeka Asâthem khuengit heh.

Loatkhesok 2

Ifisus hehnâng Raang wah Nginkong

¹“Ifisus wah Asâthem ngintatte hehnâng raangeka: “Are nginpa ate dekchah ngeko merit wanengit semte ngale kemwah hôanwah wentit toakthin wanengit heh mongko khôamte ngewah.

²Nema chenni motet a ereheh Ngama ajet; Nema chentô chaanmotet a ereheh Ngama ajet, ngale nehung arin chentô mônglo letma tongtet a erehehmin Ngama ajet. Ngama ajet nema mihnyan chhih heh hunmet, ngale Joban moattat chhoante ledangma nia Joban moattat chhoante ngalahma netânâng hokte hehmin nema thatsû letma thin a mothô khoanglep ngama jetlotet.

³Nea hung arin môngmông dangletma Ngarãng lâchêmtet, ngale nema ere chêmchei pa letadô thangma thînphehmet.

⁴Rohkomin ererãngma Ngama nenâng senchohmah: Nema Nganâng khebeng thuko huntha rãngrãng athângheh eretô hunmahha.



⁵Thatthong hun tan en, nea chentô taangnâng mejârii chhoan en a! Nepap hehwah hungngaklit letma khemako chenroh motet a ererãngrãng mo en. Rohkomin nepap hehwah hung lengaklit thangma medang enko, Nga netânâng kalekma ne wentit toakthin heh erethe kowah ngaktôan chhoan ere ang.

⁶Rohkomin nema arepa senchohli moeken: Nema Nikolaitan hehma moeka hehnâng, Ngama chentô chhichoh ekanga eretô chhichoh eken.

⁷“Nenâng nâ metong hênko, Juma, Asâthem hehnâng chenni ngaeka ereheh jetat en! “Henhenma tajien eken a ereheh nâng Ngama Joban penri thong kowah roandông chohthin bãngko penri rieka kowah echhahthuk ang.”

Samma hehnâng Raang wah Nginkong

⁸Samma wah Asâthem heh ngintatte hehnâng raang ekang: “Are nginpa henpa khekthoan ngale khedithoan, erediko henpa riilahma ngakhîntea ere ngewah raangeka.”

⁹Ngama nekhu chômpa ajet; Ngama ajet nekhua tangchhih - rohkomin linlinko nekhua techhu! Ngama ajet nia Jews mihnyan ngama ngatte mihnyan hehma ne lelatnâng nginchhih jabeka, rohkomin thin a Jews mihnyan dangmah; thin a Joak ajo demnâng aroam dângte mihnyan!

¹⁰Nema chenni chêmcheijô mechoh enkomin nekchei en. Tattan en! Juchhih ma nekhuwah wawathe pa phâtek nâng khhek lahma hung ethaktoan hên, ngale phumma ne chêm pa jâechhi rãngba eta lekchêm en. Nea lânrii rohjô mechêm enkomin, Nganâng senthemthem putedâlemha, ngale erohkoba Ngama nenâng ajien thãpa roandông ekoh a.

¹¹“Erohwhah, nenâng nâ metong hênko, Ju pumma Asâthem hehnâng chenni ngaeka erepa jetat en! “Henhenma tajien eka ereheh khohnâng jânthong arit pa lehumin.

Pergamum wah hehnâng Raang wah Nginkong

¹²“Pergamum wah Asâthem ngintatte hehnâng raangeka: “Are nginpa ronghu rongka dãngnah sêmte ngewah raangeka.



¹³Ngama nekhu chenke songtong eken a ereheh ajet, phumma eretheko joak tângthinmin tonga. Nekhua Nga demnâng toangtang dangeken, ngale Joak tongeka theko Nganâng senthemthem putedâlem lahma Ngangin phoangthôte Antipas ritphe komin nema Nganâng putedâlem pa jekmahtha.

¹⁴Rohkomin Ngama are roanche reknâng chhihchoh eka: Nekhu chhangnâng Balam ma hethôeka ngin kepte tongen, Balam ma Balak nâng Joban nâng joapsoap wah phhekchhah heh Isrial mihnyan hehnâng chhahthuk lahma chenroh papnâng dângthukmin a ereheh hethô wah, ngale dihiak dela tungko kaamchhih moatpa hethô wah. Phumma nekhu chhangnângmin erengin kepte etongen.

¹⁵Ererângrângjô, nekhu chhangnângmin Nikolaitan hehma hethôeka ngin keptemin etongen.

¹⁶Athângheh ne papwah hungngaklit en! Nehung lengaklit kenke, Nga netânâng sitsiak ekarâng, ngale Nga thunka wah hongkaera dengpa keplekma ere mihnyan heh demnâng eloatmîn karâng.

¹⁷“Eroh wah, nenâng nâ metong hênko, Juma Asâthem hehnâng chenni ngaeka erepa jetat en! “Henhenma tajien eka ereheh nâng ahuhriam wah mana echhahthuk a. Ngale Ngama thin anga nganâng longpo ekoh ang, ere longpo ko henmejô lejetli mînnyan raanglahma tonga, ere mînpa henma choh eka erepumma loloba jetmin.

Thitira hehnâng Raang wah Nginkong

¹⁸“Thitira wah Asâthem heh ngintatte hehnâng raangeka: “Are nginpa Joban Chha ngewah raangeka, ate mitpa wendô rângrâng, ngale ate dapa janlin chhumhut wah rângrâng chhum phiakeka.

¹⁹Nema chenni moeken a ereheh Ngama ajet. Ngama newah hun pemin ajet, ne putedâlem pemin ajet, nekhumâ khoakhêm, ngale nekhu hungmông rinmông dangeken hehmin ajet. Ngama ajet nekhumâ khemawah motet nomemin athângheh ajah moeken.



²⁰Rohkomin arepa Ngama nekhu nâng senchohmah: Nekhuma dihiaknyu Jizibil ma ate dedema Joban nginmatte ngariieka ngin kep eken. Ate ma hethô lahma Ngahaa hehnâng dihiak dela tungko kaamchhih mothuk re eka ngale moangachaang nâng joapsoap wah phhekchhah heh chhahthuk re eka.

²¹Ngama atenâng ate pap wah hung ngaklitrãng sanpoat kohtek, rohkomin atema kaamchhih moatwah jekpa hunmah.

²²Ngale Ngama ate erediko ate demnâng dihiak dela kaamchhih moatte heh nyahrãng chêmchhih chohtin jupthinko ephekat ang. Thinma dihiaknyu demko kaamchhih moatpa lejek kako arepa Ngama athângheh emo ang.

²³Ngama ate dijunte hehmin eritphe ang, ngale eredikoba chentô Asâthem hehma Nga a anga nga hung arin khenwah thonghun eka heh lepjette ngama ejet hang. Ngama nekhu anga nganâng henma chenroh motet a erejunko thã engakkoh a.

²⁴“Rohkomin Thitira wah ahan hehma nenâng Jizibil ma are achhihli hethô ehèn heh kepmet; mihhan hehma ‘Joak hungkhen wah alinlin ngin’ ngama ngaeka pa nema jetmet. Ngama nenâng thôkoh eka, Ngama nekhu khohnâng lihân hênlih lêhènthuk tumah.

²⁵Rohkomin nga makaka erângko, nema chenni chohtattet a ereko rongtêngtêng loletma tongen.

²⁶⁻²⁸Henhenma tajien eka, ngale Ngama hun ekang rãngrãng athôankotuk moeka, ere hehnâng Ngama Ewa ngewah chohtek rãngrãng mãnthe chaanpa ekoh ang: Ngama thinnâng chentô diak akan heh khohko pênrãng chaan ekoh ang, ngale jankangma hahtit soapwat lahma chhupjâwah rãngrãng soapwatrãng thinnâng epênthuk ang. Ngale Ngama thinnâng rangkhah meritmin ekoh ang.

²⁹“Nenâng nâ metong hènko, Juma, Asâthem hehnâng chenni ngaeka erepa jetat en!”

Loatkhesok 3

Sardis hehnâng Raang wah Nginkong



¹“Sardis wah Asâthem ngintatte hehnâng raangeka: “Arepa hennâng Joban Ju wanengit ngale merit wanengit tongeka ere ngewah raangeka. Nema chenni moeken a ereheh Ngama ajet; ngale nea riichoanjô medang enkomin mihnyan hehmanenânghân ngaehên!

²Erohwah sat en, ngale linlinjô phangtang mahrit mako nenânghenni tonghên a ereheh rôngsiet en. Chenrângma ngako, nema chenni moeken a ereheh Joban râng mapun moeken ngama khe eka.

³Erohwah, nenânghenni hethôthen a, ngale chenni chohtattet a ereheh thonghun tan en; ngale erengin heh kepletma nepap wah hungngaklit en. Phumma ne lechhin kenko, Nga nekhoh nânghahuhte hokwah rângrâng ekarâng, ngale Nga chenpoatko katmin a ere sanpoat pa nema lejetmin.

⁴Rohkomin Sardis wah nekhu roanchechha hehmane khet pa sâpoangpoang thien eken. Nea Nga demnânghketpo kepletma ejoh khoamha, chenrângma ngako, nea Nga demnângheroh tâjoh khômârâng kaamsen moeken.

⁵Hen-henma tajien eka ereheh aroh khetpo chohkep min, ngale Ngama thinnânghân titab kowah lere phemin. Ngale Ngama Ewa ngale rangkhetung wah ate ngintatte heh mathahko nea Nga dijunte ngama engang.

⁶Erohwah, nenânghân metong hênko, Ju pumma Asâthem hehnânghenni ngaeka erepa jetat en!

Filadelfia hehnângh Raang wah Nginkong

⁷“Filadelfia wah Asâthem heh ngintatte hehnângh raangeka: “Arepa henpa Asâthôan ngale tongtanga ere ngewah raangeka. Atenângh Devit sâbipa tonga, ngale chenthu atema kâsek melaangtah ko henmemin leta sektumin, ngale chenthu atema kâsek pa mesektah ko henmemin leta laangtumin.

⁸Nema chenni moeken a ereheh Ngama ajet; Ngama ajet nenânghchaan ajahho; rohkomin nema Nga nginkep eha ngale Nganânghsenthemthem putedâlem eha. Ngama ne mathahko kâsek dôngmông laangkoh eka, ere kâsekpa henmemin leta sekmin.



⁹Tattan en! Ere joak demnâng dângte mihnyan heh, thin a Jews ledang thangma nia Jews ngama ngatte mothô khoanglep heh, Ngama netânâng huthuk lekma ne dathongko ekunjup thuk ang. Ngama nenâng hun pa thin chentôma ejeta.

¹⁰Chenrãngma ngako nema Nga hôkum kepletma hungmôngmông dangletma tadô eken, ngale chentô mihnyan nyuchha heh thatsokrãng hahtokkhoh ko chêmchei hok sanpoat komin Ngama nekhu pesiet lahma ethien a.

¹¹Nga a sitsiak lâkaerâng. Nenâng chenni tonghên a ereheh senthemthem thien en, erohkoba nema tâjienthã choh ekenpa henmemin ne ngewah leta nyenmin.

¹²Ere tâjiente heh Ngama Nga Joban rangsoamhum thõngrãng ehôan ang, ngale thinma erethepa chenthumin lephethien min. Ngama thin khohnâng Nga Joban mînpa eraang ang, ngale Nga Joban sôngthin hahdaang Jeroselem nyan mînpa eraang ang, erehahpa Nga Joban tâwah rangkethung wah ekara. Ngale Ngama thin khohnâng Ngamîn nyan pemin eraang ang.

¹³“Erohwha, Nenâng nâ metong hênko, Juma Asâthem hehnâng chenni ngaeka erepa jetat en!

Laodika hehnâng Raang wah Nginkong

¹⁴“Laodika wah Asâthem heh ngintatte hehnâng raangeka: “Arepa Amen ngewah raangeka, toangtang thôn hâkhi, erediko atea Joban ma chentô hôantah heh thongpa

¹⁵Nema chenni moeken a ereheh Ngama ajet; Ngama ajet nea akhmin dangmet ngale akhammin dangmet. Ngama nea are wannii kowah chenpa komin wanthe danglet mele ngama huneka!

¹⁶Rohkomin nea lemtubu, akhammin dangmet, ngale akhmin dangmet, erohwha nea Ngama Ngathunkâ wah athoakphe erea!

¹⁷Nema ngaeken, ‘Nga a techhu ngale chennijô thoammek; ngama chenni hunekanga ereheh phangtang tonghang ngaeken.’ Rohkomin nea chentô



tangchhih a ngale chentô mînchenlia erepa jetriimet! Nea tangchhih, bôangloang, ngale mitdoak.

¹⁸Erohwah, Ngama nenâng rîn eka, nea techhu dângrăng Ngawah kem, alinlin kem pa riha. Ngale ne bôangloang tongletma rêsê choh eken kowah jekrăng Ngawah khetpo ripohha. Ngale nemitko hutrăng Ngawah phem riha, eroh koba nemitma ejienkhe en.

¹⁹Ngama hun achhâ wakkang chentô nâng ritngatmin re ekang ngale phheksiet nâsietmin hân ekang. Erohwah, hungkoh letma, nepap wah hungngaklit en.

²⁰Tattan en! Nga kâsekthong ko cheplekma kâsekko rahkong ekang; henma komin Ngaroat tatlahma kâsekpa melaang ako, Nga thinhum khennâng wânglekma thin demnâng ejoh phhekchhah wângang, ngale thinmin Nga demnâng ejoh phhekchhah hang.

²¹Chenroh Ngama phangtang tajien lekma Ewa tângthin tâko ate kêko tongwăng ekang răngrăng, henhenma phangtang tajien eka erehehmin Ngama Nga tângthinko Nga tâko etongthuk ang.

²²“Erohwah, nenâng nâ metong hênko Juma Asâthem hehnâng chenni ngaeka erepa jetat en!”

Loatkhesok 4

Rangkhethung nâng Rangsoam

¹Erediko Ngama ahan wîenthânkhe wah, ereko rangkhethung nâng kâsekpa laanglaang thienlahma khewah. Ngale poakpopo rahmetwah răngrăng roattatwah, ere roatpa amako Nganâng aroh ngalahma tatwah, “Ngatânâng anâng wângro, ngale arediko chenni dângmin a erepa Ngama nangnâng khesok e.”

²Ngale lemlienma Jupa Nga demnâng dângwah. Ngale rangkhethung wah tângthinko wathe tonglahma dângwah.



³Ate then pa thăchaan long Jaspas ngale Karnelian răngrăng phiak lahma dăngwah, ngale tôngthin tumlitko phangtang nâng chaangchoi pa thăchaan longhin Imerald răngrăng phiak lahma dăngwah.

⁴Ere tôngthin tumlitko ahan tôngthinmin roaknii wanbelii dăngwah, ere tôngthin heh khohko roaknii wanbelii khhepho phannang heh khetpo keplahma thinkhoko kem khophok phok lahma tongeka.

⁵Ere tôngthin kowah rangdeng khiapda pa liap, ngale rangmok rangphak pa hongka rewah. Ngale are tôngthin mathahko wennan wanengit dôtoak lahma dăngwah, ereheh dangeka Joban Ju wanengit pa dăngwah.

⁶Ngale tôngthin mathahko sîsa khenwah jo răngrăng, ngale longra khenwah hôangjen wah jo răngrăng sâpoangpoang dăngwah. Tôngthin tumlit sukbeliiko ahîn ngem wanbelii nâng di ama mitwin dăngwah.

⁷Khebengthôn pa sahdong hinhoo răngrăng dăngwah; ere diwah pa mânpong răngrăng dăngwah; ngale ere dikowah wanthe pa mihnyan thenphăng răngrăng dăngwah; ngale ere diwah wanthe pa rangkho wah phoangpukte laa răngrăng dăngwah.

⁸Ahîn ngem wanbeliilat nâng rang wanerokru dăngwah, ngale thin a khoh akhen phangtang nâng mitma doap lahma dăngwah. Rangwo rangnyek lejek thangma thinma sê sekohwah: “Asâ, Asâ, Asâ, pa Teso Joban Adongthôn pa, Henpa ama komin Joban dăngwah, ngale athâng hehmin Joban, erediko ahokmin sanpoat răngrăm Joban.”

⁹Ahîn ngem wanbelii pumma tôngthin kowah roantang roangjêng răngh ahînma tôngte ko toak asân, soangraang, ngale dangkoh a ngatsê selahma soamtô eka. Chenthu thinma erohmoat thuko,

¹⁰roaknii wanbelii khhepho phannang heh tôngthin kowah tôngte mathahko khupjup wah, ngale roantang roangjêng răngh ahînma tôngte ko soamtô wah. Thinma thin khophok heh tôngthin mathahko putphe lahma aroh ngatwah,



¹¹“Ni Teso ngale Ni Joban! Nangma jôba mîndông, toak asân, ngale chaan ahang heh tâchohmin. Chenrăngma ngako, chentôpa Nangma jôba hânwah, ngale Nanghung junko nangma hin ajo thuk eko ngale roandông koh eko.”

Loatkhesok 5

Nyapraangten ngale Saakchha

¹Ngama tângthin kowah tângte dekchahko nyapraangten semlahma khewah; erepa ronghu rongka nâng raanglahma dângwah ngale erepa dumengit nâng pangmiem lahma dângwah.

²Ngale Ngama rangkethung wah Joban ngintatte wathema nyahrăng chaanmông rakthô lahma tatwah, “Henma are pangmiem ekapa janphe lahma are nyapraangten pa tâjân min a?”

³Rohkomin rangkethung nângmin, ngale hahtokkhoh nângmin, erediko hahkhen nângmin are nyapraangten pa jânlahma akhen kowah tâsokte pa henjô aho.

⁴Ngama are nyapraangten pa jânlahma akhen kowah pa tâsokte henjô lekhe dâng phumma Nga nyahrăng sepwah.

⁵Erediko khhepho phannang kowah wathema Nganâng ngatwah, “Neksep, sûtan! Juda jatwah sahdong hinhoo pa, Devit Chha adongthôn pumma lâjientah, ngale atema dumengit pangmiem ekapa jânlahma nyapraangten pa etajân a.”

⁶Erediko Saakchha pa tongthin heh mongtangko cheplahma khewah, ngale ngem wanbelii erediko khhepho phannang heh ate tumlitko dangwah. Saakchha pa ritphe chhoan răngrăng dângwah. Ate ngenâng rong kaengit ngale mit wanengit dângwah, ereheh a Joban Ju wanengit hahtokkhoh phangtang nâng phoang chienchhoan eka heh dangwah.

⁷Saakchha pa wăng lahma tângthin kowah tângte dekchah ngekowah nyapraangten pa thâwângwah.



⁸Atema thâwâng poatko, ahîn ngem wanbelii ngale roaknii wabelii khhepho phannang heh Saakchha mathahko khupjup wah. Thin chentô nâng pupe wanru ngale kemwah hânwah tit wanru dângwah, ere kemwah hânwah titko tum amêngli heh mênchong dângwah, ereheh dangeka Joban mihnyan heh rangsoam pa dângwah.

⁹Thinma sê nyan sêwakwah: “Nangma jôba nyapraangten pa tâtânmin ngale nangma jôba ate pangmiem ekapa jânlohma talaango. Chenrângma ngako nanga ritphe rewah, ngale nangma roandông kohlohma riilohma Joban rângma chentô jat apat, jab ajâ, diak akan, ngale chentô mihnyan nyuchha heh riakkoh wah.

¹⁰Nangma thin a nang Joban nâng soamtô rângma soam aroakte Hahsông râng hân eko, ngale thinma hahtokkhoh pa epên a.”

¹¹Eredikomin Ngama thesûtek pa, Ngama rangkethung wah Joban ngintatte heh hahjat bijat roat akah tatwah! Thin a tângthin ngale ahîn ngem wanbelii, erediko khhepho phannang heh tûmlitko chepwah,

¹²ngale sê nyahrâng raksê wakwah: “Aritphe retah Saakchha ma jôba chaan ahang, ngun akem, buthi mongthem, chaan amân, toak asân, mîndông, ngale rô choh eka!”

¹³Ngale Ngama rangkethung wah chentô Joban ma tem atiak tahheh, hahtokkhoh wah heh, hahkhen wah heh, ngale josi khenwah heh - ngale chentô rangkhen wah ahînte hehma - sêsewak lahma tatwah: “Tângthin kowah tângte ngale Saakchha, nâng lolo jôba, rô, soamtô, mîndông ngale chaan ahangpa, roantang roanjêng râng tongeka!”

¹⁴Ahin ngem wanbelii pumma “Amen!” ngama dânthâng wah, Ngale khhepho phannang heh ate mathahko khupjup lahma atenâng soamtô wah.

Loatkhesok 6

Apângmiem reka heh

¹Erediko Ngama Saakchha ma dumengit pangmiemtah kowah khebeng thôn dum pa jânlahma khewah, ngale Ngama ahîn ngem wanbelii kowah



wantheme rangmok rangphakwah rãngrãng chaanmõangma “Karoo!” ngama roolahma tatwah.

²Ngama ngiaksûtek pa Mokpo khewah. Mokkhoh ko chhangte pumma doakhap semlahma dângwah, ngale atenâng khophok kohwah. Atema jienchoante rãngrãng Mok khohko chhangchhoan lahma ajienrãng chhoanwah.

³Erediko Saakchha ma khediwah nyapraangten pangmiem ekapa jânwah; ngale khedi wah ahîn ngem pumma ngalahma tatwah, “Karoo!”

⁴Ahan Mok wanthe wîenloat katwah, erepa Mokchek dângwah. Ere Mokchek ko chhangte ko hahtokkhoh ko ran angem hôngsietrãng chaan kohwah, epa mihnyan heh thindede ritphemîn rãngkohwah. Atenâng deng dôngmõang kohwah.

⁵Erediko Saakchha ma dângrem wah nyapraangten pangmiem ekapa jânwah; ngale ere ahîn ngem pumma ngalahma tatwah, “Karoo!” phumma Ngama ngiaksûtek pa Moknyek loatka lahma khewah. Ere Moknyek khohwah chhangte pumma ate dekho toak semlahma khewah.

⁶Ngama ahîn ngem wanbelii heh tâwah hôngloat jabkatwah rãngrãng aroh jablahma tatwah, “Jâthe dekbi thãpa ata toakthe, ngale barle toakrem pemin jâthe dekbi thã. Rohkomin, Oliv bãng ngale angurthong pa nekchhihsiet en!”

⁷Erediko Saakchha ma wanbelii kowah nyapraangten pangmiem ekapa jânwah; ngale wanbelii kowah ahîn ngem pumma, “Karoo!” ngama ngat tatwah.

⁸Phumma Ngama ngiaksûtek pa Mok cheksem khewah. Ere Mokkhoh ko chhangte mînpa rit ngale rit amah ngama dângwah erepa ate tokdiko namnam junkhoam lahma dângwah. Thinnâng hahtokkhoh wah thiakbelii kowah thiakthe pa ran angem, rêm achhong, khoanchet, ngale wunwah ngem angah heh junma mahritthuk rãng chaan kohwah.

⁹Erediko Saakchha ma wanbangâ kowah nyapraangten pangmiem tahpa jânlahma khewah. Phumma Ngama Joban nãng joapsoap thin chaam khenko



Joban jabkhab phoangthôdi, ngale thinma khetah toangtang pa phoangthôdi ritphetah mihnyan heh ju heh khewah.

¹⁰Thinma chaanmōang rakwah, “Adongthôan Teso, Asâthôan ngale toangtang thôan! Nangma hahtokkhoh wah ni ritphete mihnyan hehnâng achhih ngalohma thin chêmsietrăng chentô rangwo tongtua?”

¹¹Thin anga nganâng khetpolo kohwah, ngale thinnâng ademin roanche sanpoat bembrăng ngatwah, chenrăngma ngako thin ritphetah răngrăng ademin Teso haa ngale putedâlemte heh malaang ritphe tonga, ngama thôkoh wah.

¹²Ngale Ngama Saakchha ma wanerok kowah nyapraangten pangmiem tahpa jânlahma khewah. Ereko hah pa nyaharang tiidong tiilahma dângwah, ngale san pemin khetnyek răngrăng nyekjâ lahma dângwah, ngale dâ pemin hei răngrăng phangtang chekjâ lahma dângwah.

¹³Ngale chenthu pôngdong pôngma bãngpa heklahma Fugri ahinthu heh rângjâhek a răngrăng Merit hehmin hahtokkhoh ko jâriika rewah.

¹⁴Rang pemin nyapraang nuhâ răngrăng mahjâ eka, ngale chentô hahkong hahla ngale jotung jokep wah hah hehmin thinthe kowah mahjâ eka.

¹⁵Erediko hahtokkhoh wah lowang heh, ngale pête heh, ngale sipâhi adong heh, techhu lowang, ngale hang achaaan mihnyan heh, ngale ahan chentô mihnyan heh, haa, ngale haa ledangte hehmin, hahken ngale hahkong khawah longkapkhen hehnâng huhtong eka.

¹⁶Thinma hahkong hahla ngale longjan hehnâng ngatwah, “Ni khohko jâkahi, tângthin kowah tângte mitkhe kowah ngale Saakchha rinkhahthun kowah mumpetkat hi!

¹⁷Thin nyahrăng cheili rinkhah rangwopa lâhûtha, ngale ere demko hen tâtoatmîn min a?”

Loatkhesok 7

144,000 Isrial Mihnyan heh



¹Arediko Ngama rangkethung wah Joban ngintatte wabelii pa hahtokkhoh sukbelii ko cheplahma sukbelii ngewah hahtokkhoh ko pongwut hûeka pa hahtokkhoh nângmin, erediko josi nângmin ngale chenni bângachhong hehmin nekchenmet eka ngama tângthin lahma khewah.

²Ngale sankat ngewah ahan rangkethung wah Joban ngintattema ahîn Joban mîn tûngthin pa semlahma kalahma wênkhe wah. Joban ma hahtokkhoh ngale josi heh chhihsietrâng chaan kohtah Joban ngintatte wabelii ko chaanmõang rakroowah.

³Ngintatte pumma ngatwah, “Nima Joban haa hehnâng thin khengko Joban mînpa matungtung ekiko nema, hahtokkhoh ngale josi erediko bângachhong heh nekchhihsiet en.”

⁴Ngale khengko Joban min tûngte mihnyan heh 144,000 dângmin ngama thôkoh wah. Thin a echhi jatnii Isrial mihnyan hehwah dângmin,

⁵⁻⁸Chentô jat wah echhi hahjatniiru dângwah: Juda, Riuben, Gad, Asher, Napthali, Manasi, Simion, Livi, Isekar, Zibulun, Josep, ngale Banjamin jat hehwah dângwah.

Lephang Weihtô Loangchhang Dong

⁹Arediko Ngama sûtékpa, loangchhang dôngmõang khewah - ere mihnyan heh henmemin lephangleng roakweihtô dângwah! Thin a chentô mihnyan nyuchha jat apat, diak akan, jab ajâ, hehwah dângwah, ngale thin a khetpo pa kep ngale thin dekko pam bângdek heh semlahma Saakchha tûngthin mathahko cheplahma dângwah.

¹⁰Thinma chaanmõang rakwah: “Nâng Khope pa tûngthin kowah tûngte nâng Joban ngale Saakchha ngewah kaera!”

¹¹Rang-khethung wah Joban ngintatte chentô heh, khhepho phannang heh, ahîn ngem wanbelii heh, tûngthin tumlitko chepwah. Erediko thin dedema tûngthin mathahko then pa hahko kunkat lahma khupjup lahma soamtô wah,



¹²thinma ngatwah, “Amen! Rô, mîndông, buthi mongthem, dangkoh a ngat, toak asân, chaan ahang, ngale chentô chaan ahang pa roantang roangjêng rãng nãng Joban ngenâng tonga ngama ngatwah! Amen!”

¹³Khhepho phannang hehwah wathema Nganâng chhienwah, “Are khetpo kepte mihnyan heh hen a, ngale thin a chenngewah hûera?”

¹⁴Ngama dânthâng wah, “Hethôte, Ngama jetmek, nangma jet ole.” Atema Nganâng ngatwah, “Are mihnyan heh dangeka thinma nyahrãng cheli chêmchoh lahma khope lahma wângte mihnyan heh. Thinma thin khet pa Saakchha heinâng lâposettah.

¹⁵Eroh-wah thinma Joban tângthin mathahko cheplahma atenâng rangwo rangnyek ate rangsoam humko soamtô eka. Tângthin kowah tângte pumma thin demnâng danglahma epesiet a.

¹⁶Thin chenthumin rêm lerii tumin, ngale jolânmin lerii tumin; san memin ngale chenni akhamli mejô thinnâng lekham tumin,

¹⁷chenrãngma ngako tângthin mongtang kowah tângte Saakchha pa thin sokarete dângmin, ngale thinma Saakchha ma roandông chothin jomitko esiethûa. Ngale thinmit wah chentô mitphi heh Joban ma ehutphe koh a.”

Loatkhesok 8

Dumengit Pângmiem

¹Chenthu Saakchha ma dumengit kowah pangmiem ekapa jân phumma rangkethung nãng koantakha rãng kihchepchep dângwah.

²Erediko Ngama Joban mathahko cheplahma rangkethung wah Joban ngintatte waengit khewah, ngale thinnâng poakpopo wanengit kohlahma khewah.

³Ngintatte ahan wathema, kemwah hânwah wenkhuh tûmthhek thin semlahma, kalahma joapsoap thin chaam tâko chepkatwah. Atenâng chentô Joban mihnyan heh rangsoam demko Joban tângthin mathah kowah kemwah



hôn eka joapsoap thin chaamko johtûm thekkohrăng tûmthhekli heh jahmõang kohwah.

⁴Joban mathah kowah chepte rangkhethung wah Joban ngintatte dekwah tûmthhekre eka wenkhuh heh Joban mihnyan heh rangsoam demko rangkho nâng johwâng wah.

⁵Erediko rangkhethung wah Joban ngintatte ma kemwah hônwah wenkhuh tûmthhek thinko Joban nâng joapsoap thin chaam kowah wen toanlahma seklahma hahtokkhoh ko phekatwah. Ephumma hahtokkhoh ko rangmok rangphak, rangdăng khiapda liep, ngale hahtii dângwah.

Poakpopo

⁶Erediko rangkhethung wah Joban ngintatte wanengit pa poakpopo wanengit semlahma rahmetrăng chepwah.

⁷Khebeng wah ngintatte pumma ate poakpopo pa rahmetwah. Phumma mien ngale wen hei demnâng saakmîn lahma rangkhethung wah hahtokkhoh ko jâkatwah. Phumma hahtokkhoh wah thiakrem rângpa wenma khâmwah, ngale bângachhong hehwahmin thiakrem rângpa khâmwah, erediko wunchhong hehmin jemkhâm wah.

⁸Erediko khedi kowah ngintatte pumma ate poakpopo pa rahmetwah. Phumma josiko hahkongdong lele wenma nyahrăng kham lahma lumjâ katwah. Ngale ereko josiko wah thiakrem rângpa heirăng litjâwah,

⁹phumma jokhenwah tôngte heh thiakrem rângpa ritwah, ngale jogari hehmin thiakrem rângpa chhihjâwah.

¹⁰Erediko wanrem kowah ngintatte pumma ate poakpopo pa rahmetwah. Phumma merit dôngmõang wennan rângrăng dôlahma rangkhethung wah phekat lahma thiakremrăng jodongla ngale joanchha hehnâng chatjâwah.

¹¹(Ere merit mînpa “Akhahthôn” ngama dângwah.) Phumma jo hehwah thiakrem rângpa khahjâ rewah, ngale ajahthem mihnyan heh ere jokowah joklahma ritwah, chenrăngma ngako ere jopa akhahrăng litjâwah.



¹²Wanbelii kowah ngintatte pumma ate poakpopo pa rahmetwah. Phumma san, dâ, ngale merit heh thiakrem rãngpa sahtungmîn wah, ephumma thin wenphiak kowah thiakrem rãngpa amahjâ rewah; ngale rangwo kowahmin ngale rangnyek kowahmin thiakrem rãngpa lephiaktu dãngwah..

¹³Erediko Ngama sôtekpa laa rangkho choangnâng pongwutnâng pulahma chaanmõang jab lahma tatwah, “Cheili! cheili! ngale hahtokkhoh wah sôngte mihnyan hehrãngma chenthu ahan ngintatte warem pumma thin poakpopo pa merahmet tahko chentô cheili dãngmin a!”

Loatkhesok 9

¹Erediko wanbangâ kowah ngintatte pumma ate poakpopo pa rahmetwah. Phumma Ngama hahtokkhoh ko merit jâriika lahma khewah, ngale atenâng chenthujô lethôanthin hahkenlu ko jâkatthin sâbi pa kohlahma khewah.

²Phumma merit pumma hahkenlu pa laangwah, ngale erekowah nyahrãng wendong wah khuhwah rãngrãng wenkhuh loatkhuw wãngwah; ngale ere hahkenlu kowah loatkhuw wãngera wenkhuh pumma sanphiak ngale pongwut heh nyekkhuhwah.

³Ngale hahtokkhoh ko wenkhuh kowah kupchhang loatkatwah, ngale thinnâng gusirong chaan rãngrãng chaan kohwah.

⁴Thinnâng hin, bãng, ngale chenni pen awahjô lechhihsiet rãng ngatwah; thinnâng hen mihnyan hehnâng thin khengko Joban mîn tũngmãn ahoa ereheh chêmsiet en ngama chienwah.

⁵Kupchhang hehnâng ere mihnyan heh leritphe thangma jengbangâ rãng chêmsiet en ngama chienwah. Ere kupchhang hehma chêmsiet eka kowah chetpa gusirong ma lekko chetwah rãngrãng.

⁶Ere jengbangâ khenko thinma rit lolo ehun a, eroh komin thinma rit pa lechohlemmin; thinma rit ehun a, rohkomin rit pa thin tâwah huhchhoan rêmin.



⁷Kupchhang heh Mok rannâng katrăng chepwah răngrăng dângwah; thinkhoko kem khophok răngrăng phok rewah, ngale thin thenphăng pa mihnyan thenphăng răngrăng dângwah.

⁸Thin khochoo pa dihiaknyu khochoo răngrăng dângwah, ngale thin pâheh sahdong hinhoo pâ răngrăng dângwah.

⁹Ngale thin thenkhuh pa janwah hôanwah lakkhama tengkhiap wah răngrăng dângwah, ngale thinrang ma linjep ekapa rannâng Mok - jahmông ma mokgarii sietlahma katko rahwah răngrăng dângwah.

¹⁰Thin merako gusirong wah bii răngrăng dângwah, ngale thinma mihnyan hehnâng jengbangâ răng chêmsetthin chaan dângwah.

¹¹Thin khohko pête lowang min dângwah, erepa hahkenlu thôn bente ngintatte pa dângwah. Hibrû jabma ate mînpa Abaddon ngaeka; ngale Griik jabma ate mînpa Apollyon, are ngaeka pa (“Achhihsiette”).

¹²Khebeng cheli thônpa lâthôantah; arediko ahan cheli thôn wannii ehûra.

¹³Erediko wanerok kowah ngintatte pumma ate poakpopo pa rahmetwah. Phumma Ngama Joban mathah wah Joban nâng joapsoap thin kemwah hôaneka chaam kowah sukbelii ngewah rahjabkat lahma tatwah.

¹⁴Ere jabkhab pumma wanerok ngintatte ko ngatwah, “Iufaret jokho kowah ngintatte wanbelii khhekthien eka heh jânpheo!”

¹⁵Ngale ngintatte wanbelii pa jânphewah; are sanpoatko, ere jâko, ngale ere dâjeng kowah ere rangpâ ko thinma mihnyan nyuchha hehwah thiakrem rângpa ritpherăng khhekthien wah.

¹⁶Nganâng ranchep chhoante sipâhi heh châni million ngama thôkoh wah.

¹⁷Ngale Ngama mok le mokkhoh kowah chhangte mihnyan heh thânkewah: thinnâng lakkhapa wenchek răngrăng dangwah, safira răngrăng ahin, erediko sulfar răngrăng amien dângwah. Mok heh khopa sahdong hinhoo kho răngrăng dângwah, ngale thin thunka kowah wen, wenkhuh, ngale sulfar hôngkatwah.



¹⁸Ere khoanchet wanrem pumma hahtokkhoh wah mihnyan heh thiakremrăng ritphewah: wen, wenkhuh, ngale salfar heh mok heh thuka kowah hongkatwah.

¹⁹Chenrăngma ngako mok hehnâng thin chaanpa thunka ngale thinme nâng dângwah. Thinme heh pû răngrăng khowin dângwah, ngale thinma mihnyan hehnâng chêmstetrăng thinme pa kepwah.

²⁰Are khoanchet wanrem pumma lechêmstet dangtah mihnyan nyuchha heh phangtang thindede dekma chenni hôantah a ere hehwah hung ngaklitmah. Thinma joak ajo hehnâng soamtô pa jekmah, ngale lejienkhête, lejientatte, ngale lejienkhoamte, moangachaang, erediko ngun akem, long, bâng.

²¹Ngale thinma mihritphe heh, jâdu lôam, dihiak dela kaamchhih moat, ngale huh aliek hehwahmin hung ngaklitmah.

Loatkhesok 10

Rangkhethung wah Joban Ngintatte ngale Nyapraangten rinchha

¹Eredikomin Ngama rangkhethung wah ahan ngintatte chaanmông wanthe wienka lahma khewah. Atea phoamma doapbuk lahma dângwah ngale ate kho tumlitko chaangchoi dângwah; ate thenphăng pa san răngrăng dângwah, ngale ate da heh wentheli răngrăng dângwah.

²Ate dekko nyapraangten arinchha semlahma dângwah. Ngale ate da dachahpa josikonek, ngale ate da dahitpa bamkonek lahma dângwah,

³ngale sahdong hinhoo hukwah răngrăng chaanmông rakroo lahma tatwah. Atema rakroo diko, rangmok wanengit pumma nyahrăng linlahma dânthâng wah.

⁴Thinma jab rienrien ko Ngama aragrăng chepwah. Rohkomin, Ngama rangkhethung wah jabkat lahma tatwah, “Rangmok wanengit pumma chenni jabtah a ereheh huhthien reo; ereheh nekraangthien!”

⁵Erediko Ngama ngintatte ate dapa joko kathe ngale bamko kathe neklahma chepte pumma ate dek dekchah ngepa rangkhethung nâng laangwênwah



⁶Ngale atema roantang roangjêng rãng hînte, rang ahah hôante, josi hôante, ngale jokhenwah chentô hôante Joban mîngo toamsêm lahma khewah. Ngintatte pumma ngatwah, “Ade phumma ajah lelek tongtumin!”

⁷Phumma chenthu wanengit kowah ngintatte pumma ate poakpopo pa merahmet tahko, Joban ma ate hungnâng chenni themawa tahheh, atema ate haa mông hehnâng thôkotah rãnggrãng phangtang emoa.”

⁸Erediko Ngama rangkethung wah Nganâng jabkat lahma tettek jabkhab pumma Nganâng aroh ngatwah, “Wãng lohma joko kathe ngale bamko kathe neklahma chepte ngintatte dekkowah jânchoan nyapraangten pa thawãngo.”

⁹Phumma Ngama wãnglekma ngintatte ngekowah nyapraangten arinchha pa thâwângwah. Phumma atema Nganâng ngatwah, “Thahang ngale nangma phhek o; arepa nangwok khennâng asi edanga, rohkomin nang thunko arepa nyahti rãnggrãng etua.”

¹⁰Phumma Ngama nyapraangten arinchha pa ate dekkowah thalekma phhekwah, ngale erepa Nga thunko nyahtitu rãnggrãng tuwah. Rohkomin Ngama jokat diko erepa Nga wokkhen nâng asi rãng litdâng katwah.

¹¹Erediko Nganâng thôkoh wah, “Ademin rekthe nangma Joban jabkhab pa chentô diak akan, jat apat, jab ajâ, ngale Lowang hehnâng phoangthô chhoankohmin.”

Loatkhesok 11

Hâkhi Wanii

¹Erediko Nganâng athakthin ke rãnggrãng wanthe kohlahma ngatwah, “Wãnglohma Joban rangsoamhum ngale Joban nâng joapsoap thin chaam pa thakwãngo, ngale rangsoamhum kowah rangsoamte mihnyan hehmin weih o.

²Rohkomin thakho rãngsâ pa nekthak, chenrãngma ngako, erethepa Joban lejette hehnâng lâkohtek, erehehema Asâthôn Hahdaang pa roakbelii jengnii rãng thindama ewoatnek a.



- ³Ngama Nga hâkhi hôante wanii bosta khet kepthuk lekma echienkat ang, ngale thinma Joban nginkongpa 1, 260 rangwo khenko ephoangthôa.”
- ⁴Hâkhi hôante wanii pa Oliv bãng wannii ngale hahtokkhoh wah Teso mathah kowah wentit toakthin wannii pa edanga.
- ⁵Henma komin thinnâng chêmsietrãng mehun ako, thinthunkâ wah wen loatka lahma thinran heh eritkham a; ngale henhenma thin chêmsietrãng huneka ereheh eroh ritphemin.
- ⁶Thinma Joban nginkongpa phoangthô poatko rangpa tânghep lahma rang lepatthuk rãngmin thinnâng chaanwin dângmin. Ngale thinnâng jikhô jatkhô hehmin heirãng litthukrãng chaanwin; ngale thinma chenthu huneka erepoatko hahtokkhoh ko rongrup khoanchet chhieh huthuk lahma chêmsietrãng min chaanwin.
- ⁷Chenthu thinma Joban nginkong phoangthô pa merâ tahko, hahkenlu kowah ngemchhieh pa loatwãng lahma thin demnâng eloatmîn a. Ngale ngemchhieh pumma jien lahma ritphe erea,
- ⁸ngale thin mangpa thin Teso rittektah hahdaangdong lemko echên a. Ere hahdaangdong mînpa Sodom ba Igip ngama edanga.
- ⁹Chentô diak akan, jat apat, jab ajâ, ngale chentô mihnyan nyuchha hehma thinmangko jârem khatherãng esûhûa, ngale thinmangpa leruthuk ethien a.
- ¹⁰Are hâkhi wanii ritjunko hahtokkhoh wah mihnyan heh khuhah nâhah edanga. Thinma kuhhôn lahma wathema wathe nâng hînhô heh elit kohmînwak a, chenrãngma ngako, ere mông wanii pumma chentô mihnyan nyuchha heh khohnâng ajahthem chêmchei pa kephokwah.
- ¹¹Jârem khathe diko thinkhoh nâng Joban wah roandông choththin rek kalahma thinnâng lupkatwah, ngale ephumma thin tôanchepwah; ngale thinnâng khête heh phangtang chei rewah.



¹²Erediko mǒng wanii pumma rangkethung wah jabkhab chaanmǒangma atinii nǎng jabkat lahma tatwah, “Anǎng wǎngrên!” Phumma thinran hehmasokjenjen ko atinii phoam khohma rangkethung nǎng wǎngwah.

¹³Ere sanpoat poatko hah dǒngmǒang tiiwah; phumma thiak echhi rǎng hahdaang heh chhihsiet wah, ngale hahjat engit mihnyan heh ritwah. Ngale mihnyan ahan hehmas chei nungma rangkethung wah Joban dongnǎng rôwakwah.

¹⁴Lôdi kowah cheli thônpa lâthôantah, rohkomin eredi wanrem kowah cheili thônpa sitsiak ehûra!

Poakpopo Wanengit

¹⁵Erediko wanengit kowah ngintatte pumma ate poakpopa rahmetwah, ngale ephumma rangkethung nǎng aroh chaanmǒang rakjab lahma dǎngwah, “Ade phumma rangkhen pênrǎng chaanpa nǎng Teso ngale ate Misaia niinǎng tonga, ngale atema roantang roangjêng rǎng epên a!”

¹⁶Erediko ate tǒngthin mathah kowah tǒngte roaknii wabelii khhepho phannang hehmas thindede thhenpa hahko khupjup katlahma Joban nǎng soamtô wah,

¹⁷thinma ngatwah, “Teso Joban Adongthôn, Henpa athǎng hehmin Joban, ngale Henpa khema komin Joban dǎngwah! Nima nangnǎng dangkoh a ngaeki, chenrǎngma ngako nangma nangchaan adongthônpa kepeko ngale nangma pên eko!

¹⁸Phumma Joban lejette mihnyan heh nyahrǎng rinkhah wah, chenrǎngma ngako nekhurinkhah sanpoat pa hûera, ngale ritte heh rên sanpoat pa hûera. Ngale nanghaa mǒng hehnǎng, ngale nangran cheichei dǎngte mihnyan chentô nǎng, adong arin lenga khoakthe ko kaamsen moatthǎ koh sanpoat pa hûera. Ngale henhenma hahtokkhoh pa chhihsiet eka, ereheh chhihsiet sanpoat pa hûera!”



¹⁹Rangkhethung wah Joban rangsoam humpa laangwah, ngale Toamsem bâkot pa eretheko khewênwah. Erediko rangmok rangphak, ngale rangdâng khiapda liap dângwah, ngale hahtii erediko miendong jâlahma dângwah.

Loatkhesok 12

Dihiaknyu ngale Tewa wah Pûchhih

¹Erediko rangnâng nyahrâng adong ngale nyahrâng patritli hôngwah. Dihiaknyu wathema ate khet akhurâng san pa kep rewah, ngale ate dakhen ko dâ pa namnek, erediko ate khoko merit echhi wannii pa phok relahma hôngwah.

²Dihiaknyu pa naa chhanemnem dângwah, ngale naachhat râng wokchhâ eka junko ate seplahma dângwah.

³Eredikomin ahan patritli rangkho nâng wîenhông wah. Tewa wah Pûchhih cheksoaksoak wanthe atenâng kho phangengit ngale rong kaechhi ngale ate kho chentô nâng khaphok phok lahma hôngwah.

⁴Ate me pumma rangkho wah merit heh thiakremrâng jâsiet lahma hahtokkhoh nâng phekatwah. Ngale atea dihiaknyu pumma naa jâchhatkat rienrien lemlienma naapa loatphhekrâng ngama dihiaknyu mathahko chep eka.

⁵Erediko dihiaknyu pumma delachha chhatwah, ngale ere delachha pumma chentô diak akan heh janke semlahma epên a. Rohkomin naachha pa nyenchhoan lahma Joban ngale ate tângthin nâng wênkohwah.

⁶Dihiaknyu pa Joban ma aterâng khoakhem kotah sehah nâng huhchhoan wângeka, ngale eretheko dihiaknyu pa 1, 260 rangwo khoakhem lahma ethien a.

⁷Erediko rangkhethung nâng ranloatmîn wah. Mikel le ate ngintatte heh tewa wah Pûchhih demko loatmîn wah, ngale pûchhih pummemin ate ngintatte heh demnâng roamlahma ngakloatmîn wah;



⁸phumma pûchhih pa jienrit wah, ngale ate erediko ate ngintatte heh rangkethung nâng letongthuk tûwah.

⁹Pûchhih dôngmõang pa petphekat rewah-rangbeng hahbeng wah pû, ate mînpa Juchhih ba joak ngama dângwah, atema hahtokkhoh phangtang diapphhek chhahwah. Ate demko ate ngintatte heh aroamma hahtokkhoh nâng petphekat wah.

¹⁰Erediko Ngama rangkethung nâng chaanmõang rakjab lahma tatwah, “Athângheh Joban ngewah khope pa lâkatha! Athângheh Joban ma ate chaanpa Lowang danglahma khesok eka! Athângheh ate Misaia pumma ate chaanpa khesok eka! Chenrãngma ngako nâng Joban mathahko cheplahma rangwo rangnyek Joban nâng putedâlemte mihnyan hehnâng sekhamte pa rangkethung wah petphetah.

¹¹Thinma pûchhih pa Saakchha hei ngale thinma phoangthôtah toangtang ngin; ngale thinma thin roandông kohlahma ritranmin lechei danglahma jienwah.

¹²Ngale erohwah rangkethung erediko rangkethung wah sôngtôngte chentô heh khuhah nâhah dangen! Rohkomin hahtokkhoh ngale josi hehrãngma chentô chhih dângmin a! Chenrãngma ngako juchhih pa jâkaera, ngale atea nyahrãng rinkhah punpun danglahma jâkaera, chenrãngma ngako, atema ajet ate mahrãng sanpoat pa ajah ahotu.”

¹³Chenthu pûchhih pumma nga rangkethung wah lâpetphe thang ngama lepjet lahma, atema delachha chhatte dihiaknyu dijûn wah.

¹⁴Ate rãng khoakhem koheka sehahko pukwâng rãng dihiaknyu ko laadong rang kani kohwah, ngale eretheko atea pârem khathe pûchhih kowah pesiet lahma sokare min.

¹⁵Ngale erediko pûchhih pumma ate thunkâ wah dihiaknyu diko dihiaknyu pa chenphophea ngama jo dôngmõang hôngphat wênwah.

¹⁶Rohkomin hah ma dihiaknyuko chohsok wah; hah pumma ate thunka lahma pûchhih thunwah phatphetah jodong pa rupjokwah.



¹⁷Ngale Pûchhih pa dihiaknyu demko nyahrăng rinkhah lahma ate chhuchha ahan Joban nginkepte mihnyan ngale Jisu ma loatkhesoktah hehnâng senthemthem putedâlemte mihnyan heh demnâng loatmîn chhoanwah.

¹⁸Ngale pûchhih pa jophako chep wah.

Loatkhesok 13

Ngemchhih Wannii

¹Erediko Ngama ngemchhih pa josi wah loatwăng lahma khewah. Ere ngemchhih ko rong kaechhi ngale kho phangengit dăngwah; ate rong chentô nâng khophokwin dăngwah, ngale ate kho chentô nâng Joban nâng dummek lahma mînraangwin dăngwah

²Ngemchhih pa rusah răngrăng dăngwah, ngale dapa sepba da răngrăng dăngwah, ngale thunpa sahdong hinhoo thun răngrăng dăngwah. Pûchhih pumma ngemchhih ko ate chaan, ate tôngthin, ngale ate chaan ahang heh phangtang kohwah.

³Ngemchhih kowah khophang wanthe pa nyahrăng maksakdong chohlahma chetwawa buhritwah răngrăng dăngwah, rohkomin mămăn pa mechoan dăngwah. Phumma hahtokkhoh phangtang nyahrăng barii lahma ngemchhih diko junkhoam wah.

⁴Anga ngama pûchhih ko soamtô wah, chenrăngma ngako, atema ate chaanpa ngemchhih hehnâng kohwah. Thinma ngemchhih hehnângmin soamtô lahma ngatwah, “Ngemchhih răngrăng hen tonga? ngale ate demnâng hen tâloatmîn min a?”

⁵Ngemchhih ko nyahrăng ngam poapoa Joban nâng dummek thăsê jabkhab heh jabthukwah. Ngale eroh pa atenâng roakbelii jengnii răng dăngthukwah.

⁶Atema Joban nâng tem athoak, Joban mînko tem athoak, ngale Joban sôngthin the, erediko rangkethung nâng chentô tongeka ereheh nângmin tēm athoak wah.



⁷Atenâng Joban mihnyan heh demnâng loatmîn lahma Joban mihnyan heh jienrãng chaan kohwah, ngale atenâng chentô jat apat, diak akan, ngale jab ajâ, ngale chentô mihnyan nyuchha heh khohko pênrãng chaan kohwah.

⁸Hahtokkhoh wah sôngte chentô mihnyan hehma atenâng esoam a, rohkomin rang ahah hân mama henhen mînpa ahîn titab nâng raangthientah a, ngale henhen pa ritphe retah Saakchha rãng dângtea erehehma loloba lesam edanga.

⁹“Erohwhah nenâng nâ metong hênko tat en!

¹⁰Henhen loatritmin a, ereheh metkep eloriia; Ngale henhen dengnâng ritdoak ritmin a, ereheh metkep dengnâng erit doakriia. Arepa Joban mihnyan hehma tadô letma Joban nâng senthemthem putedâlem rãng thôkoh eka.”

¹¹Eredikomin Ngama ahan ngemchhih wênkhe wah, erepa hahkhen wah hongwãng lahma khewah. Atenâng saakchha rong rângrãng rong kani dângwah, ngale atema pûchhih jablele jabwah.

¹²Atema khebwah ngemchhih chaan ahang dong heh phangtang kepwah. Atema hahtokkhoh ngale hahtokkhoh wah sôngtôngte mihnyan chentô hehnâng khebwah mâ mechoan ngemchhih ko soamtô rãng metloatwah.

¹³Are khedi kowah ngemchhih pumma patritli moatlem heh nyahrãng dôngmông moatwah; atema anga nga mitkheko rangkethung wah hahtokkhoh ko wen jâsietkat lahma khesokwah.

¹⁴Ngale atenâng khebwah ngemchhih mathahko patritli moatlem mothuk eka heh junko hahtokkhoh wah sôngte mihnyan heh phangtang diapchhahwah. Ngemchhih pumma thinnâng khebwah dengma doakchoan ngemchhih rohkomin ahîn ere ngemchhih ko soamrãng ate moang hânrãng chienwah.

¹⁵Khedi kowah ngemchhih ko ama wah ngemchhih moangko rekma metlahma hînmet rãng chaan kohwah, ephumma ere moang pumma jab



jienjabwah, ngale henhenma atenâng lesoam letôtea ere mihnyan heh phangtang ritphe rewah.

¹⁶Ngemchhih pumma chentô mihnyan hehnâng, adong arin, techhu tangchhih, haa ngale haa ledangte, chentô nâng thin dekchah ngeko eroh ledang kako thin khengko ngemchhih mîn tûngrâng chienwah.

¹⁷Hennâng ere mînpa aho dangeka erehehema ariakmin chenjô leta chohriimin, ngale asengmin leta sengmin, ere mînpa dangeka, ngemchhih mînpa dângmin, ba atemîn thiakpa nemboat dângmin.

¹⁸Erepa jetloatrâng nângnâng Joban buthi mongthemwin dângmin. Henhen nâng Joban buthi mongthem tongeka erehehema ere ngemchhih nemboat pa eta jetloa, chenrângma ngako ere nemboat pa mihnyan mîn thiakpa edanga. Ere namboat pa 666 dângmin.

Loatkhesok 14

Saakchha ngale Ate Mihnyan heh

¹Erediko Ngama sutek pa, Zion hahhoko Saakchha cheplahma khewah; ate demko 144,000 mihnyan hehnâng atemîn ngale ate Wa mînpa thin khengko raang lahma khewah.

²Ngale Ngama rangkhethung wah jabkhab longchhak wah jo jâjen katko rahwah rângrâng, ngale rangmok rângrâng jablahma tatwah. Erepa pii anong jientêmtê hehema têmwah rângrâng harps rahtem lahma tatwah.

³Are 144,000 mihnyan heh Joban Tôngthin mathahko, ngale ahîn ngem wanbelii, erediko khhepho phannang heh mathahko chepwah; ngale thinma sênyan sêwakwah, ere sêpa thinma loloba tahe eka. Chentô mihnyan nyuchha wah thinlolo ba Joban ma pesietwah.

⁴Ere mihnyan heh thin dedema dihiaknyu heh demnâng kaamchhih lethatmo sâpoangpoang dângte heh dângwah; thin a dihiak dela ngenâng asâjû dângwah. Thinma Saakchha pa chenngê nâng dangeka ere ngeko junchhoante dângwah. Thin a hahtokkhoh wah chentô mihnyan nyuchha jat



hehwah khopesietwah, ngale thin jôba Joban ngale Saakchha nâng joapsoapte rãng khebeng thôn dangwah.

⁵Thinma chenthumin mothô khoanglep lethôwah; ngale thinnâng chenjô achhih aho.

Joban Ngintatte Warem

⁶Erediko Ngama ahan ngintatte rangkho choangwah pongwut nâng, hahtokkhoh wah mihnyan hehnâng, chentô jat apat, jab ajâ, ngale diak akan hehnâng roantang roanjêng lethôan Nginkongsen phoangthô kohrãng phoangpu lahma khewah.

⁷Atema chaanmõang raklahma ngatwah, “Joban nâng toak asân en, ngale ate adongthôanpa rãngthô en! Chenrãngma ngako atema chentô mihnyan nyuchha heh khope rên sanpoat pa lâhûtha. Rangkhethung le hahtokkhoh erediko josi le chentô jokhô jatkhô hôante nâng soamtô en!”

⁸Khebeng wah ngintatte ma jabdiko dithong wah ngintatte pumma wienjabwah, “Dihiaknyu pa lâjâriitah! Adongthôan Babilon pa lârunjâtah! Dihiaknyu pumma chentô mihnyan hehnâng ate ngewah khem ma lâmok jokthuktah - ere khem ngaeka pa dihiaknyu ma ate demnâng kaamchhih mothuktah ko ngaeka!”

⁹Khema wah ngintatte wannii diwah wanrem kowah ngintatte pumma chaanmõang raklahma wienngat wah, “Henhen ngemchhih ngale ate mõangnâng soam atôtea, erediko ngemchhih mînpa thin khengko ba thin dekko tungtea ereheh

¹⁰thindede ma Joban khem ejok a, ere khem ngaeka pa Joban rinkhah nâng ngaeka, ngale bâti nâng khem kienwah rãngrãng Joban ma ate rinkhah pa chaanhôan lahma chõngchõng kienlahma thinnâng ejokthuk a! Ngale ereheh phangtang Asâthôan ngintatte ngale Saakchha mathahko wen ngale salfar nâng ekhamriiwak a.

¹¹Thinnâng kham eka wen kowah wenkhuh pa roantang roanjêng ekhuh a. Henhenma ngemchhih ngale ate moangnâng soamtô eka erehehma rangwo



rangnyek roantang chêm echoh a, ngale atemîn tûngte mihnyan hehmemin eroh chêm echohwak a.”

¹²Arepa Joban mihnyan ngale Joban hôkum kepte erediko Jisu nâng senthemthem putedâlemte mihnyan hehma tâdôrâng dangeka.

¹³Erediko Ngama rangkethung wah jabkhab jabkat lahma tatwah, “Arepa raango: Henhen athâng hehma Teso moatlem molahma riieka ere mihnyan heh rangkepte dângmin!” “Arepa linlin!” ngama Juma dânthâng wah. “Thinma moatlem chaanmo lahma chêmteh kowah khuhah nâhah eboantong wak a, chenrângma ngako, thinma moatlemsen motah heh thin demnâng rangkethung nâng ejohwãnga.”

Hahtokkhoh kowah Chhah Munchoan heh Khôankhen

¹⁴Erediko Ngama sutek pa Ngama phoampo khewah, ngale phoam khohko mihnyan rângrâng ate khoko kem khophok pa phok ngale ate dekho mitchha nahmõang semlahma tonglahma khewah.

¹⁵Erediko ngintatte ahan wathe rangsoamhum kowah loatka lahma phoam khohko tûngte ko chaanmõang rakkatwah, “Nang mitchha pa semlohma chhah munchoan heh khôankhen o, chenrângma ngako, sanpoat pa lâhûtha; hahtokkhoh pa khôankhen râng lâmuntah!”

¹⁶Erediko phoamkhoh wah tûngte pumma ate mitchha pa hahtokkhoh ko khenkatwah, ngale hahtokkhoh wah mun eka heh khôankhen wah.

¹⁷Eredikomin Ngama ahan ngintatte wathe rangkethung wah rangsoamhum kowah loatka lahma khewah, ngale ate nângmin mitchha nahmõang dângwah.

¹⁸Erediko ahan ngintatte wathe, atea wen bemte pa Joban nâng joapsoap thin chaam kowah loatkatwah. Atema mitchha nahmõang sêmte ngintatte ko chaanmõang rakkatwah, “Nang mitchha pumma hahtokkhoh wah angurbâng kowah anguri heh khen o, chenrângma ngako anguri heh lâchumtah!”

¹⁹Ephumma ngintatte pumma ate mitchha pa hahtokkhoh ko khenkat lahma angurbâng hehwah anguri heh khôankhen wah, ngale khemkoakthin koanko



anguri heh rãngdikat arãngrãng Joban nyahrãng rinkhah thunko phekat o ngama ngatwah.

²⁰Angurri heh hahdaang kowah panlien nãng khemkoakthin koanko khihlitwah, ngale khemkoakthin koan kowah hei hôngjênwah, ngale ere heipa jodongma lumwah rãngrãng chãni meejeŋg ngale phut bangâ alu danglahma jênwah.

Loatkhesok 15

Ngintatte ngale Athôanwah Khoanchet

¹Erediko Ngama rangkhethung nãng nyahrãng patritli dõngmõang hong lahma wienkhe wah. Rangkhethung wah Joban ngintatte wanengit ngenâng khoanchet chhih wanengit dãngwah, ereheh athôan akârãng hôngwah, chenrãngma ngako, erepa Joban ma ate rinkhah pa athôan rãng loatsiet eka.

²Erediko Ngama sîsa josi rãngrãng wen demnâng roamlahma khewah. Ngale ngemchhih erediko ngemchhih moangnâng soam atôte, ngale ngemchhih nemboat tũngte mihnyan heh henhenma jientah a ere mihnyan heh khewah. Thin a sîsa josi kêko chepwah, ngale thin dekko Joban ma kohtah harps pupa pa sem rewakwah

³ngale thinma Mosa sêpase, Joban haa sêpase ngale Saakchha sêpase rewakwah: “Teso Joban Adongthôan, nangma motoh moatlem heh chentô dõnga ngale chentôsên a! diak akan wah Lowang hehma, nang lemkhô pa chentô apun ngale toangtang lemkhôa ngama ngawak eka!

⁴Nangran hen lechi dãngmin a, Teso? ngale henma nangmîn adongthôan pa lerãngthô tâdãngmin a? Nanglolo jôba Asâthôan. Chentô diak akan heh hûlahma nangnâng esoam etô hûho, chenrãngma ngako, nangma toangtang moatlem moeko pa anga ngama lâkhetah.”

⁵Erediko Ngama rangkhethung wah Rangsoamhum pa laang lahma khewênwah, ngale erekhenko Rangsoam the Asâthôan pemin dãngwah.



⁶Erediko rangsoamhum khen wah khoanchet chhih wanengit sênte ngintatte wanengit pa khetpo pa nyahrãng phiakjaja kep ngale thin thhenkhuh ko kemwah hôanwah khetchhem pa chhem lahma loatkatwah.

⁷Erediko ahîn ngem wanbelii kowah wanthema ngintatte wanengit ko roantang roanjêng ahînma tôngte Joban rinkhah pa kemwah hôanwah tit wanengit nâng mênchong kienlahma chohkoh wah.

⁸Rangsoam humpa Joban phiak ngale chaan kowah hongeka wenkhuh pumma menkhuh lahma dângwah, ngale ere rangsoamhum khenko ngintatte wanengit pumma kephûtha khoanchet chhih pa mathôan thôanko henjô leta lupwãngmin ngama dângwah.

Loatkhesok 16

Joban Rinkhah Khôanthien Tit

¹Erediko Ngama rangsoamhum kowah ngintatte wanengit ko chaanmõang jabkat lahma tatwah: “Kaletma Joban rinkhah khôanthien eka tit phangengit pa hah hahtokkhoh ko dikat en!”

²Khebengthôan kowah ngintatte ma kalahma ate ngewah tit pa hahtokkhoh ko dîkatwah. Ephumma henhen ngenâng ngemchhih mînpa tungeka ngale henhenma ate mõang ko soamtô eka ereheh nâng nyahrãng cheili chhâwawa mâchhih hôngmâwah.

³Erediko khedi kowah ngintatte pumma ate ngewah tit pa josiko dîkatwah. Ephumma jopa mihnyan ritte hei rãngrãng dângwah, ngale josi kowah chentô ahînte heh ritwah.

⁴Erediko wanrem kowah ngintatte pumma ate ngewah tit pa chentô jikhô jatkhô hehnâng dîkatwah, ngale erehehmin heirãng litjâwah.

⁵Phumma Ngama jikhô jatkhô sok arête ngintatte pumma jablahma tatwah, “Nangma are moeko pa toangtang moeko, O Asâthôan, henpa athâng hehmin, ngale henpa khema komin Joban dângwah a erepa nang jôba!



⁶Thinma Joban mihnyan ngale Mõng heh hei hôngsietwah, erohwah nenâng ere mihnyan heh hei pa jokthuk eka. Thinma chenni motah a ere thãpa jôba chohwak eka!”

⁷Erediko Ngama Joban nâng joapsoap thin chaam kowah jabkhab hongjab lahma tatwah, “Teso Joban Adongthôn! Nang moatlem pa linlin toangtang ngale apun moeko!”

⁸Erediko wanbelii kowah ngintatte pumma ate ngewah tit pa sannâng dîkatwah, ephumma san pa nyahrãng cheili chaanhong lahma ere sanchaan pumma mihnyan heh ritsahwah.

⁹Thinnâng san pa nyahrãng chaanhong lahma nyahrãng chaansah phumma thinma are sanchaan hongeka pa tâjeksiette Joban nâng tem athoak rewah. Rohkomin thinma papwah hungngaklit lahma Joban dong ngale ate chaanpa rãngthô wakmah.

¹⁰Erediko wanbangâ kowah ngintatte pumma ate ngewah rinkhah tit pa ngemchhiih tângthinko dîkatwah. Ephumma ngemchhiih ma pên eka hahsông phangtang nâng rangnyek dângwah, ngale mihnyan hehma thinnâng chet junko thin theli ko kakrii rewah,

¹¹ngale thinma thinnâng nyahrãng chet ngale mâ achâ junko rangkhethung wah tângte Joban nâng têm athoak wah. Rohkomin thin moatlem chhiih hehwah hung ngaklit mah.

¹²Erediko wanerok kowah ngintatte pumma ate ngewah tit pa Iufaret jodongko dîkatwah. Ephumma sankat ngewah kaera Lowang rãng lemhôn kohrãng jopa rupjâ rewah.

¹³Erediko Ngama juchhiih wanrem luk rãngrãng khewah. Ere wanrem pa pûchhiih, ngemchhiih, ngale mõngmõang heh thunka kowah loatkatwah.

¹⁴Ereheh a patritli moatlem moatte joak ajo heh ju. Are ju wanrem pa hahtokkhoh wah chentô Lowang heh tânâng chhoan lahma Joban Dongthôn Rangwo jâko aroamma danglahma loatmîn rãng khôansiet mînwah.



¹⁵“Tattan en! Nga a ahunte hok rãngrãng ekarâng! Henhen lejuplek thangma met hinhin tonglahma ate khet akhu heh khoakhem lahma thieneka ereheh ba rangkepte dângmin, ngale thin a nok atang heh mathahko boangloangma lephoang khoammin ngale rêê lechohmin!”

¹⁶Erediko ju hehma Lowang heh Hibrû jabma Armagedon ngaeka theko khôansiet hokwah.

¹⁷Erediko wanengit kowah ngintatte pumma ate ngewah tit pa pongwut nâng dîkatwah. Ephumma rangkethung wah rangsoamhum kowah tângthin kowah aroh hongjab lahma tatwah, “Arepa lâta dangtah!”

¹⁸Ephumma rangmok rangphak, ngale rangdeng khiapda liap, ngale nyahrâng cheli hahtii dângwah. Arerãngrãng hahtii pa mihnyan nyuchha hôantah wahjô mathattii dângwah; chentô noma are hahtii pa achhihthôn pa dângwah!

¹⁹Hahdaang dongthôn pa kharemãng khâjâwah, ngale chentô diak akan hehwah hahdaang heh chhihjà rewah. Joban ma Babilon dongthôn ko ate rinkhah bâti kowah ate rinkhah khem jokthuk tahpa thonghun rewah - erepa Ate nyahrâng rinkhah khem.

²⁰Jotung wah hah chentô heh mahjà rewah, ngale chentô hahkong hahla heh mahjà rewah.

²¹Miendong pajâ rewah, mien wanthe pajô toak bangâ lih rangkho wah mihnyan heh khohnâng jâkatwah, ngale mihnyan hehma miendong jâkatdi Joban nâng tem athoak rewah, chenrângma ngako ere mienjâ ekapa nyahrâng cheili dângwah.

Loatkhesok 17

Anga ngama Ajet Phoang Sângte Dihiaknyu

¹Erediko tit wanengit sênte ngintatte wanengit kowah Ngatânâng wathe kalahma ngatwah, “Wãngro, ngale Ngama nangnâng anga ngama ajet phoang sêngte dihiaknyu pa chenroh chêmsietmin a erepa khesok e, ere hahdaangdong pa jo jahmông kênâng hôaneka.



²Hahtokkhoh wah Lowang hehma ate demnâng kaamchhih moeka, ngale hahtokkhoh wah mihnyan heh ate demnâng kaamchhih moat pumma khemjok lahma mokwah rãngrãng moeka.”

³Jupa Nga demnâng danglahma ngintattema Nga a sehakhoh nâng pêwênwah. Ereko Ngama dihiaknyu wathe ngemchhih chek khohko chhang lahma khewah, ngale ere ngemchhih chek phoang phangtang nâng Joban nâng jôjêm dûmmek mînchhih heh raanglahma dângwah; ere ngemchhih ngeko kho phangengit ngale rong kaechhi dângwah.

⁴Dihiaknyu pa khet hin ngale khetcheksak keplahma dângwah, kem erediko thãchaan long, ngale lit hehma soangraangrii lahma dângwah. Ate dakko kemwah hânwah koapnâng atema kaamchhih ngale moatlem chin motah heh mênchong semlahma dângwah.

⁵Ate khengko mihhehma lejetlimîn raanglahma dângwah, ere raang ekapa: “Babilon adongthôn, nanga chentô dihiaknyu phoangseng lahma kaamchhih moatte nyong, ngale hahtokkhoh chhihsiette nyong” ngama raanglahma dângwah.

⁶Ngale dihiaknyu pa Joban mihnyan heh hei ngale Jisu nginkepkep dângte mihnyan ritphetah heh hei pa joklahma hei pumma moklahma khewah. Chenthu Ngama ate kheko, nyahrãng bârit rewah.

⁷Phumma ngintatte pumma Nganâng, “Chenni rãng barri ekoa?” ngama thõngphã wah. “Ngama nangnâng mihhehma lejetthin dihiaknyu ngale ate chhangeka kho phangengit ngale rong kaechhi ngemchhih mînpa thõkoh e.

⁸Ngemchhih pa poattheko ahîn dângwah, rohkomin ade phumma ahîn dangtumah; erepa chenthujô lethôanthin hahkenlu kowah loatwâng lâthângtah, ngale atea amahjã erea. Hahtokkhoh wah sõngte mihnyan henhen mînpa rang ahah hân mama ahîn titab nâng leraangthien dangtah a ere mihnyan hehma ngemchhih pa khelahma bârit erea. Arepa poattheko ahîn dângwah; phumma athângheh ahîn dangtumah, rohkomin erepa ngakhong eka.



⁹“Arepa jetloatrãng Joban buthi mongthem win dângmin. Kho phangengit pa hahkong wanengit nâng ngaeka, ngale ere khohko dihiaknyu pa tongeka. Ngale ereko Lowang wanengit pemin tongeka:

¹⁰Erekowah Lowang wabangâ pa lâjâriitah, athângheh a wathe loloma pêneka, ngale ahan wathepa mahûera; chenthu ate mehû theko atema poatthechha loloba epên a.

¹¹Ngale ngemchhih poatthe ahîn dângwah rohkomin athângheh a ahîn dangtumah, erepa Lowang wanesat rãng edanga, ngale atea Lowang wanengit kowah wathe dângwah ngale atea amahjâ erea.

¹²“Nangma rong kaechhi khe ekopa Lowang waechhi, ngale thinma athângheh mapên eka, rohkomin thinnâng ngemchhih demko danglahma Lowang rãngrãng koanta theru epênthuk a.

¹³Are Lowang waechhi latma mănthe tuta emoa, ngale thinma thin chaan ahang heh ngemchhih ko koheka.

¹⁴Thin Saakchha demnâng eloatmîn a; rohkomin Saakchha pumma atema aren reka mihnyan, ngale senthemthem putedâlem lahma ate dijunte mihnyan heh demnâng roamlahma thinma ejien a, chenrãngma ngako, atea teso hehwahmin Teso dongthôn, ngale lowang hehwah min Lowang dongthôn.”

¹⁵Ngintatte pumma Nganâng ngatwah, “Nangma dihiaknyu phoang sengte tonglahma kheko jo pa chentô diak akan heh, mihnyan nyuchha, jat apat, ngale chentô jab ajâ heh.

¹⁶Nangma rong kaechhi khe ekole ngemchhih pumma phoang sengte dihiaknyu ko chhihchoh erea; thinma dihiaknyu ngekowah chentôpa toanchhoan lahma dihiaknyu pa boangloangma ephethien a; thinma dihiaknyu ngem pa phhek erea ngale thinma atea wennâng erokphea.

¹⁷Chen-rãngma ngako, Joban ma thinhung nâng ate moatlem moatrãng chaan koheka, ngale Joban jabkhab pa toangtang madang dangka thinma jutlahma thin chaan heh ngemchhih nâng kohthuk lahma ngemchhih ko pênthuk eka.



¹⁸“Nangma khe eko dihiaknyu pa hahdaang dongthôn pa ngale atea hahtokkhoh wah Lowang heh khoko pête pa.”

Loatkhesok 18

Babilon Mahjâ

¹Are dikomin Ngama ahan ngintatte wanthe rangkethung wah kalahma khewah. Ate ngenâng chaan ahang dong dângwah, ngale atea nyahrâng phiak lahma hahtokkhoh phangtang phiakjaja phiaksiet wah.

²Atema chaanmõang rakwah: “Ate lâmah jâtah! Babilon dongthônpa lâmah jâtah! Athângheh atea joak ajo ngale juchhih heh ma sôngtông thin therâng hôaneka; ngale jatrup wongek ngale chinnyali wo heh atenâng songeka.

³Ngale chentô diak akan heh ma ate ngewah khem kowah mokjok eka - ere khem pa ate dihiak dela tungwah kaamchhih moatpa. Hahtokkhoh wah Lowang heh ma ate demnâng kaamchhih moeka, ngale hahtokkhoh wah phin athã lehte mihnyan heh min ate demnâng dâng junko nyahrâng techhu dangeka.”

⁴Eredikomin Ngama ahan jabkhab rangkethung wah jablahma tatwah, “Nga mihnyan heh loatkarên! Ate khenwah loatkarên! Nea ate ngewah pap demko nekjohroam en; Ngale atenâng hokmin chêmchei ko ne nekjohroam en!

⁵Chenrângma ngako, ate pap heh rangnâng lanlep wãngroh lâchong motah, ngale atema kaamchhih moeka heh Joban ma thonghun eka.

⁶Atema nangnâng chenroh hôanjôantho ererãngrãng nangmemin atenâng hôanjôan o; atema chenni motah a erethã atenâng depnii rãng ajah ngakkoh o. Atema nangrãng khoakhem kohtho khem noma nangma aterãng dumnii khemchaan khoakhem koh.

⁷Atenâng ajahthem chêmchei ngale hungchhih ramjôang koh o chenrângma ngako, atea nyahrâng chhu alu ngale chenni nãngmin lesekmah dângwah. Chengrãngma ngako atema atedede nãng ngariieka: ‘Nga a ako Wangcha rãngrãng tongekang! Nga a janthoinyu dangmek, Ngama chenthumin hungchhih ramjôang lejetmin’



⁸Erohwah jâthelemma atenâng chêmchei ehûa- khoanchet, hungchhih ramjôang, ngale rêm achhong ehûa. Ngale atea wenma ejemkham a, chenrăngma ngako atenâng achhih ngama ngatte Teso Joban pa achaanthôan.”

⁹Ate demnâng kaamchhih moatte ngale atenâng phetwânte hahtokkhoh wah lowang hehma chenthu ate jemkham wendô kowah wenkhuh heh makhetah ko hahtokkhoh wah lowang heh sep erea.

¹⁰Thin a ate demnâng johchêm rancheima taangmõang nâng chepwak eka. Thinma ngaeka, “Chentô cheilia! Ngale chentô patritlia! Atôdong ngale chaan Babilon hahdaangdong pa! koanta theko nangma chêmsiet eko!”

¹¹Hahtokkhoh wah phin athã lehte mihnyan hehmin ate răngma sepjoang eka, chenrăngma ngako thin ngewah chhahkhem heh henmemin ritumah;

¹²thin ngewah kem hehmin henmejô ritumah, erediko janlin hehmin, ngale long thãchaan jat hehmin ngale lit awen hehmin henmejô ritumah; thin ngewah khetpo khet hin, chaakri, ngale khetcek khetnyek hehmin henmejô ritumah; chentô thãchaanjat bãng, ngale poakpâ wah hânwah chhahkhem hehmin, erediko thãchaan bãng heh, janlin heh, ngale chentô jit ajakli long hehmin henmejô ritumah;

¹³ngale thin ngewah Sinamon, Tientumli, wennâng tûmthhekli, mirh, ngale Frankinsen hehmin henmejô ritumah; Khem ngale tien, Ata, ngale chhah, Lee amân, saak heh, mok ngale mok garii, hu ahaa, ngale mihnyan nyuchha hehmin thin ngewah henmejô ritumah.

¹⁴Phin athã lehte hehma atenâng ngaeka, “Nangma chentô asenli chhahkhem kep chihuntoh heh thônmah jâtah, ngale nangngun akem, ngale chentô jit ajakli hehmin ahotu, ngale ereheh nangma chenthumin tangak chohtumoh!”

¹⁵Ere hahdaang kowah phin athãleh kaam molahma techhu dângte mihnyan hehmin hahtaang nâng chepwah, chenrăngma ngako thinmin ate demnâng johchêm ranchei rewak eka. Thin sep ajoang erea,



¹⁶ngale thinma enga a, “Chentô cheilia! Ere hahdaangdong rãngma chentô cheili dângmin a! Atema khetsen khusen, khetchek khuchek ngale khet hin heh chîkepwah, erediko atema kem, thãchaan long, ngale lit awen heh keplahma chidângwah!

¹⁷Ngale koanta theko are chentô ate thiak aman heh phangtang ahotu!” Ngale chentô jogari wah sahhabdong heh, jogari kowah chhangte mihnyan heh, ngale jogari repte heh, ngale thin roandôngko jowah moatphhek chhahte mihnyan hehmin ataangnâng chepwah,

¹⁸ngale thinma ate jemkhâm wendô kowah wenkhuh heh khuhwâng khelahma asepe wah: “Are hahdaang rãnggrãng hahdaang ahan mathat hong dângwah!”

¹⁹Thinma thin khoko bum heh phuhwên lahma sepwak lahma ngatwah, “Chentô cheilia! Are hahdaangdong rãngma chentô cheilia! Are hahdaangdong khohko chentô jogari cheite hehmin thin jogari pa khoamthuk lahma thin a techhu dâng phumma thinmin ate ngewah bilahma techhu dângwak wah! Phumma atema koanta theko phangtang lâmah phetah!”

²⁰Rangkhethung wah heh ate mahjâ pa kheletma khuhah nâhah dangen! Joban mihnyan heh ngale moattat chhoante erediko mônggeh khuhah nâhah dangen! Chenrãngma ngako atema nenâng chêmsetdi Joban ma atenâng chêmsettah!

²¹Erediko ngintatte chaanmông wathema long dôngmông toanpe lahma josiko phekatwah, atema ngatwah, “Arerãnggrãng Babilon dongthôn hahdaang pa chaanma mahsietmin ngale chenthumin lethe chohkhe tumin.

²²Harp pupemet, mihnyan roat awa, Flut met ngale poakpopo rahmet heh nangnâng chenthumin lethe chohtat tumin! Phin athã lehte mihnyan kaam molahma nangnâng chenthumin lethe chohkhe tumin; ngale chhahthut koan rahlînmin nangnâng chenthumin lethe chohtat tumin!

²³Wentit phiakmin nangnâng chenthumin lethe chohkhe tumin; Nemnyan nyu awaa heh roat akahmin chenthujô lethe chohtat tumin. Nang demnâng



phin athãleh kaammoatte mihnyan heh hahtokkhoh ko adongthôn dângwah, ngale nangma jâdu mõiång moeko pumma hahtokkhoh wah mihnyan nyuchha heh phangtang mokwân eko!”

²⁴Mõiång heh hei ngale Joban mihnyan heh hei pa Babilon nãng chohkhe phumma Babilon pa mahsiet eka; ngale hahtokkhoh wah ahan mihnyan ritpheta heh hei pemin Babilon nãng chohkhe eka.

Loatkhesok 19

¹Erediko Ngama rangkethung nãng jahmõiång mihnyan rak akak rãngrãng tatwah, thinma ngatwah, “Joban nãng rôe! khope, mĩndông ngale chaan ahang heh nãng Joban thiak!

²Atema toangtang ngale khôalemko ren eka! Erediko hahtokkhoh wah mihnyan heh ate demnãng kaamchhih mothuk lahma chhihsiette dihiaknyu komin Joban ma chêmthuk eka. Dihiaknyu pumma Joban haaheh ritphedi Joban ma atenãng chêmthuk eka.”

³Eredikomin thinma rakwah, “Joban nãng rôe! Hahdaang dongthôn jemkham eka wenkhuh pa roantang roangjêng rãng rangkho nãng khuhwên eka!”

⁴Roaknii wabelii khhepho phannang heh erediko ahĩn ngem wanbelii heh Joban mathahko khupjup lahma tãngthin kowah tãngte Joban ko soamwah. Thinma ngatwah, “Amen! Joban nãng rôe!”

Saakchha Nemnyansiet Kuhhôn Phhekchhah

⁵Erediko tãngthin kowah aroh jabkhab hôngloat jabwah, “Joban nãng rôe, ate haa chentô hehma, ngale chentô mihnyan nyuchha hehma, adong arin, anga nga Joban ran cheite hehma Joban nãng rôe!”

⁶Erediko Ngama jahmõiång mihnyan heh jab rãngrãng tatwah, ngale longchhakwah jo jãjen katko rahwah rãngrãng tatwah, ngale rangmok rangphakwah rãngrãng tatwah. Thinma, “Joban nãng rôe! ngama ngawak lahma tatwah. Chenrãngma ngako, Teso nãng Joban Adongthôn pa Lowang! ngama ngawak lahma tatwah.



⁷Nāngkhu khuhah nâhah ngale rinroan bahsa dange; Nāngkhuma ate adongthôanpa rôe! Chenrāngma ngako Saakchha nemnyansiet sanpoat pa lâhûtha, ngale ate rāngma ate nemnyannyu ma atedede khoakhemrii eka.

⁸Nemnyannyu ko atema keprāng khetpo asâ koheka.” (Khetpo ngaeka pa Joban mihnyan heh ma moatlemsen moeka hehnâng ngaeka.)

⁹Erediko ngintatte ma Nganâng ngatwah, “Arepa raango: Henhen pa Saakchha nemnyansiet kuhhôn phhekchhah nget ekako roeeka mihnyan heh rangkepte dângmin.” Ngale eredikomin ngintatte pumma ngatwah, “Are jabkhab heh a Joban ma jabwah toangtang jabkhab.”

¹⁰Ngama atenâng soamtô rāng ate dathongko khupjup wah, rohkomin atema Nganâng ngatwah, “Aroh nekmo! Ngamin nang rāngrāng erediko putedâlemte mihnyan ahan, ngale Jisu ma loatsiet eka hehnâng toangtangko rongtêngtêng danglahma tōngte heh rāngrāng haa jôba. Joban nāngba soamtô o!” Chenrāngma ngako, Jisu ma loatsiet eka toangtang junma Mōng heh Joban ngin phoangthô rāng chaan choh eka.

Mok Khohko Chhangte

¹¹Erediko Ngama rangkhethung pa laang lahma khewênwah, ngale ereko Mok po dāngwah. Mok po khohko chhangte pa Putedâlemsen ngale Toangtang dāngwah; atema toangtangko ren eka ngale toangtangko ranloatmîn eka.

¹²Ate mitpa wentheli rāngrāng dāngwah, ngale atema ate khoko khaphok heh jahmōang phokwah. Ate khohko mînraang lahma dāngwah, rohkomin ere mînraang ekapa henmemin jetmah, atema lolo jetwah.

¹³Atema poh eka khetpa hei lolo dāngwah. Ngale ate mînpa “Joban Jabkhab” ngama dāngwah.

¹⁴Rangkhethung wah sipâhi heh ate diko Mok po ko chhang lahma khetpo asâ heh keplahma junkhoam wah.

¹⁵Ate thunkâ kowah deng nahmōang hōngkatwah, ere deng pumma atema chentô diak akan heh jieneka. Atema thin khohko janke semlahma epên a,



ngale khemkoakthin koannâng angur khihlitwah rãngrãng Adongthôn Joban nyahrãng rinkhah thunko ekhihsiet a.

¹⁶Ate khetko ngale ate da komin raanglahma dângwah: Ere mînpa “Lowang kowah Lowangdong thôn, ngale Teso kowah Teso dongthôn.” Ngama raangwah.

¹⁷Erediko Ngama ngintatte pa san khohko cheplahma khewênwah. Atema rangtung siwa wah phoangpukte wo hehnâng chaanmõang raklahma ngatwah: “Hûren ngale aroamma Joban ma phhekdong chhahdong nget ekako roamphhek chhah e!

¹⁸Hûren Lowang heh ngempa phhek hûren, sipâhi sahhabdong heh ngempa phhek hûren, ngale sipâhi heh, erediko Mok ngale mok khoh kowah chhangte mihnyan, mihnyan nyuchha, haaheh, haa ledangte, erediko adong arin anga nga mihnyan heh ngempa phhek hûren!”

¹⁹Erediko Ngama ngemchhih ngale hahtokkhoh wah lowang heh erediko thin sipâhi heh Mok khoh kowah chhangte ngale ate sipâhi heh demnâng loatmîn râng khôn lahma khewah.

²⁰Ngemchhih pa phâtek nâng loatkhek wah, ngale ate demko ate mathah kowah patritli moatlem moatte mõngmõang hehmin phâtek nâng johloatkhek wah. (Ere patritli moatlem moeka pumma Ngemchhih namboat tûngte ngale ngemchhih moang nâng soamte mihnyan heh diapchhahwah.) Ngemchhih ngale mõngmõang heh wanniiini ahînma Salfar demnâng kham eka wenko phekatwah.

²¹Thin sipâhi heh Mokkhoh kowah chhangte thunka kowah loatka era deng pumma ritdoakwah; ngale chentô wo hehema chentô taphhek eka eretô thinmang heh phhekwah.

Loatkhesok 20

Hahjatthe Rangpâ



¹Erediko Ngama rangkethung wah ngintatte ate dekho chenthumin leta thôanthin hahkenlu ko katthin sâbi ngale janru dong semlahma kalahma khewah.

²Atema dragon pûchhih, rangbeng habbeng thuwah pû - erepa, juchhih nâng ngaeka, ba Joak ajo heh hahjatthe rangpâ rãng janruma khhekthien eka.

³Ngintatte pumma chenthujô leta thôanthin hahkenlu ko phekat lahma kêsek pumma tangsek lahma têngmiem wah, erohkoba hahjatthe rangpâ malien lienko atema hen diak akanjô leta diapchhah edanga. Erediko atema amânychha rãng elaangphea.

⁴Erediko Ngama têngthin heh khewah, ngale têngthinko têngte mihnyan hehnâng arên rãng chaan kohwah. Eredikomin Jisu ma loatsiettah toangtang ngin phoangthôte mihnyan ngale Joban jabkhab phoangthôte mihnyan ritphetah Ju hehmin khetek. Thinma ngemchhih ngale ate moang hehnâng soamtô mah, ngale thinma thin kheng nâng ngale dek hehnâng ngemchhih nemboat hehmin tungmah. Thin ngakhin lahma Krista demnâng Lowang rãng rãng danglahma hahjatthe rangpâ pên eka.

⁵(Ahan riichoante mihnyan heh ere hahjatthe rangpâ pa malienlien kako ngakhin mah.) Arepa aritwah khebeng ngakhîn wângpa.

⁶Khuhah nâhah ngale ajahthem rangkepte mihnyan heh are khebeng ngakhînko johngakhînte mihnyan heh dângmin. Ere mihnyan heh ditnii lethe ngakrii tumin; thin a Joban ngale Krista rãngma soam aroakte edanga, ngale thinma ate demnâng hahjatthe rangpâ ejohpên a.

Joak jienrit

⁷Hahjatthe rangpâ pa liendiko, joakpa phâtek khenwah laangphe eka,

⁸ngale atema phoangchhoan lahma hahtokkhoh wah phoangphan chhoan eka diak akan heh ephoang diapphhek chhah a, erepa Gog ngale Magog ngama ngaeka pa. Joak ma jophawah sekeh jahtô phangtang ranloatmîn rãng ekhôngsiet a.



⁹Thin hah phangtang nâng menchhoan lahma Joban mihnyan heh nok ahah, ngale Joban ma huneka hahdaang heh ekoamwak a. Rohkomin rangkhethung wah wen jâka lahma thin jemkham wakeka.

¹⁰Thin diapchhahte juchhih pa ngemchhih ngale mōngmōang heh phekat tah wen ngale salfar ko phekat eka; ngale ereko roantang roangjêng rãng rangwo rangnyek echêmriia.

Athôan Ren

¹¹Erediko Ngama tōngthin po dōngmōang ngale ere tōngthinko tōngtepa khewah. Hahkho ngale rangkhopa ate tâkawah huhchhoan lahma lechoh khetu mahchhoan wah.

¹²Ngale Ngama riichoante heh adong arin khoakthema phangtang tōngthin mathahko cheplahma khewah. Eko titab heh lakwah, ngale erediko titab ahan hehmin lakwah, ahîn titab pa lakwah. Riichoante mihnyan heh thinma chenroh molahma titab nâng raangthientah a erejunko rênwah.

¹³Erediko Josi hehmemin thinwah aritte mihnyan heh kohwah. Arit ngale rit amah hehmemin thinma thientah aritte mihnyan heh kohwah. Ngale chentôpa henma chenroh motah a erejunko rênwah.

¹⁴Erediko arit ngale rit amah heh wennâng phekatwah. (Are wenpa depnii thêrit pa.)

¹⁵Henhen mînpa ahîn titab nâng leraangthien dangeka ere mihnyan heh wennâng phekatwah.

Loatkhesok 21

Rangkhethung Nyan le Hahtokkhoh Nyan

¹Erediko Ngama rangkhethung nyan le hahtokkhoh nyan pa khewah. Khebeng wah rangkhethung le khebwah hahtokkhoh nii amahjâ rewah, ngale josi hehmin amahjâ rewah.

²Ngale Ngama Asâthôan Hahdaang pemin khewah, erepa nemnyannyu pa ate tangwa demnâng chohmîn rãng rãngsôa arãngrãng sôa lahma Jeroselem nyan pa rangkhethung wah Joban tâwah jâka lahma khewah.



³Ngama tângthin kowah chaanmõang rakjab katlahma tatwah: “Ade phumma Joban humkâ pa mihnyan heh demnâng lâdangtah! Atea thin demnâng ejohsonga, ngale thinmin Joban mihnyan edanga. Joban atedede min thin demnâng ejohdanga, ngale atea thin Joban edanga.

⁴Joban ma thinmit kowah mitphi heh ehunphekoh a. Ereko aritmin lerii tumin, sep ajoang, ngale chet akhup min ahotu dângmin. Apã heh lâmah jâtah.”

⁵Erediko tângthin kowah tângte pumma ngatwah, “Ngale ade phumma Ngama chentôpa anyan rãng lâhôantek!” Atema Nganângmin ngatwah, “Arepa raango, chenrãngma ngako are jabkhab pa toangtang ngale dâlemlî thôn jabkhab.”

⁶Ngale atema ngatwah, “Arepa lâta dangtah! Nga a khekthôn, ngale khedithôn, abengthôn ngale athônpa. Henhen jolan riiken a, ereheh nâng Ngama thâhoma roandông chohthin jo ejokthuk ang.

⁷Henhenma tajien eka erehehma arepa Nga ngewah chohmin: Nga a thin Joban edangang, ngale thinmin Ngachhu Ngachha edangwak a.

⁸Rohkomin chephoat, mihchen sengte, kaamchhih moatte, mihritphete, dihiak dela kaamchhih moatte, jâdu hôante, moang nâng soam atôte, ngale chentô mothô khoanglep heh - thin tângthin thepa salfar demnâng wendô ekako tângmin, erepa thinrãng depnii rãng ngakrit pa dângmin.”

Jeroselem Nyan

⁹Wanengit ngintatte hehma wanengit titko athôn wah khoanchet heh chongchong sênte hehwah Ngatânâng wathe kalahma ngatwah, “Wãngro, Ngama nangnâng Sakchha tangnyu nemnyannyu pa khesok e.”

¹⁰Jupa Nga demnâng danglahma ngintatte pumma Nga a nyahrãng hahkong choangthôn khonâng sietwênwah. Atema Nganâng Asâthôn Hahdaang Jeroselem pa rangkethung wah Joban tâwah jâka lahma khesokwah



¹¹Ngale Joban phiak pumma phiakjâ lahma dângwah. Ere hahdaang pa thãchaan jat long, jasper rãngrãng phiak lahma dângwah, erediko sîsa khenwah jokhîn rãngrãng dângwah.

¹²Ere hahdaangko pan dôngmõang ngale chôangmõang dângwah, erediko pankâsek echhi wannii dângwah, ngale ere echhi wannii pa ngintatte echhi wani ma bemlahma dângwah. Pankâsek hehnâng Isrial mihnyan hehwah echhi jatnii mînpa raanglahma dângwah.

¹³Chentô ngeko pankâsek wanremru dângwah: sankat ngenâng wanrem, jome ngenâng wanrem, jokuh ngenâng wanrem, ngale sannyup ngenâng wanrem dângwah.

¹⁴Hahdaang panpa echhi wannii longphang khohnâng hânwah, ereheh khohko Saakchha moattat chhoante echhi wani hehmîn raanglahma dângwah.

¹⁵Nga demnâng jabmînte ngintatte ngeko hahdaang, ngale pankâsek heh erediko pan heh thakrãng kemwah hânwah athakthin ke dângwah.

¹⁶Hahdaang pa jêng akha tumlit nyahrãng tôde dângwah. Ngintatte pumma ere hahdaang pa ate ngewah athakthin ke pumma thakwah: ere hahdaang pa ajêngrâng hahjatthe châbangâ meejêng dângwah, ngale akha erediko achông pemin ajêng tôjô mânthe dângwah.

¹⁷Ngintatte pumma pan pemin thakwah, ngale erepa 216 fut achông dângwah, atema thak junko eretô dângwah.

¹⁸Panpa jasper longwah hânwah, ngale hahdaangpa alinlin kemwah sîsa rãngrãng khînri hânwah.

¹⁹Hahdaang pan hângrâng thieneka long heh rongrup thãchaanjat long hehma raangapaang lahma dângwah. Khebengthôn longpa jasper ma hânwah, eredikowah pa Safira ma hânwah, eredikowah pa agate longma hânwah, eredikowah pa Imerald longhinjat dângwah,



²⁰ngale onix, Karnelian, amien jat quart, beril, topaz, Kalsidoni, turkoise, ngale athôan kowah pa amithist ma hôanwah.

²¹Pankâsek echhi wannipa litpha echhi phanii heh; chentô pankâsek heh litpha pharu ma hôanwah. Hahdaang kowah lemheh alinlin kemma hôanwah, ngale sîsa rãngrãng alienkhe dângwah.

²²Ngama ere hahdaangko rangsoamhum kheho, chenrãngma ngako, erekowah rangsoamhum pa Teso Joban Adongthôan ngale Saakchha jôba rangsoamhum rãng dangeka.

²³Ere hahdaangko phiakrãng san ngale dâmin lemmah, chenrãngma ngako, Joban phiak pumma ere hahdaangko phiak eka, ngale Saakchhapa wentit rãngrãng dangeka.

²⁴Hahtokkhoh wah mihnyan heh ere phiakko ekhoamwak a, hahtokkhoh wah lowang heh ma thin ngun akem heh ere hahdaangko ekep hûa.

²⁵Ere hahdaang kowah pankâsek heh rangwo roakweih laanglaangjû edanga; ereheh chenthumin lesekin, chenrãngma ngako, ere hahdaangko rangnyek aho dângmin.

²⁶Chentô diak akan hehwah dongaleng ngale ngun akem techhu heh ere hahdaangko kephokmin.

²⁷Roh-komin ere hahdaangko ngek atek chenjô leta hûmin, ba rêseli kaamchhih moatte ngale mothô khoanglep thôte hehmin leta hûmin. Henhen mînpa Saakchha ngewah ahîn titabko raangeka ere mihnyan heh loloba ere hahdaangko tâhokmin.

Loatkhesok 22

¹Ngintatte pumma Nganâng roandông jokhôpa sîsa khenwah rãngrãng khînriiri Joban ngale Saakchha tângthin kowah hongjenka lahma khesokwah

²ngale hahdaang mongtang kowah lempumma jênkatwah. Ngale ere jokhô akêruko roandông chohbãng dângwah, ngale ere bãngko rangpâ pãtheko echhi depnii ari riilahma dângwah, dâjeng theko ditthe riawah; ngale ere



bãngdek heh chentô diak akan wah mihnyan heh khoanchet heh mesietthin dângwah.

³Ere hahdaang khenko Joban ma tem athoak eka heh chenjô lechoh khemin. Joban ngale Saakchha tôngthin pa ere hahdaangko etonga, ngale ate haa hehma atenâng esoam etôa.

⁴Thinma ate thenphãng pa echokkhe wak a, ngale ate mînpa thinkhengko eraanga.

⁵Ere hahdaangko rangnyekmin ahotu dângmin, ngale thinma wentit ba sanphiakmin lelemtumin, chenrãngma ngako, Teso Joban pa thin wenphiak edanga, ngale thinma lowang heh rãngrãng roantang roangjêng rãng epên a.

Jisu ngakkat

⁶Erediko ngintatte pumma Nganâng ngatwah, “Are jabkhab heh toantang ngale dâlemlî. Ngale Mông hehnâng ate Ju kohte Teso Joban ma, ate ngintatte pa ate haa hehnâng sitsiak chenni dângwângmin a ereheh khesokrãng chienkatwah.”

⁷“Tattan en!” Jisu ma ngaeka, “Nga sitsiak lâkaerâng! Henhenma are titab kowah môngheh ngin kepeka mihnyan heh rangkepte mihnyan dângmin!”

⁸Nga a Jon, Ngama areheh tettek ngale khetek. Ngale chenthu Ngama areheh râtat râkhe diko, Nganâng areheh khesokte ngintatte dathongko atenâng soam rãng khupjup wah.

⁹Rohkomin ngintatte pumma Nganâng ngatwah, “Aroh nekmo! Ngamin nang rãngrãng erediko nangpho anaa, ngale môngheh, erediko are titab kowah jabkhab heh nginkepkep dângte heh rãngrãng haa jôba. Joban nângba soamtô!”

¹⁰Ngale atema Nganâng ngatwah, “Are titab kowah môngheh jabkhab pa nek huh thien, chenrãngma ngako, are chentôpa linlin dângwâng rãng sanpoat pa lânâm hûtha.

¹¹Henhen pa achhih a erehehma kaamchhih moatjûjû emowak a, ngale henhen pa ngek atek a erehehmin ngek atekjû dângmin; ngale henhen pa



asen a ereheh ma kaamsenjû moatmin, erediko henhen pa Asâthôn a erehehmin Asâthônjû dângmin.”

¹²“Tattan en!” Jisu ma ngaeka. “Nga sitsiak lâkaerâng! atema chenni motah a erejunko kohrâng thã demnâng ekarâng.

¹³Nga a khekthôn ngale khedithôn, abengthôn ngale athônpa.”

¹⁴Henhenma thinkhet pa sâset eka ereheh ma rang ekep a, ngale thinma roandông chohthin bãngkawah penri eta chohchhah a, ngale pankâsek pumma hahdaangko eta nyupwãng wak a.

¹⁵Rohkomin hahdaang khenko ledangte heh kaamchhih moatte ngale jâdu hôante mihnyan heh, dihiak dela kaamchhih moatte, mihritphete, moangachaang nâng soam atôte, ngale jab ajâ erediko moatlem nâng mothô khoanglep dângte heh hahdaang kawah panlien nâng etonga.

¹⁶“Nga a Jisu, Ngama Nga ngintatte pa nang tânâng nangma Asâthem hehnâng erengin heh loatthôkoh rãng chienkat erâng. Nga a Devit humkâwah; Nga a rangkhahwah nyahrâng phiakte meritpa.”

¹⁷Ju ngale Nemnyan pumma ngaeka, “Karoo!” Henhenma arepa tateka ereheh memin “Karoo!” ngama chennga a. Huren, henhen jolân rittea; henhenma hun eken a ereheh ma roandông jopa hinhô rãnggrâng kepen.

Athôn

¹⁸Nga a Jon, henhenma are titab kawah môngngin heh tat eken a ereheh nâng thôkoh eka: arekawah raangeka leko henma komin mele bâmraang ako, are titab kawah raangeka khoanchet chhih heh thinnâng kohlahma echêmthuk a.

¹⁹Ngale henma komin are titab kawah môngngin kawah merephe ako, are titab kawah raangeka Asâthôn Hahdaang kawah thinma chohchhahthin roandông penri kawah lechohchhah thukma Joban ma erephewak a.

²⁰Anga nganâng are ngin thôkohte pumma ngaeka, “Linlin! Nga sitsiak lâkaerâng!” Amen. Karoo Teso Jisu!



²¹Teso Jisu mînchenciaan pa anga ngademnâng chendanghèn.



Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira
2022, Vitória/ES - Brasil